

# Holy Bible

*Aionian* Edition®

भटियाली नोआ नियम  
**Bhattiyali Bible**

AionianBible.org  
The world's first Holy Bible untranslation  
100% free to copy and print  
also known as “ The Purple Bible ”

*Holy Bible Aionian Edition* ©

भट्टियाली नोआ नियम  
Bhattiyali Bible

CC Attribution ShareAlike 4.0, 2018-2024

Source text: eBible.org

Source version: 2/21/2024

Source copyright: CC Attribution ShareAlike 4.0  
The Love Fellowship, 2022

Formatted by Speedata Publisher 4.19.2 (Pro) on 5/11/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language  
Report content and format concerns to Nainoia Inc  
Volunteer help is welcome and appreciated!

*Celebrate Jesus Christ's victory of grace!*



# Preface

भटियाली at [AionianBible.org/Preface](http://AionianBible.org/Preface)

The *Holy Bible Aionian Edition* © is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at [eBible.org](http://eBible.org), [Crosswire.org](http://Crosswire.org), [unbound.Biola.edu](http://unbound.Biola.edu), [Bible4u.net](http://Bible4u.net), and [NHEB.net](http://NHEB.net). The Aionian Bible is copyrighted with [creativecommons.org/licenses/by-nd/4.0](http://creativecommons.org/licenses/by-nd/4.0), allowing 100% freedom to copy and print, if respecting source copyrights. Check the Reader's Guide and read online at [AionianBible.org](http://AionianBible.org), with Android, and TOR network. Why purple? King Jesus' Word is royal... and purple is the color of royalty!



# Table of Contents

## NEW TESTAMENT

मती .....	11
मरकुस .....	29
लूका .....	42
यूहन्ना .....	61
प्रेरितां दे कम्म .....	76
रोमियो .....	96
1 कुरिन्थियो .....	105
2 कुरिन्थियो .....	115
गलातियो .....	121
इफिसियो .....	125
फिलिप्पियो .....	128
कुलुस्सियो .....	130
1 थिस्सलुनीकियो .....	132
2 थिस्सलुनीकियो .....	134
1 तीमुथियुस .....	136
2 तीमुथियुस .....	139
तीतुस .....	141
फिलेमोन .....	143
इब्रानिया .....	144
याकूब .....	151
1 पतरस .....	154
2 पतरस .....	157
1 यूहन्ना .....	159
2 यूहन्ना .....	162
3 यूहन्ना .....	163
यहूदा .....	164
प्रकाशितवाक्य .....	165

## APPENDIX

Reader's Guide

Glossary

Maps

Destiny

Illustrations, Doré





# NEW TESTAMENT



तालू यीशुऐ बोलया, “हे पिता, इना जो माफ कर, क्योकि ऐ जाणदे नी न की ऐ क्या करा दे न?”  
कने उना पर्चियां पाई करी उदे कपडे बंडी ले।  
लुका 23:34

# मत्ती

**1** ऐ यीशु मसीह दे पूर्वजां दे ना दी सूची है, सै राजा दाऊद दा बंशज था, जडा अब्राहम दा बंशज था। 2 अब्राहम ला इसहाक पैदा होया, इसहाक ला याकूब पैदा होया, कने याकूब ला यहूदा कने उदे भाई पैदा होये। 3 यहूदा कने तामार ला पेरस कने जेरह पैदा होया, कने पेरस ला हिस्त्रोन पैदा होया, कने हिस्त्रोने ला एराम पैदा होया। 4 एराम ला अम्मीनादाब पैदा होया, कने अम्मीनादाब ला नहशोन, कने नहशोन ला सलमोन पैदा होया। 5 सलमोन कने राहब ला बोअज पैदा होया, कने बोअज कने स्त ला ओबेद पैदा होया, कने ओबेद ला यिश्शै पैदा होया। 6 कने यिश्शै ला दाऊद राजा पैदा होया। कने दाऊदे ला सुलैमान, सै उसा जनानिया ला पैदा होया जडी पेहले ऊरिय्याह दी घरे बाली थी। 7 सुलैमान ला रहबाम पैदा होया, कने रहबाम ला अबिय्याह पैदा होया, कने अबिय्याह ला आसा पैदा होया। 8 आसा ला यहोशाफात पैदा होया, कने यहोशाफात ला योराम पैदा होया, कने योराम ला उज्जियाह पैदा होया। 9 उज्जियाह ला योताम पैदा होया, योताम ला आहाज पैदा होया, कने आहाज ला हिजकिय्याह पैदा होया। 10 हिजकिय्याह ला मनश्शे पैदा होया, मनश्शे ला आमोन पैदा होया, कने आमोने ला योशिय्याह पैदा होया। 11 योशिय्याह ला यकून्याह, कने उदे भाई पैदा होये। यकून्याह कने उदे भाई इझाएलियां जो कैदी बणाई करी बाबेल देशे जो लेई जाणे ला पेहले पैदा होये। 12 कैदी होईकरी बाबेल पुजाणे बाद यकून्याह ला शालतियेल पैदा होया, कने शालतियेल ला जर्म्बाबेल पैदा होया। 13 जर्म्बाबेल ला अबीहूद पैदा होया, अबीहूद ला एलयाकीम पैदा होया, एलयाकीम ला अजोर पैदा होया। 14 अजोर ला सादोक पैदा होया, सादोके ला अखीम पैदा होया, कने अखीम ला एलीहूद पैदा होया। 15 एलीहूद ला एलीआजार पैदा होया, एलीआजार ला मतान पैदा होया, कने मताने ला याकूब पैदा होया। 16 याकूब ला यूसुफ पैदा होया, जडा मरियमा दा घरेबाला था, कने मरियम ला यीशु पैदा होया जिसयो मसीह बोलदे ना। 17 अब्राहम ला लेईकरी दाऊदे दीकर सारियां चौदा पीढियां होईयां, राजा दाऊदे ला बेबीलोन जो कैदी बणाई करी पुजाणे दीकर चौदा पीढियां होईयां। 18 यीशु मसीह दा जन्म होणे ला पेहले इयां होया, कि जालू उदी माता मरियम दी मंगणी यूसुफे सोगी होई गेई, तां उना दा बियाह होणे ला पेहले ही सै पबित्र आत्मा दिया शक्तिया ला गर्भवती होई गेई। 19 उना दा होणेबाला घरेबाला यूसुफ बडा ही धर्मी था, कने उसा जो बदनाम नी करपा चांदा था, इस तांई उनी उसा जो डोल करी छडी देणे दे बारे च मने च सोचया। 20 जालू सै इना गल्लां दे बारे च सोचा दा था, तालू प्रभु दे स्वर्गदूते उदे सुपने च आई करी बोलया, “हे यूसुफ! राजा दाऊदे दे बंशज, तू मरियम जो अपणी घरे बाली बणाणे ला मत डर क्योंकि जडा उसा दे पेते च है, सै पबित्र आत्मा दिया शक्तिया ने है। 21 कने उना इक जागत जमणा है, कने तू उदा ना यीशु रखयां, क्योंकि उनी अपने लोकां जो उना दे पापां ला छुटकारा देणा है।” 22 ऐ सारा कुछ इस तांई होया कि जडा बचन परमेस्वरे दा संदेश देणेबाले यशायाह बोलया था, सै पूरा होऐ, 23 “दिख, इकी कुआरिया गर्भवती होणा कने उना इक जागत जमणा है, कने उदा ना इमानुएल रखणा है,” जिसदा मतलब ऐ है, की परमेस्वर साडे सोगी है। 24 तालू यूसुफ निद्रा ला उठया, कने जियां स्वर्गदूते उसयो बोलया था, उनी मरियम ने बियाह किता, कने उसा जो अपने घरे लेई आया। 25 जालू दीकर उना पुत्र नी जमया तालू दीकर उनी उसा ने कोई वैवाहिक संबंध नी रखया: कने यूसुफे उदा ना यीशु रखया।

**2** जालू राजा हेरोदेस यहूदिया प्रदेश च शासन करा दा था, तालू यीशु दा जन्म उस प्रदेश दे बैतलहम शहरे च होया। तालू तारयां दा ज्ञान रखणेबाले केई ज्योतिषी पूर्व दिशा ला यरूशलेम शहरे च आई करी पृछणा लागे, 2 “कि सै बच्चा कुथु है? जडा यहूदियां दा राजा बणने तांई पैदा होया है। क्योंकि असां पूर्व दिशा च उदे जन्म दे बारे च दसणे बाला तारा दिखया है, कने उसयो नमस्ते करणा आयो ना।” 3 हेरोदेस राजा यहूदियां दे राजे दे जन्म दे बारे च सुणीकरी डरी गया। कने मते सारे यरूशलेम शहर दे बासी भी डरी गे। 4 कने तालू उनी लोकां दे सारे बड़े याजकां कने व्यवस्था जो सिखाणे बालयां जो सदया कने उना ला पुछया, कि मसीह दा जन्म कुथु होणा है? 5 उना राजा हेरोदेस जो बोलया, कि मसीह दा जन्म

यहूदिया प्रदेश दे बैतलहम शहरे च होणा है। क्योंकि परमेस्वरे दा संदेश देणेबालयां इया ही लिखया है: 6 “हे यहूदिया प्रदेश दे बैतलहम शहरे दे लोको, तू कुसी भी तरीके ला यहूदा दे अधिकारियां च सबते छोटा नी है; क्योंकि तिजो च इक माणु निकलना है, जिनी मेरी प्रजा इझाएले दी रखवाली करणी है।” 7 तालू राजा हेरोदेसे ज्योतिषियां जो डोल करी सदीकरी उना ला पुछया, कि तारा कुस बेले दिखया था, क्योंकि राजा उस बच्चे दी उम्र जाणना चांदा था। 8 कने उनी उना जो ऐ बोली करी बैतलहम शहर च भेजया, “जा” कने उस बच्चे दे बारे च ठीक ढंगे ने पता करा, कने जालू सै मिली जांगा तां मिजो खबर भेजनयो ताकि मै भी उसयो नमस्ते करे। 9 सै राजे दी गल्ल सुणीकरी चली गे, कने जडा तारा उना पूर्व दिशा च दिखया था, सै तारा उना दे अग्गे-अग्गे चलया, कने उस घरे उपर स्की गया, जिथु सै बच्चा था। 10 कने सै उस तारे जो दिखीकरी बडे खुश होये। 11 कने उस घरे जाई करी उस बच्चे जो कने उदिया माता मरियम जो सोगी दिखया, कने झुकी करी बच्चे जो नमस्ते किता, कने अपना-अपणा थैला खोली करी उसयो सोना, कने लोबान, कने गंधरस दी भेंट चढाई। 12 कने उना जो सुपने च परमेस्वरे ला चेतावनी मिल्ली कि राजा हेरोदेस बाल मुडई करी मत जांदि, कने ज्योतिषियां हेरोदेस जो खबर नी दिती कने होर रस्ते ला होईकरी अपने देशे जो चली गे। 13 उना दे जाणे बाद दिखा, प्रभु दे इकी स्वर्गदूते यूसुफे दे सुपने च आई करी बोलया, “उठ! कने उस बच्चे जो कने उदिया माता जो लेईकरी मिस्र देशे जो चली जा; कने जालू दीकर मै तिजो नी बोलगा तालू दीकर ओथु ही रियां, क्योंकि राजा हेरोदेस इस बच्चे जो तोपा दा है, ताकि उसयो मारी दे।” 14 कने सै तालू ही राती उठी करी बच्चे जो कने उदिया माता जो लेईकरी मिस्र देशे जो चली गया। 15 कने राजा हेरोदेस दे मरणे दीकर सै ओथु ही रिया। इस तांई कि सै बचन पूरा हो जडा परमेस्वरे दा संदेश देणेबाले होशे बडा पहले बोलया था: “कि मै अपने पुत्रे जो मिस्र देशे ला सदया।” 16 जालू हेरोदेस जो पता लगगा कि ज्योतिषियां मिजो धोखा दिता है। तालू उसयो बडा गुस्सा आया, कने उनी सिपाईयां जो भेजी करी ज्योतिषियां दे ठीक-ठीक दसयो बकते दे मुताबिक बैतलहम शहरे च कने उस दे अखे-बखे दे सारे बच्चां जो जडे दो सालां दे या उसला भी लोके थे, सै सारे मारवाई दिते। 17 तालू जडा बचन परमेस्वरे दा संदेश देणेबाले यिर्मयाह दे जरिये बोलया गया था, सै पूरा होई गया 18 “रमाह शहर च लोकां जो कुसकी दी बडे जारे ला रोणे दी अबाज सुणोया दी थी, राहेल अपने बचयां तांई रोआ दी थी; कने चुप नी होणा चांहदी थी, क्योंकि सै हुन मरी गियो थे।” 19 यूसुफ मरियम कने बच्चा यीशु हल्ले दीकर मिस्र देशे च ही थे। राजा हेरोदेस दे मरणे बाद तां प्रभु दे स्वर्गदूते यूसुफे दे सुपने च आई करी बोलया, 20 “उठ, कने बच्चे कने उदिया माता मरियम जो लेईकरी इझाएल देशे जो चली जा, क्योंकि राजा हेरोदेस कने सै लोके जडे बच्चे जो मारणा चांदा थे, सै सब मरी गियो ना।” 21 सै उठया, कने बच्चे कने उदिया माता जो लेईकरी मिस्र देशे ला इझाएल देशे जो बापिस आई गया। 22 पर जालू यूसुफे ऐ सुणया कि अरखिलाउस अपने पिता राजा हेरोदेस दिया जाण पर यहूदिया प्रदेश च राज करे दा है, तां सै ओथु जाणे ला डरया, कने उसयो परमेस्वरे सुपने च चेतावनी दिती, कने सै गलील प्रदेशे जो चली गया। 23 कने यूसुफ नासरत नापे दे इक गांऐ च जाई बसया, ताकि सै बचन पूरा हो, जडा परमेस्वरे दा संदेश देणेबालयां यीशु दे बारे च बोलया था: “कि यीशु मसीह जडा नासरत ला है कने इसी नापे ने जाणया जाणा।”

**3** उना दिना च यहूना बपतिस्मा देणेबाला यहूदिया प्रदेश दी इक सुनसान जगा च आई करी ये प्रचार करदा था कि: 2 अपने पापां जो मनी लिया कने गलत कम्मा जो छडी दिया, क्योंकि स्वर्ग दा राज्य नेडे ओआ दा है। 3 ऐ सै ही है, जिदी चर्चा परमेस्वरे दा संदेश देणेबाले यशायाह किती थी, “सुनसान जगा ला इक हक्का पाणे बाले दी अबाज सुणा दी है, परमेस्वरे ओणे तांई, अपने आपे जो तैयार करा, कने अपने मने दी सोच समझा जो खरा रखा, उनी ओणा है।” 4 यहूना ऊंटे दे बालां दे बणयो कपडे पांदा था, कने अपने लके च चमडे दा पटा बनदा था, कने टिट्टे कने मखिर खांदा था। 5 तालू यरूशलेम शहरे दे कने सारे यहूदिया प्रदेशे दे, कने यरदन खड्डा दे अखे-बखे दे सारे इलाके दे लोक उदे बाल आये। 6 कने उना लोकां अपने पापां जो मनया, कने यहूना उना सारयां जो

यरदन खड़ा च बपतिस्मा दिता। 7 कने जालू उनी मते फरीसियां कने सद्कियां जो बपतिस्मा लेणे तांई अपने बाल ओदा दिखया, तां उनी उना जो बोलया, तुसां लोक जहरीले सांपा सांई बुरे न, तुहाडा ऐ सोचणा गलत है, कि सिर्फ तुसां बपतिस्मा लेणे ने अपने पापां दी सजा ला बची जाणा जडी परमेश्वरे तुसां जो देणी है। 8 इस तांई अपने पापां जो मन्नी करी बुरे कम्मा जो छडी करी अपने पञ्चाताप जो साबित करा। 9 कने अपने-अपणे मना च ऐ मत सोचा, कि साडा पिता अब्राहम है; क्योंकि मैं तुहांजो बोला दा है, कि परमेश्वर इना पथरां ला भी अब्राहमे तांई ओलाद पैदा करी सकदा है। 10 कने हुण कुहाडी सजा दिया जडा च रखियो है, इस तांई की जडा-जडा सख खरा फल नी दिगा, सै बड्डी करी अग्गी च फूकी देणा है। 11 “तुसां पापां दा पञ्चाताप करिके मन बदला, इस तांई मैं तुहांजो पाणियो ने बपतिस्मा दिन्दा है, पर जडा मेरे बाद ओणे बाला है, सै मिंजो ला भी शक्तिशाली है; मैं तां उदे जुते चुकणे जोगा भी नी है, उनी तुहांजो पबित्र आत्मा कने अग्गी ने बपतिस्मा देणा है। 12 उदा सूप उदे हथे च है, कने उनी अपणी कणक गाणे बाली जगा ढंगे ने साफ करणी, कने कणक पेडुआं च गटेरी रखणी, पर भूरे जो उसा अग्गी च फुकणा जडी कदी बुझदी ही नी।” 13 उस बेले यीशु गलील प्रदेशे दिया यरदन खड़ा कंडे पर यहून्ना बाल उसला बपतिस्मा लेणे तांई आया। 14 पर यहून्ना उसयो ऐ बोली करी रोकणा लग्गा, कि मिंजो तां तेरे हथे ला बपतिस्मा लेणे दी जरूरत है, कने तू मेरे बाल आया है? 15 यीशुऐ उसयो ऐ जबाब दिता, “हुण तां इयां ही होणा दे, क्योंकि सांजो इस तरीके ने सै सब कुछ करणा चाईदा जडा परमेश्वर चांदा है।” तां यहून्ना उदी गल्ल मनी लेई। 16 कने यीशु बपतिस्मा लेईकरी झट पाणिए ला बाहर आया, कने दिखया, उदे तांई अम्बर खुली गिया, कने उनी परमेश्वरे दिया आत्मा जो कबूतरे सांई उतरदे कने अपने उपर ओंढे दिखया। 17 कने दिखा, स्वर्ग ला ऐ अबाज सुणोई की, “ऐ मेरा प्यारा पुत्र है, कने तिजो ला मैं खुश है।”

**4** तालू पबित्र आत्मा यीशुऐ जो सुनसान जगा च लेई गेई ताकि शैतान उसयो लालच देई सके। 2 यीशु चाली दिन, कने चाली रात, बिना कुछ खादयो ओथू रिया, कने जालू उसयो भूख लग्गी। 3 तालू शैताने उदे बखे आई करी उसयो बोलया, “अगर तू परमेश्वरे दा पुत्र है, तां बोल, कि ऐ पथर रोटियां बणी जान, ताकि तू इना जो खाई सके।” 4 यीशुऐ जबाब दिता, “कि पबित्र शास्त्र च लिखया है, कि माणू सिर्फ रोटियां ला ही नी, पर परमेश्वरे दे बोलयो बचना जो मन्नी करी जिन्दा रेंदा है।” 5 तालू शैतान यीशुऐ जो पबित्र यस्शलेम शहर च लेई गिया कने परमेश्वरे दे मंढे दिया चूडिया पर खरेडी दिता। 6 कने उसयो बोलया, पर तू परमेश्वरे दा पुत्र है, तां ऐथू ला छाल मारी करी दस कने तिजो कुथी भी चोट नी लग्गी है; क्योंकि पबित्र शास्त्र च लिखया है, कि उनी स्वर्गदाता जो हुकम देणा; कने उना तिजो हथो हथ सभाली लेणा है; कुथी इयां ना होए कि तेरे पैरां च पथरे ला चोट लग्गी जा। 7 यीशुऐ उसयो बोलया, “कि पबित्र शास्त्र च ऐ भी लिखया है, कि लोकां जो अपने प्रभु परमेश्वरे जो नी परखणा चाईदा।” 8 फिरी शैतान उसयो इक बडे उच्चे पहाडे पर लेई गिया, कने सारे संसारे दे राज्य कने उना दी धन दौलत दस्सी करी, 9 उनी बोलया, कि अगर तू मेरे पैरां पेईकरी मिंजो नमस्ते करगा, तां मैं ऐ सब कुछ तिजो देई दिगा। 10 तालू यीशुऐ उसयो बोलया, शैतान दूर होई जा, क्योंकि पबित्र शास्त्र च लिखया है: “तू सिर्फ अपने प्रभु परमेश्वरे जो नमस्ते कने सिर्फ उदी ही भक्ति कर।” 11 तालू शैतान उदे बखे ला चली गिया, कने स्वर्गदाता आई करी यीशुऐ दी सेवा करणा लग्गे। 12 जालू उनी ऐ सुणया कि यहून्ना जो पकडी करी जेला च बन्द करी लिया है, तां सै यहूदिया दे प्रदेशे जो छडी करी गलील प्रदेशे जो चली गिया। 13 कने सै नासरते जो छडी करी कफरनहम शहरे च जडा गलील झिला दे कंडे था, जिथु जबलून कने नमाली दे गोत्र रेंदे थे, ओथू जाई करी रेणा लग्गा। 14 ताकि जडा परमेश्वरे दा संदेश देणेबाले यशायाह बोलया था, सै पूरा हो। 15 “तुसां लोक जडे जबलून कने नमाली गोत्र दे इलाके च रेंदे न, ऐ इलाके उस रस्ते पर न जडे गलील दरियाये दे बखे कने यरदन खड़ा दे पूर्वी कंडे पर है, ऐ गलील प्रदेशे दे ऐसे इलाके न जिथु होर जातियां दे लोक रेंदे न।” 16 परमेश्वरे जो जाणयो बिना नेहरे च रेणेबाले लोकां इक बडी ज्योति दिखणी; इना ज्योतिया उना लोकां जो मुक्ति दा रस्ता दसणा, जडे परमेश्वरे जो जाणयो बिना जिन्दगी जिं दे कने हमेशा दिया मौता दे

रस्ते पर चलयो न। 17 उस बेले ला यीशुऐ प्रचार करणा कने ऐ बोलणा शुरू किता, “कि मन बदला क्योंकि स्वर्गं दा राज्य बखे आई रिया है।” 18 इक दिन जालू यीशु गलील झिला दे बखे-बखे चलया था, तां दो मखबारे भाईयां जो झिला च जाल पांढे दिखया, उना च इक शमौन था जिसयो पतरस बोलदे न कने उदा भाई अन्दियास था। 19 यीशुऐ उना जो बोलया, “ओआ कने मेरे चेले बणा; मैं तुहांजो सिखांगा कि लोकां जो मेरे बाल कियां लोणा कने कियां मेरे चेले बणणा है।” 20 उना झट जाल छडया कने उदे पिच्छे चली पे। 21 जालू यीशु थोडा अगगे चलया, उनी होर दो भाईयां जो दिखया जिना दे ना याकूब कने यहून्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे, कने यीशुऐ उना जो भी सदया। 22 सै झट किस्तिया कने अपने पिता जो छडी करी उदे पीच्छे चली पे। 23 यीशु सारे गलील प्रदेशे च गुमदा रेंदा कने उना दे यहदी जंज घरां च उपदेश दिन्दा कने राज्य दा शुभसमाचार दा प्रचार, कने लोकां दियां सारियां बिमारियां कने कमजोरियां जो ठीक करदा जांदा था। 24 कने सारे सीरिया प्रदेशे च यीशुये दे कम्मा दी खबर फैली गेई कने लोक सारे बिमारां जो, जिना जो केई किस्मा दियां बिमारियां कने दुखां जकडया था, कने जिना च बुरियां आत्मा थियां, कने मिर्गिया दे दौरे बाले, कने लकवे दे रोगियां जो उस बाल लेईकरी आऐ कने यीशुऐ उना सारयां जो ठीक करी दिता। 25 कने गलील प्रदेशे कने दिकापुलिस शहरे कने यस्शलेम शहर कने यहूदिया प्रदेशे ला कने यरदन खड़ा दे पारे ला भिडा दी भीड उदे पिच्छे चली पेई।

**5** यीशु भिडा जो दिखीकरी, पाहडे पर थोडा उपर चली गिया, कने उना जो शिक्षा देणे तांई ओथू बेई गिया तां उदे चेले उदे बाल आये। 2 कने उना जो शिक्षा देणी शुरू किती: 3 “धन्य न सै लोक, जडे मने दे दीन न जिना जो परमेश्वर दी जरूरतां दा ऐहसास है, क्योंकि स्वर्गं दा राज्य उना दा ही है। 4 धन्य न सै लोक, जडे शोक करदे न, क्योंकि परमेश्वरे उना जो शांती देणी। 5 धन्य न सै लोक, जडे नम्र न, क्योंकि धरती उना दी होणी है। 6 धन्य न सै लोक, जडे धार्मिकता ने जिन्दगी जिणे दी सच्ची भूख प्यास रखदे न, क्योंकि परमेश्वरे उना जो रजाणा है। 7 धन्य न सै लोक जडे दयालु न, क्योंकि परमेश्वरे उना पर दया करणी। 8 धन्य न सै लोक, जिना दे मन साफ न, क्योंकि उना परमेश्वरे जो दिखणा। 9 धन्य न सै लोक, जडे इकी दुज्जे दा मेल करणे बाले न, क्योंकि उना जो परमेश्वरे दा पुत्र बोलया जाणा। 10 धन्य न सै लोक, जडे धर्म दे कम्म करणे दिया बजा ने सताऐ जांदे न, क्योंकि स्वर्गं दा राज्य उना दा ही है। 11 धन्य न तुसां, जालू माणूऐ मेरिया बजा ने तुहाडी निन्दा करणी कने तुसां जो सताणा क्योंकि तुसां मेरे चेले न कने झट बोली-बोली करी तुहाडे खिलाफ हर तरां दियां बुरियां गल्लां बोलणे। 12 तालू तुसां खुश कने मानन होनयो क्योंकि तुहाडे तांई स्वर्गं च बडा इनाम है। इस तांई कि जडे बडे बकते पहले परमेश्वरे दा संदेश देणेबाले थे उना जो भी इयां ही सताया था। 13 तुसां धरतिया पर लोकां तांई लूँणे सांई न; पर अगर लूँणे दा स्वाद बिगडी जा, तां फिरी सै कुसा चिजा ने लूँणका करणा? फिरी सै कुसी कम्मे दा नी है, सिर्फ इसी तांई कि इसयो बार सुटी दिया ताकि माणुआं दे पैरा हेठ ओए। 14 तुसां पूरे संसारे तांई ज्योति न। जडा शहर पाहडे पर बस्या है, सै कदी छुपी नी सकदा। 15 कने लोक दिव्या बाली करी टोकसरे हेठ नी रखदे न, पर उसयो उपर धारिया पर रखदे न, ताकि घरे दे सारे लोकां जो लौ होऐ। 16 तियां ही तुहाडी लौ भी माणुआं सामणे चमके तां सै तुहाडे भले कम्मा जो दिखीकरी तुहाडे पिता दी बडाई करन, जडा स्वर्गं च है। 17 ऐ मत समझा कि, मैं मूसा दी व्यवस्था या परमेश्वरे दा संदेश देणेबालयां दिया गल्लां जो खत्म करणा आया है, मैं उना जो खत्म करणा नी, पर उना जो पूरा करणा आया है। 18 क्योंकि मैं तुसां ने सच्च बोलदा है, कि अम्बर कने धरती खत्म होई जांगे, पर परमेश्वरे दिया व्यवस्था ला कुछ भी, ऐथू दीकर इक बिंदु या मात्रा भी पूरा होयो बिना नी टलनी है। व्यवस्था दियां सारियां भविष्यवाणियां पुरियां होणियां न। 19 इस तांई जडा कोई छोटे ला छोटे हुकम के कुसकी इकी जो भी नी मनागा, कने तियां ही लोकां जो सिखांगा, तां उसयो स्वर्गं दे राज्य च सारयां ला छोटा बोलणा, पर जडा कोई उना दा पालन करणा कने उना जो सिखांगा, सिर्फ उसयो ही स्वर्गं च महान बोलणा है। 20 मैं तुसां ने बोलदा है, कि अगर तुसां के कोई स्वर्गं दे राज्य च जाणा चांदा है, तां तुसां जो व्यवस्था जो सिखाणे बाले कने

फरिसियां ला बदीकरी परमेश्वरे दी व्यवस्था दा पालन करणा चाईदा। 21 तुसां सुण्या होणा, व्यवस्था जो सिखाणे बालयां साडे पूर्वजां जो दसया कि 'हत्या मत करदे', कने जडा कोई हत्या करणा उसयो यहूदी सभा च सजा मिलणी है। 22 पर मै तुसां जो ऐ बोलदा है, कि जडा कोई अपने भाईऐ पर गुस्सा करणा, उसयो यहूदी सभा च सजा मिलणी: कने जडा कोई अपने भाईऐ जो नकम्मा बोलणा उसयो महासभा च परमेश्वरे सजा देणी; जडा कोई अपने भाईऐ जो निकम्मा कने मुख बोले; उसयो नरके दी अग्नी दी सजा मिलणी। (Geenna g1067) 23 इस तांई अगर तू अपनी भेंट चढाणे तांई मंदरे जो लोऐ, कने ओथु तिजो याद ओऐ, कि मेरे भाईऐ दे मने च मेरे तांई कोई शिकायत है, 24 तां अपनी भेंट ओथु ही मंदरे दे सामणे छडी दे, कने पहले जाई करी अपने भाईऐ ने मेल मिलाप कर, तां फिरी आई करी अपनी भेंट चडा। 25 कचेरी जां दे बकते रस्ते च ही तू अपने बिरोधी ने राजीनामा करी ले, ताकि तेरा बिरोधी तिजो न्याय करणे बाले दे हथे ना देई दे, कने न्याय करणे बाला तिजो जेला च पाई दे। 26 मै तुसां ने सच्च बोलदा है जालू दीकर तू इक-इक पैसा नी भी दिगा तालू दीकर तू जेलखाने ला नी छुटी सकदा है।" 27 तुसां सुणी बैठयो न कि परमेश्वरे हुकम दितया था, कि व्यभिचार मत करदे। 28 पर मै तुसां ने ऐ बोलदा है, जडा कोई कुसा जनानिया जो बुरिया नजरा ने दिखे तां सै अपने मने च उसा ने व्यभिचार करी बैठा है। 29 अगर तेरी सजी हख तेरे पाप दी बजा बणे, तां उसा जो कडी करी सूटी दे; क्योंकि तेरे तांई ऐ ही खरा है कि तेरे अंगा च इकी दा नाश होई जाऐ ताकि तेरा बाकी शरीर नरक जाणे ला बची जा। (Geenna g1067) 30 कने अगर तेरा सज्जा हथ तेरे पाप करणे दी बजा बणे, तां तू उसयो बडी करी सूटी दे, क्योंकि तेरे तांई ऐ ही खरा है कि तेरे अंगा च इक हिंसा नाश होई जा, ताकि तेरा बाकी शरीर नरक जाणे ला बची जा। (Geenna g1067) 31 मूसा दिया व्यवस्था च ऐ भी बोलया था, कि जडा कोई अपणिया घरे बालिया जो तलाक देणा चांदा है, तां उसा जो तलाकनामा दे। 32 पर मै तुसां जो ऐ बोलदा है, कि जडा कोई अपणिया घरे बालिया जो व्यभिचार दे सिवा कुसी होरसी बजा ने छडी दे, तां सै उसा ला व्यभिचार करवांदा है; कने जडा उसा छडिया ने बियाह करे, सै व्यभिचार करता है। 33 फिरी तुसां सुणी बैठयो न, कि व्यवस्था जो सिखाणे बालयां साडे पूर्वजां बोलया था, झुठियां कसमां मत खांटे, पर परमेश्वरे दे सामणे खादियां अपणियां कसमां जो पुरियां करनयो। 34 पर मै तुसां ने ऐ बोलदा है, कि कदी कसम मत खांटे; ना ही स्वर्गे दी, क्योंकि स्वर्ग परमेश्वरे दा सिंहासन है। 35 ना ही धरतिया दी, क्योंकि सै उदे पैरां दी चौकी है; कने ना ही यरूशलेम शहर दी क्योंकि सै महान राजा परमेश्वरे दा शहर है। 36 कने अपने सरे दी भी कसम मत खांदा क्योंकि तू अपने इक बाले जो भी ना चिट्टा, कने ना काला करी सकदा है। 37 पर तुहाडी गल्ल हां दी हां, कने ना दी ना हो; क्योंकि जडा कुछ इसला जादा होंदा है, सै शैतान ला होंदा है। 38 फिरी तुसां सुणी बैठयो न कि मूसा दिया व्यवस्था च लिखया है, कि अगर कोई तेरी हखी जो फोडी दे तां तुमी उदे बदले च उदी हख फोडी दे, कने इयां ही दंद दे बदले दंद तोडी दिया। 39 पर मै तुसां ने ऐ बोलदा है, कि तुसां बदला मत लेंदे; पर जडा तेरिया सजिया खाडिया पर थपड़ मारे, तां उदे सामणे दुई खाडी भी करी दिया। 40 कने अगर कोई तिजो पर मुकदमा करी के जबरदस्ती तेरा कुरता लेणा चांदा है, तां उसयो अपणिया धोतिया भी लेणा दिया। 41 कने कोई रोमी सिपाई तिजो जबरदस्ती ही इक मील भर लेई जांदा है, तां उदे सोगी दो मील चली जा। 42 कने जडा कोई तिजो ला कुछ मगे, तां उसयो देई दे; कने जडा तिजो ला उधार लेणा चांदा है, उसयो मना मत करदे। 43 तुसां सुणी बैठयो न कि व्यवस्था च लिखया है; कि अपने पडोसियां ने प्यार रखा, कने दुश्मणा ने दुश्मणी रखा। 44 पर मै तुसां ने ऐ बोलदा है, कि अपने दुश्मणा ने प्यार रखा, कने जडा तुसां जो सतादां है उस तांई प्रार्थना करा। 45 जिसने तुसां अपने स्वर्गीय पिता दी ओलाद बणा ना है, क्योंकि सै खरे लोकां कने बुरे लोकां दोना उपर अपना सूरज निकालदा है, कने धर्मियां कने अधर्मियां दोनो पर बरखा बरसांदा है। 46 क्योंकि अगर तुसां अपने चाहणे बालयां ने ही प्यार रखन, तां परमेश्वरे तुसां जो फल नी देणा, क्योंकि चुंगी लेणे बाले भी इयां ही करदे न? 47 कने अगर तुसां सिर्फ अपने मसीह भाईयां जो ही नमस्ते करदे न, तां तुसां दुज्जे लोकां दे बदले कोई बडा कम्म नी करदे न। क्योंकि होर जातियां जडियां परमेश्वरे दे हुकमा दा पालन नी

करदियां न, सै भी तां इयां ही करदे न? 48 इस तांई तुहांजो उना जो प्यार करणा चाईदा जडे तुहांजो प्यार नी करदे इस तरीके ने तुसां सिद्ध बणा, जियां तुहाडा स्वर्गीय पिता सिद्ध है।

**6** ध्यान रखा तुसां माणुआं जो दसणे तांई अपने भले कम्म मत करा, नी तां तुहांजो अपने स्वर्गीय पिता परमेश्वरे ला कोई इनाम नी मिलणा। 2 इस तांई जालू तू दान करे, तां इदा दिखवा मत करदा, जियां डोंगी लोक यहूदी जंज घरे च कने गलियां च करदे न, ताकि लोक उना दी बडाई करन, मै तुसां ने सच्च बोलदा है, कि उना जो लोकां ला अपना इनाम मिली गिया है। 3 पर जालू तू दान करे, तां तेरा दान गुप्त हो जडा लोकां च कुसी जो भी पता ना चले। 4 ताकि तेरा दान गुप्त रे, कने तालू तेरा पिता परमेश्वरे जडा गुप्त च दिखदा है, उनी तिजो उदा इनाम देणा। 5 जालू तू प्रार्थना करे, तां कपटियां सांई मत करदा क्योंकि सै लोकां जो दसणे तांई यहूदी जंज घरे च कने सडकां दे मोडा पर खडोई करी प्रार्थना करदे न, सै इस तांई करदे न ताकि लोक उना जो दीखन कने प्रशंसा करन। मै तुसां ने सच्च बोलदा है, कि उना जो अपना इनाम मिली गिया है। 6 पर जालू तू प्रार्थना करणा, तां अपने कमरे अंदर जा, कने दरबाजा बंद करिके अपने पिता परमेश्वरे ने प्रार्थना कर जिसयो कुनी नी दिखया है, तालू तेरे पिता परमेश्वरे जडा गुप्त च दिखदा है, उनी तिजो इदा इनाम देणा। 7 पर प्रार्थना करदे बेले होर जातियां सांई बेकार च बडबडा मत करा, क्योंकि सै समझदे न कि उना दे बडबडाणे ने परमेश्वरे उना दी सुणी लेणी है। 8 इस तांई तुसां उना सांई मत बणा, क्योंकि तुहाडा पिता परमेश्वरे तुहाडे मंगणे ला पहले ही जाणदा है, कि तुहाडियां क्या-क्या जरूरतां न। 9 इस तांई तुसां जो इस तरीके ने प्रार्थना करणा चाईदी की: है साडे पिता परमेश्वरे, जडा तू स्वर्ग च है; तुहाडा ना पबित्र मनया जाये। 10 सोः माणुआं पर तू राज्य करे। जियां तेरी इच्छा स्वर्ग च पूरी होंदी है, तियां ही धरतिया च भी पूरी होऐ। 11 सांझो हर रोज सै खाणा दे जडा सांझो उस दिने तांई चाईदा है। 12 कने जियां असां अपने गुनागारां जो माफ कितया है, तियां ही तू भी सांझे पापां जो माफ कर। 13 कने साडी परख ना ले, पर सांझो शैताने ला बचा। क्योंकि राज्य कने पराक्रम कने महिमा सदा तेरी है। आमीन। 14 इस तांई अगर तुसां माणुआं दे गुनां जो माफ करगे जडे उना तुहाडे खिलाफ कितयो, तां तुहाडे स्वर्गीय पिता परमेश्वरे भी तुहाडे गुनां माफ करणे। 15 कने अगर तुसां माणुआं दे गुनां जो माफ नी करगे, तां तुहाडे पिता परमेश्वरे तुहाडे गुनां भी माफ नी करणे। 16 जालू तुसां बरत रखन, तां कपटियां सांई तुहाडे मुऐ पर उदासी नी होणा चाईदी क्योंकि सै अपना मु उदास बणाई रखदे न, ताकि लोकां जो पता लगगे कि उना बरत रखया है। मै तुसां ने सच्च बोलदा है, कि उना जो अपना इनाम मिली गिया है। 17 पर जालू तू बरत रखे तां अपने सिरे पर तेल मल कने मुऐ जो धोई ले। 18 ताकि लोकां जो नी, पर तेरे पिता परमेश्वरे जो पता लगगे जिसयो कुनी नी दिखया है, उनी तिजो इदा इनाम देणा। 19 अपने तांई धरतिया च धन दौलत मत गठेरा, जिथू कीडा कने भुथी खराब करदी है, कने जिथू चोर नजर रखदे न कने ताले तोडी करी चोरी लेई जांटे न। 20 पर भलाई करी के अपने तांई स्वर्ग च धन दौलत गठेरा, जिथू ना तां कीडा लगदा है, ना भुथी खराब करदी है, कने जिथू ना कोई नजर रखदा कने ना कोई चोरदा है। 21 क्योंकि तेरा मन हमेशा ओथु लगगी रेणा जिथू तेरी धन दौलत है। 22 हखी शरीर तांई इक दिट्ये सांई न, इस तांई अगर तेरियां हखी साफ न, तां तेरे सारे शरीर च भी लौ होंगी। 23 पर अगर तेरियां हखी बुरियां न, तां तेरा सारा शरीर भी नेहरे च होणा; इसा बजा ने जडी लौ तिजो च है, अगर सै नेहरा होए तां सै नेहरा कितला जादा होणा! 24 कोई माणु इक ही बकते दो मालकां दी सेवा नी करी सकदा, क्योंकि उनी इकी ने दुश्मनी कने दुऐ ने प्यार रखणा, या इकी ने मिली के रेणा कने दुऐ जो घटिया समझणा। तुसां परमेश्वर कने धन दौलत दोनो दी सेवा नी करी सकदे। 25 इस तांई मै तुसां ने बोलदा है, कि अपनी रोजे दी जिन्दगी जिणे तांई ऐ चिंता मत करदे असां क्या खाणा, कने क्या पिणा, कने ना अपने शरीर तांई कि क्या पेनाणा, क्या अपने प्राण खाणे ला कने शरीर कपडे ला बदीकरी नी है? 26 अब्बरे दे पछियां जो दिख। सै ना कुछ रांटे न, ना बडदे न, ना खतरां च बटोलंटे न, तमी तुहाडा स्वर्गीय पिता परमेश्वर उना जो खुआंदा है। तुसां क्या इना पछियां ला जादा कीमती नी न? 27 तुसां च ऐसा कुण है, जडा चिंता करणे ने अपणिया जिन्दगिया च इक घडी भी बधाई सकदा है? 28 कने

कपड़यां ताँद कजो चिंता करदे न? जंगली फुल्लां पासे ध्यान दिया, कि सै कियां बड़द्वे न, सै ना तां मेहनत करदे न, कने ना ही कपड़े बनाते न। 29 तमी मै तुसां ने बोलदा है, कि जालू राजा सुलैमान बाल बडा भरी धन दौलत थी, तालू भी उनी उना चे कुसी साँद भी कपड़े नी पायो थे। 30 इस ताँद अगर परमेश्वर बणे दे घाए जो, जडा अज है, कने कल अग्गी च फुकया जाणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी पक्का तुसां दी देखभाल करणी है, पर परमेश्वर पर तुहाडा भरोसा इतणा घट कजो है? 31 इस ताँद तुसां चिंता करिके ऐ मत बोलदे, कि असां क्या खांगे, या क्या पींगे, या क्या पेनगे? 32 क्योँकि होर जातियां इना सारियां चीजा दियां तोपा च रँदियां न, कने तुहाडा स्वर्गीय पिता परमेश्वर जाणदा है, कि तुसां जो ऐ सारियां चिजा चाईदियां न, इना दी चिंता मत करा। 33 इस ताँद पेहेले तुसां परमेश्वर दे राज्य कने धार्मिकता दी जिन्दगी जिणे दी कोशिश करा, तां तुसां जो ऐ सारियां चिजा मिली जाणियां। 34 इस ताँद कल्ले ताँद चिंता मत करा, क्योँकि कल दा दिन अपनी चिंता अणु करी लेँदा है, अज्जे ताँद अज्जे दा दुख ही बतेहरा है।

**7** दुजयाँ पर दोष मत ला, ताकि परमेश्वर तुहांजो पर भी कोई दोष ना लाये।  
 2 क्योँकि जियां तुसां कुसी पर दोष लादे न, तियां ही परमेश्वर तुहांजो पर भी दोष लागणा; कने जियां तुसां दुजयां ने व्यवहार करदे न, तियां ही परमेश्वर तुहाडे सोगी करणा। 3 तू कजो अपने विश्वासी भाईऐ दियां छोटियां-छोटियां गलतियां जो दिखदा है, जडियां उदिया हखी च पियो छोटे दे कखे साँद न, अगर तेरिया जिन्दगीया च मते पाप न, जडा तेरिया अपनी हखी च इक लठे साँद है, तां सै तिजो कनी नी मिलदा? 4 जालू तैरे अंदर ही मते पाप न, तां तू खद ला घट पाप बाले कुसी भाईये दी मदद कडिया करी सकदा है। 5 कपटियों, पेहेले तां अपने आपे दे पापां जो सुधारी ले, तां तू अपने भाईये दिया हखी दे कखे जो ढंगे ने दिखीकरी कडी सकदा है, कने तां दुजयां जो उना दे छोटे पापां जो सुधारणे च मदद करी सकणा। 6 उना लोकां जो परमेश्वर दा संदेश मत सुणा जडे बचना जो सुणना नी चाँदे। अगर तुसां ऐसा करदे न, तां ऐ ऐसा होणा जियां पबित्र चिजां जो कुतयां अगे फेंकी देणा, या जियां सूअरां दे अगे हीर मोती फेंकणा, उना तां सै पैरां हेड गरेचणे कने फिरी करी तुसां पर ही हमला करणा। 7 तुसां जो जडा चाईदा सै परमेश्वर ला मंगा कने उनी तुसां जो देणा; अगर तुसां तोपणे, तां तुसां जो मिलणा; अगर खटखटांगे, तां तुहाडे ताँद खलणा। 8 क्योँकि जडा कोई मंगदा है, उसयो मिलदा है; जडा तोपदा है, उसयो मिलदा है; कने जडा दरबाजा खटखटांदा है, उदे ताँद खोला जाणा। 9 तुसां चे कोई भी ऐसा माणु नी है, जडा अपने पुत्रे दे रोटी मंगणे पर उसयो पथर दिन्दा है। 10 इयां ही अगर तुहाडा जागत तुसां ला खेतो जो मछी मगे तां क्या तुसां उसयो जरिला सम्प दिन्ने न? 11 जालू तुसां बुरे होईकरी, अपने बचयां जो खरियाँ चिजा देणा जाणदे न, तां तुहाडे स्वर्गीय पिता परमेश्वर अपने मंगणे बालयां जो खरियाँ चिजा कनी दिगा? 12 इसा बचने जडा कुछ तुसां चाँदे न, कि माणु तुहाडे सोगी करे, तां तुसां तियां ही उना सोगी करा; क्योँकि मसा दी व्यवस्था कने परमेश्वर दा संदेश देणेवाले दी शिक्षा दा मतलब ऐई है। 13 तुसां सिर्फ सुंगडे फाटक ला परमेश्वर दे राज्य अंदर जा, क्योँकि जडा फाटक चौडा कने असान रस्ता है, सै बराबादिया पासे लेई जाँदा है; कने मते भरी लोक न जडे इस रस्ते ला जाँदे न। 14 क्योँकि सुंगडा सै फाटक है, कने ओँखा है सै रस्ता जडा अनन्त जिन्दगी बाल पुजांदा है, सै लोक थोडे ही न जिना जो ऐ रस्ता मिलदा है। 15 असां परमेश्वर दे संदेश देणेवाले लोक न, ऐसा अपने आपे जो बोलणे बाले झूठे लोकां ला चौकने रिया। सै उना भेडियां साँद न जिना अपने आपे जो भेडा दियां खल्लनी ने ढबक्या है, लोकां जो यकीन दिलाणे ताँद कि सै सच्ची च भेडां न, पर सै असल च भेडियो न जडे लोकां पर हमले करदे न। 16 उना दे कम्मा ने तुसां उना जो पछेणी लेणा है। लोक क्या झिल्लां ला अंगूर, या कंडे बाले झिल्लां ला अजीर तोडदे न? 17 इयां ही इक खरा सख खरा फल दिन्दा है, कने बेकार सख बुरा फल दिन्दा है। 18 खरा सख बुरा फल नी देई सकदा, कने ना बेकार सख खरा फल देई सकदा है। 19 जडा-जडा सख खरा फल नी दिन्दा है, सै बडी देणा है, असां परमेश्वर दे संदेश देणेवाले लोक न ऐसा अपने आपे जो बोलणे बाले झूठे लोकां जो ऐई सजा मिलणी है। 20 तुसां उना दे कम्मा ने जडे सै करदे न उना जो पछेणी लेणा है। 21 जडा मिंजो ने, हे प्रभु, हे प्रभु बोलदा है, उना सारयां

ही स्वर्ग दे राज्य च प्रवेश नी करणा है, सिर्फ उना ही जडे मेरे स्वर्गीया पिता परमेश्वर दिया मरगिया पर चलदे न। 22 न्याये दे रोजे मतयां लोकां मिंजो ने बोलणा; प्रभु जी, प्रभु जी, क्या असां तैरे नापे दी भविष्यवाणी नी किती, कने तैरे नापे ने बुरियां आत्मा जो नी कडया, कने तैरे नापे ने कितणे ही चमत्कारी कम्म नी किते? 23 तालू मै उना ने खुली करी बोली देणा है, कि मै तां तुसां जो जाणदा ही नी, बुरे कम्म करणे बाले लोको, ऐथू ला चली जा। 24 इस ताँद जडा कोई मेरियां गल्लां सुणीकरी उना जो मनदा है, सै उस अकला बाले माणुऐ साँद है, जिनी अपना घर चट्टान पर बनाया है। 25 कने अम्बर बरया कने बाढ आई, कने तूफान चट्टाना, कने सै उस घरे ने टकराया, पर सै घर नी डेखा, क्योँकि उस दी नीव चट्टाना पर बणईयो थी। 26 पर जडा कोई मेरियां इना गल्लां जो सुणदा है, कने उना पर नी चलदा है, सै उस मुख माणुऐ साँद है जिनी अपना घर रता पर बनाया है। 27 कने अम्बर बरया, कने बाढ आई, तूफान चले, कने उस घरे ने टकराए कने सै घर डेई करी सारा भजी टूटी गया। 28 जालू यीशू ऐ गल्लां बोली बैठा, तां इयां होया कि सारी भीड उस दे उपदेशे ने हेरान होई। 29 क्योँकि सै उना जो व्यवस्था जो सिखाणे बालयां साँद नी, पर अधिकारियां साँद उना जो उपदेश दिन्दा था।

**8** जालू यीशू उस पाहडे ला थल्ले उतरया, तां इक बडी बडी भीड उदे पिच्छे चली पैई। 2 इकी कोढिये यीशूऐ बाल आई करी उसयो नमस्ते किते कने बोलया, “कि प्रभु जी अगर तू चाआं, तां मिंजो ठीक करी सकदा है।” 3 यीशूऐ हथ अगे करी के उसयो छुता, कने बोलया, “मै चाँदा है कि तू ठीक होई जा” कने तालू ही उस कोढिये दा कोढ ठीक होई गया। 4 यीशूऐ उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, कि तू खरा होईया कने परमेश्वर जो भेंट चढा जिदे बारे च मसा व्यवस्था च लिखया है, ताकि लोक जाणी सकन कि तू खरा होई गया।” 5 यीशू जालू कफनरुह शेरह च आया तां इकी रोमी सुबेदारे उस बाल आई करी निनती किती, 6 “प्रभु जी, मेरे नोकरे जो लकवे दी बिमारी होई गियो है, कने सै हिली-जुली नी सकदा है, कने बडा दूखी है।” 7 यीशूऐ उसयो बोलया, “मै आई करी उसयो ठीक करगा।” 8 सुबेदारे जबाब दिता, कि प्रभु जी, मै इस लाइक नी है कि, कि तू मेरे घरे ओपे, पर तू सिर्फ हुकम करी दे, तां ही मेरे नोकरे ठीक होई जाणा। 9 मै ऐ समझदा है क्योँकि मै भी अधिकारियां दे थल्ले कम्म करणे बाला माणु है। कने मेरे अधीन सपाई कम्म करदे न, कने जालू इकी सपाईऐ जो बोलदा है कि, तू जा, तां सै चली जाँदा है; कने दुपे जो बोलदा है कि, तू ऐथू आ, तां सै आई जाँदा है; कने जालू मै अपने नोकरे जो बोलदा, कि ऐ कर, तां सै करी दिन्दा है। 10 ऐ सुणीकरी यीशूऐ हेरानी होई, कने जडे उदे पिच्छे ओआ दे थे उना ने बोलया, “मै तुसां ने सच बोलदा है, कि मै इस्राएल देशे च इक भी ऐसा माणु नी दिखया, जडा इस गैर-यहूदी माणुऐ साँद मिंजो पर भरसा करदा है। 11 कने मै तुसां ने बोलदा है, कि मतयां होर जाति दे लोकां पूर्व कने पशचमें ला आई करी अब्राहम कने इसहाक कने याकूबे सोगी स्वर्ग राज्य दे भोज च शामिल होणा है। 12 पर इस्राएलियां जो बाहर नेहरे च पाई देणा है, ओथू उना रोणा कने दंद पीणे न।” 13 कने यीशूऐ सुबेदारे जो बोलया, “घरे जा, जदेया तेरा भरोसा है, तदेया ही तैरे ताँद हो। कने उदा सेवक तालू ही ठीक होई गया।” 14 कने यीशू जालू पतरसे दे घरे पुज्जा, तां उनी उदिया समु जो बिस्तरे च पिया दिखया कने उसा जो बुखार चढया था। 15 कने उनी उसा दा हथ छुता कने उसा दा बुखार उतरी गया, कने सै उठी करी उदी सेबा करणा लगी पैई। 16 कने जालू संज होई तालू सै यीशूऐ बाल मते सारे लोकां जो लेईकरी आये जिना च बुरियां आत्मा थियां, कने उनी उना आत्मा जो अपने बचने ने कडी दिता, कने सारे मरिजां जो ठीक करी दिता। 17 ताकि जडा बचन यशायाह परमेश्वर दा संदेश देणेवाले बोलया था, सै पूरा हो: उनी अपु साडियां कमजोरियां लेई लियां, कने साडियां बिमारियां जो हटाई दिता। 18 यीशूऐ जालू अपने चारो पासे मती भरी भीड दिखीकरी, यीशूऐ अपने चेलयां जो बोलया, तां “ओआ असां गलील झीला दे पारले पासे चलदे।” 19 कने जियां ही सै जाणे जो तैयार होऐ, तां इकी व्यवस्था जो सिखाणे बाले उस बखे आई करी बोलया, “गुरु जी, मै तुहाडा चेला बणने ताँद जिथू कुथी तू जांगा, मै भी तैरे पिच्छे-पिच्छे चली पोणा है।” 20 यीशूऐ उसयो बोलया, “लोमाडियां जो रेहणे ताँद कुडी न, कने

अम्बरे दे पछियां दे आले होंदे न; पर मिंजो, माणुए दे पुत्रे बाल इक भी घर नहीं है, जिथु मैं सोई सके।” 21 इक होर चले उसने बोलया, “प्रभु जी, मिंजो पेहले घर बापस जाणा दे। मेरे पिता दे मरणे बाद, मैं उसयो दफनाणा, कने तां फिरी मैं आई करी तेरा चेला बणागा।” 22 यीशुए उसयो बोलया, “मेरा चेला बणने तांई मेरे पिच्छे आई जा; कने जडे लोक आत्मिक सने ने मरयो न, उना जो मुर्दयां जो दफनाणा दे।” 23 जालु सै किस्तिया पर चढया, तां उदे चले उदे पिच्छे चली आये। 24 कने इकदम झीला च तूफान चलणा लग्गी पिया कने किस्ति लैहरां ने डूबणा लग्गी पेई, कने यीशु सुतया था। 25 तालु चेलयां बखे आई करी उसयो जगाया, कने बोलया, “प्रभु जी, सांझो बचाई ले, असां डुबी करी मरणे बाले न।” 26 यीशुए उना जो बोलया, “हे अल्पविश्वासियों, कजो डरा दे न?” तालु उनी उठी करी पाणिणे कने तुफाने जो झिडकया, कने सब कुछ शान्त होई गया। 27 कने सै सारे हेरान होए कने बोलणा लगे, “कि ऐ कदिया माणु है? ऐथु दीकर कि तूफान कने लैहरां भी इदा हकम मने न।” 28 जालु सै उस पार गदरेनियों जगा च पुज्जे, तां उसयो दो माणु मिल्ले जिना च बुरियां आत्मा थियां, सै कब्रिस्तान ला निकलते बेले यीशुए मिल्ले, सै आत्मा बडियाँ खरनाख थियां, कि कोई भी उस रस्ते ला नी जाई सकदा था। 29 कने दिखा, उना जोंरे ने बोलया, “परमेस्वरे दे पुत्र, साडा तिजो ने क्या कम्म है? तू क्या बकते ला पेहले ही सांझो दुख देणा आया है?” 30 उना ला थोडी दूर इक सुअरां दा झुण्ड चुग्गा दा था। 31 बुरियां आत्मा उसने ऐ बोली करी बिनती किति, अगर तू सांझो कडणा है, तां इना सुअरां बिच भेजी दे। 32 यीशुए उना जो बोलया, “जा!” सै निकली करी सुअरां च चली गियां, कने सारे सुअर भेठी ला रीडकी करी पाणिणे च जाई पे कने डूबी करी मरी गे। 33 उना दे रखबाले नठी करी शेहर च ऐ खबर सुणाई, कने जीना च बुरियां आत्मा थियां उना दे बारे च भी दसया। 34 तालु जडे लोक दिखणा आयो थे, सै यीशुए ने बिनती करिके बोलणा लगे, कि साडे इलाके ला चली जा।

**9** फिरी सै किस्तिया पर चढी करी पारले पासे गिया, कने अपने शेहर कफरनहम जो आया। 2 कने कुछ लोक इकी धरंगे दे मरीजे जो मंझे पर रखीकरी उस दे बाल लेई आये। यीशुए उना दा भरोसा दिखीकरी, उस लकवे दे मरिजे ने बोलया, “हे पुत्र, हौसला रख; तेरे पाप माफ होइ गे।” 3 कने, इसा गल्ला पर केई व्यवस्था जो सिखाणे बालयां ऐ सोचया, कि ऐ तां परमेस्वरे दी निंदा करा दा है। 4 यीशुए उना दे मने दी गल्ल जाणी करी बोलया, “तुसां अपने-अपने मने च बुरा बिचार कजो करा दे न?” 5 असान क्या है, ऐ बोलणा कि, तेरे पाप माफ होये, या ऐ बोलणा कि उठ कने चल फिर। 6 पर इस तांई कि तुसां जाणी सकन कि मिंजो माणुए दे पुत्रे जो धरतिया पर पाप माफ करणे दा हक है। तालु उनी धरंगे दे मरीजे जो बोलया: उठ, कने अपने मंझे जो चुक, कने अपने घरे जो चली जा। 7 कने सै उठी करी अपने घरे जो चली गिया। 8 लोक ऐ दिखीकरी हेरान होई गे कने परमेस्वरे दी महिमा करणा लगे, जिनी आदमियां जो ऐदिया हक दितया है। 9 ओथु ला अगे जाई करी यीशुए मती नापे दे इक माणुए जो कर लेणे दिया चौकिया पर बैठयो दिखया, कने उसयो बोलया, “मेरे चेले बणा।” सै उठी करी उस दे पिच्छे चली पिया। 10 कने जालु यीशु घरे रोटियां खाणा बैठा, तां मते चुंगी लेणेबाले कने पापी आई करी उस दे चेलयां सोगी रोटी खाणा बैठे। 11 ऐ दिखीकरी फरीसियां उदे चेलयां ने बोलया, “तुहाडा गुरु चुंगी लेणे बाले कने पापियां सोगी कजो खांदा है?” 12 जालु यीशुए ऐ सुणया तां उना जो बोलया, “जडे लोक खरे न उना जो वैधे दी जरूरत नी होंदी है, पर जडे बिमार न उना जो है। 13 इस तांई तुसां जाई करी इदा मतलब सीखी लिया, कि मैं बलिदान नी पर दया चांदा है; क्योंकि मैं धर्मियां जो नी पर पापियां जो सदणा आया है।” 14 तालु यहन्ना दे चेलयां उस बाल आई करी बोलया, “क्या बजा है कि असां कने फरीसी बरत रखदे न, पर तेरे चेले तां बरत नी रखदे?” 15 यीशुए उना ने बोलया, “क्या बराती, जालु दीकर लाडा उना सोगी है, दुखी होई सकदे न? पर सै दिन ओणे न जालु लाडे उना ला बख कितया जाणा, उस बेले उना बरत रखणा। 16 लोक नोए कपडे दा रफु परणे कपडयां च कोई नी लांदा है, नी तां उनी रफुये धोणे ने सुकडी जाणा, कने पुराणा कपडा होर जादा फटी जाणा। 17 नोए अंगरा दे रसे जो पराणिया खलडिया च कोई नी भरदा है नी तां नोआ अंगर रस खलडिया जो फाडी दिन्दा है, कने अंगरा दा रस निकली जांदा ऐ, तांई तां नोआ अंगर रस

नोईयां खलडिया च भरदे न।” 18 सै उना ने ऐ गल्लां बोला दा ही था, इकी यहदी जंज घर दे सरदारे आई करी उसयो नमस्ते किते कने बोलया, “मेरी कुडी हुणी मरी है, पर ओथु आई करी उसा पर हथ रख, तां उना ज़िदिया होई जाणा।” 19 यीशु उठी करी अपने चेलयां समेत उदे पिच्छे चली पिया। 20 कने इक जनानी थी जिसा जो बाहरां सालां ला खून निकलने दी बिमारी थी, उना पिच्छे ला आई करी यीशुए दे कपडयां जो छुई लिया। 21 क्योकि सै अपने मने च बोला दी थी कि, अगर मैं उस दे कपडे जो छुई लेंगी तां मैं ठीक होई जाणा। 22 यीशुए फिरी करी उसा जो दिखया कने बोलया, “पुत्री हौसला रख; तेरा भरोसा जडा मिजों पर था उनी भरोसे तिजो खरा कितया है।” कने सै जनानी उसी बेले ठीक होई गई। 23 यीशु जालु उस सरदारे दे घरे पुज्जा, कने बंसरी बजाणे बाले कने भिडा जो रोंदे दिखया, 24 तालु बोलया, “हटी जा, कुडी मरियो नी है, पर सुतियो है”, इसा गल्ला पर सारे हंसणा लगे। 25 पर जालु भीड कडी दिती, तां उनी अंदर जाई करी कुडिया दा हथ पकडया, कने सै जिन्दी होई पेई। 26 कने इसा गल्ला दी चर्च सारे देशे च फैली गई। 27 जालु यीशु ओथु ला थोडा अगे गिया, तां दो अन्ने उदे पिच्छे ऐ बोलंदे आये, कि हे दाऊदे दे बंशज, सांझो पर दया कर। 28 जालु सै घरे च पुज्जा, तां सै अन्ने उस बाल आये, कने यीशुए उना जो बोलया, “क्या तुहांजो भरोसा है कि मैं ऐ करी सकदा है?” उना उसने बोलया, “हां प्रभु।” 29 तालु यीशुए उना दियां हखी जो छुई करी बोलया, “तुहाडे भरोसे दे अनुसार तुहाडे तांई होई जा।” 30 कने उना जो मिलणा लग्गी पिया, कने यीशुए उना जो समझाई करी बोलया, “ध्यान रे, तुसां कुस्यो भी मत दसदे, कि मैं तुहाडे तांई क्या कितया है।” 31 पर उना निकली करी सारे देशे च उठी खबर फैलाई दिता। 32 जालु सै दो अन्ने माणु बाहर जा दे थे, तां कुछ लोक इकी माणुये जो यीशुए बाल लेई आये कने सै बोली नी सकदा था, क्योकि उदे च बुरी आत्मा थी। 33 जालु यीशुए बुरिया आत्मा जो उस माणुये ला कडी दिता, तां सै बोलणा लग्गी पिया। कने भीड हेरान होई गे कने बोलणा लग्गी, कि इस्राएल देशे च ऐसा कदी नी दिखया। 34 पर फरीसियां बोलया, बुरियां आत्मा दा सरदार उसयो शक्ति दिन्दा है कने बुरियां आत्मा जो कडदा है। 35 यीशु कने उदे चेले गलील प्रदेश दे केई शेहरां कने ग्रां च होईकरी गे, कने यीशु यहदी जंज घरां च उपदेश दिन्दा, कने परमेस्वरे दे राज्य दा शुभसमाचार प्रचार करदा, कने हर तरा दियां बिमारियां कने कमजोरियां जो ठीक करदा गिया। 36 यीशु किस्तिया ला उतरया कने उनी मती भरी भीड दिखी, कने उसयो उना पर तरस आया, क्योकि उना दा कोई अगुवा नी था जडा उना दी रखबाली करी सके, जियां भेडां बिना चाले होंदियां न, सै बेवेन कने भटकयो होयो थे। 37 तालु उनी अपने चेलयां ने बोलया, “जियां खेतरां च मती फसल होंदी है, तियां ही मते भरी लोक न जडे परमेस्वरे दा संदेश सुणने तांई तैयार न, पर परमेस्वरे दे राज्य दे बारे च दसणे तांई लोक घट न। 38 इस तांई फसला दे मालिके ने प्राथना करा कि सै फसला तांई होर मजदूर भेजे।”

**10** फिरी उनी अपने बाहरां चेलयां जो अपने बाल सदया, कने उना जो बुरियां आत्मा पर हक दिता, कि उना जो कडन कने हर तरा दियां बिमारियां कने, हर तरा दियां कमजोरियां जो दूर करन। 2 इना बाहरां प्रेरितां दे ना ऐ न: पेहला शमीन, जिसयो पतरस बोलंदे न, कने उदा भाई अन्दियास; जब्दी दा पुत्र याकूब, कने उदा भाई यहन्ना; 3 फिलिपुस कने बरतुचै, थोमा, कने चुंगी लेणे बाला मती, हलाफई दा पुत्र याकूब कने तै। 4 शमीन कनानी, कने यहदा इस्करियोती, जिनी यीशुए जो पकडई भी दिता। 5 इना बाहरां चेलयां जो यीशुए ऐ हुकम देईकरी भेजया, “कि होर जातियां बाल मत जांदे, कने सामरियां दे कुसी भी शेहेरे दे अंदर मत जांदे। 6 इस्राएले दे लोकां बाल जा, जडे परमेस्वरे ला दूर होई गियो न, जियां भेडां गवाची करी अपने रखबाले ला दूर चली जांदितां न। 7 कने चलंदे-चलंदे ऐ प्रचार करा कि, स्वर्ग दा राज्य नेडे आई रिया है। 8 बिमारां जो ठीक करा: मरयां जो जिन्दा करा, कने कोडियां जो शुद्ध करा: बुरियां आत्मा जो निकाला: तुसां लोकां दी मदद करणे दा कुछ भी मत लेंदे, क्योकि परमेस्वर भी तुहाडी मदद करणे दा कुछ नी लेंदा है। 9 कने अपने थेलयां च सोना, चांदी, कने तांबे दे सिक्के मत गठेरदे। 10 रस्ते तांई ना कोई थेली रखा, ना दो कुरते, ना चुते, ना सोठी लेंगी, क्योकि मजदूरे जो खाणा कने रेणे दी जगा मिलणी चाईदी। 11 जिस कुसी शेहेरे या गांए जांगे तां ओथु पता करा कि कुण काबील माणु है

कने जाल् दीकर गांएे ला नी निकलगे, ताल् दीकर उदे घरे ही रिया। 12 घरे अंदर जांटे बेले उस घरे जो आशीष दियो। 13 अगर उस घरे दे लोक काबील होंगे, तां तुहाडी शांति उना बाल पूजणी, पर अगर सै तुहाडा स्वामन नी करगे तां तुहाडी शांति तुहाडे बाल बापस आई जांणी। 14 जिसा जगा दे लोक तुहांजो अपनांगे नी कने तुहाडे उपदेश नी सुणगे, ओथु ला जांटे बेले अपने पैरां दी धुड जाडी दियो, इयां करणे ने तुसां उना जो चेताबनी दिन्दे न कि, परमेखरे तुसां जो सजा देणी क्योकि तुसां उपदेश नी मनया। 15 मै तुसां ने सच्च बोलदा है, कि न्याय बाले रोजे से शेहरे जिथू दे लोक परमेखर दा बचन नी मदे, उना दी हालत सदोम कने अमोरा शेहरां दे लोकां दी हालत ला भी जादा भयानक होणी है।” 16 दिखा, मै तुहांजो भेडां सांई भेडियां बिच भेजदा है। तुसां सपणां सांई चलाक बना, कने कबुतरां सांई भोले बना। 17 “पर तुसां लोकां ला हमेशा चौकने रेणा। क्योकि लोकां तुहांजो कैदी बनाना कने यहूदी जंग घरे च पेश करणा कने तुहांजो कोडे मारणे, कने मेरिया बजा ने तुहांजो हाकिमा कने राजया दे सामणे न्याय तांई महाभषा च पेश करणा। 18 तुसां मेरे तांई हाकिमा कने राजया दे सामणे उना पर, कने होर जातियां पर गवाह बणने तांई पेश किते जाणे न। 19 जालू सै तुहांजो पकडांगे तां चिंता मत करदे, कि असां क्रियां, कने क्या बोलणा है: क्योकि जडा कुछ तुसां बोलणा है सै तुहांजो उसी बेले पता लग्गी जाणा। 20 क्योकि बोलणे बाले तुसां नी न, पर तुहाडे पिता परमेखरे दी पबित्र आत्मा तुसां च बोलदी है। 21 उसी बेले, जडे लोक मिजों पर भरोसा नी करदे न, उना अपने भाइयां जो अधिकारियां दे हथे मारणे तांई देई देणा, क्योकि सै मिजो पर भरोसा करदे न। पिता अपने बचयां सोगी इयां ही करणा है कने बचयां माता-पिता दे खिलाफ होईकरी उना जो मारी देणा है। 22 क्योकि तुसां मेरे चले न उदिया बजा ने सारे लोकां तुसां ने बैर करणा है, पर जडा आखरी दीकर सबर रखगा उदा ही उद्धार होणा। 23 जालू सै तुहांजो इकी शेहरे च तंग करगे, तां तुसां दूरो शेहरे जो चली जानयो। मै तुसां ने सच्च बोलदा है, तुहाडी इझाएले देशे दे इकी शेहरे ला दुज्जे शेहरे दी यात्रा पूरी भी नी होणी है, कने मै, माणुए दे पुत्रे आई जाणा है। 24 चला अपने गुप्ते ला, कने नौकर अपने मालिके ला बडा नी होंदा है। 25 काफ़ी है कि चले दा गुप्ते दे बराबर, कने नौकरे दा मालिके दे बराबर होणा; अगर सै मिजो घरे दे मालिके जो शैतान बोलदे न, तां उना मेरे घरे दे लोकां जो कितणे बुरे ना ने बोलणा है। 26 पर उना लोकां ला मत डरदे जडे तुसां जो धमकां दे, क्योकि सै बकत ओणे बाला है जालू जडा कुछ भी दक्या है, सै खोलया जाणा है; कने सै सारा कुछ जडा छुपया है, सै लोकां दे सामणे ओणा है। 27 जडा कुछ मै तुसां ने नेहरे च बोलदा है, उसयो चले सारे सामणे बिना कुसी डरे दे बोली सकदे न, कने जडा तुसां बल्ले-बल्ले सुणदे न, उसयो छती पर चढी करी प्रचार करा। 28 सै जडे शरीर जो मारी सकदे न, पर सै आत्मा जो नी मारी सकदे न, उना ला डरदे मत, पर परमेखर ला डरा, जडा आत्मा कने शरीर दोनो जो नरके च मारी सकदा है। (Geenna g1067) 29 क्या बडी घट कीमता च दो चिडियां नी बिकदियां? तमी तुहाडे पिता परमेखरे दिया मरजिया बिना उना चे इक भी मरी करी धरतिया पर नी पेई सकदी। 30 परमेखर तुहाडी जिन्दगिया दी हर गल्ला दी परवाह करदा है। सै ऐ भी जाणदा है कि तुहाडे सिरे पर कितणे बाल ना। 31 इस तांई डरा मत, क्योकि तुसां चिडियां ला भी जादा किमती ना। 32 जडा कोई लोकां दे सामणे मिजो परमेखर मन्नी लेंगा, उसयो मै भी अपने स्वर्गीय पिता दे सामणे अपने चले मन्नी लेंगा। 33 पर अगर सै दुज्यां दे सामणे ऐ बोलणे ला डरदे न, कि असां यीशुए दे चले न, तां मै अपने पिता परमेखरे जो जडा स्वर्ग च, दर्सी देणा कि, सै मेरे चले न। 34 ऐ मत सोचा कि मै धरतिया पर लोकां बिच शांती लोणे तांई आया है; मै तां लोकां च लडाई करवाणा आया है।” 35 मै तां इस तांई आया है, ताकि माणुए जो उस दे पिता परमेखरे ला, कने कुडिया जो उसा दिया माता ला, कने नुंआ जो उसा दिया ससु दे खिलाफ भडकाणा है। 36 माणुए दे दुखम उस दे घरे दे ही लोक होणे न। 37 जडा अपने माता पिता जो मिजो ला जादा प्यार करदा है, सै मेरा चेला बणने दे लायक नी है, कने जडा कुडिया या जागते जो मिजो ला जादा प्यार करदा है, सै भी मेरा चेला बणने लायक नी। 38 जडा मेरिया बजा ने दुख सेहन कने मरणे तांई तैयार नी है, सै मेरा चेला बणने दे लायक नी है। 39 कोई माणु ऐसा नी करगा कने अपने प्राणा जो बचाणा चांहगा, उनी परमेखरे सोगी

आत्मिक जिन्दगी जिणे दा मोका गबाई देणा है। पर जडा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेखरे सोगी सदा तांई दी जिन्दगी मिलणी। 40 जडा तुहांजो अपनांदा है, सै मिजो भी अपनांदा है; कने जडा मिजो अपनांदा है, सै मेरे भेजणे बालयां जो अपनांदा है। 41 जडा परमेखरे दा संदेश देणेबालयां जो परमेखरे दा संदेश देणेबाला समझीकरी अपनाए, उसयो परमेखरे दा संदेश देणेबालयां सांई इनाम मिलणा; कने जडा धर्मी माणुए जो धर्मी माणु समझीकरी अपनाए, उसयो धर्मिये सांई इनाम मिलणा है। 42 जडा कोई इना लोकयां चे इकी जो भी मेरा चेला समझीकरी सिर्फ इक कटोरा ठंडे पाणिए दा पिया, उसयो पक्का ही इनाम मिलणा है।

**11** जालू यीशु अपने बाहरां चेलयां जो हुकम देई बेठा, तां सै उना दे गलील जिले दे नगरां च उपदेश कने प्रचार करणे तांई ओथु ला चली गया। 2 यहून्ने जेला च मसीह दे कम्मा दी खबर सुणीकरी, अपने चेलयां जो उसला ऐ पृथणे जो भेजया। 3 “क्या तू ही मसीह है जिसयो भेजणे दा बायदा परमेखरे कितया था, या असां कुसी दुजे दी नियाल रखन?” 4 यीशुए जबाब दिता, “जडा कुछ तुसां दिखदे कने सुणदे न, सै सारा कुछ जाई करी यहून्ना ने बोली दिया। 5 कि अन्नयां जो मिलदा है, कने लंगडे चलदे न, कोडियां दा कोड ठीक होआ दा, कने टोणे सुणदे न, मुई देते किते जांटे न, कने गरीबां जो शुभसमाचार सुणाया जांदा है। 6 कने धन्य न सै, जडे मिजो पर शक नी करदे।” 7 यहून्ना दे चले जालू ओथु ला चली गे, तां यीशु यहून्ना दे बारे च लोकां जो बोलणा लग्गा, “तुसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? इदा मतलब ऐ है कि जडा बडी असांनी ने अपने बिचार बदली दे, सै ऐसा माणु है जडा डरदा है कि दुज्जे लोक उदे बारे च क्या सोचगे कने बोलगे। 8 तां फिरी तुसां क्या दिखणा गियो थे? क्या इक माणुए जो जिनी बडे मेंहो कपडे पायो थे? दिखा जडे लोक मेगे कपडे पांटे न सै मेहलां च रेंदे न। 9 तां फिरी कजो गियो थे? कि क्या कुसी परमेखरे दा संदेश देणेबाले जो दिखणे तांई? हों, मै तुसां ने बोलदा है, कि परमेखरे ला भी बूडे जो? 10 यहून्ना सेई माणु है जिदे बारे च पबित्र शाब्द च दसया, कि दिख, मै अपने संदेश देणेबाले दूते जो तरे अगे भेजदा है, जिनी तरे ओणे तांई लोकां जो तैयार करणा है। 11 मै तुसां ने सच्च बोलदा है, कि जडे लोक जनानिया ला पैदा होयो न, उना चे यहून्ना बपतिस्मा देणेबाले ला बडा कोई नी होया; पर स्वर्ग दे राज्य च जडा सारयां ला छोटा है, सै उसला बडा है। 12 जालू ला यहून्ना बपतिस्मा देणेबाले प्रचार करणा शुरू कितया है, उस बकते ला लेईकरी हुणे दीकर स्वर्ग दा राज्य जबरदस्ती ने अगे बदा दा है, कने हिसक लोक उस हमला करा दे न। 13 क्योकि सारे परमेखरे दा संदेश देणेबालयां दियां कताबां च कने मूसा दिया व्यवस्था च यहून्ना बपतिस्मा देणेबाले दे ओणे दीकर परमेखर दे राज्य दे बारे च लिखया है। 14 कने तुसां मेरी गल्ल मनणा चांटे न, कि एलिय्याह जिदे ओणे दी भविष्यवाणी कितियो थी, सै एलिय्याह ही है। 15 जिस बाल सुणने दा मन हो, सै ध्यान देईकरी इना गल्लां जो सुणे, कने समझी ले।” 16 मै इस युगे दे लोकां दी तुलना कुसने देई सै उना जागतां सांई न, जडे बगरां च बेईकरी इकी दुजे जो पुकारी करी बोलदे न। 17 “कि असां तुहाडे तांई खुशिया दे गाणे गाए, कने तुसां नचे नी; असां शोक दे गीत भी गाए, फिरी भी तुसां रोए नी।” 18 क्योकि यहून्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 19 पर मै माणुए दा पुत्र खांदा पिंदा है, कने सै बोलदे न, “कि पेटू कने शराबी माणु है, कने चुंगी लेणे बाले कने पाणियां दा मित्र है। पर इक माणुए दे कम्मा ऐ साबित करणा कि अकला बाला कुण है।” 20 तालू यीशुए उना शेहरां च रेणेबाले लोकां जो फटकरा लगाई, जिथु उनी बडे भरी चमत्कार दे कम्म कितयो थे; क्योकि उना अपने पापां दा पश्चाताप नी कितया था। 21 हाय, खुराजीन शेहर दे कने बैतसेदा शेहर दे लोको! जडे चमत्कारी कम्म तुहाडे शेहर च कितयो न, अगर सै कम्म सूर कने सैदा च कितयो होंदे, तां ओथु दे लोक बडे पेहेले टाट ओडी लेंदे, कने धुड अपने उपर छिडकी लेंदे ऐ दसणे तांई कि उना अपने पापां ला पश्चाताप करी लिया है। 22 पर मै तुसां ने बोलदा है, कि न्याय दे रोज जडी सजा सूर कने सैदा जो देणी है, सै सजा तुहाडिया सजा ला बडी घट होणी है। 23 हे कफरनहम शेहरे दे लोको, तुसां क्या स्वर्ग दीकर उच्चे करणे न? तुसां तां पताले दीकर थले करणे न; जडे अनोखे कम्म तुहाडे च कितयो न, अगर



सै सदोम शेर च होंदे, तां उनी अजे दीकर बणी रेणा था। (Hadēs g86) 24 पर मैं तुसां ने बोलदा है; कि न्याय दे रोज जड़ी सजा सदोम शेरने दे लोकां जो देणी है, सै सजा तुहाडिया सजा ला बडी घट होंपी है। 25 तिस्सी बेले यीशुए बोलया, “हे पिता, स्वर्ग कने धरतिया दे प्रभु, मैं तेरा धन्याबाद करता है, तू इना गल्लां जो ज्ञानियां कने समझदारां लोकां ला लुकाई रखया, कने लोक बचयां साईं न उना पर प्रगत किता है। 26 हों, पिता जी, क्योंकि तिजो ए ही ठीक लग्या।” 27 मेरे पिते मिंजो सब कुछ दितया है, कने पिता दे बिना कोई पुत्रे जो नी जाणदा है, कने ना ही कोई पिता जो जाणदा है सिर्फ पुत्र ही है जडा पिता जो जाणदा है। कने जिना लोकां जो पुत्र चुणदा है उना लोकां ही पिता जो जाणना है। 28 “सारे मेहनत करणे बालयो कने भोज हेठ दबयो लोको, मेरे बाल ओआ; मैं तुहांजो अराम देणा। 29 मेरा जुआ अपने उपर चुकी लिया; कने मिंजो ला सिखा; क्योंकि मैं मने ला नरम कने दयालू है; कने तुसां जो अपने मने च अराम मिलणा। 30 क्योंकि जडा करणे दा हुकम मैं तुहांजो दिन्दा है, सै करणा मुशकिल नी है।”

**12** उस बेले यीशु सन्ते दे रोजे खेतारां चे होईकरी चलया था, कने उस दे चेलयां जो भूख लग्गी, कने सै बेलां तोडी-तोडी करी खाणां लग्गी पे। 2 फरीसियां ए दिखीकरी उसयो बोलया, “दिख, तेंरे चेले सै कम्म करा दे न, जडा सन्ते दे रोज करणा ठीक नी।” 3 यीशुए उना जो बोलया, “क्या तुसां परमेश्वरे दे बचन च कदी नी पढया, कि राजा दाऊदे तालू क्या किता, जालू उसयो कने उस दे मित्रां जो भूख लग्गी थी? 4 सै कियां परमेश्वरे दे घरे च गिया, कने परमेश्वर जो चढाईयां रोटियां खादियां, जिना जो खाणां ना उस ताईं कने ना उदे मित्रां ताईं व्यवस्था दे अनुसार ठीक था, पर सिर्फ याजकां ताईं ठीक था? 5 या क्या तुसां मूसा दी व्यवस्था च नी पढया है, कि याजक सन्ते दे रोज मंदरे च सन्ते दे रोजे दिया विधिया जो तोडने पर भी निर्दोष होंदे न?” 6 पर मैं तुसां जो बोलदा है, इदा मतलब है, कि मैं तुहाडे बाल आया है कने मैं मंदरे ला भी जादा बहुमूल्य है। 7 अगर तुसां जाणदे न कि पबित्र शब्द च इना अखरां दा मतलब क्या है, मेरे ताईं बलियां चढाणे दी बजाए, तुसां दुजयां ताईं दयालू बना कने मेरे इना निर्दोष चेलयां दी निंदा नी करदे। 8 “मैं माणुए दा पुत्र ए बोलणे दा हक रखदा है, कि लोकां जो सन्ते बाले रोजे जो क्या करणे दी अनुमति है।” 9 ओथु ला चलीकरी करी सै यहूदी जंज घर च आया। 10 ओथु इक माणु था जिदा इक हथ सुक्की कने बेकार होई गिया था, कने फरीसियां यीशुए पर दोष लाणे ताईं उसला पुछया, कि क्या सन्ते दे रोज चंगा करणा ठीक गल्ल है? 11 यीशुए उना जो बोलया, “मन्नी लिया कि तुसां चे कुसकी दी इक ही भेड है। कने सै सन्ते दे रोजे खड़े च पेई जा, कने सै उसा जो पकडी करी खड़े ला नी कडे? 12 भला, माणुए दी कीमत भेडां ला कितणी जादा बदीकरी है। इस ताईं सन्ते दे रोजे लोकां जो खरा करणा ठीक गल्ल।” 13 कने यीशुए उस माणुए जो बोलया, “अपणा हथ कर र्सां।” उनी अपणा हथ किता, कने उदा हथ दुए हथे साईं ठीक होई गिया। 14 तालू फरीसी झट बाहर आई करी कुछ लोकां कने मिलिकरी यीशुए दे खिलाफ सलाह करणा लग्गे, कि उसयो कियां मारणा है। 15 ए जांणी करी यीशु ओथु ला चली गिया। कने मते सारे लोक उदे पिच्छे चलीं पै, कने उनी सारयां जो ठीक किता। 16 कने यीशुए चेतावनी देईकरी उना जो हुकम दिता, “कि मेरे बारे च कुसी ने भी मत दसदे कि मैं परमेश्वर दा पुत्र है।” 17 ताकि जडा बचन यशायाह परमेश्वरे दा संदेश देणेबाले बोलया था सै पूरा हो: 18 “दिखा, ए मेरा सेवक है, जिसयो मैं चूणया है, मेरा प्यारा, जिसते मेरा मन खुश है, मैं अपनी आत्मा उस पर पांणी है, कने उनी होरनी जातियां जो न्याय दा संदेश देणा। 19 ना उनी कोई लडाईं करणी, कने ना उनी कोई हल्ला पाणा, कने ना ही सै लोकां बिच घमंडी साईं जोंरे ने कोई भाषण नी देणा। 20 उनी कुसदा भी नुकसान नी करणा जडा भजयो टुटयो सरकंडे साईं कमजोर न, कने जिसयो भी कोई समस्या है सै सुलगती बतिया साईं न, उनी इसा जो कोई नुकसान नी करणा, पर उनी पक्का करणा कि न्याय किता जाए। 21 कने होरनी जातियां उदे नाए पर आस रखणी है।” 22 तालू लोक इक अन्ने कने गुंजे जो जिदे च बुरी आत्मा थी, उसयो उदे बाल लेई आये, कने उनी उसयो ठीक किता कने सै गुंजा बोलणा कने उसयो मिलणा लग्गी पिया। 23 इसा गल्ला पर सारे लोक हेरान होए, कने बोलणा लग्गे, “क्या ए माणु मसीहा होई सकदा है, जडा राजा दाऊदे दे बंशे ला है, जिसयो असां नियाला दे न।” 24 पर फरीसियां ए गल्ल

सुणीकरी बोलया, ए तां बुरियां आत्मा दे सरदार शैताने दिया सहायता लेईकरी बुरियां आत्मा जो कडदा है। 25 उनी उना दे मने दी गल्ल सुणीकरी उना ने बोलया, “अगर कुसी राज्य च लोक अपु च ही लडदे रेगे तां सै राज्य बडे बकते तक नी टिकी सकदा है। कने अगर कुसी घरे दे माणु अपु च ही लडी पोंगे तां सै घर नी बणी सकदा।” 26 अगर शैतान ही शैताने जो कड़े, तां उनी अपना ही बैरी होई जाणा, तां उनी अपना ही नाश करी लेणा है, तां फिरी उस दा राज्य कियां बदी सकदा है, 27 अगर मैं शैताने दिया मददा ने बुरियां आत्मा जो कडदा है, तां तुहाडे चले कुसदिया मददा ने बुरियां आत्मा जो कडदे न? इस ताईं उना ही तुहाडा न्याय करणा है। 28 पर अगर मैं परमेश्वरे दिया आत्मा दिया सहायता ने बुरियां आत्मा जो कडदा है, तां परमेश्वरे दा राज्य तुहाडे बाल आई पुज्जा है। 29 जालू दीकर तुसां जोंरे बाले माणुए जो नी बनगे, तां तुसां उदे घरे च नी बडी सकदे कने उदियां चीजां जो नी चोरी सकदे ना। 30 “जडा मेरे सोगी नी है, सै मेरे खिलाफ है, कने जडा मेरे सोगी नी बटोलदा है, सै खलारपा है। 31 इस ताईं तां मैं तुसां ने बोलदा है, कि माणुए दी ओलादी दे सारे पाप कने निंदा जडा सै परमेश्वर या कुसी दे खिलाफ करदे न, परमेश्वरे उना दे पाप माफ करी देणे न, पर जडा कोई पबित्र आत्मा दे खिलाफ निंदा करणा, तां सै परमेश्वरे कदी भी माफ नी करणा है। 32 पर जडा कोई माणुए दे पुत्रे दे बारे च कोई बुरी गल्ल बोलगा, उदा ए अपराध माफ होई जाणा, पर जडा कोई पबित्र आत्मा दे बारे च बुरा बोलगा, उदी ए गलती ना तां इस लोक च ना ही ओणे बाले युग च माफ होणी।” (aiōn g165) 33 “अगर सख खरा है, तां उदे फले जो भी खरा होणा, अगर सख बेकार है, तां उदे फल भी बेकार होणे न, क्योंकि सख फले ने ही पछेणया जांदा है।” 34 “तुसां जहरीले सपां दे बचयां साईं न, तुसां बुरे होईकरी कियां खरियां गल्लां बोली सकदे न? क्योंकि जडा मने च भरया है सै ही मुए च ओंदा है। 35 इक भला माणु मने दे भले भंडारे ला भलियां गल्लां कडदा है, कने इक बुरा माणु मने दे बुरे भंडारे ला बुरियां गल्लां कडदा है। 36 कने मैं तुसां ने बोलदा है, कि जडियां-जडियां बेकार गल्लां माणुए बोलणियां न, उना सारियां गल्लां दा लेखा न्याय दे रोजे देणा है। 37 क्योंकि परमेश्वरे न्याय करणा है कने हर इक माणुए जो उदियां बोलियां गल्लां दिया बजा ने दोषी या निर्दोषी ठहराया जाणा है।” 38 इसा गल्ला पर मते व्यवस्था जो सिखाणे बालयां कने फरीसियां उसयो बोलया, “गुरु जी, असां तिजो ला इक स्वर्ग दा कोई चमत्कार दिखणा चांदे न, जिसने पता लग्गे कि तिजो परमेश्वरे भेजया है।” 39 पर यीशुए उना जो जबाब दिता, तुसां चमत्कार इस ताईं मंगदे न क्योंकि तुसां बुरे लोक न कने भरोसा नी करदे न, पर परमेश्वरे दा संदेश देणेबाले योना ने जडा होया उस जो छडी करी होर कोई तुसां जो चमत्कार नी मिलणा है। 40 योना तिन्न रात दिन पाणुए दे इकी बडी बडिया मच्छिया दे पेटे च रिया, तियां ही, मैं माणुए दे पुत्रे भी तिन्न रात दिन धरतिया दे अंदर रेणा। 41 नीनवे शेरने दे लोकां न्याय दे रोजे इस युगे दे लोका सोगी उठी करी उना जो दोषी ठेहराणा, क्योंकि उना योना दा प्रचार सुणीकरी मन बदलया, पर तुसां तां पश्चाताप करणे मना करदे न; कने दिखा, ऐथु तां सै है जडा योना ला भी बडा है। 42 दक्षिणे दिया राणिया न्याय दे रोजे इस युगे दे लोकां सोगी उठी करी उना जो दोषी ठेहराणा, क्योंकि सै सुलैमान दा ज्ञान सुणने ताईं बडी दुरे ला आयियो थी; कने दिखा, ऐथु सै है जडा सुलेमाने ला भी बडा है, पर तुसां पश्चाताप करणे मना करदे न। 43 “जालू बुरी आत्मा माणुए ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है। 44 तां सै अपने आपे ने बोलदी है, कि जिस माणुए ला मैं आई है उसी माणुए दे अंदर चलीं जां कने बापस आई करी उस माणुए जो उस खाली घरे सां पांदी है, जिसयो छेल करी साफ कने सजाया हो।” 45 तालू बुरी आत्मा जाई करी अपने ला होर बुरियां सत्त आत्मा जो अपने सोगी लेई ओंदी है, कने सै उस माणुए दे अंदर जाई करी रेणा लगदी है, कने उस माणुए दी हालत पहले ला भी बुरी होई जांदी है। इस युगे दे बुरे लोकां ने भी इयां ही होणा है। 46 जालू सै भिडा ने गल्लां करा दा ही था, तां उस दी माता कने भाई बाहर खडुतयो थे, कने उसने गल्लां करणा चांदे थे। 47 कुनकी उसने बोलया, “दिख, तेरी माता कने तेंरे भाई बाहर खडुतयो न, कने तिजो ने गल्लां करणा चांदे न।” 48 ए सुणीकरी उनी बोलणे बाले जो जबाब दिता, “कुण है मेरी माता? कने कुण न मेरे भाई?” 49 कने अपने चेलयां पासे हथ करिके बोलया,

दिखा, “मेरी मां कने मेरे भाई ऐ न। 50 क्योंकि जडा कोई मेरे स्वर्गीय पिता दिया मरजिया पर चले, से ही मेरा भाई, कने बेहन, कने माता है।”

**13** तिसरी रोजे यीशु घरे ला निकली करी दरियाये दे बखे जाई बैठा। 2 कने उस बाल मती भरी भीड़ गिठी होई गई, कने से क्तिस्तिया पर चढ़ी गिया, कने सारी भीड़ दरियाये दे बखे खडोई रेई। 3 कने उनी उना ने कहाणियां च मतियां सारियां गल्लां बोलियां, “दिखा, इक बी रांणे बाला बी रांणा निकलया। 4 रांणे बेले थोडे बी रस्ते दे बखे पेई गे कने सै ता पछियां आई करी चुगी ले। 5 कने थोडे बी पथरलिया जमिना पर पे जिथु उसयो जादा मिटी नी मिली, कने जादा मिटी नी होणे दिया बजा ला तौली लूंगी पै। 6 कने जालू खडी धूप पेई, तां सै फकुई गे, क्योंकि उना दिया जडा डुगियां नी थियां तां सै सुकी गे। 7 कने थोडे बी झिल्लां च पै, कने जालू झिल्ल बडुऐ तां उना से बी डकी ले। 8 पर थोडे बी खरिया जमिना पर पे, कने सै बी लूंगे, कने मते सारे फल देणेबाले होए; केईयां सौ गुणा, केईयां सठ गुणा, केईयां ती गुणा।” 9 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 10 कने चेलयां यीशुए बखे आई करी पुछया, “तू उना ने कहाणिया च कजो गल्लां करता है?” 11 उनी जबाब दिता, “तुहांजो स्वर्गे दे राज्य दे भेदां जो समझणे दी समझ दितियो है, पर उना जो नी। 12 जिस कुसी बाल सै समझणे दी इच्छा है, जडा परमेस्वर सिखांदा है, उसयो होर देणा, पर जडा समझणे दी इच्छा नी रखदा, कि मै क्या सिखांदा, तां सै जडा समझया है, परमेस्वर से भी उसला लेई लेणा।” 13 मै उना ने कहाणिया च गल्लां इस ताई करता है, कि सै दिखदे होए भी, नी दिखदे; कने सुणदे होए भी, नी सुणदे न; कने ना समझदे न। 14 कने उना दे बारे च यशायाह दी ऐ भविष्यवाणी पूरी होई है: “तुसां कन्ना ला सुणना तां है, पर समझणा नी है; कने हखी ला दिखणा ता है, पर कुछ मिलणा नी है।” 15 “क्योंकि इना लोकां दा मन कठोर होई गिया है, कने सै कन्ना ला उच्चा सुणदे न, कने उना अपणिया हखी बंद करी लियां न; कुथी इयां ना हो कि सै हखी ला दिखन, कने कना ला सुणन कने मने ला समझन, कने अपने पापां दा फ़ात्ताप करणे, कने मै उना जो ठीक करे।” 16 “पर धन्य न तुहाडियां हखी, क्योंकि सै दिखदियां न; कने तुहाडे कन्न, कि सै सुणदे न। 17 क्योंकि मै तुसां ने सच्च बोलदा है, कि मते परमेस्वर दा संदेश देणेबाले कने धर्मी चांदे थे कि जडियां गल्लां तुसां दिखदे न, दिखन, पर दिखियां नी; कने जडियां गल्लां तुसां सुणदे न, सुणन, पर सुणियां नी।” 18 हुण तुसां भी रांणे बाले दी कहाणिया दा मलबब सुणा: 19 “जडा कोई राज्य दा बचन सुणीकरी नी समझदा, उदे मने च जडा कुछ राया था, उसयो शैतान झट पट जादां कने उना दे मने ला बचन कडी दिन्दा है जडा उना सुणया था; ऐ सै ही बी है, जडा रस्ते दे बखे राया था। 20 कने जडा पथरलिया जमिना च राया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेंदे न। 21 पर परमेस्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या परेशानी होई है, तां सै बचना ला पिच्छे हट्टी जांदे न। 22 जडे बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रेंदा है, ऐ सब परमेस्वर दे बचन च स्कावट पांदा है। कने सै बचन उना ताई फायदेमंद नी होँदा। (aiōn g165) 23 कने जडे बी खरिया जमिना पर रायो थे, ऐ सै माणु न, जडे बचन सुणीकरी ग्रहण करदे न, कने फल दिन्दे न, कोई सौ गुणा, कोई सठ गुणा, कने कोई ती गुणा।” 24 यीशुए उना जो इक होर कहाणी सुणई, “स्वर्ग दा राज्य उस माणुए साई है जिनी अपने खेते च खरा भी राया। 25 पर जालू लोक सोआ दे थे तां उना दे दुशमण आई करी कणका बिच जंगली भी राई करी चली गे। 26 जालू लूंगा निकलियां कने बेलां लगियां, तां जंगली दांणयां दियां लूंगा भी मिलणा लगियां।” 27 इस गल्ला पर घरे दे नौकरां आई करी उसला बोलया, हे मालिक, तू क्या अपने खेतरां च खरा भी नी लाया था? फिरि खेते च जंगली दाणे दे बूटे कुथु ला आऐ? 28 उनी उना जो बोलया, ऐ कुसी दुशमणे दा कम्म है। नौकरां उसला बोलया, तेरी क्या मर्जी है, कि असां जाई करी जंगली बूटयां जो जडा ला पुटी देन? 29 उनी बोलया, नी, ऐसा मत करा इयां ना होऐ कि जंगली दाणे दे बूटयां जो जडा ला पुटे बेले उना सोगी कणका दे बूटे भी पुटई जान। 30 बढणे दीकर दोनो जो बडुणा दिया, कने बढणे दे

बेले मै बढणे बालयां ने बोलणा है, कि पेहेले जंगली दाणे दे बूटयां जो बटोली करी फुकणे ताई गढियां बन्नी लियां, कने कणका जो मेरे खेते च गटेरा। 31 उनी उना जो इक होर कहाणी सुणई, “स्वर्ग दा राज्य इक राई दे दाणे साई है, जिसयो कुनी माणुए लेईकरी अपने खेतरां च राई दिता। 32 सै सारे बियां ला छोटा होँदा है, पर जालू सै बडा होई जांदा है तालू सै सारे साग पतयां ला भी बडा होँदा है; कने ऐसा सख बणी जांदा है, कि अम्बरे दे पंछी आई करी उदिया डालियाँ पर घोंसले बणादे न।” 33 उनी इक होर कहाणी उना जो सुणई, “स्वर्ग दा राज्य खमिरे (तराक) साई है, जिसयो कुनी जाननिया लेईकरी तीन पसेरी आटे च मलाई दिता कने होँदे-होँदे सै सारा खमीर बणी गिया।” 34 ऐ सारियां गल्लां यीशुए कहाणिया दे जरिये लोकां ने बोलियां, कने जडा कुछ सै सिखांदा, सै कहाणिया ने ही सिखांदा था। 35 कि जडा बचन परमेस्वर दा संदेश देणेबाले बोलया था, सै पूरा होऐ: “मै कहाणी बोलणे ताई अपना मु खोलणा है: मै उना गल्लां जो जडियां संसारे दे शरू होणें ला गुन न उना जो सामणे लोणा।” 36 तालू यीशु भिडा जो छडी करी घरे च आया, कने उदे चेलयां उदे बाल आई करी बोलया, “खतेरे दे जंगली दाणे दी कहाणी समझई दे।” 37 उनी उना जो जबाब दिता, “खरे भी रांणे बाला मै माणुए दा पुत्र है।” 38 खेतर संसारे दे लोक न, खरा बी राज्य दे लोक न, कने जंगली भी शैताने दे लोक न। 39 जिनी दुशमणे उना जो राया सै शैतान है; बढणा संसारे दा खत्मा हे: कने बढणे बाला स्वर्गदूत है। (aiōn g165) 40 जियां जंगली दाणे दे बीऐ दे बूटे फुकणे ताई गटेरदे न, तियां ही संसारे दे खात्मे च होणा है। (aiōn g165) 41 मै माणुए दे पुत्रे अपने स्वर्गदूते जो भेजणा, कने उना उदे राज्य च सारियां पाप दियां बजां जो, कने बुरे कम्म करणे बालयां जो उखाडी देणा है। 42 कने स्वर्गदूतां उना जो अग्गी दे कुण्डे च पांणा, कने उना ओथु रौणा कने दंद पीणे न। 43 उस बेले धर्मियां अपने पिता दे राज्य च सूरजे साई चमकणा है। जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 44 “स्वर्ग दा राज्य खतेरे च लुकयो खजाने साई है, जडा कुसी माणुए जो मिलया है, कने उनी लुकाई रखया, खुशिया दे मारयो जाई करी उनी अपना सारा कुच बेची करी, कने उस खेतेरे जो खरदी लिया।” 45 “फिरि स्वर्ग दा राज्य इक व्यापारिये साई है, जडा खरे मोतियाँ दिया तोपा च था। 46 जालू उसयो इक बडा भरी मेहंगा मोती मिला, तां उनी अपना सारा कुच बेची दिता, कने सै मोती खरीदी लिया।” 47 “फिरि स्वर्ग दा राज्य उस मच्छियां पकडने बाले बड्डे जाल्ले साई है, जिसयो समुद्रे च पाया, कने सै हर तरा दियां मच्छियां जो बटोली लेई आया। 48 कने जालू जाल्ल भईई गिया, तां मखबरे जाल्ले जो छिंज्जी करी किनारे जो लेई आये, कने बेईकरी खरियाँ-खरियाँ मच्छियां जो भांडयां च पाया कने बेकार-बेकार सुटी दितियां। 49 संसारे दे अंत च इयां ही होणा है; स्वर्गदूते आई करी बुरे लोकां कने धर्मियां जो लग करणा, (aiōn g165) 50 कने बुरे लोकां जो अग्गी दे कुण्डे च पांणा। ओथु उना रौणा कने दंद पीणे न।” 51 “तुसां क्या ऐ सारियां गल्लां समझी गे?” उना उसला बोलया, “हाँ।” 52 उनी उना ने बोलया, “ताई तां हर इक व्यवस्था जो सिखाणे बाला जडा स्वर्ग दे राज्य दा चेला बंणया है, उस हरस्थ दे साई है जडा अपनी पराणियां कने नोइयां चिजां जो अपने भंडारे ला कडदा है जिथु सै दुजयां दिया मदद करणे ताई उना जो गटेरदा।” 53 जालू यीशु सारी कहाणी बोली बैठा, तां ओथु ला चली गिया। 54 कने अपने देशे च आई करी उना दे यहूदी जंज घर च उना जो ऐसा उपदेश देणा लगा; कने सै हेरान होईकरी बोलणा लगे, “कि इसयो ऐ अकल कने चमत्कारी कम्म करणे दी शक्ति कुथु ला मिली? 55 क्या ऐ तरखणे दा जागत नी है? कने क्या इदिया माता दा ना मरियम कने इदे भाईयां दे ना याकूब कने यूसुफ कने शमौन कने यहूदा नी न? 56 कने क्या इदियां सारियां बेहणा साडे बिच नी रेंदिया न? फिरि इनी ऐ सारा कुछ कुथु ला सिखाया?” 57 इयां उना उदिया बजा ला ठोकर खादी, पर यीशुए उना जो बोलया, “परमेस्वर दा संदेश देणेबालयां दा अपने ग्रां कने घरे छडी करी, उसयो हर कुथी इज्जत मिलदी है।” 58 कने उनी ओथु उना दे भरोसा नी करणे दिया बजा ला जादा अनोखे कम्म नी किते।

**14** कने हुण राजा हेरोदेसे यीशुए दे कम्मा दी चर्चा सुणी जडे यीशु करा दा था। 2 कने अपने सेवकां ने बोलया, “ऐ सेई यहून्ना बपतिस्मा देणेबाला यहून्ना है! सै मरयां च जिन्दा होई गिया है, ये ही बजा है कि उदे बाल इना चमत्कारां जो

करणे तां परमेश्वर दी शक्ति है।” 3 क्योंकि हेरोदेसे अपने भाई फिलिप्पस दी घरे बाली हेरोदियास दिया बजा ला, यहून्ना जो पकड़ी करी बन्या, कने जेला च पाई दिता था। 4 क्योंकि यहून्ने उसयो बोलया था, कि इसा जो रखणा तिजो तांई ठीक नी है। 5 कने सै उसयो मारी देणा चांदा था, पर सै लोकां ला डरदा था, क्योंकि सै उसयो परमेश्वरे दा संदेश देणेबाला मंदे थे। 6 पर जालू हेरोदेस दा जन्म दिन आया, तां हेरोदियास दिया कुडिया त्योहारे च नची करी हेरोदेसे जो खुश किता। 7 इसा गल्ला पर उनी कसम खाई करी बचन दिता, कि जडा कुछ तू मंगगी, सै मैं तिजो दिंगा। 8 उना अपणिया माता दे बहकवे च आई करी बोलया, “यहून्ना बपतिस्मा देणेबाले दा सिर थालिया च रखीकरी मिंजो ऐथू मंगाबाई दे।” 9 ऐ सुणीकरी राजा बडा उदास होया, पर अपणिया कसमां, कने सोगी बोणे बालयां दिया बजा ने, हुकम दिता, कि यहून्ना दा सर इसा जो देई दिया। 10 राजे इक सिपाइऐ जो हुकम दिता, कि जेला च जा, कने यहून्ना दा मुंड बड़ी करी उदे बाल लेईकर आ। 11 सिपाइऐ जेला च जाई करी उदा सिर कटया, कने इक थालिया च रखीकरी लेई आया कने उसा कुडिया जो देई दिता, कने कुडिया अपणिया माता जो देई दिता। 12 तालू यहून्ना दे चेलयां उडिया लाशा जो ले जाई करी दबाई दिता, कने जाई करी यीशुऐ जो खबर दिती। 13 जालू यीशुऐ ऐ सुणा, तां किस्तिया च चढी करी ओथु ला कुसी सुनसान जगा जो, एकांत च चली गिया; कने लोक ऐ सुणीकरी शेहरे-शेहरे ला पैदल चली करी उदे पिच्छे चली गे। 14 उनी निकली करी मते भरे लोकां दी भीड दिखी, कने उना पर तरस खादा, कने उनी उना चे जडे मरीजां जो ठीक किता। 15 जालू संज होई, तां उदे चेलयां उदे बाल आई करी बोलया, “ऐ तां सुनसान जगा है, कने देर होआ दी है, कने लोकां जो भेजी दिया ताकि सै प्रां च जाई करी अपने तांई खांणा खरीदी लेना।” 16 पर यीशुऐ उना जो बोलया, “उना दा जाणा जरूरी नी है। तुसां ही इना जो खाणे जो दिया।” 17 उना उसला बोलया, “साडे बाल ऐथू पंज रोटियां कने दो मछियां जो छडी करी होर कुछ नी है।” 18 उनी बोलया, “उना जो ऐथू मेरे बाल लेई ओआ।” 19 तालू उनी लोकां जो घाए पर बोणे जो बोलया, कने उनी सै पंज रोटियां कने दो मछियां लियां; कने स्वर्ग पासे दिखीकरी धन्याबाद किता, कने रोटियां तोडी-तोडी करी चेलयां जो दितियां, कने चेलयां लोकां जो। 20 सारे खाई करी रजी गे। कने जालू रोटी खायी बैठे तालू चेलयां बाकी बचियाँ रोटियां कने मछियां गिठेरेंड्यां कने उसला बाहरा टोकरियाँ भरई गियां। 21 कने खाणे बाले के जनानिया कने बचयां जो छडी करी लगभग पंज हजार मर्द थे। 22 कने उनी तोले-तोले अपने चेलयां जो किस्तिया पर चढाने तांई बोलया, ताकि सै उसला पहले पार पुज्जी जान, तालू दीकर कि मैं लोकां जो भेजी करे। 23 सारे लोकां जो भेजणे बाद, यीशू पहाडे पर प्राथना करणे तांई गिया; संज्ञा जो सै ओथु किल्ला था। 24 उस बेले किस्ति झिल्ला बिच लेहरां ने डगमगा दी थी, क्योंकि होआ सामणे ला ओआ दी थी। 25 कने तां भयागा तडके यीशू झिल्ला पर चली करी उना बाल आया। 26 पर जालू चेलयां उसयो झिला पर चलदे दिखया, तां से घबराई गे, कने बोलणा लग्गे कि, “भूत है ऐ।” 27 पर यीशुऐ उना ने झट गल्लां कितियां कने बोलया, “हिम्मत रखा, डरा मत, मैं यीशू है।” 28 पतरसे उसयो जबाब दिता, “हे प्रभु, अगर तू है, तां तू मिंजो अपने बाल पाणिऐ पर चली करी ओणे दा हुकम दे।” 29 उनी बोलया, “आ।” तालू पतरस किस्तिया ला उतरी करी यीशुऐ पासे चलणा लग्गा। 30 पर होआ जो महसूस करी डरी गिया, कने जालू डबणा लगा तां चिलाई करी बोलया, “हे प्रभु, मिंजो बचा।” 31 यीशुऐ झट हथ गां करी के उसयो थमी लिया, कने उसला बोलया, “हे घटबिचारी, तू कजो शक किता?” 32 जालू सै किस्तिया पर चढी गिया, तां होआ भी स्की गेई। 33 इसा गल्ला पर जडे किस्तिया पर थे, उना उसयो झुकी करी नमस्ते करी के बोलया, “सच्चि, तू परमेश्वरे दा पुत्र है।” 34 सै पार उतरी करी गन्नेसरत प्रदेश दे कन्डे पुज्जे। 35 कने ओथु दे लोकां उसयो पछेणी लिया कने अखे-बखे दे सारे देशे च बोली भेजया, कने सारे बिमारां जो उदे बाल लेई आये। 36 कने उसने बिनती करणा लग्गे कि सै सिर्फ अपने कपडयां जो छुणा दे, कने जितणे भी छुं दे, सै सारे ठीक होई जादे थे।

**15** तालू यरूशलेम ला कुछ फरीसी कने व्यवस्था जो सिखाणे बाले यीशुऐ बाल आई करी बोलणा लग्गे, 2 “तेरे चले पूर्वजां दे रीती रिबाबां जो कजो टालन्दे न, कि बिना हथ धोतयो रोटी खादे न?” 3 यीशुऐ उना जो जबाब

दिता, “तुसां अपने बणायो नियमा दिया बजा ला कजो परमेश्वरे दे हुकमे जो टालन्दे न?” 4 क्योंकि परमेश्वरे बोलया है, “कि अपने माता पिता दा आदर करा, कने जडा कोई अपने माता पिता जो श्राप दिगा, सै पक्का मारी देणा।” 5 “पर तुसां लोकां जो इजाजत दिन्दे न की, अपने माता-पिता जो ऐ बोली दिया कि जडा कुछ मैं तुहांजो देणा था, सै मैं परमेश्वर जो देणे दी कसम खादियो है।” 6 तां सै अपने पिता दा आदर नी करता है, इयां ही तुसां भी अपने रीती रिबाजा दिया बजा ला परमेश्वरे दा हुकम तोडी दिताया है। 7 यशायाह तुहाडे बारे च ठीक बोलया था, जिनी पबित्र शाब्द च तुसां कपटियां दे बारे च लिखया है, 8 “कि ऐसे लोक गल्लां ने तां मेरा आदर करदे न, पर इना दे मन मिंजो ला बडे दूर न। 9 कने ऐ बेकार ही मेरी भक्ति करदे न, क्योंकि माणुऐ दे तरकियां जो धर्म उपदेशे बणाई करी सिखांदे न।” 10 कने यीशुऐ लोकां जो अपने बाल सदीकरी उना ने बोलया, “सुणा, कने समझ। 11 जडा मुऐ च जांदा है, सै माणुऐ जो अशुद्ध नी करता है, पर जडा मुऐ ला निकलदा है, सै माणुऐ जो अशुद्ध करता है।” 12 तालू चेलयां आई करी बोलया, “क्या तिजो ऐ पता है कि फरीसियां ऐ बचन सुणीकरी टोकर खाई करी?” 13 उनी जबाब दिता, “हर इक बूटा जडा मेरे स्वर्गीय पिता नी लाया है, सै पुटई जाणा है।” 14 “उना जो जाणा दिया; सै रस्ता दसणे बाले अन्ने न, कने अगर अन्ना अन्ने जो रस्ता दसे, तां दोनो खुंटे च पोणा है।” 15 ऐ सुणीकरी पतरसे उसला बोलया, “ऐ कहाणी सांझो समझाई दे।” 16 उनी बोलया, “क्या तुसां भी हले दीकर नी समझे?” 17 “क्या तुहांजो पता नी है, कि जडा कुछ मुऐ च जांदा है सै पेटे च पौदा है, कने संडास ने बाहर निकली जांदा है? 18 पर जडा कुछ मुऐ ला निकलदा है, सै मने ला निकलदा है, सै ही माणुऐ जो अशुद्ध करता है। 19 क्योंकि बुरे बिचार, मारणा, परस्त्रीगमन, व्यभिचार, चोरी, झूठी गवाई कने निंदा मने ला ही निकलदे न। 20 ऐ ही है जडे माणुऐ जो अशुद्ध करदे न, पर बिना हथ धोतयो खांणा खाणां माणुऐ जो अशुद्ध नी करता है।” 21 यीशू ओथु ला निकली करी, सर कने सैदा दे देशां जो चली गिया। 22 उस देशे ला इक कनानी जनानी आई, कने जोरे-जोरे ने बोलणा लग्गी, “हे प्रभु, दाऊदे दी ओलाद, मिंजो पर दया कर, मेरिया कुडिया जो बुरी आत्मा बड़ी भरी सतांती है।” 23 पर उनी उसा जो कोई जबाब नी दिता, कने उदे चेलयां आई करी उसने बिनती करिके बोलया, “इसा जो भेजी दे; क्योंकि सै साडे पिच्छे डडदी ओआ दी है।” 24 यीशुऐ जबाब दिता, “इसाएले दे घराने दियां गवाचियां भेडां जो छडी करी मिंजो होर कुसी बाल नी भेजया है।” 25 पर सै आई, कने उसयो नमस्ते करिके बोलणा लग्गी, “हे प्रभु, मेरी मदद कर।” 26 उनी जबाब दिता, “बचयां दी रोटी लेईकरी कुतयां दे अग्गे पाणा ठीक नी है।” 27 उनी बोलया, “सच्च है प्रभु; पर कुते भी सै ही टुकडे खांदे न, जडा उना दे मालिकां दे मजे ला हेठ पोंदे न।” 28 इसा गल्लां पर यीशुऐ उसा जो जबाब दिता, “हे जनानी, तेरा भरसा बडा है; जियां तू चांदी है, तेरे तांई तियां ही हो।” कने उसा दी कुडी उसी बेले ठीक होई गेई। 29 यीशू ओथु ला गलील झिला बखे आया, कने पाहडे पर चढी करी ओथु बेई गिया। 30 तालू भिडा दी भीड उदे बखे आई। कने अपने सोगी केई लंगडे, अन्ने, जल्ले, टुंडे, कने होर मते सारयां जो लेईकरी उदे बाल आये; कने उना जो उदे पैरा च रखी दिता, कने उनी उना सारयां जो ठीक किता। 31 जालू लोकां दिखया कि, जल्ले बोलणा, कने टुंडे ठीक होंणा, कने लोट्टे चलदे, कने अन्नयां जो मिलदा है, तां हेरान होऐ कने इसाएले दे परमेश्वरे दी बडाई करणा लग्गे। 32 यीशुऐ अपने चेलयां जो सदीकरी बोलया, “ऐ लोक मिजों सोगी तिन्ना रोजां ला रे दे न। उना बाल खाणे तांई कुछ नी है कने मिंजो इसा गल्ला पर तरस ओआ दा है; कने मैं इना जो भूखा नी भेजणा चांदा है; कुथी इयां ना हो कि सै रस्ते च थकी करी रेई ना जान।” 33 चेलयां उसयो बोलया, “सांझो ऐथू सुनसान जगा च कुथु ला इतणियां रोटियां मिलगियां कि असां इतणियां बडिया भिडा जो खुआन?” 34 यीशुऐ उना ला पछया, “कि तुहाडे बाल कितणियां रोटियां न?” उना बोलया, “सत रोटियां कने थोडियां दियां छोटियां मछियां न।” 35 तालू यीशुऐ लोकां जो धरतिया पर बोणे दा हुकम दिता कने सै बेई गे, 36 कने उदे बाद उनी सै सत रोटियां कने मछियां लियां, कने परमेश्वरे दा धन्यबाद करिके तोडियां, कने अपने चेलयां जो रोटीयां तोडी करी दिन्दा गिया ताकि सै उना जो लोकां च बंडी देन। 37 फिरी बादे च सारे लोक खाई करी रजी गे कने उदे बाद चेलयां बाकी बचयो टुकडयां जो सत

टोकरीयां च भरी लिया। 38 कने खाने बालयां चे जगानिया कने बचयां जो छडी करी चार हजार मर्द थे। 39 तालू से भिडा जो भेजी करी किस्तिया पर चढया, कने मगदन देशे दिया सीमा पर आया।

**16** फरीसियां कने सदकियां यीशुए बाल आई करी उसयो परखणे ताई बोलया, “कि सांझो स्वर्गो दा कोई चमत्कार दस।” 2 उनी उना जो जबाब दिता, “संझा जो तुसां बोलदे न, कि मौसम खरा रेंणा है, क्योंकि अम्बर लाल है।” 3 कने ब्यागा जो बोलदे न, कि अज तफान ओणा क्योंकि अम्बर लाल कने धुंधला है तुसां अम्बरे दे लखण दिखीकरी फरक दसी सकदे न, पर बकते दे निशाणा दा फरक कनी दसी सकदे न? 4 “इस युगे दे बुके कने व्यभिचारी लोक निशाण तोपदे न, पर योना दे निशाणे जो छडी करी उना जो कोई होर निशाण नी मिलणा।” कने सै उना जो छडी करी चली गिया। 5 कने चेले झीला दे पार जांदे बेले रोटियां लेणा भली गियो थे। 6 कने यीशुए उना जो चेतावनी दिती कि, “फरीसियां कने सदकियां दे खमिरे ला बचणे ताई चौकने रेनयो।” 7 सै अपु चे बिचार करिके बोलणा लगे, कि यीशुए ऐ इस ताई बोलया क्योंकि “असां रोटियां नी लौदियां।” 8 ऐ जाणी करी, यीशुए उना ने बोलया, “हे घटबिश्वासियों, तुसां कजो अपु चे बिचार करा दे कि सांझे बाल रोटिया नी न?” 9 तुसां क्या हले दीकर नी समझे? कने उना पंजा हजारों दियां पंज रोटिया याद नी न, कने ना ही ऐ कि कितणियां टोकरीयां चुकियां थियां? 10 कने ना ही उना चार हजार दियां सत रोटियां, कने ना ही ऐ कि तुसां कितणियां टोकरीयां चुकियां थियां? 11 “तुसां कनी समझदे कि मैं तुसां ने रोटियां दे बारे च नी बोलया? पर फरीसियां कने सदकियां दे बचना ला चौकने रेणे दे बारे च बोलया है।” 12 तालू उना जो समझ आया, कि उनी रोटिया जो खमिरे ताई नी, पर फरीसियां कने सदकियां दिया शिक्षा ला चौकने रेणे ताई बोलया था। 13 यीशु कैसरिया फिलिप्पी दे प्रदेशे च आया कने उनी अपने चेलयां ला पुछया, “लोक मिंजो, माणुए दे पुत्रे जो क्या बोलदे न?” 14 चेलयां जबाब दिता कुछ लोक बोलदे न कि तुसां यहूना बपतिस्मादाता न; पर कोई-कोई एलियाह, कने कोई-कोई बोलदे न कि पुराणे जमाने दे परमेश्वरे दा संदेश सुनाणे बालयां चे कोई इक है। 15 यीशुए उना जो बोलया, “पर तुसां मिंजो क्या बोलदे न?” 16 शमोन पतरसे जबाब दिता, “तू जिंदे परमेश्वरे दा पुत्र मसीह है।” 17 यीशुए उसयो जबाब दिता, “हे शमोन, योना दे पुत्र, तू धन्य है; क्योंकि मासे या खने नी, पर मेरा पिता परमेश्वर जडा स्वर्ग च है, उनी ऐ गल्ल तिजो पर प्रगट कितियो है। 18 कने मैं भी तिजो ने बोलदा है, कि तू पतरस है, कने मैं इसी पथरे पर अपनी कलीसिया बणाणी, कने अधोलोक दे फाटक उदे पर प्रबल नी होणे।” (Hadēs 986) 19 “मैं तिजो स्वर्ग दे राज्य दियां चाबियां दिना: कने जडा कुछ तू धरतिया पर बणागा; सै स्वर्ग च भी बाना, कने जडा कुछ तू धरतिया पर खोलगा, सै स्वर्ग पर भी खुलगा।” 20 तालू उनी चेलयां जो समझाया कि, “कुसी ने भी मत बोलदे कि, मैं मसीह है।” 21 उस बेले यीशु चेलयां जो दसणा लगा, “मिंजो जरूरी है कि मैं यरूशलेम जां, कने यहूदी अगुवे, बड़े याजकां, कने यहूदी व्यवस्था जो सिखाणे बालयां दे हथां ला मते दुख झेलें, कने सै मिंजो मारी देन, कने फिरी मैं तिन्ना रोजां बाद मरयां चे जिन्दा होई जां।” 22 पतरस यीशुए जो बखिया लेई गिया कने इसा गल्ला पर झिडकणा लग्गा, “हे प्रभु, परमेश्वर ना करे। कि तिजो पर कदी ऐसा होऐ।” 23 उनी मुडी करी पतरसे जो बोलया, “शैताने सांई कम्म करणा बंद कर! मेरे सामणे ला दूर होई जा! क्योंकि तू परमेश्वरे सांई नी, पर तू माणुए सांई सोचा दा है।” 24 यीशुए भिडा जो अपने चेलयां समेत अपने बाल सदकियां बोलया, “जडा कोई मेरा चेला बनणा चांदा है, उसयो अपणिया शरिरी दियां इच्छां कने जडियां तरकिबां बणाईयां उना जो छडी करी! मिजो तांई मरणे जो तैयार रेण पोणा, सेई मेरा चेला बणी करी मिजो फिच्छे चली सकदा है।” 25 कोई माणु ऐसा नी करगा कने अपने प्राणा जो बचाणा चांहगा, उनी परमेश्वर सोगी आत्मिक जिन्दगी जिणे दा मोका गबाई देणा है। पर जडा माणु मिजो पर भरोसा करगा कने मेरे श्भसमाचार दिया बजा ने मरगा उस माणुए जो परमेश्वरे सोगी सदा तांई दी जिन्दगी मिलणी। 26 अगर तुसां संसारे दा सब कुछ पाई लेगे कने परमेश्वरे सोगी सदा दी जिन्दगी जिणे दा मोका गबाई दिगे, तां उदा क्या फायदा? इक माणु परमेश्वरे जो क्या देई सकदा है, जडा उदी सदा दी जिन्दगी खरिदना? कुछ नी! 27 मैं, माणुए दे पुत्रे अपने स्वर्गदूते सोगी अपने पिता दिया महिमा च

ओणा है, कने उस बेले उनी हर इकी जो उदे कम्मा दे अनुसार उसयो फल देणा है। 28 मैं तुसां ने सच्च बोलदा है, “कि जडे ऐशु खडोतयो न, उना चे केई ऐसे न, कि जालू दीकर मिंजो, माणुए दे पुत्रे जो उदे राज्य च ओदे नी दिखी लेन, तालू दीकर मौता दा स्वाद नी चखणा है।”

**17** छे रोजां बाद यीशुए पतरस कने याकूब कने उदे भाई यहूना जो सोगी लिया, कने उना जो एकांत च कुसकी उच्चे पहाडे पर लेई गिया। 2 कने उना दे सामणे यीशुए दा रूप बदलई गिया। कने उदे कपडे चमकदार सफेद होई गे, 3 तालू उना तिन्ना चेलयां, परमेश्वरे दा संदेश देणेबाले मूसा कने एलियाह जो, जडे बडे पेहेले जिन्दा थे उना जो यीशुए सोगी गल्लां करदे दिखया। 4 इसा गल्ला पर पतरसे यीशुए जो बोलया, “प्रभु जी, साडा ऐशु रेंणा ठीक है, इस तांई असां ऐशु तीन तम्बू बणादे न, इक तरे तांई, इक मूसा तांई, इक एलियाह तांई।” 5 पतरस बोला दा ही था, तालू इक चमकीला बदल आया कने उना जो अपनी छाया ने ढकी लिया, बदले च परमेश्वरे जो बोलदे सुणया, “कि ऐ मेरा प्यारा पुत्र है, कने मैं इसला खुश है, कने जडा ऐ बोलदा है उसयो ध्यान ले ला सुणा।” 6 चेले ऐ सुणी के मुए भार पेई गे, कने बडे डरी गे। 7 यीशुए उना जो बखे आई करी छुता, कने बोलया, “उठा कने डरा मत।” 8 तालू उना अपने चारो पासे नजर मारी, तां मूसा कने एलियाह ओशु नी थे, कने उना जो सिर्फ यीशु ही मिल्ला। 9 जालू यीशु कने उदे तिन्ने चले पहाडे ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मैं, माणुए दा पुत्र मरयां चे जिन्दा ना होई जा।” 10 कने चेलयां उसला पुछया, “मूसा दी व्यवस्था जो सिखाणे बाले यहूदी गुरू कजो बोलदे थे मसीहा ला पेहेले एलियाह ओणा था? अगर ओणा था, तां हाली दिकर कजो नी आया सै?” 11 यीशुए उना जो जबाब दिता, “ऐ तां सच्च है कि एलियाह पेहेले आई करी सब कुछ सुधारणा है।” 12 पर मैं तुसां ने बोलदा है, “एलियाह ता पेहेले ही आई चुकया था, कने लोकां उसयो नी पछेणया; पर जियां सै करणा चांदे थे तियां ही उदे सोगी किता। इसी तरीके ने ही माणुए दे पुत्रे जो भी उना दे हथे ला दुख होणे ना।” 13 तालू चेलयां समझया कि उनी सांझो ने यहूना बपतिस्मा देणेबाले दे बारे च बोलया है। 14 जालू सै भिडा बखे पुज्जे, तां इक माणु उना बाल आया, कने गोडे भार बेईकरी बोलणा लग्गा। 15 “प्रभु जी, मेरे पुत्रे पर दया कर। क्योंकि उसयो मिगीं दे दैरे पोंदे न, उसयो बडी तकलीफ होंदी है, कने बार-बार अग्गी च, कने बार-बार पाणिए च पेई जांदा है। 16 कने मैं उसयो तरे चेलयां बाल लांदा था, पर सै उसयो ठीक नी करी सके।” 17 ऐ सुणीकरी यीशुए उना जो जबाब दिता, “अबिश्वासी लोकां, मैं कालू दीकर तुहाडे सोगी रेंगा, कने कालू दीकर तुहाडे अबिश्वास जो सेहन करगा? उसी जागते जो मेरे बाल लोआ।” 18 तालू यीशुए उसयो झिडकया, कने बुरी आत्मा उसला निकली गई; कने जागत उसी बेले ठीक होई गिया। 19 जालू यीशु किला था, तां उदे चेले उस बाल आऐ कने उसयो पुछया कि, “असां उसा बुरी आत्मा जो कजो नी कडी सके?” 20 यीशुए उना ने बोलया, “अपणे भरोसे दिया कमिया दिया बजा ला। क्योंकि मैं तुसां ने सच्च बोलदा है, अगर तुहाडा भरोसा राईया दे दांणे बराबर भी होंदा, तां इसी पहाडे ने बोली सकदे न, कि ऐशु ला खिसकी करी ओशु चली जा, तां उनी चली जाणा; कने कोई भी गल्ल तुहाडे तांई मुशकिल नी होणी। 21 (पर ऐ जात बिना प्राथना कने बिना बरते दे नी निकलदी।)” 22 जालू चेले गलील प्रदेशे च थे, तां यीशुए उना ने बोलया, “मैं, माणुए दा पुत्र माणुआं दे हथे पकडया जाणा है। 23 कने उना मिंजो मारी देणा, कने मैं तीजे रोजे मरयां चे जिंदा होई जाणा।” इना गल्लां जो सुणीकरी चेले बडे उदास होऐ। 24 जालू सै कफरनहम शेहरे च पुज्जे, तां मंदरे दा कर लेणे बालयां, पतरसे बाल आई करी पुछया, कि क्या तुहाडा गुरू मंदरे दा कर नी दिन्दा है? 25 उनी बोलया, “हाँ, दिन्दा है।” जालू सै घरे आया, तां यीशुए पतरसे दे पूछणे ला पेहेले ही उसयो बोलया, “हे शमोन तू क्या समझदा है? धरतिया दे राजे महसूल या कर कुसला लेदे न? अपणे पुत्रां ला कि परयां ला?” 26 पतरसे उना ने बोलया, “परयां ला।” यीशुए उसला बोलया, “तां पुत्र बची मे।” 27 तमी असां उना जो टोकर ना खुआन, तू झिला दे बखे जाई करी बीडी पा, कने जडी मछी पेहेले निकलग्गी, उसा जो पकडयां; उसा दा मुउ खोलणे पर इक सिक्का मिलणा है, उसयो लेईकरी मेरे कने अपने बदले उना जो कर देई दियां।

**18** उस बेले चले यीशुए बाल आई करी पृथणा लग्गे, “स्वर्गें दे राज्य च बडा कुण है?” 2 इस गल्लां पर उनी इक जागते जो अपणे बाल सदीकरी उना बिच खरेडया, 3 कने बोलया, “मैं तुसां ने सच्च बोलदा है, कि तुसां अपना मन बदला, कने बचयां सांई बणा, तां तुसां स्वर्गें दे राज्य च जाई सकदे न। 4 जडा कोई अपने आपयो बचयां सांई छोटा करगा, उनी स्वर्गें दे राज्य च बडा होणा। 5 कने जडा कोई मेरे नाए ला इक ऐसे बच्चे जो अपनांदा है सै मिंजो भी अपनांदा है।” 6 पर जडा कोई इना छोटयां च कुसी इकी जो भी भरोसे ला भटकांदा है या उना दे पाप करणे दी बजा बणादा है, उदे तांई तां खरा होंदा, कि उदे गले च बड़े घाटे दा पथर लटकाई करी उसयो डुगे समुंद्रे च डोबी दिन्दे। 7 “ठोकरां दियां बजा ने संसारे पर हाया! ठोकर लगणा जरूरी है; पर हाय उस माणुए पर जिदे जरिये ठोकर लगदी है।” 8 “अगर तेरा हथ या पैर तेरे पापां दी बजा बणा दा, तां उना जो बडी करी फेंकी दे; तेरे तांई ऐ ही ठीक है कि तू टुंटा या लंगडा होईकरी हमेशा दिया जिन्दगिया च प्रवेश करे, कि दो हथ पैर होंदे होए भी तू कदी नी बुझणे बालिया अग्गी च जां। (aiōnios g166) 9 अगर तेरी हथ तेरे पाप दी बजा बणे, तां उसा जो कडी करी फेंकी दे। तेरे तांई ऐ ही ठीक है कि काणा होईकरी हमेशा दिया जिन्दगिया च प्रवेश करे, कि दो हथी दे होंदे होए भी तू कदी नी बुझणे बालिया नरके दिया अग्गी च जां।” (Geenna g1067) 10 “दिखा, तुसां इना छोटयां च कुसयो भी घटिया मत समझदे; क्योंकि मैं तुसां ने बोलदा है कि स्वर्गें च उना दे स्वर्गांत हमेशा मेरे स्वर्गीय पिता दे सोगी रेंदे ना।” 11 (क्योंकि मैं, माणुए दा पुत्र गवाचयां जो बचाणा अया है।) 12 “तुसां क्या सोचदे न? अगर कुसी माणुए दियां सौ भेडां न, कने उना चे इक गवाची जा, तां क्या सै उना निन्यानबे जो बाकी रखबालयां बाल छडी करी, पाहडे पर जाई करी, उसा गवाचिया जो नी तोपणा?” 13 “कने अगर ऐसा हो कि सै भेड उसयो मिली जाये, तां मैं तुसां ने सच्च बोलदा है, कि उनी निन्यानबे भेडां तांई इतणा खूश नी होणा, जितणा कि इसा भेडां तांई होणा। 14 तियां ही तुहाडा पिता जडा स्वर्गें च है उदी इच्छा नी है, कि इना छोटयां चे इक भी खत्म होऐ।” 15 “अगर तेरा मसीह भाई तिजो ने कोई जुल्म करे, तां जा कने उस सोगी किल्ले च गल्ल बात करिके समझा; अगर सै तेरी सुणे ले कने अपणी गलती मन्नी ले, तां तू अपणे मसीह भाईए जो बापिस पाई लिया।” 16 कने अगर सै नी सुणे, तां इक दो जणे होर लेई जा सोगी, क्योंकि मूसा दिया व्यवस्था दे अनुसार, “हर इक आरोप जो दो या उसला जादा गबाह ला सही साबित करणा चाईदा।” 17 अगर सै उना दी भी नी मन्ने, तां तू कलीसिया ने बोली दे, पर अगर सै कलीसिया ने भी नी मन्ने, तां तू उसयो जियां तुसां होर जातियां सोगी ब्यवहार करदे न, तियां ही उसयो कलीसिया ला कडी दिया। 18 “मैं तुसां ने सच्च बोलदा है, जडा कुछ तुसां धरतिया पर बणाणा है, उनी सै स्वर्गें च भी बणाणा है कने जडा कुछ तुसां धरतिया पर खोलणा है, सै स्वर्गें च भी खोलणा है।” 19 मैं तुसां ने फिरी बोलदा है, अगर धरतिया पर तुसां चे दो जणे कुसा गल्लां तांई इक मन होईकरी मंगे, तां सै उना तांई मेरे पिता दिया तरफ ला जडा स्वर्गें च है होई जाणी। 20 “क्योंकि जिथु दो या तीन मेरे नाए ने गिठे होंदे न ओथु मैं उना बिच होंदा है।” 21 तालू पतरसे बखे आई करी, उसयो बोलया, “प्रभु जी, अगर मेरा मसीह भाई जुल्म करदा रे, तां मैं उसयो कितणी बरी माफ करे, क्या सत बरी दीकर?” 22 यीशुए उसयो बोलया, “मैं तिजो ने ऐ नी बोलदा, कि सत बरी नी, पर तिजो उसयो माफ करी देणा चाईदा।” 23 “इस तांई स्वर्गें दे राज्य उस राजे सांई न, जडा अपने सेवकां ला लेखा लेणा चांदा था। 24 जालू सै लेखा लेणा लग्गा, तां इकी बंदे जो उदे सामणे लांदा सै दस हजार सोने दे सिक्कयां दे बोरे दा कर्जदार था। 25 कने उदे बाल बापस करणे तांई कुछ भी नी था, तां उदे मालिके बोलया, कि ऐ कने इदी घरे बाली कने बाल-बच्चे कने जडा कुछ भी इदा है सै सब कुछ बेची दिया, कने कर्ज चुकाई दिया। 26 इसा गल्ला पर उनी सेवके पैरां च पेईकरी नमस्ते किते, कने बोलया, हे मालिक, सबर रख, मैं सारा कुछ भरी दिगा। 27 तालू उदे मालिके उस पर तरस खाई करी उसयो छडी दिता, कने उदा कर्ज भी माफ करी दिता। 28 पर जालू सै सेवक बाहर निकलया, तां उसयो इक सोगी कम्म करणे बाला साथी मिला, जिनी उसला सो दीनारां (सो दीनार: सो चांदी दे सिक्के) दा कर्ज लिया था; उनी उदा गला पकडी करी उसयो बोलया, जडा कुछ तरे पर कर्ज है उसयो भरी दे। 29 उदे

साथी सेवके उदे पैरां पेईकरी, उसने बिनती करणा लगा; कि सबर रख मैं सारा भरी दिगा। 30 पर सै नी मन्या, कने उनी जाई करी उसयो जेला च पाई दिता, ताकि जालू दीकर सै कर्ज नी भरगा, तालू दीकर ओथु ही रे। 31 कने उदे साथी सेवक ऐ दिखीकरी बडे उदास होए, कने जाई करी ऐ सारा हाल अपने मालिके ने सुणाई दिता।” 32 तालू उदे मालिके उसयो सदीकरी बोलया, “हे तुष्ट सेवक, तू जडी मिंजो ने बिनती किती थी, तां मैं तेरा सारा कर्ज माफ करी दिता। 33 इस तांई जियां मैं तिजो पर दया किती थी, तियां ही तिजो भी अपने साथी सेवके दा कर्ज माफ करी देणा चाईदा था?” 34 कने उदे मालिके गुस्से च आई करी उसयो सजा देणे बालें दे हथे देई दिता, ताकि जालू दीकर सै सारा कर्ज नी भरगा, तालू दीकर उना दे हवाले रे। 35 “इयां ही अगर तुसां चे हर कोई अपने मसीह भाई जो मने ला माफ नी करगा, तां मेरा पिता जडा स्वर्गें च है, उनी तुसां जो भी माफ नी करणा।”

**19** जालू यीशु ऐ गल्लां बोली बैठा, तां गलील प्रदेशे ला चली गया; सै यहूदिया प्रदेशे ला निकले कने यरदन खड्डा दे दुज्जे पासे चली गे। 2 कने मते भरी लोक उदे पिच्छे चली पे, कने ओथु यीशुए उना सारयां जो ठीक किता। 3 तालू फरीसी उदे बाल आऐ कने उसयो परखणे तांई उसला पुछया, “क्या हर इक छोटिया बजा ला अपणिया घरे बाली जो छडी देणा ठीक है?” 4 उनी जबाब दिता, “तुसां क्या पढया नी है, कि जिनी उना जो बणाया है, उनी शुरू ला ही नर कने नारी बणाई करी, बोलया। 5 इस बजा ला माणुए अपने माता-पिता ला लग होईकरी अपणिया घरे बालिया सोगी रेणा, कने इना दोनो इक तन होणा? 6 कने सै दोनो हुण इक तन न, क्योंकि हुण सै दो जणे नी, पर इक माणुए सांई न। इस तांई उसा जनानिया कने मदे जो बख नी करणा चाईदा जिना जो परमेश्वरे बियाह दे बंधना च बनया है।” 7 उना यीशुए ने बोलया, “फिरी मूसा ऐ कजो बणाया, कि उसा जो तलाक देईकरी छडी दिया?” 8 यीशुए उना ने बोलया, “मूसा तुहाडे मने दिया कठोरता दिया बजा ला तुहांजो अपणिया घरे बालिया जो छडी देणे दा हुकम दिता, पर शुरू च ऐसा नी था। 9 मैं तुसां ने बोलदा है, कि जडा कोई ब्यभिचार जो छडी करी कुसा होरसी बजा ने अपणिया घरे बालिया जो छडी करी दुईया ने बियाह करे, तां सै ब्यभिचार करदा है।” 10 चेलयां उसने बोलया, “अगर मरदे दा जनानिया सोगी ऐसा रिशता है, तां बियाह नी करणा ही ठीक है।” 11 उनी उना ने बोलया, “सारे ऐ बचन ग्रहण नी करी सकदे, सिर्फ सै ही जिना जो परमेश्वरे इस तरीके ने जिन्दगी जिणे दी शक्ति दितयो है। 12 क्योंकि कुछ नपुंसक ऐसे न जडे माऊ दे पेटे ला ही ऐसे न; कने कुछ नपुंसक ऐसे न, जिना जो माणुआं नपुंसक बणाया है: कने कुछ नपुंसक ऐसे न, जिना अपने आपे जो स्वर्गें दे राज्य तांई नपुंसक बणाया है, जडे इशयो समझी सकदे न, सै समझी लिया।” 13 तालू लोक बचयां जो उदे बाल लेईकरी आऐ, ताकि सै उना पर हथ रखे कने प्राथना करे; पर चेलयां उना जो झिडकां दीतियां। 14 यीशुए बोलया, “बचयां जो मना मत करा कने इना जो मेरे बाल ओणा दिया, जडे इना बचयां सांई भरोसेमदं न उना स्वर्गें दे राज्य च रेणा।” 15 कने सै उना पर हथ रखीकरी, ओथु ला चली गया। 16 इक माणुए यीशुए बाल आई करी बोलया, “गुरू जी, मैं कुण दिया भला कम्म करे, ताकि मिंजो हमेशा दी जिन्दगी मिल्ले?” (aiōnios g166) 17 यीशुए उसयो बोलया, “तू मिंजो ला भलाईया दे बोरे च कजो पूछा दा है? भला ता इक ही है; पर अगर तू हमेशा दिया जिन्दगिया च प्रवेश करणा चांदा है, तां तू हुकमा जो मना कर।” 18 उनी उसला पुछया, “कुण दे हुकम?” यीशुए बोलया, “ऐ कि हत्या नी करणी, ब्यभिचार नी करणा, चोरी नी करणी, झूठी गवाई नी देणी; 19 अपने माता पिता दी इज्जत करणी, कने अपने पड़ोसियां सोगी अपनयां सांई प्यार रखणा।” 20 उनी मुंडे यीशुए जो बोलया, “इना सारियां गल्लां जो तां मैं मनादा है, हुण मिंजो च कुसा गल्लां दी कमी है?” 21 यीशुए उसयो बोलया, “अगर तू सिद्ध होणा चांदा है, तां जा कने जडा कुछ तेरा है उसयो बेची करी गरीबां जो देई दे, तां तिजो स्वर्गें दा धन मिलणा, इयां करणे बाद आ कने मेरा चेला बणिगा।” 22 पर ऐ गल्ल सुणीकरी उस जवान मुंडे दे चेहे पर उदासी छाई गेई, कने सै दुखी होई करी चली गया, क्योंकि सै बडा भरी अमीर था। 23 तालू यीशुए अपने चेलयां जो बोलया, “मैं तुसां ने सच्च बोलदा है, कि अमीरां दा स्वर्गें दे राज्य च जाणा बडा मुशकिल है। 24 ऊंटे दा सुइया दे नके चे निकलना असान है, पर अमीरां दा परमेश्वरे दे

राज्य च जाणा बडा भरी मुशकिल है। 25 ऐ सुणीकरी चले बडे हेरान होईकरी बोलया, तां कुण अपने पापां दी सजा मिलणे ला बची सकदा है?" 26 यीशुऐ उना दे पासे दिखीकरी बोलया, "जडा माणु नी करी सकदे, पर परमेच्वरे सब कुछ करी सकदा है।" 27 तालू पतरसे यीशुऐ जो बोलया, "दिख, असां तां सारा कुछ छडी करी तरे पिच्छे आयो न: तां सांझो क्या मिलणा है?" 28 यीशुऐ उना जो बोलया, "मैं तुसां ने सचच बोलदा है, कि नोऐ संसारे च जालू माणुऐ दे पुत्रे अपणिया महिमा दे सिंहासने पर बोणा है, तां तुसां भी जडे मेरे पिच्छे आयो न, बाहरां सिंहासना पर बेईकरी झ्पाएले दे बाहरां गोत्रो दा नयाय करणा है।" 29 "कने जिनी घरां जो या भाई, बेहणा जो या माता-पिता जो या बाल-बचयां जो या खेतरां जो मेरे नाऐ तांई छडी दितया है, उसयो सो गुणा मिलणा, कने सै हमेशा दिया जिन्दगिया दा अधिकारी होणा। (aiōnios g166) 30 पर मते लोक जडे हण महान कने अगे न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।"

**20** स्वर्गो दा राज्य इसा कहाणिया सांई है, इक जमीदार था, सै ब्यागा निकलया, ताकि अपने अंगरा दे बागे च कम्म करणे तांई मजदुरां जो लगां। 2 कने उनी मजदुरां ने इक रोज कम्म करणे तांई इक मजदूरी रखी, अपने अंगरा दे बागे च कम्म करणे तांई भेजया। 3 फिरी कोई नौ कि बजे ब्यागा निकली करी, होर लोकां जो बजारे च बेकार खडुतयो दिखया, 4 कने उना जो बोलया, "तुसां भी अंगरा दे बागे च जा, कने जडा ठीक है, सै तुहांजो दिगा।" तां सै भी कम्म करणे तांई गे। 5 फिरी उनी दोपहर कने संझा तिन्न बजे भी निकली करी तियां ही किता। 6 कने लगभग पंज कि बजे निकली करी होरां जो खडोतया दिखया, कने उना जो बोलया, "तुसां कजो ऐथु दिन भर बेकार खडोई रैदे?" उना उसया बोलया, "इस तांई, कि कुनी भी सांझो मजदूरिया कनी लया।" 7 उनी उना जो बोलया, "तुसां भी अंगरा दे बागे च कम्म करणा जा।" 8 संझा जो अंगरा दे बागे दे मालिके अपने भण्डारिये जो बोलया, "मजदुरां जो सदीकरी जडे सारां ला आखिर च आयो उना ला लेईकरी जडे सारां ला पेहले कम्म करणा आयो मजदुरां जो उना दी मजदूरी देई दे।" 9 जालू सै आऐ जडे पंज बजे कम्मे पर लागयो थे, तां उना जो इक दिने दी दिहाडी इक दीनार मिली। 10 जडे पेहले आयो थे उना ऐ समझया, कि सांझो जादा मिलणा पर उना जो भी इक दिने दी दिहाडी इक दीनार ही मिली। 11 जालू उना जो इक दिनार मिला, तां सै घरे दे मालिके उपर बुडबुडाणे लागे। 12 कि जडे संझा दे पंज बजे आये कने इक ही घंटा कम्म किता, तू उना जो भी उतनी ही दिहाडी दिती जितनी तू सांझो दिती, असां दिन भर भार चुकया कने धुप खादी? 13 तालू बगीचे दे मालिके कने इकी जो जबाब दिता, "कि हे मित्र, मैं तिजे ने कोई गलत नी करी दा। क्या ते तिमिजे पुरे दिन कम्म करणे दा इक दीनार नी बोलया था? 14 जडा दिहाडी तेरी है, सै ले कने चली जा; मेरी मर्जी ऐ है कि जितणा मैं तिजे दे, उतणा ही इस इक घंटा कम्म करणे बाले जो भी दें। 15 मिंजो हक है कि मैं अपने पैसे जो अपणिया मरजिया ने खचीं सके। तिजे जलन नी होणा चाईदी कि मैं दुजयां तांई दयालू है। 16 पर मते लोक जडे हण महान कने अगे न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।" 17 यीशु यस्शलेम शेहरे जो जांटे बेले बाहरां चेलयां जो एकांत च लेई गिया, कने रस्ते च उना ने बोलणा लगा। 18 "दिखा, ध्याने ने सुणा, असां यस्शलेम चलयो न, कने मैं माणुऐ दा पुत्र बहूे याजकां कने यहदी व्यस्था जो सिखाणे बालयां दे हथे पकडया जाणा है, कने उना मिंजो मौत दी सजा देणी है। 19 कने होर जातियां दे हथे देई देणा है। कने उना मेरा मजाक उडाणा है, मिंजो पर थुकणा, कने मिंजो कोडे मारणे, कने मिंजो सुली पर चढाई करी मारी देणा है, कने मैं तिजे दिने मरयां च जिंटे होई जाणा है।" 20 तालू जब्दी दे पुत्रां दिशा माऊ अपने बचयां सोगी उदे बाल आई करी उसयो नमस्ते किते, कने उसला कुछ मंगणा लग्गी। 21 यीशुऐ उसा जो बोलया, "तू क्या चांहादी है?" उना उसयो बोलया, "ऐ बचन दे, कि मेरे ऐ दोनो पुत्र तरे राज्य च, इक तरे सजे पासे कने इक खबे पासे बेई सकन।" 22 यीशुऐ जबाब दिता, "तुसां जो नी पता कि तुसां क्या मंगा दे? हण जडे दुख मैं सेहणे न, क्या तुसां उना दुखां जो सेहन करी सकदे न?" उना उसने बोलया, "हाँ करी सकदे न।" 23 यीशुऐ उना जो बोलया, "तुसां भी सारे दुख सेहणे न, जियां मैं सेहणे। पर अपने सजे कने खबे पासे बैठलना मेरा कम्म नी है, पर जिना तांई मेरे पिता दिया तरफा ला तैया

कितया है, उना तांई ही न।" 24 ऐ सुणीकरी बाकी दसो चले याकूब कने यहन्ना पर गुस्सा करणा लागे। 25 तां यीशुऐ उना जो अपने बाल सदीकरी बोलया, "तुहांजो पता है ना, कि जडे लोक प्रधान मने जांटे थे, सै अपने अधिकारां दा इस्तेमाल अपने अधीन लोकां दे उपर हक जमाणे तांई करदे न। उना दे अगुवे लोक अपणी गल्ल मनाणे तांई हक जांटे न। 26 तुसां चे जडा महान बणना चांदा है, उसयो बाकियां दी सेवा करणी चाईदी। 27 कने जडा कोई तुसां चे प्रधान बणना चांदा हो, सै सारायां दा नैकर बणे। 28 मैं ऐ इस तांई बोलदा है क्योकि मैं माणुऐ दा पुत्र, इस संसारे च सारायां दी सेवा करणे तांई आया है, मैं इस तांई नी आया कि लोकां ला अपणी सेवा करां। मैं तां लोकां जो पापां ला छुटकारा करणे तांई अपने प्राण कीमत च देणा आया है।" 29 जालू सै यरीहो शेहरे ला निकला दे थे, तां इक बडी बडी भीड उदे पिच्छे चली पेई। 30 दो अन्ने, जडे सडका बखे बैठयो थे, ऐ सुणीकरी कि यीशु जा दा है, पुकारी करी बोलणा लागे, "हे प्रभु, दाऊदे दे बंशज, सांझो पर दया कर।" 31 लोकां उना जो झिंङकां दितियां, कि चुरा रिया, पर सै होर भी जोरे ने चीलाई करी बोलणा लागे, "हे प्रभु, दाऊदे दी ओलाद, सांझो पर दया कर।" 32 तालू यीशुऐ खडोई करी, उना जो सदया, कने बोलया, "तुसां क्या चांटे न कि मैं तुहाडे तांई करे?" 33 उना उसने बोलया, "प्रभु जी, ऐ कि साडियां हखी खुली जानां।" 34 यीशुऐ तरस खाई करी उना दियां हखी छुतियां, कने उना जो झट मिलणा लग्गी पिया, कने सै उदे पिच्छे चली पै।

**21** जालू सै यस्शलेम दे बखे पुज्जे कने जैतन सखां दे पाहडे पर बैतफगे जगा च आऐ, तां यीशुऐ दो चेलयां जो ऐ बोली करी भेजया, 2 "अपणे सामणे बाले ग्रां च जा, ओथु पुज्जे दी इक गधी बनियो होणी कने सोगी उसा दा बच्चा भी बनया होणा। उना जो खोली करी मेरे बाल लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जस्तरत है, कने उनी माणुऐ तुसां जो लेई जाणा देणा है।" 4 ऐ इस तांई होया, कि जडा बचन परमेच्वरे दा संदेश देणेबाले बोलया था, सै पूरा हो: 5 "सिय्योन दिया कुडिया ने बोला, दिख, तेरा राजा तरे बाल ओआ दा है; सै नम्र है, कने गधे पर बैठया है; मतलब कि लादू दे बच्चे पर बेईकरी ओआ दा है।" 6 चेलयां जाई करी, तियां ही किता, जियां यीशुऐ उना ने बोलया था। 7 गधी कने उसा दा बच्चा लांदा कने उना पर अपने कपडे बछाई दिते, कने यीशु उस पर बेई गिया। 8 कने मते लोकां अपने कपडे रस्ते च बछाए, कने केई लोकां सखा जो छागी करी डालियां रस्ते च बछाईयां। 9 कने थोडे लोक यीशु ऐ अगे-अगे चलयो थे, कने थोडे लोक पिच्छे चलयो थे, सै सारे खुशिया ने बोला दे थे, "दाऊदे दे बंशज दी होशाना; धन्य सै जडा प्रभु दे नारे ने ओंदा है, स्वर्ग च होशाना।" 10 जालू यीशु यस्शलेम शेहरे च पुज्जा, तां सारे नगरे च हिल पेई गईं, कने लोक बोलणा लागे, "ऐ कुण है?" 11 लोकां बोलया, "ऐ गलीले प्रदेश दे नास्तरत ग्रां दा परमेच्वरे दा संदेश देणेबाला यीशु है।" 12 यीशुऐ परमेच्वरे दे मंदरे च जाई करी व्यपारी लोकां जो मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे। कने पैसे बदलने बाले साहकारां दे मेज पलटी दिते, कने कबूतरां जो बेचणे बालयां दियां चौकियां जो बाहर सुटी दिता। 13 कने यीशुऐ उना जो बोलया, पबित्र शान्न ऐ बोलदा है कि, "लोक मेरे घरे जो प्राथना दा घर बोलदे न, जिथु सारे लोक प्राथना तांई ओदे न पर तुसां तां इसयो डाकुआं ने भरईयो गुफा सांई बणाई दितया है।" 14 तालू अन्ने कने लंगडे, मंदरे च उदे बाल आये, कने यीशुऐ उना जो खरा करी दिता। 15 पर जालू बहूे याजकां कने व्यक्स्था जो सिखाणे बालयां इना अनोखे कम्मा जो दिखया, जडे यीशुऐ किते कने मंदरे च जागतां जो दाऊदे दे बंशजे जो होशाना बोलंदे सुणया, तां सै गुस्सा होई गे, 16 कने उसयो बोलणा लागे, "तू क्या सुणा दा है कि ऐ क्या बोला दे न?" यीशुऐ उना ने बोलया, "हाँ; तुसां क्या ऐ कदी नी पढया की: जागतां कने दूध पिंदे बचयां दे मुरे ला तू स्तुति कराई?" 17 तालू सै उना जो छडी करी नगरे दे बाहर बैतनिय्याह ग्रां जो गिया, कने ओथु रात बिताई। 18 ब्यागा जालू सै नगरे जो बापस ओआ दा था, तालू यीशुऐ जो भूख लग्गी। 19 सडका बखे अंजिर दा इक स्ख दिखया, कने सै उस बाल गिया, कने उस स्खे च पतयां जो छडी करी होर कुछ नी था, उनी उसयो बोलया, "हण तिजे पर कदी फल नी लगणे न।" कने अंजिर दा स्ख झट सुकी गिया। (aiōn g165) 20 ऐ दिखीकरी चले बडे हेरान होए, कने बोलणा लागे, "ऐ

अंजरी दा सख झट कियां सुकी गिया?" 21 यीशुए उना जो जबाब दिता, "मै तुसां ने सच्च बोलदा है; अगर तुसां भरोसा रखन, कने शक नी करन; तां सिर्फ तुसां ऐ नी करणा जडा इस अंजरी दे सखे ने किता है, अगर तुसां इस पाहडे जो भी बोलणे कि ऐथू ला पुट्टई जा, कने समुंद्रे च जाई पो, तां ऐ होई जाणा।" 22 "कने जडे कुछ तुसां प्रार्थना च भरोसे ने मंगणे सै सारा कुछ तुसां जो मिलणा।" 23 सै मंदरे च जाई करी उपदेश करा दा था, तां बड़े याजकां कने यहूदी व्यवस्था जो सिखाणे बालयां कने यहूदी अगुवे उदे बाल आये कने उसयो पुछणा लगे, "तू ऐ कम्म कुसदे अधिकारे ला कदा है? कने तिजो ऐ हक कुनी दितया है?" 24 यीशुए उना जो जबाब दिता, "मै भी तुहांजो ला इक गल्ल पुछदा है, अगर तुसां मिंजो जबाब दिगे, तां मै दसगा कि ऐ कम्म मै कुसी हके ने करता है। 25 यहून्ना जो लोकां जो बपतिस्मा देणे ताई कुनी भेजया था? क्या सै परमेश्वरे भेजया था या माणुए? मिंजो दसा।" तालू सै अपु चे बोलणा लगे कि अगर असां बोलया कि, "परमेश्वर जडा स्वर्ग च है उनी भेजया है, तां यीशुए सांझो ला पुछणा, कि तुसां यहून्ना पर भरोसा कुनी किता?" 26 कने अगर बोलन माणुए दिया तरफा ला तां सांझो भीडा दा डर है, क्योकि सै उना लोकां ला उरदे थे, जडे यहून्ना जो परमेश्वर दे पासे ला आया इक सच्चा परमेश्वर दा संदेश देणेबाला मदे थे। 27 उना यीशुए जो जबाब दिता, "असां नी जाणदे।" यीशुए भी उना जो बोलया, "तां मै भी तुहांजो नी दसगा, कि ऐ कम्म मै कुस हके ने करता है।" 28 "तुसां इसा कहाणिया ला क्या सोचदे कने समझदे न? कुसी माणुए दे दो जागत थे; उनी पहले बाल जाई करी बोलया, अज अंगरा दे बागे च जाई करी कम्म कर।" 29 उनी जबाब दिता, मै नी जाणा, पर बादे च उसयो पछताबा होया कने फिरी चली गिया। 30 फिरी दुज्जे बाल जाई करी इयां ही बोलया, उनी जबाब दिता, जी हाँ मै जांदा है, पर सै गिया नी। 31 इना दोना चे कुनी परमेश्वरे दी इच्छा पूरी किती है? उना बोलया, "पेहेले बाले।" यीशुए उना ने बोलया, "मै तुसां ने सच्च बोलदा है, कि कर लेणेबाले कने वेशयां तुहांजो ला पेहेले परमेश्वरे दे राज्य च प्रवेश करणा है। 32 मै ऐ इस ताई बोलया क्योकि जालू यहून्ना बपतिस्मा देणेबाले तुहांजो दसया कि कियां सही तरीके ने जीणा है, कने तुसां उदा भरोसा नी किता। पर कर लेणे बालयां कने वेशयां अपणे पापां जो छडी दिता कने उदा भरोसा किता: कने तुसां ऐ दिखीकरी बादे च भी नी पछताय कि उदा भरोसा करी लेदे।" 33 "इक होर कहाणी सृणा: इक माणुए बागे च अंगर लाये। उनी बागे दे चारों पासे बाड लगवाया, कने इक जगा अंगरा दे रसे जो निचोडने ताई बनाई, कने निगरानी रखणे ताई इक उचिया जगा पर कमरा बनाया। फिरी उनी बागे जो कुछ किसाना जो ठेके पर देई दिता, कने परदेस जो चली गिया। 34 फिरी जालू अंगर पक्की गे, तां उनी अपणे नोकरां जो ठेकेदारे बाल अपणा अंगरा दे बागे दा हिस्सा लोंणे ताई भेजया। 35 पर ठेकेदारां उदे नोकरां जो पकडी करी, कोई कृतया, कोई मारी दिता; कने केईयां जो पथरा ने मारया। 36 फिरी उनी पेहेले ला भी जादा होर नोकरां जो भेजया, कने उना ठेकेदारां उना सोगी भी तियां ही किता। 37 आखरी च उनी अपणे पुत्रे जो उना बाल ऐ सोची करी भेजया, कि उना भेरे पुत्रे दी इज्जत करणी। 38 पर ठेकेदारां पुत्रे जो दिखीकरी अपु चे बोलया कि, ऐ तू दा वारिस है, ओआ असां इसयो मारी दिन्दे न, कने इदी सारी जगा जमीन साडी होई जाणी। 39 कने उना उसयो पकडया कने अंगरा दे बागे ला बार कडी करी मारी दिता। 40 इस ताई कि जालू अंगरा दे बागे दा मालिक ओगा तां, तां सै ठेकेदारां सोगी क्या करगा?" 41 उना उसने बोलया, "उनी उना बुरे लोकां जो बुरे तरीके ने खत्म करी देणा; कने अंगरा दे बागे दा ठेका होर किसाना जो देई देणा, जडे उसयो बकते पर फल दिगे।" 42 यीशुए उना ने बोलया, "तुसां क्या कदी पबित्र शाशां च ऐ नी पढया: जिस पथरे जो राजमिश्त्रियां बेकार बोलया था, सै ही पथर कुंणे च सिरे दा पथर बणया? ऐ प्रभु दिया तरफा ला होया, पर साडिया नजरा च अनोखा है।" 43 इस ताई मै तुसां ने बोलदा है, कि परमेश्वरे दा राज्य तुहांजो ला लेई लेंणा है, कने ऐसे लोकां जो देई देणा है जडे सै ही करणे जडा परमेश्वर चांदा है। 44 "जडा इस पथरे पर पोंगा, उदा चर भुर होई जाणे; जिदे पर सै पथर पोंगा, उसयो पि सडना उनी।" 45 बड़े याजकां कने फरीसी उदिया इसा कहाणिया जो सुणीकरी समझी गे, कि सै साडे बारे च बोला दा है। 46 कने सै उसयो पकडना चांदे थे पर लोकां ला डरी गे क्योकि सै उसयो परमेश्वरे दा संदेश देणेबाला मदे थे।

22 यीशुए फिरी उना जो कहाणी सुणाई, 2 "स्वर्ग दा राज्य इक कहाणिया साई है, इक राजा था जिनी अपणे पुत्रे दा बियाह किता।" 3 उनी अपणे नोकरां जो भेजया कि जिना जो नियुद्र दितियो उना लोकां जो बियाह दिया धामा च सदा; पर सै कोई ओणा नी चांदे थे। 4 "फिरि उनी होर नोकरां जो ऐ बोली करी भेजया, कि नियुद्र दितियो लोकां ने बोला: दिखा मै धाम तैयार करी दितियो है, कने सारा कुछ तैयार है; कने तुसां बियाये दिया धामा च ओआ। 5 पर सै बहाना लाइ करी चली गे: कोई अपणे खेतारां जो, कोई अपणे कम्म धंधे जो। 6 बाकी लोक जडे बचा थे उना नोकरां जो पकडी करी उना दा अनादर किता कने मारी दिता। 7 जालू राजे ऐ सुणया तालू राजे जो गुस्सा आया, कने उनी अपणी सेना भेजी करी उना हत्यारां जो मरवाया, कने उना दे शेहरे जो फुकी दिता। 8 तालू उनी अपणे नोकरां ने बोलया, बियाये दी धाम तां तैयार है, पर सदयो लोक खाणे जोगे नी न। 9 इस ताई तुसां हर जगा जा, कने जितणे भी लोक तुसां जो मिलन, सबना जो बियाये दिया धामा ताई सदी लोआ। 10 उना नोकरां हर जगा पर जाई करी क्या बुरे, क्या भले, जितणे भी मिल्ले, सब गदरे; कने बियाये बाला पर परोंणया ने भई गिया। 11 जालू राजा परोंणया जो दिखणे ताई अंदर आया, तां उनी ओथु इक माणुए जो दिखया, जिनी बियाये ताई खरे कपडे नी पायो थे। 12 राजे उसला पुछया, है मित्र, तू बिना बियाये दे नोए कपडे पाई करी ऐथू कजो आया? कने सै चुप होई गिया। 13 तालू राजे नोकरां ने बोलया, इदे हथ-पेर बन्नी करी इसयो काल कोठडी च पाई दिया, ओथु उनी रोणा कने, दंद पीणे। 14 क्योकि परमेश्वरे मते लोकां जो अपणे बाल सदया है पर थोडे ही न जडे चुणयो न।" 15 तालू फरीसियां जाई करी अपु चे बिचार किता, कि उसयो कुस तरीके ने गल्लां च फसान। 16 उना अपणे चेलयां जो हेरोदियां सोगी उदे बाल ऐ बोलणे जो भेजया, "गुरू जी, असां जो पता है कि तुसां हमेशा सच्च बोलदे न, कने परमेश्वरे दा रस्ता सच्चाईया ने दसदा है, कने कुदी भी परवाह नी करदे न, क्योकि तू माणुए दा मुए दिखीकरी गल्ल नी करदा है। 17 इस ताई सांझो दस कि तू क्या सोचदा है? महाराजा जो कर देणा ठीक है, कि गलत है।" 18 यीशुए उना दी बुराई जाणी करी बोलया, "है कपटियों, मिंजो कजो परखदे न?" 19 करे दा सिक्का मिंजो दसा। "तालू सै उदे बाल इक दीनार लेई आये।" 20 उनी, उना ला पुछया, "ऐ आकृति कने ना कुसदा है?" 21 उना उसने बोलया, महाराजा दा। तालू उनी उना जो बोलया, "जडा महाराजा दा है, सै महाराजा जो, कने जडा परमेश्वरे दा है, सै परमेश्वरे जो दिया।" 22 ऐ सुणीकरी सै हेरान होये, कने उसयो छडी करी चली गे। 23 उसी रोजे सटूकी जडे बोलदे थे कि मरयां दा जिन्दा होणा है ही नी सै यीशुए बाल आये, कने उसला पुछया, 24 "गुरू जी, मुसा बोलया था, कि अगर कोई बिना ओलादी मरी जा, तां उदा भाई उदिया घरे बालिया ने बियाह करी के अपणे भाई ताई बंश पैदा करे। 25 हुण साडे ऐथू सत भाई थे; पेहला भाई बियाह करिके मरी गिया; कने ओलाद नी होणे दिया बजा ने अपणिया घरे बालिया जो अपणे भाईए ताई छडी गिया। 26 तां दुए भाईए उसा ने ही बियाह करी लिया कने से भी बिना ओलादी मरी गिया, कने इयां ही तिजे भाई ने होया कने सतां भाईयां उसा ने बियाह किता कने सतां भाई बिना ओलादी मरी गे। 27 सबना दे बाद सै जनानी भी मरी गई। 28 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?" 29 यीशुए उना जो बोलया, "तुसां दो बजा ने गलत न, तुसां पबित्र शास्त्र जो नी जाणदे ने जडा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे कि परमेश्वर बाल भरे होये लोकां जो जिन्दा करणे दी शक्ति है।" 30 क्योकि जालू उना मरयां चे जिन्दा होणा, तां उना लोकां दे बियाह नी होणे; जियां स्वर्ग च रेणेबाले स्वर्गदूत बियाह नी करदे। 31 "मरयां चे जिन्दा होणे दे बारे तुसां क्या मुसा दिया कताबां च नी पढया जडा परमेश्वरे तुसां जो बोलया: 32 मै अब्राहम दा परमेश्वर, कने इसहाक दा परमेश्वर, कने याकूब दा परमेश्वर है? सै मरयां दा नी, पर जिन्दया दा परमेश्वर है।" 33 ऐ सुणीकरी लोक उदे उपदेशे ला हेरान होए। 34 जालू फरीसियां सुणया कि यीशुए सटूकियां दा मु बंद करी दितया है, तां सै गिटे होए। 35 उना दे इकी यहूदी मुसा दी व्यवस्था जो सिखाणे बाले परखणे ताई, यीशुए ला पुछया, 36 "गुरू जी, परमेश्वरे जडे भी हुकम दितयो न, उना सारयां चे सारयां ला बडा हुकम कुण दिया है?" 37 उनी उना जो बोलया,

“तू अपने प्रभु परमेश्वर ने अपने सारे तन मन कने सारे प्राण कने अपणिया सारिया अकला सोगी प्यार कर।” 38 सारयां ला बडा कने मुख्य हुकम तां ऐ ही है। 39 कने उस सांई ऐ दूजा हुकम भी है, कि तू अपने पडोसियां सोगी अपने सांई प्यार रख। 40 “इना दा हुकमा पर ही सारी व्यवस्था कने भविष्यवाणियां अधारित ना।” 41 जालू फरीसी गिठे थे, तां यीशुऐ उना ला पुछ्या, 42 “मसीह दे बारे च तूसां क्या सोचदे न? सै कुदा पुत्र है?” उना यीशुऐ ने बोलया, “दाऊदे दा बंशज।” 43 यीशुऐ उना ला पुछ्या, “तां दाऊद आत्मा च होईकरी उसयो प्रभु कजो बोलदा है?” 44 “प्रभुऐ, भेरे प्रभु ने बोलया, भेरे सजे पासे बो, जालू दीकर मै तैरे दुशमणा जो तैरे पैरां हेठ नी करी दे।” 45 “भला, जालू दाऊद ही उसयो प्रभु बोलदा है, तां सै उदा पुत्र किया होया?” 46 उदे जबाबे च कोई भी कुछ नी बोली सकया। पर उस रोजे ला कुसयो भी फिरी उसला पछणे दी हिम्मत नी होई।

**23** तालू यीशुऐ भिडा कने अपने चेलयां जो बोलया, 2 “फरीसियां कने व्यवस्था जो सिखाणे बालयां जो मूसा दिया व्यवस्था दी व्याख्या करणे दा हक है।” 3 इस तांई सै तूसां ने जडा कुछ बोलगे सै तूसां करणा कने मनणा, पर जडा सै करदे न सै मत करदे; क्योंकि सै उपदेश दा दिन्दे न पर उना दा पालन नी करदे। 4 सै अपु अपणी व्यवस्था दा पालन करणे दी कोशिश भी नी करदे। कने ऐसे नियम बणादे न जिना दा पालन करणा बडा मुशकिल है। 5 सै अपने सारे कम्म लोकां जो दसणे तांई करदे न: सै अपणिया बांई कने मथे पर पट्टियां बन्दे न जिना च पबित्र शाब्द दे बचन लिखयो होदे न, कने अपने कपडयां दियां झालरां बदादे न। 6 धामा च समाहित जगा च बोणा चांदे न, कने यहूदी जंज घर च भी खास-खास आसना पर बोणा पंसद करदे न, 7 बजारां च सारे लोक उना जो नमस्ते कने सारे उना जो गुरू जी बोलन सै उना जो खरा लगदा है। 8 पर तूसां गुरू मत बणदे, क्योंकि तुहाडा इक ही गुरू है: कने तूसां सारे भाई-बेहणा सांई न। 9 कने अपने पिता जो छडी करी कुसयो भी धरतिया पर अपने पिता परमेश्वरे दा आदर मत दिन्दे क्योंकि तुहाडा इक ही पिता है, जडा स्वर्ग च है। 10 कने कुसी दे गुरू भी मत बणदे, क्योंकि तुहाडा इक ही गुरू है, मतलब कि यीशु मसीह। 11 जडा तूसां चे बडा है, सै तुहाडा सेवक बणे। 12 जडा कोई अपने आपे जो बडा बणांगा, सै नम्र करी देणा: कने जडा कोई अपने आपे जो छोटा बणांगा, सै बडा करी देणा। 13 “हे कपटी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तूसां लोकां जो स्वर्गे दे राज्य च जाणे दी झाजात नी दिन्दे, ना तां अपु स्वर्ग च जाणा, कने ना तां स्वर्ग जाणे बालयां जो जाणा दिन्दे ना।” 14 “हे कपटी व्यवस्था जो सिखाणे बालयो कने फरीसियां, तुहांजो तांई बडा बुरा होणा है। तूसां धोखे कने वेईमानिया ने विधवां दे घरां दी चिजां पर कब्जा करी लेंदे है। कने लोकां जो दसणे तांई बडी देरा दीकर प्रार्थना करदे न, परमेश्वरे इना जो बडी बुरी सजा देणी है।” 15 “हे कपटी यहूदी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तूसां इक जणे जो अपने भरोसे च लोणे तांई सारियां जगा च दुरे-दुरे दीकर गुम्दे फिरदे रेंदे न, कने जालू सै भरोसे च आई जांदा है, तां उसयो अपने ला दुगणा नरक जाणे जोगा बणाई दिन्दे ना।” (Geenna 9:10-16) 16 हे अन्ने अगुवाई करणे बालयो, तुहांजो तांई बडा बुरा होणा है, कि तूसां सिखांदे न कि अगर कोई मंदरे दी कसम खा तां कोई फरक नी है, पर अगर कोई मंदरे दे सोने दी कसम खा तां उदे तांई कसम पूरी करणा जरूरी होई जांदा है। 17 हे मूर्खां, कने अन्नयो कुण बडा है, मंदरे दा सोना या सै मंदर जिसला सै सोना पबित्र होंदा है? 18 कने फिरी तूसां ऐ भी सिखांदे न कि अगर कोई वेदी दी कसम खा तां कुछ फर्क नी है, पर जडी भेट उस पर चढाई है, अगर कोई उसा दी कसम खा तां फर्क पोंदा है। 19 हे अन्नयो, कुण बडा है, भेट या वेदी जिसने भेट पबित्र होंदी है? 20 इस तांई जडा वेदी दी कसम खांदा है, सै उदी कने जडा कुछ उसा पर है, उदी भी कसम खांदा है। 21 कने जडा मंदरे दी कसम खांदा है, सै उदी कने उदे च रेणेबाले परमेश्वरे दी भी कसम खांदा है। 22 कने जडा स्वर्गे दी कसम खांदा है, सै परमेश्वरे दे सिहासने दी भी कने उस पर बोणे बाले दी भी कसम खांदा है। 23 यहूदी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तूसां पुदीने, कने सौफ, कने जिर, दा तां दसमां हिंसा दिन्दे न, पर तूसां व्यवस्था दियां जरूरी गल्लां जो मतलब कि न्याय, कने दया, कने इमानदार होणा छडी दिता है; तुहांजो दशमांश तां दिन्दे रेणा चाईदा था, पर इना गल्लां जो भी नी

छडणा चाईदा था। 24 हे अन्ने यहूदी अगुवो, (अगुवाई करणे बाले) तूसां जडे नियम जरूरी नी न उना जो तां बडिया साबधानिया ने मंदे न, जियां कि पिंदे बेले माखियां जो दूर करदे पर परमेश्वरे दी जरूरी गल्लां जो मंदे नी ना! ऐ ऊंटे जो निगलने सांई है। 25 “यहूदी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तूसां ऐसे कटोरे कने भांडे सांई न जडे तां उपरे-उपरे ला तां साफ न, पर अंदरे ला अजे भी गंदे न। सै ऐ कि, तूसां अपने आपे जो भले लोकां सांई दसदे न, पर तुहाडे मन लालची कने मतलबी ना।” 26 हे अन्ने फरीसी, पेहले तूसां जो लालची कने मतलबी होणा रोकी देणा चाईदा तां तूसां से ही करी सकणा जडा धर्म है। 27 “यहूदी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तूसां तां उना सफेदी कितियां कबरां सांई न जडियां उपरे ला तां छेल मिलदिवाँ न, पर अंदर मुर्दयां दियां हडियां कने हर तरा दियां गंदगिया ने भरइयां ना।” 28 इना कबरां सांई तूसां भी उपरे ला तां माणुऐ जो धर्मी लगदे न, पर तूसां अंदरे ला कपट कने पापा ने भरयो ना। 29 “यहूदी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तुहाडे पूर्वजां जिना परमेश्वरे दा संदेश देणेबालयां जो मारया था उना दियां कबरां जो सजां दे न कने धर्मी लोकां दियां कबरां जो सम्मानित करदे ना।” 30 कने बोलदे न कि, अगर असां अपने बाप दादायां दे बकते च होंदे तां असां परमेश्वरे दा संदेश देणेबालयां दिया हत्या च हिस्सेदार नी होंदे। 31 इसला तां तूसां अपु ही साबित करदे न कि तूसां उना लोकां दे बंशज न जिना परमेश्वरे दा संदेश देणेबालयां दी हत्या कितियो। 32 तूसां उस बुराईया जो पूरा करणे बाले न जिसयो तुहाडे पूर्वजां शुरू कितया था। 33 हे जहरीले सपां दे बचयां सांई लोको कने कैतौ दे बचचयो, तूसां नरके दिया सजा ला नी बचना है। (Geenna 10:67) 34 इस तांई मै तुहाडे बाल परमेश्वरे दा संदेश देणेबालयां जो भेजदा है। कने, बुद्धिमान, कने व्यवस्था जो सिखाणे बालयां जो भेजदा है; तूसां इना चे थोडयां जो मारी देणा हे, कने केईयां जो सूली पर चढाना कने केईयां जो अपने यहूदी जंज घर च कोडे मारणे, कने इकी शेहे ला दुजे शेहे जो नठाणे ना। 35 धर्मी हाबिल ला लेईकरी बिरिक्याह दे पुत्रे जकर्याह दीकर, जिसयो तूसां मंदरे कने वेदिया दे बिच मारया था, जितगया धर्मियां दी हत्या इसा धरतिया च होईयो है, उना सारयां तांई तूसां जो दोषी बोलणा। 36 “मै तूसां ने सच्च बोलदा है, इना सारियां हत्या दी सजा इस बकते दे लोकां पर आई पोणी है।” 37 “यस्शलेम शेहे दे लोको, हे यस्शलेम दे लोको! तूसां जडे परमेश्वरे दा संदेश देणेबालयां जो मारी दिन्दे न, कने जीना जो तुहांजो बाल भेजदे न, उना जो पथरा ने मारदे न, कितणी बरी मै चाया कि जियां मुर्गी अपने बचयां जो बचाणे तांई फंगा हेठ गिठे करी लेंदी है, तियां ही मै भी तूसां जो गिठे करी लेणा, पर तूसां नी चांदे कि ऐसा हो।” 38 दिखा, तुहाडा मंदर तुहाडे तांई उजाडी छडया है। 39 “क्योंकि मै तूसां ने बोलदा है, हुणी ला जालू दीकर तूसां नी बोलगे, कि धन्य है सै, जडा प्रभु दे अधिकारे ने ओंदा है, तालू दीकर तूसां मिंजो फिरी कदी नी दिखणा है।”

**24** जालू यीशु मंदरे ला निकली करी जा दा था, तां उदे चेले उसयो मंदरे दी बनाबटा जो दसणे तांई उदे बाल आये। 2 उनी उना जो बोलया, “क्या तूसां ऐ सारा कुछ दिखा दे ना। मै तूसां ने सच्च बोलदा है, ऐथू इक भी पथरे पर पथर नी रेंणा है, जडा ढाया नी जाणा है।” 3 जालू सै जैतून सखां दे पाहडे पर बैठया था, तां चेलयां उदे बाल आई करी उसला पुछ्या, “सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होंगा तां उदा क्या निशाण होणा है?” (aiōn 9:165) 4 यीशुऐ उना जो जबाब दिता, “ध्यान रखयो कि तुहांजो कोई भटकाई न दे।” 5 क्योंकि मते सारे लोकां भेरे नाए ने दाबा करिके ओणा ना उना बोलणा है, मै मसीहा हूँ कने उना मतयां लोकां जो भटकाणा है। 6 जालू तूसां लडाइयां, कने लडाइयां दियां गल्लां सणणे तां डरदे मत; क्योंकि इना दा होणा जरूरी है, पर तालू संसारे दा खात्मा नी होणा है। 7 क्योंकि जातियां ने जातियां कने राज्य ने राज्यां ने इक दुजे ने लडाइयां करणियां ना। कने हर कुथी हिलण होणे न कने अकाल पोणे ना। 8 ऐ तकलीफ कने दुख इयां होणा जियां इक माँ जो बच्चे दे जन्म देणे दिया शुरूआत च होंदा है। 9 “तालू सै लोक जडे तुहाडे खिलाफ न, उना तुहांजो दुख देणे तांई पकडाई देणा है, कने तुहांजो मारी देणा है, कने सारियां जातियां दे लोकां तूसां ने दुशमणी रखणी है क्योंकि तूसां मिंजो पर भरोसा रखदे



ना।" 10 तालू मतयां मिंजो पर भरोसा करणा बंद करी देणा, कने इक दुज्जे जो पकड़णा कने इक दुजे ने दुशमणी रखणी। 11 मतयां परमेश्वरे दे संदेश देणेबालयां झूठे लोकां ओणा है, कने उना मतयां जो भटकाणा। 12 पाप बढणे दिया बजा ने मतयां इक दुज्जे ला प्यार करणा बंद करी देणा है। 13 पर जड़ा जिंदगी दे अंत दीकर मिंजो पर भरोसा रखणा सै ही बचाया जाणा है। 14 कने स्वर्गे दे राज्य दा ऐ श्मसमाचार दा प्रचार सारे संसारे च करणा है, ताकि सारे देशां दियां सारियां जातियां जो इसयो मनणे दा मोका मिल्ले, तालू अंत होई जाणा है। 15 "इस तांई जालू तुसां इक उजाड़ने वाली बडी बुरी चिजा जो श्मशलेम मंदिर च खडोतयो दिखणे, जिदी चर्चा परमेश्वरे दा संदेश देणेबाले दानिय्येले किती थी, (जडे पढन, सै समझन)।" 16 तालू यहदिया प्रदेशे दे लोकां जो जान बचाणे तांई पहाडा जो नसणा पोणा। 17 जडे छती पर होंगे, सै अपने घरे चे समान लेंणे तांई थले मत उतरदे। 18 कने जडे खेतारां च होंगे, सै अपने कपडे लेंणे तांई बापस मत जादे। 19 उना रोजां च उना जनानियां तांई बडा बुरा बकत होणा जडियां लैरथियां होणियां न, कने उना जनानियां तांई जडियां निषाणे जो दूध पियादियां होणियां। 20 इस तांई प्रथना करा कि ऐ बुरा बकत सर्दियां दे दिना च या सब्दे दे दिना ना हो, जालू सभर करणा मुशकिल हो। 21 क्योंकि उना दिना लोकां जो बडे दुख होणे न, जदिया संसार दे शुरू ला हणे दीकर कदी नी होया कने ना कदी होणा। 22 "अगर परमेश्वरे उसी बुरे बकते जो नी घटादां, तां कोई भी माणू नी बचदा। पर उना चुणयो होए लोकां दिया बजा ला, जिना जो परमेश्वरे चुणयां है, बकत घटना है।" 23 "उस बेले तुसां जो कोई बोले, कि दिखा, मसीह पेथू है। या ओथू है। तां भरोसा मत करदे।" 24 क्योंकि झूठे मसीह कने परमेश्वरे दा संदेश देणेबाले झूठे लोकां मतयां ओणा है, कने उना बडे चमत्कार कने अनोखे कम्म दसणे न, ताकि होई सके तां जडे चुणयो न उना जो भटकाई दें। 25 मैं पेहेले ला ही तुसां ने ऐ सब कुछ बोली दिता है। 26 इस तांई अगर सै तुसां ने बोलन, कि दिखा, सै सुनसान जगा च है, तां बाहर मत निकलदे; दिखा, सै कोठडियां च है, तां भरोसा मत करदे। 27 क्योंकि जियां बिजली पूर्व ला निकली करी पडिमि दीकर चमकदी जांदी है, तियां ही माणूदे दे पुत्रे भी ओणा है। 28 "जिथू लाश होए, ओथू ही इल्लां गिटियां होणा है।" 29 "उना दिना च, बुरा कने दुखे बाल बकत मुकी जाणे दे बाद, सूरजे च अंधेरा होई जाणा, कने चद्रमं रौशनी नी देणी। अम्बरे ला तारायां पेई जाणा, कने अम्बरे दियां शक्तियां हिलाईयां जाणियां।" 30 "तालू मैं, माणूदे दे पुत्रे दा निशाण अम्बरे च मिलणा, तालू धरतिया दे सारे कुलां दे लोकां छती पिटणी; कने माणूदे दे पुत्रे जो बडे सामर्थ्य कने महिमा सोगी बढतां पर ओदे दिखणा।" 31 "उनी सुरही दी जौरे दिया अबाजा ने अपने स्वर्गादां जो भेजणा है, ताकि से उना सारे लोकां जो गठेरी करी, जिना जो मैं चुणयां है कने उना संसारे दे चारों पासयां ला लोका जो गठेराणा है।" 32 "अंजिर दे स्रवे दिया कहाणिया ला ऐ सिखा: जालू उदिया डालियां नरम होई जांदियां न कने पते निकलना लगदे न, तां तुहांजो पता लगी जांदा है कि गर्मियां ओणे बालियां न। 33 इयां ही जालू तुसां इना सारियां गल्लां जो होंदे दिखदे न, तां समझी जा कि मैं, माणूदे दे पुत्रे दा ओणा नेडे ही है, मतलब कि दरबाजे पर ही है।" 34 मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जांदियां न, तालू दीकर इसा पीढिया दा अंत नी होणा है। 35 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न। 36 ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गादूत कने ना ही मैं माणूदे दा पुत्र, पर सिर्फ पिता ही उसी रोजे कने घडिया जो जाणदा है। 37 "जियां नूह दे रोज थे, तियां ही माणूदे दे पुत्रे दा ओण भी होणा है।" 38 क्योंकि जियां जल-प्रलय ला पेहेले दे दिना च, जिस रोजे दीकर नूह जहाजे पर नी चढया था, तालू दीकर लोक खांदे पिंदे थे, कने उना चे बियाह होंदे थे। 39 कने जालू दीकर जल-प्रलय आई करी उना जो स्टाई नी लेई गेई, तालू दीकर उना जो कुछ भी पता नी था, तियां ही मैं माणूदे दे पुत्रे भी ओणा है। 40 उस बेले दो जणे खेते च होणे न, इक लेई लेणा है कने दूसा छडी जाणा है। 41 दो जनानिया चक्की पिसा दियां होणिया, इक लेई जाणी, कने दूई छडी देणी है। 42 "इस तांई जागदे रिया, क्योंकि तुहांजो नी पता है कि तुहाडे प्रभुये कुस रोजे ओणा है।" 43 पर ऐ जाणी लिया कि अगर घरे दे मालिके जो पता होंदा कि चोरे कालू ओणा है, तां सै जागदा रेंदा, कने अपने घरे

चोरी नी होणा दिन्दा। 44 इस तांई तुसां भी तैयार रिया, क्योंकि जिना घडिया दे बारे च सोचदे भी नी न, उसा घडिया माणूदे दे पुत्रे आई जाणा है। 45 सै भरोसे जोगा कने अकला बाला नोकर कुण है, जिसयो मालिके अपने नोकरां चाकरां दा सरदार बणाया है, ताकि बकते पर उना जो खांणा खाणे दे? 46 धन्य है सै दास, जिसयो उदा मालिक आई करी उसयो ऐदिया करदा दिखे। 47 मैं तुसां ने सच्च बोलदा है; सै उसयो अपणिया सारिया संपतिया दा अधिकारी बणाणा है। 48 "पर अगर सै बुरा नोकर सोचना लगे, कि मेरे मालिके जो ओणे जो देर है।" 49 कने अपने सोगी नोकरां जो कृपणा लग्णे, कने शराबियां सोगी खा पिणे। 50 तां उस नोकरे दे मालिके ऐसे रोजे बापस ओणा है, जिस रोजे सै उदी राह नी दिखा दा हो, कने ऐसी घडी कि उसयो पता ना हो, 51 कने उसयो सकत सजा देईकरी, उदा हिस्सा कपटियां सोगी जोडे, तालू उनी रोंणा कने दंद पिणे।

**25** फिरी यीशुऐ अपने चेलयां ने बोलया, जालू मैं, माणूदे दे पुत्रे बापस ओणा है, तालू स्वर्ग दा राज्य ऐसा होणा है: दसां कुआरियां अपणिया मशालां लेईकरी लाडे जो मिलने तांई उदे बियाये जो जाणा। 2 उना चे पंज जणियां मुर्ख कने पंज समझदार थियां। 3 उना मुर्ख कुआरियां अपणिया मशालां तां लियां, पर अपने सोगी जादा तेल नी लांदा। 4 पर समझदार कुआरियां अपणियां मशालां सोगी अपणिया-अपणिया कुपियां च तेल भी भरी लांदा। 5 जालू लाडे जो ओणे च देर होई, तां सै बोर होणा लगियां, कने सै सोई गियां। 6 पर अधिया राती रोल्ला पिया, कि दिखा, लाडा ओआ दा है, उसला मिलणे तांई चला। 7 तालू सै सारियां कुंवारियां उठी करी अपणिया-अपणिया मशालां ठीक करणा लगियां। 8 कने मुर्ख समझदारां ने बोलया, अपने तेले च थोडा सांझो भी दिया, क्योंकि साडियां मशालां बुझी जा दियां न। 9 पर समझदारां जबाब दिता, कि ऐ साडे कने तुहाडे तांई कदी पूरा नी होणा; ठीक तां ऐ है, कि तुसां बेचणे बाले बाल जाई करी अपने तांई खरदी लिया। 10 जालू सै खरीदणा जा दियां थियां, तां लाडा आई रिया, कने जडियां तैयार थियां, सै उदे सोगी बियाह बाले घरे जो चली गियां कने घरे दा दरबाजा बंद करी दिता। 11 "इदे बाद सै दूईयां कुआरियां भी वापिस आई करी रोदे होए लाडे जो सटणा लगियां, है स्वामी, है स्वामी, साडे तांई दरबाजा खोली दिया।" 12 "उनी जबाब दिता, कि मैं तुसां ने सच्च बोलदा है कि, मैं तुहांजो नी जाणदा है।" 13 "इस तांई जागदे रिया, क्योंकि तुसां नी जाणदे मेरे बापस ओणा दा रोज, कने सेह बकत कालू ओणा है।" 14 "फिर यीशु ने इक होर कहाणी दसी कि मैं जालू बापस ओणा है, तालू स्वर्ग दा राज्य ऐसा होणा: इक माणू था जिनी परदेस जांदे बेले अपने नोकरां जो सदीकरी अपणी सारी जमीन जयादात उना जो देई दिती।" 15 उनी इकी जो पंज तोडे, दुज्जे जो दो, कने तरिये जो इक, हर इकी जो उदिया शक्तिया दे अनुसार दिता, कने फिरी परदेस चली गया। 16 तालू जिसयो पंज तोडे मिलयो थे, उनी झट जाई करी उना ने लैन-दैन किता, कने पंज तोडे होर कमाई ले। 17 इसी तरिके ने जिसयो दो मिलयो थे, उनी भी दो होर कमाई ले। 18 पर जिसयो इक ही तोडा मिलया था, उनी जाई करी मिटी खूपी, कने अपने मालिके दे पेसे लुकाई दिते। 19 मते रोजां बाद मालिके आई करी उना नोकरां जो गिठे सदया कि उना उदे पैसयां ने क्या किता। 20 जिसयो पंज तोडे मिलयो थे, उनी पंज तोडे होर आणी करी बोलया, है मालिक, तू मिंजो पंज तोडे दिते थे, दिख मैं पंज तोडे होर कमायो न। 21 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोडे पैसयां जो सम्भालने कने भरोसे दे लाइक रिया है; मैं तिजो होर मतियां चिजा दा अधिकारी बणाणा है। अपने मालिके सोगी खुश हो। 22 कने जिसयो दो तोडे मिलयो थे, उनी भी आई करी बोलया, है मालिक तू मिंजो दो तोडे दिते थे, दिख, मैं दो तोडे होर कमायो न। 23 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोडे पैसयां जो सम्भालने कने भरोसे दे लाइक रिया, मैं तिजो मतियां चिजा दा अधिकारी बणांगा। अपने मालिके सोगी खुश हो। 24 तालू जिसयो इक तोडा मिलया था, उनी आई करी बोलया, है मालिक, मैं तिजो जाणदा था कि तू बडा सकत माणू है: तू दुजे लोका दे कम्मे ला फायदा कमाणे दी आस रखदा है, कने जिथू तू नी खलारदा है ओथू तू बटोलदा है। 25 तांई तां मैं डरी गया कि अगर मैं तेरा पैसा गवाई दिता तां तू मिंजो सजा देणी, इस तांई जाई करी मैं तेरा तोडा मिटिया च लुकाई दिता; दिख, जडा तेरा है, सै ऐ है। 26 उदे मालिके उसयो

जबाब देता, हे दृष्ट कने आलसी नोकर; तिजो पता था कि, मैं दुजे लोका दे कम्मे ला फामदा कमणे दी आस रखदा है। 27 तां तिजो ऐसा करणा चाईदा था कि, मेरा पैसा सर्पाफों जो देई दिन्दा, फिरी मैं आई करी अपना पैसा उना ला ब्याजे समेत लेई लेंदा। 28 तालू मालिके बाकी नोकरां जो बोलया, “तोडे जो इसला लेई लिया, कने जिदे बाल दस तोडे न, उसयो देई दिया। 29 जिना बाल समझणे दी इच्छा है जडा परमेस्वर सिखांदा है, उसयो परमेस्वरे होर समझ देणी, पर जडा समझणे दी इच्छा नी रखदा, कि मैं क्या सिखांदां, तां सै जडा समझया है, परमेस्वरे सै भी उसला लेई लेणा।” 30 कने इस नकमे नोकरे जो नेरे च पाई दिया, जिथू उनी रोणा कने दं पीणे। 31 “जालू मैं, माणुए दे पुत्रे अपणिया महिमा च ओणा है, कने स्वर्गदूते उदे सोगी ओणा, तालू लोकां दा न्याय करणे ताई उनी अपने महिमा दे सिहांसने पर विराजमान होणा।” 32 कने सारियां जातियां मेरे सामणे गिठियां करणियां न; जियां पुहाल भेडां जो बकरियां ला लग करी दिन्दा है, तियां ही उनी भी उना जो इक दुजे ला लग करणा है। 33 कने मैं धर्मी लोका जो अपने सजे पासे कने अधर्मियां लोका जो खबे पासे खरेडना है। 34 “तालू मैं राजे अपने सजे पासे बोणे बालयां ने बोलणा कि, हे मेरे पिता दे धन्य लोको, ओआ, कने उस राज्य दे अधिकारी बणी जा, जडा संसारे दे शुरू होणे ला तुहाडे ताई तैयार कितया है।” 35 क्योंकि मैं जालू भूखा था, तां तुसां मिजो खाणे जो खाणा दिता, जालू मैं प्यासा था, तां तुसां मिजो पाणी पियाया, मैं इक परदेसी था, तुसां मिजो अपने घरे रियाया। 36 जालू मैं नंगा था, तुसां मिजो कपडे दिते, मैं बिमार था, तुसां मेरा हाल चाल पुछया, मैं जेला च था, तां तुसां मिजो ने मिलणा आये। 37 “तालू धर्मियां उसयो जबाब देणा, कि प्रभु जी, असां कालू तिजो भूखा दिखया कने खुआया? या प्यासा दिखया, कने पाणी पियाया?” 38 असां कालू तिजो परदेसी दिखया कने अपने घरे रियाया या नंगा दिखया, कने कपडे दिते? 39 असां तिजो कालू बिमार कने जेला च दिखया, कने तिजो ने मिलणा आये? 40 “तालू मैं राजे उना जो जबाब देणा, मैं तुसां ने सच्च बोलदा है, कि जडा तुसां मेरे इना छोटे ला छोटे चले चे कुसी इकी दे सोगी कितया है, सै ही मेरे सोगी कितया है।” 41 “तालू उनी खबे पासे बालयां ने बोलणा है, हे श्रापित लोको मेरे सामणे ला इसा कदी नी बुझणे बालिया अग्गी च चली जा, जडी शैताने कने उदे दूतां ताई परमेस्वरे तैयार कितया है।” (aiōnios g166) 42 क्योंकि मैं भूखा था, तुसां मिजो खाणे जो नी दिता, मैं प्यासा था, कने तुसां मिजो पाणी नी पियाया; 43 मैं परदेसी था, कने तुसां मिजो अपने घरे नी रियाया; मैं नंगा था, कने तुसां मिजो कपडे नी दिते; कने मैं बिमार कने जेलां च था, तां तुसां मेरा हाल चाल नी पुछया। 44 “तालू उना जबाब देणा, कि प्रभु जी, असां तिजो कालू भूखा, या प्यासा, या परदेसी, या नंगा, या बिमार, या जेला च दिखया, कने तेरी सेवा या टहल नी कित्या?” 45 “तालू मैं उना जो जबाब देणा, मैं तुसां ने सच्च बोलदा है कि तुसां जडा इना छोटे ला छोटे चले चे कुसी इकी दे सोगी नी कितया है, से मेरे सोगी भी नी कित्या है।” 46 कने सै जडे खबे पासे न इना जो हमेशा ही सजा मिलणी है पर धर्मी लोका हमेशा दिया जिन्दगिया च प्रवेश करणा है। (aiōnios g166)

**26** जालू यीशु ए सारियां गल्लां बोली बैठा, तां अपने चेलयां ने बोलणा लग्गा। 2 “तुहांजो पता है, कि दो दिना बाद फसह दा त्योहार होणेबाला है, कने माणुए दा पुत्र सूली पर चढाणे ताई पकडायया जाणा है।” 3 तालू बड़े याजक कने प्रजा दे यहदी अग्वे कैफा नाए दे महायाजक दे अंगणे च गिठे होए, 4 कने अपु चे निचर करणा लग्गे कि यीशुए जो धोखे ने पकडी करी मारी दें। 5 पर सै बोलते थे, कि त्योहारे दे बकत नी, कुथी इयां ना होए कि लोकां च रोल्ला पेई जा। 6 जालू सै बैतनिय्याह ग्रां च शमौन कोळी दे घरे था, जिसयो यीशुए ठीक कितया था। 7 जालू यीशु खाणा खाणे ताई बैठया था तां इक जनानी संगमरमेरे दे भांडे च बडा मेंहगा इत्र लेईकरी उदे बाल आई कने, तां उना सै इत्र उदे सिरे पर नियोरी दिता। 8 एे दिखीकरी उदे चले हेरान होए कने बोलणा लग्गे, “इस इतणे मेरो इत्रे जो सत्यानाश नी करणा चाईदा? 9 इसयो तां खरे दामे च बेची करी कंगालां जो बंडी सकदे थे।” 10 एे जाणी करी यीशुए उना ने बोलया, जानानिया जो कजो तंग करा दे न? उना मिजो ने खरा कित्या है। 11 कंगालां तां तुहाडे सोगी हमेशा रेंणा है, पर मैं तुहाडे सोगी हमेशा नी रेंणा है। 12 इना जडा इत्र मेरे शरीर पर नियोरया है, सै इना मिजो मरणे ला पहले ही दफनाणे दी तैयारी कित्या है। 13 “मैं

तुसां ने सच्च बोलदा है, कि सारे संसार च जिथू कुथू भी एे शुभसमाचार सुणाया जाणा, ओथु इसा दे इस कम्मे दी चर्चा भी इसा दिया यादा च होणी।” 14 यहदा इस्करियोती, जडा बाहरां चेलयां चे इक था, उनी बड़े याजकां बाल जाई करी बोलया, 15 अगर मैं उसयो तुहाडे हथे पकडाई दे, “तां मिजो क्या दिगे? उना उसयो ती चांदिये दे सिक्के तोली करी देई दिते।” 16 कने सै तालू ला ही उसयो पकडाने दा मोका तोपणा लगी पिया। 17 अखमीरी रोटीया दे त्योहारे दे पेहले रोजे, चले यीशुए बाल जाई करी पुछणा लग्गे, “तू कुथु फसह खाणा चांदा है, ओथु असां जाई करी तेरे ताई फसह खाणे दी तैयारी करन?” 18 उनी बोलया, “शेहरे च जा कने अमुक नाए दे माणुए बाल जाई करी बोला, कि गुरू बोला दा है, कि मेरा बकत नेडे है, कने मैं अपने चेलयां सोगी तेरे ऐथु फसह दा त्योहारे मनाणा है।” 19 चेलयां यीशुए दा हुकम मनया, कने फसह तैयार कित्या। 20 जालू संज होई तां सै चेलयां सोगी खाणा खाणे ताई बैठा। 21 कने जालू सै रोटी खाणां बैठयो थे, तां यीशुए बोलया, “मैं तुसां ने सच्च बोलदा दा है, कि तुसां चे इकी जणे मिजो पकडणा है।” 22 इसा गल्ला पर सै बड़े उदास होई गे, कने सारे उसयो पुछणा लग्गे, “हे गुरू, क्या सै मैं है?” 23 उनी जबाब दिता, “जिनी मिजो सोगी थालिया च हथ पाया है, उनी ही मिजो पकडणा है।” 24 “माणुए दे पुत्रे मरी जाणा है, क्योंकि एे सब कुछ पबित्र शाखां च लिखया है, पर उस माणुए जो बडी बुरी सजा होणी है जडा मिजो धोखा दिन्दा है जिनी मिजो पकडवाणे च सहायता करणी है! अगर उस माणुए दा जन्म ही नी होया होंदा तां ही उदे ताई खरा होंदा।” 25 तालू उसयो पकडणे बाले यहदे बोलया, “गुरू जी, क्या सै मैं है?” उनी उसयो बोलया, “तू बोली बैठा।” 26 जालू सै खा दे थे तां यीशुए रोटी लेई, कने परमेस्वरे दा धन्यवाद करी के तोडी, कने चेलयां जो दिती कने बोलया, “लिया, खाई लिया; एे मेरा शरीर है।” 27 फिरी उनी दाखरस दे कटोरे जो चुकी करी परमेस्वरे दा धन्यवाद कित्या, कने चेलयां जो दिता कने बोलया, “तुसां सारे इस कटोरे चे पिया, 28 क्योंकि एे बाचा दा मेरा सै खून है, जडा मतयां लोकां दिया भलाईया ताई बहाया जाणा है।” 29 “मैं तुहांजो ने सच्च बोलदा है, मे दाखा दा एे रस उस दिने दीकर नी पीणा, जालू दीकर पिता दे राज्य च नोआ दाखरस नी पी लेणा।” 30 फिरी यीशुए कने उदे चेलयां फसह दे त्योहारे दे भजन गाई करी यरुशलेम शहरे दे बाहर जैतून सखां दे पाहडे पर चली गे। 31 तालू यीशुए उना ने बोलया, “तुसां सारयां ही अज राती अपने भरोसे ला भटकी जाणा है; क्योंकि पबित्र शाखां च लिखया है कि मैं पुहाल मारी देणा है; कने झुंडे दियां भेडां तितर-बितर होई जाणा।” 32 पर मैं मरी के जिन्दा होणे ला बाद तुहांजो ला पहले गलील प्रदेश च पूजणा है। 33 पर पतरसे यीशुए जो बोलया, “चाहे सारे छडी करी नसी जांगे पर मैं नी नसगा।” 34 यीशुए उसयो बोलया, “मैं तिजो ने सच्च बोलदा है, कि अज ही इसा राती मुर्गो जो दो बार बांग देणे ला पहले तू मिजो तीन बरी बोलणा है, कि मिजो नी जाणदा है।” 35 पतरसे यीशुए ने बोलया, अगर मिजो तेरे सोगी मरणा भी पौगा, तमी मैं तिजो ला कदी नी मना करणा। कने इयां ही सारयां चेलयां भी बोलया। 36 तालू यीशुए अपने चेलयां सोगी गतसमनी नाए दिया इक जगा च आया कने अपने चेलयां ने बोलणा लग्गा, “ऐथु बेई रिया, जालू दीकर मैं प्राथना करूं।” 37 सै पतरस कने जब्दी दे दोनो पुत्रां जो सोगी लेई गया, कने उदास कने रोणा लग्गा। 38 तालू उनी उना जो बोलया, “मेरा मन बडा उदास है, ऐथु दीकर कि मेरे प्राण निकली चलयो न। तुसां ऐथु ही स्का, कने मेरे सोगी जागदे रिया।” 39 फिरी यीशु थोडा अगे गिया, कने गोडे भार पेई गया कने मुह धरतिया पर करी प्राथना करणा लग्गा, “हे मेरे पिता, अगर होई सके तां एे कटोरा मिजो ला टली जाए, तमि जियां मैं चांदा है तियां नी हो, पर जियां तू चांदा है, तियां ही हो।” 40 फिरी जालू यीशु बापस आया कने उना चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके? 41 जागदे कने प्राथना करदे रिया ताकि मिजो पर भरोसा रखणा नी छडन। आत्मा तां खरा करणा चांहदी है पर शरीर च जोरे दी कमी है।” 42 फिरी उनी दुजी बरी जाई करी एे प्राथना कित्या कि, “हे मेरे पिता, अगर एे मेरे पित्यो बिना नी हटी सकदा है, तां तेरी इच्छा पूरी होए।” 43 तालू उनी आई करी उना जो फिरी सुतया दिखया, क्योंकि उना दियां हखी निन्दा ने भस्त्रयां थियां। 44 उना जो छडी करी सै फिरी चली गिया, कने सेई गल्लू देवारा बोली करी, तिजी बरी

प्राथना किती। 45 तालू उन्नी चेलयां बाल आई करी उना जो बोलया, हण सोदे रिया कने अराम करा: दिखा, से घडी आई गेई है, कने माणूए दा पुत्र पापियां दे हथे पकडया जाणा है। 46 “उठा कने चला। दिखा, जिनी माणूए मिजों पकडवाणा है सै बखे आई रिया है।” 47 जालू यीशुए ऐ बोला दा ही था, यहदा जडा बाहरां चेलयां च इक था, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड्डे याजकां, यहदी व्यवस्था दे गुरूआं कने यहदी अगुवां भेजयो थे। 48 उनी यीशुए जो पकडणने बालयां जो ऐ बोलया था कि: “जिदी मै चूमी लोणा, सै ही यीशु है, उसयो तुसां पकडी लेनयो।” 49 उनी झट यीशुए बाल आई करी बोलया, “गुरू जी, नमस्ते!” कने उदी चूमी लेई। 50 यीशुए उसयो बोलया, “हे मित्र, जिस्सी कम्मे तांई तू आया है, उसयो करी ले।” तालू उना बखे आई करी यीशुए जो पकडी लिया। 51 यीशुए दे साथियां चे इकी अपणी तलवार कडी कने महायाजके दे इकी नोकरे पर चलाई करी उदा कने बडी दिता। 52 तालू यीशुए उसला बोलया, अपणिया तलवारा मथाना च रख क्योकिं जडे तलवारां चलाई न सै तलवारा ने ही खत्म करणे न। 53 तिजो क्या पता नी है कि मै अपने पिता ने विनती करी सकदा है, कने उनी स्वर्गदूते दियां बाहरां पलटना ला भी जादा स्वर्गदूते मरे बाल हण हाजिर करी देणे? 54 “पर पबित्र शाखां दियां सै गल्लां कि इयां ही होणा जरूरी है कियां पुरियां होणियां?” 55 यीशुए उना जो बोलया, तुसां क्या तलवारां कने डांगा लेईकरी मिजो डाकुआं सांई पकडना आयो न? पर मै जालू हर रोज मंदरे च बेईकरी उपदेश दिन्दा था, तालू तां तुसां मिजो नी पकडया। 56 “पर ऐ इस तांई होया कि पबित्र शाखां दियां गल्लां पुरियां होना।” जालू ऐ होया तां उदे सारे चले उसयो छडी करी नसी गे। 57 तालू यीशुए जो पकडने बाले उसयो कैफा नाए दे महायाजक बाल लेई आऐ, जिथ यहदी व्यवस्था जो सिखाणे कने यहदी अगुवे गिठे होयो थे। 58 कने पतरस दुरे-दुरे ला उना दे पिच्छे-पिच्छे महायाजक दे अंगणे दीकर गिया, कने अंत दिखणे तांई अंदर जाई करी पयादां बखे बेई गिया। 59 बड्डे याजक कने यहदी महासभा दे सदस्य यीशुए जो मारी देणे तांई उदे खिलाफ च गबाई तोपा दे थे, 60 पर मते झूठे गबाह ओणे पर उना जो कोई गबाई नी मिली। आखरी च दो जणे आऐ, 61 कने बोलया, “कि इनी बोलया था कि मै परमेश्वरे दे मंदरे जो ढाई सकदा है, कने फिरी उसयो तिन्ना रोजां च बणाई सकदा है।” 62 तालू महायाजके बिच खडोई करी यीशुए जो बोलया, “तू क्या कोई जबाब नी देणा? ऐ लोक तरे खिलाफ क्या गबाई देद न?” 63 पर यीशु चुप ही रिया। तालू महायाजके उसयो बोलया “मै तिजो जिंदे परमेश्वरे दी कसम दिन्दा है, कि अगर तू परमेश्वरे दा पुत्र मसीह है, तां सांझो ने बोली दे।” 64 यीशुए उसयो बोलया, “उनी अपु मन्नी लिया; कने मै, माणूए दा पुत्र तुसां ने ऐ भी बोलदा है, कि हण तुसां माणूए दे पुत्रे जो सर्वशक्तिमान दे सजे पासे बैठया, कने अम्बरे दे बदला पर ओंदे दिखणा है।” 65 जालू महायाजके यीशुए जो ऐ बोलदे सुणया तां उनी गुरसे च अपने कपडे फाडी दिते, कने बोलया, “हण सांझो कुसी गबाह दी जरूरत नी है। तुसां परमेश्वर दी निदा करदे सुणया, तुहाडी क्या सलाह है इसा गल्ला पर?” उना सारायां फेसला किता कि यीशुए परमेश्वरे दी निदा किती है। 66 तुसां कयो सोचदे न? उना जबाब दिता, ऐ तां मारी देणे जोगा है। 67 तालू उना उदे मूरे पर थुक्या कने उसयो मुक्के मारे, कने बाकियां थपुड मारी करी बोलया, 68 हे मसीह, अगर तू परमेश्वरे दा संदेश देणेबाला है! तां सांझो दस कुनी तिजो मारया, 69 पतरस बाहर अंगणे च बैठया था तां इकी दासिया उदे बाल आई करी बोलया, “तू भी तां यीशु गलीली सोगी था।” 70 उनी सारयां दे सामणे ऐ बोली करी मना किता कि, “मै नी जाणदा कि तू क्या बोला दी है।” 71 जालू सै बाहर डेवढिया पर गिया, तां दुईया नोकराणिया उसयो दिखीकरी उना ने बोलया जडे ओथु बैठयो थे कि, “ऐ भी तां यीशु नासरिये सोगी था।” 72 उनी कसम खाई करी फिरी मना किता, “मै इस माणूए जो नी जाणदा है।” 73 थोडिया देरा बाद जडे लोक ओथु खडुतयो थे, उना पतरसे बाल आई करी उसयो बोलया, “सच्चि तू भी इना चे इक है; क्योकिं तेरी बोली तेरा सच्च दसा दी है।” 74 पतरस अपु जो कोसणा लग्गा, कसम खाणा लग्गा, मै इस माणूए जो नी जाणदा। कने झट मूर्ग बांग देई दिती। 75 तालू पतरसे जो यीशुए दियां बोलियां गल्लां याद आईयां, मुर्ग दिया बांगा देणे ला पेहेले तू मिजो तिन्न बरी मना करणा है। कने सै बाहर जाई करी जोरे-जोरे ने रोणा लग्गा।

27 कने ब्यागा तडके होदे ही झट उना बड्डे याजकां, कने यहदी अगुवां, कने व्यवस्था जो सिखाणे बालयां कने महासभा दे सारे लोकां यीशुए जो मारी देणे दी सलाह किती। 2 कने उना यीशुए जो बन्या, कने न्याय करणे तांई यहदिया प्रदेश दे राज्यपाल पिलातुस दे हबाले करी दिता। 3 जालू यीशुए जो पकडणे बाले यहदा जो पता चला कि सै मरवाणे तांई दोषी ठेहराया गिया है तां सै बडा पछताया कने उना ती चांदिदे दे सिक्कयां जो बड्डे याजकां कने यहदी अगुवां जो बापस देई आया। 4 कने बोलया, मै बैकसूर जो मारणे तांई पकडणे दा पाप किता है, उना बोलया, “सांझो क्या है? इस तांई तू ही जिम्मेवार है।” 5 तालू सै उना सिक्कयां जो मंदरे दे अंगणे च फेंकी करी बाहर चली गिया, कने जाई करी उनी अपु फा लेई लिया। 6 बड्डे याजकां उना सिक्कयां जो लेईकरी बोलया, “साडे नियम दे हिसावे ने इना पेंसया जो मंदिर दे भंडारे च रखणा ठीकरेणै है, क्योकिं ऐ इक माणूए जो मरवाणे तांई दितया दाम है।” 7 उना सलाह करिके उना सिक्कयां ने परदेशियां जो दबाणे तांई कुम्हारे ला खेतर खरीदी लिया। 8 इसा बजा ने उस खेतेरे जो अजे दीकर खूने दा खेतेरे बोलदे न। 9 तालू जडा बचन थियमह परमेश्वरे दा संदेश देणेबाले बोलया था सै पूरा होया: “उना सै ती सिक्के जडे इस्राएल दे लोकां यहदा जो दितयो थे लेई ले। 10 कने जियां प्रभूए मिजो हुकम दितया था तियां ही उना जो कुम्हारे दे खेतेरे दे दामे च देई दिता।” 11 जालू यीशु राज्यपाले दे सामणे खडोतया था, तां हाकिमे उसयो पुछया, तू क्या यहदियां दा राजा है? यीशुए उसयो बोलया, “तू अपु ही बोला दा है।” 12 जालू बड्डे याजक कने यहदी अगुवे उस पर दोष ला दे थे, तां उनी कोई जबाब नी दिता। 13 इस पर पिलातुसे उसयो बोलया, “तू क्या सुणा दा नी है कि, ऐ तेरे खिलाफ च कितणियां गबाईयां देद न?” 14 पर उनी उसयो इकी भी गल्ला दा जबाब नी दिता, ऐथु दीकर कि राज्यपाल जो बडी हेरानी होई। 15 हर साले फसह दे त्योहारे च, राज्यपाल पिलातुस इक केदिये जो छडी दिन्दा था, जिसयो लोक चांदे थे कि सै छूटे। 16 उस बेले बरअब्बा नाए दा इक मनया नामी कैदी था। 17 जालू सै गिठे होए तां पिलातुसे उना जो बोलया, “तुसां कुस्यो छुडाणा चांदे न, ताकि मै तुहाडे तांई उसयो छडी दे? बरअब्बे जो या यीशुए जो जिसयो मसीह बोलदे न?” 18 क्योकिं सै जाणदा था कि उना उसयो जलनिया ने पकडया है। 19 जालू सै न्याय दिया कुर्सिया पर बैठया था तां उदिया घरे बालिया उसयो बोली भेजया था कि, “तू उस धर्मिये दे मामले च हथ मत पांदा; क्योकिं मिजो अज राती सुपने च उदिया बजा ने बडा दुख होया है।” 20 पर बड्डे याजकां लोकां दिया भिडा जो भडकाया, कि पिलातुस ला यीशुए जो छडणे दी बजावे बरअब्बा जो छडणे दी माँग करा, कने यीशुए जो मारणे तांई बोला। 21 राज्यपाले उना ला पुछया, इना दोना चे कुस्यो चांदे न, ताकि मै तुहाडे तांई छडी दे? उना बोलया, “बरअब्बा” जो। 22 पिलातुसे उना ला पुछया, फिरी यीशुए दा क्या करणा, जिसयो मसीह बोलदे न? “सबना बोलया, इसयो सूली पर चढाई दिया।” 23 पिलातुसे उना जो बोलया, “कजो इनी क्या बुरा कितया है?” पर भीड होर भी जोरे ने चिलाणा लग्गी कि, “इसयो सूली पर चढाई करी मारी दिना।” 24 जालू पिलातुसे दिखया, कि कुछ नी बणा दा है कने उलटा होर जादा रोल्ला होंदा जादा है, तां उनी पाणी लेईकरी भिडा दे सामणे अपने हथ धोते कने बोलया, “मै इस धर्मिये दे खूने ला निर्दोष है; हण तुसां ही जाणा।” 25 सबना लोकां जबाब दिता, “इदे खूने दा इल्जाम सांझो पर कने साडिया ओलादी पर होए।” 26 बरअब्बा जो उना तांई छडी दिता, कने यीशुए जो कोडे लगबाई करी सूली पर चढाणे तांई रोमी सिपाइयां दे हबाले देई दिता। 27 तालू राज्यपाले दे सिपाइयां यीशुए जो किले च लेईजाई करी उदे चोरो पासे सारी पलटन खरेडी दिती। 28 उदे सारे कपडे उतारी करी उसयो बैगणी रंगे दे कपडे पेहनाइ दिते, 29 कने कंडयां दा मुकुट बणाई करी उदे सिरे पर रखया; कने उदे सजे हथे च सरकडा दिता। कने यीशुए दे सामणे झुकी करी उदा मजाक उडाणा लग्गे कने बोलया, “हे यहदियां दे राजा नमस्ते।” 30 कने उस पर थुक्या कने सेई सरकडा लेईकरी उदे सिरे च मारणा लग्गे। 31 जालू सै उदा मजाक उडाई बैठे, तां उना सै कपडे उतारी करी उदे अपने कपडे उसयो पेहनाए, फिरी उसयो सूली पर चढाणे तांई शेहरे ला बाहर लेई गे। 32 बाहर जांदे बेले उना जो शमौन नाए दा इक कुरेनी माणू मिल्ला, उना उसयो बेकार च ही पकडया ताकि सै उदिया सुलिया जो चुकी करी लेई चले। 33 कने उसयो

गुलगुता नाए दिया जगा च मतलब जिसयो खोपडी दी जगा बोलदे न, ओथु पुज्जी करी, 34 उना उसयो कोडा रस मिलाई करी दाखरस पीणे जो दिता, पर उनी चखी करी नी पिता। 35 तालू उना उसयो सूली पर चढाया, कने चिठियां पाई करी उदे कपडे बंडी ले। 36 कने ओथु बेईकरी उदा पेहरा देणा लगे। 37 कने उदा दोष उदे सिरे पर लाई दिता कि “ऐ यहदियां दा राजा यीशु है।” 38 तालू उदे सोगी दो डाकू इक सजे पासे कने इक खबे पासे सूली पर चढाए। 39 कने ओणे-जाणे बाले लोक सिरे हिलाई-हिलाई करी उदी निंदा करदे थे। 40 कने बोलदे थे कि, “ओ मंदरे जो ढाणे बाल्या कने उसयो तिन्ना रोजां च बणाणे बाल्या, अपने आपे जो तां बचा। अगर तू परमेख्वरे दा पुत्र है, तां सूली ला उतरी आ।” 41 इसी तरीके ने ही बड़े याजक, व्यवस्था जो सिखाणे बाले कने यहूदी अगुवे समेत सारे उदा मजाक उडाई करी बोला दे थे कि, 42 इनी होरना जो तां बचाया पर अपने आपे जो नी बचाई सकदा है। ऐ तां झाम्नाए दा राजा है। अगर तू हुण सूली ला उतरी ओए, तां असां तिजो पर भरोसा करणा। 43 इनी परमेख्वरे पर भरोसा रखया है, अगर सै इसयो चांदा है, तां हुण इसयो छुडाई ले, क्योंकि इनी बोलया था कि, मैं परमेख्वरे दा पुत्र है। 44 इयां ही सै डाकू भी उदी बुराई करदे थे जडे उदे सोगी सूली पर चढायो थे। 45 उस रोजे दोपेरा ला लेईकरी तिजे पहर दीकर सारे देशे च नेहरा होई गया। 46 तिजे पहर दे बखे यीशुए बडे जोरे ने पुकारी बोलया, “एली, एली, लमा शबत्तनी?” मतलब “है मेरे परमेख्वर, तू मिंजो कजो छडी दिता?” 47 जडे ओथु थे, उना चे कितणयां ए सुगीकरी बोलया, “सै तां एलिय्याह जो पुकारा दा है।” 48 उना चे इक बन्दा झट दोडया, कने उनी स्पंज लेईकरी सिरके च डुबोई, कने सरकंडे पर रखीकरी उसयो चुसाया। 49 होरनी बोलया, “स्की जा, दिखदे न कि, एलिय्याह इसयो बचाणा ओंदा है कि नी।” 50 तालू यीशुए फिरी बडे जोरे ने चिलाई करी अपने प्राण छडी दिते। 51 कने दिखा, मंदरे दा परदा उपरे ला लेईकरी थले दीकर फटी करी उदे दो टुकडे होई गे, कने धरती कमी पेई कने पथर तिडकी। 52 कने कबरां खुली गियां, कने मेरे हुय मते पबित्र लोकां दे शव जिन्दा होई गे, 53 कने जिन्दा होणे बाद सै कबरां ला निकली करी पबित्र शेहरां च गे, कने मत्यां जणया उना जो दिखया। 54 तालू सूबेदार कने जडे उदे सोगी यीशुए दा पेहरा देदे थे, सै भूकम्प कने जडा कुछ ओथु होया था, उसयो दिखीकरी बड़े भरी डरी गे, कने बोलणा लगे, “ऐ तां सचची ही परमेख्वरे दा पुत्र था।” 55 ओथु मतियां जनानिया जडियां गलील प्रदेशे ला ही यीशुए दी सेवा करदियां उदे सोगी आइयां थियां, सै दुजे ला ही दिखा दियां थियां। 56 उना चे मरियम मगदलीनी, कने याकूब कने थोसेस दी माता मरियम कने जब्दीये दे पुत्रां दी माता भी थी। 57 जालू संज होई तां यूसुफ नाए दा अरिमतिया शेहरे दा इक अमीर माणू जडा अपु भी यीशुए दा चेला था, ओथु आया। 58 उनी पिलातुस बाल जाई करी यीशुए दी लाश मंगी। कने पिलातुसे देणे दा हुकम देई दिता। 59 यूसुफे लाश लेई कने उसयो चीटिया चादरा च लपेटया, 60 कने उसयो अपणिया नोईया कबरां च रखया, जडी उनी चढ़ाना च बणबाइयो थी, कने कबरां दे दरबाजे पर बडा पथर रखीकरी चली गिया। 61 कने मरियम मगदलीनी कने दुई मरियम ओथु कबरां दे सामणे बेठियां थियां। 62 दुऐ रोजे जडा तैयारिया दे रोजे ला अगला दिन था, उस रोजे बड़े याजकां कने फरीसियां पिलातुसे बाल गिठे होईकरी बोलया, 63 “हे महाराजा, सांझो याद है, कि उनी भटकाणे बाले जालू जिंटे बेले बोलया था कि, मैं उना रोजां बाद फिरी जिन्दा होई जाणा है। 64 हुकम दे कि तिन्ना रोजां दीकर सिपाई कबरां दी रखबाली करन, कुथी इयां ना हो कि उदे चेले आई करी उसयो कडी नी लेई जान, कने लोकां जो बोलन कि सै मरया चे जिन्दा होई गिया है। तालू पिछला धोखा पेहले ला भी बुरा होणा है।” 65 पिलातुसे उना जो बोलया, “तुहाडे बाल सिपाई तां हेन जा कने अपणिया समझा दे अनुसार रखबाली करा।” 66 इस ताई उना जाई करी कबरा पर अपने निशाणे सोगी प्रवेश दरबाजे जो बंद करिरी सुरक्षित बनाई दिता ताकि कोई इसयो अपणिया जगा ला नी हटाए।

**28** सब्ते दे रोजे बाद हफ्ते दे पेहले रोजे पौ फटदे ही मरियम मगदलीनी कने दुई मरियम कबरां जो दिखणा आइयां। 2 कने दिखा इक बडा हिलण होया, क्योंकि प्रभुए दा इक स्वर्गदूत स्वर्गे ला उतरया था, कने बखे आई करी उनी पथरे जो हटाई दिता, कने उस पर बेई गिया। 3 उदा रूप बिजा साई था कने

उदे कपडे बर्फा साई चिटे थे। 4 उदे डरे ने पेहेदार कम्मी पे, कने मुर्दयां साई होई गे। 5 स्वर्गदूते जनानिया जो बोलया, “डरा मत, मिंजो पता है कि तुसां यीशुए जो तोपा दियां न जिसयो सूली पर चढाया था। 6 सै ऐथु नी है, सै तां अपने बचने दे अनुसार जिन्दा होई गिया है। ओआ इसा जगा जो दिखा जिथु प्रभु रखया था, 7 झट जाई करी उदे चेलयां ने बोला कि, सै मरयां चे जिन्दा होई गिया है; सै तुसां ला पेहले गलील प्रदेशे जाई रिया है, ओथु तुहांजो उदे दर्शन होणे! दिखा, मैं तुसां ने बोली दिता है।” 8 कने सै डर कने बडिया खुशिया ने कबरा ला बापस जाई करी उदे चेलयां जो खबर देणे ताई दोड़ी गियां। 9 तालू यीशु उना जो मिला। कने बोलया, “नमस्ते।” कने उना बखे आई करी उदे पैरां जो पकडी करी उसयो दण्डवत किता। 10 तालू यीशुए उना ने बोलया, “डरा मत; मेरे चेलयां जो जाई करी बोला, कि गलील प्रदेशे जो चली जा ओथु मिंजो दिखणा है।” 11 सै जनानियां चेलयां जो ऐ खबर देणा ही चलियां थियां कि, सिपाइयां जडे कबरा दी रखबाली करा दे थे उना शेहरे च आई करी सारा हाल बड़े याजकां जो सुणया। 12 तालू बड़े याजकां, यहूदी अगुवे सोगी गिठे होईकरी सलाह बणाई। उना सिपाइयां जो रिशवत दे रूप च माता सारा धन देणे दा पेसला किता, कने उना जो बोलया। 13 तुसां सारे लोकां ने ऐ बोलनयो कि राती जालू असां सुतयो थे, तां उदे चेले आई करी उसयो चोरी लेई गे। 14 कने अगर ऐ गल्ल राज्यपाले दे कना दीकर पुजगी कि तुसां रखबाली दे बकते सोई गियो थे, तां असां उसयो समझाई लेंगे कने तुसां जो चिंता करणे दी जरूरत नी है असां बचाई लेंगे। 15 उना पेसा लेईकरी जियां उना जो सिखया था, तियां ही किता। ऐ गल्ल अजे दीकर यहदियां च प्रचलित है। 16 कने गयारा चेले गलील प्रदेशे दे उस पाहडे पर गे, जडा यीशुए उना जो दसया था। 17 कने उना उदे दर्शन पाई करी उसयो नमस्ते किते, पर कुसी-कुसी जो शक होया की यीशु जिन्दा होया है। 18 यीशुए उना बाल आई करी बोलया, स्वर्ग कने धरतिया दा सारा हक मिंजो दितया है। 19 इस ताई तुसां जाई करी सारियां जातियां दे लोकां जो चेले बणा; कने उना जो पिता, पुत्र, कने पबित्र आत्म्या दे नाए ने बपतिस्मा दीया। 20 “कने उना जो सारियां गल्लां जिना दा मैं तुहांजो हुकम दितया है, उना जो मणगा सिखा: कने दिखा, मैं संसारे दे अंत दीकर हमेशा तुहाडे सोगी है।” (aiōn g165)

# मरकुस

1 परमेश्वरे दे पुत्र यीशु मसीह दा शुभसमाचार इयां शुरू होया। 2 जियां परमेश्वरे दा संदेश देणेवाले यशायाह दिया कताबा च लिखया है: परमेश्वरे अपने पुत्र, मसीह जो बोलया, “दिख, मैं अपने संदेश देणेवाले दूते जो तेरे अग्रे भेजदा है, किन्ती तेरे ताँई रस्ता ठीक करण है। 3 उसा सुनसान जगा च अबाज सुणुआ दी है, कि परमेश्वर दे ओणे ताँई, अपने आपे जो तैयार करा, कने अपने मने दी सोच समझा जो खरा रखा उनी ओणा है।” 4 यहून्ना जडा संदेश देणा आया था, सै सुनसान जगा च रेंदा था कने ऐ प्रचार करता था की, अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। 5 मते सारे यहूदिया प्रदेश दे लोक, कने यरूशलेम शहर दे रेणेवाले लोक निकली करी उदे बाल आये, कने अपने पापां जो मन्नी लिया कने यहून्ने उना लोकां जो यरदन खड़ा च बपतिस्मा दिता। 6 यहून्ना ऊंटे दे बालां दे बणयो कण्डे पांदा था, कने अपने लके च चमडे दा पडा बनी रखदा था कने टिड्डे कने मखिर खांदा था। 7 जालू यहून्ना ऐ प्रचार करता था की, “जडा मेरे बाद ओणे बाला है, सै मिजो ला भी शक्तिशाली है, मैं तां उदे जूतयां दे तस्मे खोलणे दे काबील भी नी है। 8 मैं तां तुहांजो पाणिणे ने बपतिस्मा दिता है, पर उनी तुहांजो पबित्र आत्मा ने बपतिस्मा देणा है।” 9 उना दिना जालू यहून्ना बपतिस्मा दिन्दा था तालू यीशु नासत ग्रोणे ला गलील प्रदेशे च आया, जिथु यरदन खड़ा च यीशुऐ यहून्ना ला बपतिस्मा लिया। 10 जालू यीशु पाणिणे ला निकली करी बाहर आया तां यहून्ने स्वर्ग जो खुलंदे दिखया कने स्वर्ग ला इक पबित्र आत्मा जो कबूतरे दे स्पे च अपने उपर ओंदे दिखया। 11 कने परमेश्वरे स्वर्ग ला ऐ आकाशवाणी किती, “की तू मेरा प्यारा पुत्र है, कने तिजो ला मैं खुश है।” 12 यीशुऐ दे बपतिस्मा लेणे बाद पबित्र आत्मा उसयो झट सुनसान जगा पासे भेजी दिता। 13 यीशु उसा सुनसान जगा च चांसियां रोजां दीकर रिया, ओथु शैताने उदी परख लेई। सै बणे दे जानवरां सोगी रिया, कने स्वर्गदूत यीशुऐ दी सेबा करते थे। 14 कुछ बकत बीतणे बाद राजा हेरोदेसे यहून्ना जो पकडी लिया कने उसयो जेला च पाई दिता, तालू यीशु गलील प्रदेशे च गया कने उना लोकां जो परमेश्वरे दे राज्य दा शुभसमाचार सुणाया। 15 कने बोलया, “परमेश्वरे जडा बकत दसया था सै आई गया है, स्वर्ग दा राज्य बखे आई रिया है, अपना मन बदला कने अपने पापां ला पफ़्ताताप करा, कने परमेश्वर दे शुभसमाचारे पर भरोसा करा।” 16 इक दिन जालू यीशु गलील झिला दे बखे चलया था, तां उनी शमौन कने उदे छोटे भाई अन्डियास जो झिला च जाल पांटे दिखया: क्योकि सै मच्छियां पकणने दा कम्म करते थे। 17 यीशुऐ उना जो बोलया, “ओआ कने मेरे चले बणा; मैं तुहांजो सिखांगा कि लोकां जो मेरे बाल क्रियां लोणा कने क्रियां मेरे चले बणणा है।” 18 उना झट जाल छडया कने उदे पिच्छे चली पे। 19 जालू यीशु थोडा अग्रे चलया, उनी होर दो भाईयां जो दिखया जिना दे ना याकूब कने यहून्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे। 20 यीशुऐ उना जो दिखया कने उना जो बोलया मेरे सोगी चला कने मेरे चले बणा; कने सै अपने पिता जब्दी कने मजदरां जो किस्तिया पर छडी करी, उदे चले वणने ताँई उदे पीच्छे चली पे। 21 यीशु कने उदे चले कफरनहम शहरे च आये, कने सै सब्त दे रोजे यहूदी जंज घरे च जाई करी उपदेश करणा लग्गा। 22 कने लोक उदे उपदेश सुणीकरी बडे हेरान होए; क्योकि सै उना जो यहूदी व्यवस्था जो सिखाणे बालयां साई नी, पर अधिकारे ने उपदेश दिन्दा था। 23 जालू यीशु उपदेश दे दा था, तालू यहूदी जंज घर च इक माणु था, जिदे बिच इक बुरी आत्मा थी। 24 उनी जोरे ने बोलया, “हे नासरत दे यीशु मसीह, तू सांझो कजो तंग करता है? तू क्या सांझो खत्म करणा आया है? मिजो पता है की, तू कुण है? तू ही परमेश्वर दा पबित्र पुत्र महिहा है, जडा परमेश्वरे ला आया है।” 25 यीशुऐ बुरिया आत्मा जो झिडकया कने बोलया, “चुप रे; कने इस माणुऐ ला निकली जा।” 26 तालू सै बुरी आत्मा उसयो मरोडी करी, कने जोरे ला चिलाई करी उदे चे निकली गई। 27 यहूदी जंज घरे च आयो सारे लोक हेरान होई गे, कने इसा गल्ला जो इकी दुजे ला पुछणा लग्गे, “ऐ कदिया उपदेश है? असां कदी भी इतणे हके ला उपदेश दिन्दे नी सुणया है।” कने बुरी आत्मा इदियां गल्लां जो मदियां भी हेन। 28 कने उदे बाद यीशुऐ जडा भी किता, उदे बारे

च लोक इकी दुज्जे जो दसदे रे कने झट सारे गलील प्रदेशे दे लोकां ने यीशुऐ दे बारे च सुणी लिया। 29 जियां ही यीशु कने उदे चले यहूदी जंज घर ला निकले, तां सै शमौन कने अन्डियास दे घरे जो गे कने याकूब कने यहून्ना उदे सोगी थे। 30 उस बकत शमौने दिया ससु जो बडा भरी बुखार था कने सै बिस्तरे च पियो थी, जालू यीशु घरे पुज्जा तालू उसयो कुनकी चले दसया कि शमौने दिया ससु जो बुखार है। 31 तालू यीशुऐ उसा दे बखे जाई करी उसा दा हथ पकडी करी उसा जो जगाया, कने उसा दा बुखार खरा होई गया, कने सै उना दी सेबा करणा लगी पेई। 32 उसी रोजे सझा दे बकते जालू सब्ते दा दिन मुकी गया, उदे नारे च मते लोक बिमार थे कने जिना च बुरियां आत्मा थियां, उना सारयां जो यीशुऐ बाल लेई आये। 33 मते सारे लोक घरे दे दरबाजे सामणे गिठे होई गये। 34 उनी मतयां जो जिना जो बडे प्रकार दियां बिमारियाँ थियां, उना जो ठीक किता, कने मतियां बुरियां आत्मा कडी दितियां, कने बुरियां आत्मा जाणदियां थियां की ऐ परमेश्वर दा पुत्र है, उना जो बोलणे दा हुकम नी था। 35 ब्यागा ध्याडा निकलने ला पेहले, यीशु उठया कने निकली करी इक सुनसान जगा पर जाई करी ओथु प्राथना करणा लग्गा। 36 तालू शमौन कने उदे सोगियां जो पात लग्गा, की सै चली गया, तां सै उसयो तोपणा गे। 37 जालू सै मिल्ला, तां उना उसयो दसया, “की मते सारे लोक तिजो तोपा दे थे।” 38 यीशुऐ उना जो बोलया, “चला; असां अखे बखे दे गांऐ च चलदे न ताकि ओथु भी परमेश्वर दे संदेश दा प्रचार करी सकन, क्योकि मैं इसी ताँई इसी संसारे च आया है।” 39 कने यीशु सारे गलील प्रदेशे दे यहूदी जंज घरां च जाई-जाई करी उपदेश दिन्दा, कने बुरियां आत्मा जो कडदा था। 40 इक कोढी माणु था, सै यीशुऐ बाल आया, कने उदे सामणे गोडे भार बेईकरी, उसयो बिनती किती कने बोलया, “मैं जाणदा है कि तू चाआं तां मिजो ठीक करी सकदा है।” 41 यीशुऐ उस पर तरस खाई करी अपना हथ गां किता जिसयो कोढ था, कने उसयो छूता कने बोलया, “मैं चांदा है की तू ठीक होई जा।” 42 कने झट उदा कोढ ठीक होणा लगी पिया, कने सै ठीक होई गया। 43 तालू यीशुऐ उसी माणुऐ जो सकत चेतावनी देईकरी भेजया, 44 कने उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, की तू खरा होईया कने परमेश्वरे जो भेंट चडा जिदे बारे च मसा बडी पेहले लिखया था, ताकि लोक जाणी सकन की तू खरा होई गया।” 45 पर सै बाहर जाई करी इसा गल्ला दा बडा भरी प्रचार करणा लग्गा कने उनी ऐ ऐथु दीकर फेलाई दिती, कि यीशुऐ उसयो खरा करी दिता कने यीशु शेर आम बाहर शहरे च नी जाई सकदा था, फिरी सै बाहर सुनसान जगा च रिया; कने चारो पासे दे लोक उदे बाल ओंदे रे।

2 मतयां रोजां बाद जालू यीशु कफरनहम शहरे च मुडी करी आया कने तां ओथु दे लोकां जो पात चली गया कि सै घरे आया है। 2 फिरी मते सारे लोक गिठे होए, उस बजा ने घरे मती भीड होई गई, ऐथु दीकर की दरबाजे बाल भी जगा नी रेई; कने सै उना जो परमेश्वर दे बचने च प्रचार करा दा था। 3 कने इक धरंग होयो मरीजे जो चार माणु मंझे पर चुकी करी उदे बाल लेई आये। 4 पर जालू सै भीडा दिया बजा ला यीशुऐ बखे नी जाई सके, तां उसा छती जो जिसा हेठ सै बैठया था, उना से पुटी करी रस्ता बणाई दिता, कने जालू सै पुटी बैठे, तां उना उसयो मंझे समेत छती ला थले लटकई दिता। 5 यीशुऐ उना दा भरोसा अपने उपर दिखीकर, उस धरंग होयो मरीजे जो बोलया, हे पुत्र, “मैं तेरे पापां जो माफ किता।” 6 तालू केई यहूदी व्यवस्था जो सिखाणे बाले ओथु बैठयो थे, सै अपने-अपने मने च सोचणा लग्गे, 7 “ऐ माणु ऐसियां गल्लां कजो बोला दा है? ऐ तां परमेश्वरे दी निंदा करा दा है। परमेश्वरे जो छडी करी होर कुण पापां जो माफ करी सकदा है?” 8 यीशुऐ अपनी आत्मा च झट जाणी लिया, की सै अपने मने च पेसा सोचा दे न, कने उनी यहूदी गुरूआं जो बोलया, “तुसां ऐसा कजो सोचा दे न। 9 क्या धरंग होयो मरीजे जो ऐ बोलणा सोखा है, की तेरे पाप माफ होये, या ऐ बोलणा की, उठ अपने मंजे जो चुकी करी हंड फिर? 10 पर मैं तुहांजो दसणा चांदा है की मैं, माणुऐ दा पुत्र जिसयो धरतिया पर पाप माफ करणे दा हक है।” कने उस धरंग होयो मरीजे जो बोलया, 11 “मैं तिजो बोलदा है की, उठ, कने अपने मंजे जो चुक कने अपने घरे जो चली जा।” 12 सै झट उठया कने मंझा चुक्या कने चली गया, सारे लोक जडे दिखा दे थे सै हेरान होए, कने सारे लोक परमेश्वर दी बडाई करिके बोलणा लग्गे, “असां इयोदिया कदी नी

दिखाया।” 13 इक बरी फिरी यीशु निकली करी झिला बखे गया, कने मते सारे लोक उदे बाल आये, कने सै उना जो परमेश्वर दे बचना दा उपदेश देणा लग्गा। 14 यीशु जियां ही अग्रे निकलया, तालू उनी लेवी नाये दे कर लेणेबाले माणुए जो दिखया, जिदा दुज्जा ना मर्ती था। उदे पिता दा ना हलफईस था। जडा अपगिया चौकियां पर बैठया था, जिथु से कर लेंदा था। कने यीशुए उसयो बोलया, “मेरे चले बणा।” कने सै उठी करी सारा कम्म कर छडी करी यीशु पिच्छे चली पिया, कने उदा चेला बणी गिया। 15 उदे बाद यीशु कने उदे चले लेवी दे घरे राती रोटीयां खाणे बैठयो थे। तालू मते भरी चुंगी लेणेबाले कने पापी भी चेलयां सोगी रोटीयां खाणे ताई बैठयो थे। सै मते भरी थे जडे यीशुए पिच्छे चलयो थे। 16 मसा दिया व्यवस्था जो सिखाणे बाले कने फरीसियां जालू ए दिखया, की जिना जो लोक पापी बोलदे थे, सै उना सोगी रोटीयां खा दा हैं, तां उना लोका यीशुए दे चेलयां जो बोलया, “ए तां चुंगी लेणेबाले कने पापियां सोगी खांदा पिंदा है।” 17 जालू यीशुए ए सुणया तां उना जो बोलया, “जडे लोक खरे न उना जो वैधे दी जरस्त नी होई है, पर जडे बिमार न उना जो है। मै उना लोकां जो सटणे जो नी अन्ता जडे अपने आपे जो धर्मी मंदे न, पर की जडे लोक अपने आपे जो पापी मंदे न, मै उना ताई आया है।” 18 यहूना दे चले, कने फरीसी बरत रखदे थे सै बिना कुछ खादयो रेंदे थे; इक दिन उना चे कुछ चले यीशुए बाल आये कने पुछया की, “यहूना दे चले कने फरीसियां दे चले बरत कजो रखदे न, पर तेंरे चले तां बरत रखदे नी न?” 19 यीशुए उना जो बोलया, “मेरे चले कने मै, लाडा कने उदे मित्रां साईं न। क्या लाडे दे मित्र तालू दीकर बरत रखी सकदे ने जालू दिकर पुरे बियाये च उदे सोगी न? जालू दीकर लाडा उना सोगी है तालू दीकर सै बरत नी करी सकदे न। 20 पर सै दिन ओणे न, जालू लाडा उना ला लग कितया जाणा है, तालू इना बरत रखणे न। 21 लोक नोए कपडे दा रफु पराणे कपडयां च कोई नी पांदा है, नी तां उनी रफुये धोणे ने सुकडी जाणा, कने पुराणा कपडा होर जादा फटी जाणा। मेरियां गल्लां भी पुराणे रिती रिबाजां सोगी जोडयो तां इसी कपडे साईं से भी बेकार होई जाणियां। 22 नोए अंगूर दे रसे जो पराणियां खलडिया दे झोले च कोई नी रखा है, नी तां नोआ अंगूर रस खलडिया जो फाडी दिन्दा है, कने अंगूर रस खलडिया जो खत्म करी दिन्दा है; तां तां नोआ अंगूर रस नोईयां खलडिया च नी रखदे न।” 23 इयां होया की यीशु कने उदे चले सब्दे दे रोजे खेतारां च होई करी जा दे थे; कने उदे चले चलदे-चलदे बेलां जो तोडी करी खाणा लग्गी पे। 24 तालू फरीसियां बोलया, “की तेंरे चले इयोदे कम्म कजो करदे न जडे नियमा दे अनुसार सब्दे दे दिने करणा ठीक नी होदे न?” 25 यीशुए उना जो बोलया, “तुसां क्या कदी नी पढया की जालू साडे महान राजा दाऊदे जो जरस्त पेई, कने जालू सै कने उदे साथी भूखे थे तां उनी क्या कितया था? 26 कि इक अबियातार नाए दा महायाजक था, जालू दाऊद कने उदे सोगी मित्र भूखे थे, तालू उना परमेश्वर दे तम्बू च जाई करी रोटीयां खादियां जडियां परमेश्वर जो चढाईयां थियां, कने अपने सोगियां जो भी खुआईयां, इना रोटीयां जो खाणे दा हक याजकां जो छडी करी होर कुसयो नी था।” 27 तालू यीशुए उना जो बोलया, “परमेश्वर लोकां दिया भलाईया वासते सब्दे दा रोज बणया है, उनी सब्दे बाले रोजे उना उपर भार पाणे तां नी बणया है। 28 मै, माणुए दा पुत्र ए बोलणे दा हक रखदा है कि लोकां जो सब्दे बाले रोजे जो क्या करणे दी अनुमति है।”

**3** इक होर सब्दे बाले रोजे यीशु यहूदी जंज घर च आया, ओथु इक माणु था, जिदा इक हथ सुक्की कने बेकार होई गिया था। 2 कने फरीसी यीशुए उपर कोई दोष लागे ताई बहाना तोपा दे थे, तालू कुछ माणु यीशुए जो बडिया गोराने दिखणा लग्गे, की यीशु उसया सब्दे बाले रोजे खरा करगा की नी। 3 यीशुए उस सुक्यो हथे बाले जो बोलया, “सारयां लोका दे बिच खडोई जा।” 4 कने उना ने बोलया, “क्या परमेश्वर सांझो सब्दे दे रोजे लोकां जो खरा कम्म करणे दा हुकम दिन्दा है, कि नीच कम्म करणे दा? क्या सांझो सै कुसी माणुए दे प्राण बचाणे दा हुकम दिन्दा कि मारणे दा?” पर सै सारे चुप रे। 5 यीशुए जो जालू गुस्सा आया तालू उनी उना लोकां दे चारों पासे दिखया। कने यीशु बडा उदास होया की सै बडे कठोर कने जिद्दी माणु न। कने उस माणुए जो बोलया, “अपणा हथ कर रूआं।” उनी कित्या, कने उदा हथ खरा होई गिया। 6 तालू फरीसी झट बाहर आई करी राजा हेरोदियां दे गिरोह दे कुछ लोकां कने मिली करी उदे खिलाफ सलाह करणा

लग्गे, की उसयो कियां मारणा है। 7 कने उदे बाद यीशु अपने चेलयां सोगी झिल्ला दे पासे चली गिया: कने गलील प्रदेशे ला बडी भरी भीड उदे पिच्छे चली पेई। 8 कने यहूदिया जिले, कने यरुशलेम शहर कने इद्रूमिया जिले ला, कने यरुदने खड्डा दे पारे ला, कने सूर कने सैदा शेहरे दे अखे बखे लोक ए सुणी करी यीशु वाली आये, कि यीशु बडे हेरान कने चकित करणे बाले कम्म करदा है। 9 यीशुए अपने चेलयां जो बोलया, “मिजों बोणे ताई इक छोटी किस्ती लेई करी ओआ, ताकि लोक मिजे वाली भीड नी लगाई सकन।” 10 उनी उसी रोजे मतयां जो ठीक कित्या। उदिया बजा ला, मते सारे लोक जडे बिमार थे, सै यीशुए जो छुणे दी कोशिश करा दे थे। 11 कने बुरियां आत्मा ला जकडयो लोक, जालू यीशुए जो दिखदे थे, तां यीशुए जो इज्जत देणे ताई उदे पैरां अग्रे डेई पांटे थे, कने जौरे-जौरे ने बकदे थे, “की तू परमेश्वर दा पुत्र है।” 12 कने यीशुए चेतावनी देई करी बुरी आत्मां जो बोलया, “कि मेरे बारे च कुसी ने भी मत दसदे कि मै परमेश्वर दा पुत्र है।” 13 उदे बाद यीशु इक धारा पर चढी गिया, कने उना जो अपने बाल सदया जिना जो सै चांदा ला, कने सै उदे बाल आये। 14 तालू उनी बाहरां माणुए जो चुणयां। जडे उदे खास चले बणे, उनी उना जो प्रेरित दा ना दिता, कने सै चांदा की सै उदे सोगी-सोगी रैन, कने यीशु उना जो भजे की सै प्रचार करन, 15 कने बुरियां आत्मा जो कडणे दा हक दिता। 16 ए दे सै बाहरा चले न, जिना जो यीशुए चुणया था: शमौन जिदा ना उनी पतरस रखया; 17 ए दे दो भाई जिना दा ना याकूब कने यहूना है, सै जब्दी दे पुत्र थे, जिसयो यीशु ने बुअनरगिस बोलया, कने उदा मतलब गडकने बाले माणु। 18 कने अन्द्रियास, कने फिलिप्पुस, कने बरतुल्मे, कने मर्ती, कने थोमा, कने हलफईये दा पुत्र याकूब, कने तै, कने शमौन कनानी जडे क्रांति लयोणे बाले थे, 19 कने यहूदा इस्करियोती, जिनी उसयो दुशमणा दे हथे पकडाई भी दिता था। 20 कने यीशु गांरे दे कुसी घरे च आया, कने ओथु इतणी भीड गिठी होई गई, की उसयो रोटी खाणे दा भी बकत नी मिला। 21 जालू उदे रिशतेदारां ए सुणया, तां सै उसयो घरे जो लेई जाणे तां आये, क्योकि सै बोलदे थे, की इदे होस ठीक होणे च नी है। 22 कने सै जडे मसा दी व्यवस्था जो सिखाणे बाले थे, सै यरुशलेम शेहरे ला आयो थे, सै भी ए बोलदे थे की, “इदे च शैतान है।” कने “सै बुरियां आत्मा दा सरदार है, कने शैताने दिया मददा ने बुरियां आत्मा जो कडदा है।” 23 इस ताई सै उना जो बखे सदी करी, उना जो कहाणिया च बोलणा लग्गा, “क्या शैतान अपणी ही बुरी आत्मां जो लोकां ला बार कडणे तां जोर पांगा? नी, जरा भी नी!” 24 अंगर कुसी राज्य च लोक अपु च ही लडदे रेंगे तां सै राज्य बडे बकते तक नी टिकी सकदा है। 25 कने अंगर कुसी घरे दे माणु अपु च ही लडी पांगे तां सै घर नी चली सकदा। 26 अंगर शैतान अपणा ही बैरी बणिया कने अपु ने ही लडगा, तां उनी अपणा ही नाश करी लेणा है। 27 कोई भी माणु जौरे बाले माणुए दे घरे जो नी लुटी सकदा, जालू दीकर सै पेहले, उस माणुए जो बन्नी नी ले; तां जाई करी सै उदे घरे जो लुटी सकदा है। 28 “मै तुसां ने सच बोलदा है, की माणुए दी ओलादी दे सारे पाप कने निंदा जडा सै परमेश्वर या कुसी दिखल करदे न, परमेश्वर उना दे पाप माफ करी देणे न; 29 पर जडा कोई पबित्र आत्मा दे खिलाफ निंदा करगा, तां सै परमेश्वर कदी भी माफ नी करणा है। कने परमेश्वर इसी पापे तां उदे उस माणुए जो हमेशा तां दोषी मनणा है।” (aiōn g165, aiōnios g166) 30 यीशुए ए इस ताई बोलया क्योकि सै ए बोलदे थे, की उसयो बुरिया आत्मा जकडया है। 31 तालू यीशु दी मां कने उदे भाई आये, कने उना बाहर खडोई करी उसयो बुलाबा भेजया। 32 भीड उदे अखे बखे बैठयो थी, कने उना उसला बोलया, “दिख, तेरी माता कने तेंरे भाई तिजो तोपा दे न।” 33 यीशुए उना जो जबाब दिता, “मेरी माता कने मेरे भाई कुण न?” 34 कने उनी उना पासे नजर दिती जडे उदे अखे बखे बैठयो थे कने बोलया, “दिखा, मेरी माता कने मेरे भाई न। 35 सै सै ही करदे न जडा परमेश्वर चांदा है, सै ही मेरे भाई, बेहण कने माता पिता न।”

**4** यीशु फिरी गलील झिला दे बखे उपदेश देणा लग्गा, कने ओथु इतणी भरी भीड गिठी होई गई, की सै झिला च इक किस्तिया पर चढी करी बेई गिया, कने सारे लोक झिला दे बखे खडोई रें। 2 कने सै उना जो कहाणी सुणाणा लग्गा, कने अपने उपदेश च उना ने बोलया, 3 “सुणा इक किसान अपने खेतरे च बी रांगे तां दी गिया। 4 रांटे बेले थोडे बी रस्ते दे बखे पेई गे कने सै तां पछियां आई

करी चुगी ले। 5 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लूंभी पै। 6 कने जालू खडी धुप पेई, तां से फकुई गे, क्योकि उना दियां जडा डुगियां नी थियां तां से सुकी गे। 7 कने थोडे बी झिल्लां च पे, कने जालू झिल्ल बदे तां उना सै बी डकी ले, कने उना फल नी दिता। 8 पर थोडे बी खरिया जमिना पर पे, कने सै बी लुंगे, कने मते सारे फल देणेबाले होए; केईयां ती गुणा, केईयां सठ गुणा, केईयां सौ गुणा।” 9 तालू उनी बोलया, “जिस बाल सुणने ताई कन्न न सै ध्यान लाईकरी गल्लां जो सुणे, कने इसा गल्ला जो समझी ले।” 10 जालू यीशु किल्ला रेई गिया, तां बाहरा चले कने जडे सोगी थे सै उसला इसा कहाणिया दा मतलब पुछणा लगे। 11 उनी उना जो बोलया, “तुसां तां परमेश्वरे दे राज्य दियां छुपियां होईयां सच्चियां गल्लां दसियां न, पर ऐ कहाणी बाहरे बाले लोकां ताई थी, सै जडे मिजों पर भरोसा नी रखदे। 12 जियां कि पवित्रशाश्र च लिखया है, सै तिनां जो मिलदे होए भी नी मिलदा कन्ना ने सुणदे होए भी सै नी सुणदे कने समझदे; इयां नी होऐ सै अपणे बुरे कम्मा जो छडी देन, कने उना जो माफ करणो पिये।” 13 फिरी यीशुए उना जो बोलया, “तुसां इना गल्लां जो नी समझणे, तां फिरी तुसां होरा कहाणिया जो कियां समझणे। 14 इसा कहाणिया दा ऐ मतलब है, बी राणे बाला इयोदिया है जियां कोई परमेश्वरे दे बचना दा प्रचार लोकां च करदा है। 15 जडा बी रस्ते च पिया उदी तुलना उना लोकां ने कितियो है, जडा परमेश्वर दे बचन सुणदे न। पर शैतान झट पट जादां कने उना दे मने ला बचन कडी दिन्दा है जडा उना सुणया था। 16 कने थोडे लोक उस पथरे वालिया जमिना साईं न जिथू बी पिया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेदे न। 17 पर परमेश्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या परेशानी हौदी है, तां सै बचना ला पिच्छे हटी जादे न। 18 जडे बी झिल्लां च पियो न, ऐ सै माणु न जिना बचन सुणया, 19 पर सै संसारे दियां चिंता जो लेईकरी दुखी, कने संसारिक चिंजा दिया मोहमाया च फसी जादे न, ऐ सब कुछ परमेश्वरे दे बचन च स्कावट पांदा है। कने सै बचन उना ताई फायदेमंद नी हौंदा। (aiōn g165) 20 कने जडे बी खरिया जमिना पर रायो थे, ऐ सै माणु न, जडे बचन सुणीकरी ग्रहण करदे न, कने फल दिन्दे न, कोई ती गुणा, कोई सठ गुणा, कने कोई सौ गुणा।” 21 यीशुए उना जो बोलया, “क्या कोई दिव्ये जो जल्लाई करी उसयो इक टोकरू या मंजोलिया दे जिक इस ताई रखदा है की उदिया लौई जो लुकाई सके। ना जरा भी नी। दिव्ये जो ताके उपर रखदे न, जिथू ला उदी लोअ चमकी सके।” 22 क्योकि जडा कुछ भी लुकया है, सै सामणे करणा; कने हर इक गुण गल्ल सामणे आई जाणी है। 23 “जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 24 यीशुए उना जो बोलया, “ध्यान रखा, की जितणा तुसां ध्याने ने बचना जो सुणगे, तुसां जो उतणा ही जादा समझ ओणा है, उदे साबे ने परमेश्वरे तुहांजो देणा है। जिस नापे ने तुसां नापदे न उसी नापे ने तुहाडे ताई नापया जाणा है, कने तुसां जो जादा दितया जाणा है। 25 जिना बाल जडा परमेश्वर सिखांदा है उसयो समझणे दी इच्छा है, उना जो परमेश्वरे होर समझ देणी, पर जडा समझणे दी इच्छा नी रखदा, की मै क्या सिखांदां, तां सै जडा समझया है, परमेश्वरे उसला सै भी लेई लेणा।” 26 यीशुए उना जो बोलया, “परमेश्वरे दा राज्य ऐसा है, जियां कोई किसान खेते रे बी रांदा है, 27 जालू उनी बी राई दिते उनी फिरी दुबारा मुडी करी बी नी दिखया कने अपणे रोजाने बाले कम्मा करदा रिया। पर जडा उनी बी राऐ थे, सै बी लुंगे कने बढे होए, कने से जाणदा भी नी की ऐ कियां होया। 28 धरती अपु ही फल दिन्दी है, पेहले लूंगा, फिरी सिल्ले, फिरी सियां च तैयार दांणा। 29 पर जालू सै दाणे पकी जांते न, तालू सै किसान ओंदा कने दराटिया ने बढणा लगदा, क्योकि बढणे दा बकत आई गिया था।” 30 फिरी यीशुए कहाणी सुणाई, “असां परमेश्वरे दे राज्य दी तुलना इयां करी सकदे न, जियां तुसां जो मै कहाणी दसदा। 31 कने परमेश्वर दा राज्य धरती दे सारे बियां ला सबला छोटे बी राईए दे बियां साईं है। 32 पर जालू जमिना च रादे न, तां सै उनी करी सारे साग पतरां ला बडा होई जांदा है, कने उदियां इतणियां बडियां डालियां निकलदियां न की अन्बरे दे पंछी भी उदिया छोअं च रेहेणे ताई डालियां च घोंसले बणाई सकदे न।” 33 कने सै लोकां जो परमेश्वरे दे राज्य दे बारे च दसणे ताई हरबरी कहाणिया

दा इस्तेमाल करदा था, जडियां उना जो समझ आई जान। 34 कने सै हमेशा परमेश्वरे दे राज्य दियां गल्लां कहाणिया च बोलदा था, पर जालू सै किल्ला हौंदा था, तां से अपणे चेलयां जो सारियां गल्लां दसदा था। 35 उसी दिने सझां दे बेले, उनी अपणे चेलयां ने बोलया, “ओआ, असां गलील झीला दे पार चलदे न।” 36 कने चले भी भिडा जो छडी करी उसा किस्तिया पर चडी गे, जिसा पर यीशु बैठया था। कने सै यीशुए जो अपणे कने लेई गे। ओथु उना सोगी होर भी किस्तिया थियां। 37 तालू सै झीला जो पार करा दे थे, तां बडा भरी तूफान आया कने लेहरां किस्ती ने बजियां, किस्तिया च पाणी भरईया कने किस्ती दुबणे वाली थी। 38 कने यीशु पिछले हिस्से च सुतया था, तालू उना उसयो जगाई करी बोलया, “गुरू जी, तिजो क्या साडी कोई फिकर नी है, की असां मरणे बाले न?” 39 तालू उनी उठी करी तुफाने जो डांटया, कने लेरां जो बोलया, “शांत रिया, स्की जा!” कने हवा स्की गेई कने झील शांत होई गेई। 40 कने उनी तालू चेलयां ला पुछया, “तुसां कजो डरदे न? क्या तुहांजो हले दीकर मिजो पर भरोसा नी है?” 41 सै बडे भरई डरी गे कने अपु च बोलणा लगे, “ऐ कदिया माणु है? ऐथू तक की तूफान कने लैहरां भी इदा हुकम मदे न।”

**5** यीशु कने उदे चले गलील झिला दे पार गिरासे दे लोकां दिया जगा च पुज्जे, 2 जालू यीशु किस्तिया ला थले उतरया तालू इक माणु जिसयो बुरिया आत्मा जकडया था, सै कब्रिस्तान ला निकलया कने यीशुए बाल आया। 3 सै कब्रिस्तान च रेंदा था कने लोक उसयो बन्नी करी नी रखी पादे थे, ऐथू दिकर की लोहे दे सुंगला ने भी नी। 4 क्योकि उसयो बडी बरी बेडियां कने सुंगला ने बनया था, पर सै उना सुंगला जो तोडी दिन्दा, कने बेडियां दे टोटे-टोटे करी दिन्दा था, कने उसयो कोई भी काबू च नी करी सकदा था। 5 सै रात दिन कब्रिस्तान कने पाहडा च जौरे-जौरे बकदा रेंदा, कने अपणे आपे जो पथरा ने जखमी करदा रेंदा था। 6 सै यीशुए जो दुरे ला ही दिखीकरी दोडया, कने यीशुए जो इज्जत देणे ताई उदे पैरां अगो डेई पिया। 7 उनी जौरे ने चिलाई करी बोलया, “यीशु जी, परमपिता परमेश्वरे दे पुत्र, तु मिजो कजो सता दा है? तु परमेश्वरे दे ना लेईकर कसम खा की तु मिजो नी सतागा।” 8 उनी ऐ बोलया क्योकि यीशुए उसयो पेहले ही हुकम देई दितया था, “हे बुरी आत्मा, इस माणुए ला तु निकली जा।” 9 यीशुए उसा बुरिया आत्मा जो पुछया, “तेरा क्या ना है?” उनी बोलया, “मेरा ना सेना है, क्योकि असां मते सारे न।” 10 कने उना बुरियां आत्मा उसला बडी बिनती किति, “की सांझो गिरासे दे इलाके ला बाहर मत भेजा।” 11 ओथु धारा पर इक सूअरां दा झुण्ड चुग्गा दा था। 12 कने बुरियां आत्मा यीशुए ने बिनती करिके बोलया, “की सांझो इना सूअरां च भेजी दे ताकि असां इना दे अंदर जाई सकन।” 13 यीशुए उना जो हुकम दिता कने सै बुरियां आत्मा उसी माणु ला निकली करी सूअरां दे अंदर समाई गियां, कने उसी झुण्डे च कोई दो हजार सूअर थे, कने खडे डडे पासे दौडे कने रिडकी करी झिला च जाई पे कने डुबी करी मरी गे। 14 उना दे पुहालां नटी करी शेहर कने गांऐ च ऐ खबर सुणाई, कने जडा होया था लोक उसयो दिखणा आये। 15 यीशुए बाल आई करी, उना उसयो दिखया जिदे च बुरियां आत्मा थियां, उसयो कपडे पाई करी कने खरा बैठया दिखीकरी सै डरी गे। 16 दिखणे बालयां उदा जिदे बिच बुरियां आत्मा थियां, कने सूअरां दा पूरा हाल, बाकियां जो दसया। 17 तालू जडे लोक दिखणा आयो थे, सै यीशुए ने बिनती करिके बोलणा लगे, कि साडे इलाके ला चली जा। 18 जालू यीशु किस्तिया पर जाणे ताई चढया, तां सै जिदे च पेहले बुरियां आत्मा थियां, सै यीशुए ने बिनती करणा लग्गा, “की मिजो भी अपु सोगी रेंणा दे जियां बाहरा चले उदे सोगी रेंदे थे।” 19 पर यीशुए उसयो अपणे सोगी चलणे ताई मान करी दिता, कने उसयो बोलया, “अपणे घरे जाई करी अपणे लोकां जो दस, की प्रभुऐ तिजो पर दया करिके तेरे ताई कदेया कम्म किता है।” 20 तालू सै माणु अपणे घरे दे इलाके च चली गिया। फिरी उनी सारे दिकापुलिस जिदा मतलब “दस शेहर” च ऐ प्रचार करणा शरू किता, कि यीशुए मेरे ताई बडा कुछ कितया है, कने उसयो सुणनेबाले सारे लोक हेरान होऐ। 21 जालू यीशु दोबारा किस्तिया च गलील झिला पारे जो गिया, कने बडे भरी लोक उस बाल गिठे होई गे। सै झिला बखे ही था, 22 शहदी जंज घरे दे सरदाराने च इक याईर नाये दा सरदार आया, सै यीशुए दी इज्जत मान ताई यीशुए दे पैरां अगो डेई पिया, 23 कने उनी ऐ बोली करी बडी बिनती किति,

“की मेरी लोकी कुड़ी मरण लगियो है, कने तू साडे घरे आई करी उसा जो छु, ताकि सै ठीक होई जा कने मरणे ला बची जा।” 24 तालू ही यीशु उस सोगी चली पिया, कने मते भरे लोक उदे पिच्छे चली पै, सै यीशुदे दे उपर डेई पोंदे थे। 25 भिडा च इक जनानी थी जिसा जो बाहरां सालां ला खून निकलने दी बिमारी थी। 26 उना मते वेधां हथा ला दुख झेलया था कने अपने सारे पेसे खचणे बाद भी सै खरी नी होई। कने उसा दा हाल बडा बुरा होई गिया था। 27 जालू उना सुणया यीशुदे लोकां जो खरा कितया है, तां उना सोचया, “कि मैं उदे कपडयां जो छुई लें, तां मैं खरिया होई जाणा।” तां तां उना भिडा च यीशु दे पिच्छे आईके उदे कपडयां जो छुता। 28 कयोकि सै बोलदी थी, “अगर मैं उदे कपडयां जो भी छुई लेंगी, तां ही मैं ठीक होई जाणा।” 29 कने झट उसा दा खून चलणा बंद होई गिया, उना अपने शरिर ला मेहसूस करी लिया की मैं इसा बिमारिया ला ठीक होई गियो है। 30 यीशु भिडा च पिच्छे मुडया कने पुछया, “मेरे कपडयां जो कुनी छुता?” उनी ऐसा इस तां पुछया कयोकि उसयो पता लगी गिया की उदे चे सामर्थ्य निकली, कने कोई माणु खरा होया है। 31 उदे चेलयां उसयो बोलया, “तू दिखा दा है, की तेरे ओखे बखे इतनी भरी भीड है, कने तू पुछदा है, की कुनी मिजो छुता?” 32 तालू यीशुदे उसी माणुदे जो दिखणे तां जिनी ऐ कम्म कितया था, चारो पासे नजर दौडाई। 33 तालू सै जनानी जाणी गिया की मैं खरी होई गियो, तालू सै आई कने यीशुदे दे पैरां च पेई गेई कने पैर बंदे। कने यीशुदे जो दसया की मैं तिजो छुतया था। उना सोचया कि उनी उसा पर गुस्सा होणा उसा गल्ला दिया वजा ला सै डरी कने कम्मी पियो थी। 34 यीशुदे उसा जो बोलया, “कुडिये, तेरा भरोसा जडा मिजों पर था उनी भरोसे तिजो खरा कितया है, शांति ने चली जा, हणु तू अपणिया इसा बिमारिया ला बची करी रियां।” 35 यीशु हले उसा ने गल्ल कर दा ही था, यहदी जंज घरे दे सरदारे दे घरे ला कुछ लोकां आई की बोलया, “की तेरी कुड़ी तां मरी गेई है” हणु गुस्से जो कजो तकलीफ दे दा है? 36 जडी गल्ल सै बोला दे थे, उसा गल्ला जो यीशुदे अंगसुणी करिके यहदी जंज घरे दे सरदारे जो बोलया, “डक मत, सिर्फ मिजों पर भरोसा रख।” 37 तालू यीशुदे सिर्फ पतरस, याकूब कने याकूब दे भाई यहूना कने याइर जो ही अपने कने ओणा दा हुकम दिता, होर कुसयो भी अपने सोगी ओणा नी दिता। 38 कने यहदी जंज घरे दे सरदारे दे घरे च पुज्जी करी, उनी लोकां जो रोंदे कने डडदे दिखया। 39 तालू यीशुदे कमेरे अंदर जाई करी उना जो बोलया, “तुसां इयां डडा कने रोआ मत? कुड़ी मरियो नी है पर सुतियो है।” 40 सै सुणीकरी, सारे लोक यीशुदे पर हसणा लगे, तालू उनी सारयां जो बाहर कडी दिता। कने कुडिया दे माता पिता कने अपने चेलयां जो सोगी लेईकरी कमेरे अंदर गिया जिथु कुड़ी पियो थी। 41 कने यीशुदे कुडिया दा हथ पकडी करी उसा जो बोलया, “तलिता कमी,” जिसदा मतलब है की, “हे छोटी कुडिये, मैं तिजो बोलदा है, उठ।” 42 कने कुड़ी झट उठी करी हंडणा लगगी पेई, सै बाहरां सालां दी थी। जालू इयां होया तां सारे लोक कुडिया जो दिखीकरी हेरान होई गे। 43 फिरी यीशुदे उसा दे माता पिता जो समझाई करी हुकम दिता की इसा गल्ला दा कुसयो पता नी लगे की उनी मरियो कुडियो जो जिन्दा कितया है। कने इसा कुडिया जो खाणे जो दिया कुछ।

**6** तालू यीशु कफरनहम शेहरे ला चली गिया, सै अपने गां नासरत जो आया, कने उदे चले भी उदे सोगी आये। 2 यीशु सब्ते बाले रोजे यहदी जंज घर च परमेस्वरे दे बचना दा उपदेश देणा लग्गा, कने मते लोक सुणीकरी हेरान होई गे कने बोलणा लगे, “इनी माणुदे ऐ गल्लां कुछ ला सिखियां न? कने इसयो ऐ सारा ज्ञान कने चमत्कार करणे दी शक्तियां कुनी दितियां? कने सामर्थ्य दे कम्म कियां इदे ला होंदे न? 3 ऐ सिर्फ तरखाणे दा पुत्र है, जडा मरियम दा पुत्र, कने याकूब, योसेस, यहदा कने शमीन दा भाई है। कने इदिया बेहणा भी ऐथु साडे सोगी न” कने उना यीशुदे पर भरोसा करणे जो मना करी दिता। 4 यीशुदे उना जो बोलया, की परमेस्वरे दे संदेश देणेबालयां दा अपने गां कने अपने रिशतेदारां अपने घरे छडी करी, हर कुथी उदी इज्जत मान होंदा है। 5 कने ओथु उसी पर कुनी भरोसा नी किता, इसा बजा ला उनी ओथु थोडे बिमारां पर हथ रखीकरी खरा किता उदे अलावा ओथु होर कोई चमत्कार नी करी सकया। 6 कने यीशु उना दे अविश्वास ने बडा हेरान होया कने उदे बाद यीशु अखे बखे दे गां च गिया कने परमेस्वर दे

बचना दा उपदेश दिता। 7 थोडे बकते बाद यीशुदे बाहरां चेलयां जो अपने बाल सदया कने उना जो बुरी आत्मा कडणे दा हक दिता। उना जो दो-दो करिके लगलगा गां भेजणा लग्गा, कने उना जो बुरियां आत्मा जो लोकां च कडणे दा हक दिता। 8 कने यीशुदे उना जो हुकम दिता, की अपने रस्ते तांई सिर्फ इक सोठी लेनयो। ना तां खाणे तांई रोटी लेणी, ना तां झोला, ना ही बटुए च पेसे, 9 पर जूते पाई लेनयो कने होर कोई कपडे पाणे तांई मत लेंदे। 10 यीशुदे उना जो बोलया, “की कोई तुहांजो अपने घरे रेहणे तांई सदया, जालू दीकर तुसां उसी गां च रेंगे, तालू दीकर उसी दे घरे च परोणे बणी करी रिया। 11 जिसा जगा दे लोक तुहांजो अपनाने नी कने तुहाडी सुणणे नी, ओथु ला जांदे बेले अपने पैरां दी धुड जाडी दिनयो, ताकि उना लोकां जो पता लगे की परमेस्वरे दिया तरफा ला मिलणे बाली सजा दे सै अपु ही जिम्मेवार न।” 12 तालू चेलयां जाई करी घोषणा किती की अपना मन बदला कने अपने पापां दा पश्चाताप करा, कने परमेस्वरे दे शुभसमाचार पर भरोसा करा, कने परमेस्वरे पासे मुडा। 13 कने उना मतियां बुरियां आत्मा जो कडया, कने मतयां बिमारां जो जैतुन दा तेल मली करी खरा किता। 14 कने हुण राजा हेरोदेसे यीशु दे कम्मा दी चर्चा सुणी जडे यीशु करा दा था, कयोकि मते सारे लोक यीशुदे जो जाणदे थे कने उदे बारे च चर्चा करा दे थे। कने बोला दे थे की ऐ सेई यहूना बपतिस्मा देणे वाला है, सै मरयां च जिन्दा होई गिया है, ऐई बजा है कि उदे बाल ऐ चमत्कार करणे तांई परमेस्वरे दी शक्ति है। 15 कने होरनी लोकां बोलया है, “परमेस्वरे दा संदेश दे बाला एलियाह है। कने बाकियां बोलया, ऐ सै परमेस्वरे दा संदेश देणेबाला है, जडे बडे जमाने पहले रेंदे थे।” 16 हेरोदेसे ऐ सुणीकरी बोलया, “ऐ यहूना बपतिस्मा देणेबाला है, मैं अपु उदा मुंड बडबाया था, पर सै मरी करी फिरी जिन्दा होई गिया है।” 17 हेरोदेस थोडे बकते पहले अपने भाई फिलिप्पस दी घरे बाली हेरोदियास ने बियाह करी लिया था। 18 तालू यहूना उसयो बोलया, “ऐ तू खरा नी किता तू अपने भाईये दी लाडी लेई ली।” तां तां हेरोदियास जो खुश करणे तांई, हेरोदेसे यहूना जो पकडी करी उसयो जेला च पाई दिता। 19 तां तां हेरोदियास यहूना ने दुशमणी रखदी थी कने सै चांहदी थी, की उसयो मरवाई दे, पर ऐसा होई नी सकया, 20 हबर्की जालू हेरोदेस यहूना जो बोलदे सुणदा था, तां सै डरदा था, कयोकि यहूना इक पबित्र कने धर्मी माणु था, पर तमी सै उसयो सुणना पसंद करदा था। कने सिपाहियां जो उदी रखबाली करणे तांई रखया, हेरोदेस उदियां गल्लां सुणीकरी डरी जांदा था, पर सै खुशिया ने सुणदा था। 21 थोडे बकते बाद, हेरोदेसे अपना जन्म दिन मनाया। उनी अपने बड़े प्रधान अधिकारियां, सेना दे बड़े खास अमुवां कने गलील प्रदेशे दे अमुवां जो धामा च सदया। इसा धामा च हेरोदियास जो यहूना जो मरवाणे दा मोका मिली गिया। 22 कने हेरोदियास दी कुड़ी अंदर आई, कने नची करी हेरोदेस कने उदे सोगी धाम खाणा आये परोणयां जो खुश किता, तालू राजे कुडिया जो बोलया, “तू जडा मजीं मिजो ला मंग, मैं तिजो दिगा।” 23 कने हेरोदेसे उसा ला ऐ बायदा किता, “की मेरे अथे राज्य दीकर जडा कुछ तू मिजो ला मंगगी सै मैं तिजो दिगा।” 24 उना बाहर जाई करी अपणिया माता ला पुछया, की मैं क्या मगे? माता बोलया की, “उसयो बोल की सै यहूना बपतिस्मा देणेबाले दा मुंड बड्डी करी मिजो दे।” 25 कने सै झट अंदर राजे बाल आई, कने उसने बिनती किती की, “मैं चांहदी है, की तू हणी यहूना बपतिस्मा देणेबाले दा मुंड बड्डी करी मिजो इक थालिया च दे।” 26 ऐ सुणीकरी राजा बडा उदास होया, पर अपणिया कसमां, कने सोगी बोणे बालयां दिया बजा ला उसा दिया गल्ला जो टालना नी चांदा था। 27 राजे इक सिपाइये जो हुकम दिता, कि जेला च जा, कने यहूना दा मुंड बड्डी करी उदे बाल लेईकर आ। 28 सिपाइये जेला च जाई करी उदा सिर कटया, कने इक थालिया च रखीकरी लेई आया कने उसा कुडिया जो देई दिता, कने कुडिया अपणिया माता जो देई दिता। 29 जालू यहूना दे चेलयां जो पता चला की उसयो मारी दितया है, यहूना दे चले आये, कने उना उदिया लाशा जो चुकी करी कबरा च रखी आये। 30 जालू सै प्रेरित जिना जो यीशुदे भेजया था, सै यीशु बाल बापस आये कने उदे चारों बखे खडोइ गे, कने जडा कुछ उना किता, कने सिखया था, सारा कुछ उसयो दसया। 31 मते सारे लोक ओदे जांदे थे कने इसा बजा ला यीशु कने उदे चेलयां जो रोटियां खाणे दा बकत नी मिलदा था। तालू यीशुदे चेलयां जो बोलया, “असां कुथी सुनसान जगा चलदे जिथु कितले रेई सकन कने थोडा



बकत अराम करी सकन।” 32 इस ताई सै किस्तिया च बेईकरी सुनसान जगा च चली गे। 33 कने मतयां लोकां उना जो जांदे दिखया कने पछेणी लिया की सै कुथु जाणा लगयो ना। कने अखे बखे दे नगरां दे लोक गिठे होईकरी यीशु कने उदे चेलयां ला पेहले ओथु पैदल दौडी करी पुज्जी गे। 34 यीशु किस्तिया ला उतरया कने उनी मती भरी भीड दिखी, कने उना पर तरस खादा, क्योकि उना दा कोई अगुवा नी था, जडा उना दी रखबाली करी सके, जियां बिना गवाले भेडां होंदियां न, “फिरी सै उना जो परमेस्वर दे राज्य दियां मतियां गल्लां सिखाणा लग्गा।” 35 जालू संज होणा लग्गी, तां उदे चले उदे बखे आई करी बोलणा लग्गे, “ऐ सुनसान जगा है, कने दिन बडा ढली गिया है। 36 इना जो भेजी दे, ताकि ऐ अखे बखे दे गां कने बासियां च जाई करी, अपने ताई कुछ खाणे जो खरीदी लेन।” 37 यीशुए उना जो जबाब दिता, “तुसां ही इना जो खाणे जो दिया।” उना यीशुए जो बोलया, “की तू चांदा है की असां जान कने दो सौ दिना दी मजदुरिया बराबर दियां रोटीयां खरदी करी इना जो खुआन?” 38 यीशुए उना जो बोलया, “जाई करी दिख हाहाडे बाल कितणियां रोटीयां न?” उना पता करी के बोलया, “पंज रोटीयां कने दो मछियां भी हेन।” 39 तालू यीशुए उना जो हुकम दिता की, सबना जो सेले घाए पर बैठ्ठाई दिया। 40 सै सौ-सौ करिके कने पंजा-पंजा करिके झण्डा च बेई गे। 41 कने यीशुए सै पंज रोटीयां कने दो मछियां लियां, कने स्वर्ग पासे दिखीकरी परमेस्वर दा धन्यवाद किता, कने रोटीयां तोडी करी दो टोटे किते कने चेलयां जो दिन्दा गिया, ताकि सै लोकां जो परोसन, कने सै दो मछियां भी उना च बंडी दितियां। 42 सारे खाई करी रजी गे। 43 कने जालू रोटी खायां बैठे तालू चेलयां बाकी बचियां रोटीयां कने मछियां गिठेइयां कने उसला बाहरा टोकरियां भरई गियां। 44 जिना रोटीयां खादियां सै पंज हजार सिर्फ मर्द थे, उना बच्चे कने जणासा जो गिणया नी था। 45 तालू यीशुए झट पट अपने चेलयां जो बोलया की सै किस्तिया पर चडी जा कने झिला दे पारले पासे बैतसेदा शेहे जो चली जा, जालू दीकर की सै सारे लोकां जो भेजी नी ले। 46 सारे लोका जो भेजणे बाद, यीशु पहाडे पर प्रार्थना करणे ताई गिया। 47 कने जालू संज होई, तालू किस्ति गलील झिला दे बिच थी, कने यीशु किला झिला बखे था। 48 जालू उनी दिखया की सै बडे घबराई गियो न, क्योकि हवा उना दे खिलाफ चलियो थी, तां ब्यागा तडके यीशु झिला पर चली करी उना बाल आया, कने सै उना ला बखे ला निकलना चांदा था। 49 पर जालू उना उसयो झिला पर चलदे दिखया, तां से डडणा लग्गी पै, उना जो लगया की सै भुत है, तां सै दिखीकरी डरी गे, 50 क्योकि सारे उसयो दिखीकरी घबराई गियो थे। पर यीशुए उना ने झट गल्लां कितियां कने बोलया, “हिम्मत रखा, डरा मत, मै यीशु है।” 51 तालू सै उना बाल आया कने किस्तिया पर चडी गिया, कने हवा स्की गई, कने सै बडे हेरान होणा लग्गे। 52 हाली उना दिखया भी था की पिछलिया धियाडिया यीशुए पंज रोटीयां ने पंज हजार ला जादा लोकां जो खाणा खुआया था, सै हाली भी उसयो नी समझयो थे, की यीशु कुण है। क्योकि उना दे मन कठोर थे। 53 जालू यीशु कने उदे चले इक किस्तिया च गलील दिखया झिल्ला च गन्नेसरत प्रदेशे दे बखे पुज्जे, कने किस्ति घाटे पर बन्नी दिती। 54 कने जालू सै किस्तिया ला उतरे, तां लोकां उसयो झट पछेणी लिया, 55 सै झट पट ही सारे इलाके च गे, कने बिमारां जो मंझयां पर चुकी करी लेई गे जिथु उना जो खबर मिली की यीशु ओथु है। 56 कने जिथु कुथी सै गां, शेहरां या बस्तियां च जांदा था, तां लोक बिमारां जो बजारां च रखीकरी उसला बिनती करदे थे, की सै सिर्फ अपने कपडयां जो छुणा दे, कने जितणे भी छुंदे थे, सै सारे ठीक होई जांदे थे।

**7** तालू इक रोज फरीसी कने केई यहूदी व्यवस्था जो सिखाणे बाले जडे यस्त्रलेम शेहेर च आयो थे, उसयो सुणने ताई गिठे होए, 2 कने उना दिखया की उदे चले बिना हथ धोते रोटी खा दे थे, जडा की यहूदी रिवाजे अनुसार अपबित्र था। 3 फरीसी कने सारे यहूदी खाणा खाणे ला पेहले अपने बजुगां दे रीती रिवाजे पर चलदे थे कने जालू दीकर सै हणे ने हथ नी धोई लेन खाणां नी खांदे थे, 4 कने बजारे ला ओणे दे बाद, जालू दीकर से अपने रीती रिवाजा दे अनुसार नोई नी लेन, साफ नी होंदे तालू दीकर खाणां नी खांदे, कने उना दे बजुगां दे होर भी बतरे रिवाज थे, जिना जो सै मंदे थे, जियां की कटोरे, लोटे, कने तांबे दे भांडयां जो धोणा कने मांजणा। 5 ताई तां उना फरीसियां कने व्यवस्था जो सिखाणे बालयां

उसयो पुछया, “की तरे चले साडे सियाणे दियां रिबाजां जो नी मंदे?” सै तां बिना हथ धोयो रोटी खांदे न? 6 यीशुए उना जो जबाब दिता, “यशायाहे ठीक था, जिनी पबित्र शाब् च तुहाडे सांई कपटियां दे बारे च लिखया है, की ऐसे लोक गल्लां ने तां मेरा आदर करदे न, पर इना दे मन मिंजो ला बडे दूर न। 7 इना दी कितियो भक्ति मेरे ताई बेकार है, क्योकि ऐ लोकां जो माणुए दियां दसियां गल्लां जो परमेस्वर दियां गल्लां दस्सी करी मनणे ताई बोलदे न। 8 क्योकि तुसां परमेस्वरे दे हुकमा जो मनणा बंद करी दिता है, कने माणुए दे रिबाजां जो मना दे न।” 9 कने यीशुए उना ने बोलया, “तुसां अपने बणायो नियमा जो मनणे ताई चलाकिया ने परमेस्वरे दे हुकम जो टाली दिन्दे न। 10 उदाहरण ताई, मूसा ने बोलया है, की अपने माता पिता दा आदर करा, कने जडा कोई अपने माता पिता जो श्राप दिगा, सै पक्का मारी देणा। 11 पर तुसां लोकां जो ऐ दसदे न की, अपने माता पिता दी मदद नी करणा कने उना दे हिस्से दियां चिंजा उना जो छडी करी परमेस्वर जो देणा ठीक है। कने तुसां लोकां जो इजाजत दिन्दे अपने माता पिता जो ऐ बोलणे दी की जडा कुठ भै तुहांजो देणा था, सै भै परमेस्वर जो देणे दी कसम खादियो है, कने मै हुण तुसां दी मदद नी करी सकदा, इसला तुसां लोकां जो ऐ बोलदे की हुणे ला तुसां जो माता पिता दी सेवा करणे दी कोई जरूरत नहीं है। 13 इयां बोली करी, जिना रीती रिबाजां जो तुसां लोकां दीकर पुजाया है, सै परमेस्वरे दियां बोलियां गल्लां जो बेकार होणे दी बजा बणी जांदा है।” 14 तालू यीशुए लोकां जो अपने बाल सदीकरी उना जो बोलया, “तुसां सारे मेरी सुंणा, कने समझा। 15 ऐसी कोई चीज नी ऐ जडी माणुए च बाहर ला आई करी उसयो अशुद्ध करदी है, पर माणुए जो अशुद्ध सै करदा है जडा उदे अंदरे ला निकलदा है। 16 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 17 जालू सै भीडा दे बखे ला घरे दे अंदर गिया, तां उदे चेलयां यीशुए जडा बोलया था, उसा कहाणिया दा मतलब पुछया। 18 यीशुए उना ने बोलया, “क्या तुसां भी ऐसे ना समझन? क्या तुहांजो नी पता, की जडा भी खाणा माणु खांदा है, सै उसयो अशुद्ध नी करी सकदा। 19 क्योकि सै उदे मने च नी, पर उदे पेटे च जांदी है, कने संडास च निकली जांदी है,” यीशुए दा बोलणे दा मतलब ऐ था, की सारियां खांणे बालियां चीजा ठीक न। 20 लोक जडा बुरा सोचदे न, “सै ही बोलदे न कने करदे, सै ही उना जो परमेस्वर दे सामणे अशुद्ध करदा है। 21 क्योकि अंदर ला, मतलब की माणुए दा मन ही बुरियां चिजा दी जड है। बुरे-बुरे बिचार, व्यभिचार, चोरी, हत्या, परझीगमन, 22 लालच, बुराई, धोखा, लुचापन, बुरी नजर, निंदा, धमंड, कने मुखता निकलदी है। 23 ऐ सारियां गल्लां मने ला निकलदियां न कने माणुए जो अशुद्ध करदियां न।” 24 इदे बाद यीशु कने उदे चले ओथु ला उठी करी सर कने सैदा दे शेहेरे दे अखे बखे बालिया जगा जो चली गे। ओथु सै इकी घरे च गिया, कने सै चांदा था, की उसयो कोई नी जाणी सके की सै ओथु स्कया है। पर लोकां जो बडा तोला पता लग्गी गिया था कि सै ओथु स्कया है। 25 कने इक जनानी उदी चर्चा सुणीकरी आई, जिसा दिया छोटिया कुडिया जो बुरिया आत्मा जडकडया था, सै झट उदे पैरां च पेई गई। 26 सै जनानी यहूदी नी थी। सै सीरिया गांए दे सुसफिनीकी नाये दे इलाके च जमियो थी। कने उना उसला बिनती किती, की मेरिया कुडिया च बुरिया आत्मा जो कडी दे। 27 यीशुए उसा जो बोलया, “पेहले बचयां जो रजणा दे, क्योकि बचयां ला रोटीयां लेईकरी कुतयां दे अग्गे पाणा ठीक नी है।” 28 उना जबाब दिता, प्रभु ऐ सचच है, पर कुते भी तां बचयां दे मेजे हेठ रोटीया दे चूरे चारे जो खाई लेंदे न। 29 यीशुए उसा जो बोलया, “इसा गल्ला दा जबाब भरोसे ने दिता, उदिया बजा ने बुरी आत्मा तेरिया कुडिया च निकली गियो है कने तू हुण घरे चली जा।” 30 कने उना अपने घरे आई करी दिखया कुडी मंजे पर पियो है, कने बुरी आत्मा कुडिया ला निकली गियो है। 31 फिरी यीशु कने उदे चले अखे बखे दे इलाके जो छडी करी सिदोन शेहेर जो निकली गे। फिरी सै दिकापुलिस “दस शेहर” च होईकरी गलील झिला बालिया जगा च पुज्जा। 32 कने लोक इक टोणे जो जडा थथलान्दा भी था, उसयो उस बाल लेईकरी आये कने बिनती किती की, इसयो खरा करी दे। 33 तालू सै उसयो भिडा ला लग लेई गिया, कने अपणियां उंगलियां उदे कना च पाईयां, कने अपना थुक अपणिया उंगलियां च लगाया कने उसी माणुए दी जीभा जो छूता। 34 कने स्वर्ग पासे दिखीकरी लम्बा साह लिया। फिरी

उसी माणुए जो बोलया, “इफतह।” मतलब की “खुली जा” 35 कने इकदम ही सै साफ-साफ सुणना लगी पिया, कने बिना कुसी वीणिया ने सै साफ-साफ बोलणा लगी पिया। 36 तालू यीशुए उना जो समझाया की कुसी ने मत बोलंदे, पर उनी जितना उना जो समझाया उतणा ही सै बोलणा लगी पिया। 37 सै बडे ही हेरान होईकरी बोलणा लग्गे, “यीशुए जडा कुछ कित्ता सै सब कुछ खरा ही कितया है,” यीशु टोणयां जो सुणने दी, कने गुंगयां जो बोलणे दी शक्ति दिन्दा है।

**8** उसी बकते दी गल्ल है जालू मते सारे लोक दिकापुलिस च यीशुए बाल गिठे होए, कने उना बाल खाणे ताई कुछ नी था, तां यीशुए अपने चेलयां जो सदीकरी उना जो बोलया, 2 ऐ लोक मिजों सोगी तिन्ना रोजां ला रेह दे न। उना बाल खाणे ताई कुछ नी है कने मिजो इसा गल्ला पर तरस ओआ दा है। 3 कने इना च थोडे लोक बडे दुरे ला आयो थे। अगर मैं इना जो भूखा घरे भेजी दें, तां इना रस्ते च थकी जाणा कने बेहोश होई जाणा। 4 उदे चेलयां उसयो जबाब दिता की, ऐथू सुसमान जगा च इतणी रोटियां कुनी कतां ला लोणियां, की ऐ सारे जणे रजी जान? 5 यीशुए उना जो पूछया, “तुहाडे बाल कितणियां रोटियां न?” उना बोलया, “साडे वाली सत रोटियां न।” 6 तालू यीशुए लोकां जो धरतिया पर बाणे दा हुकम दिता कने सै बेई गे, कने उदे बाद सै सत रोटियां लियां, कने परमेश्वरे दा धन्यवाद करिके तोडियां, कने अपने चेलयां जो रोटीयां दे टुकडे दिन्दा गिया ताकि सै उना जो लोकां च बंडी देन। 7 उना बाल थोडियां छोटियां मछियां भी थियां, कने यीशुए परमेश्वरे दा धन्यवाद करिके सै अपने चेलयां जो दितियां, कने लोकां जो परोसणे दा हुकम देई दिता। 8 फिरी सारे लोक खाई करी रजी गे कने उदे बाद चेलयां बाकी बचियां रोटियां दे टुकडयां जो सत टोकरियां च भरी लिया। 9 कने सै लोक लगभग चार हजार थे, कने यीशुए उना लोकां जो विदा कित्ता। 10 कने यीशु चेलयां सोगी किस्तिया पर चडी करी दलमनुता इलाके जो चली गिया। 11 फिरी फरीसी आई करी यीशुए ने गल्ल बात करणा लग्गे, क्योंकि सै उसयो फसाणा चांदे थे इस ताई उना उसयो पूछया स्वर्ग दा कोई चमत्कार दस। जिसने ऐ साबित होई जां की परमेश्वरे तिजो शक्ति दितियो है। 12 उनी उना दे अविश्वास ला नराज होईकरी लम्बा साह लिया कने बोलया, “इस युगे दे लोक कजो चमत्कार तोपे न? मैं तुहांजो ने सच्च बोलदा है, की इस युगे दे लोकां जो कोई चमत्कार नी देणा है।” 13 फिरी सै फरीसियों जो छडी करी, अपने चेलयां सोगी किस्तिया पर चडी गिया कने गलील झिला दे चारों पासयां ला होंदे होए चली गिया। 14 यीशुए दे चले रोटियां लेणा भूली गियो थे, कने उदिया वजाने उना बाल किस्तिया च इक रोटियां जो छडी करी कख भी नी था। 15 कने यीशुए उना जो चेतावनी दिती कि, “फरीसियां कने हेरोदेस दे खमिरे ला बचणे ताई चौकने रेनयो।” 16 सै अपु चे बिचार करिके बोलणा लग्गे, कि यीशुए ऐ इस ताई बोलया क्योंकि “साडे बाल रोटीयां घट न।” 17 ऐ जाणी करी यीशुए उना ने बोलया, “तुसां कजो अपु चे बिचार करा दे कि साडे बाल रोटियां नी न? क्या तुसां अपने मने जो इतणा कठोर बनाई लिया, तुसां क्या हले दीकर समझे नी? 18 तुसां बाल हखी कने कन्न होंदे होए भी नी दिखी कने सुणी सकदे। कने क्या तुहांजो कुछ भी याद नी है? 19 कीं तालू तुसां बचियां रोटियां दे टुकडयां जो कितणियां टोकरियां च भरया था, जालू मैं पंज हजार लोकां जो पंज रोटियां ला खुयाया था?” उना बोलया, “बाहरा टोकरियां।” 20 “कने जालू चार हजार लोकां ताई सत रोटियां थियां तां कितणे टोकरे भरी करी चुके थे?” उना बोलया, सत टोकरे। 21 यीशुए उना जो बोलया, “तुसां हाली दीकर कजो नी समझदे की मैं कुण है?” 22 तालू यीशु कने उदे चले बैतसेदा शेहरे च आए, कने लोक इक अन्ने जो उदे बाल लेईकरी आए कने उसला बिनती कीती की इसी माणुए जो छु कने खरा करी दे। 23 तालू यीशुए उस अन्ने दा हथ पकडी करी उसयो ग्रां दे बाहर लेई गिया। कने यीशुए अपना थुक उदिया हखी पराला लाया कने उस पर हथ रखे, कने उसयो पूछया, “क्या तिजो कुछ मिल्ला दा है?” 24 उनी नजरां उपर करी के बोलया, “मैं माणुए जो दिखा दा है, पर सै साफ नी मिल्ला दे, सै मिजो सखां साई चलदे मिला दे न।” 25 तालू यीशुए दोबारा उदियां हखी पर हथ रखे, कने अन्ने गोरा ने दिखया, कने उदियां हखी ठीक होई गियां, कने उसयो सब कुछ साफ-सुथरा मिलणा लगी पिया। 26 कने यीशुए उसयो हुकम दिता कि अपने घरे जो मुडी जा, पर ऐथू जडा होया गांए बालयां जो दसणे ताई, ग्रांए दे अंदर पेर

भी मत रखदा। 27 यीशु कने उदे चले बैतसेदा शेहरे जो छडी करी कैसरिया फिलिप्पी शेहरां दे बखे आले ग्रां च चली गे, कने रस्ते च उनी अपने चेलयां जो पूछया, “की लोक मेरे बारे च क्या बोलंदे न, की मैं कुण है? 28 चेलयां जबाब दिता कुछ लोक बोलंदे ने कि तुसां यहन्ना बपतिस्मा देणेबाले न; पर कोई-कोई एलिय्याह बोलदा, कने कोई-कोई बोलंदे न कि पुराणे जमाने दे परमेश्वरे दा संदेश देणेबालयां च कोई इक है।” 29 फिरी यीशुए पूछया, “पर तुसां मिजो क्या बोलंदे न?” पतरसे उसयो जबाब दिता, “तू मसीहा है, जडा परमेश्वरे दिया तरफा ला भेजया है।” 30 तालू यीशुए उना जो हुकम दिता की मेरे बारे च कुसी ने मत बोलंदे की, मैं मसीहा है कने परमेश्वरे मिजो भेजया है। 31 तालू यीशु अपने चेलयां जो सिखाणा लग्गा, कि मैं, जडा माणुए दा पुत्र है, “मिजो मते दुख सेहणे पोणे न, कने यहदी अगुवे, बड़े याजकां, कने यहदी व्यवस्था जो सिखाणे बालयां मिजो अपनाणा नी है, कने मैं मारी देणा है, कने फिरी मैं तिन्ना रोजां बाद मरयां चे जिन्दा होई जाणा है।” 32 यीशुए उना जो ऐ गल्ल साफ तरिके ने बोली दिती। पतरस यीशुए जो बखिया लेई गिया कने इसा गल्ला पर झिडकणा लग्गा। 33 तालू यीशु पिच्छे मुडया कने चेलयां जो दिखया कने पतरसे कने झिडकी करी बोलया, “शैताने साईं कम्म करणा बंद कर! मेरे सामणे ला दूर होई जा! क्योंकि तू परमेश्वरे दे साईं नी, पर तू माणुए साईं सोचदा है।” 34 यीशुए भिडा जो अपने चेलयां सोगी अपने बाल सदीकरी बोलया, “जडा कोई मेरा चेला बणना चांदा है, उसयो अपणिया शरीर दियां इच्छां कने जडियां तरकिबां बणाईयां उना जो छडी करी कने जडा मिजों ताई मरणे जो तैयार रंदा है, सेई मेरा चेला बणी करी मिजों पिच्छे चली सकदा है। 35 कोई माणु इयोदिया नी करगा कने अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जडा माणु मिजों पर भरोसा करणा कने मेरे श्भसमाचार दिया बजा ने मरगा उस माणुए जो परमेश्वरे सोगी सदा ताई दी जिन्दगी मिलणी। 36 अगर तुसां संसारे दा सब कुछ पाई लेंगे कने पर परमेश्वरे सोगी सदा दी जिन्दगी जिणे दा मोका गवाई दिगे, तां उदा क्या फायदा? 37 इक माणु परमेश्वरे जो क्या देई सकदा है, जडा उदी हमेशा दी जिन्दगी खरिदगा? कुछ नी! 38 तुहाडे च अगर कोई माणु मिजों अपना परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाडा मजाक उडाणा। फिरी जालू मैं माणुए दे पुत्रे, पबित्र स्वर्गदां सोगी धरतिया पर ओणा है, तां मैं उना लोकां जो भी अपना चेला मणणे ला मना करी देणा है। तालू सारायां लोकां मेरी महिमा दिखणी जडी मेरे पिता दी है।”

**9** यीशुए भिडा कने अपने चेलयां जो बोलया, मैं तुहांजो ने सच्च बोलदा है, “ऐथू खडोतयो लोकां चे कुछ लोक पेसे न, उना तालू दीकर जिन्दे रेणा है जालू दीकर सै परमेश्वरे दे राज्य जो शक्तिशाली स्पे च अपने बिच ओदे नी दिखी लेन।” 2 इक हफते बाद यीशु पतरस, याकूब कने यहन्ना जो इक उच्चे पहाडे पर लेई गिया कने ओथु उना सिबा होर कोई नी था, कने उना दे सामणे यीशुए दा रूप बदलुई गिया। 3 कने उदे कपडे चिटे होईकरी चमकणा लग्गे। धरतिया पर इयोदे चिटे कपडे कोई भी धोबी धोई करी नी करी सकदा। 4 तालू उना तिन्ना चेलयां, दो परमेश्वरे दे संदेश देणेबाले मूसा कने एलिय्याह जो, जडे बडे पेहले जिन्दा थे उना जो यीशुए सोगी गल्लां करदे दिखया। 5 ऐ सब दिखीकरी पतरसे यीशुए जो बोलया, “मूस जी, साडा ऐथू रेणा ठीक है, इस ताई असां ऐथू तीन तम्ब बणांदे न, इक तेरे ताई, इक मूसा ताई, इक एलिय्याह ताई।” 6 पतरसे ऐ इस ताई बोलया की, सै कने दुज्जे दो चले डरी गियो थे, कने नी जाणदे थे क्या बोलणा क्या करणा। 7 तालू इक बदल आया कने उनी उना जो अपणी छाया हेठ हकी लिया, कने उना बदले च परमेश्वरे जो बोलंदे सुणया, “कि ऐ मेरे प्यारा पुत्र है, कने मैं इसला खुश है, कने जडा ऐ बोलदा है, उसयो ध्याने ने सुणा।” 8 तालू उना अपने चारो पासे नजर मारी, तां मूसा कने एलिय्याह ओथु नी थे, कने उना जो सिर्फ यीशु ही मिल्ला। 9 जालू यीशु कने उदे तिन्ने चले पहाडे ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मैं, माणुए दा पुत्र मरयां चे जिन्दा न होई जा।” 10 चेलयां जडा पहाडे पर होया उदे बारे च कुसी जो भी नी दसया, पर सै इसा गल्ला दे बारे चर्चा करणा लग्गे की, “मरयां चे जिन्दा होई जाणा” इदा क्या मतलब था। 11 कने चेलयां

उसला पुछ्या, “मूसा दी व्यवस्था दे अनुसार व्यवस्था जो सिखाणे बाले बोलदे थे, मसिहा ला पहले एलिय्याह ओणा था? अगर ओणा था, तां हाली दिकर कजो नी आया सै?” 12 यीशुए उना जो जबाब दिता, ऐ तां सचह है कि एलिय्याह पहले आई करी सब कुछ सुधारणा है। पर कजो माणुए दे पुत्रे दे बारे च ऐसा लिखया है, की उनी बडे दुख सेहणे न, कने उसयो निच समझणा है। 13 पर मै तुसां ने बोलदा है, एलिय्याह ता पहले ही आई चुकया था, साडे अगुवां उदे कने बडा बुरा व्यवहार कितया। जियां से करणा चांदे थे, जदिया की पबित्र शास्त्रां च बडी पहले ही बोलया था की उना करणा। 14 जालू यीशु कने तिन चले बाकी चेलयां बाल मुडी करी आये, तां दिखया की उना दे चारो पासे तां बडी भरी भीड लगियो है, कने व्यवस्था जो सिखाणे बाले उना सोगी बेहस करा दे थे। 15 कने जियां ही सारे लोकां यीशुए जो दिखया, दिखदे ही बडे हेरान होये, कने उदे बाल दौडी करी आये कने उसयो नमस्ते किते। 16 यीशुए उना ला पुछ्या, “तुसां इना सोगी बेहस कुसा गल्ला पर करा दे न?” 17 भिडा चे इकी माणुए उसयो जबाब दिता, “गुरु जी, मैं अपने पुत्रे जो तेरे बाल लेईकरी आया था, उदे च बुरी आत्मा है, जिना इसयो गंगा बणाई दितया है। 18 जालू भी बुरी आत्मा उदे अंदर ओदी है, तां सै उसयो गुरसे ने जमिना पर पटकरी दिन्दी, कने उदे मुरे ला झाग निकलदा, कने दंदा पिदा, सकत होई जांदा। मै तुहाडे चेलयां जो बोलया की बुरिया आत्मा जो बाहर कडी दिया पर सै उना ला नी होया।” 19 ऐ सुणीकरी यीशुए उना जो जबाब दिता, “हे अक्विसी लोकों, मै कालू दीकर तुहाडे सोगी रंगा, कने कालू दीकर तुहाडे अक्विसा जो सेहन करणा? उस जागते जो मेरे बाल लोआ।” 20 तालू सै जागते जो यीशुए बाल लेई आये कने जालू बुरिया आत्मा यीशुए जो दिखया, तां उना आत्मा जागते जो झट मरोडया, कने धरतिया पर फकोडी दिता, कने सै मुरे ला झाग निकालदे-निकालदे बिलटियां मारणा लग्गा। 21 यीशुए जागते दे पिता ला पुछ्या, “ऐ कालू ला होआ दा है?” कने उनी बोलया, “जालू ला ऐ लोका दिया नियाना होदा था। 22 मती बरी बुरिया आत्मा इसयो मारणे तांई अग्गी कने पाणिये च सुटी दितया था, पर अगर तू कुछ करी सके, तां सांझो पर तरस खाई करी साडी सहायता करा।” 23 यीशुए उना जो बोलया, “अगर तू करी सकदा है, ऐ क्या गल्ल होई? जडा मिंजो पर भरोसा करदा है, उदे तांई सब कुछ होई सकदा है।” 24 बच्चे दे पिते झट पैरां च पेईकरी जोरे ने बोलया, “प्रभू जी, मेरी सहायता करा की मै तुसां पर भरोसा करे।” 25 जालू यीशुए दिखया, की मते सारे लोक उसयो दिखणे तांई गिठे होआ दे थे, तां उनी बुरिया आत्मा जो ऐ बोली करी झिडका दितियां की, “हे बुरी आत्मा, जडी इसी जागते जो गंगा कने बेहरा बणा दी कने बोलणा नी दे दी, मै तिजो हुकम दीदा है की, इसयो छडी दे, कने फिरी कदी मत ओदी।” 26 तालू बुरिया आत्मा चिलाई करी जागते जो मरोडी करी सटया, कने निकली गेई कने सै जागत बिना हिल्ले ओथु लाशा सांई पेई रिया था, ऐथू दीकर की मते लोक बोलणा लगे की, ऐ तां मरी गया है। 27 पर यीशुए उदा हथ पकडी करी उसयो उठालया, कने सै खडोई गया। 28 बांटे च जालू यीशु कने उदे चले घरे च किले थे, तालू उदे चेलयां पुछ्या कि, “असां बुरिया आत्मा जो कजो नी कडी सके?” 29 यीशुए उना जो जबाब दिता, “ऐसियां बुरियां आत्मा जो प्राथना कने बरत कितयो बिना माणुआं ला बाहर नी कडी सकदे।” 30 बांटे च यीशु कने उदे चेलयां उना जगा जो छडी दिता कने गलील प्रदेशे ला निकले। कने यीशु नी चांदा था की कोई उसयो जाणे की सै कुथु है। 31 क्योंकि यीशु अपने चेलयां सोगी मता बकत बिताणा चांदा था कने उना जो सिखाणा चांदा था। कने उना ने बोला दा था की, “माणुए दा पुत्र, मेरे दुश्मणा दे हथे पकडया जाणा है, कने उना लोका मिंजो मारी देणा है, कने मरणे दे तरिये रोजे मरयां चे जिन्दा होई जाणा है।” 32 पर ऐ गल्ल उना दिया समझा च नी आई, कने चले पृछणे ला डरदे थे जडा यीशुए बोलया था। 33 यीशु कने उदे चले कफरनहम शेहरे च अपने घरे जो आये, कने जालू से घरे अंदर थे, तालू यीशु उना जो पुछणा लग्गा, “रस्ते च तुसां कुसा गल्ला पर बेहसा दे थे?” 34 सै चुप रे, क्योंकि उना रस्ते च ऐ बेहस कितियो थी कि, असां चे बडा कुण है। 35 तालू यीशु बेई गया कने बाहरां चेलयां जो अपने बाल गिठा होणे जो बोलया, कने उना जो बोलया, “जडा कोई सारयां ला महान बणा चांदा है, तां सै अपु जो सारयां ला निच समझे कने सारयां दा सेवक बणे।” 36 तालू यीशुए बखे इक बच्चा खुडोतया था,

यीशुए बच्चे जो गल्ले लगाया कने चेलयां जो बोलया। 37 “जडा कोई माणु इयां ही इक बच्चे पर दया दसदा है, सै सच्ची मेरा इज्जत मान करदा है। कने कोई मेरी इज्जत मान करदा है, तां सै मेरा ही नी बल्कि मेरे परमेश्वरे दी इज्जत मान करदा है, जिनी मिजो भेजया है।” 38 तालू यहून्ना उसयो बोलया, “गुरु जी, असां इकी माणुए जो तेरे नाए दी शक्ति ने बुरियां आत्मा जो कडदे दिखया है, कने असां उसयो मना भी किता, क्योंकि सै साडे सांई तेरा चेला नी था।” 39 यीशुए बोलया, “उसयो मना मत करा अगर कोई मेरे नाये ने चमत्कार करदा है, क्योंकि ऐसा कोई नी है, जडा मेरे नाये ने सामर्थ्य दे कम्म करे, कने जल्दी मिजो बुरा बोली सके, 40 क्योंकि जडे साडे बेरी नी है, सै साडे सोगी साथी ना।” 41 जडा कोई इक कटोरा पाणिये दा तुहांजो इस तांई पियां, की तुसां जो मसीह दे चले बोलदे न, मै तुसां ने सचच बोलदा हे की उनी अपना फल कुसा भी हालत च नी दे गवाणा है। 42 पर अगर कोई इना छोटयां चे, जडे मिंजो पर भरोसा करदे न, उना दे पापां दी बजा बणे तां उना तांई ऐं ही खरा है की अपने गले च पथर बन्नी करी दरियाये च छलांग लगाई। 43 सारियां बुराइयां जो छडी दिया जिना ने पाप होदा है, बुराइयां जो पूरे तरीके ने छडी दिया, जियां की तुसां इक हथ बडा दे, जडा तुहाडे पापां दी बजा बणदा है। अगर तुसां स्वर्ग जो जांटे न, भले ही तुसां बाल इक ही हथ है, सै तुसां तांई खरा है। कने अगर तुसां बाल दोनो हथ न, कने तुसां नरके जान, तां इसला भयानक कुछ नी है। (Geenna g1067) 44 नरके दिया उसा जगा पर जिथू सारयां दे जिस्मा जो खणे बाले कीडे कदी नी मरदे कने बलियो अग्न कदी नी बुझदी। 45 सारियां बुराइयां जो छडी दिया जिना ने पाप होदा है, बुराइयां जो पूरे तरीके ने छडी दिया जियां की तुसां इक पैर बडा दे, जडा तुहाडे पापां दी बजा बणदा है। अगर तुसां स्वर्ग जो जांटे न, भले ही तुसां बाल इक ही पैर है, सै तुसां तांई खरा है। कने अगर तुसां बाल दोनो पैर न, कने तुसां नरके जान, तां इसला भयानक कुछ नी है। (Geenna g1067) 46 नरके दिया उसा जगा पर जिथू सारयां दे जिस्मा जो खणे बाले कीडे कदी नी मरदे कने बलियो अग्न कदी नी बुझदी। 47 सारियां बुराइयां जो छडी दिया जिना ने पाप होदा है, बुराइयां जो पूरी तरह छडी दिया जियां की तुसां इक हाथी जो कडा दे, जडा तुहाडे पापां दी बजा बणदा है। अगर तुसां स्वर्ग राज्य जो जांटे न, भले ही तुसां बाल इक ही हथ है, सै तुसां तांई खरा है। कने अगर तुसां बाल दोनो हथी न, कने तुसां नरके जान, तां इसला भयानक कुछ नी है। (Geenna g1067) 48 नरके दी उसा जगा पर जिथू सारयां दे जिस्मा जो खणे बाले कीडे जडे कदी नी मरदे कने बलियो अग्न कदी नी बुझदी। 49 क्योंकि हर इक जणा अग्गी ने शूद्र किता जाणा, जियां की बलिदान गुणे ने शूद्र होदा है। 50 गुण इक जस्री चिज है, पर अगर उदा स्वाद चली जा, तां उदा स्वाद कियां वापिस लोणा? तुसां च लूणे सांई खुबियां होणी चाईदियां, कने अपु चे मिली झूली कने शांतिया ने रिया।

**10** यीशुए अपने चेलयां सोगी कफरनहम शहर छडी दिता, सै यहूदिया प्रदेशे ला निकले कने यरदन खड्डा दे दूरे पास्से चली गे। कने इक बरी फिरी भीड उदे बाल गिठी होई गेई, कने सै उना जो हरबरी सांई उपदेशे देणा लग्गा। 2 तालू फरीसी उदे बाल आपे कने उसयो परखणे तांई उसला पुछ्या, “क्या मूसा दिया व्यवस्था च इक मरदे जो अपणिया घरे बालिया जो तलाक देणे दा हक है?” 3 यीशुए उना जो जबाब दिता, “मूसा तुहांजो तलाक दे बारे च क्या हुकम दितया है?” 4 उना बोलया, “मूसा हुकम दितया की त्याग पत्र लिखी करी अपणी घरे बालिया जो देई दिया कने उसा जो छडी दिया।” 5 यीशुए उना जो बोलया, “तुसां हरबरी परमेश्वरे दे हुकमं जो मणणे तांई मुकरी जांटे न, क्योंकि तुसां दा मन कठोर है, इस तांई मूसा ऐ लिखया था। 6 पर पबित्र शास्त्रां च लिखया है कि जालू परमेश्वरे संसार बणया था, तालू उनी इक मर्द तांई इक जनानी बणाई। 7 जालू इक मर्द जनानिया ने बियाह करदा है, तां सै दोनो इक होई जान्दे न, क्योंकि सै दोनो इक जान न। 8 कने सै दोनो हुण इक तन न, क्योंकि हुण सै दो जणे नी, पर इक माणुए सांई न। 9 इस तांई उसा जनानिया कने मर्द जो बख नी करणा चाईदा जिना जो परमेश्वरे बियाह दे बंधना च बनया है।” 10 कने बांटे च, जालू सै चेलयां सोगी घरे च किल्ला था, तालू चेलयां तलाक दे बारे च उसला पुछ्या। 11 यीशुए उना जो जबाब दिता, “जडा अपणिया घरे बालिया जो छडी करी दुईया ने बियाह करे तां सै उसा पेहलिया दे खिलाफ च व्यभिचार करदा है। 12 कने अगर घरे

बाली अपने घरे बाले जो छडी करी कुसी होरसी ने बियाह करे, तां सै व्यभिचार करदी है।” 13 फिरी लोक बचयां जो यीशुए बाल लोणा लगे ताकि सै उना पर हथ रखीकर उना जो आशीष दे, पर चेलयां उना लोकां जो डांटया। 14 यीशुए जो ऐ सब दिखीकरी गुस्सा आया कने उना जो बोलया, “बचयां जो मना मत करा कने इना जो मेरे बाल ओणा दिया, जडे इना बचयां सांई भरोसेमदं न उना परमेश्वरे दे राज्य च रेणा। 15 मै तुसां ने सच्च बोलदा है, परमेश्वरे अपने राज्य च सिर्फ उना लोकां जो ओणा देणा है जडे परमेश्वरे दे राज्य जो बचयां सांई अपनांदे न।” 16 कने यीशुए बचयां जो गल्ले ने लाया, कने उना पर हथ रखीकरी यीशुए आशीष दिती। 17 जालू यीशु कने उडे चेलयां यात्रा करणा शुरू किती थी, तां इक माणु उडे बाल दौडी करी आया कने इज्जत मान तांई उडे पैरां अगे डेई पिया कने उसला पछणा लग्गा की, “हे उत्तम गुरू, मै क्या कम्म करां की परमेश्वर मिजो हमेशा दी जिन्दगी दे? (aiōnios g166) 18 यीशुए उसयो बोलया, तुसां मिजो कजो उत्तम बोलदे न, उत्तम तां सिर्फ इक ही है, सै परमेश्वर है।” 19 “तू परमेश्वर दे हुकमा जो तां जाणदा है की: हत्या नी करणी, व्यभिचार नी करणा, चोरी नी करणी, झूठी गबाई नी देणी, बेईमानी नी करणी, कने अपने माता पिता दा आदर करणा।” 20 उनी यीशुए बोलया, “गुरू जी, इना सबना हुकमा जो तां मै बचपने ला ही मनदा आया है।” 21 यीशुए उस पासे नजर करी के प्यारे ने दिखया कने उसयो बोलया, “इक कम्म है जडा तिजो हाली भी करणे दी जरूरत है। जा, कने जडा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बनिया।” 22 तालू माणुए यीशुए दी इसा गल्ला जो सुणया, कने उडे चेहेरे पर उदासी छाई गई, कने सै दुर्बी होईकरी चली गिया, क्योंकि सै बडा भरी अमीर था। 23 यीशुए चारो पासे दिखीकरी अपने चेलयां जो बोलया, “अमीरां दा परमेश्वरे दे राज्य च जाणा बडा मुशकिल है।” 24 तालू चले यीशुए दियां गल्लां सुणी की हेरान होई गे, यीशुए बोलया मेरे भाईयो, जडा कोई अपने पैसयां उपर भरोसा करदा है, उना तांई परमेश्वरे दे राज्य जो जाणा बडा मुशकिल है। 25 उंटे दा सुइया दे नाके चे निकलना असान है, पर अमीरां दा परमेश्वरे दे राज्य च जाणा बडा भरी मुशकिल है। 26 जालू चेलयां ऐ सुणया, तां सै बडे हेरान होईकरी अपु चे बोलणा लगे, “तां कृण अपने पापां दी सजा मिलणे ला बची सकदा है?” 27 यीशुए उना दे पासे दिखीकरी बोलया, “जडा माणु नी करी सकदे, पर सै परमेश्वर करी सकदा है, क्योंकि परमेश्वरे सब कुछ करी सकदा है।” 28 पतरस यीशुए जो बोलणा लग्गा, सांडो क्या मिलणा? असां तां तुहाडे चले बणने तांई अपना सारा कुछ छडी दितया है। 29 यीशुए चेलयां जो बोलया, “मै तुहांजे ने सच्च बोलदा है, मेरे चले बणने तांई कने शुभ्रमाचार दा प्रचार करणे तांई तुसां च जिनी भी घरे जो छडया, या अपने भाई बेहण, माता-पिता, अपणिया जमिना जो छडया है। 30 उसयो इस बकते सौ गुणा ना मिल्ला हो, जिनी अपना टबर, भाई कने बेहणां, माता-पिता, बाल बचयां जो या खेतरां जो छडया हो। पर उसयो तकलिफां कने ओणे बाले बकते च हमेशा दी जिन्दगी मिलणी है। (aiōn g165, aiōnios g166) 31 पर मते लोक न जडे हण महान कने अगे न, उसी बकते सै पीच्छे होणे, कने जडे पीच्छे न, सै उस बकते पेहले होणे न।” 32 सै यरुशलेम शेरर जो जांटे बेले जालू रस्ते च थे, तां यीशु उना दे अगे-अगे चलया था, कने उडे चले बडे हेरान होऐ की जिथु सै चलयो थे, ओथु मते लोका उना दा बिरोध किता था, कने जडे लोक उडे सोगी थे, सै इसा गल्ला ला डरयो थे, की यरुशलेम शेरर च उना दा क्या होणा। तालू सै फिरी उना बाहरां चेलयां जो इकरी तरफा लेईकरी उना ने गल्लां बोलणा लग्गा, जडियां उस सोगी होणे बालियां थियां। 33 “दिखा, ध्याने ने सुणा, असां यरुशलेम शेररे जो चलयो न, कने मै माणुए दा पुत्र बडे याजकां कने यहूदी व्यवस्था जो सिखाणे बालयां दे हथे पकडया जाणा है, कने उना मिजो मौत दी सजा देणी है, कने होर जातियां दे हथे देई देणा है। 34 कने उना मेरा मजाक उडाणा है, मिजो पर थुकणा, कने मिजो कोडे मारणे, कने मिजो मारी देणा है, कने मै तिजे दिने मरयां चे जिडे होई जाणा है।” 35 याकूब कने यहूना दा भाई, जडे जब्दी दे पुत्र थे उना यीशुए बाल आई करी बोलया, “गुरू जी, असां कुछ तिजो ला मंगणा चांटे न, सेई तू साडे तांई कर।” 36 यीशुए उना ला पछया, “तुसां क्या चांटे न की मै तुहाडे तांई करे?” 37 उना यीशुए जो बोलया, “असां तुसां दे महिमामय राज्य च तुसां दे बखे

इज्जत बाली जगा च बोणा चांटे न। असां च इक तुहाडे खबे कने इक सज्जे हथे बखे बोणा चांटे न।” 38 यीशुए उना जो बोलया, “तुसां जो नी पता कि तुसां क्या मंगा दे? हण जडे दुख मै सेहणे न, क्या तुसां उना दुखां जो सेहन करी सकदे न? क्या तुसां मरणे तांई तैयार न क्योकि मै जल्दी ही मरणे बाला है?” 39 उना उसला बोलया, “असां करी सकदे न।” यीशुए उना ने बोलया, “तुसां भी सारे दुख सेहणे न, जियां मै सेहणे। तुसां जो भी मारया जाणा है, जियां मिजो मारणा है। 40 मिजो ऐ तय करणे दा हक नी है, की मेरे सज्जे कने खबे कुसयो सै जगा मिलणी है, सै जगा उना लोकां तांई न, जिना जो परमेश्वर चुणयां है।” 41 ऐ सुणीकरी बाबरी दसो चले याकूब कने यहूना पर गुस्सा करणा लगे। 42 तां यीशुए उना जो अपने बाल सदीकरी उना जो बोलया, “तुहांजो पता है ना, कि जडे लोक प्रधान मने जांटे थे, सै अपने अधिकारां दा इस्तेमाल अपने अधीन लोकां दे उपर हक जमाणे तांई करदे न। उना दे अगुवे लोक अपणी गल्ल मनणे तांई हक जातां दे। 43 पर तुहांजो उना सांई नी होणा चाईदा, तुहांजो चे जडा महान बणना चांदा है, उसयो बाकियां दी सेवा करणी चाईदी। 44 कने जडा कोई तुसां चे प्रधान बणना चांदा हो, सै सारायां दा नौकर बणे। 45 मै ऐ इस तांई बोलदा है क्योकि मै, माणुए दा पुत्र, इस संसारे च सारयां दी सेवा करणे तांई आया है, मै इस तांई नी आया कि लोकां ला अपणी सेवा करां। मै तां लोकां जो पापां ला छुटकारा करणे तांई अपने प्राण कीमत च देणा आया है।” 46 यरुशलेम शेरर दे रस्ते च जांटे, यीशु कने चले येरीहो च आये, जालू सै कने उडे चले कने इक बडी भीड यरीहो शेररे ला निकला दी थी, इक बरतिमाई माणे दा अन्ना भिखारी सडका दे बखे बैठया था। सै तिमाई दा जागत था। 47 सै ऐ सुणीकरी की यीशु नासरत शेररे ला है, जडा रस्ते च चलया था, डडी-डडी करी बोलणा लग्गा, “हे यीशु, राजा दाऊदे दे बंशज, मिजो पर दया कर।” 48 उसयो मतयां झिडकां दीतियां की चुप रे, पर सै होर जोरे ने बोलणा लग्गा की, “हे यीशु, राजा दाऊदे दे बंशज, मिजो पर दया कर।” 49 तालू यीशुए ऐ सुणया कने स्की करी बोलया, “उसयो थैथु लोआ।” कने लोकां उस अन्ने जो सदीकरी बोलया, “हिम्मत रख, उठ सै तिजो सदा दा है।” 50 कने अन्ने माणुए एडत अपने उपर ओडियो चादर सुटी कने उठी करी यीशुए बाल आया। 51 यीशुए उसयो पुछया, “तू क्या चांदा है की मै तेरे तांई करे?” अन्ने उसयो बोलया, “गुरू जी, ऐ की मिजो मिलणा लगी पोऐ।” 52 यीशुए उसयो बोलया, “मै तिजो ठीक करा दा क्योकि तू मिजो पर भरोसा करदा है। हण तू घरे जो जाई सकदा है” कने उसयो मिलणा लगी पिया, कने रस्ते च यीशुए पिच्छे चली पिया।

**11** जियां यीशु कने उडे चले यरुशलेम शेररे दे बखे पुज्जे, सै जैतन स्व्हां दे पाहडे दे कंडे बैतफगे कने बैतनियाह ग्रांए च आये, तां यीशुए अपने दो चेलयां जो ऐ बोली करी भेजया, 2 “सामणे दे ग्रां च जा, कने ओथु पुजदे ही तुहांजो इक गधिया दा बच्चा बननया मिलणा है, उडे उपर हली कोई नी बैठया था। सै खुंडे च बननया होणा उसयो खोली करी लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है। कने उनी जल्दी ही बापस करी देणा है।” 4 चेलयां ग्रांए च जाई करी उस गधिया दे बच्चे जो इक घरे दे दरबाजे बखे खुंडे ने बननया दिखया, कने सै उसयो खोलणा लगे। 5 कने जडे ओथु खुडतयो थे उना चे कोई-कोई बोलणा लगे की ऐ क्या करा दे न, इस गधी दे बच्चे जो कजो खोला दे न? 6 जियां यीशुए बोलया था, तियां ही चेलयां उना जो बोली दिता उना गधिया दे बच्चे जो जाणा दिता। 7 कने दो चेलयां उस गधिया दे बच्चे जो यीशुए बाल लांदा, कने उस पर अपने उपरे बाले कपडे उदिया पीठी पर पाई दिते कने यीशु उस पर बेई गिया कने यरुशलेम शेररे दी पाससे चलणा लगे। 8 तालू मतयां सारयां लोकां अपने कपडे रस्ते च बछाई दिते कने उदा आदर मान किता। कने केईयां रस्ते च पात्रां बालियां डालियां बडी-बडी करी बछाई करी उदा मान आदर किता। 9 कने थोडे लोक यीशु दे अगे-अगे चलयो थे, कने थोडे लोक पिच्छे चलयो थे, सै सारे खुशिया ने जोरे ने बोला दे थे, “होशाना; परमेश्वर इसला खुश है जडा उडे हके सोगी ओंदा है। 10 परमेश्वरे दा अनुग्रह ओणे बाले राज्य पर है, जडे साडे सियाणे राजा दाऊदे दे राज्य सांई है, धन्य हो! परमेश्वर जडा स्वर्ग च रंदा है, उदी होशाना हो।” 11 जालू यीशु यरुशलेम शेररे च पुज्जा कने तां सै परमेश्वरे दे मंदरे दे अंदर गिया, कने सारे पासे

दिखाया कने सै अपने बाहरां चेलयां सोगी बैतनिय्याह ग्रांणे जो मुडी गया, क्योकि संज होई गियो थी। 12 दुज्जे दिने जालू यीशु कने उदे चले बैतनिय्याह ग्रांणे ला यरूशलेम शेहरे जो चलयां थे, तालू यीशुए जो भूख लग्गी। 13 कने उनी पतयां ने भरया होया अंजरी दा सख दिखया कने सै उदे बखे गे, ताकि कुछ खाणे जो मिली जा, पर ओथु पतयां जो छडी करी होर कोई फल नी मिल्ला, क्योकि फल देणे दी रित नी थी। 14 कने यीशुए उस सखे जो बोलया, “अज्जे ला बाद तेरा फल कुनी नी खाणा। कने उदे चले सुंगा दे थे।” (aiōn g165) 15 “उदे बाद यीशु कने उदे चले सै यरूशलेम शेहरे च आणे,” उनी उना लोकां जो परमेस्वर दे मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे। यीशुए पैसयां बदलने बाले मंजे जो, कने कबूतरां जो बेचणे बालयां दे पिजरयां जो बाहर सुटी दिता। 16 “कने उनी लोकां जो हुकम दिता की मंदरे दे अंगणे ला होईकरी चिजां जो लिणा बंद करा। 17 कने यीशुए उना जो बोलया, पबित्र शास्त्र ऐ बोलदा की, लोक मेरे घरे जो प्राथना दा घर बोलदे न, जिथु सारे लोक प्राथना ताई ओदे न? पर तुसां तां इसयो डाकुआं ला भस्मईयो गुफा साईं बणाईं दितया है।” 18 बड्डे याजकां कने यहूदियां दिया व्यवस्था जो सिखाणे बालयां ऐ सुणया, जडा यीशुए बोलया कने कितया, तां सै उसयो मारणे दा मौका तोपणा लग्गे, पर सै लोकां ला डरा दे थे, क्योकि सारे लोक यीशुए दियां गल्लां ने हेरान थे। 19 जालू संझा दा बेला होया, तां यीशु कने उदे चले शेहर छडी करी बैतनिय्याह ग्रां जो मुडी गे। 20 फिरी ब्यागा तडके बेले यीशु कने उदे चले यरूशलेम शेहरे जो ओआ दे थे, तालू उना अंजरी दे सखे जो दिखया तां सै सुकी गया था। 21 परतसे जो सै गल्ल याद आई, कने उनी यीशुए जो बोलया, “गूट जी, दिख। ऐ अंजरी दा सख जिसयो तू श्राप दितया था सै सारा सुकी गया है।” 22 यीशुए उसयो जबाब दिता की, “परमेस्वरे पर भरोसा रख जडा तुसां मंगे से सारा कुछ मिलणा। 23 मै तुसां ने सच्च बोलदा है, की अगर कोई इस पहाडे जो बोले की, की ऐथू ला उठ कने समुद्रे च जाई करी पेई जा, कने अपने मने च कोई शक नी रखे, पर भरोसा रखे, की जडा मै बोलदा है सै होई जा, तां उस ताई तदिया होई जाणा है। 24 इस ताई मै तुहांजो बोलदा है की जडा कुछ तुसां प्राथना करिके मंगा, तां भरोसा करी लिया की तुहांजो मिली गया है, तां सै तुहांजो मिली जाणा। 25 जालू कदी तुसां प्राथना करदे न, तां अगर तुहाडे मने च कुसी ताई बैर है, तां उसयो माफ करी दिया, इस ताई की तुहाडा पिता परमेस्वर जडा स्वर्ग च रेंदा है, उनी तुसां दे पाप माफ करी देणे। 26 पर अगर तुसां माफ नी करणे, तां तुहाडे पिता परमेस्वरे जडा स्वर्ग च है, उनी भी तुहाडा पाप माफ नी करणा।” 27 यीशु कने उदे चले यरूशलेम शेहरे जो मुडी करी आये, जालू सै मंदरे च गुमा दा था तां बड्डे याजक कने यहूदी व्यवस्था जो सिखाणे बालयां कने यहूदी अग्वे उदे बाल आये कने पछणा लग्गे, 28 “उना उसयो बोलया, ऐ कम्म तू कुसी हके ने करा दा है? कने तिजे ऐ हक कुनी दितया है?” 29 यीशुए उना जो बोलया, “मै भी तुहांजो ला इक गल्ल पछदा है, अगर तुसां मिजो जबाब दिणे, तां मै दसगा कि ऐ कम्म मै कुसी हके ने करदा है। 30 यहून्ना जो लोकां जो बपतिस्मा देणे ताई कुनी भेजया था? क्या सै परमेस्वरे भेजया था या माणुए? मिजो दसा।” 31 तालू सै अपु च बोलणा लग्गे कि अगर असां बोलया कि, “परमेस्वर जडा स्वर्ग च है उनी भेजया है, तां यीशुए सांझो ला पुछणा, कि तुसां यहून्ना पर भरोसा कुनी कितो?” 32 अगर असां बोलया की, सै माणुए दे पास्से ला आया है, तां सै जबाब नी देई सके, क्योकि सै उना लोकां ला डरदे थे, जडे ऐ मंदे थे की यहून्ना परमेस्वर दे पासे आया इक सच्चा परमेस्वरे दा संदेश देणेबाला था। 33 उना यीशुए जो जबाब दिता, सांझो नी पता कुनी यहून्ना बपतिस्मा देणेबाले जो भेजया। यीशुए उना जो जबाब दिता, “मै भी तुहांजो नी दसणा की मिजो ऐसे कम्म करणे दा हक कुनी दितया है।”

**12** इदे बाद, यीशु यहूदी अगुवां ने कहाणियां च गल्लां करणा लग्गा, इक माणुए बागे च अंगूर लाये। उनी अंगूरा दे बागे दे चारों पासे बाड लगवाया, कने इक जगा अंगूरा दे रसे जो निचोडने ताई बणाई, कने निगरानी रखणे ताई इक उचिया जगा पर कम्मरा बणाया। फिरी उनी बागे जो कुछ किसाना जो ठेके पर देई दिता, कने परदेस चली गया। 2 फिरी जालू अंगूर पक्की गे, तां उनी अपना इक नोकर ठेकेदारो बाल अपना अंगूरे दे बागे दा हिस्सा लोणे ताई भेजया। 3 पर ठेकेदारां उसयो पकडया कने मारी कुटी करी बिना कुछ दितयो खाली हथ भेजी

दिता। 4 बागे दे मालिके इक होर नोकर भेजया, ठेकेदारां उदा सिर फोडया कने उदी बेस्ती किती। 5 फिरी बागे दे मालिके इक होर नोकरे जो भेजया, कने उना उसयो मारी दिता। तां उनी होर मतयां जो भेजया, पर ठेकेदारो उना चे केईयां जो कुटया, कने केईयां जो मारी दिता। 6 हुण बागे दे मालिके बाल भेजणे ताई सिर्फ इक ही माणु था। जडा उदा अपना प्यारा जागत था। उना बाल भेजया की सै मेरे जागते दी इज्जत करणे। 7 पर उना ठेकेदारां उदे जागते जो ओदे दिखया, कने उना अपु चे सलाह किती की, ऐई तां बारिस है, इनी तां अंगूरे दे बागे दा मालिक बणना, ओआ असां इसयो मारी दिन्दे न, तां सारी जयादात साडीं होई जाणी। 8 कने उना उसयो पकडी करी मारी दिता, कने उदी लाशा जो अंगूरे दे बागे बाहर फेंकी दिता। 9 “तां हुण, अंगूर दे बागे दा मालिक क्या करगा? क्या उनी आई करी उना ठेकेदारां जो खतम करी दिगां, कने दाखां दे बागे दा ठेका कुसी होरसी जो दिगा। 10 क्या तुसां पबित्र शास्त्रे दा ऐ हिस्सा नी पढया जिदे च मसीह दी तुलना इक खास पथरे ने करदा है? सै बोलदा है, जिस पथरे जो राजमिष्रियें बेकार बोलया था कने सुटी दितया, सै ही पथर, सबना ला खास पथर बणी गया। 11 प्रभु परमेस्वरे इयोदिया किता, कने साडिया नसरा च ऐ बडा ही अनोखा है।” 12 तां उना उसयो पकडना चाया, क्योकि सै समझी गियो थे, उनी साडे बरोध च ऐ कहाणी बोलियो है। पर सै यीशुए जो पकडी नी सके क्योकि सै लोकां ला डरा दे थे, इस ताई सै यीशुए जो किल्ला छडी करी चली गे। 13 तालू उना उसयो गल्लां च फसाणे ताई केई फरीसियां कने राजा हेरोदियां दे दले दे लोकां जो उस बाली भेजया। 14 उना आई करी उसयो बोलया, “गूट जी, सांझो पता है की, तुसां हमेशा सच्च बोलदे न, कने तुसां इसा गल्ला ला नी डरदे की दुज्जे लोक तुहाडे बारे च क्या सोचदे न, कुसदी परबाह नी करदे न, क्योकि तुसां सारयां कने इकोदिया व्यवहार करदे न, तू तां परमेस्वरे दा रस्ता सचाइया ने दसदा है। तां हुण सांझो दस। क्या महाराजा जो कर देणा साडिया व्यवस्था दे खिलाफ है या नही? 15 असां जो कर देणा चाईदा या नी देणा चाईदा?” यीशुए उना दा कपट जाणी करी उना जो बोलया, “तुसां मिजो ला कुछ गलत बूलबाई करी फसाणे दी कोशिश कजो करा दे न? इक चांदी दा सिक्का मिजो बाल लेईकरी ओआ, मै उसयो दिखें।” 16 सै लेई आणे, कने यीशुए उना जो पुछया, “मिजो दसा की इस चांदी दे सिक्के च कुसदा चित्र बणया कने कुसदी मोहर लगियो?” उना बोलया, “महाराजा दा।” 17 यीशुए उना जो बोलया, “जडा महाराजा दा है, सै महाराजे जो दिया, कने जडा परमेस्वरे दा है, सै परमेस्वरे जो दिया।” तालू सै उस पर बडे हेरान होए। 18 यहूदियां दे धर्मी दल दे थोडे लोक जिना जो सट्की भी बोलदे न, तालू थोडे यहूदी अग्वे यीशुए बाल आये। कने सै भरोसा नी करदे थे, कि लोक मरणे दे बाद फिरी जिन्दे होई सकदे ने। उना यीशुए ला पुछया, 19 “गूट जी, मूसा साडे ताई लिखया है, की अगर कुसी दा भाई बिना ओलादी मरी जा, कने उदी घरे बाली जिन्दा रे, तां उदा भाई उदिया घरे बालिया सोगी बियाह करिके अपने भाई ताई बंश पैदा करे। 20 स्टुक्रियां यीशुए जो इक कहाणी सुणाई की, इक घरे च सत भाईं थे। सबते बडे भाईये इकी जनानिया ने बियाह किता, जालू सै मरी गया तां उदी कोई भी ओलाद नी थी। 21 तां दुणे भाईये उसा सोगी ही बियाह करी लिया कने सै भी बिना ओलादी मरी गया, कने इयां ही तिजे भाईये किता, 22 कने सतां भाईयां उसा ने बियाह किता कने सतो भाई बिना ओलादी मरी गे। सबना दे बाद सै जनानी भी मरी गई। 23 हुण, सांझो दस तां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?” 24 यीशुए उना जो बोलया, “तुसां दो बज्जा ने गलत न, तुसां पबित्र शास्त्र जो नी जाणदे ने जडा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे न की परमेस्वरे बाल मरयो लोकां जो जिन्दा करणे दी शक्ति है। 25 क्योकि जालू उना मरयां च जिन्दा होणा, तां उना लोका दे बियाह नी होणे; जियां स्वर्ग च रेणेबाले स्वर्गदूत बियाह नी करदे। 26 मरयां च जिन्दा होणे दे बारे च, तुसां क्या मूसा दिया कताबां च नी पढया जालू झाडिया जो अगग लागियो थी, तां उसा जगा पर क्या होया था, परमेस्वरे मूसा ने गल्ल किती कने बोलया, मै अंझाहम, इसहाक, कने याकूब दा परमेस्वर है, जिदी ऐ अराधना करदे थे। 27 तां इई तां मरयो लोकां दा परमेस्वर नी है। पर जिन्दया दा परमेस्वर है, तुसां बडे गलत न।” 28 कने यहूदी मूसा दी व्यवस्था जो सिखाणे बालयां च इकी ऐ चर्चा सुणी,

जडी यीशु कने सदुकी अपु चे करा दे थे, कने ऐ जाणी करी की यीशुऐ उना जो ठीक तरीके ने जबाब दिता, तां सै यीशुऐ बाल आया कने पुछ्या, “की परमेश्वरे जडे भी हुकम दितयो न, उना सारयां चे सारयां ला बडा हुकम कुण दिया है?” 29 यीशुऐ जबाब दिता, “सबना हुकमा ला बडा हुकम ऐ है. इस्राएल दे लोको तुसां सुणा। प्रभु साडा परमेश्वर जिसदी असां अराधना करदे न, सै इक ही प्रभु है। 30 कने तू अपणे प्रभु परमेश्वर ने अपणे सारे मने ने, कने अपणे सारे प्राणा ने, कने अपणिया सारिया अकला ने, कने अपणिया सारिया शक्तियां ने प्यार रखनयो। 31 परमेश्वर दा दुज्जा हुकम ऐ है, की जितणा तुसां अपणे आपे जो प्यार करदे न, दूजयां ने भी उतणा ही प्यार करा, परमेश्वरे इना दो हुकमा ला बड़े होर कोई हुकम नी दितया न।” 32 मूसा दिया व्यवस्था जो सिखाणे बालयां उसयो बोलया, “गूसू जी,” बिलकुल ठीक। तू सच्च बोलया है, सै ही परमेश्वर है, कने उसयो छडी करी होर कोई नी है। 33 कने उसला सारे मन, कने सारिया अकला ने, कने सारे प्राणा ने, कने सारिया ताकता ने प्यार रखणा, कने पडोसियां ने अपणयां साईं प्यार रखणा, ऐ सब परमेश्वरे जो जानकरा दियां बलियां चढाणे ला जादा जरूरी है। 34 जालू यीशुऐ दिखया की उनी सोची समझीकरी जबाब दिता, तां यीशुऐ उसयो बोलया, “तू परमेश्वरे दे राज्य च प्रवेश करणे दे नेडे है।” कने फिरी होर कुसी जो उसला कुछ पुछणे दी हिम्मत नी होई। 35 फिरी यीशुऐ परमेश्वरे दे मंदरे च उपदेश दिन्दे होये बोलया की, व्यवस्था जो सिखाणे बाले कियां बोली सकदे न की मसीह राजा दाऊदे दा बंशज है? 36 ऐथु दिकर कि राजा दाऊद, जालू परमेश्वर दी पबित्र आत्मा उसयो बोलणे दी शक्ति दिती, तां उनी बोलया, “परमेश्वरे भेरे मसीह जो अपणे बखे इज्जत मान कने हक दी पदवी च बोणे ताईं बोलया था, हालांकि उनी उदे सारे दुशमणा जो पूरी तरहा उदे अर्धन करी दिता।” 37 “ऐथु दिकर कि राजा दाऊदे भी मसीह जो प्रभु करी के बोलया, तां सै दाऊद दा बंशज कियां होया?” कने लोक उसयो बडे मजे ने सुणदे थे। 38 यीशुऐ अपणे उपदेश च उना ने बोलया, “व्यवस्था जो सिखाणे बालयां ला साबधान रिया, जडे लोकां जो दसणे ताईं लम्बे कने मेरे कपडे पाणा पसंद करदे, कने उना जो बडा पसंद है की लोक उना जो बजारां च नमस्ते करन, 39 कने यहूदी जंज घरां च खास-खास आसन पर बोणा पसंद करदे न। कने खांदे बेले खास जगा चांदे न। 40 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे ताईं बडी देरा दीकर प्राथना करदे न, परमेश्वरे ला इना जो बडी बुरी सजा मिलणी है।” 41 यीशु मंदरे दे भंडारे सामणे बेईकरी दिखा दा था की लोक परमेश्वरे दे मंदरे दे भंडारे च कियां पैसा पांदे न, कने मेरे अमीरां लोकां बडा सारा पैसा पाया। 42 इलणे च इक गरीब बिधवा आई करी दो तांबे दे सिक्के पाये, जिना दी कीमत बडी घट थी। 43 तालू उनी अपणे चेलयां जो अपणे बखे सदीकरी बोलया, “मै तुसां ने सच्च बोलदा कि इस मंदरे दे भंडारे च जितणया भी दान पाया है, उना सबना ला बदीकरी इना गरीब बिधवा पाया है।” 44 क्योंकि सबना अपणे भंडारे चे थोडा दिया दिता, पर इना गरीब बिधवा इसा बाल जितना भी था, सारा पाई दितया है।

**13** जालू यीशु मंदरे ला निकला दा था, तां उदे चेलयां चे इकी उसयो बोलया, “गूसू जी, दिख, कितणियां छेल ईमारता न कने बड़े-बड़े पत्थरां ने बणियां न कने कितणे-कितणे बड़े घर न।” 2 यीशुऐ उसयो बोलया, “तुसां इना बड़े-बड़े घरां जो दिखा दे न, इक दिन इना चे ऐथु इक भी घर नी बचणा है, ऐथु दीकर की इक पथरे उपर पथर नी रेंणा है, जडा डायनी नी जाणा।” 3 जालू यीशु मंदरे ला जैतून सखां दे पाहडे पर चली गिया कने मंदरे दे सामणे बेई गिया, तां पतरस, याकूब, यहून्ना कने अन्दियास यीशुऐ बाल आये कने तालू यीशुऐ बाल कोई नी था, कने उसला पुछ्या, 4 “सांडो दस ऐ सब कुछ कालू होणा है? कने जालू ऐ सब कुछ पूरा होणोबाला होणा तां उदा क्या निशान होणा है?” 5 यीशुऐ उना ने बोलया, ध्यान रखयो की तुहांजो कोई धोखा न दे। 6 मते सारे लोकां मेरे नाए ने दाबा करिके ओणा है। उना बोलणा है, मै मसीहा हूँ कने उना मतयाँ लोकां जो भटकणा है। 7 जालू तुसां लडाईयां, कने लडाईयां दियां गल्लां सुणणे तां डरदे मत; क्योंकि इना दा होणा जरूरी है, पर तालू संसारे दा खात्मा नी होणा है। 8 क्योंकि जातियां ने जातियां कने राज्य ने राख्या इक दुज्जे ने लडाईयां करणियां न। कने हर कुथी हिलण होणे न कने अकाल पोणे न। ऐ तकलीफ कने दुख ऐदिया होणा जदिया की जालू माँ बच्चे जो जन्म देणा लगदी है। 9 “पर तुसां जो हमेशा

चौकने रेणा चाईदा, क्योंकि लोकां तुहांजो कैदी बगाना कने यहूदी जंज घरा च देणा कने तुहांजो मार पोणी, कने मेरिया बजा ने तुहांजो हाकिमा कने राजयां सामणे न्याय ताईं महासभा च पेश करणा है, ताकि तुसां उना जो मेरे ताईं गबाई देन। 10 कने सारे देशां च, तुहांजो कने होर जडे मिजों उपर भरोसा करदे न, तुहांजो संसारे दे अंत होणे दे पेहेले सारयां लोकां जो श्भसमाचार सुणाणा है। 11 जालू तुहांजो कैदा च पाणा है, तां तुसां इदी चिंता मत करदे, की असां क्या बोलणा है। क्योंकि उस बेले पबित्र आत्मा तुसां दे जरिये गल्लां करणियां न। 12 उसी बेले, जडे लोक मिजों पर भरोसा नी करदे न, उना अपणे भाईयां जो जेला च करी लेणा, जडे मिजों पर भरोसा करदे ने सै मखाई देणे न। पिता अपणे बचयां सोगी इयां ही करणा है, कने बचयां मां-प्यो दे खिलाफ होईकरी उना जो मारी देणा है। 13 क्योंकि तुसां मेरे चले न उदिया बजा ने सारे लोकां तुसां ने बैर करणा है, पर जडे लोक मिजों पर भरोसा रखदे न कने आखरी दीकर सेहन करणा, उना दा ही उद्धार होणा है।” 14 जालू तुसां इक मसीह बिरोधी जो यरूशलेम मंदरे च खडोतयो दिखणा, जिथु उसयो नी होणा चाईदा। यहूदिया प्रदेशे दे लोकां जो जान बचणे ताईं पाडा पर नसणा पोणा। 15 जडा कोई अपणी घरे दिया छतीं पर हो, तां सै समान लेणे ताईं थले ना उतरे, ना ही अंदरे जो जा। 16 कने जडा खतरां च होऐ, सै अपणे कपडे लेणे ताईं मुडी करी घरे ना ओऐ। 17 ऐ उना जनानिया ताईं बडा बुरा बकत होणा जडियां लैरथियां न, कने उना जनानियां ताईं जडियां नियाणे जो दूध पियादियां न, उना जो अपणी जान बचाणे ताईं नसणा बडा मुशकिल होई जाणा। 18 इस ताईं प्राथना करा की ऐ बुरा बकत सर्दियां च ना हो, जालू सभर करणा मुशकिल हो। 19 क्योंकि उना दिना लोकां जो बडे दुख होणे न, उना लोकां कदी भी ऐसे दुखां दा सामणा नी कितया होणा, जालू ला परमेश्वरे संसार बणाया है। 20 अगर परमेश्वरे उस बुरे बकते जो नी घटादां, तां कोई भी माणू नी बचदा। पर उना चुणयो होए लोकां दिया बजा ला, जिना जो परमेश्वरे चुणयां है, बकत घटाणा है। 21 अगर उस बेले कोई तुसां जो बोले, की दिखा, मसीह ऐथु है। या दिखा, ओथु है। तां उदा भरोसा मत करदे। 22 क्योंकि झूठे मसीह कने झूठे परमेश्वरे दा संदेश देणेबालयां ओणा है, उना लोकां जो धोखा देणे ताईं जिना जो परमेश्वरे चुणयां है, उना चमत्कार कने अनोखे कम्म दसणे न। 23 पर तुसां चौकने रिया, दिखा मै तुहांजो सारियां गल्लां होणे ला पेहेले ही बोली दितियां न। 24 “उना दिना च, बुरा कने दुखे बाल बकत मुकी जाणे दे बाद, सूरजे च अंधेरा होई जाणा, कने च चद्रमें लौ नी देणी। 25 अम्बरे ला तारायां पेई जाणा, कने अम्बरे दियां शक्तियां हिलाईयां जाणियां। 26 तालू लोकां मिजों, माणुऐ दे पुत्रे जो धरतिया पर बदलां उपर ओंदे कने उना मेरी शक्ति कने महिमा जो दिखणा। 27 मै अपणे स्वर्गदूतां जो धरतिया पर भेजणा, ताकि सै उना सारे लोकां जो गटेरी करी, जिना जो मै चुणयां है, कने उना संसारे दे चारों पासयां ला लोका जो गटेरणा है।” 28 “अंजीर दे स्खे ला ऐ सिखा, जालू उदियां डालियां निकलदियां न कने पते निकलना लगदे न, तां तुसां जो पता लगी जांदा है, की गर्मियां दी रित नेडे ओआ दी है।” 29 जालू तुसां इना चिजां जो होंदे होये दिखणे, तां तुसां जाणी लेनयो, की सै माणुऐ दा पुत्र ओणे बाला है, कने ऐ दुःख नी है। 30 मै तुसां ने सच्च बोलदा है, इसा पीछिया दे सारे लोकां तालू दिकर नी मरणा है, जालू दिकर ऐ सब होई ना जा। 31 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न। 32 “ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मै, माणुऐ दा पुत्र, पर सिर्फ पिता परमेश्वर ही उसी रोजे कने घडिया जो जाणदा है। 33 दिखा, जागदे कने प्राथना करदे रिया; क्योंकि तुहांजो नी पता की कालू मै मुडी करी ओणा। 34 मेरा धरती छडणा कने बापिस ओणा इयां होणा है, जियां परदेस जांदे बेले अपना घर छडी जाए, कने अपणे नोकरां जो हक दे, कने सारयां जो अपना-अपणा कम्म दसी दे, कने द्वार पालां जो पेहेदारी करणे दा हुकम दिता कने उदे वापिस ओणे ताईं तैयार रे। 35 तुसां नी जाणदे न कि घरे दे मुखिया कालू मुडी के ओणा है, तां तुसां पेरादारी करनयो, क्योंकि मै घरे दा मुखिया संज्ञा जो या अधिया राती जो, या मुर्गे दिया बांगा दणे दे बेले या ब्याणा जो कालू भी आई सकदा है। 36 इयां नी होऐ की मै अचानक ओऐ कने मै इयां नी दिखणा चांदा की तुसां विना तयारी दे होना। 37 कने जडा मै तुहांजो बोलदा है, सै ही सारयां जो बोलदा है, की मेरे ओणे दीकर तैयार रिया।”

**14** दो दिना बाद फसह कने अखमीरी रोटिया दा त्योहार होणेबाला था। कने बड़े याजक कने व्यवस्था जो सिखाणे बाले इसा गल्लां दिया तोपा च थे, की यीशुए जो कियां धोखे ने पकड़ी करी मारी देना। 2 पर बोलदे थे की, “सांझो त्योहारे दे बेले ऐ नी करणा चाईदा। कुथी इयां ना हो की लोकां च रोला नी पेई जा।” 3 जालू सै बैतनिव्याह ग्रां च शमौन कोठी दे घरे था, जिसयो यीशुए कोठे दिया बिमारिया ला खरा कितया था। सै ओथु रोटी खाणा बैठया था, तां इक जनानी उदे घरे जो आई कने उना इक बोतल लांदियो थी; जडी संगमरमर दी थी, उसा बोतला च जटामासी तेले ने बणया बडा मेहणा इत्र था, कने उना बोतला दा मुह तोड़ी करी सारा इत्र यीशुए दे सिरे पर नियोरी दिता। 4 पर केई लोक मने च बोलणा लगे, “इस मेगे इत्रे जो सत्यानाश नी करणा चाईदा था। 5 कयोकि ऐ इत्र इतणा मेहणा था की, इस इत्र दी कीमत इक साले दिया मजदूरिया बराबर थी, कने इसयो बेचिकरी गरीबां जो बंडी सकदे थे।” कने सै उसा जो बुरी हाले झिडकणा लगे। 6 यीशुए बोलया, “इसा जो किली छडी दिया, इसा जो तंग करणा बंद करा, इयां तां मिजो पर इत्र णणा खरी गल्ल है। 7 गरीब तां इमेणा तुहाडे सोगी रेंदे न, कने तुसां उना ने जालू मर्जी खरा करी सकदे न, पर मैं तुहाडे सोगी सदा नी रेंणा है। 8 इना जनानिया मेरे तांई खरा कम्म कितया है, ऐ जडा कुछ करी सकदी थी, सै इना कित्ता, इना मेरे शरिर पर इत्र मलया है, इना मिजो मरणे ला पहले ही दफनाणे दी तैयारी कित्ती है। 9 मैं तुसां ने सच्च बोलदा है, सारे संसार च जिथु भी शुभसमाचार दा प्रचार होंगा, इना जनानिया जडा कितया ओथु इसा दे इस कम्मे दी चर्चा भी उसा दिया यादा च कित्ती जाणी है।” 10 तालू यहदा इस्करियोती जडा बाहरां चेलयां चे इक था, सै यीशुए जो पकडणे च सहायता करणे तांई बड़े याजकां बाल गिया। 11 सै ऐ सुणीकरी खुश होए, कने उसयो पेसे देणे जो मन्नी गे, कने सै यीशुए जो धोखे ने यहदी अगुवां दे हथे पकडणे दा तां मौका तोपा दे थे। 12 अखमीरी रोटिया दे त्योहारे दे पहले दिने, जिस रोजे फसह दी बलि दिन्दे थे, उदे चेलयां उसयो पछया, “तुसां सांझो कुथु भेजणा चांदे न की असां फसह दे त्योहारे दा खणा बणाई करी खाई सकन?” 13 उनी अपने दो चेलयां जो ऐ बोली करी भेजया, “की यस्त्रलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे चली जानयो। 14 कने सै जिस घरे जो जांगा, उस घरे दे मालिके जो बोलयो: की गुरु जी ने पछया है, की मेरा कने मेरे चेलयां दा फसह दा खणा खाने बाला कमरा कुथु है? 15 उनी तुहांजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साडे तांई तैयारी करा।” 16 दो चले निकली करी नगरे च आये कने जियां यीशुए उना जो बोलया था, तियां ही था, कने उना फसह त्योहारे दा खणा तैयार कित्ता। 17 जालू संज होई, तां यीशु बारां चेलयां सोगी उदे घरे जो आया। 18 कने जालू सै रोटी खाणा बैठयो थे, तां यीशुए बोलया, “मैं तुसां ने सच्च बोलदा है, की तुहांजो चे इकी जणे, जडा मेरे सोगी रोटी खा दा है, मिजो पकडवाणे तांई मेरयां दुशमणा दी सहायता करणी है।” 19 जालू उदे बाद उना ऐ गल्ला सुणिया तां उना पर उदासी छाई गई कने सै इक-इक करी के उसने बोलणा लगे, “क्या सै मैं है?” 20 यीशुए उना जो बोलया, “सै बाहरां चेलयां चे इक है, जडा मेरिया थालिया च डुबोई करी खा दा है। 21 कयोकि मैं, माणुए दे पुत्रे मरी जाणा है, ऐ सब कुछ पबित्र शाब्बां च लिखया है, पर उस माणुए जो बडी बुरी सजा होणी है, जडा मिजो धोखा दिन्दा है जिनी मिजो पकडवाणे च सहायता करणी है, अगर उस माणुए दा जन्म ही नी होया होंदा तां ही उदे तांई खरा होंदा।” 22 जालू सै खा दे थे, तां यीशुए रोटी लेई, कने परमेस्वरे दा धन्यवाद करी के तोड़ी, कने अपने चेलयां जो देईकरी बोलया, “खाई लिया, ऐ मेरा शरिर है।” 23 फिरी उनी दाखरस दे कटोरे जो चुकी करी परमेस्वरे दा धन्यवाद कित्ता, कने चेलयां जो दिता, कने उना सारयां उस कटोरे च पीता। 24 कने यीशुए उना जो बोलया, “ऐ दाखरस मेरा खन है, मेरा खन केईयां लोकां दी भलाई तांई बहाया जाणा है, ऐ उसा बाचा जो साबित करणा, जडा परमेस्वरे अपने लोकां सोगी कितया है। 25 मैं तुहांजो ने सच्च बोलदा है, मैं उसी दिने बाद कदी भी धाखा दा रस नी पीणा, जालू दीकर परमेस्वरे दे राज्य च नोआ दाखरस नी पी लेणा।” 26 फिरी यीशुए कने उदे चेलयां फसह दे त्योहारे दे भजन गाई करी यस्त्रलेम शहरे दे बाहर जैतन सखां दे पाहडे पर चली गे। 27 तालू यीशु पहाडे दे पासे चलया था उनी चेलयां जो बोलया, तुसां सारयां

मिजो छडी करी नसी जाणा है, कयोकि पबित्र शाब्बां च लिखया है, सै सच्च होणा है: “मैं रखवाले जो मारणा कने भेडां तितर बितर होई जाणा है।” 28 पर मैं मरी के जिन्दा होणे ला बाद तुहांजो ला पहले गलील प्रदेश च पूजणा है, कने तुहांजो ने मिलणा है। 29 पर पतरसे यीशुए जो बोलया, “चाहे सारे छडी करी नसी जांगे पर मैं नी नसगा।” 30 यीशुए उसयो बोलया, “मैं तिजो ने सच्च बोलदा है, की अज ही इसा राती मुर्गे जो दो बार बांग देणे ला पहले तू मिजो तीन बरी बोलणा है, की मिजो नी जाणदा है।” 31 पर उनी होर भी जोर देईकरी बोलया, “अगर मिजो तैरे सोगी मरणा भी पोंगा तमी मैं कदी नी बोलणा की मैं तिजो नी जाणदा।” इयां ही बाकी सारयां चेलयां भी बोलया। 32 फिरी जालू यीशु कने उदे अनुयायी गतसमनी नाए दे इक बागे च आये, कने उनी अपने चेलयां जो बोलया, “ऐथु बेई रिया, जालू दीकर मैं प्राथना करे। 33 कने यीशु पतरस, याकूब कने यहन्ना जो बागे च थोडा दिया अगो लेई गिया, कने सै बडा ही दुखी कने बेचेन होणा लग्गा, 34 कने उना ने बोलया, “मेरा मन बडा उदास है, ऐथु दीकर कि मेरे प्राण निकली चल्यो न, तुसां ऐथु स्का कने जागदे रिया।” 35 फिरी यीशु थोडा अगो गिया, कने गोडे भार बेई गिया कने मुह धरतिया पासे करी प्राथना करणा लग्गा, “की अगर होई सके तां ऐ घडी मिजो ला टली जा।” 36 कने बोलया, “पिता जी, तिजो ला सब कुछ होई सकदा है, ऐ जडा दुख ओणे बाला है, ऐ टली जाये पर जियां तुसां चांदे न तियां ही होऐ।” 37 फिरी जालू यीशु बापस आया कने तिन्न चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके? 38 जागदे कने प्राथना करदे रिया ताकि मिजो पर भरोसा रखणा नी छडन। आत्मा तां खरा करणा चांहदी है पर शरिर च जोरे दी कमी है।” 39 कने यीशु फिरी बापस चली गिया, कने सै ही बोली करी प्राथना कित्ती। 40 कने उनी फिरी आई करी उना जो सुतया दिखया, कयोकि से जागते रेईकरी बडे थकी गियो थे, जालू यीशुए उना जो जगाया कने उना जो नी पता था की उसयो क्या बोलन। 41 फिरी तीजी बरी आई करी उना जो बोलया, “हुण सोंदे रिया कने अराम करा, तुसां बडा सोई लिया हुण से बकत आई गिया है, जालू मैं, माणुए दा पुत्र पापियां दे हथे पकडया जाणा है। 42 उठा कने चला। दिखा, जिनी माणुए मिजो पकडवाणा है, सै बखे आई रिया है।” 43 जालू यीशु ऐ बोला दा ही था, तां यहदा जडा बाहरां चेलयां चे इक था, सै ओथु आया, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड़े याजकां, यहदी व्यवस्था जो सिखाणे बाले कने यहदी अगुवां भेजयो थे। 44 कने यीशुए जो पकडणे बाले यहदा उना दी सहायता कित्ती, कने उना जो पहले ही दस्सी दितया था, की जिसयो मैं गुरु बोलगा कने गले लाईकरी चुम्मी लेंगा, तां उसयो पकडी करी ढंगे ने लेई जानयो। 45 कने यहदा आया कने उनी झट यीशु दे बखे जाई करी बोलया, “गुरु जी।” कने गले लाईकरी उदी चुम्मी लेई। 46 तालू उना उसयो कस्सी करी पकडी लिया कने बन्दी बणाई लिया। 47 जडे उदे बखे खडोतयो थे, उना चे इकी जणे अपनी तलवार कडी कने महायाजके दे नोकरे पर चलाई दिती कने उदा इक कन बडी दिता। 48 यीशुए उना जो बोलया, “तुसां क्या मिजो डाकू समझीकरी तलवारां कने डांगा लेईकरी बन्दी बणाने तांई आयो? 49 मैं तां रोज ही मंदरे च तुहाडे सोगी रेईकरी उपदेश दिन्दा था, तालू तां तुसां मिजो बन्दी नी बणया पर ऐ इस तांई होया की पबित्र शाब्बां च लिखया पूरा होऐ।” 50 जालू ऐ होया तां उदे सारे चले उसयो छडी करी नसी गे। 51 इक जवान अपने नगे शरिर पर चादर ओडी करी उदे पिच्छे चली पिया; कने लोक उसयो यीशुए दा चेला समझीकरी पकडना लग्गा। 52 पर सै चादरा छडी करी नंगा ही नठी गिया। 53 फिरी सै यीशुए जो महायाजके दे घरे बाल लेई आये; कने सारे बड़े याजक, कने यहदी अगुवे कने व्यवस्था जो सिखाणे बाले ओथु गिठे होई गे। 54 पतरस भी उना दे पिच्छे-पिच्छे महायाजके दे अंगणे च जाई रिया, कने मंदरे दे सिपाईयां सोगी बेईकरी अगग तपणा लगी पिया। 55 बड़े याजक कने यहदी महासभा दे सदस्य यीशुए जो मारी देणे तांई उदे खिलाफ च गबाई तोपा दे थे, पर उना जो कोई गबाई नी मिली। 56 कयोकि मते लोक उदे खिलाफ च झुठियां गबाईयां दिन्दे थे, पर उना दियां गबाईयां इक दियां नी थियां। 57 तां कियणयां ही लोकां उठी करी उदे खिलाफ ऐ झूठी गबाई दिती। 58 “असां इसयो ऐ बोलदे सुणया है, की मैं माणुए दे बणयो मंदिर जो डाई करी तिन्ना रोजां च नोआ मंदिर बणाई लेणा, जडा हथा ने

नी बणया होणा है।” 59 ऐ गबाई भी उना दी इक देई नी निकली। 60 तालू महायाजके बिच खडोई करी यीशुऐ ला पुछया, तू कोई जबाब कनी दिन्दा? ऐ लोक तेरे खिलाफ क्या गबाई दिन्दे न? 61 पर सै चुप ही रिया, कने उनी कोई जबाब नी दिता: महायाजके उसयो फिरी पुछया, “क्या तू उस परमधन्य परमेश्वरे दा पुत्र मसीह है, जिदी असां अराधना करदे न?” 62 यीशुऐ बोलया, “हां मैं है: कने तुसां मिंजो माणुऐ दे पुत्रे जो सबते शक्तिशाली परमेश्वर दे सजे पासे हके कने बैठयो दिखणा, कने अम्बरे च बदलां सोगी ओदे दिखणा है।” 63 जालू महायाजके यीशुऐ जो ऐ बोलदे सुणया तां उनी गुप्से च अपने कपडे फाडीं दिते, कने बोलया, “हुण सांझो कुसी गबाह दी जरूरत नी है। 64 तुसां इसयो परमेश्वरे दी निंदा करदे सुणया, तुहाडी क्या सलाह है इसा गल्ला पर?” उना सारायां फेसला किता की यीशुऐ परमेश्वर दी निन्दा कितियो, इस तांई इसयो मौत दी सजा मिल्ले। 65 तालू कोई तां उस पर थुकणा लग्गे, कने कोई उदा मु ढकणा कने मुके मारणा, कने मजाक उडाई करी बोलणा लग्गे, “गुरू जी, अगर तू परमेश्वरे दा संदेश देणेबाला है, तां सांझो दस कुनी लिजो मारया, कने सिपाईयां उसयो पकडीं करी थपुड मारे।” 66 जालू पतरस थल्ले अंगणे च अगामी सेका दा था, तां महायाजक दिया नोकराणियां चे इक ओथु आई, 67 कने उना पतरसे जो अग तापदे दिखया कने उसयो ध्याने ने दिखीकरी बोलणा लग्गी, “तू भी तां इस यीशु नासरत बाले दा सोगी था।” 68 सै मुकरी गया, कने बोलणा लग्गा, मैं नी जाणदा इसयो कने मिंजो नी पता की तू क्या बोला दी है। फिरी सै बारले पासे चली गया, कने मुर्गे बांग देई दिती। 69 सै नोकराणी बखे खडोतयो बंदयां ने फिरी बोलणा लग्गी, की ऐ उदे चेलयां चे इक है। 70 पर सै फिरी मुकरी गया। कने थोडिया देरा बाद उना जडे बखे खडोतया थे, उना पतरसे जो बोलया, “पक्का तू उना चे ही इक है, जियां तू बोलदा है इसला लगदा तू भी गलील प्रदेश ला है, तू उदे चेलयां चे इक है।” 71 पतरस अपु जो कोसणा लग्गा, कसम खाणा लग्गा, की जिस माणुऐ दी तुसां गल्ल करा दे न उसयो मैं नी जाणदा। 72 तां तालू मुर्गे दुज्जी बरी बांग दिती: तालू पतरसे जो यीशुऐ दी गल्ल याद आई जडीं उसयो बोलियो थी, “की मुर्गे जो दो बार बांग देणे ला पहले तू मिंजो तिन बरी मुकरणा है।” तालू पतरस अपने दुखे जो नी संभाली पाया कने दुखी होईकरी जोर-जोर ने रोणा लग्गा।

**15** कने ब्यागा तडके होदे ही इत उना बड़े याजकां, कने यहदी अगुवां, कने व्यवस्था जो सिखाणे बालयां कने महासभा दे सारे लोकां सलाह करिके के यीशुऐ जो बनन्या, कने न्याय करणे तांई यहूदिया प्रदेश दे राज्यपाल पिलातुस दे हबाले करी दिता। 2 कने पिलातुसे उसयो पुछया, “क्या तू यहूदियां दा राजा है?” यीशुऐ उसयो जबाब दिता, “जडा तू बोला दा है, ऐ सही है।” 3 कने बड़े याजक उस पर बडियां गल्लां दा दोष ला दे थे। 4 पिलातुसे उसयो फिरी पुछया, “तू क्या कोई जबाब नी देणा है, दिख ऐ तिजो पर कितणियां गल्लां दा दोष ला दे न?” 5 यीशु फिरी चुप रिया कने कोई जबाब नी दिता, ऐ दिखीकरी पिलातुस बडा हेरान होया। 6 हर साले फसह दे त्योहारे च, पिलातुस इक केदिये जो छडीं दिन्दा था, जिसयो लोक चांदे थे की सै छुटे। 7 कने बरअब्बा नापे दा इक माणु बाकी कंतिकारियां सोगी कैदा च था, जिना रोम सरकार दे खिलाफ च लोकां दी हत्या कितियो थी। 8 कने भीड पीतालुस दे बखे आई कने उसने बिनती करणा लग्गी, कने साडे तांई इक कैदी जो छडीं दे जियां तू हरबरी करदा है। 9 पिलातुसे उना जो जबाब दिता, क्या तुसां चांदे न की, मैं तुहाडे तांई यहूदियां दे राजे जो छडीं दे? 10 कनॉकि सै जाणदा था, की बड़े याजकां यीशुऐ जो जलनिया ने पकडाया था। 11 पर बड़े याजकां लोकां दिया भिडा जो भडकाया, कि पिलातुस ला यीशु जो छडणे दी बजाये बरअब्बा जो छडणे दी मांग करा। 12 ऐ सुणीकरी पिलातुसे उना ला फिरी पुछया, “तां जिसयो तुसां यहूदियां दा राजा बोलदे न, उदा मैं क्या करे?” 13 भीडा दे लोक चिलाणा लग्गे, “उसयो सूली पर चडाई करी मारी दिया।” 14 पिलातुसे उना जो बोलया, “कजो इनी क्या बुरा कितया है?” पर भीड होर भी जोरे ने चिलाणा लग्गी की, “इसयो सूली पर चडाई करी मारी दिया।” 15 तालू पिलातुसे भिडा जो खुश करणे तांई बरअब्बा जो उना तांई छडीं दिता, कने यीशुऐ जो कोडे लगबाई करी सूली पर चढाणे तांई रोमी सिपाईयां दे हबाले देई दिता। 16 सिपाई उसयो किले दे अंदरे बाले अंगणे च लेईं गे जिसयो प्रीटोरियम बोलदे न,

कने सारिया सिपाईयां दिया पलटना जो सदी लेईं आये। 17 कने यीशुऐ दा मजाक उडणे तांई उना उसयो बैगणीं रंगे दे कपडे पेहनये, कने कंडयां दा मुकट बणाई करी उदे सिरे पर रखया, 18 कने सै यीशुऐ दा मजाक उडणे तांई उसयो ऐ बोलदे थे की, “हे यहूदियां दे राजा, नमस्ते।” 19 सै बार-बार उदे सिरे पर भारी सरकंडे ने मारदे थे, कने उदी बेजती करणे तांई उस पर थुका दे थे, कने उसयो इज्जत मान देणे तांई अराधना करणे जो गोडे भार बेईकरी उसयो नमस्ते करणे दा नाटक करा दे थे। 20 जालू सै उदा मजाक उडाई बैठे, तां उना सै बैगणीं कपडे उतारी करी उदे अपने कपडे उसयो पेहनाए, फिरी उसयो सूली पर चढाणे तांई शेहरे ला बाहर लेईं गे। 21 जालू सै शेहरे बाहर चलयो थे, तां शमौन नापे दा माणु कुरेनी ग्रांऐ ला ओआ दा था, उदे पुत्र सिकन्दर कने रफ़स थे। कने सिपाईयां शमौन जो हुकम दितया की सै सूली जो चुकी करी उसा जगा लेईं जा जिथू उना यीशुऐ जो सूली पर चढाणा था। 22 सिपाईं यीशुऐ जो गुलगुता नाए दिया जगा पर लेईं आये, जिदा मतलब है खोपडी दी जगा। 23 तालू सिपाईयां यीशुऐ जो गन्धरस नापे दी दवा, दाखरस च मिलाई करी पिणे तांई यीशुऐ जो दिता ताकि उसयो पीडा दा असर नी होए, पर उनी पिणे जो मना करी दिता। 24 फिरी उना यीशुऐ जो हथां पैरां पर किल्लां ठोकी करी सूली पर चढाया, कने उदे कपडयां तांई परिचियां पाईयां, ऐ दिखणे तांई की क्या कुसयो मिलदा है, कने कपडयां जो अपु चे बंडी लिया। 25 ब्यागा दे कोई नौ की बजे, जालू उना यीशुऐ जो सूली पर चढाया। 26 सिपाईयां यीशुऐ दिया सुलिया उपर लकडीं की पट्टी लाईं दिती। उदे च यीशुऐ दा दोष लिखया था, की ऐ “यहूदियां दा राजा।” 27 उना उदे सोगी दो डाकू, इक उदे सजे पासे कने इक उदे खबे पासे सूली पर चढाये। 28 तालू सै पबित्र शाबे दा बचन सच्च होई गया जडा मसीह दे बारे च बोलया था, की सै अपराधियां सांई गिणया जाणा, कने सै पुरा होया। 29 कने रस्ते च जाणे बाले सारे लोक सिर हिलाई-हिलाई करी, उदी ऐ बोली करी निंदा करदे थे, “वाह रे। मंदरे जो ढाणे बाले, कने तिन्ना रोजां च बणाणे बाले। 30 सूली ला उतरी करी अपने आपे जो बचाई ले।” 31 इयां ही बड़े याजक कने मूसा दी व्यवस्था जो सिखाणे बाले अपु चे मजाके च बोलदे थे, “की इनी होरनी जो बचाया, पर अपने आपे जो नी बचाई सकदा। 32 ऐ माणु जडा इस्राएल दा राजा, मसीह होणे दा दाबा करदा है, हुण सूली ला उतरी आये तां, असां दिखीकरी भरोसा करी लेणा कि ऐ साडा राजा है।” कने जडे उदे सोगी दो जणे सुलिया पर चढाये थे, सै भी उदी निंदा करा दे थे। 33 दोपहर बाहरा बजे ला तिन्ना बजे दीकर सारे देशे च नेहरा होई गया। 34 दोपेरा दे तिजे पेहर यीशुऐ बडे जोरे ने पुकारी करी बोलया, “इलोई, इलोई, लमा शबक्तनी?” जिसदा मतलब है, “भेरे परमेश्वर, भेरे परमेश्वर, तू मिंजो कजो छडीं दिता?” 35 कने कुछ लोक जडे उदे बखे खडोतयो थे, उना सुणया जडा यीशुऐ बोलया पर सै समझे नी कने बोलणा लग्गे, “दिखा, ऐ एलियाह जो सहायता तांई पुकारा दा है।” 36 कने उना लोकां च इक जणा दौडी करी गया कने उनी स्पंज लेईं करी सिरके च डुबाया, कने सरकंडे दे उपर बन्नी करी यीशुऐ जो चुसाया, कने बोलया, “स्की जा कुछ मत करा, दिखदे न की, एलियाह इसयो उतारणे तांई ओदा है की नी।” 37 तालू यीशु बडे जोरे ने बोली करी मरी गया। 38 कने सै मोटा परदा जडा मंदरे च टंगया होया था, जडा सारायां जो परमेश्वर दी मोजुदगी च अंदर ओणे जो रोकदा था, उपरे ला थले दीकर फटी गया कने उदे दो टुकडे होईं गे। 39 जडा सुबेदार उदे सामणे खडोतया था, उनी जालू यीशुऐ दी पुकार सुणी कने उसयो दिखया की सै क्रियां मरया, तां उनी बोलया, “सच्ची ऐ माणु, परमेश्वरे दा पुत्र था।” 40 कने केई जनानिया भी दुरे ला दिखा दिया थियां: उना चे इक मरियम भी थी जडीं मगदल नापे दे शेहरे ला थी, सलोमी कने मरियम जडे छोटा याकूब कने योसेस दी मां थी। 41 जालू सै गलील प्रदेशे च था तां सै उदे पिच्छे चलदियां थियां, कने उदी सेबा करदियां थियां, कने होर भी मतियां जनानिया थियां, जडियां उदे सोगी यरुशलेम शेहर च आईयां थियां कने सै उसयो दुरे ला दिखा दिया थियां। 42 जालू संज होईं गेईं, तां इस तांई की सै तैयारिया दा दिन था, जडा सब्ते दे इक रोज पहले होँदा है। 43 अरिमतिथिया शेहरे दा रेहणे बाला यूसुफ नापे दा इक माणु था, सै यहूदी सभा दा इक बडा मनया तनया मंत्री था, कने अपु भी परमेश्वरे दे राज्य दी नियाल रखदा था। सै हिम्मत करिके पिलातुस बाल गया कने उनी यीशुऐ दी लाश दफनाणे तांई मंगी। 44 पिलातुस जो



भरोसा नी होया, की यीशु इतणी तोल्ली मरी गया, कने उनी सुबेदारे जो सदीकरी पूछया, की क्या ऐ सचच है, की यीशुऐ मरयो बडी देर होई गियो है? 45 जालू उनी सुबेदारे ला हाल पता करी लिया, तां पिलातसे यूसुफे जो लाश लेई जाणे दी अनुमति देई दिती। 46 तालू उनी इक मलमल दी चादरा च लपेटी लिया, कने दफनाणे तांई कबरां च रखया कने सै कबर चट्टाना जो कटी करी बणाईयो थी, कने उनी कबरां दा मु बंद करणे तांई इक गोल पथर लुडकाई करी रखी दिता। 47 मरियम जडी मगदलीनी शेहरे ला थी कने योसेस दी मां मरियम दिखा दियां थियां की, सै कुथु रखया है।

**16** अगली संझा जालू सब्ते दे दा रोज होई गया, तां उना जनानियां जिना दे नां मरियम मगदलीनी, याकूबे दी मां मरियम, सलोमी उना सुगंध बालियां चिंजा खरीदियां, ताकि यीशुऐ दिया लाशा पर मलन, क्योंकि ऐ सारा यहदियां दा रिती रिबाजा था। 2 ब्यागा तडके तुआरे बाले दिने, सै कबरां पर गियां, 3 कने अपु चे बोला दियां थियां की, “साडे तांई कबरां दे रखयो बडे कने भारी पथरे जो कुण हटंगा?” 4 पर जालू उना यीशुऐ दी कबरा पास दिखया, तां दिखया की सै पथर तां पेहले ला ही हटया होया है। 5 कने जालू सै कबरा दे बखे पुजियां कने अंदर गियां, उना ओथु इक नौजवान जागते जो चिट्टे चमकदार कपडे पाई करी उदे सजे पास बैठया दिखया, कने सै बडियां हेरान होईयां कने डरी गियां। 6 उनी जवान माणुऐ उना जनानियां जो बोलया, डरा मत, तुसां यीशु नासरत बाले जो तोपा दियां न, जिसयो सूली पर चढाया था। सै जिन्दा होई गया है, ऐथु नी है; दिखा ऐ सेई जगा है, जिथु उना उसयो रखया था। 7 पर हण तुसां जा, कने ऐ गल्लत तुसां पतरस कने यीशुऐ दे बाकी चेलयां जो बोला की यीशुऐ तुहांजो ला पेहले गलील प्रदेशे जो जाणा है, जियां उनी तुहांजो ने बोलया था, तुसां उसयो ओथु दिखणा है। 8 जालू उना ऐ सुणया, तालू सै कबरां ला निकली करी नटी गियां क्योंकि सै घबराई करी कमी पियां थियां। कने उना रस्ते च कुसी होरसी ने कुछ नी बोलया।

**9 (note: The most reliable and earliest manuscripts do not include Mark 16:9-20.)** हफते दे पेहले तुआरे ब्याग होंदे ही सै जिन्दा होईकरी सबना ला पेहले यीशु मरियम मगदलीनी जो मिल्ला, जिसा चे उनी सत बुरियां आत्मा कडियां थियां। 10 सै यीशु दे चेलयां बाली गई, चेले बडे भरी गमे च थे कने रोआ दे थे, उना जडा कुछ उना दिखया था, सै उना जो सुणया। 11 पर जालू उना उसा ला सुणया की यीशु जिन्दा है, कने उना उसयो दिखया है, उना भरोसा नी किता। 12 उदे बाद यीशु दुज्जे दो होर चेलयां सामणे आया, जडे यस्शलेमे शेहरे ला अपणे घरे जो ओआ दे थे, पर पेहले उना उसयो नी पछाणा, क्योंकि उदी भेस भुशा पेहले ला लग थी। 13 जालू उना जाणी लिया सै कुण है, तालू सै दौडी करी दुज्जयां जो दसणा गे, पर उना भी भरोसा नी किता। 14 इदे बाद यीशु उना गयारां चेलयां जो भी मिल्ला, जालू सै रोटी खाणां बैठयो थे, तां यीशुऐ उना जो झिडकया, क्योंकि यीशुऐ जो जिन्दा होणे बाद दिखया, फिरी भी उना भरोसा नी कितया था। 15 कने यीशुऐ उना जो बोलया, “तुसां सारे संसार च जाई करी लोकां जो परमेस्वर दे शुभसमाचार दा प्रचार करा। 16 जडा कोई मिजों पर भरोसा करगा कने बपतिस्मा लेंगा परमेस्वरे उसयो उदे पापां दी सजा ला बचाणा, पर जडा मिजो पर भरोसा नी करगा तां उसयो सजा मिलणी है। 17 कने जडे लोक मिजों पर भरोसा करगे सै चमत्कारी निशाण उना दे बाली होणे न, उना मेरे नाए ने बुरियां आत्मा जो कडणा, कने मै उना जो नोईयां-नोईयां भाषा बोलणे दे काबील बणाणां। 18 मै उना जो बचाणा है, जडे सप्पां जो भी चुकी लेंगे, कने जहरीली चीज भी पी लेंगे, मै तमी उना जो मरणा नी दिगां, उना बिमारां पर हथ रखणा कने उना जो मेरे नाए ला खरा करणा है।” 19 तालू उदे बाद प्रभु यीशु उना ने गल्लां करणे बाद परमेस्वरे यीशुऐ जो स्वर्ग च सदी लिया, कने यीशु परमेस्वरे दे सजे पास इज्जत बाले सिहांसन पर बैठी गया। 20 तालू चेले सारयां पासो गे कने हर जगा परमेस्वरे दा प्रचार किता, कने प्रभु उना सोगी कम्म करदा रिया, कने उना चमत्कारां दे जरिये जडे सोगी-सोगी होंदे थे, बचना जो पुरा करदा रिया। आमीन।

# लूका

**1** श्रीमान थियुफिलसुस ताई मतयां लोकां साडे बिच होइयां घटना दे बारे च इक दस्तावेज लिखणे दी कोशिश कितियो है। 2 उना बिलकुल सेई लिख्या जडा सान्झो उना लोकां दसया था, जिना शुरू ला ही थीशुए दी सेबकाई जो अपणी हखी ने दिख्या था कने जडे बादे च परमेश्वरे दे बचने दे सेवक बणे। 3 इस ताई श्रीमान थियुफिलसुस में भी इना सारियां गल्लां दी जांच परख किती कने मिजो ऐ टीक लग्गा की तुहाडे ताई इना घटना जो क्रमानुसार लिखे। 4 मैं ऐ इस ताई करा दा ताकि तुहांजो हर उसा गल्ला दा पता पुरिया सचाइया ने लग्गे जडियां लोकां तुहांजो दसियां न। 5 जालू हेरोदेस यहदिया प्रदेश दा राजा था, अबिय्याह दी टोलिया च जकर्याह नाए दा इक याजक था, कने उदी घरे बालिया दा ना एलीशिबा था कने सै भी इझाएल दे पेहले याजक हासन दे बंशे ला थी। 6 सै दोयो ही परमेश्वरे दे सामणे धर्मी थे, कने सै प्रभु दे सारे हुकम कने नियम पर सच्चे चलणे बाले थे। 7 पर उना दी कोई ओलाद नी थी, क्योंकि एलीशिबा बच्चा पैदा नी करी सकदी थी, कने सै दोयो ही बूढ़े थे। 8 इक दिन जालू जकर्याह यरुशलेम शेहरे दे मंदरे च परमेश्वरे दे सामणे याजके दे स्पे च सेबा करा दा था, क्योंकि उस हप्ते उदिया टोलिया दी याजक सेबा दी बारी थी। 9 याजकां दे पची पाणे बाले रिबाजे दे हिसावे ने जकर्याह दे नाए दी पची निकली की प्रभु दे मंदरे च जाई करी धूब बाल्ले। 10 जालू सै धूप लगाणे दे बेले सारे लोक बाहर अणणे च खडोई करी प्राथना करा दे थे। 11 तालू जकर्याह जो प्रभु दा स्वर्गदूत धुणे दिया बेदिया दे संजे पास खडोतया दुसा। 12 कने जकर्याह उसयो दिखीकरी घबराई गया कने सै बडा भरी डरी गया। 13 पर स्वर्गदूते उसयो बोलया, “ओ जकर्याह डर मत क्योंकि परमेश्वरे तेरी प्राथना सुणी लिइयो है, तेरिया घरे बालिया एलीशिबा इक जागत जमणा है, कने तू उदा ना यहन्ना रखयां। 14 कने तिजो खूशी होणी: कने मते लोकां उदे पैदा होणे दिया बजा ने खूश होणा। 15 क्योंकि उनी परमेश्वरे दे सामने बडा महान होणा; कने उनी कदी भी कोई ऐसी चीज नी खाणी पिणी जिसने कोई नशा होंदा है; कने उनी अपने पैदा होणे ला पेहले ही पबित्र आत्मा ने परिपूर्ण होई जाणा है। 16 कने उनी इझाएलियां च मतयां लोकां जो उना दे प्रभु परमेश्वरे दे बाल बापस लोणा है। 17 यहन्ना इक ऐसा माणु होणा है उनी परमेश्वरे दा संदेश देणेबाले एलियाह सांई आत्मा च शक्तिया ने भरपूर होणा है कने प्रभु दा रस्ता तैयार करणा है। ताकि माता पिता दा मन बाल बचयां दे पास फेरी दे, कने हुकम नी मनणे बालयां जो धर्मियां सांई जीणा सिखाणा; कने प्रभु ताई इक खरी प्रजा तैयार करे। 18 जकर्याह स्वर्गदूते ला पुछया, ऐ मैं किया यकीन करे की साडे ने ऐसा होणा? क्योंकि मैं तां बुढ़ा है, कने मेरी घरे बाली भी बूढ़ी होई गियो है।” 19 स्वर्गदूते उसयो जबाब दिता, “मैं जिब्राईल है, जडा परमेश्वरे दे सामने खडोई रेंदा है, कने मिजो तेरे ने गल्लां करणा कने तिजो ऐ शुभसमाचार सुणाणें तांई भेजया है। 20 कने दिख जीस दिने दीकर ऐ बच्चा पैदा नी होंगा कने मेरियां बोलियां गल्लां सही बकत पर पुरियां नी होंगिया उसी रोजे दीकर तिजो ला बोली नी होंगा, क्योंकि जडियां गल्लां मैं तिजो बोलियां न तू उना गल्लां दा भरोसा नी किता।” 21 लोक जकर्याह जो निर्याला दे थे क्योंकि याजक मंदरे च धुप लगाणे बाद बाहर आई करी लोकां जो आशीर्वाद दिन्दा था, पर उसयो बडी देर होई गेई थी अंदर, तां लोक बडे हेरान होऐ। 22 जालू सै मंदरे ला बाहर आया, तालू सै उना ने बोली नी सकया, तालू सै समजी के, की इसयो मंदरे च कोई दर्शन होया है, कने सै उना ने इशारे च गल्लां करा दा था, सै गूणा होई गिया। 23 जालू मंदरे च उदिया याजक सेबा दे दिन पूरे होई गे, तां सै यरुशलेम शेहरे ला अपने घरे जो चली गिया। 24 कुछ दिना बाद उदी घरे बाली एलीशिबा लेरथी होई; कने पंज महीने दीकर अपने आपे जो लोकां ला लुकाई रखया। 25 की प्रभुऐ मेरे तांई भला कम्म किता है, माणुआं च मेरिया बांजपन दिया बदनामिया जो दूर करणे तांई इना दिना च प्रभुऐ मेरे उपर कृपा करिके मिजो तांई ऐसा किता है। 26 जालू एलीशिबा जो छेमा मिना लगया था तालू परमेश्वरे दिया तरफा ला जिब्राईल स्वर्गदूत गलील प्रदेश दे नासरत शेहरे च इक कुवारिया बाल गिया, 27 जिसा दी मंगणी राजा दाऊदे दे बंशे दे यूसुफ नाए दे इक मरदे ने होईयो थी; उसा कुवारिया दा ना मरियम था। 28 कने स्वर्गदूते अन्दर आई करी उसा जो बोलया, “खूशी कने तेरी जय हो,

परमेश्वरे तिजो पर कृपा किती है! परमेश्वर तेरे सोगी है।” 29 सै इस बचने ला बडी घबराई गेई, कने सोचणा लगणी की इसा गल्ला दा क्या मतलब है? 30 स्वर्गदूते उसा जो बोलया, “हे मरियम, डर मत, क्योंकि तिजो पर परमेश्वरे दी कृपा होईयो है। 31 कने दीख, तू लेरथिया होणा है, कने तिजो इक जागत पैदा होणा है; कने तू उदा ना यीशु रखयां। 32 कने उनी बडा महान होणा; कने उसयो परमेश्वरे दा पुत्र बोलया जाणा; कने प्रभु परमेश्वरे उसयो उदे पूर्वज दाऊदे सांई राजा बणाना है। 33 कने उनी इझाएल दे लोकां पर हमेशा राज करणा; कने उदे राज्य दा कदी अंत नी होणा।” (aiōn 1615) 34 मरियमा स्वर्गदूते जो बोलया, ऐ कियां होणा? मेरा तां अजे बियाह भी नी होया है। 35 स्वर्गदूते उसा जो जबाब दिता, पबित्र आत्मा तिजो पर उतरणा है, कने परमेश्वरे दिया शक्तिया तिजो पर छां करणी है, तांई तां तेरा जन्म लेणे बाला जागत पबित्र होणा है, सै परमेश्वरे दा पुत्र बोलया जाणा। 36 कने सुण तेरी रिशतेदार एलीशिबा दे भी बूडे बारे बच्चा होणेबाला है, ऐ इसा दा छेमा महिना है जिसा जो लोक बांज बोलते थे। 37 क्योंकि परमेश्वर सब कुछ करी सकदा है। 38 मरियमा बोलया, “दीख, मैं प्रभु दी दासी है, जियां तू बोलया है सेई मेरे सोगी हो।” तालू स्वर्गदूत ओथु ला चली गिया। 39 कुछ दिना बाद मरियम उठी करी यहदिया प्रदेश दे इक पाहडी इलाके दे इकी गां जो गेई। 40 कने जकर्याह दे घरे पुजिकरी एलीशिबा जो नमस्ते किते। 41 जियां ही एलीशिबा मरियमा दे नमस्ते सुणे, तियां ही बच्चा उसा दे पेटे च उछली पिया, कने इलीशिबा पबित्र आत्मा ने परिपूर्ण होई गेई। 42 कने तिन्ना बडे जोरे ने बोलया, “तू सारियां जाननियां चे बडी भरी धन्य है, कने जडा बच्चा तू जमणा है सै धन्य है। 43 कने मैं बडी सोभावशाली है, की मेरे प्रभु दी मां मिजो ने मिलणा आई है? 44 दिख जियां ही तेरे नमस्ते बोलणे दी अबाज मेरे कना च पेई तियां ही मेरे पेटे च बच्चा खुशिया ने उछली पिया। 45 कने तू धन्य है, क्योंकि तू भरोसा किता जडियां गल्ला प्रभुये दी तरफा ने बोलियां न, कने सै परमेश्वरे पुरियां करणियां न।” 46 तालू मरियमा बोलया, मैं परमेश्वरे दी स्तुति करदी है। 47 कने मैं अपने उदार करणे बाले परमेश्वरे ला बडी खुश है। 48 क्योंकि उनी मिजो अपणिया दासियां दिया दीनता पर नजर किती है; इस तांई दिखा, हण सारे युगां-युगां दे लोकां मिजो धन्य बोलणा है। 49 क्योंकि उनी अपणिया शक्तिया ने मिजो तांई बूढ़े-बूढ़े कम्म कितयो न, कने उदा ना पबित्र है। 50 जडे परमेश्वरे दा डर मंदे न, उना पर उदी दया पीढियां ला पीढियां दीकर बणी रेंदी है। 51 उनी अपणी महान शक्ति ने बूढ़े-बूढ़े कम्म किते न, कने जडे बडे घमंडी थे उना जो हराई दिता। 52 परमेश्वरे राजयां ला राज करणे दा हक लेई लोणा है; कने गरीबां जो उच्चा करदा है। 53 उनी भुरघ्यां जो खरियां-खरियां चीजा ने रजाया, कने अमीरां जो खाली हथ कडी दिता। 54 परमेश्वरे साडे पूर्वजां ने कितयो बायदे जो याद किता कने अपने सेवक इझाएल दे लोकां दी मदद करणा आया है। 55 उनी अब्राहम जो कने उदे सारे बंशजा जो हमेशा तांई दया दसणे तांई याद कितया है! (aiōn 1615) 56 मरियम पूरे तिन मिहने उसा सोगी रेईकरी घरे जो बापस गेई। 57 तालू एलीशिबा दा बच्चा पैदा करणे दा बकत पूरा होया, कने उना इक पुत्र जमया। 58 उसा दे पडोसियां कने रिशतेदारां ऐ गल्ल सुणीकरी की प्रभुये उसा पर बडी बडी दया किती है, कने सै उसा सोगी बडे खूश होऐ। 59 कने जालू सै अठमे रोजे उदा खतना करणे तांई आये। तालू सै उदा ना उदे पिता दे नाए पर जकर्याह रखणा लगे, 60 तां उदिया माता एलीशिबा बोलया, “नी; इदा ना यहन्ना रखा।” 61 उना उसा जो बोलया, “ऐ ना तां तेरिया रिशतेदारिया च कुसी दा भी नी है।” 62 तालू उना उदे पिता जो इशारा करी के पूछया की तू इदा ना क्या रखणा चांदा है? 63 कने उनी लिखणे बाली पट्टी मंगाई करी लिखा, इदा ना यहन्ना है, कने सारे हेरान होऐ। 64 तालू ही उदी अबाज बापस आई गेई; कने सै परमेश्वरे दा धन्यबाद करणा लग्गा। 65 कने उदे अखे-बखे दे लोकां पर डर बेठी गिया; कने उना सारियां गल्लां दी चर्चा यहदिया प्रदेशे दे पाहडी इलाकयां च फेली गेई। 66 कने सारयां सुणेने बालयां लोकां अपने मने च बिचार करिके बोलया, ऐ बच्चा कदिया होंगा? “क्योंकि इदे सोगी प्रभु दी शक्ति है। 67 कने उदा पिता जकर्याह पबित्र आत्मा ने परिपूर्ण होई गिया, कने भविष्यवाणी करणा लग्गा। 68 प्रभु, इझाएल दे परमेश्वर दी स्तुति करा, क्योंकि सै अपने लोकां जो मिलणा आया है, कने अपने लोकां जो छुडायो है। 69 जडा प्रभु दे सेवक, राजा दाऊद दा बंशज है उनी साडे

ताईं इक शक्तिशाली उद्धार करणे बाले जो भेजया है। 70 बडे पहेले प्रभुये अपने पबित्र परमेश्वरे दा संदेश देणेबाले दे जरिये बोलया, जडे संसार दे आदि ला होदि आये न, मतलब की उनी सांझो साडे दुश्मणा ला कने उना सारियां शक्तियाँ ला बचाणा जडे सान्झो ने नफरत करदे न। (aiōn g165) 72 उनी अपने पबित्र बायदे जो याद करिके साडे पूर्वजां पर दया करणी, 73 उनी साडे पूर्वज अब्राहम ने कसम खाई करी बायदा किता, 74 की उनी सांझो साडे दुश्मणा ला बचाणा, 75 ताकि असां उदे सामणे पबित्रता, धार्मिकता कने बिना कुसी डरे जिन्दगी भर उदी सेवा करी सकन। 76 कने हे बच्चे, तिजो परम प्रधान परमेश्वरे दा संदेश देणेबाला बोलया जाणा है क्योंकि तू प्रभु दे अग्रे-अग्रे चलणा कने माणुआं जो तैयार करणा, 77 कने इनी अपने लोकां जो सिखाणा की पापा दी माफ़ी दे जरिये छुटकारा पाई सकदे न। 78 ऐ साडे परमेश्वरे दिया उसा दया ने होणा है; जियां सूरज सांझो रोशनी देणे ताईं चमकदा है, तियां ही मसीह भी साडे बाल स्वर्ग ला ओणा है। 79 पाप च कने मोता दी छोआं च बोणे बलयां जो रोशनी देणी है, इना रोशनिया सान्झो जिन्दगी च मार्गदर्शन करणा, जडा सांझो परमेश्वर सोणी शक्ति दिन्द्या है।” 80 कने सै जागत यूहन्ना बडा होईकरी आंकां च बलशासी होंदा गिया, कने इझाएल दे लोकां दे सामणे ओणे दीकर सै सुनसान जगा च रिया।

**2** उना दिना च रोमी महाराजा औगुस्तस कैसरे सारे रोमी सम्राज्य दी जनगणना करणे दा हुकम दिता। 2 ऐ पैली जनगणना उस बेले होई, जालू क्विरिनियस सीरिया प्रदेश दा राज्यपाल था। 3 कने सारे लोक जनगणना च ना लिखाणे ताईं अपने-अपणे शेहरे जो गे जिथु उना दे पूर्वज थे। 4 यूसुफ भी ताईं तां गलील प्रदेश दे नासरत शेहरे ला यहूदिया प्रदेशे दे राजा दाऊद दे शेर बैतलहम शेहरे जो गिया था, क्योंकि सै राजा दाऊद दा बंशज कने परिवारे दा था। 5 ताकि अपनी मंगैत मरियम जडी लेरथी थी, उसा सोगी जाई करी ना लिखाइ दे। 6 जालू सै बैतलहम शेहरे च थे तां उसा दे बच्चा जमणे दे दिन पुरे होई गे। 7 कने उना अपना जेठा पुत्र जमया कने उसयो कपडे च लपेटि करी खुरलिया च रखया; क्योंकि उना ताईं सरां च जगा नी थी। 8 कने उस देशे च कुछ पुआल थे, जडे मैदाना च रेईकरी अपने धंणे दा पैरा दिन्दे थे। 9 कने प्रभु दा इक स्वर्गदूत उना बखे आई खडोता; कने प्रभु दी चमक उना दे चारो पासे चमकी, कने सै बडे डरी गे। 10 तालू स्वर्गदूते उना ने बोलया, “डरा मत; दिखा मै तुहांजो इक बडी खुशिया दा शुभसमाचार सुणांदा है; जडा सारे लोकां ताईं होणा, 11 की अज राजा दाऊद दे शेर बैतलहम च तुहाडे ताईं इक उद्धारकर्ता जमया है, सेई मसीह प्रभु है। 12 मै तुहाडे ताईं उना दी ऐ पछेण दिन्द्या की सै बच्चा कुण है, तुहांजो इक बच्चा फालडु च लपेटया कने खुरलिया च पिया मिलणा है।” 13 तालू उस स्वर्गदूते सोगी इक स्वर्गदूतां दी टोली परमेश्वरे दी स्तुति कने ऐ बोलेद होए प्रगट होई, 14 “स्वर्ग च परमेश्वरे दी महिमा कने धरतिया पर जिना लोकां ला सै खुश हे शांति हो।” 15 जालू स्वर्गदूत उना बखे ला स्वर्ग जो चली गे, तालू पुआलां अपु चे बोलया, “ओआ, असां बैतलहम शेहरे च जाई करी ऐ गल्ल जडी होइयो है, कने जडा प्रभुये सांझो ने दसया है, उसयो दिखन।” 16 कने उना झट पट जाई करी मरियम कने यूसुफ जो कने खुरलिया च उस बच्चे जो पिया दिखया। 17 इना जो दिखीकरी उना सै गल्लां जडियां उस बच्चे दे बारे च स्वर्गदूतां ने बोलिया थी, सै सबना जो दसणा लग्गे। 18 कने सारे लोकां जालू ऐ गल्लां सुणियां जडियां गल्लां उना पुआलां बोलियां, तां सै बडे हेरान होऐ। 19 पर मरियम इना सारियां गल्लां जो मने च रखीकरी सोचदी रेई। 20 कने जियां उना स्वर्गदूतां पुआलां जो बोलया, तियां ही सारा सुणिकरी कने दिखीकरी परमेश्वरे दी महिमा कने स्तुति करदे बापस चली गे। 21 जालू यीशुऐ जो पैदा होयो अठ रोज पुरे होऐ, कने उदे खतने दा बकत आया, तां उदा ना यीशु रखया, जडा स्वर्गदूते उदे पेटे च ओणे ला पहेले बोलया था। 22 जालू मूसा दिया व्यवस्था दे अनुसार उना दे शूद्र होणे दे दिन पुरे होऐ तां सै उसयो यरूशलेम शेहरे दे मंदरे च लेई गे, ताकि उसयो प्रभु दे सामणे लेई ओन। 23 जियां की मूसा दिया व्यवस्था च लिखया है: “हर जेठा पुत्र प्रभु ताईं पबित्र होणा।” 24 मूसा दिया व्यवस्था दे बचना दे अनुसार, “पंडुकों दा इक जोडा, या कबुतरां दे दो बच्चां दी बलि दिया।” 25 उस बकते यरूशलेम शेहरे च शमौन नापे दा इक माणु था। कने सै माणु बडा धर्मी कने भक्त था। कने बडिया बेसबरिया ने मसीह दे ओणे दी नियाल रखा था की सै आये कने इझाएल दे लोकां

जो तसल्ली दे, कने पबित्र आत्मा उस सोगी थी। 26 कने उसयो पबित्र आत्मा दसया था कि, तू प्रभु दे मसीह जो दिखणे ला पहेले मरणा नी है। 27 उस दिन उसयो आत्मा अगुवाई किती तां सै मंदरे च आया। कने जालू माता-पिता यीशुऐ जो अंदर लेई आये, ताकि उस ताईं व्यवस्था दे रीती रिबाजां दे अनुसार करन, 28 तां उनी बच्चा यीशु जो गोदा च लिया कने परमेश्वरे दा धन्यवाद करिके बोलया, 29 प्रभु जी, हण तू मिंजो अपने सेवके जो अपने बायदे दे अनुसार शांतिया ने मरणा दे; 30 क्योंकि मै उस उद्धारकर्ता जो दिखी लिया है। 31 जिसयो तू सारे लोकां जो बचाणे ताईं भेजया है। 32 ताकि सै होर जातियां जो परमेश्वरे दा रस्ता दसणे ताईं लौ बणे, कने तेरे अपने लोक इझाएल दी महिमा करन। 33 कने यीशुऐ दे माता पिता उना गल्लां जो जडियां शमौने उदे बारे च बोलियां, सै उना गल्लां ने बडे हेरान हुंदे थे। 34 तालू शमौने उना जो आशीष देईकरी, उदिया माता मरियम ने बोलया, दिख, सै तां इझाएल च मतयां लोकां दे विनाश कने उद्धार ताईं, इसयो परमेश्वरे दिया तरफ ला इक नशाण दे स्पे च भेजया है, जिदे खिलाफ च गल्लां कितियां जाणियां न। 35 इक भयंक दूखे कने इक तलबारा साईं किनी देणा इसला मतयां लोकां दे दिले दे बिचार सामणे होणे न। 36 कने आशेर दे गोत्र ला हन्नाह नापे दी फनुएल दी इक कुडी परमेश्वरे दा संदेश देणेबाली थी: कने सै बडी बड्डी थी, सै बियाह होणे ला सतां साला दीकर अपने घरे बाले ने रेई सकी थी। 37 सै चोरासियां सालां दी बिधवा थी: कने सै मंदरे जो नी छडती थी पर दिन रात बरत कने प्राथना करी-करी भक्ति करदी थी। 38 सै उस बेले ओथु आई करी परमेश्वर दा धन्यवाद करणा लग्गी, कने उना सारयां ने, जडे यरूशलेम शेहरे दे लोकां जो छुडाणे ताईं मसीह जो भेजणे ताईं परमेश्वरे दी हर दिखदे थे, उदे बारे च गल्लां करणा लग्गी। 39 कने जालू यूसुफ कने मरियम प्रभु दीया व्यवस्था दे अनुसार सारा कुछ करी बेठे तां सै गलील प्रदेश च अपने शेहर नासरत जो बापस चली गे। 40 बच्चा बडा कने जौरे बाला होंदा गिया; कने अकला बाला होंदा गिया; कने परमेश्वरे दा अनुग्रह उस पर था। 41 यीशुऐ दे माता पिता हर साल फसह दा त्योहार मनाणे ताईं यरूशलेम शेहरे जो जांदि थे। 42 जालू सै बहारां सालां दा होया, तालू सै त्योहारे दे रिबाजे ने अनुसार यरूशलेम शेहरे जो गे। 43 जालू यीशुऐ दे माता-पिता उना दिना जो पूरा करिके के बापस ओणा लग्गे, तां सै जागत ओथु यरूशलेम शेहरे च ही रेई पिया, कने उदे माता पिता जो इसा गल्ला दा पता नी था। 44 सै ऐ समझीकरी, की सै होर यात्रियां सोगी होंणा, कने इक दिन होई गिया कने सै अपने रिश्तेदार कने जान पछेणा बालयां च तोपणा लग्गे। 45 पर जालू नी मिल्ला, ता सै तोपदे-तोपदे यरूशलेम शेहरे जो बापिस चली गे। 46 कने तिन्ना रोजां बाद उना उसयो यरूशलेम शेहरे दे मंदरे दे अंगणे च उपदेशकां दे बिच बैठया, कने उना जो सुणदे कने उना ला सबाल पुछे दिखया। 47 कने जडे भी उसयो सुणा दे थे, सै उदिया समझा कने उदे जबाबा ला हेरान थे। 48 तालू यीशुऐ दे माता पिता उसयो दिखीकरी हेरान होऐ, कने उदिया माता उसयो बोलया, “पुत्र, तू सांझो ने इयोदिया व्यवहार कजो किता? दिख, तेरे पिता कने मै, तिजो तोपा दे कने बेचेन थी।” 49 उनी उना ने बोलया, “तुसां मिंजो कजो तोपा दे थे? कजा तुहांजो पता नी था, की मिंजो अपने पिता दे घरे होना जरूरी है?” 43 जालू गल्ल उनी उना ने बोली, उना सै गल्ल समझी नी। 51 तालू सै उना कने गिया, कने नासरत नगर च आया, कने उना दे कुले च रिया; कने उदिया माता ऐ सारियां गल्लां मने च रखियां। 52 कने यीशु अकला कने डील-डौल च कने परमेश्वर कने माणुऐ दे अनुग्रह च अग्रे बढदा गिया।

**3** रोमी महाराजा तिबिरियस कैसर दे राज्य दे पदमं साले च, जालू पुन्तियस पिलातस यहूदिया प्रदेश दा राज्यपाल था, कने गलील प्रदेश च राजा हेरोदेस राज करा दा था कने इतुरैया कने त्रखोनितिस दे इलाके च उदा भाई फिलिप्पस, कने अबिलेने प्रदेश च राजा लिसानियास राज्य करा दे थे। 2 कने जालू हन्ना कने कैफा बड्डे याजक थे, उस बकते परमेश्वरे दा बचन सुनसान जगा च जकर्याह दे पुत्र यूहन्ना बाल पुज्जा। 3 कने यूहन्ना यरदन खडा दे अखे-बखे दे सारे देशां च जाई करी प्रचार करदा था, की अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। 4 जियां यशायाह परमेश्वरे दा संदेश देणेबाले दे बचना दीया कताबां च लिखया है, “सुनसान जगा च इक पुकारणे बाले दी अबाज सुणुआ दी है की प्रभु दा रस्ता तैयार करा, कने

उदियां सडकां सिदियां बणा।” 5 हर इक घाटी भरी दिती जाणी, कने हर इक पहाड कने टीला थले करी देणा; कने जडा देरा है सै सीधा, कने जडा उच्चा सै नीटा है सै पहरा रस्ता बणाना। 6 कने सारे लोकां उसयो दिखणा है जिसयो परमेस्वरे उना जो बचाणे तांई भेजया है। 7 जडी भीडा दी भीड उसला बपतिस्मा लेणे तांई निकली करी ओदी थी, सै उना जो बोलदा था की, “तुसां लोक जहरीले सांपा सांई बुरे न, तुहाडा ऐ सोचना गलत है की सिर्फ तुसां बपतिस्मा लेणे ने अपने पापां दी सजा ला बची जाणा जडी परमेस्वरे तुसां जो देणी है। 8 सजा ला बचने तांई पैसे कम्म करा जिना ने पता चले की तुसां सच्ची ही पश्चाताप किता है; कने अपने-अपणे मने च ऐ मत सोचा, परमेस्वरे सान्झो सजा नी देणी क्योकि साडा पिता अब्राहम है; क्योकि मैं तुसां ने बोलदा है की, परमेस्वर तुहाडी जगा लेणे तांई इना पथरां ला भी अब्राहम तांई ओलाद पैदा करी सकदा है। 9 कने हुण कुहाडी स्र्वां दिया जडा च रखियो है, हर इक माणु उस स्र्खे सांई है जडा खरा फल नी दिन्दा है, उसयो परमेस्वरे दोषी बोलणा है कने सै स्र्ख बड़ी करी अग्गी च फूकी देणा।” 10 कने लोकां उसला पुछया, “तां असां परमेस्वरे दिया सजा ला बचणे तांई क्या करन?” 11 यहून्ना उना जो जबाब दिता, “जिसदे बाल दो कुरते न, सै उसयो बंडी दिया जिना बाल नी न, कने जिसदे बाल खाणां है, सै भी इयां करन।” 12 कने कर लेणेबाले भी बपतिस्मा लेणा आये, कने उसला पुछया, “गुरू जी, असां क्या करन?” 13 यहून्ने उना जो बोलया, “जितणा तुहांजो अधिकारियां बोलया लेणे तांई, उसला जादा चुंगी मत लेंदे।” 14 कने सिपाइयां भी उसला पुछया, असां क्या करन? उनी उना जो बोलया, कुसी ने लडाई मत करदे, कने कुसी पर झूठा दोष मत लांदे, कने अपणिया तनखाई पर खुश रेंणा। 15 जालू सारयां लोकां मसीह दे तोल्ली ओणे दी अस लगाईयो थी, कने सारे अपने-अपणे मने च यहून्ना दे बारे च सोचा दे थे, की सै ही मसीहा ता नी है। 16 तां यहून्ने उना सारयां जो जबाब दिता, “मैं तां तुहांजो पाणिये ने बपतिस्मा दिन्दा है, पर सै ओणेवाला है, सै मिजो लो भी शक्तिशाली है; मैं तां उस जोगा भी नी है की उदे जतयां दे तस्मे भी खोली सके, उनी तुहांजो पबित्र आत्मा ने कने अग्गी ने बपतिस्मा देणा है। 17 उदा सूप, उदे हथे च है; कने उनी अपना खेतर ढंगे ने साफ करणा; कने कणका जो अपने खेतेरे च गिटेरगा, पर भूरे जो अग्गी च फूकी देणा है, सै अग्ग कदी नी बुझदी है।” 18 सै बडियां सारियां शिक्षा देईकरी लोकां जो शुभसमाचार सुणांदा रिया। 19 पर जालू यहून्ना गलील प्रदेश दे इलाके दे राजा हेरोदेस जो उदे भाई फिलिपुस दिया घरे बाली हेरोदियास दे बारे च, कने उना दे सारे बुरे कम्मा दे बारे च जडे उनी कितयो थे, उना दी निंदा किती। 20 तां ही तां राजा हेरोदेसे सारयां ला बडी करी बुरा कम्म किता, की यहून्ना जो जेला च पाई दिता। 21 जालू सारे लोकां बपतिस्मा लिया, कने यीशु भी बपतिस्मा लेईकरी प्रार्थना करा दा था, तां स्वर्ग खुली गिया। 22 कने पबित्र आत्मा शरीर दे स्पे च कब्रुतर बणी करी उस पर उतरी, कने आकाशवाणी होई: तू मेरा प्यारा पुत्र है, तिजो ला मैं खुश है। 23 जालू यीशु अपु उपदेश करणा लग्गा तां सै लगबग तियां सालां दा था कने (जदिया समझया जांदा है) की यूसुफ दा पुत्र था; कने यूसुफ एली दा पुत्र, 24 कने एली मत्तात दा पुत्र, कने मत्तात लेवी दा पुत्र, कने लेवी मलकी दा पुत्र, कने मलाकी यन्ना दा, कने यन्ना यूसुफ दा पुत्र, 25 कने यूसुफ मत्तित्याह दा, कने मत्तित्याह आमोस दा पुत्र, कने आमोस नहम दा, कने नहम असल्याह दा पुत्र, कने असल्याह नोगह दा पुत्र, 26 कने नोगह मात दा पुत्र, कने मात मत्तित्याह दा पुत्र, कने मत्तित्याह शिमी दा, कने शिमी योसेख दा पुत्र, कने योसेस योदाह दा पुत्र, 27 कने योदाह यहून्ना दा पुत्र, कने यहून्ना रेसा दा पुत्र, कने रेसा जम्बाबेल दा, कने जम्बाबेल शालतियेल दा पुत्र, कने शालतियेल नेरी दा पुत्र, 28 कने नेरी मलकी दा पुत्र, कने मलकी अदी दा पुत्र, कने अदी कोसाम दा पुत्र, कने कोसाम इलमोदाम दा पुत्र, कने इलमोदाम एर दा पुत्र, 29 कने एर येशु दा पुत्र, कने येशु एलीएजर दा पुत्र, कने एलीएजर योरिम दा पुत्र, कने योरिम मत्तात दा पुत्र, कने मत्तात लेवी दा पुत्र, 30 कने लेवी शमोन दा पुत्र, कने शमोन यहदा दा पुत्र, कने यहदा यूसुफ दा पुत्र, कने यूसुफ योनादा दा, कने योनाद एलयाकीम दा पुत्र, 31 कने एलयाकीम मलेआह दा पुत्र, कने मलेआह मिन्नाह दा पुत्र, कने मिन्नाह मत्तात दा पुत्र, कने मत्तात नातान दा पुत्र, कने नातान दाऊद दा पुत्र, 32 कने दाऊद यिशै दा पुत्र, कने यिशै ओबेद दा पुत्र, कने ओबेद बोअज दा पुत्र,

कने बोअज सलमोन दा पुत्र, कने सलमोन नहशोन दा पुत्र, 33 कने नहशोन अम्मीनादाब दा पुत्र, कने अम्मीनादाब अरनी दा पुत्र, कने अरनी हिस्त्रोन दा पुत्र, कने हिस्त्रोन पेरस दा पुत्र, कने पेरस यहदा दा पुत्र, 34 कने पेरस याकूब दा पुत्र, कने याकूब इसहाक दा पुत्र, कने इसहाक अब्राहम दा पुत्र, कने सै तेरह दा पुत्र, कने तेरह नाहोर दा पुत्र, 35 कने नाहोर ससग दा पुत्र, कने ससग रूज दा पुत्र, कने रूज फिलिग दा पुत्र, कने फिलिग एबिर दा पुत्र, कने एबिर शिलह दा पुत्र, 36 कने शिलह केनान दा पुत्र, कने केनान अरफक्षद दा पुत्र, कने अरफक्षद शेम दा पुत्र, कने सै नूह दा पुत्र, कने नूह लेमेक दा पुत्र, 37 कने लेमेक मथूशिलह दा पुत्र, कने मथूशिलह हनोक दा पुत्र, कने हनोक यिरिद दा पुत्र, कने यिरिद महललेल दा पुत्र, कने महललेल केनान दा पुत्र, 38 कने केनान एनोश दा पुत्र, कने एनोश शेत दा पुत्र, कने शेत आदम दा पुत्र, कने शेत परमेस्वरे दा पुत्र था।

4 फिरी यीशु पबित्र आत्मा ने परिपूर्ण होईकरी यरदन खडा ला बापस आया; कने आत्मा दी अगुवाई ने सुससान जगा च रिया; 2 कने शैतान चालियां रोजां दीकर उदी परख करदा रिया। उना रोजां च उनी कुछ नी खादा कने जालू सै रोज पुरे होई गे, तालू उसयो भूख लग्गी। 3 कने शैताने उसयो बोलया, “अगर तू परमेस्वरे दा पुत्र है तां इसी पथरे जो बोल की, तू रोटी बणी जा।” 4 यीशूऐ उसयो जबाब दिता, “पबित्र शास्त्र च लिखया है: माणुऐ सिर्फ रोटियां ने ही जिंदि नी रेणा।” 5 तालू सै शैतान उसयो लेई गिया कने पल भर च ही सारे संसारे दे राज्य उसयो दस्से। 6 कने उसयो बोलया, मैं ऐ सारे हक, कने सारा धन दौलत तिजो दिना, क्योकि सै मिजो दितया है: कने जिसयो दिल करदा उसयो देई दिन्दा है। 7 इस तांई अगर तू मिजो नमस्ते करगा, तां ऐ सारा तेरा होई जाणा। 8 यीशूऐ उसयो जबाब दिता, “पबित्र शास्त्र च इयां लिखया है: तू अपने परमेस्वरे जो नमस्ते कर; कने उदी ही उपासना कर।” 9 तालू उनी उसयो यस्खालेम शेहर च लेईजाई करी मंदरे दिया चुंडिया पर खडेरया, कने उसयो बोलया, “अगर तू परमेस्वरे दा पुत्र है, तां अपने आपे जो ऐथू ला थले फेकी दे। 10 क्योकि पबित्र शास्त्र च लिखया है, उनी तेरे तांई अपने स्वर्गदूतां जो हुकम देणा, की सै तिजो बचान। 11 कने उना तिजो हथो हथ सभाली लेणा पर इयां ना हो की तेरे पैरां च पथरे ने चोट लग्गी जा।” 12 यीशूऐ उसयो जबाब दिता, पबित्र शास्त्र च ऐ भी लिखया है: तू अपने प्रभु परमेस्वरे दी परख मत करदा। 13 जालू शैतान सारियां परखां करी बैठा, तालू सै थोडी देरां तांई उदे बखे ला चली गिया। 14 फिरी यीशु आत्मा दिया शक्तिया ने परिपूर्ण होईकरी गलील प्रदेश जो बापिस गिया, कने उदी चत्त अखे-बखे दे देशां च फेली गेई। 15 कने सै उना ही यहदी जंज घरां च उपदेश करदा रिया, कने सारे उदी बडाई करदे थे। 16 कने सै नासरत च बापस आया; जिथू पलया बडयो था; कने अपने रिबाजे दे अनुसार सबत दे रोजे पबित्र शास्त्र पढने तांई यहदी जंज घर च जाई करी खडोई गिया। 17 परमेस्वरे दा संदेश देणेबाले यशायाह दी कताब पढने जो उसयो दिती। कने उनी कताब खोलिकरी सै जगा कडी जिथू ऐ लिखया था: 18 “प्रभु दी आत्मा मिजो सोगी है, इस तांई उनी कंगालां जो शुभसमाचार सुनाणे तांई मेरा अभिषेक कितया है, कने मिजो इस तांई भेजया है, की केदियां जो छुटकारे दा कने अनन्यां जो नजर मिलणे दा शुभसमाचार दा प्रचार करे कने कुचले होया जो छुडां। 19 कने प्रभु दे खुश रेंणे दे साले दा प्रचार करे।” 20 तालू उनी कताब बंद करी के सेवके दे हथे च देई दिती, कने बैठी गिया: कने यहदी जंज घर दे सारे लोकां दियां नजरं उन पर थियां। 21 तालू सै उना ने बोलणा लग्गा, “अज ही तुहाडे सुणने ने ऐ लेख परा होया है।” 22 कने सारयां लोकां उदी प्रशंसा किती, जडियां अनुग्रह दियां गल्लां उदे मुरे ला निकलदियां थियां, उना ला हेरान होए; कने बोलणा लग्गे, “क्या ऐ यूसुफे दा पुत्र नी है?” 23 उनी उना जो बोलया, “तुसां मिजो पर ऐ कहावत जरूर बोलणी है, की हे बैध, अपने आपे जो खरा कर। जडा कुछ असां सुणया है की तू कफरनहम शेहेर च कितया है, उसयो अपने देशे च भी कर।” 24 कने उनी बोलया, “मैं तुहांजो ने सच्च बोलदा है, कुसी भी परमेस्वरे दा संदेश देणेबालयां जो अपने देशे च इज्जत नी मिलदी। 25 मेरी गल्ल सुणा। की परमेस्वरे दा संदेश देणेबाले एलित्याह दे दिना च जालू साडे तिन्ना सालां दीकर कोई बरखा नी होई, ऐथू दीकर की सारे इस्त्राएल देशे च बडा भरी अकाल पिया, तां इस्त्राएल देशे च मतियां बिधबा थियां। 26 पर एलित्याह जो इस्त्राएल च उना चे कुसी बाल भी नी भेजया गिया, सिर्फ सिदोन

शेहर दे बखे साफरत दे इलाके च इक होर जाति दी बिधवा बाल भेजया। 27 कने परमेश्वरे दा संदेश देणेबाले एलीशा दे बकते इम्राएल देशे च बतरे कोहड़ी थे, पर सीरिया दा वार्सी नामान जो छडी करी उना चे कोई भी ठीक नी किता, नामान होर जाति दा था।” 28 ऐ सारियां गल्लां सुणिकरी जितणे भी यहूदी जंज घर च थे, सारे गुस्से होईं गे। 29 कने उना उठी करी उसयो शेहरे ला बाहर कडया, कने जिस पाहडे पर उना दा शेहर बसया था, उसयो उदिया चूडिया पर लेईं चले, ताकि उसयो ओथु ला थले फेंकी करी मारी देन। 30 पर सै उना दे बिचे ला निकली करी चली गिया। 31 फिरी यीशु गलील प्रदेश दे कफनरहम शेहर च गिया, कने सब्ते दे रोजे लोकां जो उपदेश दिन्दा था। 32 सै उदे उपदेशे ने हेरान होईं गे क्योंकि यीशु बचन अधिकारे ने बोलदा था। 33 तालू ही यहूदी जंज घर च इक माणु था, जिदे बिच इक बुरी आत्मा थी। 34 उनी जॉरे ने बोलया, “हे नासरत दे यीशु, तू सांझो कजो परेशान करदा है? तू क्या सांझो खतम करणा आया है? मिंजो पता है की, तू कुण है? तू ही परमेश्वर दा पबित्र पुत्र मसिहा है, जडा परमेश्वरे ला आया है।” 35 यीशुए बुरिया आत्मा जो झिडकया कने बोलया, चुप रे; कने इस माणुए ला निकली जा, तालू सै बुरी आत्मा उसयो बिच पटकी करी बिना नुकसान कितयो उस बन्दे ला निकली गईं। 36 इस पर सबना जो हेरानी होईं, कने सै अपु चे गल्लां करी के बोलणा लग्गे, “ऐ कदिया बचन है? की सै हक कने सामर्थ्य ने बुरियां आत्मा जो हुकम दिन्दा है, कने बुरी आत्मा इसदियां गल्लां जो मंदियां भी ना।” 37 इदे बाद यीशुए दी चर्चा सारे पासे होणा लग्गी पेईं। 38 सै यहूदी जंज घर ला उठी करी शमौने दे घरे जो गिया कने शमौने दिया ससु जो बुखार चडया था, कने उना उसा ताईं यीशुए ने बिनती किती। 39 उनी उसा बखे खडे होईंकरी बुखारे जो डांटया कने बुखार उतरी गिया कने सै झट पट उठी करी उदी सेबा करणा लग्गी पेईं। 40 सूरजे डुबणे दे बेले जिना -जिना लोकां जो लग-लग तरा दियां बमारियां थियां उना सारयां लोका जो यीशुए बाल लेईं आये, कने उनी इकी-इकी पर हथ रखीकरी सारयां जो ठीक किता। 41 कने बुरियां आत्मा चिखदियां कने बोलदियां होइयां मतयां लोकां ला निकली गियां की, “तू परमेश्वरे दा पुत्र है” पर सै उना जो डांटदा था, कने बोलणा नी दिन्दा था, क्योंकि उना जो पता था की ऐ मसीह है। 42 जालू दिन होया तां सै निकली करी इक सुनसान जगा पर चली गिया, कने भिडा दी भीड उसयो तोपदे उस बाल आईं, कने उसयो रोकणा लग्गी, की ऐथु ला ना जा। 43 पर यीशुए उना ने बोलया, “मिंजो होर-होर शेहरां च भी परमेश्वरे दे राज्य दा शुभसमाचार सुणाणा जरूरी है, क्योंकि मै इसी ताईं संसारे च भेजया है।” 44 कने सै गलील प्रदेश दे यहूदी जंज घर च प्रचार करदा रिया।

**5** इक दिन जालू यीशु गलील दे झिला दे कंडे पर खडोतया था, तां भीड परमेश्वरे दा बचन सुणने ताईं उस पर डेईं पोआ दी थी। 2 की उनी झिला दे बखे दो किस्तिया लगीयां दिखियां, कने मछबारे उना ला उतरी करी मच्छियां पकडणे बाले जाले जो धोआ दे थे। 3 उना किस्तिया चे इकी पर, जडी शमौने दी थी, चडी करी यीशुए उसला बिनती किती की, किनारे ला थोडी हटाईं ले, तालू सै किस्तिया पर बेईंकरी लोकां जो उपदेश देणा लग्गा। 4 जालू यीशु लोकां ने गल्लां करी बैठा, तां उनी शमौने जो बोलया, “डुणे पाणिणे च लेईं चल, कने मच्छियां पकडने ताईं अपने जाले जो फेक।” 5 शमौने उसयो जबाब दिता, “हे मालिक, असां सारी रात मेहनत किती कने कुछ नी पकडया; पर तैरे बोलने ने असां जाल फेका दे ना।” 6 जालू पतरस कने उदे साथियां जाल पाया, तां मतियां भरी मछियां जाले च फसी गियां, कने उना दे जाल फटणा लग्गी पिया थे। 7 इस पर उना अपने साथियां जो इशारा किता जडे दुईयां किस्तिया पर थे, ताकि आईं करी साडी मदद करा: कने उना आईं करी, दोनो किस्तिया मच्छियां ने इतणियां भरी लियां की सै डूबणा लगी पिया थियां। 8 ऐ दिखीकरी शमौन पतरस यीशुए दे पैरां च पेईं गिया, कने बोलया, “प्रभु जी, मेरे बखे ला चली जा, क्योंकि मै पापी माणु है।” 9 क्योंकि इतणियां मछियां पकडणे ने उसयो कने उदे साथियां जो बडी हेरानी होईं; 10 कने तियां ही उदे साथी जब्दी दे पुत्र याकूब कने यहन्ना भी बडे हेरान होऐ। तालू यीशुए शमौने ने बोलया, “डरा मत, हण ला तुसां माणुआं जो मेरे चले बणना सिखाणा है।” 11 कने सै किस्तिया जो किनारे पर लेईं आऐ, कने सब कुछ छडी करी उदे पिच्छे चली पे। 12 जालू यीशु कुसी शेहरे च था, तां दिखा, ओथु इक माणु था, जिसयो कोह होया था कने सै यीशुए जो दिखीकरी मुऐ दे भार

पेईं गिया, कने बिनती करणा लगा कि, “प्रभु जी अगर तू चां तां मिंजो ठीक करी सकदा है।” 13 यीशुए हथ अग्रे करी के उसयो छुता कने बोलया, “मै चांदा है की तू ठीक होईं जा” कने तालू ही उदा कोह ठीक होईं गिया। 14 तालू उनी उसयो समझाया, “कुसी ने कुछ मत बोलदा, पर जाईं करी अपने आपे जो याजकां जो दस, की तू खरा होईया कने परमेश्वरे जो भेंट चढा जिदे बारे च मुसा हुकम दितया है, ताकि लोक जाणी सकन की तू खरा होईं गिया।” 15 पर यीशु दे बारे च खबर होर भी जादा फेलदी गेईं, कने भिडा दी भिड उसयो सुणने ताईं कने अपणियां बिमारियां ला ठीक होणे ताईं गिठी होईं। 16 पर यीशु मसीह हमेशा सुनसान जगा च जाईं करी किल्ला प्राथना करदा था। 17 कने इक रोज ऐसा होया की सै उपदेश दे दा था, कने फरीसी कने व्यवस्था जो सिखाणे बाले ओथु बैठयो थे, जडे गलील प्रदेश कने यहूदिया प्रदेशे दे इलाके दे हर इक गां ला कने यरशल्लेम शेहरे ला आयो थे; कने ठीक करणे ताईं प्रभु दी शक्ति उस सोगी थी। 18 कने दिखा लोक इक माणुए जो मझे पर चुकी लेईं आऐ, कने सै धंगरे दा मरीज था, कने सै उसयो अंदर लेईं जाणे कने यीशुए दे सामणे रखणे दी तरकीब तोपा दे थे। 19 कने जालू भिडा दिया बजा ने अंदर नी लेईंजाईं सके तां उना छठीं पर चडी करी कने खपेरैलां जो हटाईं करी, उना उसयो मझे समेत कमरे बिच यीशु दे सामणे उतारी दिता। 20 उनी उना दा भरसा दिखीकरी बोलया, “हे माणु, तैरे पाप माफ होऐ।” 21 तालू व्यवस्था जो सिखाणे बाले कने फरीसी गल्लां करणा लग्गे, “ऐ कुण है, जडा परमेश्वरे दी निंदा करा दा है? परमेश्वरे जो छडी करी होर कुण पापां जो माफ करी सकदा है?” 22 यीशुए उना दे मने दियां गल्लां जो जाणी करी बोलया, “की तुसां अपने मने च क्या गल्लां करा दे न? 23 क्या बोलणा असान है? क्या इयां बोलणा, की तैरे पाप माफ होये, या की इयां बोलणा की उठ कने हंड फिर? 24 पर ऐ इस ताईं की तुहांजो पता लग्गे की मिंजो, माणुए दे पुजे जो धरतिया पर पाप माफ करणे दा हक भी है।” उनी उस धंगरे दे मरिजे जो बोलया, “मै तिजो ने बोलदा है, उठ कने अपने मझे जो चुकी करी अपने घरे चली जा।” 25 सै झट पट उदे सामणे उठया, कने जिस पर सै लेटया था उसयो चुकी करी, परमेश्वरे दी बडाईं करदा होया अपने घरे जो चली गिया। 26 तालू सारे हेरान होऐ कने परमेश्वरे दी बडाईं करणा लग्गे, सारे डरीकरी बोलणा लग्गे, “अज असां बडियां अनोखियां गल्लां दिखियां।” 27 कने उदे बाद यीशु बाहर गिया, कने उनी लेवीं नाऐ दे इक कर लेणेबाले जो चुंगिया दिया चोकिया पर बैठया दिखया, कने उसयो बोलया, “की मेरा चेला बण।” 28 तालू सै सब कुछ छडी करी उठया कने उदे पिच्छे चली पिया। 29 कने लेवीं अपने घरे यीशुए ताईं इक बडी बडी धाम दिती; कने चुंगी लेणेबाले कने होर मते भरी लोकां उदे सोगी खाणां खादा था। 30 कने फरीसी कने मुसा दी व्यवस्था जो सिखाणे बाले उदे चेलयां जो ऐ बोली करी गल्लां करणा लग्गे, “की तुसां चुंगी लेणेबाले कने पापियां सोगी कजो खांदे पिंदे न?” 31 यीशुए उना जो जबाब दिता, वैध भले चंगे लोका ताईं नी होंदा, पर सै बिमारां ताईं जरूरी होंदा। 32 मै धर्मियां जो नी, पर पापियां जो मन बदलने ताईं सदणा आया है। 33 फरीसी कने मुसा दिया व्यवस्था जो सिखाणे बालयां यीशुए जो बोलया, “यहन्ना दे चले तां बराबर बरत रखदे कने प्राथना करदे न, कने तियां ही फरीसियां दे भी करदे न, पर तैरे चले तां खांदे पिंदे ना।” 34 यीशुए उना जो बोलया, “क्या तुसां बरातियां ला बरत करवाईं सकदे न जालू दीकर लाडा उना सोगी होऐ? 35 पर सै दिन ओणे न, जिना च लाडा उना ला बख कितया जाणा है, तालू बरातियां उना रोजां च बरत रखणे ना।” 36 यीशुए उना ने इक होर कहाणी बोली: कोई भी माणु नोऐ कपडयां जो फाडिकरी पारणे कपडयां च रफू नी लांदा है, अगर कोई इयां करदा है तां नोआ कपडा धोणे बाद छोटा होईं जांदा है, जिसने पारणे कपडे होर फटी जाणा कने सै पारणा कपडा उस सोगी मेल नी खाणां। 37 नोऐ अंगरा दे रसे जो पारणिया खलडिया च कोई नी रखदा है नी तां नोआ अंगर रस पारणिया खलडिया जो फाडी करी निकली जांदा है, कने अंगर रस खलडिया जो बराबद करी दिन्दा है, 38 ताईं तां नोआ अंगर रस नोईयां खलडिया च ही रखणा चाईंदा। 39 कोई माणु पारणा अंगर रस पी करी नोआ नी पिणा चांदा क्योंकि सै बोलदा है, की पारणा ही खरा है।

**6** फिरी सै सब्ते दे रोजे खेतारां चे होईंकरी चलया था, कने उदे चले बेलां तोडी-तोडी करी कने हथा ने मल्ली-मल्ली करी खांदे जा दे थे। 2 तालू फरीसियां

चे कोई बोलणा लगे, "तुसां सै कम्म कजो करदे न जडा सब्बे दे रोज करणा ठीक नी हे?" 3 यीशुए उना जो जबाब दिता, की तुसां ऐ नी यहुदा, कि राजा दाऊदे जालु सै कने उदे साथी भूखे थे तां उना क्या किता? 4 दाऊद कियां परमेश्वरे दे घरे गिया, कने भेंट चढाईयां रोटियां लेईकरी खादियां कने अपने साथियां जो भी दितियां, जिना जो सिर्फ याजक लोक ही खाई सकदे थे? 5 कने यीशुए उना ने बोलया, "मै माणुए दा पुत्र ऐ बोलणे दा हक रखदा है कि लोकां जो सब्बे बाले रोजे क्या करणा चाईदा कने क्या नी करणा चाईदा।" 6 कने इक दिन इयां होया की सै कुसी हौर सब्बे दे रोजे यहदी जंज घर च जाई करी उपदेश देणा लग्गा; कने ओथु इक माणु था, जिदा सज्जा हथ सुक्या था। 7 व्यवस्था जो सिखाणे बालयां कने फरीसी उस पर दोष लगाणे दे मोके दीया ताका पर थे, की दिखदे न की सै सब्ब दे रोजे ठीक करदा है की नी। 8 पर सै उना दे बिचार जाणदा था; तां तां उनी सुक्यो हथे बाले माणुए जो बोलया, "उउ, खडोई जा।" सै उठी होया। 9 यीशुए उना जो बोलया, "मै तुसां ला ऐ पुछदा है की सब्ब दे रोजे क्या ठीक है, भला करणा या बुरा करणा; जान बचना या मारणा?" 10 तालु यीशुए उना लोकां पासे दिखया। कने उस माणुए जो बोलया, "अपणा हथ कर र्खां।" उनी किता, कने उदा हथ खरा होई गिया। 11 पर ऐ दिखीकरी फरीसी कने मूसा दी व्यवस्था जो सिखाणे बाले बडे गुरुसा होई गे कने अपु चे बोलणा लग्गे की असां यीशुए दा क्या करन? 12 उदे बाद यीशु धारा पर प्राथना करणे तांई गिया, कने परमेश्वरे ने प्राथना करणे च सारी रात बिताई। 13 जालु दिन होया, तां उनी अपने चेलयां जो सदीकरी उना चे बाहरा चुणी ले, कने उना जो प्रेरित बोलया। 14 कने सै ऐ न: शमोन जिदा ना उनी पतरस भी रखया; कने उदा भाई अन्ट्रियास, कने याकूब, कने यहन्ना, कने फिलिप्पस, कने बरतुलमै, 15 कने मर्ती, कने थोमा, कने हलफई दा पुत्र याकूब, कने शमोन जिसयो जेलोतेस बोलदे न, 16 कने याकूब दा पुत्र यहदा, कने यहदा इस्करियोती, जडा उसयो पकडवाणे बाला बणया। 17 तालु सै उना सोगी उत्तरिकरी चौरस दिया जगा पर खडोता, कने उदे चेलयां दी मती भीड कने सारे यहदिया प्रदेश, कने यरुशलैम शहर, कने सूर कने सैदा शहरां दे कने समुदे दे बखे ला बतैरे लोक, 18 जडे उदी सुणना कने अपणियां बमारियां ला ठीक होणे तांई उस बाल आयो थे, ओथु थे। कने बुरियां आत्मा दे सताये होऐ लोक भी ठीक होँदे थे। 19 कने सारे उसयो छूणा चाँदे थे, क्योकि उसला शक्ति निकलदी थी जडी सबना जो ठीक करदी थी। 20 तालु उनी अपने चेलयां पासे दिखीकरी बोलया, "धन्य न तुसां, जडे दीन न, क्योकि परमेश्वरे दा राज्य तुहाडा है।" 21 "धन्य न तुसां, जडे की हुण भूखे न; क्योकि तुसां रजाऐ जाणे न। धन्य न तुसां, जडे की हुण रौंदे न, क्योकि तुसां हसणा है।" 22 "धन्य न तुसां, जालु माणुए दे पुत्रे दिया बजा ने लोकां तुहांजे ने दुशमणी रखणी है, कने तुसां जो कडी देणा, कने तुहाडी निंदा करणी, कने तुहाडा ना बुरा समझीकरी तुहांजे बडी देणा है।" 23 "उस रोजे खूश होनयो, क्योकि तुहाडे तांई स्वर्ग च बडा इनाम है। उना दे बाप-दादे भी परमेश्वरे दा संदेश देणेबालयां सोगी इयां ही करदे थे।" 24 "पर तुहाडे तांई बडी बुरी सजा होणी जडे बडे अमीर न, क्योकि तुहांजे पहले ही अपणी खुशी मिली गियो है।" 25 "तुहाडे तांई बडी बुरी सजा होणी जडे हुण रजी करी खादे न, क्योकि उना भूखे रेणा है। तुहाडे तांई बडी बुरी सजा होणी; जडे हुण हसदे न, क्योकि बादे च शोक करणा कने रोणा है।" 26 "तुहाडे तांई बडी बुरी सजा होणी, जालु सारे माणु तुहांजे खरा बोलगे, क्योकि तुहाडे पूर्वजां उना लोकां दे बारे च खरियां गल्लां बोलियां जडे परमेश्वरे दे संदेश देणेबाले झूठे लोक थे। इसला पता चलदा की तुसां भी परमेश्वरे दे संदेश देणेबाले झूठे लोक न।" 27 पर तुसां सुणने बालयां जो मै बोलदा है, की अपने दुशमणां ने प्यार रखा; जडे तुहांजे ने बैर करन, उना दा भला करा। 28 जडे तुहांजे श्राप देन, उना जो आशीष दिया; जडे तुहाडी बेजती करन, उना तांई प्राथना करा। 29 जडा तेरिया इकी खाडिया पर थपड मारणा तां तू दर्जी भी उस पासे करी दे, कने जडा तेरी चादर खोई ले, उसयो अपणा कुरता देणे ला भी मत रोक। 30 जडा कोइ तिजो ला मंगे, उसयो देई दे; कने जडा तेरी चिज खोई ले, उसला मंगदा मत। 31 कने जियां तुसां चाँदे न की लोक तुहांजे ने करन, तुसां भी उना ने तदिया ही करा। 32 अगर तुसां अपने ने प्यार रखणेबाले ने प्यार रखन, तां तुहाडी क्या बडाई? क्योकि पापी भी तां अपने ने प्यार रखणे बालयां सोगी प्यार रखदे न। 33 कने अगर तुसां अपने ने भलाई करणे बाले ने ही भलाई

करदे न, तां तुहाडी कोई कजो बडाई करे? क्योकि पापी भी तां इयां ही करदे न। 34 कने अगर तुसां उसयो ही उधार दिन्दे न, जिल्ला बापस मिलणे दी आस रखदे न, तां तुहाडी कोई कजो बडाई करे? क्योकि पापी भी पापियां जो उधार दिन्दे न, ताकि उतणा ही बापस मिलले। 35 अपने दुशमणां ने प्यार रखा, कने भलाई करा, कने फिरी बापस नी मिलणे दी इच्छा नी रखीकरी उधार दिया; कने तुहाडे तांई बडा इनाम होणा है; कने तुसां परम प्रधान परमेश्वरे दे सन्तान बणना, क्योकि सै उना पर जडे परमेश्वरे दा धन्यवाद नी करदे न कने बुरे लोकां पर भी दया करदे न। 36 जियां तुहाडा पिता दयावान है, तियां ही तुसां भी दयावान बणा। 37 "कुसी पर दोष मत लगा; तां तुहांजे पर भी परमेश्वरे दोष नी लगाणा: कुसी जो सजा नी देणी, तुसां भी दुजयां जो माफ करगे तां तुहांजे भी परमेश्वरे माफ करणा।" 38 दिया करा, तां तुहांजे भी मिलणा। लोकां पूरा नाप दबाई-दबाई करी कने हिलाई-हिलाई करी कने उभरदा होया तुहाडिया गोदा च पाणा, क्योकि जिस नापे ने तुसां नापदे न, उसी नापे ने तुहाडे तांई भी नापया जाणा। 39 फिरी यीशुए उना ने न इक होर कहाणी बोली: क्या कोई अन्ना माणु, कुसी अन्ने जो रस्ता दसी सकदा है? क्या इना दोना खड्डे च नी पोणा? 40 चेला अपने गुरूए ला बडा नी हौदा, पर जडा कोई पूरा शिक्षित हौणा, सै ही अपने गुरूए सांई होणा। 41 तू कजो अपने भाईऐ दियां छोटियां-छोटियां गलतियां जो दिखदा है, जडियां उदिया हखी च पिये छोटे दे कखे सांई न, कने तिजो अपणियां बडियां-बडियां गलतियां नी मिलदियां, जडियां तेरियां हखी च इक लठे सांई न। 42 जद की तिजो अपणी ही हखी दा लठा नी मिलदा है, तां अपने भाईये जो कियां बोली सकदा है, भाई स्क मै तेरी हखी दे तिनके जो कडी दिन्दा है? हे कपटी मने दे लोको पहले तां अपणी हखी दे लठे जो कडा, तां जडा तिनका तरे भाईऐ दी हखी च है, उसयो गंगे ने दिखीकरी कडी सकदे न। 43 कोई ऐसा खरा सख नी है, जडा बेकार फल दे, कने ना ही तां कोई बेकार सख है, जडा खरा फल दे। 44 हर कोई सख अपने फले ने पखयेणा जांदा है; क्योकि लोक झिल्लां चे अंजीर नी तोडदे न, कने ना बेरी दे झिले ला अंगूर तोडदे न। 45 भला माणु अपने मने दे भले भंडारे ला खरियां गल्लां कडदा है; कने बुरा माणु अपने मने दे बुरे भंडारे ला बुरियां गल्लां ही कडदा है; क्योकि जडा मने च भस्या हौंदा हे सेई सुऐ च ओंदा है। 46 जालु तुसां मेरा बोलया नी मंदे, तां कजो मिजो प्रभु-प्रभु बोलदे न? 47 जडा कोई मेरे बाल ओंदा है, कने मेरियां गल्लां सुणीकरी उना जो मनदा है, मै तुहांजे दसदा है की सै कुसदे सांई है? 48 सै उस माणुए सांई है, जिनी घर बणादे बेले दुगी जमीन खणीकरी पथरां दी नियां बणाइयां न, कने जालु बाढ आई तां पाणी उस घरे ने लग्गा, पर उसयो हिलाई नी सकया, क्योकि सै पक्का बणया था। 49 "पर जडे सुणीकरी नी मंदे न, सै उस माणुए सांई न, जिनी मिटीया पर बिना नियां दा घर बणाया है, जालु उस पर पाणी लगया, तालु सै झट ढेई गिया, कने सै ढेईकरी टूटी भजी गिया।"

7 जालु सै लोकां जो अपणिया सारियां गल्लां सुणाई बैठा, तां कफरनहम शेर च आया। 2 कने ओथु कुसकी सब्बेदे दा इक सेवक जडा उदा बडा खास सेवक था, सै बमारिया ने मरणे बाला था। 3 उनी यीशु मसीह दे बारे च सुणया कने सुणिकरी केई बड्डे यहदी अंगुवां जो उसला ऐ बिनती करणे तांई उदे बाल भेजया, की आई करी मेरे दासे जो ठीक करी दे। 4 सै यीशु बाल आये कने उसला बडी बिनती करी के बोलणा लग्गे, "ऐ सेनापति इस काबील है की, तू उस तांई ऐ कम्म करे, 5 क्योकि सै साडिया जातियां ने प्यार रखदा है, कने उनी ही साडे यहदी जंज घर जो बणाया है।" 6 यीशु उना सोगी-सोगी चलया, पर जालु सै घरे ला थोडी दूर था, तां सब्बेदारे उसयो अपने केई साथियां बाल बोली भेजया, प्रभु जी, इतणा कष्ट मत कर, क्योकि मै इस लायक नी हे की, तू मेरे घर आवे। 7 इसा बजा ला मै अपने आपे जो इसी लायक नी समझया की, तरे बाल ओऐ, पर तू बचन ही बोली दे तां ही मेरा सेवके ठीक होई जाणा। 8 मै भी अधिकारियां दे थल्ले कम्म करणे बाला माणु है, कने मेरे अधीन सपाई कम्म करदे न, कने जालु इसी सपाईए जो बोलदा है कि, तू जा, तां सै चली जांदा है; कने दुऐ जो बोलदा है कि, तू ऐथू आ, तां सै आई जांदा है; कने जालु मै अपने नोकरे जो बोलदा, कि ऐ कर, तां सै करी दिन्दा है। 9 ऐ सुणिकरी यीशु हेरान होया, कने उनी मु फेरिकरी उसा भिडा ने जडी उदे पिच्छे ओआ दी थी बोलया, "मै तुहांजे ने बोलदा है, कि मै इस्राएल च भी ऐदिया भरोसा नी दिखया।" 10 कने जडे साथी भेजयो थे सै घरे

बापस आये, कने उस सेवके जो दिखया तालू सै ठीक होई गया था। 11 थोड़े रोजां बाद सै नाईन मागे दे इक शेहरे जो गिया, कने उदे चले कने बडी भी भीड उदे सोगी चलियो थी। 12 जालू सै शेहरे दे फाटके बखे पुज्जा, तां ओथु लोक इकी मुर्द जो बाहर लेई चलयो थे कने सै अपणिया माऊ दा इकलोता पुत्र था, कने सै बिधवा थी, कने शेहरे दे मते लोक उसा सोगी थे। 13 उसा जो दिखीकरी प्रभु जो उसा पर बडा तरस आया, कने यीशुए उसा जो बोलया की, “रो मत।” 14 तालू यीशुए जाई करी अर्थिया जो छुता; कने जडे अर्थिया लेईकरी चलयो थे सै स्की गे, तालू यीशुए बोलया, “हे जवान, मैं तिजो बोलदा है, की उठ जा!” 15 तालू सै मुर्दा जिंदा होई गिया, कने बोलणा लग्गी पिया: कने उनी उसयो उदिया माऊ जो देई दिता। 16 ए सब कुछ दिखीकरी सै सारे डरी गे; कने सै परमेख्वरे दी बडाई करी के बोलणा लग्गे, “साडे बिच इक परमेख्वरे दा संदेश देणेबाला बडा महान माणु आया है, कने परमेख्वर अपने लोकां दी मदद करणे तांई आया है।” 17 कने उदे बारे च ए गल्ल सारे यहूदिया प्रदेशे दे इलाके कने अखे-बखे दे देशे च फेरली गेई। 18 कने यहून्ना जो उदे चेलयां इना सारियां गल्लां दी खबर दीती। 19 तालू यहून्ने अपने चेलयां चे दो चेलयां जो सदीकरी प्रभु बाल ए पुछणे तांई भेजया, “की क्या तू ही मसीह है, जिसयो भेजणे दा बायदा परमेख्वरे कितया था या असां कुसी दुजे दी नियाल रखन?” 20 उना यीशुए बाल जाई करी बोलया की, “यहून्ना बपतिस्मा देणेबाले सांझो तरे बाल ए पुछणे तांई भेजया है, की क्या तू ही मसीह है, जिसयो भेजणे दा बायदा परमेख्वर ने कितया था या असां कुसी दुजे दी नियाल रखन?” 21 उसी बेले यीशुए मतयां जो बिमारियां कने पीडा, कने बुरियां आत्मा ला छुडाय; कने मते अनयां जो हखी दीतियां। 22 कने यीशुए उना ने बोलया, जडा कुछ तुसां दिखया कने सुणया है, जाई करी यहून्ना जो बोली दिया, “की जडे अन्ने थे उना जो मिलणा लग्गी पिया, कने जडे लंगडे थे सै चलदे फिरदे न, कने कोढियां दा कोढ ठीक होई गिया है, कने जडे टोणे थे सै सुणना लग्गी पे, कने मुर्दे जिन्दे होई जां दे न, कने कंगालां जो शुभसमाचार सुणया जां है। 23 धन्य न सै, जडे मिजो पर शक नी करदे न।” 24 जालू यहून्ना दे भेजयो संदेश देणेबाले दूत चली गे, तां यीशु यहून्ना दे बारे च लोकां ने बोलणा लग्गा, की तुसां सुनसान जगा च क्या दिखणा गियो थे? क्या होआ ने हिलदे होए सरकंडे जो? 25 तां फिरी तुसां क्या दिखणा गियो थे? क्या नरम कपडे लायो माणु जो? जडा मंगे कपडे पांदा है, कने ठाठ-बाठ ने मेहलां च रंदा है। 26 तां फिरी क्या दिखणा गियो थे? क्या कुसी परमेख्वरे दा संदेश देणेबाले जो? हां, मैं तुहांजो ने बोलदा है, की तुसां परमेख्वरे दे संदेश देणेबाले ला भी बड़े जो दिखया है। 27 ए से ही है, जिसदे बारे च पबित्र शाब्दा च लिखया है: “दिख, मैं अपने संदेश देणेबाले दूते जो तरे अग्गे-अग्गे भेजदा है, जिनी तेरा अग्गे दा रस्ता तैयार करणा है।” 28 “मैं तुहांजो ने बोलदा है, जडे जनानिया ला जमयो न, उना च यहून्ना ला बडा कोई नी: पर जडा परमेख्वरे दे राज्य च छोटे ला छोटा है, सै उसला भी बडा है।” 29 जालू उना यीशुए दियां बोलियां गल्लां जो सुणया, तां सारयां लोकां ऐथू दीकर की कर लेणेबालयां भी यहून्ना ला बपतिस्मा लेईकरी परमेख्वरे जो सच्चा मनी लिया है। 30 पर फरीसियां कने व्यवस्था जो सिखणे बालयां उसला बपतिस्मा लेणे ला मना करी दिता कने परमेख्वरे दिया मर्जिया जो जडी उना तांई थी उसा जो अपनणे ला मना करी दिता। 31 मैं इस युगे दे लोकां दी तुलना कुसने दें कि सै कुदे सांई न। 32 सै उना जागतां सांई न, जडे बजारां च बेईकरी इकी दुजे जो पुकारी करी बोलदे न। की असां तुहाडे तांई खुशिया दे गाणे गाए, कने तुसां नचे नी; असां रोए, कने तुसां छाती नी पीटी। 33 क्योंकि यहून्ना बार-बार बरत रखदा कने ना श्राव पिन्दा था, कने सै बोलदे न कि उदे च बुरी आत्मा है। 34 मैं माणुए दा पुत्र खांदा पिंदा है; कने तुसां बोलदे न, दिखा, पेदू कने शराबी माणु, कने कर लेणेबालयां दा कने पापियां दा सार्थी है। 35 “पर ज्ञान दी सच्चाई उदियां सारियां ओलादी दे सामणे आई है।” 36 फिरी कुनकी फरीसीए उसला बिनती किती, की मेरे सोगी खाणां खा; कने यीशु उस फरीसीए दे घरे जाई करी रोटी खाणां बैठा। 37 कने दिखा, उस शेहरे दी इक पापी जनानिया जो जालू ए पता लग्गा की फरीसी दे घरे यीशु रोटी खाणां आया है, तां सै संगमरमर दे भांडे च बडा मेगा इर लेई आई। 38 कने उदे पैरां बखे बेईकरी रोई-रोई करी, पैरां जो आंसुआं ने सेडणा लग्गी कने अपने बाला ने पुंजया कने उदे पैरां जो बार-बार चुमणा लग्गी कने इर

यीशुए दे पैरां च मलया। 39 ए दिखीकरी, सै फरीसी जिनी यीशुए जो सदया था, अपने मने च सोचणा लग्गा, “अगर ए परमेख्वरे दा संदेश देणेबाला होदा तां इसयो पता लग्गी जांदा, की ए जडी उसयो छुआ दी है, सै कुण है कने कदेई जनानी है? क्योंकि सै तां पापी जनानी है।” 40 यीशुए उदे बिचारां जो जाणी करी उना जो जबाब च बोलया, हे शमौन, मिजो तिजो ने कुछ बोलणा है। उनी बोलया, “गुरू जी, बोला।” 41 तालू यीशुए इक कहाणी सुणाई, “कुसकी महाजने दे दो देणदार थे, इक पंजसो दिना दी मजदुरिया दा कने दुआ पंजा दिना दी दियाडी दा देणदार था।” 42 पर जालू उना बाल बापस करणे जो कुछ नी रिया, तां उनी महाजने दोनो जणयां दा कर्ज माफ करी दिता। उना दोनों चे कुनी उस महाजने ने जादा प्यार रखणा। 43 शमौने जबाब दिता, “मेरिया समझा च तां सै माणु जिदा जादा कर्ज माफ करी दिता।” यीशुए उसला बोलया, तू ठीक जबाब दिता है। 44 कने उना उसा जनानिया पासे फिरी करी उनी शमौने ने बोलया, “क्या तू इसा जनानिया जो दिखया इना क्या किता? मैं तरे घरे जो आया पर तू मिजो पैरां धोणे तांई पाणी नी दिता, पर इना मेरे पैरे आंसुआं ने धोते, कने अपने बाला ने पूंजे।” 45 तू गले लाईकरी मेरा स्वागत नी किता, पर जालू लां मैं आया है तालू ला इना मेरी इज्जत करणा नी छडी है। 46 तू मेरे सरे च तेल नी मलया; पर इना मेरे पैरां च इतणा मेहंगा इर मली करी मेरा इज्जत मान किता है। 47 “तांई तां मैं तिजो ने बोलदा है; की मते सारे पाप जडे इना कितयो न, सारे माफ होए, क्योंकि इना जादा प्यार किता है; पर जिदा थोडा माफ होया है, सै घट प्यार करदा है।” 48 कने उनी जनानिया ने बोलया, “तरे पाप माफ होए।” 49 तालू जडे लोक ओथु रोटी खाणां बैठयो थे, सै अपने-अपने मने च सोचणा लग्गे, “ए कुण ए जडा पापां जो भी माफ करदा है क्योंकि परमेख्वर ही ए करी सकदा है।” 50 पर उनी जनानिये ने बोलया, “परमेख्वरे तिजो बचाई लिया है क्योंकि तू मिजो पर भरोसा किता है, कने शांतिया ला चली जा।”

**8** उदे बाद यीशु शेहरे-शेहरे च कने गांए-गांए च जाई करी प्रचार करदे होए कने परमेख्वरे दे राज्य दा शुभसमाचार सुणणे लग्गा कने सै बाहरा चले भी उदे सोगी थे। 2 कने कुछ जनानिया भी जिना जो बुरियां आत्मा कने बिमारियां ला ठीक कितया था, कने उना दे ना ए न: मरियम जडी मगदल गां ला थी, जिना ला सत बुरियां आत्मा निकलियां थियां। 3 कने राजा हेरोदेस दे भण्डारी खोजा दी घरेबाला योअन्ना कने सुसन्नाह कने मतियां जनानिया अपणिया कमाईया ने यीशु कने उदे चेलयां दी सेबा करदियां थियां। 4 जालू मती भरी भीड गिठी होई, कने शेहरे-शेहरे दे लोक उदे बाल चली ओदे थे, तां उनी इक कहाणी उना जो सुणाई: 5 इक किसान अपने खेतरे च बी रांणे तांई निकलया: रांदे बेले थोडे बी रस्ते दे बखे पेयी गे कने सै तां पंछियां आई करी चुर्गी ले। 6 कने थोडे बी पथरलिया जमिना पर पे जिथु उसयो जादा मिटी नी मिली, कने जादा मिटी नी होणे दिया बजा ने तौली लूंगी पै, कने जालू खडी धूप पेई, तां सै फकुई गे, क्योंकि उना दियां जडा डुगियां नी थियां तां सै सुकी गियां। 7 कने थोडे बी झिल्लां च पै, कने जालू झिल्ल बदे तां उना से भी डकी ले, कने उना फल नी दिता। 8 पर थोडे बी खरिया जमिना पर पे, कने सै भी लूंगे, कने मते सारे फल देणेबाले होए; केईयां ती गुणा, केईयां सठ गुणा, केईयां सौ गुणा फल दिता। “ए बोलिकरी उनी जोरे ने बोलया, जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 9 उदे चेलयां उसयो पुछया, “की इसा कहाणिया दा क्या मतलव है?” 10 उनी बोलया, तुहांजो परमेख्वरे दे राज्य दे भेदां जो समझणे दी समझ दितियो है, पर ए कहाणियां बाकियां तांई सुणादा है, इस तांई की “सै दिखदे होए भी ना दीखन, कने सुणदे होए भी ना समझना” 11 इसा कहाणिया दा मतलब ए की: बी तां परमेख्वरे दा बचन है। 12 रस्ते बखे बाले सै न, जिना सुणया; पर शैतान झट पट जांदा कने उना दे मने ला बचन कडी दिन्दा है, ताकि कुथी इयां ना होये की सै भरोसा करी लेन कने उना दा उद्धार होई जा। 13 कने जडा पथरलिया जमिना च राया था, ए सै माणु न, जडे बचना जो सुणीकरी उना जो झट खुशिया ने गृहण करी लेंदे न। पर परमेख्वर दे बचना जो मने दिया गहराईया च बटपणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हटी जां दे न। 14 जडे बी झिल्लां च पियो न, ए सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक

चिंजा दा लालच उना दे मने च रेंदा है, ऐ सब परमेश्वरे दे बचना च स्कावट पांदा है। कने सै बचन उना भाई फायदेमंद नी होंदा। 15 कने खरियों जमिना बाले बी सै न, जडे बचन सुणीकरी भले कने खरे मने ने सम्भाली करी रखदे न, सै सबर ने फल दिन्दे न। 16 कोई दिव्या बाली करी भांडे ने नी ढकदा है, कने ना मंझे हेठ रखदा है, पर धारिया पर रखदे न, ताकि अंदर ओणे बालयां जो लौ होऐ। 17 “क्योंकि जडा कुछ भी लुकया है, सै सामणे करणा है; कने हर इक गुप्त गल्ल सामणे आई जाणी है। 18 जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, की मै क्या सिखांदा, तां सै जडा समझया है, परमेश्वरे सै भी उसला लेई लेणा।” 19 उदी माता कने उदे भाई उस बाल आए, पर भीडा दिया बजा ने मिली नी सके। 20 कने उसयो बोलया, “तेरी माता कने तेरे भाई बाहर खडोटयो न कने तिजो ने मिलणा चांदे न।” 21 उनी उदे जबाब च बोलया, “मेरी माता कने मेरे भाई ऐ ही न, जडे परमेश्वरे दे बचना जो सुणदे कने मंदे न।” 22 फिरी इक रोज सै कने उदे चेले किस्तिया पर चढे, कने उनी उना ने बोलया, “ओआ, गलील झीला दे पार चलते न।” कने उना किस्ति खोली दिती। 23 जालू किस्ति चलियो थी तां सै सोई गिया: कने झीला च तफान आई गिया, कने किस्ति पाणिणे ने भरुणा लगी पेई कने सै खते च थे। 24 तालू उना यीशुऐ बखे आई करी उसयो जगाया, कने बोलया, “हे स्वामी। हे स्वामी। असां डूबणा लगी पियो न।” तालू उनी उठी करी पाणिणे कने तफाने जो डांटया कने सै स्की गे, कने सै शान्त होई गिया। 25 यीशुऐ उना ने बोलया, तुहाडा भरुसा कुथ था? पर सै डरी गे, कने हेरान होईकरी अपु चे बोलणा लगे, “ऐ कदिया माणु है? ऐथू दीकर की तफान कने लैहरां भी इदा हुकम मंदे न।” 26 फिरी सै गिरासे दे लोकां दे देशे च पुज्जे, जडा उसी पार गलील प्रदेशे दे सामणे है। 27 जालू सै किनारे पर उतरया, तां उस ग्रांऐ दा इक माणु उसयो मिल्ला, जिदे च बुरी आत्मा थी। कने सै कपडे नी पांदा था, कने ना घरे रेंदा था, सै कब्रिस्तान च रेंदा था। 28 सै यीशुऐ जो दुरे ला ही दिखीकरी दोडया, कने यीशुऐ जो इज्जत देणे तांई उदे पैरां अग्रे डेई पिया। उनी जौरे ने चिलाई करी बोलया, “हे यीशु, परमपिता परमेश्वरे दे पुत्र। मिंजो तिजो ने क्या कम्म? मै तिजो ने बिनती करदा है, मिंजो दुख ना दे।” 29 क्योंकि सै उसा बुरिया आत्मा जो उस माणुऐ ला निकलने दा हुकम दे दा था, क्योंकि सै उदे च बार-बार प्रबल होंदी थी। लोक उसयो रसियां कने सुंगला ने बन्दे थे, तमी सै सब केसी जो तोडी दिन्दे था, कने बुरी आत्मा उसयो सुनसान जगा जो नटाई लेई जांदी थी। 30 यीशुऐ उसयो पुछया, “तेरा क्या ना है?” उनी बोलया, “मेरा ना सेना है, क्योंकि मतियां बुरियां आत्मा उदे च समाई गियां थियां।” 31 कने उना उसला बिनती किती की, “सांझो अथाह कुंडे च जाणे दा हुकम मत दींदा।” (Abyssos g12) 32 ओथु पाहडे पर इक बडा बडा सूअरां दा झण्ड चूग्या दा था, उना उसला बिनती किती, “सांझो उना च समाणा दे।” कने यीशुऐ उना जो जाणा दिता। 33 तालू सै बुरियां आत्मा उस माणुऐ ला निकली करी सूअरां दे झण्डे च समाई गियां कने सै झण्ड पहाने ला रिडकी करी दरियाये च पेई गिया कने सारे सूअर डूबी करी मरी गे। 34 उना दे पुहालां नठी करी शेहर कने ग्रांऐ च ऐ खबर सुणाई। 35 कने जडा होया था लोक उसयो दिखणा आये कने जिस माणुऐ ला बुरियां आत्मा निकलियां थियां, उसयो यीशुऐ बखे कपडे पाइकरी कने ठीक-ठाक बैठया दिखीकरी सै डरी गे। 36 कने दिखणे बालयां उना जो दसया, की सै बुरियां आत्मा ने सताया होया माणु कियां ठीक होया। 37 तालू गिरासे दे लोकां दे देशे अखे-बखे दे लोकां यीशुऐ ने बिनती किती, की सांडे थैलू ला चली जा: क्योंकि सै बडे डरी गियो थे। कने सै किस्तिया पर चढी करी चली गिया। 38 जिस माणुऐ चे बुरियां आत्मा निकलियां थियां, सै यीशुऐ ने बिनती करणा लग्गा, की मिंजो अपने सोगी रेंणा दे, पर यीशुऐ उसयो भेजी करी बोलया। 39 “की अपने घरयो बापस चली जा कने लोकां ने बोली दे, की परमेश्वरे तेरे तांई कदे बडे-बडे कम्म किते न।” कने सै जाई करी सारे शेहर च प्रचार करणा लग्गा, की यीशुऐ मेरे तांई कदे बडे-बडे कम्म किते न। 40 जालू यीशु बापस ओआ दा था, तां लोक उसला खुशिया ने मिल्ले; क्योंकि सै यीशुऐ जो निव्याला दे थे। 41 यहूदी जंज घर दे सरदारां चे इक याईर नाये दा सरदार आया, सै यीशुऐ दी इज्जत मान तांई यीशुऐ दे पैरां अग्रे डेई पिया, कने उनी ऐ बोली करी बडी बिनती किती, “मेरे घरे जो चला।” 42 क्योंकि उदी

बाहरां सालां ती इक ही कुडी थी, कने सै मरणे बाली थी। जालू सै चलदा था, तां लोक यीशुऐ पर डेई पोदे थे। 43 कने इक जनानी जिंसा जो बाहरां सालां ला खून चलणे दी बिमारी थी, कने उना अपणी सारी कमाई वेधां पिच्छे खची बैठियो थी कने तमी कुंदे भी हथे ला ठीक नी होइयो थी, 44 उना पिच्छे ला आई करी उदे कपडे दे कुणे जो छुता, झट उसा दा खून निकलन बंद होई गिया। 45 इस पर यीशुऐ बोलया, मिंजो कुनी छुता? जालू सारे मुकरणा लगे, तां पतरस कने उदे साथियां बोलया, “हे स्वामी, तू दिखा दा हे की तेरे अखे बखे इतणी भरी भीड है, कने तिजो पर डेई पोदे न।” 46 पर यीशुऐ बोलया, “कुनकी मिंजो छुता है मिंजो पता लगी गिया है की मिंजो ला शक्ति निकली है।” 47 जालू जनानिया दिखया, की मै लुकी नी सकदी, तालू कमदी होई आई, कने उदे पैरां पर पेईकरी सारे लोकां सामणे दसया, की मै तिजो कजो छुता है, कने कियां मै झट ठीक होई गेई। 48 उनी उसा जो बोलया, “बेटी तेरा भरुसा जडा मिंजो पर था उनी भरुसे तिजो ठीक कितया है, शांतिया ला चलिया।” 49 यीशु हले उसा ने गल्ल करा दा ही था, यहूदी जंज घरे दे सरदारे दे घरे ला कुछ लोकां आई करी बोलया, “की तेरी कुडी तां मरी गेई है?” एण गुप्पे जो कजो तकलीफ दे दा है? 50 जडी गल्ल सै बोला दे थे, उसा गल्लां जो यीशुऐ अणसुणी करिके यहूदी जंज घर दे सरदारे जो बोलया, “डर मत, सिर्फ मिंजो पर भरुसा रख, तां उना ठीक होई जाणा।” 51 घरे आई करी उनी पतरस, कने यहूना, कने याकूब कने कुडिया दे माता-पिता जो छडी करी होर कुसयो भी अंदर नी ओणा दिता। 52 कने सारे उसा तांई रोआ दे थे, पर उनी बोलया, “रोआ मत; सै मरियो नी है पर सुतियो है।” 53 सै ऐ जाणी करी, की मरी गियो है उदा मजाक उडणा लगे। 54 पर उनी उसा कुडिया दा हथ पकडया कने पुकारिकरी बोलया, “हे कुडी उठ।” 55 तालू उदे प्राण बापस आई गे कने सै झट उठी बैठी; फिर उनी हुकम दिता की, इसा जो कुछ खाणे जो दीया। 56 उसा दे माता-पिता हेरान होऐ, पर उनी उना जो चेतावनी दिती, की ऐ जडा होया है, सै कुसी ने मत बोलदे।

9 फिरी यीशुऐ उना बाहरां चेलयां जो सदिकरी उना जो सारियां बुरियां आत्मा जो कडणे कने बमारियां जो दूर करणे दी शक्ति कने हक दिता। 2 कने उना जो परमेश्वरे दे राज्य दा प्रचार करणे, कने बिमारियां जो ठीक करणे तांई भेजया। 3 कने उनी उना ने बोलया, की अपने रस्ते तांई सिर्फ इक सोठी लेनयो। ना तां खणे तांई रोटी लेणी, ना तां झोला, ना ही बटुए च पसे, पर जुंते पाई लेनयो कने होर कोई कपडे पाणे तांई मत लेंदे। 4 अगर कोई हांजांओ अपने घरे रहेणे तांई सदगा, जालू दीकर तुसां उसी ग्रांऐ च रेंगे, तालू दीकर उसी दे घरे च परोणे बणी करी स्की रिया। 5 “जिसा जगा दे लोक तुहांजो अपनागे नी कने तुहाडी सुणगे नी, ओथु ला जांदे बेले अपने पैरां ती धुड जाडी दिनयो, ताकि उना लोकां जो पता लगे की परमेश्वरे दिया तरफा ला मिलणे बाली सजा दे सै अपु ही जिम्मेवार न।” 6 सै निकलिकरी ग्रांऐ-ग्रांऐ च जाई करी शुभसमाचार सुणा दे, कने हर कुथी लोकां जो ठीक करदे फिरदे थे। 7 कने देशे दी चौथाई दा राजा हेरोदेस ऐ सारा कुछ सुणि करी घबराई गिया, क्योंकि मतयां बोलया, की यहूना मरी करी जिन्दा होई गिया है। 8 कने मतयां ऐ बोलया, की एलिय्याह दिखया है: कने केईयां बोलया की पारणे परमेश्वरे दा संदेश देणेबाले दा तां मै सिर कटबाया था तां हुण ऐ कुण है, जितदे बारे च ऐसिया गल्लां सुणांदा मै?” कने हेरोदेसे जो उसयो दिखणे दी इच्छा होई। 10 जालू सै प्रेरित जिना जो यीशुऐ भेजया था, सै यीशुऐ बाल मुडी करी आये कने उदे चारों बखे खडोई, कने जडा कुछ उना किता, कने सिखया था, उसयो दसी दिता, कने सै उना जो लग करिके बैतसैदा नांऐ दे इकी शेहरे जो लेई गिया। 11 ऐ जाणी करी भीड उदे पिच्छे चली पेई, कने सै खुशिया ने उना ने मिला, कने उना सोगी परमेश्वरे दे राज्य दियां गल्लां करणा लग्गा, कने जडे ठीक होणा चांदे थे उना जो ठीक किता। 12 जालू संज होणा लगी, तां उना बाहरां आई करी उसयो बोलया, “भिडा जो बिदा कर, ताकि असां अखे बखे दे ग्रं कने बस्तियां च जाई करी अपने रेंणे तांई कने रोटिया दा इंतजाम करन, क्योंकि असां ऐथु सुनसान जगा च न।” 13 यीशुऐ उना जो बोलया, “तुसां ही उना जो खाणे जो दिया।” उना बोलया, “साडे बाल पंज रोटियां कने दो मछियां जो छडी करी कुछ होर कुछ नी है; पर हॉ, अगर असां जाई करी इना सारयां लोकां तांई रोटियां



खरीदी लेई ओन, तां होई सकदा है।” 14 (क्योंकि ओथु लगबग पंज हजार मर्द थे।) कने उनी अपने चेलयां ने बोलया, उना जो पंजा-पंजा करिके झुण्डा च बडाई दिया। 15 उना तियां ही किता, कने सबना जो बटाई दिता। 16 तालू उनी सै पंज रोटीयां कने दो मछियां लिईयां, कने स्वर्गे पासे दिखीकरी धन्याबाद किता, कने तोडी-तोडी करी चेलयां जो दिन्दा गिया ताकि सै लोकां जो परोसी दें। 17 सारे खाई करी रजी गे। कने जालू रोटी खायीं बैठे तालू चेलयां बाकी बचियाँ रोटीयां कने मछियां गिठेइयां कने उसला बाहरा टोकरीयाँ भरई गियां। 18 जालू यीशु एकांत च प्राथना करा दा था, कने चले उदे सोगी थे, तां उनी उना ला पुछया, “लोक मिंजो क्या बोलदे न?” 19 चेलयां जबाब दिता कुछ लोक बोलदे ने कि तुसां यहन्ना बपतिस्मा देणेबाले न; पर कोई-कोई बोलदे एलिय्याह है, कने कोई-कोई बोलदे न कि पुराणे जमाने दे परमेस्वरे दा संदेश देणेबालयां च कोई इक है। 20 यीशुए उना ला पुछया, “पर तुसां मिंजो क्या बोलदे न?” “पतरसे जबाब दिता, परमेस्वरे दा मसीहा।” 21 तालू यीशुए उना जो समझाई करी बोलया, “ऐ कुसी ने मत बोलदे।” 22 कने उनी बोलया, कि मैं, जडा माणुए दा पुत्र है, “मिंजो मने दुख सेहणे पोणे न, कने यहूदी अगुवे, बड़े याजकां, कने यहूदी व्यवस्था जो सिखाणे बालयां मिंजो अपनाना नी है, कने मैं मारया जाणा है, कने फिरी मैं तिन्ना रोजां बाद मरयां च जिन्दा होई जाणा है।” 23 यीशुए उना सबना जो बोलया, “जडा कोई मेरा चेला बनणा चांदा है, उसयो अपणिया शरीर दिया इच्छां कने जडियां तरकिबां बणाईयां न उना जो छडी करी! कने जडे मिजो तांई मरणे जो तैयार रेंदे न सेई मेरे चले बणी करी मिजो पिच्छे चली सकदे न। 24 कोई माणु ऐसा नी करणा कने अपने प्राणा जो बचाणा चांहागा, उनी परमेस्वरे सोगी आत्मिक जिन्दगी जिणे दा मोका गवाई देणा है। पर जडा माणु मिजो पर भरोसा करणा कने मेरे शुभसमाचार दिया बजा ने मरणा उस माणुए जो परमेस्वरे सोगी सदा तांई दी जिन्दगी मिलणा। 25 अगर तुसां संसारे दा सब कुछ पाई लेंगे कने पर परमेस्वरे सोगी हमेशा दी जिन्दगी जिणे दा मोका गवाई दिगे, तां उदा क्या फायदा? इक माणु परमेस्वरे जो क्या देई सकदा है, जडा उदी हमेशा दी जिन्दगी खरिदागा? कुछ नी! 26 तुहाडे च अगर कोई माणु मिजो अपना परमेस्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाडा मजाक उडाणा। फिरी जालू मैं माणुए दा पुत्र, पबित्र स्वर्गदातां सोगी धरती पर ओणा है, तां मैं उना लोकां जो भी अपना चेला मन्णे ला मना करी देणा है, तालू सारयां लोकां मरी महिमा दिखणी जडी मेरे पिता दी है।” 27 “मैं तुसां ने सच बोलदा है, की जडे ऐथू खडुतयो न, उना च कोई-कोई ऐसे न, की जालू दीकर परमेस्वरे दा राज्य नी दिखी लेंगे, तालू दीकर उना मौत दा स्वाद नी चखणा है।” 28 इना गल्लां दे कोई अठ रोज बाद सै पतरस, कने यहन्ना कने याकूब जो सोगी लेईकरी प्राथना करणे तांई पहाडे पर गिया। 29 जालू सै प्राथना करा दा ही था, तां उदे चेहरे दा रूप बदलई गिया, कने उदे कपडे चिटे होईकरी चमकणा लगे। 30 कने दिखा, दो परमेस्वरे दे संदेश देणेबाले मूसा कने एलिय्याह जो, जडे बड़े पहले जिन्दा थे उना जो यीशुए सोगी गल्लां करदे दिखया। 31 ऐ महिमा सोगी मिल्ले, कने उदे मरणे दी चचां का दे थे, जडा यस्शलेम च होणेबाला था। 32 पतरस कने उदे साथी निद्रा ने भरस्यो थे, जालू ढंगे ने उठी होए, तां उदी महिमा; कने उना दो आदमियां जो, जडे उदे बखे खडुतयो थे, दिखया। 33 जालू सै उदे बखे ला जाणा लगे, तां पतरसे यीशुए जो बोलया, “प्रभु जी, साडा ऐथू रेंणा ठीक है, इस तांई असां ऐथू तीन तम्बू बणादे न, इक तेरे तांई, इक मूसा तांई, इक एलिय्याह तांई।” पतरसे ऐ इस तांई बोलया की, सै कने दुजजे दो चले डरी गियो थे, कने नी जाणदे थे क्या बोलणा क्या करणा। 34 सै ऐ बोला दा ही था, की इक बदले आई करी उना जो डकी लिया, जालू सै उस बदले ने घिरणा लगे तां सै डरी गे। 35 कने उस बदले च ऐ अबाज निकली, “ऐ मेरा प्यारा पुत्र है, कने मैं इसला खुश है, कने जडा ऐ बोलदा है उसयो ध्यान ने सुणा।” 36 ऐ अबाज होंदे ही यीशुए जो उना किल्ला दिखया; कने सै चुप रे, कने जडा कुछ उना दिखया था, उदी कोई गल्ल उना रोजा च कुनी नी किती। 37 कने दुगे रोजे जालू सै पहाडे ला उतरे, तां इक बडी बडी भीड उसला मिलणा आई। 38 तालू भिडा च इक माणुए जोरे ने बोलया, गुरू जी, मैं तिजो ने बिनती करदा है, की मेरे पुत्रे पर दया कर; क्योंकि सै मेरा इकलोता पुत्र है। 39 कने इक बुरी आत्मा उसयो पकडी लेंदी है,

कने सै इकदम बकणा लगी पोंदा है, कने सै आत्मा उसयो ऐसा मरोडदी है, की उदे मुए ला झाग निकली पोंदा है; कने उसयो गेरेकी करी बडिया मुशकिला ने छडदी है। 40 कने मैं तेरे चेलयां ने बिनती किती, की इसा जो कडी दिया; पर सै कडी नी सके। 41 ऐ सुणीकरी यीशुए उना जो जबाब दिता, “हे अविश्वासी लोकों, मैं कालू दीकर तुहाडे सोगी रेंगा, कने कालू दीकर तुहाडे अविश्वास जो सेहन करणा उसी जागते जो मेरे बाल लोआ।” 42 सै ओआ दा ही था की बुरिया आत्मा उसयो पटकी करी मरोडया, पर यीशुए बुरिया आत्मा जो डांटया कने जागते जो ठीक करिके उदे पिता जो देई दिता। 43 तालू सारे लोक परमेस्वरे दी इसा शक्तिया ला हेरान होए। पर जालू सारे लोक उना सारे कम्मा ने जडे सै करदा था, हेरान होआ दे थे, तां उनी अपने चेलयां ने बोलया, 44 “ऐ गल्लां तुसां मत भुलदे, क्योंकि माणुए दा पुत्र, मेरे दुश्मणा दे हथे पकडाया जाणा है।” 45 पर ऐ गल्ल उना दिया समझा च नी आई, कने ऐ उना ला छिपी रेंई; ताकि उना जो पता नी लागे, कने सै इसा गल्ला दे बारे च पुछणे ला डरदे थे। 46 फिरी उना च ऐ बेहस होणा लागी की, की सांझो चे बडा कुण है? 47 पर यीशुए उना दे मने दी गल्ल जाणी लेई, कने इक बच्चे जो लेईकरी अपने बखे खडेया, 48 कने उना ने बोलया, “जडा कोई मेरे नाए ने इस बच्चे जो अपनांदा है, सै मिंजो अपनांदा है, कने जडा कोई मिंजो अपनांदा है, सै मिंजो भेजणे बाले जो अपनांदा है, क्योंकि जडा तुहाडे च सबना ला छोटा है, सेई बडा है।” 49 तालू यहन्ने बोलया, “प्रभु जी, असां इकी माणुए जो तेरे नाए दिया शक्तिया ने बुरियां आत्मा जो कडदे दिखया है, कने असां उसयो मना भी किता, क्योंकि सै साडे सांई तेरा चेला नी था।” 50 यीशुए उसयो बोलया, “उसयो मना मत करा; क्योंकि जडे साडे बैरी नी है, सै साडे सोगी साथी न।” 51 जालू यीशुए दे स्वर्ग जाणे दे दिन पुरे होणे बाले थे, तालू उनी यस्शलेम जाणे दा बिचार पका किता। 52 यीशुए ओथु जाणे ला पहले अपने अग्रे संदेश देणेबाले दूत भेजे: सै सामरियां दे इक गांए जो गे, ताकि उदे तांई जगा तैयार करन। 53 पर उना लोकां उसयो उतरणा नी दिता, क्योंकि सै यस्शलेम शेहरे जो चलयथा था। 54 ऐ दिखीकरी उदे चेलयां याकूब कने यहन्ना ने बोलया, “प्रभु जी; क्या तू चांदा है, की असां हुकम देन, की अम्बरे ला अग्न पोये कने उना जो भस्म करी दे?” 55 पर यीशुए उना जो मुडी करी डांटया कने बोलया, “तुसां नी जाणदे न की तुसां कदेई आत्मा दे न। 56 क्योंकि माणुए दा पुत्र लोकां दे प्राणा जो खत्म करणे तांई नी पर बचाणे तांई आया है।” कने सै कुसकी होरसी गांए जो चली गे। 57 जालू सै रस्ते च चलयो थे, तालू कुम्की उसयो बोलया, “जिथू-जिथू तू जागा, मैं भी तेरे पिच्छे जाणा।” 58 यीशुए उसयो बोलया, “लोमडियां जो रेहणे तांई कुडी न, कने अम्बरे दे पंछियां दे घांसले होंदे न; पर मिंजो, माणुए दे पुत्रे बाल इक भी घर नहीं है, जिथू मैं सोई सकें।” 59 उनी दुगे ने बोलया, “मेरे चले बणी जा।” उनी बोलया, “प्रभु जी, मिंजो पहले जाणा दे ताकि मैं अपने पिता जो दर्बी ओए।” 60 उनी उसला बोलया, “जडे लोक आत्मिक स्ने ने मरयो न, उना जो अपने मुर्दे दबाणा दे, पर तू जाई करी परमेस्वरे दे राज्य दा शुभसमाचार सुणा।” 61 इक होरनी बन्दे बोलया, “प्रभु जी, मैं तेरे पिच्छे ओंगा; पर पहले मिंजो जाणा दे ताकि मैं अपने घरे दे लोकां ने बिदा लेई ओए।” 62 यीशुए उसयो बोलया, “जडा कोई अपना हथ हले पर रखीकरी पिच्छे दिखदा है, सै परमेस्वरे दे राज्य जोगी नी है।”

**10** इंदे बाद प्रभुए सतर होर चले रखे कने जीसी-जीसी शेहरे कने जगा पर उनी अपु जाणे दी योजना बणाईयो थी ओथु उना जो दो-दो करिके अग्रे भेजया। 2 कने उनी उना जो बोलया, “पकियो फसला दे खतर बडे न; पर मजदूर थोडे न: इस तांई खेतरे दे मालिके ने बिनती करा, की सै अपने खेतरां जो बडणे तांई मजदूर भेजी दे।” 3 जा; दिखा मैं तुहाजो भेडां सांई भेडियां दे बिच भेजदा है। 4 इस तांई ना बटुआ, ना झोली, ना जूते; ना कने हा ही रस्ते च कुसयो नमस्ते करा। 5 जिसदे भी घरे जा, पहले बोला, इस घरे दा कल्याण हो। 6 अगर ओथु कोई मेहमाना दा आदर करणे बाला होंगा; तां तुहाडी आशीष उस पर होणी, नी तां तुहाडे बाल बापस आई जाणी। 7 उसी घरे च रिया, उस घरे ला तुहाजो जडा कुछ मिलदा है, सेई खा पिया; क्योंकि मजदूर जो तां अपनी मजदूरी मिलणा चाईदी; घरे-घरे मत फिरदे। 8 कने जिसी शेहरे च जांगे, कने ओथु दे लोक तुहाजो अपने घरे खुशिया ने अपनांगे, तां जडा कुछ तुहाडे सामणे रखगे सै ही

खा। 9 ओथु दे बिमारां जो ठीक करा: कने उना जो बोलणा, परमेश्वरे दा राज्य तुहाडे बखे आई रिया है। 10 पर जिस शेहरे च जांगे, कने ओथु दे लोक तुहांजो अपनगो नी, तां उना दे बजारां च जाई करी बोला, 11 तुहाडे शेहरे दी धुड भी, जडी साडे पैरां च लगियो है, असां तुहाडे सामणे झाडी दिन्दे न, तमी ऐ समझी लिया, की परमेश्वरे दा राज्य तुहाडे बखे आई रिया है। 12 “मैं तुसां ने सच्च बोलदा है, की न्याय बाले रोजे सै शेहरे जिथु दे लोक परमेश्वरे दा बचन नी मंदे, उना दी हालत सदोम दे लोकां दी हालत ला भी जादा भयानक होणी है।” 13 “हाया! खुराजीन शेहर कने बैसैदा शेहर दे लोको! जडे अनोखे कम्म तुहाडे शेहरे च कितयो न, अगर सै कम्म सूर कने सैदा शेहरे च किते जांदे, तां सै ऐ दसणे तांई की उना अपने पापां ला पन्नाताप करी लिया है, तां बडे पेहले टाट ओढी लेंदे, कने धुडी अपने उपर छिडकी लेंदे।” 14 की परमेश्वरे दे न्याय दे रोज जडी सजा सूर कने सैदा शेहरे दे लोकां जो देणी है, सै सजा तुहाडिया सजा ला घट होणी है। 15 हे कफरनहम शेहरे दे लोको तुसां क्या स्वर्ग दीकर उच्च किते जाणे न? तुसां तां पनाल लोक दीकर थले किते जाणे न। (HadEs 986) 16 “जडा तुहाडी सुणदा है, सै मेरी सुणदा है, जडा तुहांजो तुच्छ समजदा है, सै मिंजो भी तुच्छ समजदा है; कने जडा मिंजो तुच्छ समजदा है, सै मेरे भेजने बाले जो भी तुच्छ समजदा है।” 17 सै सत्तर चले खुशिया ने बापस आई करी बोलणा लगे, प्रभु जी, बुरियां आत्मा भी साडी गल्ल मन्नी जालू असां उना जो तरे नाणे न हुकम दिता। 18 यीशुऐ उना ने बोलया, जालू बुरियां आत्मा तुहाडा हुकम मनया, तां मैं शैताने जो बिजलिया सांई स्वर्ग ला पोदे दिखया। 19 मैं तुहांजो सपां कने बिच्छुआं जो मारणे, कने शैताने दी शक्तिया पर हक दितया है; कने कुसा भी चीजा ने तुहांजो कोई नुकसान नी होणा। 20 पर तुसां इसला खुश मत होआ, की बुरियां आत्मा तुहाडा हुकम मंदियां न, पर इसला खुश होआ की तुहाडे ना स्वर्ग च लिखयो न। 21 तालू सै पबित्र आत्मा च होईकरी खुश होई गिया, कने बोलया, पिता जी, स्वर्ग कने धरतिया दे प्रभु, मैं तेरा धन्यवाद करदा है, की तू इना गल्लां जो ज्ञानिया कने समजदारां ला लुकाई रखया, कने बचयां पर प्राट कितया है, पिता जी, क्योकि तिजो ऐई खरा लग्गा। 22 “मेरे पिता मिंजो सब कुछ देई दितया है; कने कोई नी जाणदा है की पुत्र कुण है सिर्फ पिता ही जाणदा है, कने पिता कुण है ऐ भी कोई नी जाणदा, सिर्फ पुत्र जाणदा कने सै जिदे पर पुत्र उसयो प्रकट करणा चांगा।” 23 तालू यीशुऐ चेलयां पासे मुडी करी उना जो एकांत च बोलया, “धन्य न सै हखी, जडियां गल्लां तुसां दिखदे न उना गल्लां जो सै भी दिखदियां न। 24 क्योकि मैं तुहांजो ने बोलदा है, की परमेश्वरे दे संदेश देणेबाले मते लोक कने राजे चांदे थे, की जडियां गल्लां तुसां दिखदे न उना जो दिख्वा, पर नी दिखियां कने जडियां गल्लां तुसां सुणदे न उना जो सुणा, पर नी सुणियां।” 25 इक दिन जालू यीशु लोकां जो सिखा दा था तां इक यहदी मूसा दी व्यवस्था जो सिखाणे बालयां चे उठया; कने ऐ बोली करी उदी परख लेंणा लग्गा, “गुरू जी, हमेशा दी जिन्दगिया दा बारिस बणने तांई मैं क्या करे?” (aiōnios g166) 26 यीशुऐ उसयो बोलया, “मूसा दी व्यवस्था च क्या लिखया है? तू उना जो कियां समझदा है?” 27 उनी जबाब दिता, “तू अपने प्रभु परमेश्वरे सोगी अपने सोरे तन मन कने अपने सोरे प्राण कने अपने सोरे जोरे ने कने अपणिया सारिया अकला ने प्यार कर; कने अपने पडोसिये ने अपणयां सांई प्यार रख।” 28 यीशुऐ उसयो बोलया, “तू ठीक जबाब दिता, ऐई कर तां तिजो हमेशा दी जिन्दगी मिलणी।” 29 पर उनी अपने कम्मा जो सही ठेहराणे तांई यीशुऐ ला पुछया, तां मेरा पडोसी कुण है? 30 यीशुऐ उसयो इक कहाणिया दे जरिये जबाब दिता, इक माणु यकशलेम शेहर ला परीहो शेहर जो चलया था, कने डाकुयां उस पर हमला करी दिता कने उदे कपडे उतारी दिते, कने उसयो मारी-कुटी करी अदमरा करी के छडी गो। 31 कने इयां होया की उस रस्ते चे इक यहदी याजक चलया था, पर याजके उसयो दिखीकरी उदी कोई मदद नी किती कने ओथु ला चली गिया। 32 इयां ही इक लेवी जडा यहदी मंदरे च कम्म करदा था उसा जगा पर आया, उनी भी उसयो दिखीकरी उदी कोई मदद नी किती कने तुज्जे पासे ला चली गिया। 33 पर इक सामरिया प्रदेश दा इक माणु उसा जगा ला निकल्या जिथु सै जख्मी माणु पिया था, उसयो दिखीकरी उस पर तरस आई गिया। 34 कने उदे बखे आई करी उनी उदे जखमा पर तेल कने दाखरस लाईकरी पटी बन्नी, कने अपणिया सवारिया पर चडाई करी उसयो संरा

च लेई गिया, कने उदी सेवा किती। 35 दूरे रोजे उनी दो दीनार (दो दीनार मतलब दो दिना दी मजदूरी) देईकरी उसा सरां दे मालके जो दिते, कने बोलया, इसदी सेवा करनयो, कने जडा कुछ तेरा होर लग्गा, सै मैं तिजो बापस आई करी देई दिगा। 36 तालू यीशुऐ पुछया “हूण तेरिया समझा च जिस पर डाकुआं हमला कितया था, उदा इना तिन्ना चे पडोसी कुण होया?” 37 उनी बोलया, “सै ही जिनी उस पर तरस खादा था।” यीशुऐ उसयो बोलया, “जा, तू भी इयां ही कर।” 38 यीशु कने उदे चले जालू चलयो थे, तां सै इक गांणे च गिया, ओथु मार्या नाणे दी इकी जनानिया उसयो अपने घरे ओणे दा नियोता दिता। 39 कने मरियम नाणे दी उसा दी इक बेंहण थी; सै प्रभु दे पैरां बखे देईकरी उदी शिक्षा जो सुणा दी थी। 40 पर मार्या रोटियां बणादे-बणादे घबराई गई कने उदे बखे आई करी बोलणा लग्गी, प्रभु जी, क्या तिजो जरा भी चिंता नी है की मेरिया बेंहणा मिंजो सोरे कम्म करणे तांई किल्ला छडी दितया है? इस तांई उसा जो बोल, की मेरी मदद कर। 41 यीशुऐ उसा जो जबाब दिता, “मार्या, हे मार्या; तू बडियां गल्लां तांई चिन्ता करदी कने घबरांदी है। 42 पर इक ही गल्ला दी चिन्ता कने दी जरस्त है, कने मरियमा से कम्म तोपी लिया है, कने इसा जो इसला दूर नी कित्ता जाणा है।”

**11** यीशु कुसकी जगा पर प्राथना करा दा था। कने जालू सै प्राथना करी बैठा, तां उदे चेलयां चे इकी चले उसयो बोलया, “प्रभु जी, जियां यहूने अपने चेलयां जो प्राथना करणा सिखया है तियां ही सांझो सिखाई दे।” 2 यीशुऐ उना ने बोलया, तुसां इस तरीके ने प्राथना करणा चाइदी की: हे साडे पिता परमेश्वर, जडा तू स्वर्ग च है; तेरा ना सोरे लोकां च पबित्र मनया जा, कने तेरा राज्य सांझो च ओपे। 3 सांझो हर रोज सै खाना दे जडा सांझो उस दिने तांई चाइदा है। 4 कने जियां असां सांझो सोगी गलत करणे बालयां जो माफ कितया है, तियां ही तू भी साडियां गलतियां जो माफ कर कने सांझो परख च फसणे ला बचा। 5 कने यीशुऐ उना ने बोलया, तुसां चे कुण है, जिसदा इक मित्र हो, कने सै अधिया राती जो उदे घरे जाई करी उसयो बोले, मिंजो तिन्न रोटियां दे। 6 क्योकि मेरा इक मित्र हुणी मिंजो मिलणे तांई आया है कने मिंजो बाल उसयो खुआणे तांई कुछ नी है। 7 कने सै अंदरे ला जबाब दिन्दा है, मिंजो तंग मत कर; हूण तां दरबाजा बंद है, कने मेरे बच्चे मेरे सोगी बिस्तरे च सुतयो न, इस तांई मैं उठीकरी तिजो कुछ नी देई सकदा। 8 मैं तुहांजो ने जडा बोलदा है उसयो समझा, अगर सै उदा मित्र होणे पर भी उसयो उठी करी री नी देणा च, फिरी भी उस दोस्ते दे बार-बार बिनती करणे पर उदिया जरस्तां दे अनुसार उतणा उठी करी जरस्त दिगा। 9 “तुसां जो जडा चाइदा सै परमेश्वरे ला मंगा कने उनी तुसां जो देणा; अगर तुसां तोपणे, तां तुसां जो मिलणा; अगर खटखटांगे, तां तुहाडे तांई खुलणा।” 10 क्योकि जडा कोई मंगदा है, उसयो मिलदा है; जडा तोपदा है, उसयो मिलदा है; कने जडा खटखटादा है, उदे तांई खुलदा है। 11 तुहाडे चे कुण ऐदिया पिता होंगा, की जालू उदा पुत्र रोटी मंगे, तां उसयो पथर दे: या मच्छी मंगे तां मछिया दे बदले सप दे? 12 या अंडा मंगे तां उसयो बिच्छु देई दे? 13 “अगर तुसां बुरे होईकरी अपने बचयां जो खरियां चिजा देणा जाणदे न, तां तुहाडे स्वर्गीय पिता परमेश्वरे अपने मंगणे बाले जो केई जादा बदीकरी पबित्र आत्मा देणे तांई तैयार है।” 14 फिरी उनी इक गूंगी बुरी आत्मा जो कडया; जालू सै बुरी आत्मा निकली गई, तां सै गूंगा बोलणा लग्गी पिया; कने लोकां जो हेरानी होई। 15 पर उना चे कितणयां ही बोलया, “ऐ तां बुरियां आत्मा दे सरदार शैताने दी मदद लेईकरी बुरियां आत्मा जो कडदा है।” 16 हेरानी उदी परख लेणे तांई उसला स्वर्ग दा कोई निशाण दसणे तांई बोलया। 17 पर उनी, उना दे मने दियां गल्लां जो जाणी करी, उना ने बोलया, “अगर कुसी राज्य च लोक अपु चे ही लडदे रेंगे तां सै राज्य उजडी जांदा है। कने अगर कुसी घरे दे माणु अपु चे ही लडदे रेंगे तां सै घर भी उजडी जांदा है।” 18 अगर शैतान अपणी ही बुरी आत्मा दे खिलाफ लडगा, तां उनी अपना ही नाश करी लेणा है, तां फिरी उदा राज्य कियां बदी सकदा है? क्योकि तुसां मेरे बारे च तां बोलदे न, की ऐ तां शैताने दिया मददा ने बुरियां आत्मा जो कडदा है। 19 “भला अगर मैं शैताने दिया मददा ने बुरियां आत्मा जो कडदा है, तां तुहाडी ओलाद कुसदिया मददा ने बुरियां आत्मा जो कडदी है? इस तांई तुहाडिया ओलादी ही तुहाडा न्याय करणा है।” 20 पर अगर मैं परमेश्वरे दिया शक्तिया ने बुरियां आत्मा जो कडदा है, तां परमेश्वरे दा राज्य तुहाडे बखे आई रिया है। 21 जालू जोरे बाला माणु

हथियार लेईकरी अपने घरे दी रखवाली करता है, तां उदी संमति बची रेंदी है। 22 पर जालू उसला जादा जौरे बाला उसला लडीं करी उसयो जीती लेंदा है, तां उदे सै हथियार जिना पर उसयो भरोसा था, उना जो खोई लेंदा है कने उदिया संपतिया जो लुटी करी बंडी दिन्दा है। 23 “जडा मेरे सोगी नी है सै मेरे खिलाफ है, कने जडा मेरे सोगी नी बटोलदा है सै खलारदा है।” 24 जालू बुरी आत्मा माणुए ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है। तां सै अपने आपे ने बोलदी है, कि मै अपने तिस्सी घरे जो बापस चली जाणा है, जिस माणुए ला निकली थी, 25 “जालू सै बापस ओदी है तां उस माणुए जो उस घरे सांई पांदी है, जिसयो छेल करी साफ कने सजाया हो।” 26 तालू सै बुरी आत्मा जाई करी अपने ला होर बुरियां सत आत्मा जो अपने सोगी लेई ओदी है, कने सै उदे अंदर बडी करी ओथु रेंदियां न, कने उस माणुए दी हालत पहले ला भी बुरी होई जांदी है। 27 जालू यीशु ए सब गल्लां बोला दा ही था तां भिडा चे इकी जनानिया उचिया अबाजा ने बोलया, “धन्य है सै जनानी जिना तिजो पैदा किता कने तिजो अपना दूध पियाया।” 28 उनी बोलया, “हॉ, पर धन्य न सै, जडे परमेख्वरे दा बचन सुणीकरी मदे न।” 29 जालू बडे भरी लोकां दी भीड गिटी होआ दी थी तां सै बोलणा लग्गा, “इस युगे दे बुरे लोक चिन्न चमत्कार तोपदे न, पर परमेख्वरे दा संदेश देणेबाले योना दे चिन्न चमत्कार जो छडी करी उना जो कोई होर कोई चिन्न नी मिलणा।” कने यीशु उना जो छडी करी चली गया। 30 जियां योना नीनवे शेहरे दे लोकां तांई चिन्न बणया, तियां ही मै माणुए दा पुत्र भी इस युगे दे लोकां तांई चिन्न होणा है। 31 दक्षिणे दिया राणिया न्याय दे रोजे इस बेले दे आदमियां दे सोगी उठी करी, उना जो दोषी बोलणा है, क्योकि सै राजा सुलेमान दा ज्ञान सुणने तांई बडी दुरे ला आई, कने दिखा ऐथु सै है जडा सुलेमान ला भी बडा है। 32 नीनवे शेहरे दे लोकां न्याय दे रोजे इस बेले दे लोकां सोगी खडे होईकरी, इसा पीढी दे लोकां जो दोषी बोलणा है, क्योकि उना योना दा प्रचार सुणिकरी मन बदलया है कने दिखा, ऐथु सै है जडा योना ला भी बडा है। 33 “कोई माणु दिण्या बाली करी थले या टोककरे हेठ नी रखदा है, पर धारिया पर रखदा है ताकि अंदरे ओणे बालयां जो लौ होए।” 34 तेरियां हखी तेरे शरीर तांई इक दिव्ये सांई न, इस तांई अगर तेरी हख साफ है, तां तेरा सारा शरीर भी लौ लुआन है, पर अगर सै बुरी है, तां तेरा शरीर भी नेहरे च है। 35 तांई तां ध्यान रखा, की जडी लौ तिजो च है सै नेहेरा ना होई जाये। 36 इस तांई अगर तेरा सारा शरीर लौ लुआन हो, कने उदा कोई हिंसा नेहेरे च नी रे, तां सारे दा सारा शरीर ऐसा लौ लुआन होणा, जियां उस बेले होदा है, जालू दिण्या अपणिया लौडे ने तिजो लौ दिन्दा है। 37 जालू यीशु अपना प्रचार खत्म करी बेठा, तां इकी फरीसिये उसला बिनती किती, की मेरे घरे रोटी खाणां चल; कने सै अंदर जाई करी रोटी खाणां बैठा। 38 फरीसी जो ए दिखीकरी बडी हेरानी होई की यीशुए खाणां खाणे ला पहले अपने रिती रिबाजा ने हथ पैर नी धोते। 39 प्रभु यीशुए उसयो बोलया, “हे फरीसियो, तुसां ऐसे भांडे न, जडे तां उपरे-उपरे ला तां साफ न, पर तुसां दे मने अंदर लालच कने बुराई भईस्यो है।” 40 हे मुखौं, जिनी बाहरे दा हिंसा बणया है, क्या उनी ही अंदरे दा हिंसा नी बणया है? 41 गरीब लोकां जो दान देईकरी अपना मन अंदरे ला साफ करा, तां दिखा सब कुछ तुहाडे तांई पबित्र होई जाणा। 42 “पर हे फरीसियो, तुहाडे तांई बडा बुरा होणा है! तुसां पुदीने कने जरि दा, कने सारिया भान्तिया दे साग पतयां दा दसमां हिंसा दिन्दे न, पर न्याय जो कने परमेख्वरे दे प्यारे जो टाल्ली दिन्दे न; तुहांजो इयां करणा चाईदा था की इना जो भी करदे रेंदे कने उना जो भी नी छडदे।” 43 हे फरीसियो, तुहांजो तांई बडा बुरा होणा है! तुसां यहूदी जंज पर च खास-खास जगा च आसन कने ए चांदे न की बाजारां च लोक तुहांजो नमस्ते बोलन। 44 “तुहांजो तांई बडा बुरा होणा है। क्योकि तुसां उना लुकियां कबरां दे सांई न, जिना पर लोक चलदे न, पर जाणदे नी न।” 45 तालू इकी व्यवस्था जो सिखाणे बाले उसयो जबाब दिता, “गुरु जी, ऐसिया गल्लां बोली करी तू साडी निंदा करा दा है।” 46 उनी बोलया, “हे व्यवस्था जो सिखाणे बालया, तुहांजो तांई बडा बुरा होणा है। तुसां ऐसे बोझे जो माणुए पर लददे न, जिसयो चुकणा बडा मुशकिल है, पर तुसां अपु उना बोझां जो अपणिया इकी उंगलियां ने भी नी हिलांदे न।” 47 तुहांजो तांई बडा बुरा होणा है। तुसां उना परमेख्वरे दा संदेश देणेबालयां दियां कबरां बणांदे न, जिना जो

तुहाडे बाप दादयां मारी दितया था। 48 इस गल्ला दे तुसां गबाह न, कने अपने बाप दादयां दे कम्मा ने सहमत न; क्योकि उना तां उना जो मारी दिता कने तुसां उना दियां कबरां बणांदे न। 49 इस तांई तां परमेख्वरे दिया अकला भी बोलया है, की मै उना बाल परमेख्वरे दा संदेश देणेबालयां कने प्रेरितां जो भेजगी, कने उना इना चे कितणयां जो मारी देणा, कने कितणयां जो सताणां है। 50 ताकि जितणे भी परमेख्वरे दा संदेश देणेबालयां दा खून इस संसारे दे शुरु ला बहाया है, सबना दा लेखा, इस युगे दे लोकां ला लेणा है। 51 हाबिल दिया हत्या ला लेईकरी परमेख्वर दा संदेश देणेबाले जकयाई दिया हत्या दीकर जिसयो बेदी कने मंदे दे बिच मारया था; मै तुसां ने सचच बोलदा है; उदा लेखा इस बकते दे लोकां ने लेणा है। 52 “व्यवस्था जो सिखाणे बालयां लोकां पर लानत है! क्योकि तुहांजो बाल स्वर्ग जाणे दा रस्ते दा पता था। पर तां भी तुसां उसी रस्ते पर नी चले कने दूजे लोकां जो भी जाणे ला रोकी लिया है।” 53 जालू सै ओथु ला निकलया, तां व्यवस्था जो सिखाणे बाले कने फरीसी बडे पिच्छे पेई गे, कने छेडना लगे, की सै बडियां गल्लां दी चर्च करे, 54 कने उदिया ताका पर लग्गी रे, की उदे मुरे दी कोई गल्ल पकडन।

**12** इतणे च ओथु जालू हजारानां दी भीड होई गई, ऐथु दीकर की लोक इकी दुरे पर डेई पांठे थे, तां यीशुए सबना ला पहले अपने चेलयां ने बोलया, फरीसियां दी कपटरूपी जिन्दगी ला जडी खमिरे सांई हे उसा ला बची करी रेनयो। 2 क्योकि कुछ भी हक्या नी है, जडा खोलया नी जाणा है; कने कुछ छुपया नी है, जडा सामणे नी ओणा है। 3 तांई तां जडा कुछ, तुसां नेहेरे च बोलया है, सै लौड च सुणया जाणा, कने जडा तुसां अंदर कमरयां च कन्ना च बोलया है, उदा छती पर चडी करी प्रचार होणा। 4 “पर मै तुसां ने बोलदा है, जडे मेरे साथी न, कि जडे शरीर जो मारी सकदे न, पर सै आत्मा जो नी मारी सकदे न, उना ला डरदे मत।” 5 मै तुहांजो चेतावनी दिन्दा है की तुहांजो कुसने डरना चाईदा, तुहांजो उस परमेख्वरे ला डरणा चाईदा जिसयो तुहांजो मारणे ला बाद नरके च भेजणे दा हक है। (Geenna 10:67) 6 “क्या बडी घट कीमत च पंज चीडियां नी बिकदियां? तमी परमेख्वर उना चे इकी जो भी नी भुलदा।” 7 बल्कि तुहाडे सिरे दे सारे बाल भी गिणयो न, इस तांई डरा मत, तुसां परमेख्वरे तांई मतियां चीडियां ला भी बदीकरी कीमती न। 8 मै, माणुए दे पुत्र तुहांजो बोलदा है जडे कोई बोलदे न, की सै मेरे चले न, उसयो मै भी अपने स्वर्गीय पिता परमेख्वर दे सामणे अपने चले मनी लेंगा। 9 पर अगर सै दूजयां दे सामणे ए बोलणे ला डरदे न, कि असां यीशुए दे चले न, तां परमेख्वरे भी अपने स्वर्गादूतां सामणे तुहांजो चेला नी मानणा है। 10 पर जडा कोई माणुए दे पुत्रे दे बारे च कोई बुरी गल्ल बोलगा, उदा ए अपराध माफ होई जाणा, पर जडा कोई पबित्र आत्मा दे बारे च बुरा बोलगा, उदा अपराध माफ नी होणा है। 11 “जालू लोक तुहांजो यहूदी जंज घर च कने हाकिमां कने अधिकारियां दे सामणे लेई जांगे, तां चिंता मत करदे की असां कियां या क्या जबाब दें, या क्या बोलन।” 12 क्योकि पबित्र आत्मा तुहांजो तालू ही सिखाई देणा, की क्या बोलणा चाईदा। 13 फिरी भिडा चे इकी माणुए यीशुए बोलया, “गुरु जी, मेरे भाईए जो बोल, की पिता दी जमीन जयादात मिंजो देई दे।” 14 यीशुए उसयो बोलया, “हे माणु, कुनी मिंजो तुहाडा न्याय करणे बाला या धन बंडणे बाला बणया है?” 15 कने यीशुए उना जो बोलया, “ध्यान रखा, कने हर तरा दिया मोहमाया ने अपने आपे जो बचाई रखा; क्योकि कदी भी जिन्दगी उदिया जमीन जायदाद ला जादा नी होदी।” 16 यीशुए उना जो इक कहाणी सुनाई, कुसकी अमरि दिया जमिना च मती भरी फसल होई। 17 तालू सै अपने मने च सोचणा लग्गा, की मिंजो नी समझ ओआ दी की मै क्या करे, क्योकि मेरे बाल तां इतणी जगा ही नी है, जिथु मै अपनी सारिया फसला जो रखी सके। 18 कने उनी बोलया, मै इयां करणा है की अपने गोदामें दियां बखारियां जो तोडी करी उना ला बडियां बणाणियां न; कने ओथु अपनी सारी संपति कने फसल रखणी; 19 कने इदे बाद अपने आपे ने बोलणा, की तेरे बाल मते साला तांई मती धन दौलत कने फसल रखियो है; मजे ने खा पी, सूखे ने रे। 20 पर परमेख्वरे उसयो बोलया, हे मुखौं इसा राती तू मरी जा; तां तालू जडा कुछ तू गठेरया है, सै कुसदा होणा? 21 “इयां ही उस माणुए ने भी होणा है जडा सब कुछ अपने तांई गठेरदा, पर परमेख्वरे दिया सेवा करणे तांई अपनी क्षमता कने धन दौलत खर्च नी

करदा।” 22 फिरि उनी अपने चेलयां ने बोलया, तांई तां मै तुहांजो बोलदा है, अपणी जिन्दगी दी चिंता मत करा, की असां क्या खांगे; ना ही अपने शरीर दी की असां क्या पांगे। 23 क्योंकि रोटिया ला जिन्दगी कने कपड़यां ला शरीर जादा बदीकरी है। 24 कोयां पर ध्यान दिया; ना सै रांटे न, ना सै बडदे न, न उना बाल खेत; ना उना दे गोदाम होंदे न जिथु से गटेरी सकन, तमी परमेश्वर उना जो पालदा है। तुहाड़ी कीमत पछियां ला भी बदीकरी है। 25 तुसां चें ऐसा कुण है, जडा चिंता करणे ने अपणिया जिन्दगिया च इक घडी भी बधाई सकदा है? 26 इस तांई अगर तुसां सबना ला छोटा कम्म भी नी करी सकदे, तां जिन्दगी च दुजियां गल्लां दी कजो चिंता करदे? 27 “जंगली फुलां दे बारे च सोचा की सै कियां बडुं दे न, सै ना तां मेहनत करदे न, कने ना ही कपडे पांटे न, तमी मै तुसां ने बोलदा है, की जालू राजा सुलेमान बाल धन दौलत थी, तालू भी उनी जंगली फुलां चें कुसी सांई भी कपडे नी पायो थे।” 28 इस तांई अगर परमेश्वर दरबडे दे घारे जो, जडा अज है, कने कल अगी च फुकया जाणा, तमी परमेश्वर घारे जो इतणी सुन्दरता दिन्दा है, तां हे अल्पविश्वासियो, तां उनी पक्का तुहाड़ी देखभाल करणी है, तुहाडा भरोसा इतणा घट्ट कजो है? 29 कने तुसां इसा गल्लां दिया तोपा च मत रिया, की क्या खांगे कने क्या पींगे, कने ना ही शक करा। 30 क्योंकि जडे लोक परमेश्वरे जो नी जाणदे सै इना चिजां जो तोपदे रेंदे न; कने तुहाडा पिता जाणदा है, तुहांजो इना चिजां दी जरूरत है। 31 पर उदे राज्य दिया तोपा च रिया, तां ऐ चिजां भी तुहांजो मिली जाणियां। 32 तुसां मेरे तांई भेडां दे झुण्ड सांई न, इस तांई कुसा भी गल्ला दे बारे च मत डरा; क्योंकि तुहाडे परमेश्वर पिता जो ऐ खुशी है, की तुहांजो राज्य दे। 33 अपणिया जमीन जयादात जो बेचिकरी दान करी दीया; कने अपने तांई ऐसे बटुऐ बणां, जडे पराणे नी होंदे, इदा मतलब की स्वर्ण च ऐसा धन गटेरा जडा घटदा नी है कने जिसदे नेडे चोर नी जांदा है, कने खराब करणे बाला कीडा नी लगदा। 34 क्योंकि जिथु तुहाडा धन है, ओथु तुहाडा मन भी लगया रेंदा है। 35 हमेशा सेबा करणे तांई तैयार रिया कने सारी रात तुहाडे दिट्ये बलदे रेंदे न। 36 कने तुसां उना माणुऐ सांई बणा, जडे अपने मालिके जो निययाला दे होन, की सै बियाह ला कालू बापस ओगा; की सै जालू आई करी दरबाजा खट खटागां तां झट उदे तांई खोली देन। 37 धन्य न सै सेवक, जिना जो मालिक आई करी उदे बापस ओणे दी निययाल रखदे दिखे; मै तुहांजो ने सच्च बोलदा, की उनी इक सेवके सांई कपडे पाई करी उना जो रोटी खाणां बठाणा, कने अपु उना जो खाणे तांई परोसणा। 38 अगर सै अधिया राती या ब्यागा पेहर च आई करी उना जो जागदा दिखे, तां सै सेवक धन्य न। 39 पर तुसां ऐ जाणी लिया, की अगर घरे दा मालिक जाणदा, की चौरे कुसा घडिया ओणा है, तां सै जाणदा रेंदा, कने अपने घरे च चोरी नी होणा दिन्दा। 40 तुसां भी मेरे बापस ओणे तांई तैयार रिया; क्योंकि मै, माणुऐ दे पुत्रे ऐसिया घडिया स्वर्ग ला ओणा जालू तुसां मेरे ओणे दी उम्मीद नी कितियो होणी है। 41 तालू पतरसे बोलया, “प्रभु जी, क्या ऐ कहाणी तू सांझो ही बोला दा है की सबना जो बोलदा है।” 42 प्रभु यीशुऐ बोलया, “सै भरोसे लाइक कने अकला बाला भंडारी कुण है, मालिक जिसयो नोकरा-चाकरां दा सरदार बणाऐ ताकि सै उना जो टेमे दा खाणे पिणे दा समान दे।” 43 धन्य है सै सेवक, जिसयो उदा मालिक आई करी ऐसा ही करदा दिखे। 44 मै तुहांजो ने सच्च बोलदा; उनी उसयो अपणिया सारिया संपतिया दा मालिक बणाई देणा। 45 पर अगर सै सेवक सोचना लगे, की मेरे मालिके जो ओणे च हल्ले बडा बकत है, कने सै दासां कने दासियां जो मारणा-कुटणा कने खाणां-पिणा कने शरबी होणा लगे। 46 तां उस दासे दे मालिके प्से रोजे ओणा है जिस दिने सै उसयो निययाला दा नी होणा, कने ऐसी घडी जिसा जो सै जाणदा ना होणा, तालू उदे मालिके ओणा, उसयो खरियां झिडकां देईकरी उदी गिणती अविश्वासियां सोगी करी देणा। 47 कने सै सेवक जडा मालिके दी इच्छा जाणदा था, कने तैयार नी रिया कने ना उदिया मरजिया चलया, उनी बडी मार खाणी। 48 पर जिसयो पता नी होईकरी मार खाणे जोगा कम्म करे उनी घट मार खाणी, तांई तां जिसयो जादा दितया है उसला जादा मंगया जाणा है; कने जिसयो जादा सौपया है, उसला जादा दा हिसाब लेणा है। 49 मै धरतिया पर अगर लागणा आया है; बस ऐ ही चांदा है, की हुण ही लगी जांदी! 50 मिंजो जल्द ही इक भयंकर पीड झेलणा पोणी है; कने जालू दीकर सै पीड नी झलगा तालू दीकर मै बडा बेचेन है। 51

तुसां क्या सोचदे न की मै धरतिया पर लोकां बिच मेल मिलाप करणा आया है? मै बोलदा है, नी मै लग करणा आया है। 52 क्योंकि अगर कुसी इकी घरे दे पंज जणे न, तां उना अपु चे बख रेणा है, तिन्ना जाणया जडे मिंजो पर भरोसा नी करदे उना दों जणयां दा बिरोध करणा जडे मिंजो पर भरोसा करदे न। 53 पिता पुत्रे ने, कने पुत्रे पिता ने बेर रखणा; माता कुडिया ने, कने कुडिया माता ने, ससु नुआ ने, कने नुआ ससु ने बेर रखणा है। 54 कने यीशुऐ भिडा ने भी बोलया, जालू तुसां बदलां जो पशचिम ला उठदे दिखे न, तां झट बोलदे न, की बरखा होणी है, कने इयां ही होदा है। 55 कने जालू दक्षिणी होआ चलदी दिखे न तां बोलदे की लू चलणी, कने इयां ही होदा है। 56 हे कपटियां, तुसां धरती कने अम्बरे दे स्पे च भेद करी सकदे न, पर इस युगे च परमेश्वर क्या करा दा है, उदे बारे च भेद कजो नी जाणदे न। 57 तुसां जो अपु ही फेसला करणा चाईदा की तुहाडे तांई क्या ठीक है? 58 जालू तू अपने मुई सोगी न्याय करणे बाले बाल चलया है, तां रस्ते च ही उसला छुटणे दी कोसिस करी ले इयां ना हो, की सै तिजो जजे बाल लेई जाऐ, कने जज सिपाई बाल देई दे कने सिपाई तिजो जेला च पाई दे। 59 मै तुहांजो बोलदा है, कि जालू दीकर तू दमडी-दमडी नी देई दिगा तालू दीकर ओथु ला नी छुटी सकणा है।

**13** उस बेले कुछ लोक आई रे, कने उना यीशुऐ ने बोलया, की रोमी राज्यपाल पिलातुसे गलील प्रदेशे दे थोडे लोकां दी हत्या करी दितियो थी, जालू से मंदिर च बलि चढा दे थे। 2 ऐ सुणीकरी यीशुऐ उना जो जबाब च ऐ बोलया, “क्या तुसां ऐ समझदे न, की ऐ गलील प्रदेशे दे लोक, बाकी सारयां गलीली लोकां ला जादा पापी थे की उना पर ऐ मुशकिल पेई?” 3 मै तुसां ने बोलदा, की नी थे; पर अगर तुसां भी अपने पापां जो नी मनगे कने मन नी बदलगे तां तुसां भी इयां ही खत्व होणा है। 4 या क्या तुसां समजदे न, की उना ठारा जणयां दे बारे च तुहाडा क्या बोलणा है जालू उना पर शीलोह दा गुम्मत पिया, कने सै दखुई करी मरी गे: क्या सै यरूशलेम शेहेर दे होर सोरे रेणे बालयां ला जादा पापी थे? 5 “मै तुसां ने बोलदा है, की नी थे; पर अगर तुसां मन नी बदलया तां तुसां भी इना सांई ही खत्व होणा।” 6 फिरि उनी ऐ कहाणी भी सुणाई, की कुसकी अंगूरा दे बागे च इक अंजीर दा सख लगया था: सै उदे च फल तोपणा हर साल आया, पर नी मिल्ले। 7 तालू उनी बागे दे रखबाले जो बोलया, दिख मै तिन्ना सालां ला इस अंजीर दे सखे च फल तोपणा ओंदा है, पर मिल्ले नी न, इसयो बडी दे क्योंकि ये खरिया जमिना जो खराब करा दा है। 8 “उनी उसयो जबाब दिता, की हे मालिक इसयो इस साल तां रेंपी दे; की मै इदे चारो पासे खूपी करी खाद पां। 9 अगली बरी अगर ऐ फलगा तां ठीक नितां इसयो बडी दियां।” 10 सन्ते दे रोजे यीशु इकी यहदी जंज घर च उपदेशे दा था। 11 कने ओथु इक जनानी थी, जिसा जो ठारां सालां ला इक बुरी आत्मा बिकलांग करी रखया था, कने सै बडी जादा कुबडी होई गियो थी, कने कुसी भी तरीके ने सिटी नी होई सकदी थी। 12 यीशुऐ उसा जो दिखीकरी सदया, कने बोलया, “हे नारी, तू इसा अपणिया बिमारिया ला छुटी रोई।” 13 तालू उनी उसा पर हथ रखे, कने सै झट सीधी होई रोई, कने परमेश्वरे दी बडाई करणा लगी। 14 इस तांई की यीशुऐ उसा जो सन्ते दे रोजे ठीक किता था, यहदी जंज घरे दा सरदार लोकां ने बोलणा लगा, “इक हपते च छे रोज न, जिना च असां कम्म करी सकदे न, इना रोजा च आई करी ठीक होआ; पर सन्ते दे रोजे नी।” 15 ऐ सुणीकरी प्रभु यीशु जबाब दिता, “हे कपटियां, क्या सन्ते दे रोजे तुसां सोरे जणे अपने दांदा या गधे जो बेकां ला खोलिकरी पाणी पिणा नी लेई जांदे?” 16 ऐ जनानी जडी अब्राहमे दे बंशज है, जिसयो शैताने ठारां सालां ला बन्नी रखया था, क्या ठीक नी था की सन्ते दे रोजे अपने बंधने ला छुड़ाई जांदी? 17 जालू उनी ऐ गल्लां बोलियां, तां उदे सोरे बिरोधी शरमिंदा होई गे, कने सारी भीड उना महान कम्मा ने जडे सै करदा था, खुश होई। 18 फिरि यीशुऐ बोलया, “परमेश्वरे दा राज्य कुसदे सांई है? कने मै उदी तुलना केसने करे?” 19 “सै राईया दे इकी दाणे सांई है, जिसयो इकी माणुऐ लेईकरी अपणिया जमिना च राया है: कने सै बडोईकरी सख बणी गिया; कने अम्बरे दे पछियां उदियां डालियां पर अपने घोसले बणाऐ।” 20 उनी फिरि बोलया, मै परमेश्वरे दे राज्य दी तुलना केसने करे? 21 “सै खमिरे सांई है, जिसयो इकी जनानिया लेईकरी बडे सोरे ओटे च पाया, कने होंदे-होंदे सारा अटा खमीर बणी गिया।” 22 सै शेहर-शेहर, कने

अपने चेलयां सोगी ग्रां-ग्रां होईकरी उपदेश दिन्दा होया यस्शलेम शेहर दे पासे जा दा था। 23 कने कुंनकी यीशुए पुद्यया, “प्रभु जी, क्या परमेश्वरे कुछ लोकां जो ही अनन्तकाल दी सजा ला बचणा है?” उनी उना जो बोलया, 24 परमेश्वरे दे राज्य च जाणे दी कोशिश करा, क्योंकि परमेश्वरे दे राज्य च अंदर जाणा सुंगडे दरबाजे ला अंदर जाणे साईं है, क्योंकि मैं तुसां ने बोलदा है, की मतयाँ अंदर जाणे दी कोशिश करणी है, पर जाईं नी सकणा है। 25 जालू परमेश्वर जडा घरे दा मालिक है उठी करी दरबाजा बंद करी बैठया हो, कने तुसां बाहर खडोई करी दरबाजा खट खटाई करी कने बिनती करी बोलन, प्रभु जी, साडे ताईं खोली दे, कने सै जबाब दे की मैं तुहांजो नी जाणदा, तुसां कुथ ला आयो न? 26 “तालू तुसां बोलणा लगणा, की असां तरे सामणे खादा पीता कने तू साडे बजारां च उपदेश दिता।” 27 पर परमेश्वरे बोलणा, मैं तुसां ने बोलदा है, मैं नी जाणदा तुसां कुथ ला न। हे बुरे कम्म करणे बालयां, तुसां सारे मिंजो ला दूर होई जा। 28 ओथ रोणा कने दंद पीणे: जालू तुसां पूर्वज अब्राहम कने इसहाक कने याकूब कने सारे परमेश्वरे दे संदेश देणेबालयां जो परमेश्वरे दे राज्य च बैठया कने अपने आपे जो बाहर कडया दिखणा। 29 तालू परे संसारे ला लोक आई करी परमेश्वरे दे राज्य दिया दावता च हिस्सेदार होंगे। 30 “कने दिखा, जडे पिछले न, उना पहले होई जाणा, कने जडे पहले न, उना पिछले होणा।” 31 उसा घडिया कितणे ही फरीसियां आई करी उसयो बोलया, ऐथू ला निकली करी चली जा; क्योंकि राजा हेरोदेस तिजो मारी देणा चांदा है। 32 उनी उना ने बोलया, जाई करी उस माणूए जो बोली दिया जडा लोमडियां साईं चलक है, की दिख मैं अज कने कल सारी बुरी आत्मा जो कडदा कने बिमारां जो ठीक करदा है कने तिजे रोजे अपना कम्म पूरा करणा है। 33 तमी मिंजो अज कने कल कने परसु सफर करणा जरूरी है, क्योंकि इक परमेश्वरे दा संदेश देणेबाला सिर्फ यस्शलेम शेहरे च ही मारया जाणा है। 34 “हे यस्शलेम शेहरे दे लोको! तुसां इना परमेश्वरे दा संदेश देणेबालयां जो मारी दिता है, जडे पहले रेंदे थे कने उना लोकां जो पथरां ने मारदे न जिना जो तुहाडे बाल भेजया; कितणी ही बी मैं ऐ चाया, की जियां मुर्गी अणयां बचयां जो अपने फंगा थले गिठे करदी है, तियां ही मैं भी तरे बचयां दी रखबाली करे, पर तू ऐ नी चाया।” 35 “दिखा, तुहाडा मंदिर तुहाडे ताईं उजाडी छडया है, कने मैं तुसां ने बोलदा है; जालू दीकर तुसां नी बोलणे, की धन्य है सै, जडा प्रभु दे नाए ने ओदा है, तालू दीकर तुसां मिंजो कदी नी दिखणा है।”

**14** फिरी यीशु सब्दे दे रोजे फरीसियां दे सरदारां के कुसकी दे घरे रोटी खाणां खाणे ताईं गया: कने सै यीशु जो ढगे ने ताका दे थे की कोई गलती तोपी सकन। 2 ओथ इक माणू था, जिसदे हथ कने परे सजी गियो थे। 3 इसा गल्ला पर यीशुए व्यवस्था जो सिखाणे कने फरीसियां ने बोलया, “क्या सब्दे दे रोजे लोकां जो ठीक करणे अलमति व्यवस्था च है, की नी है?” 4 पर सै चुपचाप ही रे। तालू यीशुए उस पर हथ रखीकरी ठीक कित्ता, कने जाणा दिता। 5 कने उना जो बोलया, “मन्नी लिया कि तुसां के कुसकी दा जागत या दांद सब्दे दे रोजे खुए च पेई जा कने उसयो उस रोजे झट बाहर ना कडे?” 6 सै इना गल्लां दा कोई भी जबाब नी देईं सके। 7 तालू उनी दिखया, की सदयो लोक कियां सै जगा चुणी लेंदे जिथ सब्दे खास लोक बौदे न, तां यीशुए उना जो इक कहाणी सुणाई करी उना ने बोलया, 8 जालू कोई तिजो बियाये दिया धामा च सदगा, तां तुसां उना खास आसना च मत बौदा, कुथकी इयां ना हो की उनी तिजो ला भी बडे खास बदे जो न्युंदर दितियो हो। 9 कने जिनी तिजो कने उसयो दोनो जो न्युंदर दितियो है, सै आई करी तिजो ने बोले, की इसयो जगा दे, तालू तिजो शरमिदा होईकरी सारयां ला पिच्छे बालिया जगा च बोणा पोई। 10 पर जालू तिजो सदयो, तां सारयां ला पिच्छे बालिया जगा जाईं करी बेईं जा, की जालू सै, जिनी तिजो सदया हे सै ओए, कने तिजो ने बोले की हे मित्र, अग्रे जाईं करी खास बाली जगा च बैठ; तालू तरे सोगी बोणे बालयां दे सामणे तेरी बडाईं होंगी। 11 “क्योंकि जडा कोई अपने आपे जो बडा महान बणांगा, उसयो छोटा कित्ता जाणा; कने जडा कोई अपने आपे जो छोटा बणांगा, सै सब्दे महान कित्ता जाणा।” 12 तालू यीशुए अपने न्युंदर देणेबाले फरीसियो जो भी बोलया, “जालू तू दिने दा या राती दा खाणां खांगा, तां अपने दोस्तां या भाईयां या रिश्तेदारां या अमीर पडोसियां जो मत सददा, की इयां ना हो, की सै भी तिजो सदन, कने जडा तू खाणा खुआया उदा

बदला होई जाऐ।” 13 “पर जालू तू रोटी खाए, तां गरीबां जो, लंगडयां जो कने अनन्यां जो सदी लियां। 14 तालू तू धन्य होणा, क्योंकि उना बाल तिजो देणे ताईं कुछ नी है, पर जालू धमी लोकां दे फिरी जिन्दा होई जाणा तालू परमेश्वरे तुहांजो इदा इनाम देणा।” 15 उदे सोगी रोटी खाणे बालयां के इकी ऐ गल्लां सुणिकरी उसयो बोलया, “धन्य है सै, जडा परमेश्वरे दे राज्य दिया धाम च शामिल होंगा।” 16 उनी उसयो बोलया, कुनकी माणूए बडी बडी धाम दिती कने मतयां जो सदया। 17 जालू खाणां तैयार होई गया, तां उनी अपने नोकरे जो भेजया कि जिना जो नियुंदर दितियो उना लोकां जो बोली ओआ, की ओआ, खाणां तैयार है। 18 पर सै सारे दे सारे माफी मंणा लगे, पहले माणूए उसला बोलया, मैं खेत खरीदया है कने जरूरी है की मैं उसयो दिखे; मैं तिजो ने बिनती करदा है, की मिंजो माफ करी दे। 19 दूए माणूए बोलया, मैं पंज जोडी दांद खरिदयो न, कने उना जो परखणा जाणा है; मैं तिजो ने बिनती करदा है की मिंजो माफ करी दे। 20 इकी होरनी बोलया, की मैं बियाह कित्ता है, इस तां मैं नी आई सकदा है। 21 उनी सेवके आई करी अपने गालिने ने ऐ गल्ल सुणाईं तालू घरे दे मालिके गुस्से च आई करी बोलया, शेहरे दे बजारां कने गलियां च जाई करी झट कंगालां, टुडे, लंगडयां कने अनन्यां जो ऐथू लेईं ओआ। 22 सेवके फिरी बोलया, हे मालिक, जियां तू बोलया था, तियां ही कित्ता है; फिरी भी जगा है। 23 “मालिके सेवके ने बोलया, सडकां कने बागां च जाई करी लोकां जो मजबूर करी के लेईं आए ताकि मेरा घर भरईं जा। 24 क्योंकि मैं तुसां ने बोलदा है, की पहले सदयो होए लोकां के कोई भी मेरिया रोटिया जो नी चखणा।” 25 कने जालू मती भीड यीशुए सोगी चलियो थी, तां उनी पिच्छे मुडी करी उसला बोलया। 26 “जडे लोक मेरे बाल ओदे न, सै तालू दीकर मेरे चले नी बणी सकदे, जालू दीकर अपने माता-पिता कने घरे बाली कने बच्चे कने भाई बंधण कने अपने आपे ला जादा प्यारा मिंजो ने नी करदे।” 27 जडा मेरिया बजा ला दुख सेहन कने मरणे ताईं तैयार नहीं है, सै भी मेरा चेला बणने दे लायक नहीं है। 28 “अगर तुसां के कोई इक बडा बडा घर बणाणा चांदा हो, तां उनी सब्दे पहले बेईकरी इसा गल्ला दा हिसाब लाणा की इसयो बणाणे च कित्ता खर्चा ओणा, कने दिखणा की इसयो पूरा करणे ताईं पूरा पैसा है की नी।” 29 अगर उनी इयां नी कित्ता, तां उनी जालू नियां पाई करी घरे जो पूरा तैयार नी करी सकणा, तां सारे दिखणे बाले ऐ बोलिकरी उदा मजाक उडाणा, 30 की इनी माणूए घर बणाणा तां शुरू कित्ता, पर पूरा बणाईं नी सकया? 31 “अगर इक राजा दस हजार माणूआं जो लेईकरी दूए राजे ने लडना चलया हो, जडा बी हजार माणूआं जो लेईकरी उस पर हमला करणा ओआ दा हो, तां सब्दे पहले बेईकरी इसा गल्ला पर बिचार करे की जडा बी हजार लेईकरी मिंजो ने लडना ओआ दा है, क्या मैं उदा सामणा करी सकदा है की नी?” 32 नितां उदे दूर रेंदे ही, उसला संधी करणे दे बारे च गल्ल बात करणे ताईं सै दूतां जो भेजे। 33 इयां ही तुसां के जडा कोई अपना सब कुछ छडी दे, सै ही मेरा चेला होई सकदा है। 34 लूँण तां खरा होंदा है, पर अगर उदा स्वाद बिगडी जा, तां उदा स्वाद कियां नमकीन करणा? 35 “सै तां ना जमिना दे ना तां उदा दे कम्मे ओदा है: उसयो तां लोक बाहर फेंकी दिन्दे न। जिस बाल सुणने ताईं कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

**15** सारे कर लेणेबाले कने पापी लोक यीशु बाल ओदे थे ताकि उदी सुणन। 2 कने फरीसी कने व्यवस्था जो सिखाणे बाले बोलणा लगे, “ऐ तां पापी लोकां ने मिलदा है कने उना सोगी खाणा खांदा है।” 3 तालू उनी उना जो ऐ कहाणी सुणाई, 4 “अगर तुसां के कुसी बाल सो भेडां होन, कने उना के इक गबाची जाये तां सै उना नडिनुए भेडां जो सुनसान जगा च छडी करी, उसा गवाचिया जो तालू दीकर तोपे जालू दीकर सै मिल्ली न जा।” 5 कने जालू मिली जांती है, तां सै बडिया खुशिया ने उसा जो मुंडे पर चुकी लेंदा है। 6 कने अपने घरे आई करी दोस्तां कने पडोसियां जो गिठे करी के बोलदा है, मेरे सोगी खुशी मना क्योंकि मेरी गबाचियो भेड मिली गेईं है। 7 मैं तुसां ने बोलदा है; की इयां ही इक मन बदलने बाले पापिये दे बारे च स्वर्गे च इत्नी ही खुशी होणी, जितनी की उना नडिनुए धर्मियां दे बारे च नी होंदी जडे सोचदे न की सै धमी न, कने जिना जो पछाताप दी जरूरत नी है। 8 तालू यीशुए इक होर कहाणी सुणाईं अगर कुसी जनानिया बाल दस चांदी दे सिक्के होन, कने उना के इक सिक्का गबाची जाऐ;

तां सै दिव्या वाली करी कने पूरे घरे च बोखरिया ने सोतया, ताल् दीकर सै ध्यान लगाई करी तोपदी रेईं जाल् दीकर तोपी ना ले। 9 कने जाल् मिली जांदा है, तां सै अपणियां सेलियाँ कने पडोसियां जो गठेरी करी बोलदी है, की ओआ मरे सोगी खूशी मना क्योकि मेरा गबाचया सिक्का मिली गया है। 10 "मै तिजो ने बोलदा है, की इयां ही इक पापी माणु जाल् अपने पापां जो मन्नी लेदां है, तां परमेस्वरे दे स्वर्गदूत उस पापी तांई खूशी मनादे ना।" 11 फिरी उनी इक होर कहाणी सुणाई, इकी माणुए दे दो पुत्र थे। 12 उना चे छोटे जागते पिता ने बोलया, पिता जी, की जडा हिसा मेरा जमीन जयादात च है, सै हण मिजो देई दिया। कने पिता उना जो अपणी सारी जमीन जयादाद दोनो जागतां बिच बंडी दिती। 13 "कने कुछ दिना बाद की छोटा पुत्र सारा कुछ गठेरी करी दूर कुसी देशे जो चली गया कने ओथु बुरे कम्मा कने खाणे पिणे च अपणी सारी धन दौलत उडाई दिती।" 14 जाल् सै सारा कुछ खचीं बैठा, कने उसी देशे बडा बडा अकाल पेई गया, कने उस बाल खाणे पिणे जो कुछ नी बचया। 15 कने सै उसी देशे दे रेहणे जाले इक माणुए दे घरे कम्म करणे तांई गया। उनी उसयो अपने खेतारां च सूआरां जो चपुणे तांई भेजया। 16 कने सै इतणा भूखा था, की सै उना फलियाँ जो खाणे ने इतणा खूश था जिना जो सुआर खांटे थे, क्योकि उसयो कोई कुछ नी दिन्दा दा खाणे जो। 17 जाल् उसयो समझ आई तां सोचना लग्गा कने बोलणा लग्गा, की मेरे पिता दे कितणे ही मजदूरां जो खाणे ला जादा रोटी मिलदी है, पर मै एथू भूखा मरा दा। 18 मै हण उठी करी री अपने पिता बाल जाणा है कने बोलणा की पिता जी मै परमेस्वर दे खिलाफ च कने तेरिया नजरा च पाप कितया है। 19 हण इसी जोगा नी है की तेरा पुत्र बणे, मिजो अपने इकी मजदूरे साईं ही रखी ले। 20 ताल् उनी उस देशे जो छडी दिता कने अपने पिता बाल जाणे तांई बापस चली पिया, सै अजे दूर ही था, की उदे पिता जो उसयो दिखीकरी तरस आई गया, कने उस पासे दोडी करी उसयो गल्ले लाई लिया, कने बडे च्मे ले। 21 पुत्रे उसला बोलया, पिता जी, मै परमेस्वरे दे खिलाफ च कने तेरिया नजरा च पाप कितया है; कने मै हण तेरा पुत्रे हणे जोगा नी रिया है। 22 पर पिता अपने नोकरां ने बोलया, झट छेल दे कपडे कडी करी इसयो पेहना, कने इदिया उंगलियां च गुन्टिया कने पैरां च जूतियां पेहना, 23 कने इक बडी बडी धाम तैयार करा ताकि असां खाई करी खूशी मनान। 24 क्योकि मै सोचया था की मेरा ए पुत्र मरी गया है, पर ए मरया नी है: गवाची गया था, पर हण मिली गया है। कने सै खूशी मनाणा लगे। 25 जाल् ए सब होआ दा था पर उदा जेठा पुत्र खेतारां च कम्म करा दा था। कने सै जाल् घरे बखे पुज्या, तां उनी गाणे-बजाणे कने नचणे दा रेल्ला सुणया। 26 कने उनी इकी नोकरे जो सदीकरी पुछया, ऐ क्या होआ दा है? 27 उनी उसला बोलया, तेरा भाई घर बापिस आया है, कने तेरे पिता बड्डी धाम तैयार कितयो है, क्योकि सै भला चंगा घर बापस आया है। 28 ऐ सुणिकरी उसयो बडा गुस्सा आई गया कने सै घरे अंदर नी जादा था, इस तांई उदा पिता बाहर आई करी उसयो अंदर चलणे तांई मनाणा लग्गा। 29 उनी पिता जो जबाब दिता, की दिख; की मै इतणे सालां ला तेरी सेबा करा दा है, कने कदी तेरी गल्ल नी टाल्ली, तमी तू मिजो अजे दीकर कदी तू मिजो कुछ खाने नी दिता, की मै अपने दोस्तां सोगी खूशी मनां। 30 पर जाल् तेरा ऐ पुत्र आया, जिनी तेरी सारी धन दौलत कन्जरियां पिच्छे उडाई करी आया है, तां तू इदे तांई बडी धाम लगायी। 31 "उनी उसला बोलया, मेरा पुत्र तू हेमेशा मेरे सोगी है; कने जडा कुछ मेरा है सै सब कुछ तेरा ही है। 32 पर हण तिजो खूशी मनाणी कने मगन होणा चाईदा क्योकि तेरा ऐ भाई मरी गया था पर ए मरया नी है: गवाची गया था, पर हण मिली गया है।"

**16** फिरी उनी चेलयां जो भी कहाणी सुणाई, कुसकी इक अमीर बन्दे दा इक भंडारी था, कने लोकां उदे सामणे उस पर इलजाम लगाया की ऐ तेरिया धन दौलत जो उडाई दिन्दा है। 2 कने उनी अमीर बंदे अपने भंडारी जो सदीकरी बोलया, ऐ क्या है जडा मै तेरे बारे च मै क्या सुणादा है? तू मेरे पैसयां दा क्या कितया है सारा हिसाब दे; क्योकि तू अजे बाद भंडारी नी है। 3 "ताल् भंडारी सोचना लग्गा, की हण मै क्या करे? क्योकि मेरा मालिक मिजो भंडारी दे कम्मे ला कडा दा है: कोई मेहनत बाला कम्म तां मिजो ला हौदा नी, कने भीख मंगणे ने मिजो शर्म ओदी है।" 4 मिजो पता है की क्या करणा ताकि जाल् मिजो भंडारिये दे कम्मे ला कडया जांगा तां लोक मेरी मदद करन। 5 कने उनी अपने मालिके दे

देणदारां जो इक-इक करी के सदया कने पेहेले ला पुछया, की तिजो पर मेरे मालिके दा कितणा कर्ज है? 6 उनी बोलया, 3,700 लिटर तेल, ताल् उनी उसला बोलया, की अपणी खाता बही ले कने बेईकरी झट 1,850 लिटर तेल लिखी दे। 7 फिरी दुज्जे ला पुछया, तिजो पर कितणा कर्ज है? उनी उसला बोलया, 20,000 किलो कणक, ताल् उनी उसयो बोलया, अपना बही खाता ले कने 16,000 किलो कणक लिखी दे। 8 मालिके उस अधमीं भंडारी दी तारीफ किती, की उनी चलाकिया ने कम्म कितया है; क्योकि इसा दुनिया दे लोक अपने बक्ते दे लोकां सोगी व्यवहार करणे च ज्योति दे लोकां ला जादा चलाक ना। (aiōn g165) 9 कने मै तुसां ने बोलदा है, की संसारिक पेसे ने अपने तांई मित्र बणाई लिया; ताकि जाल् ऐ पैसा नी रेंगा तां अनन्तकाल दे घरे च तुहांजो रेहणे तांई जगा दे। (aiōnios g166) 10 जडा छोटिया-छोटिया गल्लां च भरोसे दे लायक है, सै बडियां गल्लां च भी भरोसे दे लायक है: छोटिया-छोटिया गल्लां च भरोसे दे लायक नी है, सै बडियां गल्लां च भी भरोसे दे लायक नी है। 11 इस तांई जाल् तुसां संसारिक पेसे च भरोसे दे लायक नी, तां तुहांजो स्वर्गं दा धन कुनी देणा? 12 अगर तुसां होरसी दे पैसे च भरोसे दे लायक बणी रे, तां जडा तुहाडा है, उसयो तुहांजो कुण दिगा? 13 "कोई सेवक दो मालिकां दी सेबा नी करी सकदा: क्योकि उनी इकी ने बेर कने इकी ने प्यार रखणा; या इकी ने मिली की रेंगा कने दुज्जे जो बुरा समझणा: तुसां परमेस्वर कने धन दौलत दोनो दी सेबा नी करी सकदे।" 14 फरीसी जडे लालची थे, ऐ सारियां गल्लां सुणिकरी उदा मजाक उडाणा लगे। 15 यीशुए उना ने बोलया, "तुसां तां माणुए दे सामणे अपने आपे जो सही दसदे न: पर परमेस्वर तुहाडे मने जो जाणदा है, जडी चीज आदमियां दिया नजरा च बडी जरूरी है, सै परमेस्वरे दिया नजरा च बुरी है।" 16 जाल् यहन्ना बपतिस्मा देणेबाला आया, उसला पेहेले मूसा दी व्यवस्था कने परमेस्वरे दा संदेश देणेबाले तुहाडे मार्गदर्शक थे, पर परमेस्वरे दे राज्य दा शुभसमाचार दा प्रचार सुणया जादा है, कने हर कोई परमेस्वरे दे राज्य अंदर जाणे तांई उताबले न। 17 "परमेस्वरे दिया व्यवस्था दे इक बिन्दुए दे मिठी जाणे ला, अब्बर कने धरतिया दा खतम होई जाणा असान है।" 18 उदाहरण तांई जडा कोई अपणिया घरे बालिया जो छडी करी दुजिया ने बियाह करदा है, सै ब्यभिचार करदा है, कने जडा कोई ऐदिया जनानिये ने बियाह करदा है, सै भी ब्यभिचार करदा है। 19 यीशुए इक होर कहाणी सुणाई इक अमीर माणु था सै बडे मंगे कने मलमले दे कपडे पेहनदा था कने हर रोज शानदार खाणा खादां कने ठाठ बाठ ने रेंदा था। 20 कने लाजर नाए दा इक गरीब जिदे शरिरे च फोडे थे उसयो लोक उस अमीर माणुए दे घरे बाहर छडी दिन्दे थे। 21 कने सै चांदा था, की अमीर माणुए दे खाणे बाद बचयो जूटे टुकडयां ने अपना पेट भरे, कने कुते भी आई करी उदे जखमा जो चटदे थे। 22 कने इयां होया की सै गरीब मरी गया, कने स्वर्गदूत लाजर जो पूर्वज अब्राहम बाल लेई गया। कने सै अमीर भी मरया कने दबी दिता, 23 कने पताल च पीडा ने तडफदे होए उनी उपर दिखया कने दुरे ला लाजर जो अब्राहमे दे बखे बैठया दिखया। (Hadēs g86) 24 कने उनी जोरे ने अबाज लाईकरी बोलया, हे पिता अब्राहम, मिजो पर दया करी के लाजर जो मिजो बाल भेजी दे, ताकि सै मिजो अपणिया उंगलियां दे सिरे जो सेडी करी मेरिया जीभा जो ठंडा करे, क्योकि मै इसा अग्नी ने तडपा दा है। 25 पर अब्राहमे बोलया, हे पुत्र याद कर, की तू अपणिया जिंदगियां च खरियाँ चिजा लेई बैठया है, कने तियां ही लाजर जो सारियां बुरियां चिजां पर इसयो हण एथू शांति मिल्ला दी है, कने तू तडफा दा है। 26 कने इना सारियां गल्लां जो छडी करी साडे कने तुहाडे बिच इक बडी बड्डी खाई है ताकि जडा एथू ला उस पर जाणा चा सै ना जाई सके, कने ना कोई ओथु ला इस पार साडे बाल आई सके। 27 उनी बोलया, हे पिता जी, मै तिजो ने बिनती करदा है, की तू लाजर जो मेरे पिता दे घरे भेज, 28 क्योकि मेरे पंज भाई न, मै चांदा है की लाजर जाए कने मेरे भाईयां जो चेताबनी दे, इयां ना होए की सै भी इसा पीडा दिया भयानक जगा च ओना। 29 अब्राहमे उसला बोलया, उना बाल चेताबनी देणे तांई तां मूसा दी व्यवस्था कने परमेस्वरे दा संदेश देणेबाले न, उना जो इना जो सुणा चाईदा। 30 "उनी बोलया, नि, पिता अब्राहम; पर अगर कोई उना जो चेताबनी दे, तां उना अपने पापां दा पश्चाताप करणा है। 31 अब्राहमे उसयो

बोल्या, जद सै मूसा कने परमेश्वरे दा संदेश देणेबालयां दी नी मंदे न, तां अगर कोई मरयां चे जिन्दा होई जा तां उना उर्दी गल्लां दा भी भरोसा नी करणा।”

**17** फिरी यीशुए अपने चेलयां बोल्या, ऐ गल्ल ता पक्की है कि परिक्षां माणुए पर जरूर ओणियां न जडा उना जो पाप करणे दी बजा बणा, पर हाय उसी माणुए पर, ज़िदिया बजा ने सै ओदियां न। 2 पर जडा कोई इना छोटयां चे कुसी इकी जो भी भरोसे ला भक्तदां है या उना दे पाप करणे दी बजा बणा दे, उदे तांई तां खरा होंदा, कि उदे गले च बड़े घराटे दा पथर लटकाया जाए, कने डुगे समुद्रे च डोबया जाए। 3 “ध्यान रखा; अगर तेरा मसीह भाई गलत कम्म करे तां उसयो समजाआ, कने अगर सै पछतांगा तां उसयो माफ करी दे।” 4 “अगर सै दिन भर च सत बरी तिजो ने गलत करे कने सतों बरी तेरे बाल आई करी बोले, की मैं पछतादां है, तां उसयो माफ करी दे।” 5 ताल प्रेरितां प्रभु यीशु ने बोल्या, “साडे भरोसे जो होर जादा बढा कने मजबूत करा।” 6 प्रभुए बोल्या, अगर तुहाडा भरोसा राईया दे दाणे बराबर भी होंदा, तां अगर तुसां इस तुते दे स्वे जो बोलदे की तू जडा ला उखड़ी करी समुद्रे च लगी जा, तां उनी तुहाड़ी मनी लेणी। 7 अगर तुहाडा सेवक हल जोती करी, या भेडां चुगाई करी बापस घरे जो ओए, तां उसयो बोले, झट आ कने रोटी खाई ले? 8 ना, उनी तां इयां बोलणा, कि मिंजो तांई रोटी बणा कने जालू दीकर मैं रोटी खां तालू दीकर मेरी सेवा करणे तांई तैयार रे इदे बाद तू भी खाई लिया? 9 क्या तुसां अपने सेवके जो उस कम्मे जो करणे तांई धन्यवाद नी करणे जडा तुसां उसयो करणे तांई बोलया था? 10 “इयां ही जालू तुसां सै सब कुछ करी लिया हो जडा तुसां जो करणे तांई बोल्या था, तां तुसां जो ऐ बोलणा चाईदा, असां निकम्मे सेवक न; की जडा सांझो करणा चाईदा था सेई असां कितया है।” 11 जालू यीशु कने उदे चेले यरूशलेम शेहरे जाणे बाले रस्ते पर चलयो थे, सै सामरियां कने गलील प्रदेश ला होईकरी जा दे थे। 12 कने कुसकी गांए ला जांदे बेले उसयो दस कोडी मिल्ले। 13 कने उना दुरे ला ही खडोई करी, “जोरे ने बोलया, यीशु जी, मालिक जी, सांझो पर दया कर।” 14 यीशुए उना जो दिखीकरी बोलया, “यरूशलेम दे मंदिर च जाओ; कने अपने आपे जो याजकां जो दस्सा कि तुसां खरे होई गियो न” कने सै जांदे-जांदे ही ठीक होई गे। 15 तालू उना चे इकी ऐ दिखया की मैं ठीक होई गिया है, सै जोरे ने बोली करी परमेश्वरे दी बडाई करदा यीशुए बाल बापस आया; 16 कने यीशुए दे पैरां पर झुकी करी धन्यावाद करणा लग्गा; कने सै सामरी था। 17 इसा गल्ला पर यीशुए बोल्या, क्या सै दसो जणे उकी नी होए, तां सै होर जो जे जे कतां न? 18 “क्या इस गैर यहूदी जो छडी करी कोई होर नी निकलया, जडा परमेश्वरे दी बडाई करदा है?” 19 तालू यीशुए उसला बोलया, “उठी करी चली जा; क्योंकि तू भरोसा कितया है की तू ठीक होई गिया है।” 20 जालू फरीसियां उसयो पुछया, की परमेश्वरे दा राज्य कालू ओणा है? तां यीशुए उना जो जबाब दिता, “परमेश्वरे दा राज्य इयोदिया नी है, जिसयो तुसां दिखी सकदे न। 21 कने लोकां ऐ नी बोलणा, की दिखा, ऐथू है, या ओथु है। क्योंकि दिखा, परमेश्वरे दा राज्य तुहाडे बिच है।” 22 कने यीशुए चेलयां ने बोलया, सै दिन ओणे न, जिना च तुसां माणुए दे पुत्रे दे रोजां च इकी रोजे जो दिखणा चाणा है, पर नी दिखी सकणा है। 23 लोकां तुसां ने बोलणा, दिखा मसीह ओथु है! या दिखा ऐथु है! पर तुसां चली मत जांदे कने पिच्छे ही मत होई जांदे। 24 क्योंकि जियां बिजली अम्बरे दे इकी छोरे ला दुए छोरे दीकर चमकदी है, तियां ही मैं माणुए दे पुत्रे भी माणुए रोजे च सामणे ओणा है। 25 पर निहले बडा जरूरी है, की सै बडे जादा लुख डोले, कने उसयो इसा पीढी दे लोक मचे बोलन। 26 जियां साउ पूर्वज नूह दे रोजां च होया था, तियां ही माणुए दे पुत्रे दे रोजां च होणा है। 27 जिस रोजे दीकर नूह जहाजे पर नी चढया, उस दिने दीकर लोक खांटे पिंटे थे, कने उना च बियाह शादियां होंदिया थियां; तालू जल-प्रलय आई कने सब कुछ खत्म करी दिता। 28 कने तियां रिती ला ही साडे पूर्वज लूत दे रोजां च होया था जडा सदोम शेहरे च रे दा था, की लोक खांटे-पिंटे कने लेण देण करदे, कने पेड़ लाग्गदे कने घर बणां दे थे; 29 पर जिस रोजे लूत सदोमे ला निकलया, उस रोजे अम्बरे ला अग गन्धक बरसी कने सारे लोकां जो जडे शेर च रे दे थे खत्म करी दिता। 30 कने सै रोज भी इयोदिया होणा, जालू मैं माणुए दे पुत्रे इयां ही इकदम दोबारा बापिस ओणा है। 31 उस रोजे जडा छतीं पर होंगा, कने उदा समान घरे हो, तां सै उसयो लेणे तांई थले ना उतरे, कने तियां ही

जडा खेतेरे जो गिया हो सै बापस नी ओए। 32 साडे पूर्वज लूत दी घरे आली जो याद रखा, की उसा कने क्या होया था। 33 जडा कोई अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका खोई देणा है। जडा कोई मेरे तांई अपणी जान गबांगा उसयो परमेश्वरे सोगी सदा तांई दी जिन्दगी मिलणी। 34 मैं तुसां ने बोलदा है, उसा राती दो माणु इकी मंझे पर होणे, पर इक लेई जाणा कने दुज्जे जो छडी देणा है। 35 “दो जनानिया सोगी चक्की पियाँ दियां होणियां, इक लेई जाणी कने दुई छडी देणी। 36 (दो जणे खेतेरे च होणे न, इक लेई जाणा कने दूजा छडी देणा।)” 37 ऐ सुणीकरी उना उसला पुछया, हे प्रभु ऐ कुथु होणा है? उनी उना ने बोल्या, हर कोई जाणदा है ऐ कुथु होणा है तियां सारे जाणदे न जिथू लाश है, ओथु इल्लां गिठियां होंदियां न।

**18** फिरी यीशुए अपने चेलयां जो इदे बारे बोलया की रोज प्राथना करणा कने कदी हिम्मत नी छडणी चाईदी, इस तांई उना ने ऐ कहाणी सुणाई: 2 “कुसकी शेहरे च इक न्यायधीश रेंदा था; सै ना परमेश्वरे ला डरदा था ना कुसी माणुए दी परवाह करता था।” 3 कने उसी शेहरे च इक बिधवा भी रेंदी थी: जडी उदे बाल आई करी बोलदी थी, की मेरा न्याय करी के मिंजो दुशमणे ला बचाई ले। 4 कने बडे दिना दीकर तां मनया नी पर आखरी च मने च सोची करी बोलया, मैं ना परमेश्वरे ला डरदा, कने ना आदमियां दी परवाह करता है; 5 तमी ऐ बिधवा मिंजो तंग करदी रेंदी है, इस तांई मैं इसा दा न्याय करणा है, कुथी इयां ना हो की बार-बार आई करी आखरी च मिंजो बुरी तरह थकाई दे। 6 प्रभु ने बोलया, सुणा, की इनी अधमीं न्यायधीशे क्या बोलया है, उस बारे च धयाने ने सोचा। 7 क्या परमेश्वर अपने चुणयो लोकां दा न्याय नी करणा, जडे रात-दिन उदे सामणे रोंदे न; परमेश्वरे उना दी मदद करणे च देर नी करणी है? 8 “मैं तुसां ने बोलदा है; उनी झट उना दा न्याय करणा; तमी जालू मैं, माणुए दे पुत्रे बापस धरती ओणा, तां मिंजो हेरानी होंदी है की क्या मिंजो धरतिया पर ऐसा माणु मिलगा जडा मिंजो पर भरोसा करदा हो।” 9 कने यीशुए उना लोकां ने जडे अपने बारे च सोचदे न, की असां धर्मी न, कने दुजयां जो निच बोलते थे, ऐ कहाणी सुणाई 10 “दो माणु मंदरे च प्राथना करणा गे; इक फरीसी था कने दूजा कर लेणे बाला था। 11 फरीसी खडोई करी अपने मने च इयां प्राथना करणा लग्गा, की हे परमेश्वर, मैं तेरा धन्यवाद करदा है, की मैं होरनी माणुए सांई बुरा करणे बाला, अन्यायी कने व्यभिचारी नी है, कने ना ही इस कर लेणेबाले सांई है। 12 मैं हपते च दो बरी बरत रखदा है; मैं अपणिया कमाईया दा दसमां हिंसा भी तुसां जो दिन्दा है। 13 पर कर लेणेबाले दूर खडोई करी, स्वर्ग पासे दिखणा भी नी चाया, पर सै दुखे ने अपणिया छतिया पीटी-पीटी करी बोलणा लग्गा, हे परमेश्वर मैं पापी है, मिंजो पर दया कर, मिंजो माफ कर। 14 यीशुए बोलया मैं तुसां ने बोलदा है, की ऐ चुंगी लेणे बाला था ना की फरीसी माणु जडा परमेश्वरे सामणे धर्मी दसया; क्योंकि जडा कोई अपने आपे जो बडा महान बणागा, सै छोटा करी देणा है; कने जडा अपने आपे जो छोटा बणागा, उसयो आदर मान मिलणा।” 15 फिरी लोक अपने बचयां जो यीशुए बाल लोणा लग्गे, ताकि सै उना पर हथ रखे; कने चेलयां दिखीकरी उना जो डांटया। 16 यीशुए बचयां जो अपने बाल सदीकरी बोलया, बचयां जो मना मत करा कने इना जो मेरे बाल ओणा दिया, क्योंकि परमेश्वरे दा राज्य उना दा है जडा इना बचयां सांई है। 17 मैं तुसां ने सच्च बोलदा है, परमेश्वरे अपने राज्य च सिर्फ उना लोकां जो ओणा देणा है जडे परमेश्वरे दे राज्य जो बचयां सांई अपनांदा है। 18 कुनकी यहूदी अधिकारिये उसला पुछया, “उतम गुरू जी, मैं क्या कम्म करां की परमेश्वर मिंजो हमेशा दी जिन्दगी दे?” (aiōnōs g166) 19 यीशुए उसयो बोलया, तुसां मिंजो कौ उतम बोलदे न, उतम तां सिर्फ इक ही है, सै परमेश्वर है। 20 तू परमेश्वरे दे हुक्मा जो तां जाणदा है की: “व्यभिचार नी करणा, झट्टी गबाई नी देणी, अपने माता पिता दा आदर करणा।” 21 उनी बोलया, “मैं तां इना सबना हुक्मा जो तां बचपन ला मनदा आया है।” 22 ऐ सुणीकरी, यीशुए उसला बोलया, तिजो च अजे भी इक गल्ला दी कमी है, जा, कने जडा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बणिया। 23 सै ऐ सुणीकरी बडा उदास होई गिया, क्योंकि सै बडा अमीर था। 24 यीशुए उसयो दिखीकरी बोलया, अमीरां दा परमेश्वरे दे राज्य च जाणा बडा मुशकिल है। 25 अंटे दा सुइया दे नाके के निकलना असान है, पर अमीरां दा

परमेश्वरे दे राज्य च जाणा बड़ा भरी मुशकिल है। 26 कने सृणने बालयां बोलया, “अगर ऐसा है तां कुण अपने पापां दी सजा मिलणे ला बची सकदा है?” 27 यीशुए जबाब दिता, “जडा माणुए ला नी होई सकदा है सै परमेश्वरे ला होई सकदा है।” 28 पतरसे यीशुए जो पुछया, दिख, असां तां घर-बार छडी करी तरे पिच्छे चलयो न। 29 यीशुए उना जो जबाब दिता, “मै तुसां ने सच्च बोलदा है, जिनी भी परमेश्वरे दे राज्य तांई घर, या घरे बाली, या भाई, या माता पिता, या बाल बचयां जो छडी दितया हो। 30 कने इस बेले केई गुणा जादा मिलणा; पर परलोके च हमेशा दी जिन्दगी मिलणी।” (aiōn g165, aiōnios g166) 31 फिरी यीशुए बाहरां चेलयां जो एकांत च लेईजाई करी उना ने बोलया, दिखा, असां यस्शलेम शेहरे जो जाणा है, कने जितणियां भी गल्लां मेरे, माणुए दे पुत्रे तांई परमेश्वरे दा संदेश देणेबालयां लिखियां न सै सारियां पुरियां होणियां न। 32 “क्योंकि सै होर जातियां दे हथे देई देणा है। कने उना मेरा मजाक उडाणा है, कने मेरी निंदा करी के मिजो पर थुकणा, 33 कने मिजो कोडे मारणे, कने मिजो मारी देणा है, कने मै तिजे दिने मै मरयां चे जिदे होई जाणा है।” 34 कने चेलयां इना गल्लां चे कोई भी गल्ल न समझ आई: कने ऐ गल्ल उना च ही लुककी रेई, कने जडा बोलया था सै उना दिया समझा च नी आया। 35 जालू यीशु यरीहो शेहरे दे बखे पुज्जा, तां इक अन्ना सडका कंडे बेईकरी भिख मंगा दा था। 36 कने भिडा दी चलने दी अबाज सुणीकरी पुछणा लग्गा, ऐ क्या होआ दा है? 37 उना उसयो दसया, “नासरत दा यीशु मसीह जा दा है।” 38 तालू उनी अबाज लाईकरी बोलया, “हे यीशु, राजा दाऊदे दे बंशज, मिजो पर दया कर।” 39 जडे अग्ने-अग्ने चलयो थे, सै उसयो डांटणा लग्गे की चुप रे: पर सै होर जोरे ने बकणा लग्गा, “हे राजा दाऊदे दी बंशज मिजो पर दया कर।” 40 तालू यीशुए ऐ सुणया कने स्की करी बोलया, “उसयो ऐशु लोआ।” कने तालू सै बखे आया तां यीशुए उसयो पुछया, 41 “तू क्या चांदा है की मै तरे तांई करे?” अन्ने उसने बोलया, गुरू जी, ऐ की मिजो मिलणा लग्गी पोए। 42 यीशुए उसयो बोलया, “दिखणा लग, तरे भरोसे जडा मिजो पर है तिजो ठीक करी दिता है।” 43 कने सै झट मिलणा लग्गी पिया; कने परमेश्वरे दी बडाई करदा होया उदे पिच्छे चली पिया, कने सारे लोंका ऐ दिखीकरी परमेश्वरे दी स्तुति किति।

**19** यीशु यरीहो शेहर ला होईकरी जा दा था। 2 कने दिखा, जक्कई नापे दा इक माणु जा जडा चुंगी लेणेबालयां दा सरदार कने अमीर था। 3 सै यीशुए जो दिखणा चांदा था की सै कुण दिया है? पर भिडा दिया बजा ने सै दिखी नी सका दा था। क्योंकि सै छोटे कंदे दा माणु था। 4 तालू सै उसयो दिखणे तांई अग्ने दोडी करी इक गूलर दे स्खे पर चडी गिया, क्योंकि यीशु उसी रस्ते ला जाणे बाला था। 5 जालू यीशु उना जगा पर पुज्जा जिथु जक्कई था, तां यीशुए उपरे पासे दिखीकरी बोलया, हे जक्कई, झट उतरी आ; क्योंकि अज मिजो तरे घरे रंणा जस्ती है। 6 सै झट स्खे ला उतरया कने यीशुए जो खुशिया ने अपने घरे जो लेई गिया, कने खुशिया सोगी उदा स्वागत किता। 7 ऐ दिखीकरी सारे लोक बुडबडाणा लग्गे, “की सै तां इक पापी माणुए दे घरे चली गिया है।” 8 जक्कई खाणे दे बकते खडोई करी यीशु ने बोलणा लग्गा, “प्रभु जी, दिख मिजो बाल जडा कुछ है सै गरीबां जो दिन्दा है, कने अगर मै लोंका ला चुंगी लेणे च बेईमानी कितियो है तां उसयो चार गुणा बापस करी दिन्दा है।” 9 तालू यीशुए उसला बोलया, अज इसी घरे दे लोंका बिच उद्धार आया है, क्योंकि ऐ भी अब्राहमे दा बंशज है। 10 “क्योंकि मै, माणुए दा पुत्र गवाचयां जो तोपणा कने उना जो अनन्त सजा ला बचाणे तांई आया है।” 11 जालू लोक ऐ गल्लां सुंणा दे थे तां यीशुए उना जो इक कहाणी सुणई, इस तांई की सै यस्शलेम शेहरे दे नेडे था, कने लोंकां जो लागया की परमेश्वरे दा राज्य बस हुण ओणे बाला है। 12 यीशुए बोलया, इक अमीर माणु दूर देशे जो चलया ताकि राजपद पाई करी बापस आई जा। 13 कने उनी अपने दस सेवकां जो दस मुहरां दितियां, कने उना ने बोलया, मेरे बापस ओणे दीकर लेणे देण करनयो। 14 पर उदे शेहरे बाले उसला बैर रखदे थे, उदे पिच्छे संदेश देणेबाले दूतां ने बोली भेजया, की असां नी चांदे न की ऐ सांझो पर राज करे। 15 जालू सै राजपद लेईकरी बापस आया, तां इयां होया की उनी अपने सेवकां जो जिना जो मुहरां दितियां थियां, अपने बाल सदया ताकि पता लग्गे की लेणे देणे ने उना क्या-क्या कमाया है। 16 तालू पहले आई करी बोलया, हे

मालिक तेरियां मुहरां ने मै दस होर मुहरां कमाईया न। 17 उनी उसला बोलया, उत्तम सेवक, बडा खरा किता, तू बडे ही थोडे च भरोसे बाला निकलया हुणे ला तू दसां नगरां दा अधिकारी। 18 दुज्जे आई करी बोलया, हे मालिक तेरिया मुहरां ने मै पंज होर मुहरां कमाईया न। 19 उनी उसला बोलया, जा तू भी पंजा नगरां दा अधिकारी। 20 कने तिजे आई करी बोलया, हे मालिक दिख, तेरी मोहर ऐ है, जिसा जो मै गमछे च बनी करी रखया था। 21 क्योंकि मै तिजो ला डरदा था, क्योंकि तू बडा सकत माणु है: जडा तू नी रखया होदा उसयो तू चुकी लेंदा, कने जडा तू नी राया है, उसयो तू बडदा है। 22 उनी उसला बोलया, हे निकम्मे सेवक, मै तेरियां ही गल्लां ने तिजो दोषी बणादा है: तू मिजो जाणदा था की मै सकत माणु है, जडा मै नी रखदा है उसयो चुकी लेंदा है, कने जडा मै नी राया उसयो बडी लेंदा है? 23 तां तू मेरे पैसे बयाजे पर महाजना बाल कनी रखी दिते, इयां करदा तां मै आई करी बयाजे समेत लेई लेंदा। 24 कने जडे लोक उदे बखे खडोतयो थे, मालिके उना ने बोलया, इसला मुहरां जो लेई लिया, कने जिसदे बाल दस मुहरां न उसयो देई दिया। 25 उना मालिके ने बोलया, हे मालिक, उस बाल दस मुहरां तां हेन। 26 मालिके उना जो बोलया, “जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, की मै क्या सिखांदां, तां थोडा जडा उसयो समझ आया से भी उसला लेई लेणा।” 27 “पर मेरे उना बैरियां जो जडे नी चांदे थे की मै उना दा राजा बणा, उना जो मेरे सामणे लेई ओआ कने मारी दिया।” 28 ऐ गल्लां बोली करी यीशु अपने चेलयां सोगी यस्शलेम शेहरे दे पासे उना दे अग्ने-अग्ने चलया। 29 कने सै जालू जैतून सखां दे पाहडे पर बैतफगे कने बैतनिय्याह गांए दे बखे पुज्जा, तां उनी अपने दों चेलयां जो ऐ बोली करी भेजया, 30 सामणे दे गां च जा, कने ओथु पुज्जे ही तूहांजो इक गधिया दा बच्चा बन्नया मिलणा है, उदे उपर हिली कोई नी बैठया था, सै खुंडे च बन्नया होणा उसयो खोली करी लेई ओआ। 31 “कने अगर कोई तूहांजो ला पुच्छे, की कजो खोला दे न, तां ऐ बोली देणा, कि प्रभु जो इसदी जस्तरत है।” 32 जडे चले भेजयो थे, उना जाई करी सियुदा ही दिखया, जियां यीशुए बोलया था। 33 जालू सै गधे दे बच्चे जो खोला दे थे, तां उदे मालिके उना ला पुछया, “इसयो कजो खोला दे न?” 34 उना बोलया, “प्रभु जो इसदी जस्तरत है।” 35 सै उसयो यीशुए बाल लेई आये कने अपने कपडे उदे उपर पाई दिते कने यीशु उस पर बैठी गिया। 36 जालू यीशु गधे पर बेईकरी जा दा था, तां मतयां लोंकां अपने कपडे रस्ते च बछाई दिते। 37 यस्शलेम शेहरे जांई बेले जालू यीशु जैतून सखां दे पाहडे दिया उतराईया च पुज्जा, तां चेलयां दी सारी मंडली उना सारे अनोखे कम्मा दिया बजा ने जडे उना दिखयो थे, खुश होईकरी जरे ने सारे परमेश्वरे दी स्तुति करणा लग्गे: 38 “धन्य हो सै राजा, जडा प्रभु दे नापे ने ओंदा है। स्वर्ग च शांति कने अम्बरे च महिमा हो।” 39 तालू भिडा चे कितणे ही फरीसी उसयो बोलणा लग्गे, “गुरू जी, अपने चेलयां जो ऐ गल्लां बोलणे तांई डांट।” 40 यीशुए जबाब दिता, “मै तुसां ने बोलदा है, अगर ऐ लोंक चुप रे, तां पथरां बोली पोणा है।” 41 जालू यीशु यस्शलेम शेहरे बखे आया तां उस शेहरे जो दिखीकरी रोया। 42 कने बोलया, की तरे तांई कितणा भला होदा, कि तू, इस रोजे तू परमेश्वरे दिया शांतिया दियां गल्लां समझदा जडियां तिजो शान्ति दिन्दियां, पर हुण सै तेरिया नजरा ला लुककी गियां न। 43 “क्योंकि सै दिन तिजो पर ओणे न जालू तरे दुश्मणा हर तरफा ला शेहर पर हमला करणा है, कने चारो पासे ला तूहांजो दबाई देणा है। 44 तरे दुश्मणा पूरी तराह ने शेहरे जो खरम करी देणा कने तरे सारे लोंकां जो मारी देणा, कने तिजो च पथरे पर पथर भी नी छडणा है; क्योंकि तू सै मोका नी पछेणया जालू परमेश्वर तिजो बचाणे तांई आया था।” 45 तालू सै मंदरे च जाई करी बेचणे बालयां जो बाहर कडणा लग्गा। 46 कने यीशुए उना जो बोलया, पबित्र शात्र च लिखया है की, मेरा घर प्राथना दा घर होणा, पर तुसां तां इसयो डाकुआं ला भरईयो गुफा सांई बणाई दितया है। 47 कने सै हर रोज मंदरे च उपदेश दिन्दा था: कने बड़े याजक कने यहूदी व्यवस्था जो सिखाणे बालयां कने बड़े लोक उसयो मारणे दा मोका तोपदे रेंदे थे। 48 पर कोई तरिका नी तोपी सके; की ऐ किया करणा, क्योंकि सारे लोक उसयो बड़े चापे ने सुणदे थे।



**20** इक रोज ऐसा होया की जालू यीशु लोकां जो मंदरे च उपदेश दे दा था, कने शुभसमाचार सुण्णा दा था, तां बड्डे याजक कने यहूदी व्यवस्था जो सिखाणे बाले कने यहूदी अंगुवे यीशूरे बाल आया। 2 कने बोलणा लागे, “सांझो दस, तू इना कम्मा जो कुस अधिकारे ने करदा है, कने सै कुण है, जीर्नी तिजो ऐ हक दितया है?” 3 यीशूरे उना जो जबाब दित, “मै भी तुसां ला इक सबाल पुछदा है, मिजो दसा तां मै भी दसगा: 4 यहूना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिजो दसा।” 5 तालू सै अपु चे बोलणा लागे कि अगर असां ऐ बोलया कि, “परमेश्वर जडा स्वर्गं च है उनी भेजया है, तां यीशूरे सांझो ला पुछणा, कि तुसां यहूना पर भरोसा कन्नी किता?” 6 “अगर असां बोलया, माणुऐ दिया तरफा ला, तां सारे लोकां सांझो पथर मारणे, क्योंकि सारे लोक सची जाणदे न की यहूना सच्चा परमेश्वरे दा संदेश देणेबाला था।” 7 उना जबाब दित, “असां नी जाणदे, की सै कुसदिया तरफा ला था।” 8 यीशूरे उना ने बोलया, “तां मै भी नी दसणा की मै ऐ कम्म कुसदे हके ने करदा है।” 9 तालू यीशु लोकां जो इक कहाणी सुणणा लग्गा, इकी माणुऐ अंग्रा दा बाग लगाया, कने किसाना जो उदा ठेका देईकरी कने मतयां रोजां तांई परदेस जो चली गिया। 10 फिरी जालू अंग्र पक्की गे, तां उनी अपणा इक नोकरे जो ठेकेदार बाल अपणा अंगुरे दे बागे दा हिस्सा लोणे तांई भेजया। पर ठेकेदारां उसयो पकडया कने मारी कुटी करी बिना कुछ दितयो खाली हथ भेजी दित। 11 फिरी मालिके इक होर नोकर भेजया, कने उना उसयो भी मारी कुटी करी कने बेजती करिके खाली हथे भेजी दित। 12 फिरी मालिके तिजे नोकरे जो भेजया, कने उना उसयो भी मारी कुटी करी बाहर कडी दित। 13 “तालू अंग्रा दे बागे दे मालिके बोलया, मै क्या करे? मै अपने प्यारे पुत्रे जो उना बाल भेजदा है शायद सै मेरे पुत्रे दा आदर करन।” 14 जालू ठेकेदारां उसयो दिखया तां अपु चे बिचार करणा लागे, ऐ तां बारिस है: ओआ, असां इसयो मारी दिन्दे, ताकि सब कुछ साडा होई जा। 15 कने उना उसयो अंग्रा दे बागे ला बार कडी करी मारी दित: तां दाखे दे बागे दे मालिके उना सोगी क्या करणा? 16 “उनी आई करी उना ठेकेदारां दा नाश करणा, कने अंग्रा दे बागे जो कुसकी होरसी जो देई देणा। ऐ सुणीकरी लोकां बोलया, हे परमेश्वर इयां मत करदा।” 17 उनी उना पासे दिखीकरी बोलया, फिरी पबित्र शब्ज च ऐ क्या लिखया है: जिसे पथरे जो राजमिस्त्रियां बेकार बोलया था, सेई कुणे दा सिरा बनया। 18 “जडा कोई उस पथरे पर पोंगा उदे टोटे-टोटे होई जाणे, कने जिदे पर सै पोंगा, उनी सै पिई देणा।” 19 तालू ही बड्डे याजक कने यहूदी व्यवस्था जो सिखाणे बाले यीशूरे जो पकडना चांदे थे, क्योंकि सै समझी गे, की उनी सांझो पर ऐ कहाणी बोलियो है, पर सै लोकां ला डरदे थे। 20 सै यीशूरे जो फसाणे दिया ताका च थे। कने उना गुप्तचर भेजे, की सै धर्मी दा भेस बनाई करी उदी कोई गल्ल पकडन, ताकि उसयो राज्यपाल कने अधिकारियां दे हथे देई दें। 21 उना उसला ऐ पुछया, गुरू जी, असां जाणदे न की, तुसां हमेशा सच्च बोलदे न कने सिखांदा भी है, कने कुसदा भी पक्षपात नी करदा है; कने परमेश्वरे दा रस्ता सच्चाईयां ने दसदा है। 22 “इस तांई सांझो दस की महाराजा जो कर देणा ठीक है की नी?” 23 उनी उना दी चलाकी दिखीकरी उना ने बोलया, 24 इक दीनार मिजो दससा। इस पर कुसदी छाप कने ना है? उना बोलया, “महाराजा दा।” 25 यीशूरे उना ने बोलया, “तां जडा महाराजा दा है, उसयो महाराजा जो दिया कने जडा परमेश्वरे दा है उसयो परमेश्वरे जो दिया।” 26 सै लोकां सामणे उसा गल्ला जो पकडी नी सके, कने उदे जबाबे ने हेरान होईकरी चुप होई गे। 27 फिरी सदूकी जडे बोलदे न, की मरयां दा जिन्दा होणा हेई नी, उना चे थोड्यां यीशूरे बाल आई करी पुछया। 28 गुरू जी, मूसा दिया व्यवस्था च साडे तांई ऐ लिखया है, “अगर कुसकी दा भाई अपणिया घरे वालिया दे होंदे बिना बच्चे दे मरी जा, तां उदा भाई उदिया घरे वालिया जो ब्याई ले, कने उदे तांई बंश पैदा करे।” 29 इक घरे च सत भाई थे, पेहला भाई बियाह करिके बिना ओलादी दे मरी गिया। 30 तां दुरो भाईरे उसा ने ही बियाह करी लिया कने से भी बिना ओलादी मरी गिया, 31 कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 32 बादे च सै जनानी भी मरी गेई। 33 हण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे

बाली होणी? 34 यीशूरे उना ने बोलया, इसी युगे दे लोकां च तां बियाह होंदे न। (aiōn g165) 35 पर जिना लोकां इस लाइक होणा है, की उसी युगे च कने मरयां चे जिन्दे होणा है, उना च बियाह नी होणे न। (aiōn g165) 36 फिरी उना मरणा भी नी; क्योंकि सै स्वर्गदूते सांई होणे, कने मरयां चे जिन्दा होणे ने सै परमेश्वरे दी ओलाद होणे न। 37 पर इसा गल्ला जो की मरयो होऐ भी जिन्दा होई जांदे न, मुसे झाडी बालिया कथा च सिखाया है, इस तांई “सै परमेश्वर जो अब्राहम दा परमेश्वर, कने इसहाक दा परमेश्वर, कने याकूब दा परमेश्वर बोलदा है।” 38 “परमेश्वर तां मुर्दयां दा नी पर जिदया दा परमेश्वर है: क्योंकि उदे तांई सारे जिंदे न।” 39 तालू ऐ सुणिंकरी कितणयां ही व्यवस्था जो सिखाणे बालयां बोलया, “गुरू जी, तू ठीक बोलया है।” 40 कने उना जो होर कुछ पुछणे दी हिम्मत नी होई। 41 फिरी यीशूरे उना ला पुछया, मसीह जो राजा दाऊदे दा बंशज कियां बोलदे न? 42 राजा दाऊदे अपु भजन संहिता दिया कताबां च बोलया है: “प्रभुरे मेरे प्रभु ने बोलया, 43 तू मेरे सिंहासने दे सजे पासे बो, जालू दीकर मै तेरे बैरियां जो तेरे पैरां हेठ करी दें।” 44 “राजा दाऊद तां उसयो प्रभु बोलदा है तां सै फिरी उदा बंशज कियां होया?” 45 जालू सारे लोकां सुणा दे थे, तां यीशूरे अपने चेलर्यां ने बोलया। 46 “व्यवस्था जो सिखाणे बालयां ला साबधान रिया, जडे लोकां जो दसणे तांई लम्बे कने मेगे कपडे पाणा पसंद करदे, कने उना जो बडा पसंद है की लोक उना जो बजारां च नमस्ते करन, कने यहूदी जंज घरां च कने खांदे बेले खास-खास आसना पर बोणा पसंद करदे न। 47 सै थोखे कने वेईमानिया ने विधवां दे घरां दी चिजां पर कऊजा करी लेंदे न। कने लोकां जो दसणे तांई बडी देरा दीकर प्राथना करदे न, परमेश्वरे ला इना जो बडी बुरी सजा मिलणी है।”

**21** फिरी यीशूरे मंदरे दे भंडारे दे सामणे बेईकरी अमीरां जो अपणा-अपणा दान पेटीया च पांदे दिखया। 2 इतणे च इक गरीब बिधवा आई करी दो तांबे दे सिक्के पाये, जिना दी कीमत बडी घट थी। 3 तालू उनी बोलया, मै तुसां ने सच्च बोलदा है, की इना गरीब बिधवा सबना ला बदीकरी इस भंडारे च पाया है। 4 क्योंकि सबना अपने भंडारे च थोडा दिया दित, पर इना गरीब बिधवा इसा बाल जितना भी था सारा ही पाई दित। 5 जालू कुछ चले मंदरे दे बारे च गल्लां करा दे थे, की सै कदे छेल पथरां ने कने चढाईयां चिजां ने सबावया है, तां यीशूरे बोलया, 6 “सै दिन ओणे न, जिना चिजा दी तुसां बडी तरीफ करा दे न, इक दिन ओणा है इना भवना दे इक भी पथरे पर पथर नी रेणा है, जडा डाय नी जाणा है।” 7 चेलयां यीशूरे ला पुछया, “गुरू जी, सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होणा तां उदा क्या निशान होणा है?” 8 यीशूरे बोलया, ध्यान रखयो की तुहांजो कोई धोखा न दे। मते सारे लोकां मेरे नाए ने दाबा करिके ओणा है। उना बोलिया है, “मे मसीह हूँ; कने ऐ भी बोलणा की टम नेडे आई गिया है: तुसां उना पिच्छे मत चली जांदे। 9 जालू तुसां लडाईयां, कने दंगया दियां गल्लां सुणणे तां डरी मत जांदे; क्योंकि इना दा होणा जरूरी है, पर तालू संसारे दा खात्मा नी होणा है। 10 तालू यीशूरे उना ने बोलया, क्योंकि जातियां ने जातियां ने कने राज्य ने राज्यां ने इक दुजे ने लडाईयां करणियां न। 11 कने हर कुथी हिलण होणे न कने अकाल पोणे, कने महामारियां पोणिया न, कने अम्बरे च गल्लां कने बड्डे-बड्डे निशाण प्रगट होणे न। 12 पर इना सबना गल्लां ला पेहले उना लोकां तुहांजो कैदी बगाना कने यहूदी जंज घरे च देणा कने तुहांजो मार पोणी, कने मेरिया बजा ने तुहांजो हाकिमा कने राजयां दे सामणे न्याय तांई पेश किते जाणे न, 13 पर ऐ तुहाडे तांई गबाई देणे दा मोका बणी जाणा है। 14 इस तांई सब अपने-अपणे मने च पेहले ही ठाणी लिया की असां जबाब देणे दी चिंता नी करणी है। 15 क्योंकि मै तुहांजो ऐसे बोल कने दिमाग दिगा, की तुहाडे सारे बिशीधियां सामणा कने टालूनी नी सकणा है। 16 कने तुहाडे माता-पिता कने भाई कने रिश्तेदारां, कने दोस्तां भी तुहांजो पकडणा है; ऐथू दीकर की तुहांजो चे कितणयां जो मरवाई देणा है। 17 कने मेरे नाए दिया बजा ला सबना लोकां तुहांजो ने बैर करणा है। 18 पर तुहाडे सरे दा, इक बाल भी बांका नी होणा। 19 पर जडा जिंदगी दे अंत दीकर मिजो पर भरोसा रखगा सै ही बचाया जाणा है। 20 जालू तुसां यरूशलेम जो सेना ने फिरया दिखन, तां समझी लिया की उदा बिनाश होणेबाला है। 21 यहूदिया प्रदेशे दे लोकां जो जान बचाणे तांई पहाडा जो नसणा पोणा। कने जडे यरूशलेम दे अंदर हौन सै बाहर नसी जान; कने जडे ग्रां च हौन

सै उना च मत जांदे। 22 क्योकि ऐ बदला लेणे दे ऐसे रोज होणे न, जिना च सारियां लिखियाँ होइयां गल्लां पुरियां होणियां न। 23 ऐ उना जानागिया ताई बडा बुरा बकत होणा जडियां लैरथियां न, कने उना जानानियां ताई जडियां नियाणे जो दूध पियादियां न। क्योकि देशे च बडा बडा क्लेश कने इना लोका पर बडी मुसीबत होणी है। 24 उना जो तलबारां ने मारयां जाणा है, कने केई देशां दे लोक गुलाम बनाई करी लेई जाणे न, कने जालू दीकर बाकी जातियां दा बकत पूरा नी होगा, तालू दीकर यस्शलेम बाकी जातियां दा गुलाम रेणा है। 25 कने सुरज कने चन्द्रमा कने तारयां च अनोखे निशान मिलणे न, कने धरतिया पर, देशे-देशे दे लोकां जो पेशानी होणी है; क्योकि उना उफणदे समुद्रे दियां लेहारां ने घबराई जाणा है। 26 कने डरे दिया बजा ने कने दुनिया च ओणे बालियां घटना दी राह दिखदे-दिखदे लोकां दीया जानी च जान नी रेंणी हे क्योकि अम्बरे दियां शक्तियाँ हिलाईयां जाणियां न। 27 तालू उना मिजो माणुऐ दे पुत्रे जो सामर्थ्य कने बडी महिमा दे सोगी बदले पर ओदे दिखणा है। 28 “जालू ऐ गल्लां होणा लगन, तां सिधे होईकरी अपने सिरे जो उपरे उठाना; क्योकि तुहाडा छुटकारा नेडे होणा।” 29 यीशुऐ उना जो इक कहाणी सुणाई, अजरी कने सारे सखां जो दिवा। 30 जियां ही उना दियां कुम्बलियां निकलदियां न, तां तुहांजो ऐ दिखीकरी पता लग्गी जांदा है, की गर्मियां ओणे बालियां न। 31 इयां ही जालू तुसां ऐ गल्लां होंदे दिखन, तां समझी लिया की परमेश्वरे दा राज्य नेडे है। 32 “मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जांदियां न, तालू दीकर इसा पीढिया दा अंत नी होणा है।” 33 “अम्बर कने धरती खतम होई जाणे, पर मेरियां बोलियां गल्लां कदी नी टलनियां न, सै हमेशा रेंणियां न।” 34 इस ताई साबधान रिया, ऐसा ना हो की तुहाडे मन नशे च संसारे दियां मोहमाया च कने इसा जिन्दगिया दिया चिंता च सुस्त होई जान, कने सै दिन तुहांजो पर फंदे साई इकदम आई पोऐ। 35 क्योकि उनी सारिया धरतिया पर रेंणेबालयां पर इयां ही आई पोंणा है। 36 “इस ताई जागदे रिया कने हर बेले प्राथना करदे रिया ताकि तुसां ओणे बालियां पेशानियां ला बचणे कने मिजो माणुऐ दे पुत्रे दे सामणे खडणे लाइक बणन।” 37 कने सै दिने मंदरे च उपदेश करादा था; कने राती जैतून सखां दे पाहडे पर जाई करी रेंदा था। 38 कने ब्यागा उसयो सणने ताई मंदरे च उदे बाल ओंदे थे।

**22** अखमीरी रोटिया दा त्योहारे जिसयो फसह बोलदे न, नेडे ही था। 2 कने बडे याजक कने व्यवस्था जो सिखाणे बाले इसा गल्ला दिया तोपा च थे की, उसयो कियां मारन, पर सै लोकां ला डरदे थे। 3 कने शैतान यहदा च बडी गिया, इसयो इस्करियोती भी बोलदे न कने सै बाहरां चेलयां चे इक था। 4 उनी जाई करी बडे याजकां कने सरदारां ने गल्लात किती, की उसयो कियां उना दे हथे पकडा। 5 सै खुश होऐ, कने उसयो पेसे देंणे दा बचन दिता। 6 उनी मन्नी लिया, कने मोका तोपणा लग्गा, की बिना बुरा कितयो यीशुऐ उना दे हथे पकडाई दे। 7 तालू अखमीरी रोटिया दे त्योहारे दा दिन आया, जिदे च फसह दे मेमने दी बलि देणा जरूरी थी। 8 कने यीशुऐ पतरस कने यहूना जो ऐ बोली करी भेजया, “जाई करी साडे खाणे ताई फसह दा खाणा तैयार करा।” 9 उनी यीशुऐ पुछया, “तू कुथ चांदा है, की असां फसह दा खाणा तैयार करन?” 10 उनी अपने दो चेलयां जो ऐ बोली करी भेजया, की यस्शलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे चली जानयो। 11 कने सै जिस घरे जो जांगा, उस घरे दे मालिके जो बोलयो: की गुरु जी ने पूछया है, की मेरा कने मेरे चेलयां दा फसह दा खाणा खाने बाला कमरा कुथ है? 12 “उनी तुहांजो इक उपरे आला सजया सजाया कने तैयार कितया बडा कमरा दर्सी देणा है, कने तुसां ओथु साडे ताई तैयारी करा।” 13 उना जाई करी, जियां यीशुऐ उना ने बोलया था, सियुदा ही था, कने उना उसा जागा फसह दा खाणा तैयार किता। 14 जालू बकत होया, तां यीशु बारह प्रेरितां सोगी रोटी खाणां बैठा। 15 कने यीशुऐ उना ने बोलया, “की मिजो बडी इच्छा थी, की दुख भोगणे कने मरणे ला पेहेले फसह दे त्योहारे दा खाणा तुहाडे सोगी खां। 16 क्योकि मैं तुसां ने बोलदा है, की जालू दीकर सै परमेश्वरे दे राज्य च पूरा नी होगा तालू दीकर मैं फसह दे त्योहारे दा खाणा दुबारा नी खाणा।” 17 तालू उनी अंगूर दे रस दा कटोरा लेईकरी परमेश्वरे दा धन्याबाद किता कने बोलया, “इसयो लिया कने अपु चे बंडी करी पी लिया। 18 क्योकि मैं तुसां ने बोलदा है, की जालू दीकर परमेश्वरे दा राज्य नी ओगा तालू

दीकर मैं अंगरा दा रस कदी नी पिगा।” 19 फिरि उनी रोटी लेई, कने धन्याबाद करिके तोडी, कने उना जो ऐ बोली करी दिती, ऐ मेरा शरीर है, जडी तुहाडे ताई दितया जांदा है: मिजो याद करणे ताई ऐई करा-करा। 20 इयां ही उनी खाणां खाणे बाद कटोरा भी ऐ बोलदे दिता, ऐ अंगूर दे रसे दा कटोरा मेरे उस खुने च नोई बाचा है जडा तुहाडे ताई भाया जाणा है। 21 पर दिखा, मिजो पकडवाणे बाले दा हथ मेरे सोगी मेरिया थालिया च है। 22 “क्योकि मिजो, माणुऐ दे पुत्रे दा जियां उदे ताई तय है तियां करदा है, पर हाय उस माणुऐ पर, जिसदिया बजा ने पकडाया जांदा है।” 23 तालू सै अपु चे बोलणा लग्गे की, “असां चे कुण है, जडा ऐ कम्म करणा?” 24 उना चे ऐ भी बेहस होई की, सांझो चे कुण बडा समझया जांदा है? 25 यीशुऐ उना ने बोलया, बाकी जातियां दे राजे उना पर प्रभुता करदे न; जडे उना पर हक रखदे न, उना जो उपकारक बोलदे न। 26 पर तुसां ऐ दे मत बणदे; नितां जडा तुसां चे बडा है, सै छोट्टे दे बराबर कने जडा सबसे बड़ा है सै सेबक दे बराबर बणे। 27 क्योकि बडा कुण है; सै जडा रोटी खाणां बैठया या सै जडा सेबा करदा है? क्या सै नी जडा रोटिया खाणां बैठया है? पर मैं तुहाडे बिच सेवके साईं है। 28 पर तुसां ही न, जडे मेरियां परिक्षां च लगतार मेरे सोगी रें; 29 कने जियां मेरे पिता मिजो ताई इक राज्य दितया है, तियां ही मैं भी तुहाडे ताई राज्य दिन्दा है। 30 ताकि तुसां मेरे राज्य च मेरिया मेजा पर खा पिया; कने सिंहसनां पर बेईकरी इझाले देशे दे बाहरां गोत्रों दे लोकां दा न्याय करा। 31 “शमौन, हे शमौन, दिख, शैताने तुसां लोकां जो परखणे ताई परमेश्वर ला आज्ञा मंगी लियो है, कि भलाई जो बुराई ला बख करणा जियां किसान कणका ला भुऐ जो बख करदा है। 32 पर मैं तेरे ताई परमेश्वरे ला प्राथना किती है, की तेरा भरोसा मिजो ला नी जा: कने जालू तू पञ्चाताप करे, तां अपने भाईयां जो भी मिजो पर भरोसा करणे ताई मजबूत करे।” 33 पतरसे यीशुऐ बोलया, “प्रभु जी, मैं तेरे सोगी जेला जाणे कने मरणे जो भी तैयार है।” 34 पर यीशुऐ बोलया, “हे पतरस मैं तिजो ने बोलदा है, की अज मुर्गे तालू दीकर बांग नी देणी जालू दीकर तू तिन बरी मिजो पछेणने ला मना करी बोणा है।” 35 कने यीशुऐ उना ने बोलया, “जालू मैं तुहांजो बटुऐ, कने झोली, कने चुते बिना शुभसमाचार प्रचार करणे भेजया था, तां क्या तुहांजो कुसा भी चिजा दी कमी होई थी?” उना बोलया, “नी होई कुसा भी चिजा दी।” 36 उनी उना ने बोलया, “पर हण लोक साडे खिलाफ न हण जिसदे बाल बटुआ है सै उसयो लेई ले, कने तियां ही झोली भी, कने जिसदे बाल तलबार नी है सै बाहरे दे कपडे बेची करी खरीदी ले।” 37 क्योकि मैं तुसां ने बोलदा है, की ऐ जडा पबित्र शास्त्र च लिखया है सै पूरा हो की, “सै अपराधियां सांभ मनया गिया है, उदा पूरा होणा जरूरी है: क्योकि मेरे बारे जडियां गल्लां लिखियां न सै पुरियां होणे बालियां न।” 38 चेलयां बोलया, “प्रभु जी, दिख, ऐथु दो तलबारां न।” यीशुऐ उना ने बोलया, “बतेरियां न।” 39 तालू सै बाहर निकली करी रोजे सांई जैतून सखां दे पाहडे पर गिया, कने चेले उदे पिच्छे गे। 40 उसा जगा पर पुज्जी करी यीशुऐ उना ने बोलया, “प्राथना करा, की तुसां दी परख ना होऐ।” 41 फिरि यीशु थोडा ओगे गिया, कने गोडे भार बेईकरी प्राथना करणा लग्गा, 42 “पिता जी अगर तू चा तां इस कटोरे जो बखे ला हटाई ले, पर तमी मेरी नी पर तेरी इच्छा पूरी हो।” 43 तालू स्वर्ग दे इक स्वर्गदूते ओथु प्रगट होया जडा उसयो सामर्थ्य दिन्दा था। 44 कने सै बडा पेशान कने व्याकुल होईकरी कने दुखे ने प्राथना करणा लग्गा; कने उदा पसीना मना की खुने दियां बडियां-बडिया बूदा सांई धरतिया पर पोआ था। 45 तालू सै प्राथना ला उठया कने अपने चेलयां बखे आई करी उना जो उदासिया दे मारयो सतुया दिखया। 46 कने उना ने बोलया, “कजो सोआ दे न? उदा, प्राथना करा, की तुहाडी परख ना होऐ।” 47 जालू यीशु ऐ बोला दा ही था, की दिखा मते सारे लोक आपे, यहदा जडा बाहरां चेलयां चे इक था सै अग्गे-अग्गे ओआ दा था, सै यीशुऐ दे बखे आया, ताकि उदा चूमा लेई सके। 48 यीशुऐ उसयो बोलया, “हे यहदा, क्या तू चूमा लेईकरी मिजो, माणुऐ दे पुत्रे जो पकडवा दा है?” 49 उदे साथियां जालू दिखया की क्या होणे वाला है, तां बोलया, “प्रभु जी, क्या असां तलबार चलाना?” 50 कने चेलयां चे इक्की महायाजके दे नोकरे च तलबार चलाई करी उदा सजा कन उडाई दिता। 51 इस पर यीशुऐ बोलया, “हूण बस करा।” कने उदा कन छुई करी उसयो ठीक किता। 52 तालू यीशुऐ बडे याजकां कने मंदरे दे रखबालयां दे अगुवां कने यहदी अगुवां

जो बोलता, तुसां क्या तलवारानं कने डांगा लेईकरी मिजो डाकुआं सांई पकडना आयो ना। 53 "मै जालू हर रोज मंदरे च बेईकरी उपदेश दिन्दा था, तालू तां तुसां मिजो नी पकडया; पर ऐ तुहाडा बकत है, कने नेहरे दा हक है।" 54 फिरी सै उसयो पकडी करी लेई चले, कने महायाजक दे घरे जो लेई आये कने पतरस दुर्-दुर् ला ही उना दे पिच्छे चलया था। 55 कने जालू सै अंगणे च अगग वाल्ली करी गिठे बैठे, तां पतरस भी उना दे बिच बेई गया। 56 कने इक दासिया उसयो अगगी दी लौई च बैठया दिखीकरी कने उदे पासे दिखीकरी बोलणा लगगी, "ऐ भी तां यीशुऐ सोगी था।" 57 पर पतरसे ऐ बोली करी मना किता, की मै इसयो नी जाणदा। 58 थोडी देरा बाद फिरी कुनकी होरनी उसयो दिखीकरी बोलया, "तू भी तां उना चे है।" पतरसे बोलया, "सै माणू मै नी है।" 59 कोई इक घंटे बाद इक होर माणू बोलणा लगगा, "पक्का ऐ भी उना सोगी ही था; क्योकि ऐ भी गलीली है।" 60 पतरसे बोलया, "मिजो नी पता की ऐ क्या बोला दा है?" पतरसे दे इयां बोलदे ही, मुर्गे झट बांग देई दिती। 61 तालू प्रभु यीशुऐ मुडी करी पतरसे पासे दिखया, कने पतरसे जो सै भल्ल याद आई जडी उनी बोलियो थी, "अज मुर्गे जो बांग देणे ला पेहले, तू तिन्न करी मिजो मना करणा है।" 62 कने पतरस बाहर निकली करी बडा भरी रोणा लगगा। 63 जिना माणूआं यीशुऐ जो पकडया था, सै उदा मजाक उडाई करी उसयो कुटणा लगगे; 64 कने उदियां हखी पर पट्टी बन्नी करी पुछया, "अगर तू परमेश्वरे दा संदेश देणेबाला है! तां सांझो दस कुनी तिजो मारया।" 65 कने उना होर भी बुरियां गल्लां उदे बारे च बोलियां। 66 जालू ब्याग होई तां यहूदी अगुवां कने बड़े याजक कने व्यवस्था जो सिखाणे बाले पिठे होऐ, कने उसयो अपणीया महासभा च आणी करी पुछया, 67 अगर तू मसीह है, तां सांझो ने बोली दे। यीशुऐ उना ने बोलया, "अगर मै तुहांजो ने बोलें तां तुसां मनणा नी। 68 अगर मै कोई सबाल प्छां, तां तुसां जबाब नी देणा। 69 पर हुणे ला मै, माणूऐ दे पुत्रे सबते शक्तिशाली परमेश्वरे दे सजे पासे बेई रेणा।" 70 इस पर सारयां बोलया, "तां तू क्या परमेश्वरे दा पुत्र है?" यीशुऐ उना ने बोलया, "तुसां अपु ही बोलदे न, क्योकि मै है।" 71 तालू उना बोलया, "हुण सांझो गबाई दी क्या जरूरत है क्योकि असां अपु ही इदे मुरे ला सुणी लिया है।"

**23** तालू सारी सभा उठी करी उसयो पिलातस बाल लेई गेई। 2 कने सै ऐ बोली करी उस पर दोष लगाणा लगगे, "असां इसयो साडे लोकां जो बेहकादे कने महाराजा जो कर देणे ला मना करदे, कने अपने आपे जो मसीह, कने राजा बोलदे सुणया है।" 3 पिलातुसे उसला पुछया, "क्या तू यहदियां दा राजा है?" उनी उसयो जबाब दिता, "तू अपु ही बोला दा है।" 4 तालू पिलातुसे बड़े याजकां कने लोकां ने बोलया, "मिजो इस माणूऐ च कोई दोष नी मिलदा है।" 5 पर सै होर भी दबाब पाई करी जोरे ने बोलणा लगगे, "यहदिया प्रदेशे दे सारे लोकां च इदिया शिक्षा दिया बजा ने दंगे हो दे न, कने गलील प्रदेश च भी इयां ही किता कने हुण ऐयू आई गया है।" 6 ऐ सुणीकरी पिलातुसे पुछया, "क्या ऐ माणू गलील प्रदेश दा रेणे बाला है?" 7 कने ऐ जाणी करी की सै उस प्रदेश दा है जिथू राजा हेरोदेस राज करदा है, तां उसयो हेरोदेसे बाल भेजी दिता, क्योकि उना दिना राजा हेरोदेस भी यरूशलेम च था। 8 हेरोदेस यीशुऐ जो दिखीकरी बडा खूश होया, क्योकि सै उसयो बडे रोजां ला दिखणा चांदा था: उनी उदे बारे च सुणाया था, कने हेरोदेस यीशुऐ ला कुछ चमत्कार दिखणे दी आस रखदा था। 9 सै उसला मतियां गल्लां पुछदा रिया, पर उनी उना दा कोई भी जबाब नी दिता। 10 कने बड़े याजक कने व्यवस्था जो सिखाणे बाले खडोई करी पुरे जोरे शोर लाईकरी उस पर दोष लांदे रे। 11 तालू राजा हेरोदेसे अपने सिपायां सोगी उदी बेजती करिके उदा मजाक उडायया, कने चटकिले कपडे पेहनाइ करी उसयो पिलातुस बाल बापस भेजी दिता। 12 उस बकते दीकर पिलातुस कने हेरोदेस इकी दुऐ दे दूशमण थे, पर दोनो उसी रोजे मित्र बणी गे। 13 पिलातुसे बड़े याजकां कने सरदारां कने लोकां जो सदीकरी बोलया, 14 तुसां इस माणूऐ जो मेरे बाल लेई आये कने बोलया की दंगा कराणे तांई लोकां जो भटकदा था। पर दिखा, मै तुहाडे सामणे इसदी जाँच किती, पर जिना गल्लां दा तुसां इदे पर दोष लगा दे न, मिजो उना गल्लां दे बारे च उदे च कोई भी दोष नी मिल्ला है; 15 कने ना ही हेरोदेसे उस पर कोई दोष लाया, क्योकि उनी इसयो साडे बाल बापस भेजी दिता है क्योकि इनी माणूऐ ऐसा कुछ नी कितया की इसयो मौत दी सजा मिल्ले। 16 "इस तां मै इसयो कोडी मरवाई

करी छडी देणा है।" 17 पिलातुस फसह दे त्योहारे दे बेले उना दे इकी केदिये जो छडी दिन्दा था। 18 तालू सारे मिली करी बोलणा लगगे, इसयो मौत दी सजा दिया, कने साडे तांई बरअब्बा जो छडी दे। 19 सै कुसकी दंगे दिया बजा ने जडा शेहरे च होया था, कने हत्या दिया बजा ने जेला च पाया था। 20 पर पिलातुसे यीशुऐ जो छडणे दिया इच्छा ने लोकां जो फिरी समझाया। 21 पर सै जोरे-जोरे ने बोलणा लगगे, "इसयो सुली पर चढाई दिया! इसयो सुली पर चढाई दिया!" 22 उनी तिजी बार फिरी बोलया, "कजो उनी क्या बुरा कितया है? पर मिजो इदे च मौत दी सजा देणे जोगी कोई गल्ल नी मिल्ला दी है, मै इसयो मारी कुटी करी छडी देणा है।" 23 पर सै चिलाई-चिलाई करी पिच्छे ही पेई ने, की इसयो सुली पर चढाई दिया, कने सै होर जोरे-जोरे ने बोलणा लगगे। 24 पिलातुसे हुकम दिता, की इना दिया बिनतिया दे अनुसार करा। 25 कने उनी उस माणूऐ जो जडा दंगे कने हत्या दिया बजा ने जेला च था, जिसयो सै मंगदे थे, छडी दिता; कने यीशुऐ जो उना दिया इच्छा अनुसार उना जो देई दिता। 26 जालू सिपाई यीशुऐ जो लेई चलयो थे, तां उना समोन नापे दे इक कुरेनी जो जडा ग्रुपे ला ओआ दा था, उसयो पकडी करी उस पर सुली लदी दिती ताकि उसयो यीशुऐ दे पिच्छे-पिच्छे लेई चले। 27 कने लोकां दी बडी बडी भीड उना दे पिच्छे चली पेई, कने उना चे जनानिया भी मतियां थियां, जडियां उदे तांई छातिया पिटी करी रोआ दियां थियां। 28 यीशुऐ उना पासे मुडी करी बोलया, "हे यरूशलेम शेहरे दियां कुडियो, मेरे तांई मत रोआ; पर अपने तांई कने अपने बचयां तांई रोआ।" 29 क्योकि दिखा, सै दिन दुख भरे दिने ओणे न, जिना च लोकां बोलणा है, "धन्य न सै जनानियां जिना दे कदी बच्चे नी थे, कने जिना कदी बच्चे जम्मे नी, जिना ना कदी उना जो दूध पियाया।" 30 उस बेले, उना लोकां पहाडा ने बोलणा लगणा है, की सांझो पर पेई जा, कने पहाडियां ने की सांझो ढकी लिया। 31 "क्योकि अगर सै मिजो इस तरीके ने मारदे न जडा हरे रखे सांई है, तां जडे लोक सुके रखे सांई न उना ने क्या कुछ नी करणा।" 32 सै होर दो माणूआं जो यीशुऐ सोगी मारणे तांई लेई चले जिना बुरे कम्म कितयो थे। 33 जालू सै उसा जगा पर पुज्जे बिसा जो खोपडी बोलदे न, तां उना ओथु उसयो कने उना दो बुरे कम्म करणे जिलां जो भी इकी जो सजे पासे कने दुज्जे जो खबे पासे सुली पर लटकया। 34 तालू यीशुऐ बोलया, "हे पिता, इना जो माफ कर, क्योकि ऐ जाणदे नी न की ऐ क्या करा दे न?" कने उना पर्चियां पाई करी उदे कपडे बंडी ले। 35 लोक खडोई करी दिखा दे थे, कने सरदार भी मजाक करिके बोलदे थे, इनी होरां जो बचाया, अगर ऐ परमेश्वरे दा मसीह है, कने उदा चुण्या होया है, तां अपने आपे जो बचाई ले। 36 सिपाई भी बखे आई करी यीशुऐ जो पिणे तांई सिरका देईकरी उदा मजाक करिके बोलदे थे। 37 "अगर तू यहदियां दा राजा है, तां अपने आपे जो बचा।" 38 कने उदे उपर इक दोष पत्र भी लगाया था: "ऐ यहदियां दा राजा है।" 39 जडे बुरे कम्म करणे बाले यीशुऐ सोगी लटकाये थे, उना चे इकी निंदा करिके बोलया, "क्या तू मसीह नी है? तां फिरी अपने आपे जो कने सांझो बचा।" 40 इसा गल्लां पर दुज्जे उसयो डांटया, "क्या तू परमेश्वरे ला भी नी डरदा है?" तिजो भी तां सै ही सजा मिलियो है, 41 "कने सांझो तां न्याय दे अनुसार सजा मिलियो है, क्योकि सांझो तां अपने कम्मा दा ठीक फल मिला दा है; पर इनी तां कोई गलत कम्म नी कितया है।" 42 तालू उनी बोलया, "यीशू जी, जालू तू अपने राज्य च राजा होईकरी ओगा, तां मिजो याद रखयां।" 43 यीशुऐ उसला बोलया, "मै तिजो ने सच्च बोलदा है की अज ही तू मेरे सोगी स्वर्गलोक च होणा है।" 44 कने लगभग दोपेहर ला लेईकरी तिन्न बजे दीकर सारे देशे च नेहरा रिया, 45 कने सूरजे दी लोओ चली गेई, कने मंदरे दा मोटा परदा बिचे ला फटी करी दो टुकडे होई गिया, 46 कने यीशुऐ जोरे ने बोलया, "पिता, मै अपनी आत्मा तेरे हाथ च दिन्दा है।" ऐ बोली करी अपने प्राण छडी दिते। 47 सुबेदारे जडा कुछ होया था दिखीकरी परमेश्वरे दी बडाई किती, कने बोलया, पका ऐ कोई धर्मी माणू था। 48 भीड जडी ऐ दिखणे तांई गिठी होईयो थी, इसा घटना जो दिखीकरी छातियां पिटदे होए अपने घरां जो बापस चली गेई। 49 कने यीशुऐ दे सारे जाणने पछेणने बाले भित्र, कने जडियां जनानिया गलील प्रदेश ला उदे सोगी आईयां थियां, दू खडोई करी जडा कुछ होया था सारा कुछ दिखा दियां थियां। 50 कने ओथु यूसुफ नापे दा इक माणू था सै महासभा दा सदस्य था कने सज्जन कने धर्मी था। 51 कने सै यहूदी अगुवां दे बिचारां कने उना

दे कम्मा ला खुश नी था; कने सै यहदियां दे शेहर अरिमतिया शेहरे दा रहेणे बाला कने परमेश्वरे दे राज्य दी नियाल्ल रखणे बाला था। 52 उनी पिलात्स दे बाल जाई करी यीशुए दी लाश मंगी, 53 कने लाशा जो सूली ला उतारी करी मत्तले दिया चादरा च लपेटया, कने उसयो इक कबरा च रखया, जडी पथरे च खणियो थी; कने उसा च कदी भी कोई नी रखया था। 54 सै रोज शुकवार था, जडा तैयारी बाला दिन था कने सब्दे दा रोज शुरू होणेबाला था। 55 कने उना जनानियां जडियां उदे सोगी गलील प्रदेशे ला आइयां थियां, पिच्छे-पिच्छे जाई करी कबर दिखी कने ऐ भी की उदी लाश कियां रखी है। 56 कने अपने घरां जो बापस आई करी उना सुगंध बालियां चिजां कने इत्र यीशुए दिया लाशा पर मलणे तांई तैयार किता; कने सब्दे दे रोजे उना मूसा दिया व्यवस्था दे अनुसार अराम किता।

**24** पर हब्दे दे पेहले रोजे सै बडी ब्यागा ही उना सुगंधित चिजां जो जडियां उना तैयार कितियां थियां, लेईकरी कबरां पर आईयां। 2 कने उना दिखया की कबरा दे दरबाजे ला पथर पेहले ला ही हटया होया है, 3 कने सै अंदर गियां कने दिखया पर यीशुए दी लाश ओथु नी थी। 4 जालू सै इसा गल्ला ने हेरान थियां तां दिखा, दो माणु चिट्टे चमकीले कपडे पायो उना बखे खडोतयो थे। 5 जालू सै डरी गियां, कने उना मु धरतिया पासे हेठ करी दिते; तां उना स्वर्गदूतां जनानिया ने बोलया, “तुसां जिन्दया जो मरयां चे कजो तोपदे न?” 6 “सै ऐथू नी है, पर जिन्दा होई गिया है। याद कर उनी गलील प्रदेशे च रेंदे बेले तुसां ने बोलया था, 7 की जरूरी हे, की मैं, माणुए दा पुत्र पापियां दे हथे पकडया जा, कने सूली पर चडाया जाए, कने तिजे दिने मरयां चे जिन्दा होई जाए।” 8 तालू यीशुए दिया गल्लां उना जो याद आईयां। 9 कने कबरा ला बापस आई करी उना गयारां चेलयां जो, कने बाकियां सबना जो, ऐ सारियां गल्लां सुणाई दीतियां। 10 जिना प्रेरितां ऐ गल्लां बोलियां, सै मरियम मगदलीनी कने योअन्ना कने याकुबे दी मां मरियम कने उना सोगी दियां सारियां जनानिया भी थियां। 11 पर उना दियां गल्लां उना जो कहाणियां सांई लगियां, कने चेलयां उना दा भरोसा नी किता। 12 तालू पतरस उठी करी दोडी करी यीशुए दिया कबरा पर गिया, कने निठे होईकरी अंदर दिखया ओथु उनी सिर्फ बस कपडे पियो दिखे, कने जडा होया उसला हेरान होईकरी बापस घरे चली गिया। 13 उसी रोजे यीशु दे दो चले इम्माऊस नापे दे इक गांऐ जो चलयो थे, जडा यरूशलेम शेहरे ला कोई गयारा किलो मीटर दूर था। 14 कने सै इना सारियां गल्लां पर अपु चे गल्ल बात करा दे थे, जडियां होईयां थियां। 15 कने सै जालू अपु चे गल्ल बात कने पछताछ करा दे थे, तां यीशु अपु आई करी उना सोगी चलणा लग्गा। 16 पर परमेश्वरे उना जो यीशुऐ जो पछेणने ला रोकी रखया था, ताकि सै उसयो पछेणी नी सकन। 17 तालू यीशुए उना ने पुछया, “ऐ कया गल्लां न, जडियां तुसां चलंदे-चलंदे अपु चे करा दे न?” सै स्की गे कने उना दे मु बडे उदास लग्गा दे थे। 18 ऐ सुणीकरी, उना चे क्लियुपास नापे दे इकी माणुऐ बोलया, “शायद तू यरूशलेम च किल्ला ही परदेसी है; की जिसयो पता नी है की, पिछले इना रोजां च ऐथू कया-कया होया है?” 19 यीशु उना ला पुछया, “कया-कया होया है?” उना उसला बोलया, नासरत गां दे यीशु दे बारे च जडा असल च परमेश्वरे कने सारे लोकां दे बखे कम्म कने बचन च सामथीं परमेश्वरे दा संदेश देणेबाला था। 20 बहू याजकां कने साडे सरदारां उसयो पकडाई दिता, की उसयो मारणे दा हुकम दिता; कने उसयो सूली पर चढाई दिता। 21 पर सांझो आस थी, की इनी ही इस्पांले देश दे लोकां जो रोम देश ला छुटकारा देणा, कने इना सारियां गल्लां दे सिवा इसा गल्लां जो अज तिजा दिन होई गिया। 22 कने हण केई जनानिया सांझो हेरानिया च पाई दिता है, जडियां अज ब्यागा कबरा पर गियां थियां। 23 कने जालू उना जो उदी लाश नी मिल्ली, तां ऐ बोलदियां आईयां, की असां जो स्वर्गदूतां दे दर्शण होऐ, उना बोलया की यीशु जिन्दा है। 24 “तालू साडे साथियां चे केई कबरा पर गे कने जियां उना जनानिया बोलया था, तियां ही ओथु था; पर यीशुऐ जो उना नी दिखया।” 25 तालू यीशुऐ उना दोनो चेलयां ने बोलया, “हे मूर्खीं, जडा कुछ परमेश्वरे दा संदेश देणेबालयां दिया कताबां च लिखया है तुसां लोकां जो इना सारियां गल्लां पर भरोसा करणा बडा कठिन लग्गा है।” 26 “ऐ जरूरी था, की मसीह ऐ सारे दूख झेले कने फिरी करी अपणिया महिमा च प्रवेश करे।” 27 तालू यीशुऐ उना जो पुरे पबित्र शाखां चे, उनी मूसा ला शुरू करिके सारे परमेश्वरे दा संदेश देणेबालयां जितणियां गल्लां उदे बारे

च बोलियां दियां, सै उना जो समजाइयां। 28 इतणे चे सै उस गांऐ बखे पुज्जे, जिथू सै चलयो थे, कने यीशुऐ दे व्यवहारे जो दिखीकरी ऐसा लग्गा था, की सै चेलयां ला अग्रे बटणा चांदा है। 29 पर उना ऐ बोली करी उसयो रोकया, “साडे सोगी रे; क्योकि संज होई चलियो है, कने दिन बडा डली गिया है।” तालू सै उना सोगी रहेणे तांई अंदर गिया। 30 जालू यीशु उना सोगी रोटी खाणां बैठा, तां उनी रोटी लेईकरी धन्यवाद किता, उसा जो तोडी करी उना जो देणा लग्गा। 31 तालू उना दियां हखी खुली गियां; कने उना उसयो पछेणी लिया, कने सै उना दी हखी अग्रे ला गायब होई गिया। 32 उना अपु चे बोलया, “जालू सै रस्ते च सांझो ने गल्लां करा दा था, कने सांझो पबित्र शाखां दा मतलब समझा दा था, तां कया साडे मना च उतेजना नी जागी?” 33 सै उसी बेले उठी करी यरूशलेम शेहरे जो बापस चली गे, कने उना गयारां चेलयां कने उदे साथियां जो गिठे दिखया। 34 जडे गिठे होयो थे सै ऐ बोला दे थे, “प्रभू सची जिन्दा होई गिया है, कने शमौने जो मिलया है।” 35 तालू उना रस्ते दियां गल्लां उना जो दिसियां कने ऐ भी बोलया की जालू सै रोटी तोडा दा था तां उना उसयो पछेणी लिया की सै यीशु है। 36 सै ऐ गल्लां करा दे ही थे, की यीशु अपु ही उना बिच प्रकट हुआ; कने उना ने बोलया, “तुहांजो शांति मिल्ले।” 37 पर सै घबराई गे, कने डरी गे, कने सोचना लग्गे की असां भूते जो दिखा दे न। 38 यीशुऐ उना ने बोलया, कजो घबरा दे न? कने तुहाडे मने च कजो शक होंदा है? 39 “मेरे हथ कने पैरां जो दिखा, की मैं सै ही है, मिंजो छुई करी दिखा; क्योकि भुत दी हड्डी कने मास नी होंदा है जियां मिंजो च दिखदे न।” 40 ऐ बोली करी उनी उना जो अपने हथ पैर दस्से। 41 जालू खुशिया दे मारे उना जो भरोसा नी होया की यीशु जिन्दा है, कने हेरान होआ दे थे, तां यीशुऐ उना ला पुछया, “कया ऐथू तुहाडे बाल कुछ खाणे जो है?” 42 उना उसयो भुनियो मछिया दा टुकडा दिता। 43 यीशुऐ सै मछिया दा टुकडा लेईकरी उना दे सामणे खादा। 44 फिरी यीशुऐ उना ने बोलया, “ऐ मेरियां सै गल्लां न, जडियां मैं तुहाडे सोगी रेईकरी तुहांजो ने बोलियां थियां, की जरूरी हे, की जितणियां गल्लां मूसा दिया व्यवस्था कने परमेश्वरे दा संदेश देणेबालयां कने भजना दियां कताबां च मेरे बारे च लिखियां न, सै सारियां सच्च साबित होन।” 45 तालू यीशुऐ उना जो पबित्र शाख समझणे तांई मदद किती। 46 कने उना ने बोलया, की पबित्र शाखां च ऐसा लिखया है की मसीह जो दूख झेलणे न, कने तिजे दिने मरयां चे जिन्दा होई जाणा है, 47 कने यरूशलेम शेहरे ला लेईकरी सारियां जातियां दे पापां दी माफी तांई शुभसमाचार दा प्रचार उदे नापे ने होणा है। 48 “तुसां इना सारियां गल्लां दे गबाह न। 49 कने मैं अपु तुहांजो पर पबित्र आत्मा जो भेजणा है, जिसदा बायदा मेरे पिता कितया है। तालू दीकर शेहरे च इंतजार करणा होणा जालू दीकर तुहांजो स्वर्ग ला सामर्थ्य नी मिलदी।” 50 तालू सै उना जो बैतनिय्याह गांऐ दीकर शेहर ला बाहर लेई गिया, कने उना जो हथ चुकी करी आशीष दीती; 51 कने उना आशीष दिन्दे ही उना ला लग होई गिया कने स्वर्ग जो चली गिया। 52 कने सै उसयो दण्डवत करिके बडिया खुशिया ने यरूशलेम शेहरे जो बापस चली गे। 53 कने सै लगातार मंदरे च जाई करी परमेश्वरे दी स्तुति करदे थे।

# यूहन्ना

**1** इस सारे संसारे दे बणने ला पहले बचन था, कने बचन परमेश्वरे सोगी था कने सै बचन परमेश्वर था। 2 बचन इस सारे संसारे दे बणने ला पहले ला ही परमेश्वरे सोगी था। 3 परमेश्वरे सारा कुछ उसी बचन ने ही बणाया है कने जडा कुछ भी बणाया है इदे चे कोई भी चीज बचन बिना नी बणियो है। 4 साडी शारीरिक कने आत्मिक जिन्दगी उना च ही थी, कने सै जिन्दगी सारे लोकां जो लौ दिन्दी जोत थी। 5 कने लौ नेहे च चमकदी है; कने नेहरा उसा लौइ जो बुझाई नी सकया। 6 परमेश्वरे यूहन्ना नाए दे इक माणुए जो भेजया। 7 सै लौइ दे बारे च दसणे तांई आया था ताकि सारे लोक उदे जरिये उसा जोती पर भरोसा करन। 8 यूहन्ना अपु तां सै लौ नी था, पर सै उसा लौ दी गबाई देणा आया था। 9 “सै जडी सच्ची लौ है” जडी हर इक माणुए जो लौ करदी है, सै संसार च ओणे बाली थी। 10 सै संसार च था, कने संसार उदे ने पैदा होया है, कने संसारे दे लोकां उसयो नी पछेणया। 11 सै अपने लोकां च आया पर उसयो उदे अपने लोकां नी अपनया। 12 पर जितणया उसयो अपनया, उनी उना जो परमेश्वरे दी ओलाद होंगे दा हक दिता, मतलब की सै जडे उस पर भरोसा रखदे नः 13 सै ना तां माता-पिता दी इच्छा ला, कने ना तां माणुए दिया इच्छा ने, ना शरिर दिया इच्छा ने, ना इक माणुए दिया ओलाद दी इच्छा ने, पर परमेश्वरे ला पैदा होया है। 14 कने बचन इक माणु बणया कने असां लोकां बिच रिया, कने असां उदी ऐसी महिमा दिखी, जदेई पिता दे इकलोते दी महिमा। जो पिता परमेश्वरे ला सचाइया कने अनुग्रह ने भरपूर होईकरी आया। 15 यूहन्ना उदे बारे च गबाई दिती, कने पुकारी करी बोलया, की ऐ सेई है, जिदे बारे च मैं बोलया था, की उनी मेरे बाद ओणा है, सै मिंजो ला भी बदीकरी है, क्योंकि सै मिंजो ला पहले इस संसारे च मोजूद था। 16 क्योंकि उदी परीपूर्णता ने सांझो सारयां जो मिलया है मतलब अनुग्रह पर अनुग्रह। 17 व्यवस्था तां मूसा ने दितियो है, पर परमेश्वरे यीशु मसीह दे जरिये अनुग्रह कने सचाई दर्सी। 18 परमेश्वरे जो कुनी भी कदी नी दिखया है, सिर्फ उदे इकलोते पुत्रे जडा असल च परमेश्वर है, कने पिता परमेश्वर दे सबते नेडे है, उनी सांझो दसया है, की परमेश्वर कदिया है। 19 यूहन्ना दी गबाई ऐ है, की जालू यहदी अगुवां यरूशलेम शेहरे ला याजकां कने लेवियां जो उसला ऐ पुछणे तांई भेजया, “तू कुण है?” 20 यूहन्ना उना जो साफ-साफ बोलया, “मैं मसीह नी हँ।” 21 तालू उना उसला पुछया, “तां फिरी कुण है? कया तू परमेश्वरे दा संदेश देणेबाला एलियाह है?” उनी बोलया मैं नी हँ। तां कया तू सै परमेश्वरे दा संदेश देणेबाला है जिसदा पिता परमेश्वरे बायदा कितया था? उनी जबाब दिता की, “नी।” 22 तालू उना यूहन्ना ला पुछया, “तां फिरी है कुण तू। ताकि असां अपने भेजणे बालयां जो जबाब देई सकन। तू अपने बारे च कया बोलदा है?” 23 उनी बोलया, “जियां यशायाह परमेश्वरे दा संदेश देणेबाला बोलया है, की मैं सुनसान जगा च इक हक पाणे बाले दी अबाज है की तुसां प्रभुए दा रस्ता सीधा करा।” 24 ऐ लोक फरीसियां दे पासे ला भेजयो थे। 25 उना उसला ऐ सबाल पुछया, की अगर तू मसीह नी है, कने ना एलियाह है, कने ना ही सै परमेश्वरे दा संदेश देणेबाला है जडा ओणे बाला था, तां फिरी तू बपतिस्मा कजो दिन्दा है? 26 यूहन्ना उना जो जबाब दिता, की मैं तां पाणिणे ने बपतिस्मा दिन्दा है, पर तुहाडे बिच इक माणु खडोतया है, जिसयो तुसां नी जाणदे ना। 27 मतलब की मेरे बाद ओणे बाला है, मैं तां उदे जुतयां दे तस्मे खोलणे दे कार्बाली ला है। 28 ऐ गल्लां यरदने खड्वा दे पार बैतनियाह शेहर च होईयां, जिथू यूहन्ना लोकां जो बपतिस्मा दिन्दा था। 29 यूहन्ने दुज्जे रोजे यीशुए जो अपने पासे ओंदे दिखीकरी बोलया, “दिखा, ऐ परमेश्वरे दा मेमना है, जिनी संसारे दे पाप चुकी लेई जाणे ना। 30 ऐ सेई है जिदे बारे च मैं बोलया था, की इकी माणुए मेरे पिच्छे ओणा है, सै मिंजो ला भी बडा है, क्योंकि सै मिंजो ला भी पहले था। 31 कने मैं उसयो पछेणदा नी था की सै मसीह था, इझाएल देश दे लोकां जो ऐ दसणे तांई की सै कुण है, तां मैं पाणिणे ने बपतिस्मा दिन्दा आया।” 32 कने यूहन्ने ऐ गबाई दिती की, मैं पबित्र आत्मा जो कबुतरे सांई स्वर्ग ला उतरदे दिखया है, कने सै उस पर स्की गई। 33 पर मैं तां उसयो पछेणदा नी था सै मसीह था, पर जिनी मिंजो पाणिणे ने बपतिस्मा देणा भेजया, उनी ही मिंजो ने बोलया, की जिस पर तू आत्मा जो उतरदे कने स्कदे दिखगा; सेई पबित्र

आत्मा ने बपतिस्मा देणेबाला है। 34 कने मैं दिखया, कने गबाई दिती है की मैं तुसां ने सच्च-सच्च बोलदा की ऐई परमेश्वरे दा पुत्र है। 35 दुज्जे रोजे फिरी यूहन्ना कने उदे दो चले खडोतयो थे। 36 कने यीशु चल्या था, तां उनी उदे पासे नजर करिके बोलया, “दिखा, ऐ परमेश्वरे दा मेमना है।” 37 तालू सै दोनो चले यूहन्ना दी गल्ल सुणीकरी यीशुए दे पिच्छे चली पे। 38 यीशुए पिच्छे मुडी करी उना जो पिच्छे ओंदे दिखीकरी उना ला पुछया, तुसां कुदिया तोपा च न? उना उसला बोलया, “गुरू जी, तू कुथु रेंदा है?” 39 यीशु मसीह उना ने बोलया, “चला दिखी लिया।” तालू उना आई करी उदे रेहणे दी जगा दिखी, कने उस रोजे सै सोगी रे; कने ऐ दोपहर दे लगभग चार बजयो थे। 40 उना दोना चे इक तां शमौन पतरस दा भाई अन्दियास था, जडे यूहन्ना दियां गल्लां सुणीकरी उदे पिच्छे आया था। 41 उनी पहले अपने सगे भाई शमौन ने मिली करी उसला बोलया, की सांझो मसीह मिली गया है। 42 अन्दियास शमौने जो यीशुए बाल लेई आया: यीशुए उस पासे नजर करिके बोलया, तू यूहन्ना दा पुत्र शमौन है, तिजो पतरस बोल्ला है। 43 दुज्जे रोजे यीशुए गलील प्रदेशे जो जाणे दा फेसला कितो, कने फिलिप्पुस ने मिली करी बोलया, “मेरे चले बणने तांई मेरे पिच्छे चली पो।” 44 फिलिप्पुस तां अन्दियास कने पतरसे दे शेहर बैतसैदा दा रेंणेबाला था। 45 फिलिप्पुसे नतनएल ने मिली करी बोलया, “सांझो सै माणु मिल्ली गया है जिदे बारे च मूसा दिया व्यवस्था च कने परमेश्वरे दा संदेश देणेबालयां लिखया था। सै नासरत शेहरे ला यूसुफे दा पुत्र यीशु है।” 46 नतनएले उसला बोलया, कया कोई खरी चीज भी नासरत शेहर ला निकली सकदी है? फिलिप्पुसे उसला बोलया, “चली करी दिखी ले।” 47 यीशुए नतनएल जो अपने बाल ओंदे दिखीकरी उदे बारे च बोलया, दिखा, ऐ सची इझाएल दा भरोसे बाला बंशज है: इदे च कोई कपट नी है। 48 नतनएले यीशुए जो बोलया, “तू मिंजो कियां जाणदा है?” यीशुए उसयो जबाब दिता, फिलिप्पुसे तिजो जालू सदया, उसला पहले जालू तू अंजिरि दे स्खे थले ला, तालू मैं तिजो दिखया था। 49 नतनएले उसयो जबाब दिता, “गुरू जी, तू परमेश्वरे दा पुत्र है; तू इझाएल दा महाराज है।” 50 यीशुए उसयो जबाब दिता, “मैं तां तिजो ने बोलया, की मैं तिजो अंजिरि दे स्खे थले दिखया, कया तू तां भरोसा करा दा है? तू इसला भी बड़े कम्म दिखणे ना।” 51 फिरी यीशुए उसयो बोलया, “मैं तुसां ने सच्च-सच्च बोलदा है की तुसां स्वर्ग जो खुलया कने परमेश्वरे दे स्वर्गदूते जो उपर जांदे कने मिंजो, माणुए दे पुत्रे उपर उतरदे दिखणा।”

**2** फिरी दो दिन बाद गलील प्रदेशे दे काना शेहर च कुसकी दा बियाह था, कने यीशुए दी माता भी ओथु थी। 2 यीशु कने उदे चले भी उसी बियाह च सदया थे। 3 जालू दाखरस घटी गिया, तां यीशुए दिया माता उसला बोलया, “की इना बाल दाखरस नी रिया।” 4 यीशुए उसला बोलया, “माता जी तुसां मिंजो कजो दस्सा दे? अजे मेरा टेम नी आया है की लोक मिंजो मसीह से स्मे च पछेणना।” 5 पर उदिया माता सेवकां ने बोलया, “जडा कुछ सै तुहांजो बोलगा, सेई करनयो।” 6 ओथु यहदियां दे अपने धार्मिक रिबाजां दे अनुराह हथ धोणे दा रिबाज था। उना हथ धोणे तांई पथरे दे छे घडे रखयो थे। जिना च लगभग सौ-सबासौ लिटर पांणी ओंदा था। 7 यीशुए उना ने बोलया, “घडयां च पांणी भरी दिया।” उना घडयां जो उपरे दीकर भरी दिता। 8 तालू यीशुए उना जो बोलया, “हंग पांणी निकाली करी धामा दे प्रधाने बाल लेई जा।” सेबकां तियां ही कितया जियां उना जो करणे तांई बोलया। 9 जालू धामा दे प्रधाने सै पांणी चख्या, तां सै दाखरस बणी गिया था कने उसयो नी पता था की सै कुथु ला आया है; पर जिना सेवकां पांणी कडया था सै जाणदे थे, तां धामा दे प्रधाने लाडे जो सदीकरी, उसयो बोलया। 10 हर इक माणु पहले सबना ला खरा दाखरस दिन्दा है, कने जालू लोक उसयो पी करी रजी जिदे न, तालू घटिया बाला धाखरस दिन्दा है; पर तू सबना ला बदिया दाखरस हले दीकर रखया है। 11 यीशुए गलील प्रदेशे दे काना शेहर च अपना ऐ पेहला चमत्कार दसी करी अपनी महिमा दसी कने उदे चेलयां उस पर भरोसा कितो की सै ही मसीह है। 12 इदे बाद सै कने उदी माता, उदे भाई, उदे चले, कफरनहम शेहर जो गे कने ओथु थोडे दिन रे। 13 यहदियां दा फसह दा त्योहार नेडे था, कने यीशु यरूशलेम शेहर जो गिया। 14 कने उनी मंदरे च दांद, कने भेडां, कने कबुतरां जो बेणेणे बालयां जो बैठया दिखया। 15 तालू उनी रसियां जो कोडा बणाई करी, सारियां भेडां कने दांदा जो मंदरे ला कडी दिता, कने साहकारां दे पेसे

खलारी दिते, कने पिढां जो पुढा सुटी दिता, 16 कने कबुतरां बेचणे बालयां ने बोलया, “इना जो ऐथू ला लेई जा। मेरे पिता दे घरे जो व्यापारे दा घर मत बणा।” 17 तां उदे चेलयां जो याद आया की पबित्र शब्द च लिखया है, “तेरे घरे दा जूनू मेरे अंदर अग्गी साईं बलदा है।” 18 इस पर यहूदी अगुवां उसला बोलया, “तू सांझो क्या चमत्कार दसी सकदा है की जिसने साबित हो की तिजो परमेश्वरे दिया तरफा ला हक है।” 19 यीशुए उना जो जबाब दिता, “इसी मंदरे जो तोड़ी दीया, कने मैं इसयो उना रोजां च दोबारा बणाई दिगा।” 20 यहूदी अगुवां बोलया, “इस मंदरे जो बणाणे जो छयाली साल लगयो न, कने तू क्या इसयो उना रोजां च बणाई दिगा?” 21 पर यीशु जिस मंदरे दे बारे च बोला था, सै उदा शरीर था। 22 जालू यीशु मरी करी जिंदा होया था, तालू उदे चेलयां जो याद आया था की उनी ऐ बोलया था; कने पबित्र शब्द कने सै बचन जडा यीशुए बोलया था, उस पर भरोसा किता। 23 जालू यीशु यरुशलेम शेर च फसह दे त्योहारे च था, तां मतयां उना चमत्कारां जो जडे सै दसदा था दिखीकरी उस पर भरोसा किता। 24 पर यीशुए भरोसा नी किता की उना उस पर भरोसा किता है, 25 कने उसयो कुसदी भी जरूरत नी थी जडा उसयो लोकां दे बारे च दस्से क्योकि सै जाणदा था की उना दे दिलां च कने उना दे क्या इरादे न?

**3** फरीसियां चे नीकुदेमुस नादे दा इक माणू था, जडा यहूदियां दा धार्मिक अगुवा था, सै इक फरीसी था। 2 उनी राती यीशुए बाल आई करी उसयो बोलया, “गुरू जी, असां जाणदे न, की परमेश्वरे तुहांजो सांझो सिखाणे तांई भेजया है, क्योकि कोई भी इना चमत्कार जो जडे तू दसदा है, अगर परमेश्वर दा साथ ना हो तां नी दसी सकदा है।” 3 यीशुए उसयो जबाब दिता, “मैं तिजो ने सच्च-सच्च बोलदा है, अगर कोई नोए सिरे ला नी जम्मे तां सै परमेश्वरे दा राज्य नी दिखी सकदा है।” 4 नीकुदेमुसे उसला बोलया, “माणू जालू बुडा होई जांदा है तां सै कियां जन्म लेई सकदा है? क्या सै अपणिया माता दे पेटे च दुज्जी बरी जाई करी जन्म लेई सकदा है?” 5 यीशुए जबाब दिता, मैं तिजो ने सच्च-सच्च बोलदा है, जालू दीकर कोई माणू पाणिए कने पबित्र आत्मा ने नी पैदा होए तालू दीकर सै परमेश्वरे दे राज्य च प्रवेश नी करी सकदा है। 6 माणू अपने बचयां जो जन्म दिन्दे न। फिरी भी सिर्फ परमेश्वरे दी आत्मा ही तुसां जो परमेश्वरे दी ओलाद दे स्पे च बदली सकदा है। 7 हेरान मत हो, की मैं तिजो ने बोलया, तिजो दोबारा ला पैदा होणा जरूरी है। 8 हवा जिस पासे चांढही है उस पासे चलदी है, कने तू उदी आबाज सुणदा है, पर ऐ पता नी की सै कुथू ला ओदी है कने कुस पासे चली जादी है? जडा कोई पबित्र आत्मा ने जमया है सै ऐदिया ही है। 9 नीकुदेमुसे उसयो जबाब दिता, “क्या ऐ गल्लां होई सकदियां न?” 10 ऐ सुणीकरी यीशुए उसयो जबाब दिता, तू इसाएलियां दा इक महान गुरू है, तिजो तां असल च इना गल्लां जो समझणा चाईदा है? 11 मैं तिजो ने सच्च-सच्च बोलदा है की सांझो जडा पता है, सै बोल्दे न, पर जिसयो असां दिखदे न उदी गबाई दिन्दे न, कने असां जडा बोल्दे न उस पर तुसां भरोसा नी करदे न। 12 जालू मैं तुसां ने धरतिया पर होणे बालियां गल्लां बोलियां, तां तुसां भरोसा नी किता, अगर मैं तुसां जो दस्से की स्वर्ग च क्या होणा है, तां क्या तुसां भरोसा करगे? 13 कोई स्वर्ग पर नी गया, “पर सिर्फ मैं, माणूए दा पुत्र स्वर्ग ला थल्ले आया है।” 14 कने जियां मुसे सुनसान जगा च पितल दे सप्पे जो उपर चढाया, तियां ही जरूरी है की मैं, माणूए दे पुत्रे जो भी उपर चढाया जाओ। 15 ताकि जडा कोई मिंजो पर भरोसा करे उदे च उसयो हमेशा दी जिन्दगी मिल्ले। (aiōnios g166) 16 “क्योकि परमेश्वरे संसारे दे लोकां ने ऐसा प्यार किता की उनी अपणा इकलोता पुत्र देई ता, ताकि जडा कोई उस पर भरोसा करे, उदा नाश ना होए, पर उसयो हमेशा दी जिन्दगी मिल्ले। (aiōnios g166) 17 क्योकि परमेश्वरे अपने पुत्रे जो संसारे दे लोकां पर सजा देणे तांई नी भेजया है, पर इस तांई भेजया की उदे जरिये संसारे दे लोकां दा उद्धार होए। 18 जडा परमेश्वरे दे पुत्रे पर भरोसा करदे न, उस पर सजा दा हुकम नी होदा, पर जडे परमेश्वरे दे पुत्रे पर भरोसा नी करदे न, सै दोषी न क्योकि उनी परमेश्वरे दे इकलोते पुत्रे दे नाए पर भरोसा नी किता। 19 कने सजा दा हुकम देणे दी बजा ऐ की लो संसारे च आई है, कने लोकां नेहे जो लौइ ला जादा प्यार किता क्योकि उना दे कम्म बुरे थे। 20 क्योकि जडा कोई बुराई करदा है, सै लौइ ने बैर रखदा है, कने लौइ च नी ओंदा है, इयां ना हो कि उदे कम्मा पर दोष लगान। 21

पर जडा सचाइया पर चलदा है सै लौइ च ओंदा है, ताकि उदे कम्म प्राप्त होन जडा परमेश्वरे चांदा की सै करना।” 22 इदे बाद यीशु कने उदे चेले यहूदिया प्रदेश च आये; कने सै ओथु उना सोगी रेईकरी बपतिस्मा देणा लग्गा। 23 कने यहून्ना भी एनान ग्रां च जडा सामरिया इलाके दे शालेम शेर दे नेडे है ओथु बपतिस्मा दिन्दा था। क्योकि ओथु मता पाणी था, कने लोक आई करी बपतिस्मा लेंदे थे। 24 क्योकि यहून्ना तालू दीकर जेला च नी पाया था। 25 ओथु यहून्ना दे चेलयां दा कुसकी यहूदिये सोगी रिबाजा दे हिसावे ने शुद्धी दे बारे च बेहस होई। 26 कने यहून्ना दे चेलयां उस बाल आई करी उसला बोलया, “गुरू जी, जडा माणू यरदन खड्डा दे पारले पासे तेरे सोगी था, जिसदे बारे च तुसां गबाही दिती थी; दिख, सै बपतिस्मा दिन्दा है, कने सब उस बाल ओंदे न।” 27 यहून्ने जबाब दिता, जालू दीकर माणूए जो स्वर्ग ला ना दितया जाए, उसयो तालू दीकर कुछ नी मिल्ली सकदा। 28 तुसां अपु मेरे गबाह न की क्या बोलया था, की मैं मसीह नी है, पर उदे पहले भेजया गिया है। 29 लाडा लाडिये ने बियाह करी लेंदा है, पर लाडे दा मित्र सोगी खड्डाई करी उदी सुणदा है, लाडे दियां गल्लां ने बडा खुश होदा है; तियां ही मेरा दिल खुश होई गिया है। 30 जरूरी है सै होर जादा खास होई जा कने मैं घट खास होई जां। 31 “जडा स्वर्ग ला ओंदा है सै सबना ला बडा है, जडा धरतिया ला ओंदा है सै धरतिया दा है; कने धरती दियां गल्लां करदा है: जडा स्वर्ग ला ओंदा है, सै सबना ला उपर है। 32 जडा कुछ उनी दिखया, कने सुणया है, उदी गबाई दिन्दा है; पर बडे घट लोक उदे संदेशे जो मंदे न। 33 पर जिना लोकां उदा संदेशे मन्नी लिया उनी इसा गल्ला पर प्रमाण देई दिता की परमेश्वर सच्चा है। 34 क्योकि जिसयो परमेश्वरे भेजया है सै परमेश्वरे दे बचना दा प्रचार करदे न क्योकि ऐ सेई है जिसयो परमेश्वरे बिना नापी-तोली करी पबित्र आत्मा दिन्दा है। 35 पिता परमेश्वर पुत्रे ने प्यार करदा है, कने उनी सारियां चिंजा उदे हथां च देई दितियां। 36 जडा परमेश्वरे दे पुत्रे पर भरोसा रखदा है, हमेशा दी जिन्दगी उदी है; पर जडा पुत्रे जो नी मन्दा है, उसयो अनन्त जिन्दगी नी मिलणी, पर परमेश्वरे दी सजा उसयो मिलणी है।” (aiōnios g166)

**4** फिरी जालू यीशुए जो पता लग्गा की फरीसियां सुणया है की यीशु यहून्ना ला जादा चेले बणांदा कने बपतिस्मा दिन्दा है। 2 यीशु नी पर उदे चेले बपतिस्मा दिन्दे थे, 3 तालू सै यहूदिया प्रदेश जो छडी करी फिरी अपने चेलयां सोगी गलील प्रदेशे दे इलाके जो चली गिया, 4 कने उसयो सामरियां प्रदेश ला होईकरी जाणा जरूरी था, क्योकि परमेश्वर भी ऐई चांदा था। 5 तांई तां सै सामरियां प्रदेश दे खूखार शेरें दीकर आया, जडा उसा जमिना दे बखे है जडी याकूबे अपने पुत्र यूसुफे जो दितियो थी। 6 कने याकूबे जडा खु ओथु बणाया था, सै हले दीकर भी ओथु ही था। कने यीशु रस्ते च थकी करी उस खुए पर इयां ही बेई गिया। कने ऐ गल्ल दोपहर दे बकते होई थी। 7 इतणे च इक सामरी जनानी पाणी भरना आई। यीशुए उसा जो बोलया की “मिंजो पीणे तांई पाणी दे।” 8 क्योकि उदे चेले तां शेरें च खाना खरीदणा गियो थे। 9 इना सामरी जनानिया उसला बोलया, तू यहूदी होईकरी सामरी जनानिया ला पाणी कजो मंगा दा है? क्योकि यहूदी सामरियां सोगी कुछ भी रिश्ता नी रखदे। 10 यीशुए जबाब दिता, “तू नी जाणदी है की परमेश्वर तिजो क्या देणा चांदा, कने ऐ भी नी जाणदी की कुण तिजो ला पाणी मंगा दा है। अगर तू जाणदी, तां तू मिंजो ला मंगदी, कने मैं तिजो जिन्दगिया दा पाणी दिन्दा जडा जिन्दगी दिन्दा है।” 11 जनानिया उसला बोलया, प्रभु जी, तैर बाल पाणिए भरने तांई तां कुछ हे भी नी है, कने खु तां बडा डुगा है; तां फिरी सै जिन्दगिया दा पाणी तैर बाल कुथु ला आया? 12 क्या तू साडे पूर्वज याकूबे ला बडा है, जिनी सांझो ऐ खु दिता; कने उनी कने उदे बचयां कने डंगारां समेत इस खुए ला पीता? 13 यीशुए उसा जो जबाब दिता, जडा कोई इस पाणिए जो पिगा उसयो फिरी त्रे नगी पाणी, 14 पर जडा कोई उस पाणिए जो पिगा जडा मैं उसयो देणा, तां उनी फिरी अनन्तकाल दीकर कदी त्रिणा नी होणा। जडा पाणी मैं उसयो दिगा, सै उदे च इक पाणिए दा खु बणी जाणा, जडा उस पाणिए जो दिन्दा रेंदा है कने उसयो हमेशा दी जिन्दगी देणी। (aiōn g165, aiōnios g166) 15 उना जनानिया उसला बोलया, “प्रभु जी, सै पाणी मिंजो दे ताकि मिंजो त्रे ना लगे कने ना पाणी भरणे तांई बार-बार इतणी दुरे जो ओए।” 16 यीशुए उसा जो बोलया, “जा, अपने घरे बाले जो ऐथू सूदी लेई ओ।” 17 जनानिया जबाब दिता, “मेरा

घरे बाले नी है।" यीशुए उसा ने बोलया, "तू ठीक बोलदी है, की मेरा घरेबाला नी है। 18 क्योंकि तू पंज घरे बाले करी बैठेइयो है, कने हणू तू जिस माणुए बाल है सै भी तेरा घरेबाला नी है; ऐ तू सच्च बोलया है।" 19 जाननिया उसला बोलया, "प्रभु जी, मिंजो लगदा है तू परमेश्वरे दा संदेश देणेबाला है। 20 साडे सामरी पूर्वज इसी पाहेडे पर परमेश्वरे दी भक्ति करते थे, कने तुसां यहूदी लोक बोलदे न की सै जगा जिथू अराधना करणी चाईदी सै यस्त्रालेम शेर च है।" 21 यीशुए उसा ने बोलया, "हे जाननिये, मेरिया गल्लां पर भरोसा कर की सै बकत ओणा है, ना तां तुसां इसी पाहेडे पर पिता दी भक्ति करणी है ना तां यस्त्रालेम शेर च। 22 तुसां सामरी लोक जिसयो नी जाणदे न, उदी भक्ति करते न; कने असां यहूदी लोक जिसयो जाणदे न उदी अराधना करते न; क्योंकि उद्धार करणे बाले यहूदियां चे ही ओणा है। 23 पर सै बकत ओणा है, मतलब अजे भी है, जिदे च सच्च भक्त पिता परमेश्वरे दी भक्ति आत्मा कने सचाइया ने करणी है, क्योंकि पिता परमेश्वर अपने तांई पेदे ही अराधना करणे बालयां जो तोपदा है। 24 परमेश्वर आत्मा है, कने जरूरी है की उदी अराधना करणे बाले आत्मा कने सचाइया ने भक्ति करन।" 25 जाननिया उसला बोलया, "मै जाणदी है की मसीह जिसयो ख्रिस्तस बोलदे न, ओणे बाला है; जालू उनी ओणा है, तां उनी सांझो सारियां गल्लां दसी देणियां न।" 26 यीशुए उसा ने बोलया, "मै जडा तिजो ने बोला दा है, सेई है।" 27 इतणे च उदे चले आई गे, कने हेरान होणा लगे की सै जाननिया ने गल्लां करा दा है; पर तमी कुनी नी पुछया, तू क्या चांदा है? "कने कजो इसा ने गल्लां करा दा है?" 28 तालू सै जाननी अपना घडा छडी करी शेहरे जो चली गेई, कने लोकां ने बोलणा लग्गी, 29 "ओआ, इक माणुए जो दिखा, जिनी सब कुछ दसी दिता जडा मै कितया। कुथी ऐई तां मसीह नी है?" 30 तालू सै शेहरे ला निकली करी यीशुए जो दिखणा ओणा लगे। 31 इतणे च उदे चले आई करी उसला बिनती करणा लगे, "गुरू जी, कुछ खाई ले।" 32 पर यीशुए उना ने बोलया, "मेरे बाल खांणे तांई ऐसा खांणा है जिसयो तुसां नी जाणदे न।" 33 तालू चेलयां अपु चे बोलया, "क्या कुनी इदे तांई कुछ खांणे जो लांदया है?" 34 यीशुए उना ने बोलया, मेरा खांणा परमेश्वरे दी इच्छा दा पालन करणा है जिनी मिंजो भेजया है, कने उस कम्म जो पूरा करणा है जडा उनी मिंजो सौपया। 35 क्या तुसां नी बोलदे, बडाई करणे जो अजे भी चार महीने पियो न? दिखा, मै तुसां ने बोलदा है, अपणियां हखी खोला कने ओणे बाले लोकां जो दिखा। सै खतरां च पकियो फसला साई न, कने बडाइ तांई तैयार न। 36 पेहेले ला ही बडणे बाले कम्म करा दे न कने उना जो अपणी मजदूरी मिल्ला दी है। कने बी राणे बाला कने बडणे बाला दोनो मिलिकरी खुशी मानन। (aiōnios g166) 37 क्योंकि इसा गल्ला पर ऐ कहावत ठीक बोदी है: राणे बाला कोई होर है कने बडणे बाला कोई होर है। 38 मै तुहांजो उस खेतेर जो बडणे तांई भेजया जिस च तुसां मेहनत नी कितियो होरनी मेहनत कितियो है, "तुसां उसा फसला जो गठेरणा (जिस तांई उना कम्म कितया है)।" 39 कने उस शेहरे दे मतयां सामरियां उसा जाननिया दे बोलणे ने यीशुए पर भरोसा किता; जिना ऐ बोलया था, की उनी सब कुछ दसी दिता, जडा मै कितया है। 40 जालू से सामरी उदे बाल आये, तां उसला बिनती करणा लगे की साडे ऐथू रे। तां सै ओथू दो रोज रिया। 41 कने उदे संदेश दिया बजा ने मतयां यीशुए पर भरोसा किता। 42 कने उना जाननिया बोलया, हणू असां तेरे बोलणे ने ही भरोसा नी करदे न, क्योंकि असां अपु ही सुणी लिया, कने असां जाणदे न की ऐई सच्ची दा संसारे दा उद्धार करणे बाला है। 43 फिरी सै उना दो रोजां बाद सै ओथू ला निकली करी गलील प्रदेश जो गिया। 44 क्योंकि यीशुए अपु ही बोलया था की परमेश्वरे दा संदेश देणेबाले दी अपने देशे च इज्जत नी हौदी है। 45 जालू सै गलील प्रदेश गिया, तां गलील बासी खुशिया ने उसला मिल्ले; क्योंकि जितणे भी कम्म उनी यस्त्रालेम शेर च त्योहारे बेले कितयो थे, उना सारयां कम्मा जो दिखया था, क्योंकि सै भी त्योहारे जो गियो थे। 46 तालू सै फिरी गलील प्रदेश दे काना शेर च आया, जिथू उनी पांणिए जो दाखरस बनाया था। ओथू राजे दा इक सेवक था जिसदा पुन कफरनहम शेर च बीमार था। 47 सै ऐ सुणीकरी की यीशू यहूदिया प्रदेश ला गलील प्रदेशे च आया है, उदे बाल गिया कने उसला बिनती करणा लग्गा की चली करी मेरे पुत्रे जो ठीक करी दे: क्योंकि सै मरणे बाला था। 48 यीशुए उसयो बोलया, जालू तुसां चमत्कार कने अनोखे कम्म नी दिखी लेंगे तालू दीकर तुसां

मिंजो मसीहा नी मनणा। 49 राजे दे सेवके उसला बोलया, "प्रभु जी, मेरे जागते दी मौत होणे ला पेहेले चला।" 50 यीशुए उसयो बोलया, "आ तेरा जागत जिन्दा है।" उनी माणुए यीशुए दी गल्ल मन्नी कने चली गिया। 51 सै अजे रस्ते च ही चलया था, की उदे सेवक उस बाल आई रे कने बोलणा लगे, "तेरा जागत जिन्दा है।" 52 उनी उना ला पुछया, "की कुस बकते सै खरा होणा लग्गा?" उना उसला बोलया, "कल दोपहर इक बजे उदा भूखार उतरी गिया।" 53 तालू उस जागते दा पिता समझी गिया की ऐ उस बकते ही होया है जिस बकते यीशुए बोलया, तेरा जागत जिन्दा है, "कने उनी कने उदे सारे घरे बालयां यीशुए पर भरोसा किता।" 54 ऐ दुज्जा चमत्कार था जडा यीशुए यहूदिया प्रदेश ला गलील प्रदेश च बापस आई करी किता।

5 इना गल्लां दे बाद यहूदियां दा इक त्योहार होया, कने यीशू यस्त्रालेम शेर जो गिया। 2 यस्त्रालेम च भेडां दे फाटके बखे इक तलाब है जिसयो इब्रानी भाषा च बैतहसदा बोलदे न, कने उदे चारो पासे पंज बराडे न। 3 उना च मते बीमार, अन्ने, लंगडे कने सुकयो अंगा बाले, पांणिए हिलणे दिया आसा च ओथू बेई रेंदे थे। 4 क्योंकि परमेश्वरे दे नियुक्त बकते पर स्वर्गादूत तलाब पर उतरी करी पांणिए जो हिलादें थे: पांणी हिलणे बाद जडा कोई भी पेहेले अंदर जांदा था सै ठीक होई जांदा था चापे उदी कोई भी बिमारी हो। 5 ओथू इक माणू था, सै ठठियां सालां ला बीमारिया च था। 6 यीशुए उसयो पिया दिखीकरी कने जाणी करी की ऐ इसा हालता च बडे रोजां ला है, उसला पुछया, "क्या तू ठीक होणा चांदा है?" 7 उनी बिमारे जबाब दिता, "प्रभु जी, मेरे बाल कोई माणू नी है, की जालू पांणी हिले, तालू मिंजो तलाब दे अंदर जाणे तांई मदद करे, मै तलाब दे अंदर जाणे दी कोशिश करदा है, हमेशा मेरे पुजणे ला पेहेले ही कोई होर मेरला पेहेले तलाब अंदर चली जांदा है।" 8 यीशुए उसला बोलया, "उठ, अपणिया चटाईया जो चुकी करी हंड फिर।" 9 सै माणू झट ठीक होई गिया, कने अपणिया चटाईया जो चुकी करी चलणा फिरणा लग्गी पिया। 10 जिस रोजे ऐ सब होया सै सब्ते दा दिन था। इस तांई यहूदी अगुवे उसला जडा ठीक होया था, बोलणा लगे, "मसा दिया व्यवस्था दे अनुसार सब्ते दे रोजे, तिजो चटाईया जो चुकी करी लेई जाणा ठीक नी है।" 11 उनी उना जो जबाब दिता, "जिनी मिंजो ठीक किता उनी मिंजो बोलया है, अपणिया चटाईया चुकी करी चल फिर।" 12 उना उसला पुछया, "सै कुण माणू है जिनी तिजो ऐ बोलया, चटाई जो चुक कने चल फिर?" 13 पर जडा ठीक होई गिया था, सै नी जाणदा था की सै कुण है; क्योंकि उसा जगा पर भीड होंणे दिया बजा ने यीशू ओथू भिडा ने मिली गिया कने उना जो मिल्ला नी। 14 कुछ बकते बाद सै यीशुए जो मंदरे दे आंणे च मिला, तालू उनी उसला बोलया, "दिख, तू तां ठीक होई गिया है; हणू दोबारा पाप मत करदा, इयां ना हो की इसला भी बडी मुसबत तिजो पर आई जा।" 15 उनी माणुए जाई करी यहूदी अगुवां ने बोली दिता की जिनी मिंजो ठीक कितया है सै यीशू है। 16 इसा बजा ने यहूदी अगुवे यीशुए जो सताणां लगे, क्योंकि सै ऐसे-ऐसे कम्म सब्ते दे रोजे करदा था। 17 इसा गल्लां पर यीशुए उना ने बोलया, मेरा पिता परमेश्वर हले दीकर कम्म करदा है कने मिंजो भी कम्म करणा चाईदा। 18 यीशुए ऐ बोलया इसा बजा ने यहूदी अगुवे उसयो होर भी जादा मारणे दी कोशिश करणा लगे, की सै सिर्फ ऐई नी की सब्ते दे दिने दे रिबाजे जो तोडा दा, पर सै परमेश्वरे जो भी अपना पिता बोली करी, अपने आपे जो परमेश्वर दे बराबर बोला दा था। 19 इसी पर यीशुए उना ने बोलया, मै तुसां ने सच्च-सच्च बोलदा है, मै अपु ला कुछ नी करी सकदा है, सिर्फ सेई जडा सै पिता परमेश्वर जो करदे दिखदा है, क्योंकि जिना-जिना कम्म जो सै करदा है उना जो मै भी तियां ही करदा है। 20 इस तांई पिता परमेश्वर मिंजो ने प्यार करदा है कने जडे-जडे कम्म सै अपु करदा है, सै सारे उसयो दसदा है; कने उनी इना ला भी बडे कम्म उसयो दसणे न, ताकि तुसां हेरान होन। 21 क्योंकि जियां मेरा पिता परमेश्वर मरयां लोकां जो जिन्दा करदा है, तियां ही मै भी जिना जो चांदा है उना जो जिन्दा करदा है। 22 पिता परमेश्वर कुसी दा भी न्याय नी करदा है, पर न्याय करणे दा सारा कम्म मिंजो देई दितया है, 23 इस तांई जियां सारे लोक पिता परमेश्वर दा आदर करदे न तियां ही मेरा भी आदर करन जडा मेरा आदर नी करदा, सै पिता परमेश्वर दा आदर भी नी करदा है जिनी उसयो भेजया है। 24 मै तुसां ने सच्च-सच्च बोलदा है, जडा मेरा बचन सुणीकरी मेरे भेजणे

बाले पर भरोसा करता है, हमेशा दी जिन्दगी उड़ी है, कने उसयो सजा नी मिलणी है पर से तां अनन्त मौता ला बची गिया है कने उनी पेहले ला ही जिन्दगी च प्रवेश करी लिया है। (aiōnios g166) 25 “मैं तुसां ने सच्च-सच्च बोलदा है, से बकत ओणा है, कने हण है, जिदे च मरयां परमेश्वरे दे पुत्र, मेरी अबाज सुणनी, कने जडे सुणगे उना हमेशा ताई जी पोणा है।” 26 क्योकि जियां पिता परमेश्वर अपने अंदर जिन्दगी रखदा है, तियां ही उनी अपने पुत्र, जो भी हक दितया है की से अपने आपे च जिन्दगी रखे; 27 क्योकि मैं माणुं दे पात्र है, इस ताई पिता परमेश्वरे मिजो सारे लोकं जो न्याय करणे दा अधिकार दितया है। 28 इसला हेरान मत होआ, क्योकि से बकत ओणा है, की से सारे लोक जडे मरी गियो न, उना मेरी मतलब की, माणुं दे पुत्रे दी अबाज सुणीकरी जिन्दे होई जाणा है। 29 जिना बाल अच्छी जिन्दगी थी, उना हमेशा दी जिन्दगी ताई जिन्दे होई जाणा है, से जडे बुराई च जिन्दगी बितान्दे न, उना दोषी दा न्याय तियां ही करदा है जियां पिता परमेश्वर मिजो उनी दा न्याय करणे ताई बोलदा है, कने मेरा न्याय सही है; क्योकि मैं अपनी मरजी नी, पर अपने भेजणे बाले दी मर्जी चांदा है। 31 अगर मैं अपु ही अपनी गबाई दें, तां मेरी गबाई सच्ची नी है। 32 इक होर है जडा मेरा पिता परमेश्वर है, से भी मेरे बारे च गबाई दिन्दा है, कने मैं जाणदा है की मेरी जडी से गबाई दिन्दा है, से सच्ची है। 33 तुसां यहून्ना बपतिस्मा देणेबाले बाल संदेश देणेबाले भेजे कने उनी सचाइया दी गबाई दितियो है। 34 पर मैं अपने बारे च माणुंआं दी गबाई नी चांदा है, तमी मैं इसा गबाई दे बारे च दसया है जडी यहून्ना दिती थी ताकि तुहाडा उद्धार होऐ। 35 यहून्ना इक दिख्ये सांई था; कने तुहांजो थोडिया देरा ताई उदिया लौई च, मगन होणा खरा लगगा। 36 पर मेरे बाल यहून्ना ला भी बडी गबाई है: क्योकि जडा कम्म पिता परमेश्वरे मिजो पूरा करणे ताई दितया से मेरे बारे च गबाई दिन्दा है। जडा कम्म मैं करी सकदा है, से गबाई दिन्दा है की मिजो पिता परमेश्वरे भेजया है। 37 कने पिता परमेश्वर जिनी मिजो भेजया है, उना ही मेरी गबाई दितियो है तुसां ना तां उदी कदी अबाज सुणी, कने ना उसयो आमणे सामणे दिखया है। 38 कने उदे संदेशो जो मने च टिकाई करी नी रखदे, क्योकि जिसयो परमेश्वरे भेजया है तुसां उदा भरोसा नी करदे। 39 तुसां पबित्र शास्त्रं च ध्याने ने पढी करी तोपदे न, क्योकि तुसां समझदे न की उना ने हमेशा दी जिन्दगी मिलदी है, कने ऐ सेई बचन है, जडा मेरी गबाई दिन्दा है; (aiōnios g166) 40 पर ऐ सब होणे पर भी अनन्त जिन्दगी पाणे ताई मेरे बाल नी ओणा चांदे न। 41 मैं माणुं ऐ ला आदर दी आस नी रखदा है। 42 क्योकि मैं तुसां जो जाणदा है की तुसां अपने मने च परमेश्वरे ताई प्यार नी रखदे न। 43 मैं अपने पिता परमेश्वर दे अधिकारे ने आया है, कने तुसां मिजो अपनां दे नी अगर कोई होर अपने ही अधिकारे ने ओऐ, तां उसयो तुसां अपनां दे लेंदे न। 44 तुसां मिजो पर भरोसा नी करी सकदे न, क्योकि तुसां इकी दुज्जे ला अपनी आदर मान चांदे न, कने तुसां इकलोते परमेश्वरे ला आदर मान पाणे दी कोशिश नी करदे न। 45 ऐ मत समझा, की मैं पिता परमेश्वरे दे सामणे तुसां पर दोष लगा दा: मूसा, जिस पर तुसां आस रखियो है, उनी तुसां पर दोष लगाने न। 46 क्योकि अगर तुसां मूसा दा भरोसा करदे, तां मेरा भी भरोसा करदे, इस ताई की उनी भी मेरे बारे च पबित्र शास्त्र च लिखया है। 47 क्योकि तुसां उदियां लिखियां गल्लां दा भरोसा नी करदे, तां तुसां पक्का ही मेरियां गल्लां दा भी नी करी सकदे।”

**6** इना गल्लां दे बाद यीशु गलील झिला च मतलब की तिबिरियासे दिया झिला बखे गिया। 2 कने बडी भरी भीड उदे पिच्छे चली पेई क्योकि जडे अनोखे कम्म से बिमारां पर दसदा था से उना जो दिखदे थे। 3 तालू यीशु पहाडे पर चढी करी अपण्यां चेलयां सोगी ओथु बैठा। 4 कने यहूदियां दे फरह दा त्योहारे नेडे ही था। 5 तालू यीशु ऐ नजरा चुकी करी मती भरी भिडा जो अपने बाल ओदे दिखया, कने फिलिप्पुस ने बोलया, “असां इना जो खांणे ताई रोटी कुथु ला खरदी लोणी?” 6 पर यीशु ऐ गल्ल उसयो परखणे ताई बोली; क्योकि से अपु जाणदा था की मैं क्या करणा है। 7 फिलिप्पुसे उसयो जबाब दिता, “इतणी रोटियां दी कीमत दो सो दिना दिया मजदुरिया दे बराबर होणी, से भी उना ताई पूरी नि होणी की उना चे हर इकी जणे जो थोडी-थोडी मिलली जा।” 8 उदे चेलयां च शपौन पतरस दे भाई अन्दियासे उसयो बोलया, 9 “ऐथु इक जागत है जिदे बाल जो दियां

पंज रोटियां न कने दो मछियां न, पर ऐ इतणे लोका ताई काफनी नी है।” 10 यीशु ऐ बोलया, “लोकं जो बढाई दिया।” उसा जगा पर मता था था: तालू से लोक बैठी गे, कने से गिणतिया च लगबग पंज हजार थे। 11 तालू यीशु ऐ रोटियां लियां, कने धन्यवाद करिके जडे बैठयो थे उना जो बंडी दितियां: कने तियां ही मछियां जो भी जितणियां से चांदे थे बंडी दितियां। 12 जालू से खाई करी रजी गे तां उनी अपने चेलयां ने बोलया, “बचयां टुकडयां जो गटेरी लिया, ताकि कुछ बर्बाद ना होऐ।” 13 उना से रोटियां दे टुकडे गटेरे, कने से पंज रोटियां दे टुकडे जडे खांणे बालयां ला बची गियो थे उना ने बाहरा टोकरियां भरियां। 14 तालू जडा अनोखा कम्म उनी करी के दसया उसयो दिखीकरी लोक बोलणा लग्गे; की से परमेश्वरे दा संदेश देणेबाला है जडा संसारे च ओणे बाला था, से पका ऐई है। 15 यीशु ऐ जाणी करी की लोक मिजो राजा बणाणे ताई आई करी पकडना चांदे न, फिरी पहाडे पर किला ही चली गिया। 16 फिरी जालू संज होई, तां उदे चले झिला कंडे पर अये, 17 कने किस्तिया पर चढी करी झिला पर कफननहम शेहर जो जाणा लग्गे: उस बेले नेहरा होई गिया था, कने यीशु हले दीकर उना बाल नी पुजया था। 18 कने तुसां देना बजा ने झिला च लेहरां उठणा लगियां। 19 जालू से चलदे-चलदे लगबग चार मील निकली गे, तां उना यीशु ऐ जो झिला पर चलदे कने किस्तिया बखे ओदे दिखया, कने चले डरी गे। 20 पर यीशु ऐ उना ने बोलया, “मैं है; डरा मत।” 21 से उसयो किस्तिया पर चढाणे ताई तैयार होऐ कने झट से किस्ति उसा जगा जाई पुज्जी जिसा जगा से चलयो थे। 22 दुज्जे रोजे उना भिडा, जडी झिला पर खडोटियो थी, ऐ दिखया की ऐथु इकी जो छडी करी होर कोई लोकी किस्ति नी थी, कने यीशु अपण्यां चेलयां सोगी इसा किस्तिया पर नी चढया था, बस उदे चले ही गियो थे। 23 होर लोकी किस्तियां तिबिरियास शेहेर ला उसा जगा पर आईयां, जिथु उना प्रभु दा धन्यवाद करणे बाद रोटी खादी थी। 24 जालू भिडा दिखया, की ऐथु ना यीशु है, ना उदे चले, तां से भी लोकियां-लोकियां किस्तिया पर चढी करी यीशु ऐ जो तोपदे कफननहम शेहर च जाई पुज्जे। 25 कने झिला दे पार उसला मिली करी उसयो बोलया, “गुरु जी, तू ऐथु कालू आया?” 26 यीशु ऐ उना जो जबाब दिता, “मैं तुसां ने सच्च-सच्च बोलदा है, तुसां मिजो इस ताई नी तोपा दे की तुसां अनोखे कम्म दिखयो, पर इस ताई की तुसां रोटियां खाई करी रजी गे। 27 खत्म होणे बाले खांणे पिच्छे मेहनत मत करा, पर उस खांणे ताई करा जडा हमेशा दिया जिन्दगिया दीकर रेंदा है, जडा मैं माणुं दे पुत्रे तुहांजो ऐ खाणा देणा है, क्योकि पिता परमेश्वरे मिजो ऐसा करणे दा हक दितया है।” (aiōnios g166) 28 उना यीशु ऐ ला पुछया, “परमेश्वरे दा कम्म करणे ताई असां क्या करन?” 29 यीशु ऐ उना जो जबाब दिता, “परमेश्वर चांदा है की तुसां उस पर भरोसा करन जिसयो उनी भेजया है।” 30 तालू उना उसला पुछया, “फिरी तू कुण दिया चमत्कार दसदा है, कि असां उसयो दिखीकरी तिजो पर भरोसा करन? तू कुण दिया कम्म दसदा है? 31 साडयां पूर्वजां सुनसान जगा च मन्ना खादा; जियां पबित्र शास्त्र च लिखया है, मूसा उना जो खांणे ताई स्वर्ग ला रोटी दिती।” 32 यीशु ऐ उना बोलया, “मैं तुसां ने सच्च-सच्च बोलदा है तुहांजो से रोटी स्वर्ग ला मूसा नी दितियो, पर मेरे पिता परमेश्वर तुहांजो स्वर्ग ला सच्ची रोटी दिन्दा है। 33 क्योकि परमेश्वरे दी रोटी सेई है, जडी स्वर्ग ला उतरी करी संसारे दे लोकं जो जिन्दगी दिन्दी है।” 34 तालू उना उसला बोलया, “प्रभु जी, ऐ रोटी सांझो रोज ही दे कर।” 35 यीशु ऐ उना ने बोलया, “रोटी जडी हमेशा दी जिन्दगी दिन्दी है से रोटी में है: जडा मेरे बाल ओगा उनी कदी भूखे नी होणा कने जडा मिजो पर भरोसा करणा, से कदी तरिणा नी होणा। 36 पर मैं तुसां ने पेहले ही बोलया था, की तुसां मिजो दिखी भी लिया है तमी भरोसा नी करदे। 37 जडा कुछ पिता परमेश्वरे मिजो दिन्दा है, से सब मेरे बाल ओणा है, कने जडा कोई मेरे बाल ओगा उसयो मैं कदी नी कडगा। 38 क्योकि मैं अपनी इच्छा नी, पर अपने भेजणे बाले दी इच्छा पुरी करणे ताई स्वर्ग ला उतरया है। 39 कने मेरे भेजणे बाले दी इच्छा ऐ है की जडा कुछ उनी मिजो दितया है, उदे चे मैं कुछ नी गबां पर उसयो आखरी रोजे इसयो फिरी ला जिन्दा करे। 40 क्योकि मेरे पिता परमेश्वरे दी इच्छा ऐ है, की जडा कोई मिजो दिखदा है, कने मिजो पर भरोसा करे, उसयो हमेशा दी जिन्दगी मिल्ले; कने मैं उसयो आखरी रोजे फिरी जिन्दा करी दिंगा।” (aiōnios g166) 41 तालू यहूदी अगुवे उस पर बुडबडणा लग्गे, इस ताई की उनी



बोल्या था, “जड्डी रोटी स्वर्ग ला उतरियो है से मैं है।” 42 कने उना बोल्या, “क्या ऐ यूसुफे दा पुत्र यीशु नी है, जिसदे माता-पिता जो असां जाणदे न? तां से कजो बोलादा न की मैं स्वर्ग ला उतरया है?” 43 यीशुऐ उना जो जबाब दिता, “अपु चे मत बुडबुडा। 44 कोई मेरे बाल नी आई सकदा है, जालू दीकर पिता परमेस्वर, जिनी मिजो भेजया है, उसयो अपणे बाल खिची नी ले; कने मैं उसयो आखरी रोजे फिरी जिन्दा करी देणा है। 45 परमेस्वरे दा संदेश देणेबालयां लेखां च ऐ लिखया है, से सारे परमेस्वरे दिया तरफा ला सिखाए होणे न। जिनी कुनी पिता परमेस्वर ला सिखया कने सुणया है, से मेरे बाल ओदा है। 46 कुनी भी पिता परमेस्वर जो नी दिखया। मैं किल्ला ही है, जडा परमेस्वर दिया तरफा ला आया है, जिनी उसयो दिखया है। 47 मैं तुसां ने सचच-सचच बोलादा है, की जडा कोई मिजो पर भरोसा करदा है, हमेशा दी जिन्दगी उदी है। (aiōnios g166) 48 रोटी जडी जिन्दगी दिन्दी है से मैं है। 49 तुहाडे पूर्वजां सुसनन जगा च मन्ना खादा कने मरी गो। 50 ऐ जिन्दगी दी रोटी है जडी स्वर्ग ला उतरदी है ताकि माणु इसयो खा कने कदी मरे ना। 51 जिन्दगी रोटी जडी स्वर्ग ला उतरती से मैं है। अगर कोई इसा रोटीया चे खा, तां हमेशा जिन्दा रेणा, कने जड्डी रोटी मैं संसारे दिया जिन्दगिया तां दिगा, से मेरा मास है।” (aiōn g165) 52 इस पर यहदी अगुवे ऐ बोली करी अपु चे लडना लगे, “ऐ माणु सांझो कियां अपना मास खाणे जो देई सकदा है?” 53 यीशुऐ उना ने बोल्या, “मैं तुसां ने सचच-सचच बोलादा है जालू दीकर मेरा, माणुऐ दे पुत्रे दा मास नी खागे, कने उदा खून नी पीगे, तुसां च जिन्दगी नी है। 54 जडा मेरा मास खांदा है, कने मेरा खून पिंदा है, हमेशा दी जिन्दगी उदी ही है, कने न्याये दे रोजे उसयो फिरी जिन्दा करणा। (aiōnios g166) 55 क्योंकि मेरा शरीर सच्ची खाणे दी चीज है कने मेरा खून भी सच्ची पिणे दी चीज है। 56 जडा मेरा मास खांदा है कने मेरा खून पिंदा है से मिजो च टिकी रंदा है, कने मैं उदे च रंदा है। 57 मेरा पिता परमेस्वर जिनी मिजो भेजया है, से जिन्दगी दिन्दा है। जियां उनी मिजो जिन्दगी दितियो, तियां ही मैं भी उस माणुऐ जो जिन्दगी देणी जडा मेरे शरीर जो खांदा है।” 58 ऐ से रोटी है, जडी स्वर्ग ला उतरती होई है; पर तुहाडे पूर्वजां मन्ना खादा, कने मरी गो: जडा कोई ऐ रोटी खांगा, उनी हमेशा जिंदा रेणा। (aiōn g165) 59 ऐ गल्लां उनी कफरनहम शेहरे दे इक यहदी जंज घर च उपदेश दिन्दे बेले बोलियां। 60 तां दी यीशुऐ दे चेलयां चे मतयां ऐ सुणीकरी बोल्या, ऐ समझणा बडा मुशकिल है; की कुण इसयो मन्नी सकदा है? 61 यीशुऐ अपणे मने च ऐ जाणी करी की मेरे चेले अपु चे इसा गल्ला दे बारे च बुडबुडा दे न, उना ला पुठ्या, “क्या ऐ गल्ल तुहांजो मिजो पर भरोसा करणे ला रोकदी है? 62 कने अगर तुसां मिजो माणुऐ दे पुत्रे जो स्वर्ग जांदे दिखगे, जिथुं से पहले था, तां क्या हांंगा? 63 परमेस्वरे दी आत्मा तां जिन्दगी देणेबाली है, शरीर ने कोई फायदा नी है: जडियां गल्लां मैं तुसां ने बोलियां से पबित्र आत्मा ने बोलियां न, कने ऐ गल्लां माणुआं जो जिन्दगी दीदियां न। 64 पर तुसां चे कितणे ऐसे न जडे भरोसा नी करदे न।” क्योंकि यीशु तां पहले ही जाणदा था की जडे भरोसा नी करदे न, से कुण न; कने कुनी उसयो पकडवाणा है। 65 कने यीशुऐ बोल्या, इसी तां मैं तुसां ने बोल्या था की जालू दीकर पिता परमेस्वर दिया तरफा ला ऐ बरदान ना होऐ, तालू दीकर से मेरे बाल नी आई सकदा है। 66 इसी पर उदे चेलयां चे मते बापस फिरी गे कने उदे बाद कदी उस सोगी नी चले। 67 तालू यीशुऐ उना बाहरां चेलयां ने बोल्या, “क्या तुसां भी चली जाणा चांदे न?” 68 शमौन पतरसे उसयो जबाब दिता, प्रभु जी, असां कुसदे बाल जाणा? हमेशा दिया जिन्दगिया दिया गल्लां तां तेरे बाल ही न। (aiōnios g166) 69 कने असां भरोसा कितया है, कने जाणी गियो न, की परमेस्वरे दा पबित्र जन कने मसीहा तू ही है जिसयो परमेस्वरे भेजया है। 70 यीशुऐ उसयो जबाब दिता, “क्या मैं तुसां बाहरां चेलयां जो नी चुणयां है? तमी तुसां च इक माणु बुरा है।” 71 ऐ उनी शमौन इस्करियोती दे पुत्र यहदा दे बारे च बोल्या, क्योंकि ऐं जडा उना बाहरां च था, जिनी उसयो पकडवाणा था।

7 इना गल्लां बाद यीशु गलील प्रदेश च गुमदा रिया, क्योंकि यहदी अगुवे उसयो मारणे दी कोशिश करा दे थे, इस तां मैं यहदिया प्रदेश च गुमणा नी चांदा था। 2 कने यहदी लोकां दा इक त्योहारे ओणे बाला था जिसयो झोपडियां दा त्योहार बोलेदे थे। 3 इस तां मैं यीशुऐ दे भाइयां उसयो बोल्या, “ऐथे ला यहदिया

प्रदेश जो चली जा, की जडे कम्म तू करदा है, उना जो तेरे चेले भी दिखन। 4 क्योंकि कोई भी जडा प्रसिद्ध होणा चांदा है से लुकी करी कम्म नी करदा, अगर तू ऐ कम्म करदा है, तां अपणे आपे जो संसारे च सबना दे सामणे कर।” 5 क्योंकि यीशुऐ दे भाई भी उस पर भरोसा नी करदे थे। 6 तालू यीशुऐ उना ने बोल्या, “मेरा बकत हले नी आया है; पर तुहाडे तां कोई भी बकत सही है। 7 संसारे दे लोक तुसां ने बैर नी करी सकदे न, पर से मिजो ने बैर करदे न, क्योंकि मैं उदे खिलाफ ऐ गबाई दिन्दा है, की उना दे कम्म बुरे न। 8 तुसां त्योहारे जो जा; मैं हले इसी त्योहारे जो नी जाणा, क्योंकि हले दीकर मेरा बकत पूरा नी होया है।” 9 से उना ने ऐ गल्लां बोली करी गलील प्रदेश च ही रिया। 10 पर जालू उदे भाई त्योहारे जो चली गे, तां से बादे च लुकी करी ओथु गिया। 11 यहदी लोक त्योहारे च ऐ बोली करी यीशुऐ जो तोपणा लगे की से कथु है? 12 कने लोकां च उदे बारे च लुकी-लुकी करी मतियां गल्लां बोलियां: कुछ बोलेदे थे की, “सै भला माणु है।” कने कितणे ही बोलेदे थे, की नी से लोकां जो भटकांदा है। 13 यहदी अगुवे दे डरे दिया बजा ने कोई भी माणु उदे बारे च खुली करी नी बोलादा था। 14 कने जालू त्योहारे दा अधा रोज होई गिया; तां यीशु उदे च जाई करी उपदेश देणा लग्गा। 15 तालू यहदी लोक हेरान होईकरी बोलाणा लगे, की ऐ माणु बिना पबित्र शाश्ट्र पढयो ज्ञानी कियां बणी गिया? 16 यीशुऐ उना जो जबाब दिता, “मेरा उपदेश मेरा अपना नी है, पर परमेस्वरे दिया तरफा ला है जीनी मिजो भेजया है। 17 अगर कोई उदिया इच्छा पर चलणा चा, तां उनी जाणी लेणा की मेरी शिक्षा परमेस्वरे दिया तरफा ला ओदी है, पर उपदेशे दे बारे च जाणी लेणा की से परमेस्वरे दिया तरफा ला है। 18 जडा अपणि्या तरफा ला कुछ बोलादा है, से अपणी ही इज्जत मान चांदा है; पर जडा अपणे भेजणे बाले दा इज्जत मान चांदा है से ही सच्चा है, कने उदे च धोखा नी है। 19 क्या मूसा परमेस्वरे दा संदेश देणेबाले तुहांजो व्यवस्था नी दितियो है? तमी तुसां चे कोई भी व्यवस्था पर नी चलदा है। तुसां कजो मिजो मारी देणा चांदे न?” 20 लोकां जबाब दिता; “तियो च बुरी आत्मा है! कुण तियो मारणा चांदा है?” 21 यीशुऐ उना जो जबाब दिता, “मैं इक कम्म सब्ते बाले दिने किता, कने तुसां सारे हेरान होई गे। 22 इसा बजा ने मूसा तुहांजो खतने दा हुकम दितया है, ऐ नी की से मूसा दिया तरफा ला है पर ऐ पूर्वजां ला चली आईयो है, कने सब्ते दे रोजे तुसां माणुऐ दा खतना करदे न। 23 जालू सब्ते दे रोजे माणुऐ दा खतना करदे न ताकि मूसा दिया व्यवस्था दा हुकम न टली जा, तां तुसां मिजो पर कजो इस तां गुस्सा करदे न, की मैं सब्ते दे रोजे इकी माणुऐ जो पुरी तरा ठीक किता। 24 तुसां बाहरी रूप दिखीकरी न्याय मत करा, पर सच्चाईया ने न्याय करा।” 25 तालू कितणे यरुशलेम शेहरे दे रेणेबाले बोलाणा लगे, “क्या ऐ से ही नी है, जिसयो साडे अगुवे मारणे दी कोशिश करा दे न? 26 पर दिखा, से तां शेराम गल्लां करदा है कने कोई उसयो कोई कुछ नी बोलादा है; क्या होई सकदा की यहदी अगुवां सच्ची जाणी लिया है की, ऐं मसीह है? 27 इसयो तां असां जाणदे न, की ऐ कथु दा है; पर मसीह जालू ओणा है, तां कुसयो नी पता होणा है से कथु दा है।” 28 तालू यीशुऐ मंदरे च उपदेश दिन्दे होऐ जोरे ने बोल्या, “तुसां मिजो जाणदे न, कने ऐ भी जाणदे न की मैं कथु दा है: मैं तां अपु ला नी आया है पर मिजो भेजणे बाला भरोसेमंद है, उसयो तुसां नी जाणदे न। 29 पर मैं उसयो जाणदा है; क्योंकि मैं उदिया तरफा ला है कने मिजो उनी ही भेजया है।” 30 इसा गल्ला पर अगुवां उसयो पकडना चाया पर तमी कुनी भी उसयो गिरफ्तार नी किता, क्योंकि उदा मरणे दा सही बकत हले दीकर नी आया था। 31 कने भिडा चे मतयां यीशुऐ पर भरोसा किता, कने बोलाणा लगे, की जालू मसीह ओणा है, तां उनी क्या इदे भी जादा अनेखे कम्म दसणे जडे इनी दसे न? 32 फरीसियां लोकां जो उदे बारे च ऐ गल्लां बल्ले-बल्ले करदे सुणया; कने बडे याजकां कने फरीसियां उसयो पकडने तां मंदरे दे रखबाले भेजे। 33 इस पर यीशुऐ बोल्या, “मैं थोडिया देरा दीकर तुहाडे सोगी है; फिरी मैं अपणे भेजणे बाले दे बाल बापस चली जाणा है। 34 तुसां मिजो तोपणा है, पर मैं मिलणा नी है; कने जिथुं मैं है, ओथु तुसां आई नी सकदे।” 35 यहदी अगुवां अपु चे बोल्या, इनी कथु जाणा की सांझो इनी मिलणा ही नी है। क्या से उना बाल जांगा जडे यूनान शेहरे च लग-लग जगा च रंदे न, कने यूनान दे लोकां जो भी उपदेश दिंगा? 36 से क्या बोलाणा चांदा है, जडी उनी बोली, की तुसां मिजो तोपणा है, पर मैं नी मिलणा है: कने जिथुं मैं है, ओथु तुसां नी आई

सकते? 37 फिर त्योंहारे दे आखरी रोजे, जडा खास दिन है, यीशु खडोता कने जारे ने बोलया, “अगर कोई त्रिणा है तां मेरे बाल ओपे कने पाणी पिरे? 38 जडा मिंजो पर भरोसा कराग, जियां पबित्र शाब्दां च लिख्या है, उदे मने चे पाणिए दियां खडूं जडियां जिन्दगी दिन्दियां सै चली पोणियां ना।” 39 जालू यीशुए ऐ गल्ल बोलती, तां सै पबित्र आत्मा दे बारे च बोला दा था, सै उना सारायां जो मिलदा है जडे उस पर भरोसा करदे थे, क्योंकि पबित्र आत्मा हल्ले दीकर नी उतरया था। क्योंकि परमेस्वरे हले दीकर यीशु दी महिमा जो प्रगत नी कितया था। 40 तालू भिडा चे केई लोकां ऐ सुणीकरी बोलया, “सच्च्वी ऐई है सै परमेस्वरे दा संदेश देणेबाला है, जिसदी असां उम्मीद रखियो है।” 41 लोकां बोलया, ऐ मसीह है, पर कुनी बोलया, “कजो? क्या मसीह गलील प्रदेश ला ओणा है? 42 पर पबित्र शाब्दां च लिख्या है, की मसीह दाऊदे दे बंशे ला कने बैतलहम शेहरे ला ओणा है, जिथू दाऊद रंदा था?” 43 इयां यीशुए दिया बजा ने लोकां च फूट पेई गईं। 44 उना चे कितणे ही उसयो पकड़ाणा चांदे थे, पर कोई भी उसयो गिरफ्तार नी करी सकया। 45 तालू सपाईं षडू याजकां कने फरीसियां बाल बापस आणे, कने उना सिपाईयां ला पुछया, “तुसां उसयो कनी लंदा?” 46 सिपाईयां जबाब दिता, की कुनी माणुए कदी भी ऐदिया गल्लां नी बोलियां। 47 फरीसियां उना जो जबाब दिता, “क्या तुसां भी भटकी गियो न? 48 क्या सरदारां या फरीसियां चे कुनी भी उस पर भरोसा किता है? 49 पर ऐ लोक जडे मूसा दी व्यवस्था जो नी जाणदे, उना जो परमेस्वरे श्राप दितया है।” 50 निकुदेमुसे, (जडा राती यीशुए बाल आया था कने उना चे इक था), उना ने बोलया, 51 “क्या साडी व्यवस्था कुसी माणुए जो जालू दीकर पेहले उदे बारे च सुणीकरी समझी ना ले की सै क्या करदा है, उसयो सजा दिन्दी है?” 52 उना उसयो जबाब दिता, “क्या तुमी गलील प्रदेशे दा है? पबित्र शाब्द च तोप कने तां तिजो पता चलणा, की गलील दे इलाके ला कोई परमेस्वरे दा संदेश देणेबाले प्रगत नी होंणा है।” 53 तालू सारे अपने-अपने घरे जो चली गे।

**8** पर यीशु अपने चेलयां सोगी जैतून ख्वां दे पाहडे पर गिया। 2 यीशु अगली ब्याग तडके मंदरे दे अंगणे च बापस आया, कने मते सारे लोक उदे बाल आये; कने सै बेठी करी उना जो उपदेश देणा लग्गा। 3 जालू सै बोला दा ही था, तां धार्मिक व्यवस्था जो सिखाणे बाले कने फरीसी इक जनानिया जो लेई आये जडी व्यभिचार च पकड़ियो थी, कने उसा जो सामणे खरेडी करी यीशुए बोलया, 4 “गुरू जी, ऐ जनानी व्यभिचार करदे पकड़ियो है। 5 व्यवस्था च मूसा सांझो हुकम दितया है की ऐसे माणुए जो पथर मारी करी मारी दिया: तां तू क्या बोलदा है की सांझो क्या करणा चाईदा?” 6 उना यीशुए जो परखणे तां ऐ गल्ल बोलती थी ताकि उना जो यीशुए पर दोष लाणे तांई कोई गल्ल मिल्ले, पर यीशु झुकी करी उंगलियां ने जमिना पर लिखणा लग्गा। 7 जालू सै उसला पुछदे रे, तां उनी सिधे होईकरी उना ने बोलया, “तुसां चे जिनी भी कदी पाप नी कितया है, सै ही पेहले इसा जो पथर मारे।” 8 कने फिर झुकी करी उंगलियां ने जमिना पर लिखणा लग्गा। 9 पर ऐ सुणीकरी बडयां ला लेईकरी छोटयां दीकर सारे इक-इक करी के निकलीं गे क्योंकि सै जाणदे थे की सै पापी न, कने सिर्फ यीशु कने सै जनानी ओथु रेई गईं। 10 यीशुए सिधे होईकरी उसा ने बोलया, “हे जनानी, सै कुथु गे? क्या कुनी तिजो सजा देणे दा हुकम नी दिता?” 11 उना बोलया, “प्रभू जी, कुनी भी नी।” यीशुए बोलया, “मैं भी तिजो सजा देणे दा हुकम नी दिन्दा; हण बापस घरे चली जा, कने हण दोबारा कदी जिंदगी च पाप मत करदी।” 12 तां यीशुए लोकां ने फिर बोलया, “संसारे दी लो मै है; जडा मेरियां गल्लां पर चलणा, उनी नेहरे च नी चरणा है, कने उसयो सै लो मिलणी जडी हमेशा दी जिन्दगी दिन्दी है।” 13 फरीसियां उसला बोलया; “अपणी गबाई अपु ही दिन्दा है, तेरी गबाई सच्च्वी नी है।” 14 यीशुए उना जो जबाब दिता, “अगर मैं अपणी गबाई अपु दिन्दा है, तमी मेरी गबाई ठीक है, क्योंकि मैं जाणदा है, की मैं कुथु ला आया है कने कुथयो जाणा है? पर तुसां नी जाणदे की मैं कुथु ला ओंदा है या कुथयो जाणा है। 15 तुसां लोक इन्सानो सोच ने बाकी लोकां दा न्याय करदे न; मैं कुसदा भी न्याय नी करदा है। 16 कने अगर मैं न्याय करे भी तां मेरा न्याय सच्च्व है; क्योंकि मैं किल्ला नी है, पर मैं पिता परमेस्वरे सोगी है, जिनी मिंजो भेजया है। 17 कने मूसा दिया व्यवस्था च लिख्या भी है; दो जाणया दी गबाई मिली करी ठीक होदी है। 18 इक तां मैं अपु अपणी गबाई दिन्दा है, कने दूजा मेरा पिता

परमेस्वर मेरी गबाई दिन्दा है जिनी मिंजो भेजया है।” 19 उना यीशुए ला पुछया, तेरा पिता कुथु है? यीशुए जबाब दिता, “ना तुसां मिंजो जाणदे न, ना तुसां मेरे पिता परमेस्वर जो, अगर मिंजो जाणदे होदे तां मेरे पिता परमेस्वर जो भी जाणदे।” 20 ऐ गल्लां उनी मंदरे दे अंगणे च उपदेश दिन्दे भंडार घरे च बोलियां, कने कुनी भी उसयो नी पकड़या; क्योंकि उदे मरणे दा बकत हले दीकर नी आया था। 21 यीशुए फिर उना ने बोलया, “मैं चली जाणा है, कने तुसां मिंजो तोपणा है कने तुसां अपने पाप माफ होयो बिना ही मरी जाणा। जिथू मै जांदा है, ओथु तुसां नी आई सकदे ना।” 22 इस पर यहदी अगुवां बोलया, क्या इनी अपने आपे जो मारी लेणा है, की ऐ बोला दा है, “जिथू मै जांदा है ओथु तुसां नी आई सकदे न?” 23 यीशुए उना ने बोलया, “तुसां इस संसारे च पैदा होयो न, पर मैं स्वर्ग ला आया है, तुसां इस संसारे द न, मैं संसारे दा नी है। 24 इस ताई मै तुसां ने बोलया, कि तुसां अपने पापां माफ होयो बिना ही मरी जाणा है, अगर तुसां भरोसा नी करदे की मैं सै ही है जडा ओणे बाला है, तां तुसां मरी जाणा, कने तुहाडे पाप माफ नी किते जाणे ना।” 25 यहदी अगुवां उसला पुछया, “तू कुण है?” यीशुए उना ने बोलया, जालू ला मैं उपदेश देणा शुरू कितया है तालू ला मै दसदा आया है की मैं सेई है। 26 मिंजो तुहाडे न्याय दे बारे च तुसां जो जता कुछ बोलणा है, पर मिंजो भेजणे बाला सच्च्व है। कने जडा मै उसला सुणदा है, सै ही संसारे दे लोकां जो बोलदा है। 27 सै हले दीकर ऐ नी समझी सके थे की सांझो ने पिता परमेस्वर दे बारे च बोला दा है। 28 तालू यीशुए बोलया, “जालू तुसां मिंजो, माणुए दे पुत्रे जो उप चढांगे, जालू ला मै उपदेश देणा शुरू कितया है तालू ला मै दसदा आया है की मैं सेई है, कने अपने आपे ला कुछ नी करदा है, पर जियां मेरे पिता परमेस्वरे मिंजो सिख्या है, तियां ही ऐ गल्लां बोलदा है। 29 कने मिंजो भेजणे बाला मेरे सोगी है, उनी मिंजो किल्ला नी छडया; क्योंकि मैं हमेशा ला ही कम्म करदा है, जिस ने सै खुश होंदा है।” 30 मतयां लोकां जिना यीशु जो ऐ गल्लां बोलदे सुणया, उस पर भरोसा किता। 31 तालू यीशुए उना यहदी लोकां ने जिना उस पर भरोसा कितया था, बोलया, “अगर तुसां मेरी गल्लां च बर्णी रेणे, तां सच्च्वी मेरे चले ना। 32 तुसां सच्च्व जो जाणणा, कने सच्च्व ने तुहांजो अजाद करणा।” 33 उना उसयो जबाब दिता, “असां तां अब्राहम दे बंशज न, कने कदी कुसदे गुलाम नी रे; फिरी तू कजो बोला दा, की तुसां अजाद होई जाणा?” 34 यीशुए उना जो जबाब दिता, “मैं तुसां ने सच्च्व-सच्च्व बोलदा है की जडा कोई पाप करा दा है सै पापे दा गुलाम है। 35 कने सेवक हमेशा घरे च नी रंदा है; पर पुत्र हमेशा घरे च रंदा है। (aiōn g165) 36 इस ताई अगर पुत्र तुहांजो अजाद करणा तां, तुसां सच्च्वी दे अजाद होणा है। 37 मै जाणदा है की तुसां अब्राहम दे बंशज दे न; तमी मेरे उपदेशां दा पालन नी करणा, तांई तां तुसां मिंजो मारी देणा चांदे ना। 38 मै उना चिंजा जो दसदा दा है जिना जो मै दिख्या है जालू मै पिता परमेस्वरे सोगी था, कने तुसां सै ही करदे रंदे न जडा तुसां अपने पिता ला सुणया है।” 39 उना उसयो जबाब दिता, “साडा पूर्वज तां अब्राहम है।” यीशुए उना ने बोलया, अगर तुसां अब्राहम दे बंशज होंदे, तां जडा अब्राहम करदा था सै कम्म तुसां भी करदे। 40 अब्राहमे जडा किता, सै करणे दिया बजाए तुसां मिंजो माणे दी कोशिश करा दे न, जिनी तुहांजो सच्च्व बचन सुणया जडा परमेस्वरे ला सुणया ऐसा तां अब्राहमे नी कितया था। 41 तुसां अपने पिता सांई कम्म करदे न, उना उसयो बोलया, “असां व्यभिचारे ने नी जमयो न, साडा सिर्फ इक ही पिता है सै ही परमेस्वर है।” 42 यीशुए उना ने बोलया, “अगर परमेस्वर तुहाडा पिता होंदा, तां तुसां मिंजो ने प्यार रखदे; क्योंकि मैं परमेस्वरे दिया तरफा ला आया है; मैं अपणिया इच्छा ने नी आया है, उनी ही मिंजो भेजया है। 43 जडा मै कुछ बोलदा है सै तुसां कजो नी समझदे न? इस तांई तुसां मेरे संदेश जो मनणे तांई मना करदे ना। 44 तुसां अपने पिता शैताने ला न, कने अपने पिता दियां जरूरां जो पूरा करणा चांदे ना। सै तां शुरू ला ही हत्यारा है, कने सै कदी भी सच्च्व नी था, क्योंकि सच्च्व उदे अंदर है ही नी: जालू सै जूठ बोलदा है, तां सै अपने सभावो ने जूठ बोलदा है; क्योंकि सै जूठा है, बल्कि जूठ दा पिता है। 45 पर मै सच्च्व बोलदा है, इस तांई तुसां मेरा भरोसा नी करदे? 46 तुसां चे कुण मिंजो पापी साबित करी सकदा है? अगर मैं सच्च्व है, तां तुसां मिंजो पर भरोसा कनी करदे? 47 जडा कोई भी परमेस्वरे ने रिशता रखदा है, सै परमेस्वरे दियां गल्लां सुणदा है; कने तुसां इस तांई नी सुणदे क्योंकि तुहाडा परमेस्वरे सोगी कोई

रिश्ता नी है।” 48 ऐ सुणीकरी यहूदी अगुवां उसयो बोलया, “क्या असां ठीक नी बोलदे न, की तू सामरी है, कने तेरे अंदर बुरी आत्मा है?” 49 यीशुऐ जबाब दिता, “मिंजो च बुरी आत्मा नी है; पर मैं अपने पिता परमेश्वर दा आदर करता है, कने तुसां मेरा निरादर करते न। 50 मैं अपना आदर मान नी चांदा है, पर इक है जडा चांदा है मिंजो आदर मान मिल्ले, कने से सेई है जडा न्याय भी करता है। 51 मैं तुसां ने सच्च-सच्च बोलदा है, अगर कोई माणू मेरियां शिक्षा पर चलगा, तां उनी कदी नी मरणा है।” (aiōn g165) 52 यहूदी अगुवां उसयो बोलया, “हुण सांझो पता लागी गिया की तिजो अंदर बुरी आत्मा है; अब्राहम मरी गिया है, कने परमेश्वर दा संदेश देणेबाले भी मरी गियो न कने तू बोलदा है, अगर कोई मेरे संदेश जो मनगा तां उनी अनन्तकाल दीकर मरणा नी है।” (aiōn g165) 53 साडा पूर्वज अब्राहम तां मरी गिया है, क्या तू उसला भी बडा है? कने परमेश्वरे दा संदेश देणेबाले भी मरी गियो न, तू अपने आपे जो क्या समझदा है। 54 यीशुऐ जबाब दिता, “अगर मैं अपु अपनी तारीफ करूं, तां मेरी तारीफ कुछ नी, पर जडा मिंजो आदर मान दिन्दा है, से मेरा पिता परमेश्वर है, कने जिसयो तुसां बोलदे न, की से तुहाडा परमेश्वर है। 55 कने तुसां तां उसयो नी जाणया, पर मैं उसयो जाणदा है, कने अगर मैं बोले की मैं उसयो नी जाणदा है, तां मैं तुहाडे सांई जडा बणना: पर मैं उसयो जाणदा कने उदे हुकम मनदा है। 56 तुहाडा पूर्वज अब्राहम मेरा दिन दिखणे दिया आसा च बडा मगन था; कने उनी दिखया कने खुश होया।” 57 यहूदी अगुवां उसयो बोलया, “हले दीकर तू पूंजा सालां दा भी नी है, फिरी भी तू अब्राहम जो दिखया है?” 58 यीशुऐ उना ने बोलया, मैं तुसां ने सच्च-सच्च बोलदा है, अब्राहम पैदा होणे ला पेहले, मैं है। 59 तालू लोकां यीशुऐ जो मारणे तांई पथर चुके, पर यीशु लुकी करी मंदरे ला निकली गिया।

9 फिरी यीशुऐ जांदे बेले इक माणुऐ जो दिखया, जडा जमदा ही अन्ना था। 2 कने उदे चेलयां उसला पुछया, “गुरू जी, कुनी पाप कितया था की ऐ अन्ना जमया, इनी माणुऐ, या उदे माता पिता?” 3 यीशुऐ जबाब दिता, ना तां इनी पाप कितया था, ना तां इदे माता पिता: पर ऐ इस तांई अन्ना जमया, की परमेश्वरे दी शक्ति इदे च प्रगट होऐ। 4 जिनी मिंजो भेजया है; सांझो झट ही उदे दितयो कम्मा जो पूरा करणा है: से रात ओणे बाली है जिदे च कोई कम्म नी करी सकदा है। 5 जालू दीकर मैं संसारे च है, तालू दीकर संसारे दी लौ मैं है। 6 ऐ बोली करी उनी जमिना पर थक्या कने उसी थके ने मिट्टी सेडी कने सेई मिट्टी उस अन्ने दिया हखी पर लगाई करी। 7 उसयो बोलया, “जा, कने अपना मु शीलोह दे कुण्डे च धोई ले” (शीलोह दे कुण्डे दा मतलब है भेजया है) तां उनी जाई करी धोता, कने जालू से घरे जो बापस ओणा लग्गा तां उसयो मिलणा लागी पिप्या। 8 तालू उदे पडोसी कने होर लोक जिना उसयो पेहले भीख मंगदे दिखया था, इक दुज्जे ने बोलणा लग्गे, “क्या ऐ से ही नी है, जडा बेईकरी भीख मंगदा था?” 9 केईयां लोका बोलया, ऐ सेई है, होरनी बोलया, नी, पर उदे सांई है उनी बोलया, “मैं सेई है जडा बेईकरी भीख मंगदा था।” 10 तां से उसला पुछणा लग्गे, “तेरियां हखी दी लौ कितयां बापस आई?” 11 उनी जबाब दिता, “यीशु नापे दे इकी माणुऐ मिट्टी सेडी, कने मेरियां हखी पर लगाई करी मिंजो बोलया, शीलोह दे कुण्डे च जाई करी मु धोई ले, मैं गिया कने धोई करी मिंजो मिलणा लागी पिप्या।” 12 उना उसयो पुछया, से माणू कुथु है? उनी बोलया, “मैं नी जाणदा।” 13 लोक उस माणुऐ जो जडा पेहले अन्ना था उसयो फरीसियां बाल लेई गे। 14 जिस दिने यीशुऐ मिट्टी सेडी करी उदियां हखी ठीक कितियां थियां से सब्ते दा रोज था। 15 फिरी फरीसियां भी उसयो पुछया; तेरी हखी कितियां ठीक होईयां? उनी उना जो बोलया, “उनी मेरी हखी पर मिट्टी लाई, फिरी मैं धोई लेई, कने हुण मिंजो मिलणा लागी पिप्या।” 16 इस पर केई फरीसी बोलणा लग्गे, “ऐ माणू परमेश्वरे दिया तरफा ला नी है, क्योकि से सब्ते दे रोजे जो नी मनदा है।” होरनी बोलया, इस सांई पापी माणू इस तरीके ने चमत्कार कितयां दर्सी सकदा है? इसा गल्ला जो लेईकरी उना च फुट पेई गेई। 17 उना उस अन्ने ने फिरी बोलया, उनी तेरियां हखी ठीक कितियां न, तू उदे बारे च क्या बोलदा है? उनी बोलया, “से परमेश्वरे दा संदेश देणेबाला है।” 18 पर यहूदी अगुवां जो भरोसा नी होया की ऐ अन्ना था कने हुण दिखणा लागी गिया है जालू दीकर उदे माता पिता जो सदया जितियां हखी ठीक होईयां थियां। 19 कने उना ला पुछया, “क्या ऐ तुहाडा पुत्र है, इसयो तुसां बोलदे

थे की अन्ना जमया था? फिरी इसयो कितयां मिलणा लागी पिप्या है?” 20 उदे माता पिता जबाब दिता, “असां तां जाणदे न की ऐ साडा पुत्र है, कने अन्ना जमया था। 21 पर असां ऐ नी जाणदे की हुण कितयां करी इसयो मिलणा लागी पीया है; कने ना ऐ जाणदे की कुनी इसदियां हखी ठीक कितियां; से अपने जबाब देणे तांई काफी बडा है; उसी ला पुछी लिया; उसी ला पुछी लिया उनी अपने बारे च अपु बोली देणा है।” 22 ऐ गल्लां उदे माता पिता तां बोलियां क्योकि से यहूदी अगुवां ला उरदे थे; क्योकि यहूदी अगुवे एका करी के बैठयो थे, की अगर कोई भरोसा करे की से मसीह है, तां से यहूदी जंज पर ला कडी देणा। 23 इसा बजा ने उदे माता पिता बोलया की से सबालां दा जबाब देणे तांई बतेरा बडा है, उसला ही पुछी लिया। 24 तालू यहूदी अगुवां उस माणुऐ जो फिरी सदया जडा अन्ना था उसयो बोलया, “परमेश्वरे दे सामणे बायदा कर की तू सच्च बोलगा; असां तां जाणदे न की मैं माणू पापी है।” 25 उनी जबाब दिता, “मैं नी जाणदा से पापी है या नी: मैं तां बस इक गल्ल जाणदा है की मैं अन्ना था कने हुण दिखदा है।” 26 उना उसला फिरी पुछया, “उनी तेरे ने क्या कितया? उनी तिजो कितया ठीक कितया?” 27 उनी उना ने बोलया, “मैं तां तुसां ने बोली बैठया है, कने तुसां नी सुणया; हुण दुई बरी कजो सुणना चांदा न? क्या तुसां भी उदे चेले बणना चांदे न?” 28 तालू उना उसयो बुरा भला बोलया कने बोलया, तू ही उदा चेला है; असां तां परमेश्वर दे संदेश देणेबाले मूसा दे चेले न। 29 असां जाणदे न की परमेश्वरे मूसा ने गल्लां कितियां न; पर इस माणुऐ जो नी जाणदे न की कुथु ला आया है। 30 उनी उना जो जबाब दिता, ऐ तां हेरामिया दी गल्ल है की तुसां नी जाणदे कुथु दा है पर तमी उनी मेरियां हखी ठीक करी दितियां। 31 असां जाणदे न की परमेश्वर पापियां दी नी सुणदा है पर अगर कोई परमेश्वरे दा भक्त हो, कने उदिया इच्छा पर चलदा है, तां से उदी सुणदा है। 32 जालू ला इस संसारे जो बणया है तालू ला ऐ कदी नी सुणया, की कुनी भी जन्मे दे अन्ने दियां हखी ठीक कितियो होन। (aiōn g165) 33 अगर ऐ माणू परमेश्वरे दिया तरफा ला नी होंदा, तां उनी कुछ भी नी करी सकणा था। 34 उना उसयो जबाब दिता, तू तां बिलकुल पापां च जमया है, तू क्या सांझो सिखा दा है? तालू उना उसयो यहूदी जंज पर ला बाहर कडी दिता। 35 यीशुऐ सुणया, की उना उसयो यहूदी जंज घरे ला बाहर कडी दितया है; कने जालू उसला मिलया तां बोलया, “क्या तू परमेश्वरे दे पुत्रे पर भरोसा करता है?” 36 उनी जबाब दिता, “श्रीमान जी, मिंजो दस की ऐ परमेश्वरे दा पुत्र कुण है, ताकि मैं उस पर भरोसा करी सके?” 37 यीशुऐ उसला बोलया, मैं, “तू मिंजो पेहले भी दिखया है कने मैं ही से परमेश्वरे दा पुत्र है, जडा हुण तिजो ने गल्लां करा दा है।” 38 उनी बोलया, “प्रभु जी, मैं तिजो पर भरोसा करता है।” कने उसयो गुण्डवत कित। 39 तालू यीशुऐ बोलया, “मैं इस संसारे च इस न्याय जो करणे तांई आया है: ताकि अन्ने लोकां जो मिलणा लग्गी पोणा कने जिना लोकां जो मिलदा है से अन्ने होई जाणे।” 40 जडे फरीसी उदे सोगी थे, उना ऐ गल्लां सुणीकरी उसला बोलया, “क्या तू बोला दा है की असां भी अन्ने न?” 41 यीशुऐ उना ने बोलया, अगर तुसां अन्ने होंदे तां पापी नी होणा था पर हुण बोलदे न, की सांझो मिलदा है, इस तांई तुहाडे पाप माफ नी किते जाणे न।

10 “मैं तुसां ने सच्च-सच्च बोलदा है, की अगर कोई भेडां दिया गुराला दे दरबाजे ला नी अंदर ओऐ, पर होर कुसी पासे ला चडी करी अंदर ओऐ, से चोर कने डाकू है। 2 पर जडा दरबाजे च जांदा है से भेडां दा पुआल है। 3 उदे तांई द्वारपाल दरबाजा खोली दिन्दा है, कने भेडां उदी अबाज पछेणदियां न, कने से अपणियां भेडां जो ना लेई-लेईकरी सददा है कने बाहर लेई जांदा है। 4 कने जालू से अपणियां सारियां भेडां जो बार कडी बोंदा है, तां उना दे अग्ने-अग्ने चलदा है, कने भेडां उदे पिच्छे-पिच्छे चली पोंदिया न; क्योकि से उदी अबाज पछेणदियां न। 5 पर से होरसी दे पिच्छे नी जांदियां, पर उना ला नठदियां न, क्योकि से होरसी दी अबाज नी पछेणदियां न।” 6 यीशुऐ उना ने ऐ कहाणी बोली, पर से नी समझे की ऐ बोलणे दा क्या मतलब है। 7 तालू यीशुऐ उना ने फिरी बोलया, मैं तुसां ने सच्च-सच्च बोलदा है, की भेडां दा मैं ही दरबाजा है जिदे के भेडां अंदर ओंदियां न। 8 जितणे मिंजो ला पेहले आये; से सारे चोर कने डाकू न, पर मेरियां भेडां उना दी नी सुणी। 9 मैं ही दरबाजा है; अगर कोई मिंजो के अंदर जा तां परमेश्वरे उदा उदार करणा कने उनी अंदर बाहर ओंदे जांदे रेणा कने उसयो खाणे

पिणे जो मिलदी रेंपी। 10 चोर सिर्फ भेडां जो चोरणे कने मारणे कने खत्म करणे ताई ओंदा है। पर मैं इस ताई आया की उना जो सच्चाई च जिन्दगी कने भरपूरी दी जिन्दगी मिल्ले। 11 खरा पुआल मैं है; खरा पुआल भेडां ताई अपनी जान देई दिन्दा है। 12 भाडे पर रखयो होया मजदूर जालूँ सै भेडिये जो ओंदे दिखणा तां उनी नठी जाणा। उनी भेडां जो छडी देणा क्योंकि सै उना दा पुहाल नी है कने भेडां उदियां नी न। इस ताई भेडिया उना पर हमला करता है कने झण्ड जो बखेरी दिन्दा है। 13 सै इस ताई नठी जांदा है की सै भाडे दा मजदूर है, कने उसयो भेडां दी खिता नी है। 14 खरा पुआल मैं है, मैं अपणियां भेडां जो जाणदा है कने मेरियां अपणियां भेडां मिंजो जाणदियां न, 15 जियां पिता परमेश्वर मिंजो जाणदा है, कने मैं पिता परमेश्वरे जो जाणदा है। कने मैं भेडां ताई मरणे ताई तैयार है। 16 कने मेरियां होर भी भेडां न, जडियां इसा गुराला दियां नी न, मिंजो उना जो लोणा भी जरूरी है, उना मेरी अबाज पछेणनी है; तां फिरी इक झण्ड कने इक ही पुआल होणा है। 17 मैं अपणिया मरजिया ने जान दिन्दा है, इस ताई पिता परमेश्वर मिंजो ने प्यार करता है, ताकि मैं दोबारा जिन्दा होई जा। 18 कोई मेरिया जिन्दगीया जो मिंजो ला नी लेई सकदा है, इसयो मैं अपणिया इच्छा ने दिन्दा है। मिंजो अपनी जिंदगी देणे दा भी हक है, कने उना जो फिरी बापस लेणे दा भी हक है: क्योंकि ऐ सेई हुकम है जडा मिंजो मेरे पिता परमेश्वरे ला मिलया है। 19 इना गल्लां दिया बजा ने यहूदी लोकां च फिरी फुट पेई गईं। 20 उना चे मते बोलणा लगे, इदे च बुरी आत्मा है, कने सै पागल है; इसदी मत सृणा? 21 होरनी बोलया, ऐ गल्लां ऐसे माणुपे दियां नी न जिदे च बुरी आत्मा हो: इक बुरी आत्मा कदी भी नी इक अन्ने माणुपे दी हखी ठीक करी सकदी है? 22 यरूशलेम शहर च यहूदी मंदरे दी स्थापना दा त्योहार था, कने सर्दियां दी रित थी। 23 यीशू मंदरे दे अंगणे च घुमा दा था, जिसयो लोक सुलैमान राजे दा ओसारा बोलदे न। 24 तालूँ यहूदी अगुवां उसयो धरोटी लिया कने पुछया, “तू सांझो बडे लम्बे बकते दीकर दुबिधा च रखया है। हुण सांझो साफ-साफ दस। क्या तू मसीह है।” 25 यीशूए उना जो जबाब दिता, “मैं तुसां ने बोली दितया है, कने तुसां मेरा भरोसा करदे ही नी न, जडे कम्म मैं अपने पिता परमेश्वरे दे हके ने करता है सै ही मेरे गबाह न। 26 पर तुसां इस ताई मेरा भरोसा नी करदे न क्योंकि तुसां मेरियां भेडां चे नी न। 27 मेरियां भेडां मेरी अबाज पछेणदियां न, कने मैं उना जो जाणदा है, कने सै मेरे पिच्छे-पिच्छे चलदियां न। 28 मैं उना जो हमेशा दी जिन्दगी दिन्दा है, कने उना दा कदी नाश नी होणा, कने कोई उना जो मेरे हथां ला नी खोई सकदा है। (aiōn g165, aiōnios g166) 29 मेरा पिता परमेश्वर, जिनी उना जो मिंजो दितया है, सबना ला बडा है, कने कोई उना जो पिता परमेश्वरे दे हथे ला खोई नी सकदा। 30 मैं कने पिता परमेश्वर इक ही न।” 31 यहूदी अगुवां उसयो मारणे ताई फिरी पथर चुके। 32 इस पर यीशूए उना ने बोलया, “मैं पिता परमेश्वरे दिया तरफा ला तहांजो मते भले कम्म दसयो न, उना चे कुस कम्मे ताई तुसां मिंजो पथर मारा दे न?” 33 यहूदी अगुवां यीशूए जबाब दिता, “भले कम्म ताई असां तिजो पथर नी मारा दे न, पर परमेश्वरे दी निंदा करणे दिया बजा ने कने इस ताई की तू माणु होईकरी अपने आपे जो परमेश्वरे बोलदा है।” 34 यीशूए उना जो जबाब दिता, क्या पबित्र शास्त्र च ऐसा नी लिखया है की परमेश्वरे अपने लोकां दे अगुवां ने बोलया की, तुसां ईश्वर न? 35 तुसां जाणदे न की पबित्र शास्त्र च कुछ भी बदलया नी जाई सकदा। इस ताई अगर उदे लोकां दे अगुवां जो “ईश्वर” बोलया गया हो। 36 तां जालूँ मैं बोलदा है, मैं परमेश्वरे दा पुत्र है तां तुसां मिंजो कजो बोलदे न, “तू निंदा करा दा है।” मैं सै ही है जिसयो पिता परमेश्वरे लग कितया कने मिंजो संसार च भेजया है। 37 अगर मैं अपने पिता दा कम्म नी करता तां, तुसां मेरा भरोसा मत करा। 38 पर अगर मैं करता है, तां चाऐ मेरा भरोसा ना भी करा, पर उना कम्मा दा तां भरोसा करा, तालूँ तुसां जो पता चलणा कने समझणा की पिता परमेश्वर मिंजो च रेंदा है, कने मैं पिता परमेश्वर च रेंदा है। 39 तालूँ उना फिरी यीशूए जो पकडने दी कोशिश किति पर सै उना दे हथे ला बची करी निकली गया। 40 फिरी यीशू यरदने खडा दे पर उसा जगा पर चली गया, जिथूँ यहून्ना पेहले बपतिस्मा दिन्दा था, कने ओथूँ रिया। 41 कने मते लोक उदे बाल आई करी उसला बोलदे थे, “यहून्ना तां कोई चमत्कार नी दसया, पर जडा कुछ यहून्ना इदे बारे च बोला दा सै सारा सच्च था।” 42 कने ओथूँ मतयां उदे पर भरोसा कित।

11 बैतनिय्याह गां च इक लाजर नाऐ दा माणू बीमार था। मरियम कने मार्था उदियां बेहणा थियां। 2 ऐ सै ही मरियम थी जिना बादे च प्रभुपे दे पैरा उपर इत्र नियोरी करी उदे पैरां जो अपने बाला ने पुंजया था, उसा दा ही भाई लाजर बीमार था। 3 उसा दिया बेहणा यीशूए जो बोली भेजया, “प्रभु जी, दिख, जिसयो तू प्यार करता है, सै बीमार है।” 4 ऐ सुणीकरी यीशूए बोलया, “ऐ बिमारी मौत ने नी मुकणी, पर परमेश्वर दिया महिमा ताई है, ताकि उसला मिंजो, परमेश्वरे दे पुत्रे दी महिमा हो।” 5 कने यीशू मार्था कने उदी बेहण कने लाजरे ने प्यार करता था। 6 पर उनी सुणया, की सै बीमार है, जिसा जगा सै था, ओथूँ दो रोज होर स्की गया। 7 फिरी दो दिन बाद उनी चेलयां ने बोलया, “ओआ, असां फिरी यहूदिया प्रदेश दे इलाके दे बैतनिय्याह शहरे जो चलदे न।” 8 चेलयां उसयो बोलया, “गुरू जी, हुंणी तां यहूदी अगुवे तिजो पथर मारणा चांदे थे, क्या फिरी भी तू ओथूँ चलयया है?” 9 यीशूए जबाब दिता, “क्या दिने दे बाहरा घंटे नी होदे न? अगर कोई दिने चले, तां उसयो ठोकर नी लगदी, क्योंकि सै इस संसारे दी लौई ने मतलब की सर्जे ली लौई ने दिखदे न। 10 पर अगर कोई राती जो चले, तां उसयो ठोकर लागणी, क्योंकि तालूँ उदे च लौ नी है।” 11 इदे बाद यीशूए उना ने बोलया, “साडा मित्र लाजर सोई गया है, पर मैं उसयो जगाणा चलयया है।” 12 तालूँ चेलयां उसयो बोलया, “प्रभु जी, अगर सै सोई गया है, तां उनी ठीक ठाक होई जाणा।” 13 यीशूए तां उदिया मौता दे बारे च बोलया था: पर सै समझे की उनी निद्रां ने सोई जाणे दे बारे च बोलया। 14 तालूँ यीशूए उना ने साफ बोली दिता की, लाजर मरी गया है। 15 कने मैं तुहाडे फायदे ताई खुश है की मैं ओथूँ नी था जिसने तुसां भरोसा करन। पर हुण ओआ, असां उदे बाल चलदे न। 16 तालूँ थोमा जिसयो दितुसुस बोलदे न, अपने सोगी बाले चले ने बोलया, “ओआ, असां भी उदे सोगी मरणे ताई चलदे न।” 17 जालूँ यीशूए जो बैतनिय्याह गां च आई करी ऐ पता चला की उसयो चार दिन पेहले ही कबरा च दफनाई दितया है। 18 बैतनिय्याह गां यरूशलेम शहर दे नेडे लगभग कोई तिन किलो मीटर था। 19 कने मते यहूदी लोक मार्था कने मरियम बाल उदे भाईरे दे बारे च शान्ति देणे ताई आयो थे। 20 जालूँ मार्था यीशूए दे ओणे दी खबर सुणीकरी यीशूए ने मितणा गई, पर मरियम घरे बेई रेई। 21 मार्था यीशूए जो बोलया, “प्रभु जी, अगर तू ऐथूँ होंदा, तां मेरा भाई कदी नी मरदा। 22 कने हुण भी जाणदी है, की जडा कुछ तू परमेश्वरे ला मंगणा, परमेश्वरे तिजो देणा।” 23 यीशूए उसा जो बोलया, “तेरा भाई फिरी जिंदा होई जाणा।” 24 मार्था उसयो बोलया, मैं जाणदी है, “न्याय दे रोजे जालूँ हर कोई जिन्दा होई जाणा तालूँ उनी भी जिन्दा होई जाणा।” 25 यीशूए उसा ने बोलया, “मैं सै है जडा मरयो लोकां जो जिन्दगी च बापस लौंदा है, जडा कोई मिंजो पर भरोसा करता है सै अगर मरी भी जा तमी, उनी जी पोणा। 26 कने जडा कोई मिंजो पर भरोसा करता है सै जिन्दा है, कने उनी अनन्तकाल दीकर नी मरणा। मार्था तू क्या इसा गल्ला पर भरोसा करदी है?” (aiōn g165) 27 उनी उसयो बोलया, “हाँ, प्रभु जी, मैं भरोसा करी लिया है, की परमेश्वरे दा पुत्र मसीह जडा संसारे च ओणे बाला था, सै तू ही है।” 28 ऐ बोली करी सै चली गई, कने अपनी बेहण मरियम जो होले करी सदीकरी बोलया, “गुरू ऐथूँ ही है, कने तिजो सदा दा है।” 29 सै सुणदे ही झट उठी करी उदे बाल आई। 30 (यीशू हले दीकर भी गांऐ ला बाहर ही था, पर उसा ही जगा च था जिथूँ मार्था उसला मिल्ली थी)। 31 तालूँ जडे यहूदी लोक मरियम सोगी उसा दे घरे थे, कने उसा जो दिलासा देदे थे, कने दिखया की मरियम झट उठी करी बाहर चली गई। इस ताई सै उसा दे पिच्छे-पिच्छे गे, ऐ सै समझीकरी की सै कबरा पर रोणे ताई जा दी है। 32 जालूँ मरियम ओथूँ पुज्जी जिथूँ यीशू था, तां उसयो दिखदे ही उदे पैरां च पेईकरी बोलया, “प्रभु जी, अगर तू ऐथूँ होंदा तां मेरा भाई नी मरदा।” 33 जालूँ यीशूए उसा जो कने उसा सोगी आयो यहूदी लोकां जो रोंदे दिखया, तां यीशूए बडा ही दुखी होईकरी उना ला पुछया, 34 कने बोलया, तुसां उसयो कथूँ दफनाया है? उना उसयो बोलया, “प्रभु जी, चली करी दिखी ले।” 35 यीशूए दिया हखी चे आंसू निकलना लगे। 36 तालूँ यहूदी लोक बोलणा लगे, “दिखा, सै उसने कदेया प्यार रखदा था।” 37 पर उना चे कितणे ही बोलया की, “इनी तां उस अन्ने दिया हखी ठीक कितियां न, क्या ऐ लाजरे जो मरणे ला नी बचाई सकदा था?” 38 यीशू मने च बडा ही दुखी होया कने कबरा पर आया, सै इक गुफा थी, कने गुफा दे मुऐ पर

इक पथर रखया होया था। 39 यीशुए बोलया, “पथरे जो हटा।” उस मरयो दी बेंहण मार्या बोलणा लग्गी, “प्रभु जी, उदे चे तां हण मुक्क ओआ दी है, क्योंकि उसयो मरयो चार रोज होई गियो न।” 40 यीशुए उस जो बोलया, “क्या मैं तिजो ने बोलया नी था की अगर तू मिजो पर भरोसा करगी तां तू परमेश्वरे दी महिमा जो दिखगी।” 41 तालू उना सै पथर हटाया, फिरी यीशुए स्वर्ग पासे दिखीकरी के बोलया, “पिता परमेश्वर जी, मैं धन्याबाद करदा है की तू मेरी सुणी लेई है।” 42 पर जड़ी भीड़ अखे बखे खड़ोतियो है, उना दिया बजा ने यीशुए जारे ने बोलया, “मैं जाणदा है, की तू हमेशा मेरी सुणदा है, जिसने की सै भरोसा करन, की तू मिजो भेजया है।” 43 ऐ बोल्ली करी उनी जारे ने पुकारया, “हे लाजर बाहर निकली आ।” 44 जडा मरी गिया था, सै बाहर आया, कने उदा सारा शरीर पट्टियाँ च कने मु कपडे च लपेटया होया था कने यीशुए उना जो बोलया, “इसयो खोली करी जाणा दिया।” 45 तालू जडे यहूदी लोक मरियमा दे सोगी आयो थे, उना उदा ऐ कम्म दिखया कने उना चे मतयां उदे पर भरोसा किता। 46 उना चे कितणयां ही फरीसियां बाल जना करी यीशुए दे कम्मा दी खबर दिती। 47 इस पर बड़े याजकां कने फरीसियां दी महासभा दे लोकां जो गठेरी करी बोलया, “असां क्या करगे? ऐ माणू तां बडे चमत्कार दसदा है। 48 अगर असां इसयो हण भी नी रोकदे न, तां सारयां उस पर भरोसा करी लेणा की सै ही मसीहा है, कने रोमी लोकां आई करी साडे मंदरे कने देशे पर कब्जा करी लेणा।” 49 तालू उना दिया सभा चे कैफा नाए दा इक माणू जडा उस साले दा महायाजक था, उनी बोलया, “तुसां कुछ भी नी जाणदे; 50 कने ना ऐ समझदे न, तुहाडे ताई ऐ ठीक है, की साडे लोकां ताई इक माणू मेरे, नी की सारे इस्त्राएल देशे दे लोकां दा नाश होई जा।” 51 ऐ गल्ल उनी अपने आपे ला नी बोली, पर उस साले दे महायाजक दे स्पे च, उनी ऐ भविष्यवाणी किती, की यीशुए पुरे इस्त्राएल देशे ताई मरणा। 52 कने ना सिर्फ इना ताई ही नी। पर उनी परमेश्वरे दी होर ओलादी ताई भी मरणा जडे इस संसारे च बिखरयो न, ताकि उना जो गठेरी सके। 53 यहूदी अगुवे उस रोजे ला ही उसयो मारने दी सलाह करणा लग्गी पै। 54 इसा साजिशा दिया बजा ने यीशुए यहूदियां दे बिच सेरे आम घुमणा बंद करी दिता; यीशु ओथु ला सुनसान जगा दे नेडे बाले प्रदेश दे इफ्राईम नाए दे इकी शेहरे जो चली गिया, कने अपने चेलयाँ सोगी ओथु ही रेंणा लग्गा। 55 कने यहूदिया दे फसह दे त्योहारे दा बकत नेडे था, कने मते लोक फसह ला पहले यस्त्रालेम शेहर जो गे ताकि मंदरे च अपने आपे जो शूद्र करन। 56 कने यीशुए जो तोपदे कने मंदरे च खडोई करी अपु चे बोलणा लग्गे, “तुसां क्या समझदे न? क्या सै त्योहारे च नी ओणा?” 57 कने बड़े याजकां कने फरीसियां ऐ हुक्म दितया था, की अगर कुस्यो पता लग्गे की यीशु कुथु है तां दसनयो, ताकि उसयो गिरफ्तार करी सकन।

**12** फिरी यीशु फसह दे त्योहारे ला छे रोज पहले बैतनिय्याह गां च आया, जिथू लाजर जो मरयां चे जिन्दा किता था। 2 ओथु उना उदे ताई धाम तैयार किती, कने यीशुए जो आदर मान देणे ताई मार्या सेबा करा दी थी, कने लाजर भी उना चे इक था, जडे उदे सोगी रोटी खांगे ताई बैठयो थे। 3 तालू मरियमा जटामासी दा अधा सेर मेंहणा इत्र लेईकरी यीशुए दे पैरां पर नियोरया, कने अपने बालां न उदे पैर पूंजे, कने इत्रे दिया खुशबुआ ने सारा घर सुगन्धित होई गिया। 4 पर उदे चेलयाँ चे यहूदा इस्करियेल नाए दा इक चेला था जडा उसयो पकड़वाणा चांदा था, बोलणा लग्गा, 5 “ऐ इत्र तिसो दीनास च बेची करी गरीबां जो कनी देई दिता?” 6 उनी ऐ गल्ल इस ताई नी बोली की, की उसयो गरीबां दी चिंता थी, पर इस ताई की सै चोर था कने उदे बाल उना दे पैसयां दी थेली रेंदी थी, कने उसा च कोई कुछ पांदे थे, सै कडी लेंदा था। 7 यीशुए बोलया, “इसा जो तंग मत करा, इना बकत ला पहले मिंजो दफनाणे दी तैयारी ताई ऐ करा दी है। 8 गरीबां तां तुहाडे सोगी हमेशा रेंणा है, पर मैं तुहाडे सोगी हमेशा नी रेंणा।” 9 जालू लोकां सुणया की यीशु ओथु था तां तालू लोकां दी बडी भीड़ ओथु आई। सै सिर्फ यीशु जो ही नी पर लाजर जो भी दिखणा आयो थे जिसयो उनी मरयां चे जिन्दा कितया था। 10 तालू बड़े याजकां लाजरे जो भी मारणे दी योजना बणाई। 11 क्योंकि उदिया बजा ने मते लोक उना जो नी अपनादे थे, क्योंकि उना यीशुए पर भरोसा कितया। 12 दुज्जे दिने मतयां लोका जडे त्योहरे च आयो थे, ऐ सुणीकरी, की यीशु यस्त्रालेम शेहर च ओआ दा है। 13 इस ताई उना खजरी दियां

डालियाँ लियां, कने उसला मिलणे ताई निकले, कने चिलाणा लग्गे, “होशाना। इस्त्राएल दा राजा धन्य हो, जडा प्रभु दे नाए ने ओंदा है।” 14 जालू यीशुए जो इक गंधे दा बच्चा मिल्ला तां सै उस पर बैठी करी यस्त्रालेम शेहर च आया, ऐ तियां ही होया जियां की पबित्र शाब्ब च लिखया है। 15 “हे यस्त्रालेम शेहर दे लोकों, मत डरा; दिख तेरा राजा गंधे दे बच्चे च सवार होईकरी ओआ दा है।” 16 यीशुए दे चले, ऐ गल्लां पहले नी समझे थे; पर जालू यीशुए दी महिमा प्रगट होई, तां उना जो याद आया, की जडा कुछ भी यीशुए ने होया सै ठीक तियां ही होया जियां की पबित्र शाब्ब च लिखया था; कने लोका उदे कने ऐदिया व्यवहार कितया था। 17 तालू भिडा दे लोकां जडे उस बेले यीशुए सोगी थे, सै दुज्जे लोकां जो दसणा लग्गे की उनी लाजरे जो कबरा ला सदीकरी, उसयो जिन्दा करी दिता। 18 मते लोक यीशुए ने मिलणे ताई आए, क्योंकि उना इस चमत्कार दे बारे च सुणया था। 19 तालू फरीसियां अपु चे बोलया, “सोचा असां कुछ नी करी सकदे न, दिखा, संसार च हर कोई उदे पिच्छे होई चलया है।” 20 ओथु कुछ यूनानी लोक थे जडे फसह दे त्योहारे बेले भक्ति करणे ताई यस्त्रालेम शेहर च आयो थे। 21 उना गलील प्रदेश दे बैतसैदा शेहरे दे रेणेबाले फिलिप्पस दे बाल आई करी उसला बिनती किती, “श्रीमान असां यीशुए ने मिलणा चांदे न।” 22 फिलिप्पसे आई करी अन्धियास ने बोलया; तालू अन्धियास कने फिलिप्पसे दोनो जाई करी यीशुए जो बोलया। 23 इस पर यीशुए उना जो बोलया, सै बकत आई गिया है, की मेरी, माणुए दे पुत्रे दी महिमा हो। 24 मैं तुसां ने सच्च-सच्च बोलदा है, की जालू दीकर कणका दा दाणा जमिना च पेईकरी मरी नी जांदा है, सै किला ही रेंदा है पर जालू मरी जांदा है, तां मते फल दिन्दा है। 25 जडा अपने प्राणा ने प्यार करता है, सै उना जो गबाई दिन्दा है; पर जडा इस संसारे च अपने प्राणा जो प्यार नी करता है; तां उनी हमेशा दिया जिन्दगिया ताई उदी रक्षा करणी है। (aiōnios g166) 26 अगर कोई मेरी सेबा करे, तां मेरा चेला बणे; कने जिथू मैं है ओथु मेरे सेवके भी होणा; अगर कोई मेरी सेबा करे, तां पिता परमेश्वरे उदा आदर करणा। 27 हण मैं बडा बेचेन होआ दा है। इस ताई मैं क्या बोले? पिता जी, मिजो इसा दुखे दिया घडिया ला बचाई ले? पर मैं संसार च इस ताई आया की दुख झेले कने मरी जा। 28 हे पिता परमेश्वर तू प्रगट कर की तू कितणा महिमामय है। तालू ऐ आकाशवाणी होई, “मैं प्रगट कितया है की मैं कितणा महिमा बाला है कने मैं ऐ फिरी प्रगट करणा।” 29 तालू सै लोक जडे खडोई करी अबाज सुंणा दे थे, उना बोलया, की बदल गरजया, कने होरनी बोलया, “कोई स्वर्गदूत उसने बोलया।” 30 इसी पर यीशुए बोलया, “ऐ अबाज तुहाडे भले ताई थी, मेरे ताई नी है। 31 हण सै बकत है जालू परमेश्वरे संसारे दे लोकां दा न्याय करणा, कने हण सै बकत है जालू यीशुए इस संसारे दे सरदार शैताने दी शक्ति जो खत्म करणा। 32 कने अगर मैं धरतिया ला उपर चढाया जांगा, तां सारयां जो अपने बाल लेई ओणा।” 33 इयां बोली करी उनी ऐ प्रगट करी दिता, की सै कियां मरणे बाला था। 34 इसा पर लोका उसला बोलया, “असां पबित्र शाब्ब दी ऐ गल्ल सुणियो है, की मसीहे हमेशा जिन्दा रेंणा है, फिरी तू कजो बोला दा है, की माणुए दे पुत्रे जो उच्चे पर चढाणा जरूरी है? ऐ माणुए दा पुत्र कण है?” (aiōn g165) 35 यीशुए उना ने बोलया, “(लौ) हण थोडिया देरा दीकर तुहाडे बिच है, जालू दीकर लौ तुहाडे सोगी है तालू दीकर चली रिया; इयां ना होए की नेहेरा तुहांजो घेरी ना ले; जडा नेहेरे च चलदा है उसयो नी पता होंदा की कुथयो चलया है। 36 जालू दीकर लौ तुहाडे सोगी है, लौ पर भरोसा करा की तुसां लौ दी ओलाद बणन।” ऐ गल्लां बोली करी यीशु चली गिया कने अपने आपे जो उना ला लुकाई रखया। 37 कने यीशुए उना दे सामणे इतणे चमत्कार दर्से, तमी उना उदे पर भरोसा नी किता; 38 ऐ इस ताई होया ताकि जडा यशायाह परमेश्वरे दा संदेश देणेबाले बोलया था सै सच्च होई जा; “प्रभु जी, साडे संदेश पर कुनी भरोसा किता है? कने परमेश्वर दी पराक्रमी शक्ति कुदे पर प्रगट होई?” 39 इसा बजा ने सै भरोसा नी करी सके, क्योंकि यशायाहे फिरी बोलया: 40 परमेश्वरे उना दी हखी अनिया करी दितियां ताकि सै दिखी नी सकन, कने उना दे दिमाग बंद करी दिते ताकि सै समझी नी सकन। नितां उना मिंजो पर भरोसा करी लेणा कने मैं उना जो ठीक करी दिन्दा। 41 यशायाहे ऐ गल्लां इस ताई बोलियां, की उनी बकते ला पहले उदी महिमा दिखी, कने उदे बारे च गल्लां कितियां। 42 मते अगुवां भी उदे पर भरोसा किता, पर फरीसियां दिया

बजा ने सबना सामणे नी मंन्दे थे, इस डरे ने नी की उना जो यहदी जंज घर ला कडी दिगे। 43 क्योकि उना जो परमेस्वरे दी तारीफ ला, माणुपे दी तारीफ जादा प्यारी लगदी थी। 44 यीशुपे भिडा जो पुकारी करी बोलया, “जडा मेरे पर भरोसा करदा है, सै सिर्फ मिंजो पर नी पर मिंजो भेजणे बाले परमेस्वरे पर भरोसा करदा है। 45 कने जडा मिंजो दिखदा है, सै मिंजो भेजणे बाले परमेस्वरे जो दिखदा है। 46 मैं संसारे च इक लौ बणी करी आया है ताकि जडा मिंजो पर भरोसा करगा सै कदी नेहरे च नी रेगा। 47 अगर कोई मेरियां गल्लां सुणीकरी उना दा पालन नी करे, तां मैं उसयो दोषी नी बोलणा है, क्योकि मैं संसारे दे लोकां जो दोषी ठहरणे तांई नी आया, पर संसारे दा उद्धार करणे तांई आया है।” 48 जडा मिंजो तुच्छ समझदा है कने मेरियां गल्लां जो नी मंन्दा है, उना दा न्याय करणे बाला तां इक ही है, मतलब की जडा बचन मैं बोलया है, उनी उसयो आखरी दिना च दोषी बणाणा। 49 क्योकि मैं अपने हक ने ए गल्लां नी कितियां न, पर पिता परमेस्वर जिनी मिंजो भेजया है उनी मिंजो हुकम दितया है की क्या-क्या बोले? 50 कने मैं जाणदा है, की उदे हुक्मा जो मनणा हमेशा दिशा जिन्दगीया दा रस्ता है, इस तांई मैं तुसां जो सेई बोलदा है जडा पिता परमेस्वर मिंजो बोलदा है। (aiōnios g166)

**13** फसह दे त्योहारे ला पेहले जालु यीशुपे जाणी लिया, की मेरा सै बकत आई गया है की मैं संसारे जो छडी करी अपने पिता परमेस्वर बाल बापस चली जां, यीशु अपने चेलयां सोगी हमेशा प्यार करदा रिया, जडे संसार च यीशुपे सोगी थे, जदिया प्यार सै करदा था, आखरी दीकर सिधुदा ही प्यार रखदा रिया। 2 यीशु कने उदे चले राती दा खाणा खा दे थे। शैताने पेहले ही यीशुपे जो धोखा देणे तांई शमौन दे पुत्र यहदा इस्करियोती दे मने च ए पाई दितया था, की उसयो पकड़वाई दे। 3 जालु यीशु ए जाणदा था की पिता परमेस्वरे मिंजो हर चिजा पर हक दितया है कने मैं परमेस्वरे दे बखे ला आया है, कने परमेस्वरे बाल बापस जाणा है। 4 खाणा खांदे बेले उठी करी यीशुपे अपने बाहरी कपडे खोली दिते, कने अंगोछा लेईकरी अपना लक्के च बन्नी लिया। 5 तालु भांडे च पाणी लेईकरी चेलयां दे पैर धोई करी कने जडा अंगोछा लक्के च लपेटया था उसला पुंजणा लग्गा। 6 जालु यीशु शमौन पतरसे दे बखे आया तालु पतरसे उसयो बोलया, “प्रभु जी, तू कजो मेरे पैरां धोणा लगया है?” 7 यीशुपे उसयो जबाब दितया, “जडा मैं करदा है, तू हण इदा मतलब नी जाणदा है, पर कुछ बकते बाद जाणना है।” 8 पतरसे उसयो बोलया, मैं तुसां जो अपने पैरां जो कदी नी धोणा देणा। ए सुणीकरी यीशुपे उसयो बोलया, “अगर तू मिंजो अपने पैर नी धोणे नी दिते, तां तू मेरा चेलानी है।” (aiōn g165) 9 शमौन पतरसे उसयो बोलया, “प्रभु जी, तां मेरे पैर ही नी बल्कि हथ कने सर भी धोई दे।” 10 यीशुपे उसयो बोलया, “इक माणु जडा नोहोई बैठया है, सै बिलकुल साफ है, उसयो सिर्फ अपने पैरां जो धोणे दी जरूरत है। कने तुसां सारे शूद्र न सिर्फ इकी जो छडी करी।” 11 सै तां अपयो पकड़णे बाले जो जाणदा था तांई तां उनी बोलया, “तुसां सारे दे सारे शूद्र नी ना।” 12 जालु यीशु उना दे पैरां जो धोई बैठा तां सै अपने बाहरे बाले कपडे पाई करी फिरी बेई गिया कने उना ने बोलणा लग्गा, “क्या तुसां समझे की मैं तुहाडे सोगी क्या कितया है? 13 तुसां मिंजो गुरू, कने प्रभु, कने ठीक ही बोलदे न, क्योकि मैं तुहाडा गुरू कने प्रभु है। 14 अगर मैं प्रभु कने गुरू होईकरी तुहाडे पैर धोते, तां तुहांजो भी नम्र होईकरी इक दुज्जे दे पैर धोई करी मिंजो ला सिखणा चाईदा। 15 क्योकि मैं तुहांजो इक नमूना दस्सी दितया है, की जियां मैं तुहाडे सोगी कितया, तुसां भी तियां ही करा। 16 मैं तुसां ने सच्च-सच्च बोलदा है, नोकर अपने मालिके ला बडा नी हौदा, कने ना भेजया होया उना जो भेजणे बाले ला बड्ठा हौदा। 17 हण तां तुसां इना गल्लां जो जाणदे न, तां अना जो करा ताकि तुसां भी धन्य होना। 18 मैं तुसां सबना दे बारे च नी बोला दा है: जिना जो मैं चूणयां है, उना जो मैं जाणदा है: पर ए इस तांई होआ दा है ताकि पवित्र शास्त्रां च जडा लिखया है सै पूरा हो, जिनी मेरे सोगी रोटी खादी, उनी मिंजो धोखा दितया है। 19 हण मैं तुहांजो उदे होणे ला पेहले दसी दिन्दा है ताकि जालु होई जांगा तां तुसां भरोसा करनयो की मैं सेई है। 20 मैं तुसां ने सच्च-सच्च बोलदा है, की जडा मेरे भेजयां जो अपनांदा है, सै मिंजो भी अपनांदा है, कने जडा मिंजो अपनांदा है, सै मेरे भेजणे बाले जो भी अपनांदा है।” 21 ए गल्लां बोलणे बाद यीशु बडा ही दुखी होया कने अपने चेलयां जो दसया, “मैं तुसां ने सच्च-सच्च बोलदा है, की तुसां

चे इकी जणे मिंजो पकड़णा है।” 22 चले ए शक करदे होपे, इकी दुपे पासे दिखणा लग्गे, ए कुमदे बारे च बोला दा है। 23 उदे चेलयां चे इक जिसने यीशु प्यार रखदा था, यीशुपे दे बखे बैठया था। 24 तालु शमौन पतरसे उदे पासे इशारा करी के पुछया, “दसी दे तां, सै कुसदे बारे च बोला दा है?” 25 तालु उनी भी यीशुपे दे बखे जाई करी पुछया, “प्रभु जी, सै कुण है?” 26 यीशुपे जबाब दितया, “जिसयो मैं ए रोटिया दा टुकडा चटनिया च डोबी करी दिगा, सै ही है।” कने उनी टुकडा चटनिया च डोबी करी शमौन दे पुत्र यहदा इस्करियोती जो दितया। 27 कने जियां ही यहदा टुकडा खादा, यीशुपे उसयो बोलया, “जडा तू हण करणा जा दा है, सै झट कर, तालु ही शैतान उदे च बडी गिया। 28 खाणा खाणे बालयां चे बाकी कुसियो भी पता नी था की यीशुपे उसयो ऐसा कजो बोलया। 29 यहदा बाल पैसां दी थेली रेदी थी, इस तांई कुनी-कुनी समझया, की यीशु उसयो बोला दा है, की जडा कुछ सांझो त्योहारे तांई चाईदा सै खरीदी ले, या गरीबां जो कुछ दे। 30 तालु सै रोटी दे टुकडे जो खाली करी झट बाहरे जो चली गिया, कने राती दा बकत था। 31 जालु सै बाहर चली गिया तां यीशुपे बोलया, हुण मेरी, माणुपे दे पुत्रे दी महिमा होई, कने परमेस्वरे दी महिमा मिंजो च होई; 32 कने परमेस्वरे अपने पुत्रे दी महिमा करणी, कने तोल्लनी ही करणी है। 33 हे प्यारे बच्चो, मैं होर थोडी देर तुहाडे बखे है; फिरी तुसां मिंजो तोपणा, कने जियां मैं यहदियां जो बोलया, जिथु मैं जाणा, ओथु तुसां नी आई सकदे न, तियां ही मैं हण तुहांजो भी बोलदा है। 34 मैं तुहांजो इक नोआं हुकम दिन्दा है, इक दुज्जे ने तियां ही प्यार करा: जियां मैं तुसां ने प्यार करदा है, तियां ही तुसां भी इक दुज्जे ने प्यार करा।” 35 अगर तुसां इक दुज्जे ने प्यार करणे, तां हर कुसी जो पता चलणा की तुसां मेरे चले न। 36 शमौन पतरसे उसयो बोलया, “प्रभु जी, तू कुथु जाणा है?” यीशुपे जबाब दितया, जिथु मैं जाणा है, ओथु तू मेरे पिच्छे नी आई सकदा? पर बादे च तुसां मेरे पिच्छे ओणा। 37 पतरसे उसयो बोलया, “प्रभु जी, हण मैं तेरे पिच्छे कनी आई सकदा है? मैं तां तेरे तांई अपनां जान देणे तांई तैयार है।” 38 यीशुपे जबाब दितया, क्या तू मेरे तांई मरण है? मैं तिजो ने सच्च-सच्च बोलदा है की मुर्गे जो बांग देणे ला पेहले तू मिंजो तिन्न बरी बोलणा की तू मिंजो नी जाणदा।

**14** “तुहाडा मन दुखी ना हो, तुसां परमेस्वरे पर भरोसा रखा कने मिंजो पर भी भरोसा रखा। 2 मेरे पिता परमेस्वर दे घरे रहणे दियां मतियां जगा न, अगर नी हुंदियां, तां मैं तुसां ने बोली दिन्दा क्योकि मैं तुहाडे तांई जगा तैयार करणा जांदा है। 3 मेरे जाणे कने तैयारी करणे बाद, तां मैं फिरी आई करी तुहांजो अपने सोगी लेई जांगा, ताकि जिथु मैं रे ओथु ही तुसां भी रेन। 4 उसका जडा दा रस्ता जिथु मैं जाणा है ओथु दा रस्ता तुसां जाणदे न।” 5 थोमे उसला बोलया, “प्रभु जी, सांझो नी पता तू कुथु जाणा है, तां सांझो रस्ता कियां पता होंगा?” 6 यीशुपे उना जो बोलया, “रस्ता कने सचाई कने जडा जिन्दगी दिन्दा है सै मैं ही है, मेरे बिना कोई भी पिता परमेस्वरे बाल नी पुज्जी सकदा है। 7 अगर तुसां मिंजो जाणया हौदा, तां मेरे पिता परमेस्वरे जो भी जाणदे, कने हण उसयो जाणदे भी हेन, कने उसयो दिखया भी है।” 8 फिलिप्पुसे उसला बोलया, “प्रभु जी, पिता परमेस्वर दे दर्शन करवाई दे: इतणा ही साडे तांई काफी है।” 9 यीशुपे उसयो बोलया, हे फिलिप्पुस, मैं इतणे रोजां ला तुहाडे सोगी है, क्या तू मिंजो नी जाणदा? जिनी मिंजो दिखया है उनी पिता परमेस्वर जो भी दिखया है: तू कजो बोला दा की पिता परमेस्वर दे दर्शन करवाई दे? 10 क्या तू भरोसा नी करदा है, की मैं पिता परमेस्वर च है, कने पिता परमेस्वर मिंजो च है। ए गल्लां लिखियां मैं तुसां ने बोला दा है, अपणिया तरफा ला नी बोला दा, पर पिता परमेस्वरे मिंजो च रेईकरी जडा चांदा है सै ही करदा है। 11 मेरा ही भरोसा करा, की मैं पिता परमेस्वर च है, कने पिता परमेस्वर मिंजो च है; नितां जडे चमत्कार मैं कितयो न उना दिया बजा ने मेरे पर भरोसा करा। 12 मैं तुसां ने सच्च-सच्च बोलदा है, की जडा मिंजो पर भरोसा करदा है, ए कम्म जडे मैं करदा है उनी भी करणे, क्योकि मैं पिता परमेस्वर बाल जाणा है। 13 कने जडा कुछ तुसां मेरे नापे ने मंगणे, सेई मैं करणा ताकि पुत्रे दे जरिये पिता परमेस्वर दी महिमा होपे। 14 अगर तुसां मिंजो ला मेरे नापे ला कुछ मंगणे, तां मैं सै पूरा करणा। 15 अगर तुसां मिंजो ने प्यार करदे न, तां मेरे हुक्मा जो मंगणे। 16 कने मैं पिता परमेस्वर ने बिनती करणा, की सै तुहांजो इक होर मददगार दे, ताकि सै हमेशा तुहाडे सोगी रे। (aiōn g165) 17 सै सच्च दी आत्मा,

जड़ी पबित्र आत्मा है, सै परमेश्वरे दे बारे च सच्च जो प्रगत करता है, क्योंकि संसार ना पबित्र आत्मा जो दिखदा है कने ना उसयो जाणदा है: तुसां पबित्र आत्मा जो जाणदे न, क्योंकि सै तुहाडे सोगी रेंदा है कने उनी तुसां च होणा है। 18 'मै तुहांजो अनाथ नी छण्डा है, मै तुहाडे बाल बापस ओणा। 19 थोडे ही बकते च संसारे दे लोकां मिजो नी दिखणा, पर तुसां मिजो दिखणा क्योंकि मै फिरी ला जिन्दा होणा है, इस ताईं तुसां भी जिन्दा रेंणा है। 20 जिस रोजे मै जिन्दे होईकरी बापस ओणा उसी दिने तुहांजो पता लगणा, की मै अपने पिता परमेश्वर च है कने तुसां मिजो च न, कने मै तुसां च है। 21 जडे मेरे हुक्मा जो जाणदा है, कने सै हुक्मा जो मंनदा है, सै ही मिजो ने प्यार करता है, कने मै भी उसला प्यार करणा है कने जडा मिजो ने प्यार करता है, उसला मेरे पिता परमेश्वरे भी प्यार करणा, कने मै उसला प्यार रखणा, कने मै अपने आपे जो उदे पर प्रगत करणा है।' 22 उनी यहदे जडा इस्करियोती नी था, उनी बोलया, "प्रभु जी, क्या होया की तू अपने आपे जो सांजो पर प्रगत करणा चांदा है, कने संसारे दे लोकां पर नी?" 23 यीशुए उसयो जबाब दिता, मै अपने आपे जो ऐसे लोकां जो दसदा है जडे कोई मिजो ने प्यार करते न, कने मेरियां सिखाईयां गल्लां जो मंदे न। कने मेरे पिता उसने प्यार रखणा कने असां आई करी उदे सोगी रेंणा है। 24 जडा मिजो ने प्यार नी करता, सै मेरी सिखाईयां गल्लां जो नी मंनदा है, कने जडा मेरी शिक्षा तुसां सुणदे न, सै मेरियां नी न पर मेरे पिता परमेश्वर दी शिक्षा न, जिनी मिजो भेजया है। 25 ए गल्लां मै तुहाडे सोगी रेंईकरी तुसां ने बोलियां न। 26 मददगार मतलब की पबित्र आत्मा जिसयो पिता परमेश्वरे मेरी जगा लेणे ताईं भेजणा है, पबित्र आत्मा तुहांजो सारियां गल्लां सिखाणियां न, कने जडा कुछ मै तुसां ने बोलया है, सै सब कुछ तुहांजो याद करणा है। 27 मै तुहांजो शांति दिन्दा है, मै अपनी शांति तुहांजो दिन्दा है; ऐ सै शांति नी है जडी संसार देई सकदा है। तुसां अपने मने जो दुखी कने डरया होया मत होणा दिया। 28 तुसां सुणया, की मै तुहांजो ने बोलया, "मै जाणा है। कने तुहाडे बाल फिरी बापस आई जाणा है अगर तुसां मेरे ने प्यार करते न, तां इसा गल्लां ने खुश होदे न, की मै पिता परमेश्वर बाल जाणा है क्योंकि पिता परमेश्वर मिजो ला बडा महान है।" 29 कने मै हण ऐ सब गल्लां होणे ला पहले तुहांजो ने बोली दितियां न, की जालू सै होई जांगियां, तां तुसां मिजो पर भरोसा करन। 30 हण मेरे बाल तुसां ने तुहाडे सोगी गल्लां करणे ताईं जादा बकत नी क्योंकि इसी संसारे दे सरदारे शैताने ओणा है, कने मिजो पर उदा कोई हक नी है। 31 मै तियां ही करता है जियां पिता परमेश्वरे मिजो हुकम दिता, ऐ इस ताईं की संसार दे लोकां जो पता लग्ये की मै पिता परमेश्वरे ने प्यार करता है। कने जियां पिता परमेश्वर मिजो हुकम दिन्दा, मै तियां ही करता है। उडा, ऐथू ला चलदे न।

**15** सच्ची दाखा दी बेल मै हे; कने मेरा पिता परमेश्वर किसान है। 2 हर इक डाली जडी मिजो ने लगियो है, कने नी फलदी है, उस जो सै बडी दिन्दा है, कने जडी डाली फलदी है उसा जो सै छांडदा है ताकि सै होर जादा फले। 3 जडी शिक्षा मै तुसां जो दितियो है, उसा दिया बजा ने तुसां शूद न। 4 तुसां मिजो च बणी रिया, कने मै तुहांजो च: जियां कोई डाली अगर दाखा दिया बेला ला टूटी जा, तां सै अपु नी फली सकदी, तियां ही तुसां मिजो च बणी नी रेंगे तां, तुसां कुछ नी करी सकदे। 5 मै दाख बेल है: कने तुसां डालियां न; जडा मिजो च बणी रेंदा है, कने मै उदे च, सै मता फलदा है, क्योंकि मिजो ने लग होईकरी तुसां कुछ नी करी सकदे। 6 अगर कोई मिजो च बणी नी रे, तां उसा डालियां जो बड्डी करी फेंकी दिन्दे न, कने जालू सै डालियां सुकी जांदियां न; कने लोक उना जो गठेरी करी अग्नी च पाई दिन्दे न, कने सै फकई जांदियां न। 7 अगर तुसां मिजो ने बणी रेंन, कने मेरियां शिक्षा च तुसां बणी रेंगे तां तुसां जडा चांगे सै मंगा कने सै तुहाडे ताईं होई जाणा। 8 मेरे पिता परमेश्वर दी महिमा इसी ने होंदी है, की तुसां बडा जादा फल लोंगे, ऐई तुहाडा मेरे चेले होणे दा सबूत है। 9 जियां पिता परमेश्वरे मिजो ने प्यार रख्या, तियां ही मै भी तुहांजो ने प्यार किता, मेरे प्यारे च बणी रिया। 10 अगर तुसां मेरे हुक्मा जो मंनगे, तां मेरे प्यारे च बणी रेंणा जियां की मै अपने पिता परमेश्वरे दे हुक्मा जो मनया है, कने उदे प्यारे च बणी रेंदा है। 11 मै ए गल्लां तुहांजो इस ताईं बोलियां न, ताकि तुसां च भी सेईं खुशी हो जडी मिजो च है, कने तुहाडी खुशी पुरी होई जा। 12 मेरा हुकम ऐ है, की जियां मै तुसां ने प्यार रखया है तियां ही तुसां भी इकी दुज्जे ने प्यार रखा। 13 कुसी बाल ऐ

दसणे ताईं की सै अपने मित्रां ने प्यार करता है, इसला बडा होर कोई तरिका नी है की सै अपने मित्रां जो बचणे ताईं अपनी जान देई दे। 14 जडा भी हुकम मै तुहांजो दिन्दा है, अगर तुसां उसयो करन, तां तुसां मेरे मित्र न। 15 हण मै तुहांजो सेवक नी बोलणा, क्योंकि सेवक नी जाणदा है, की उदा स्वामी क्या करता है: पर मै तुहांजो मित्र बोलया है, क्योंकि मै जडियां गल्लां अपने पिता परमेश्वरे ला सुणियां, सै सारियां तुहांजो दस्सी दितियां न। 16 तुसां मिजो नी चूंणया है पर मै तुहांजो चूंणया है कने तुहांजो नियुक्त कितया है ताकि तुसां जाई करी फल देन; कने तुहाडा फल टिकाऊ रे, ताकि तुसां मेरे चेले न, इस ताईं जडा कुछ तुसां मेरे ना ने मंगगे, सै तुहांजो दे। 17 इना गल्लां दा हुकम मै इस ताईं दिन्दा है, ताकि तुसां इकी दुज्जे ने प्यार रखन। 18 अगर संसार दे लोक तुहांजो ने बैर रखदे न, तां तुसां जाणदे न, की इना तुसां ला पहले मिजो ने भी बैर रखया। 19 अगर तुसां संसारे दे लोकां साईं होंदे, तां संसारे दे लोक अपणयां ने प्यार करते न, पर इसा बजा ने की तुसां इस संसारे दे लोकां ने रिश्ता नी रखदे, कने मै तुहांजो इस संसारे ला चूंणया है, इस ताईं संसारे दे लोक तुहांजो ने बैर रखदे न। 20 जडा मै तुसां जो दसया है, सेवक अपने मालिके ला बडा नी होंदे है, इसयो याद रखा अगर उना मिजो सताया, तां तुहांजो भी सताणां है; अगर उना मेरियां शिक्षा जो मनया, तां तुहाडी शिक्षा जो भी मणणा। 21 पर ए सारा कुछ लोकां इसा बजा ने तुहाडे सोगी करणा क्योंकि तुसां मेरे चेले न, कने सै मेरे भेजणे बाले परमेश्वरे जो नी जाणदे न। 22 अगर मै नी ओदा कने उना ने गल्लां नी करता, तां सै पापी नी बणदे पर हण उना जो उना दे पापां ताईं कोई भाना नी। 23 जडा मिजो ने बैर रखदा है, सै मेरे पिता परमेश्वर ने भी बैर रखदा है। 24 अगर मै उना च सै चमत्कार नी करता, जडे कुनी होरनी नी किंते तां सै पापी नी बणदे, पर हण उना मिजो दिखी लिया है फिरी भी सै मिजो कने मेरे पिता परमेश्वरे दोनो ने बैर करते न। 25 ऐ इस ताईं होया की जडा उना दे पबित्र शात्र च लिखया है ऐ इना गल्लां जो पूरा करता है, उना बिना कुसी बजा ने मिजो ने नफरत किती। 26 पर जालू सै मददगार ओणा, जिसयो मै तुहाडे बाल पिता परमेश्वरे दिया तरफ ला भेजगा, मतलब की सच्च दी आत्मा जडी पिता परमेश्वरे दिया तरफ ला निकलदी है, तां उनी मेरी गबाई देणी। 27 कने तुसां भी गबाह न क्योंकि तुसां शुरू ला मेरे सोगी न।

**16** ऐ गल्लां मै तुहांजो ने इस ताईं बोलियां की कुथी तुसां भरोसा करणा ना छडी देन। 2 उना तुहांजो यहदी जंज घर ला कडी देणा, कने सै बकत ओणा है, की अगर कोई तुहांजो मारी दिगा, तां तुहाडे हत्यारे ऐ समझणा है की सै परमेश्वरे दी सेवा करा दा है। 3 कने उना ऐ इस ताईं करणा क्योंकि उना ना पिता परमेश्वर जो जाणया है कने ना ही मिजो जाणदे न। 4 पर मै ए गल्लां इस ताईं तुसां ने बोलियां, ताकि जालू उना दा बकत ओए तां तुहांजो याद आई जा, मै ऐ सब तुसां जो शुरू च इस ताईं नी बोलया, क्योंकि उस बकत मै तुहाडे सोगी था। 5 हण मै अपने भेजणे बाले बाल जाणा है कने तुसां च कोई मिजो ला नी पछदा है, की मै कुथू चलया है? 6 पर मै जडियां ऐ गल्लां तुसां ने बोलियां न, इस ताईं तुहाडा मन बडा दुखी होया है। 7 तमी मै तुसां ने सच्च बोलदा है, की मेरा जाणा तुहाडे ताईं खरा है, क्योंकि अगर मै नी जांगा, तां उनी दिलासा देणेबाले तुहाडे बाल नी ओणा, पर अगर मै जांगा, तां उसयो तुहाडे बाल भेजी दिगा। 8 कने उनी आई करी संसारे दे लोकां जो पाप कने धार्मिकता कने न्याय दे बारे च यकीन दिलाणा। 9 पापे दे बारे च यकीन दिलाणा की सै मिजो पर भरोसा करणे ने मना करते न; 10 कने ऐ साबित करता है की यीशु धर्मी था, इस ताईं की मै पिता परमेश्वर बाल चलया है, कने तुसां मिजो फिरी नी दिखणा है, 11 कने न्याय दे बारे च भी यकीन दिलाणा की इस संसारे दे सरदार शैताने जो दोषी ठहरया है। 12 मै तुहांजो ने होर भी मतियां गल्लां बोलणा चांदा है, पर हले तुसां इना जो सेहन नी करी सकदे न। 13 पर जालू सै मतलब की सच्च दिया आत्मा ओणा है, तां आत्मा तुसां जो परमेश्वर दे बारे च जडा सच्च है सै समझणा है, क्योंकि उनी अपने अधिकारे ने नी बोलणा है, पर जडा कुछ परमेश्वरे ला सुणगा, सै ही उनी बोलणा है, कने होणे बालियां गल्लां तुहांजो दसणियां। 14 उनी मेरी महिमा करणी, क्योंकि उसयो मेरिया तरफ ला जडा मिलया है, उनी तुसां जो सै ही सिखाणा। 15 जडा कुछ पिता परमेश्वर दा है, सै सब मेरा है; ताईं तां मै बोलया था की, उनी मेरियां गल्लां च लेईकरी तुहांजो दसणा है। 16 "थोडे बकते च तुसां मिजो नी दिखणा, कने

फिरी थोड़ी देरा च तुसां मिजो दिखणा है।” 17 तालू उदे कितणयां ही चेलयां अपु चे बोलया, “ऐ क्या है, जडा से सांझो ने बोला दा है, थोड़े बकते च तुसां मिजो नी दिखणा, कने फिरी थोड़ी देरा च तुसां मिजो दिखणा है? कने ऐ इस ताई की मैं पिता परमेस्वर बाल चलया है?” 18 चले इकी दुज्जे ला पुछदे रे, “की सै क्या बोला दा है। क्या है ऐ थोड़े बकत बाद जिसदे बारे च सै बार-बार बोला दा है।” 19 यीशु ऐ जाणी करी, की सै मिजो ला इना गल्लां दा मलबल पृछणा चांदे न, उना जो बोलया, क्या तुसां अपु चे मेरिया इना गल्लां दे बारे च पृछा दे न, थोड़े बकते च तुसां मिजो नी दिखणा, कने फिरी थोड़ी देरा च तुसां मिजो दिखणा है? 20 मैं तुसां ने सच्च-सच्च बोलदा है; मेरिया मौता दे बाद तुसां रोणा कने दुखी होणा है, पर संसारे दे लोकां खुश होणा है: तुसां जो दुख होणा, पर जालू मैं मरी करी दुबारा जिन्दा होणा तालू तुहाडा दुख खुशी च बदली जाणा। 21 जालू जनानी बच्चे जो जमणा लगदी है तां उसा जो बडी पिढ होंदी है, क्योंकि उसा दे दुखे दी घडी आईयो है, पर जालू सै बच्चा जम्मो बोदी है तां इसा खुशिया ने की संसारे च इक माणु पैदा होया है, उस दुखे जो फिरी कदी याद नी करदी। 22 इयां ही हुण तुहांजो भी दुख है, पर मैं तुसां ने फिरी मिलणा है कने तुसां खुश होणा; कने तुहाडी खुशी तुहांजो ला कुनी नी खौणी। 23 जालू मिजो तुसां दोबारा दिखणा तालू मिजो ला कुछ नी पृछणा: मैं तुसां ने सच्च-सच्च बोलदा है, अगर पिता परमेस्वरे ला कुछ मंगगे, तां उनी मेरे चले होणे दिया बजा ने तुहांजो देणा। 24 हले दीकर तुसां मेरे नाऐ ने पिता परमेस्वरे ला कुछ नी मंगया; पर मंगगे तां मिलणा ताकि तुहाडी खुशी पूरी होई जा। 25 “मै तुहांजो ने ऐ गल्लां कहाणियां च बोलियां न, पर सै बकत ओणा है, की मैं तुसां ने होर कहाणियां च नी बोलणा है पर खुली करी पिता परमेस्वर दे बारे च दसणा। 26 उस बेले तुसां अपु मेरे नाऐ ने मंगणा, क्योंकि तुसां मेरे चले न कने मैं तुसां जो बोलदा है, की मैं तुहाडे ताई पिता परमेस्वर ने बिनती नी करणी। 27 क्योंकि मेरे पिता परमेस्वर तां अपु ही तुसां ने प्यार करता है, इस ताई की तुसां मिजो ने प्यार रखया है, कने ऐ भी भरोसा कित्ता की, मैं पिता परमेस्वर दिया तरफ ला निकलया है। 28 मैं पिता परमेस्वर ला निकली करी संसारे च आया है, फिरी संसारे जो छडी करी पिता परमेस्वरे बाल जाणा है।” 29 उदे चेलयां बोलया, “दिख, हुण तां तू खुली करी बोला दा है, कने कोई कहाणी नी बोली।” 30 हुण असां जाणी गियो न, की तू सारा कुछ जाणदा है, कने तिजो कुसी दी जरूरत ही नी की कोई तिजो ला सबाल पुच्चे, इसला असां भरोसा करदे न, की तू परमेस्वरे ला निकलया है। 31 ऐ सुणीकरी यीशु ऐ उना ने बोलया, “की क्या तुसां हुण भरोसा करदे न? 32 दिखा, सै बकत ओणा है बस आई रिया है की तुसां सारयां बख-बख होईकरी अपणे-अपणे रस्ते जाणा है, कने मिजो किल्ला छडी देणा है, तमी मैं किल्ला नी क्योंकि मेरा पिता परमेस्वर मेरे सोगी है। 33 मैं ऐ गल्लां तुसां ने इस ताई बोलियां न, ताकि तुसां जो अंदरूनी शांति मिल्ले क्योंकि तुसां मेरे सोगी रिशता रखया, संसार च तुहांजो दुख होणा है, पर सबर रखा, मैं इस संसारे च राज करणे बाले शैताने जो हराई दीतया है।”

**17** यीशु ऐ अपणे चेलयां ने ऐ गल्लां बोलणे बाद कने अपणियां नजरां स्वर्गें पासे करिके बोलया, पिता परमेस्वर, सै बकत आई गिया है, की तू अपणे पुत्रे दी महिमा कर, ताकि पुत्र भी तेरी महिमा करे, 2 क्योंकि तू मिजो सारयां लोकां पर हक दीतया है, की जिना जो तू मिजो दीतया है, उना सबना जो सै हमेशा दी जिन्दगी दे। (aionios g166) 3 कने हमेशा दी जिन्दगी ऐ है कि लोक तिजो जाणी सकन यानी कि इकलोते सच्चे परमेस्वरे जो। कने ऐ भी की सै मिजो जाणन, यानी यीशु मसीह जो, जिसयो तू भेजया है। (aionios g166) 4 जडा कम्म तू मिजो करणे जो दीतया था, उसयो पूरा करिके मैं धरतिया पर तेरी महिमा कित्ती है। 5 इस ताई पिता परमेस्वर तू मिजो अपणी महिमा ने महिमित कर, महिमा जडी संसारे दे होणे ला पहले मेरी महिमा तेरे सोगी थी। 6 मैं तुसां जो उना चेलयां पर प्रगत कितया है, जडे तुसां मिजो संसारे चे दीतयो न। सै तुहाडे थे, कने तू उना जो मिजो दिता। कने उना तेरे बचना जो मनया है। 7 हुण सै जाणी गियो न, की जडा कुछ तू मिजो दीतया है, सब कुछ तेरिया तरफ ला है। 8 क्योंकि जडा संदेश तू मिजो दिता, मैं उना जो उना बाल देई दिता कने उना इना गल्लां पर भरोसा कित्ता: कने सच्ची जाणी लिया है, की मैं तेरिया तरफ ला आया है, कने भरोसा करी लिया है की तू ही मिजो भेजया है। 9 मैं उना ताई बिनती करदा है, सिर्फ उना ताई

ही करदा है जडे तू मिजो दीतयो न कयोकि सै तेरे न। पर जडे संसारे ने रिशता रखदे न उना ताई बिनती नी करदा है। 10 कने जडा कुछ मेरा है सै सब कुछ तेरा है; कने जडा तेरा है सै मेरा है; इना ने मेरी महिमा प्रगत होई है। 11 हुण मैं संसारे च नी रेंणा है, कने मैं तेरे बाल ओआ दा है पर मेरे चेलयां इस संसारे च रेणा है; हे पबित्र पिता, अपणे नाऐ दिया शक्तिया ने उना दी रक्षा कर, ताकि उना दा इक ही मन हो जियां साडा इक ही मन है। 12 जालू मैं उना सोगी था, तां मैं तेरे उस नाऐ ने जडा तू मिजो दीतया है, उना दी रक्षा कित्ती। मैं उना दी देख रेख कित्ती, कने बिनाशे दे पुत्रे जो छडी करी उना चे कूसदा भी नाश नी होया, इस ताई की पबित्र शाश्वे च लिखियो गल्ल पुरी हो। 13 पर हुण मैं तेरे बाल ओणा है, कने ऐ गल्लां मैं संसारे च रेंदे होए बोलदा है, ताकि उना जो मेरी खुशी भरपूरी ने मिल्ले। 14 मैं तेरा संदेश उना बाल पुजाई दीतया है, कने संसारे दे लोकां उना ने बैर कित्ता, कयोकि जियां मैं संसार दा नी है, तियां ही से भी संसारे दे नी न। 15 मैं ऐ बिनती नी करदा, की तू उना जो संसारे ला चुकी ले, पर ऐ की तू उना दी शैताने ला रक्षा कर। 16 जियां मैं संसारे दा नी है, तियां ही से भी इस संसारे दे नी न। 17 तेरा बचन सत्य है। उना जो सच्चाई च अपणे ताई लग कर। 18 जियां तू मिजो संसारे च भेजया, तियां ही मैं भी इना जो संसारे च भेजया है। 19 कने मैं उना दे फायदे ताई अपणे आपे जो पबित्र करदा है ताकि सै भी सच्च ने पबित्र होन। 20 मैं बस अपणे चेलयां ताई ही बिनती नी करदा है, पर जडे इना दी शिक्षा ने मिजो पर भरोसा करगे उना ताई भी बिनती करदा है। 21 की सै सारे इक होन; जियां पिता तू मिजो च है, कने मैं तिजो च है, तियां ही से भी सांझो च होन, इस ताई की संसार दे लोक भरोसा करन, तू ही मिजो भेजया है। 22 कने सै महिमा जडी तू मिजो दीती, कने मैं उना जो दीतियो है की सै तियां ही इक होन जियां असां इक न। 23 मैं उना च कने तू मिजो च ताकि सै सिद्ध होईकरी इक होई जान, कने संसार जाणे की तू ही मिजो भेजया है, कने जियां तू मिजो ने प्यार रखया है, तियां ही उना ने भी प्यार रख। 24 पिता परमेस्वर, मैं चांदा है की जिना जो तू मिजो दीतयो है, जिथू मैं है, ओथु भी मेरे सोगी होन ताकि सै मेरिया उसा महिमा जो दिखन जडी तू मिजो दीतयो है, कयोकि तू मिजो संसारे दे बणने ला पहले ला ही मिजो ने प्यार रखया है। 25 हे धार्मिक पिता, संसारे दे लोकां तिजो नी जाणया, पर मैं तिजो जाणदा है कने चेलयां भी जाणया की तू मिजो भेजया है। 26 कने मैं तेरा ना उना जो दसया कने दसदे रेंणा है ताकि जडा प्यार तिजो मिजो ने था, सेई उना चेरे कने मैं उना च रेणा।

**18** जालू यीशु ऐ प्रार्थना करणे बाद अपणे चेलयां सोगी किद्रोन दे नाल्ले पार गिया। ओथु इक बाग था, यीशु कने उदे चले उस बागे दे अंदर गे। 2 उसयो पकडबाणे बाला यहदा भी उसा जगा जो जाणदा था, कयोकि यीशु ओथु अपणे चेलयां सोगी चांदा था। 3 तालू यहदा, सिपाईयां दी इक ठोलिया सोगी कने बड़े याजकां कने फरीसियां दे सेवकां जो लेईकरी उस बागे च आया कने हथां च दिव्ये, मशालां, कने हथियार लियो थे। 4 तालू यीशु, उना सबना गल्लां जो जाणी करी जडियां उसने होणे बालियां थियां, अगे आई करी उना ला पुछया, की कुसयो तोपा दे न? 5 उना उसयो जबाब दिता, “नासरत नगर ला यीशु ऐ जो।” यीशु ऐ उना जो बोलया, की मैं ही यीशु है। उसयो पकडबाणे बाला यहदा भी उना सोगी खडोतया था। 6 यीशु ऐ जो ऐसा बोलदे ही, की मैं ही नासरत दा यीशु है, सै पिच्छे हटी करी धरतिया पर देई। 7 तालू यीशु ऐ उना ला फिरी पुछया की, तुसां कुसयो तोपा दे न, “उना बोलया, नासरत नगर दे यीशु जो।” 8 यीशु ऐ जबाब दिता, “मैं तां तुसां जो बोली बैठया है की हौं मैं ही यीशु है, अगर तुसां मिजो तोपा दे न तां इना लोकां जो जाणा दिया, ऐ मेरे चले न।” 9 ऐसा इस ताई होया की, यीशु ऐ जडा पहले बोलया था सै सच्च होई जा: “जिना जो तू मिजो दीतया है उना चे मैं इकी जो भी नी गबाया है।” 10 तालू शमीन पतरसे अपणी तलवार कडी कने, महायाजके दे इकी नोकरे पर चलाई दिती कने उस दा इक कन उडाई दिता। उस सबके दा ना मलखूस था। 11 तालू यीशु ऐ पतरसे ने बोलया, “अपणिया तलवारा जो मयाना च रख। जडा कटोरा मेरे पिता परमेस्वरे मिजो दीतया है, क्या मैं उसयो नी पिये?” 12 तालू सिपाईयां कने उना दे सबेदारां कने यहदी अगुवां दे नोकरां यीशु जो पकडी करी बन्नी दिता, 13 कने पहले उसयो हन्ना बाल लेई गे, कयोकि सै उस साले दे महायाजक कैफा दा सौरा था। 14 ऐ सेई कैफा नाऐ दा इक माणु था, जिनी यहदी अगुवां जो सलाह दिती थी की साडे लोकां ताई मरणा



इक माणुए दा खरा है। 15 शमौन पतरस कने इक होर चेला भी यीशुए दे पिच्छे चली पे, इस चेले जो महायाजक जाणदे पछेणदे थे। इस ताई सै यीशुए पिच्छे-पिच्छे महायाजक दे अंगणे दीकर गिया, 16 पर पतरस बाहर दरबाजे पर खडोई रिया, तालू सै दुज्जा चेला जिसयो महायाजक जाणदे थे सै बाहर आया, कने उनी दरबाजे पर खडोतियो नोकराणियां जो बोली करी पतरसे जो अंदर लेई ओदा। 17 उना नोकराणिया जडी दरबाजे पर खडोतियो थी, पतरसे जो बोल्या, “की तू भी इस माणुए दे चेलयां चे तां नी ऐ?” उनी बोल्या, “मै नी है।” 18 सर्दियां दिया बजा ने मंदरे दे रखबाले कने सिपाई अगग बाली करी तथा दे थे, कने पतरस भी उना सोगी खडोई करी अगग तथा दा था। 19 तालू महायाजके यीशुए ला उदे चेले कने उदे उपदेशां दे बारे च पछताछ किति। 20 यीशुए उसयो जबाब दिता, “मै सबना च खुली करी गल्लां कितियां, मै यहदी जंज घर कने मंदरे च जाई करी हमेशा उपदेश दिता जिथु यहदी गिठे होंदे थे, कने कुछ भी लुकी करी कुछ नी बोल्या। 21 तू मिजो ला ऐ सबाल कजो पूछा दा है? सुणने बालयां ला पुछ की मै उना ने क्या बोल्या है? सै जाणदे न की मै क्या-क्या बोल्या है।” 22 जालू यीशुए ऐसा बोल्या, तां बखे खडोतयो मंदरे दे रखबालयां चे इक्की रखबाले, यीशुए जो थपड मारी करी बोल्या, “क्या तू महायाजक जो इयां जबाब दे दा?” 23 यीशुए उसयो जबाब दिता, अगर मै गलत बोल्या, तां साबित कर की मै गलत बोल्या; पर अगर खरा बोल्या है तां मिजो कजो मारा दा है। 24 यीशुए अजे भी बनया ही था, कने हन्ने उसयो तियां ही कैफा महायाजक बाल भेजी दिता। 25 शमौन पतरस खडोई करी अगग तथा दा था, तालू उस सोगी खडोतयो लोकां उसयो पुछया की, “कुथी तू भी तां उदे चेलयां चे तां नी है?” उनी बोल्या, “मै नी है।” 26 महायाजक दे नोकरां चे इक्की नोकरे, जडा उदा रिशतेदारां चे था, कने उदा कन पतरसे बडी दितया था, उनी बोल्या की तिजो तां मै यीशुए सोगी बागे च नी दिखया था? 27 पतरसे फिरी मना करी दिता, कने तालू झट भुंगं बाग देई दिती। 28 फिरी यहदी लोक यीशु जो कैफा बाल लेई आणे कने किल्ले जो लेई गे, ऐ रोमी राज्यपाल पिलातुस दा मेहल था, कने ब्यागा दा बकत था पर सै अपु किल्ले अंदर नी गे अगर जादे तां उना अशुद्ध होई जाणा था, क्योकि पिलातुस यहदी नी था। अगर अशुद्ध होई जादे तां फसह दी रोटी नी खाई सकदे थे। 29 तालू पिलातुस बाहर निकली करी उना बाल आया कने बोल्या लग्गा, “तुसां इस माणुए पर कुसा गल्लां दा आरोप लगा दे न?” 30 उना उसयो जबाब दिता, अगर ऐ अपराधी माणु नी होंदा तां असां इसयो तरे बाल नी लोंदे। 31 पिलातुसे उना जो बोल्या, “तुसां ही इसयो लेईजाई करी अपणिया व्यवस्था दे अनुसार इसयो सजा दिया।” यहदी अगुवां उसयो बोल्या, “की सांझो कोई हक नी है की असां कुसी जो मौत दी सजा देई सकन।” 32 ऐ इस ताई होया की यीशु दी सै गल्ल पूरी हो जडी उनी ऐ इशारा करदे बोली थी मेरी मौत कियां कुस तरीके ने होणी है। 33 तालू पिलातुस फिरी किल्ले दे अंदर गिया, कने यीशुए जो अंदर सदीकरी पुछया, “तू क्या यहदी लोकां दा राजा है?” 34 यीशुए जबाब दिता, “तू क्या ऐ गल्ल अपणिया तरफ ला बोला दा है, की कुनी होरनी ऐ गल्ल तिजो मेरे बारे च बोली है?” 35 पिलातुसे जबाब दिता, “तू जाणदा है की मै यहदी नहीं है? तेरिया ही जाति कने बड़े याजकां तिजो मेरे हथे दितया है, तू क्या कितया है?” 36 यीशुए जबाब दिता, मेरा राज्य इस संसारे दा नी है, अगर मेरा राज्य इस संसारे दा होंदा तां मेरे चेलयां लडणा था, कने मै यहदी अगुवां दे हथे गिरफ्तार नी होंदा: पर मेरा राज्य ऐथू दा नी है। 37 पिलातुसे उसयो बोल्या, तू क्या राजा है? यीशुए जबाब दिता, “तू बोलादा है, की मै राजा है, मेरा जन्म लेणा कने संसार च ओणे दी बजा ऐ है की मै सच्च दे बारे च सिखाई सके। जडा कोई परमेखरे ने सच्चा प्यार करदा है, कने मेरा बचन सुणदा है।” 38 पिलातुसे उसयो बोल्या, “सच्च क्या है?” ऐ बोली करी सै फिरी यहदी अगुवां बाल चली गिया कने उना ने बोल्या, “मिजो उदे च कोई भी दोष नी लग्गा दा है। 39 पर तुहाडा ऐ रिबाज है की मै फसह दे त्योहारे च तुहाडे तां ईक कैदी छडी दें। तुसां क्या चांदे न की मै तुहाडे तां ईक यहदियां दे राजे जो छडी दें?” 40 तालू उना फिरी जारे ने बोल्या, “इसयो नी, पर साडे तां ईक बरअब्बा जो छडी दे।” कने बरअब्बा इक डाकु था।

**19** इसा गल्ला पर पिलातुसे सिपाईयां जो हुकम दिता की यीशुए जो लेई जा कने कोडे मारा। 2 कने सिपाईयां कंडयां दा मुकट बनाया कने उदे सिरे

पर रखया, कने उसयो बैगणी कपडे पेनाऐ, 3 कने उदे बखे आई करी बोल्या लग्गे, नमस्ते, यहदियां दे राजा कने उसयो थपड मारे। 4 तालू पिलातुसे फिरी बाहर निकली करी लोकां ने बोल्या, “मै उसयो तुहाडे बाल फिरी लोंदा है, ताकि तुहांजो पता लग्गे की मिजो इदे च कुछ भी गलत नजर नी आया।” 5 तालू यीशुए जो कंडयां दा मुकट कने बैगणी कपडे पेनाई करी बाहर लांदा कने पिलातुसे उना ने बोल्या, “इस माणुए जो दिखा।” 6 जालू बड़े याजकां कने मंदरे दे रखबालयां उसयो दिखया, तां चीलाई करी बोल्या, “इसयो सूली पर चडा, सूली पर चडा।” पिलातुसे उना जो बोल्या, “तुसां ही इसयो सूली पर चडा, क्योकि मिजो इदे च कुछ भी गलत नी मिल्ला है।” 7 यहदी अगुवां उसयो जबाब दिता, “साडी भी व्यवस्था है कने उसा व्यवस्था दे अनुसार सै मारी देणे दे जोगा है क्योकि उनी अपने आपे जो परमेखरे दा पुत्र बोल्या है।” 8 जालू पिलातुसे ऐ गल्ल सुणी तां सै होर भी जादा डरी गिया। 9 कने फिरी किले दे अंदर गिया कने यीशुए जो बोल्या, “तू कुथु दा है? पर यीशुए उसयो कोई ही जबाब नी दिता।” 10 पिलातुसे उसयो बोल्या, “मिजो ने कनी बोला दा है? क्या तू जाणदा नी की तिजो छडणे दा हक मिजो है कने तिजो सूली पर चडाणे दा हक भी मिजो है।” 11 यीशुए जबाब दिता, “अगर तिजो परमेखर दिया तरफ ला नी दितया होंदा, तां तेरा मिजो पर कोई हक नी होंदा, इस तां ई जिनी मिजो तेरे हथे पकडाया है, उदा पाप जादा है।” 12 ऐ जबाब सुणीकरी पिलातुसे उसयो छडणा चाया, पर यहदियां चीलाई-चीलाई करी बोल्या, “अगर तू इसयो छडी दिगा तां तू महाराजा कैसरे दा मित्र नी है; जडा कोई भी राजा होणे दा दांबा करदा है कने अपने आपे जो राजा बोलादा है सै महाराजा दा दुश्मन है।” 13 ऐ गल्लां सुणीकरी पिलातुस यीशुए जो बाहर लेई आया कने न्याय दे सिंहासने पर बैठा, कने सै जगा इक चबूतरा था जिसयो इज्जानी भाषा च गबन्ता बोलदे न। 14 ऐ फसह दे त्योहारे दे हफते सबते दिया तयारियां दा रोज था कने दोपहर दे बकते: तालू उनी यहदी लोकां जो बोल्या, “ऐ ही है, तुहाडा राजा।” 15 पर सै चिलाणा लग्गे, इसयो मारी दे, इसयो मारी दे! कने इसयो सूली पर चडा। पिलातुसे उना जो बोल्या, क्या मै तुहाडे राजे जो सूली पर चडा? बड़े याजकां जबाब दिता, “महाराजा जो छडी करी साडा होर कोई राजा नी है।” 16 तालू पिलातुसे यीशुए जो उना दे हबाले करी दिता ताकि सै उसयो सूली पर चडाण। 17 तालू सै यीशुए जो लेई गे। उना यीशुए ला अपणी सूली अपु चुकबाई कने उसयो यरूशलेम शेर दे बाहर खोपडी नाऐ दिया जगा जो लेई गे, कने जिसयो इज्जानी भाषा च गुलगुता बोलदे न। 18 ओथु उना उसयो कने उदे सोगी दो माणुए जो सूली पर चढाया, इकी जो इक पास्से कने, दुजे जो दुपे पास्से, कने बिच यीशुए जो। 19 कने राज्यपाल पिलातुसे इक्की फटिया पर लिखी करी सुलिया पर लगाई दिती कने उसा पर ऐ लिखया था, “नासरत दा यीशु मसीह यहदियां दा राजा।” 20 ऐ फटी मते यहदियां पडी क्योकि जिथु यीशुए जो सूली पर चढाया था सै जगा यरूशलेम शेर दे बखे थी कने इज्जानी भाषा च कने लतीनी भाषा कने युनानी भाषा च लिखियो थी। 21 तालू यहदियां दे बड़े याजक पिलातुसे बोल्या, “यहदियां दा राजा मत लिख पर ऐ की उनी बोल्या, मै यहदियां दा राजा है।” 22 पिलातुसे जबाब दिता, “मै जडा लिखी दितया है, सै नी बदलया जाणा है।” 23 जालू सिपाई यीशुए जो सूली पर चडाई बैठे, तां उदे कपडे लेईकरी उना चार हिसयां च किते, चारो सिपाईयां तां ईक-ईक हिसा कने कुरता भी लेई लिया, पर कुरते जो सितया नी था पर सै उपरे लेईकरी थले दीकर इक ही कपडे ने बुणया था। 24 इस तां ई उना अपु चे बोल्या, “असां ऐ नी फाडना, पर इदे पर पर्चियां पांदे न की ऐ कुसदा होणा।” ऐ इस तां ई होया, ताकि पबित्र शाब्दे च लिखया गिया सच्च हो, “उना मेरे कपडे अपु चे बंडी ले कने मेरे कपडयां पर पर्चियां पाईयां, कने सिपाईयां इयां ही किता।” 25 पर यीशुए दे सूली बाल उदी माता कने उदिया माता दी बेहण, क्लोपास दी घरे बाली मरियम कने मगदल ग्रां दी मरियम खडोतियो थी। 26 यीशुए अपणिया माता जो कने उस चेले जो जिसने सै प्यार रखदा था उसयो बखे खडोतया दिखीकरी अपणी माता ने बोल्या, “हे नारी, दिख, ऐ तेरा पुत्र है।” 27 तालू उनी चेले बोल्या, “ऐ तेरी माता है।” कने उसी बेले सै चेला, उसा जो अपने घरे लेई गिया। 28 इदे बाद यीशुए ऐ जाणी करी की मेरा सारा कम्म खत्म होई गिया है, इस तां ई की पबित्र शाब्दां दियां गल्लां सच्च साबित होन बोल्या, “मै तरिणा है।” 29 ओथु इक सिरके ने बस्या बांडा रखया

था, तां उना चे कुनकी सिरके ने सेडयो स्पंजे जो जुफे दे रूडे दे डंडे पर रखीकरी उडे मुरे ने लाया। 30 जालू यीशुए सै सिरका चखया, तां बोलया, “परा होया,” कने सर झुकाई करी अपने प्राण छडी दिते। 31 हण ऐ तैयारिया दा दिन था, कने अगले दिन सब्त कने फसह दोनों ही थे। ऐ यहूदी लोकां तांई इक खास दिन था, सै नी चांदे थे इस दिने लाशा सूली उपर रेन। इस तांई उना पिलातसे ने बोलया की उना माणुआं दियां जंगा तोडी दिया ताकि उना दी मौत झट होई जा ताकि लाशां जो थले उतारया जाई सके। 32 तां सिपाईयां आई करी पेहले बाले दियां जंगा तोडियां फिरी दुजे दियां भी, जडे यीशुए सोगी सूली पर चढायो थे। 33 पर जालू यीशुए बाल आई करी दिखया की सै मरी गया है, तां उदियां जंगा नी तोडियां। 34 पर सिपाईयां चे इकी बरखे ने उदा पंजर बेधया कने उदे च खन कने पाणी निकलया। 35 जिनी माणुए ऐ सब दिखया, उनी ऐ गबाई दिती है, ताकि तुसां भी यीशुए पर भरोसा करी सकन। कने उदी गबाई सच्ची है, कने सै जाणदा है, की सच्च बोला दा है। 36 ऐ गल्लां इस तांई होईयां की पबित्र शास्त्रे च जडा लिखया है सै सच्च होई जा, “उदी कोई हूदी नी तोडी जाणी।” 37 फिरी इक होर जगा पबित्र शास्त्रे च लिखया है, “जिसयो उना बेधया है, उदे पर नजर कर्णी।” 38 इना गल्लां दे बाद अरिमतिया शेहरे दे यूसुफे, जडा यीशुए दा चेला था, (पर यहूदी अगुवां दे डरे ने इसा गल्ला जो लुकाई रखदा था), उनी पिलातसे ने बिनती कीती, की मैं यीशुए दिया लाशा जो लेई जां, कने पिलातसे उदी बिनती सुणी, कने सै आई करी उदी लाशा जो लेई गया। 39 नीकुदेमुस भी जडा पेहले यीशुए बाल राती गया था कने लगबग तेती किलो गन्धस कने एलबा लेई आया। 40 तालू इना दोनों यीशुए दी लाशा लेई कने यहूदियां दे रिबाजे ने उस पर सै मुस्का बालियां चिंजा लगाई करी कपडे दियां पट्टियां च लपेटया। 41 उसा जगा पर जिथू यीशु सूली पर चढाया था, ओथु इक बारी थी; कने उसा सो बारिया च इक नोई कबर थी, उसा च पेहले कदी कोई नी दफनाया था। 42 इस तांई उना यीशुए जो उसा कबरा दिया गुफा च रखी दिता क्योकि सै बखे ही थी कने सै यहूदियां दे सब्त दी तैयारिया दा दिन भी था।

**20** तुआरे ब्यागा तडके मरियम जडी मगदल गां दी थी, सै कने उसा सोगी होर भी जनानियां कबरा पर आईयां, उना कबरा दे दरबाजे ला पथरे जो हटया दिखया। 2 तालू सै दोडी कने शमौन पतरसे कने उसी दुऐ चेले बाल जिसने प्रभु प्यार रखदा था, आई करी बोलया, “सै प्रभु यीशुए दी लाशा जो कबरा ला कडी लेई गे; कने मैं नी जाणदी की उसयो कुथु रखया है।” 3 तालू पतरस कने सै दुज्जा चेला कबरा पासे चलती पे। 4 कने दोनो सोगी-सोगी दोडयो थे, पर दुआ चेला पतरसे ला तेज दोडी करी पेहले कबरा पर पुज्जी गया। 5 कने निठा होईकरी अंदर दिखया की ओथु कपडे दियां पट्टियां दा डेर लगया था: पर सै अंदर नी गया। 6 तालू उदे पिच्छे-पिच्छे शमौन पतरस भी पुज्जी गया कने कबरा दे अंदर गया कने कपडे पियो दिक्खे। 7 कने सै अंगोछा जडा सिर पर लपेटया था, सै कपडे सोगी नी पिया था पर सै इक लग जगा च मिल्ला। 8 तालू दुआ चेला भी जडा कबरा च पेहले पुजया था, अंदरे जो गया कने दिखीकरी भरोसा किता कि यीशु मरयां चे जिन्दा होई गया था। 9 पबित्र शाशां च यीशु दे बारे च ऐ लिखया था की उनी मरणे बाद जिन्दा होणा है, पर सै हले दीकर नी समझी पायो थे। 10 तालू सै चेले अपने घरे जो बापस चलती गे। 11 पर मरियम रोदी होई कबरा दे बाहर ही खडोई रेई कने रोदे-रोदे कबरा पासे निठे होईकरी, 12 दो स्वर्गदां जो चमकदे कपडे पाई करी इकी जो सोदिया कने दुज्जे जो पोंदियां बैठया दिखया, जिथू यीशुए दी लाशा रखियो थी। 13 स्वर्गदां मरियम ला पुछया, ओ जनानियो, तू कजो रोआ दी है? उनी उना जो बोलया, “सै मेरे प्रभु दिया लाशा जो चुकी लेई गे कने मिंजो नी पता की उसयो कुथु रखया है।” 14 ऐ बोलणे दे बाद सै पिच्छे मुडी कने यीशुए जो खडोतया दिखया कने पछेणया नी की सै यीशु है। 15 यीशुए उसा ने बोलया, जनानियो तू कजो रोदी है? कुसयो तोपा दी है? उना माली समझीकरी उसयो बोलया, “श्रीमान जी, अगर तू उदे शरिरे जो चुकया है तां मिंजो दसी दे की कुथु रखया है कने मैं उसयो लेई जांगी।” 16 यीशुए उसा जो बोलया, मरियम। उना उस पासे मुडी करी उसला इज्जानी भाषा च बोलया, गुरू जी। 17 यीशुए उसा जो बोलया, “मेरे पैरां च पेईकरी मिंजो मत रोक क्योकि मैं हले दीकर उपर पिता परमेस्वर बाल नी गया है, कने मेरे चेलयां बाल जाई करी

उना जो बोली दे, की मैं अपने पिता, कने तुहाडे पिता, कने अपने परमेस्वर, कने तुहाडे परमेस्वरे बाल उपर चलयया है।” 18 मरियम जडी मगदल गां दी थी उना जाई करी चेलयां जो दसया, “मैं प्रभु जो दिखया, कने उनी मिंजो ने गल्लां कितियां।” 19 उसी तुआरे दिया सझा बेले सारे चेले इकी जगा गिठे होए, उना दरबाजे बंद करी ले क्योकि यहूदी अगुवां ला डरयो थे, तालू यीशु आया कने बिच खडोई करी उना जो बोलया, “तुहांजो शांति मिल्ले।” 20 कने ऐ बोली करी उनी अपने हथां कने पैरां दे जखम दस्से: तालू चेले प्रभु जो दिखीकरी खुश होए। 21 यीशुए फिरी उना जो बोलया, “तुहांजो शांति मिले; जियां पिता परमेस्वरे मिंजो संसार च भेजया है, तियां ही मैं भी तुहांजो संसारे च भेजा दा है।” 22 ऐ बोली करी उनी उना पर फुंक मारी कने बोलया, “पबित्र आत्मा जो अपनाओ। 23 अगर तुसां कुसी दे पाप माफ करगे, उना दे पाप माफ होए न, कने जिना दे पाप तुसां माफ नी करगे, उना अपने पापां च फसी रेणा है।” 24 पर बाहरां चेलयां चे इक माणु थोमा जिसयो दिदुमुस बोलदे न, जालू यीशु आया तां सै उना सोगी नी था। 25 जालू होर चेले उसला बोलणा लग्गे, असां प्रभु जो दिखया है, तालू उनी उना जो बोलया, “जालू दीकर मैं उदे हथां च मेखां दे जखम कने उना मेखां दे छेदां च कने उदे पसलियां च हथ नी पाई लेणा, तालू दीकर मैं भरोसा नी करणा की सै मरयां च जिन्दा होई गया है।” 26 अठां रोजा बाद उदे चेले फिरी घरे अंदर थे, कने थोमा उना सोगी था, कने दरबाजे बंद थे, तालू यीशुए आई करी कने बिच खडोई करी बोलया, “तुहांजो शांति मिल्ले।” 27 तालू उनी थोमा जो बोलया, अपणिया उगलियां ने मेरे हथां जो छूईकरी दिख कने अपने हथे जो अगो करी के मेरियां पसलियां च पा; कने शक करणा बंद कर कने भरोसा कर की मैं मरयां चे जिन्दा होई गया है। 28 ऐ सुणीकरी थोमे जबाब दिता, “मेरे प्रभु जी, मेरे परमेस्वर।” 29 यीशुए उसयो बोलया, “तू तां मिंजो दिखीकरी भरोसा किता है। धन्य न सै जडे बिना दिखयो मिंजो भरोसा करदे ना।” 30 यीशुए होर भी चमत्कार चेलयां दे सामणे दस्से, जडे इसा कताबां च नी लिखयो न। 31 पर ऐ इस तांई लिखयो न, ताकि तुसां भरोसा करन, की यीशु ही परमेस्वरे दा पुत्र मसीह है: कने उस पर भरोसा करी के उदे नाए ने तुहांजो हमेशा दी जिन्दगी मिल्ले।

**21** इना गल्लां दे बाद यीशुए अपने आपे जो तिबिरियास झिला दे बखे चेलयां जो दर्शण दिते कने इस तरीके ने दर्शण दिते। 2 शमौन पतरस कने थोमा जिसयो दिदुमुस बोलदे न, कने गलील प्रदेश दे काना शेहरे दा नतनएल कने जब्दी दे पुत्र, कने उदे चेलयां चे दो जणे होर गिठे होए थे। 3 शमौन पतरसे उना जो बोलया, मैं मछियां पकडना चलाया है। उना उसला बोलया, “असां भी तरे सोगी चलदे ना।” तां सै निकली करी किस्तिया पर चढी गे, पर उसा राती उना कुछ नी पकडया। 4 अगले दिने ब्याग होंदे ही यीशु कनारे पर खडोतया था, पर चेलयां उसयो पछेणया नी की ऐ यीशु है। 5 तालू यीशुए उना जो बोलया, हे मेरे प्यारो, क्या तुहाडे बाल कुछ खाणे जो है? उना जबाब दिता, “नी।” 6 यीशुए उना जो बोलया, “किस्तिया दे सजे पास्से जाल फेका, तां मिलणियां।” तालू उना जाल फेकया, कने हण मछियां जादा होणे दिया बजा ने उना ला जाल नी खिची होया। 7 इस तांई उस चेले ने जिसने प्रभु प्यार रखदा था पतरसे जो बोलया, “ऐ तां प्रभु है।” जालू शमौने ऐ सुणया की प्रभु यीशु है, तां उनी अपने सै कपडे पाई ले जडे उनी कम्म करदे बेले उतारी दितयो थे कने पाणियो च छाल लेई दिती। 8 पर होर चेले डोंगिया पर मछियां ने भरए जाले जो खिञ्जी लेई आए, क्योकि सै कनारे ला जादा दूर नी थे, कोई सो मीटर दूर थे। 9 जालू सै कनारे पर पुज्जे, तां उना कोलयां दिया अग्गी पर मछियां उदे बखे रोटियां रखियां दिखियां। 10 यीशुए उना जो बोलया, “जडियां मछियां तुसां हण पकडिया न, उना चे थोडियां लेई ओआ।” 11 शमौन पतरसे डोंगिया पर चढी करी इकसो त्रिंज्यां मछियां ने भरया जाल कनारे पर खिचया, कने इतणियां मछियां होंणे ने भी जाल नी फटया। 12 यीशुए उना जो बोलया, “ओआ रोटी खाई लिया।” कने चेलयां चे कुसयो भी हौसला नी होया, की उसला पछन, तू कुण है? “क्योकि सै जाणदे थे की ऐ प्रभु ही है।” 13 यीशुए रोटी लेईकरी उना जो दिती, कने तियां ही मच्छी भी दिती। 14 ऐ तिजी बरी है की यीशुए मरी करी जिंदा होणे बाद चेलयां जो दर्शण दिते न। 15 रोटी खाणे बाद यीशुए शमौन पतरसे जो पुछया, हे यहन्ना दे पुत्र शमौन, क्या तू सच्ची इना बाकियां ला जादा मिंजो ने प्यार करदा है? उनी यीशुए जो बोलया, हां

प्रभु; तू तां जाणदा है, की मैं तिजो पर भरोसा रखदा है, उनी उना जो बोलया, “मेरे छेलुआं दी रखवाली कर।” 16 यीशुए फिरी दूजी बरी उसयो पुछया, “हे यहून्ना दे पुत्र शमौन, क्या तू मिजो ने प्यार रखदा है?” उनी उसयो बोलया, “हों, प्रभु तू तां जाणदा हे की मैं तिजो ने प्यार करदा है?” उनी उसयो बोलया, “मेरियां भेडां दा पुआल बण।” 17 यीशुए तीजी बरी उसयो पुछया, “यहून्ना दे पुत्र शमौन, क्या तू मिजो ने प्यार करदा है?” पतरस उदास होई गया, की उनी उसयो तीजी बरी ऐसा बोलया, “क्या तू मिजो ने प्यार करदा है।” कने उनी बोलया, “प्रभु जी, तू तां सब कुछ जाणदा है की मैं तिजो ने प्यार करदा है।” यीशुए उसला बोलया, “मेरियां भेडां जो चुगा।” 18 “मैं तुसां ने सचच-सचच बोलदा है, जालू तू जवान था, तां अपने लक्के जो बन्नी करी जिथू चांदा था, ओथू गुमदा था; पर जालू तू बुडा होइ जाणा, तां तू अपने हथां जो फेलांगा, कने कोई तिजो बन्नी लेंगा कने तिजो ओथू लेई जाणा जिथू तू जाणा नी चांदा।” 19 यीशुए ऐसा ऐ दसणे तांई बोलया की पतरसे कियां मरणा कने परमेश्वरे दी महिमा करणी है; ऐ बोली करी, उसयो बोलया, “मेरा चेला बणी रे।” 20 पतरसे मुडी करी उस चेले जो पिच्छे ओदे दिखया जिसने यीशु प्यार रखदा था। ऐ सै ही है जिनी फसह दी रोटी खाणे बेले यीशुए बखे बेईकरी पुछया था, “प्रभु जी, तिजो पकडाणे बाला कण है?” 21 उसयो दिखीकरी पतरसे यीशुए जो बोलया, “प्रभु जी, इदे सोगी क्या होणा है?” 22 यीशुए उसयो बोलया, “अगर मैं चां की सै मेरे ओणे दीकर जिन्दा रे, तां तिजो क्या? तू मेरा चेला बणी रे।” 23 तांई तां भाईयां च ऐ गल्ल फेली गेई की उनी दुज्जे चेले नी मरणा है; तमी यीशुए उसयो ऐ नी बोलया, की इनी नी मरणा है, पर ऐ की “अगर मैं चां की ऐ मेरे ओणे दीकर जिन्दा रे, तां तिजो इसला क्या?” 24 जिनी माणूऐ ऐ सब कुछ दिखया, उनी ऐ गबाई दिती है, ताकि तुसां भी यीशु पर भरोसा करी सकन। कने उदी गबाई सचची है। कने असां जाणदे न की सै सचचाईया ने बोलदा है। 25 यीशुए होर भी मते कम्म किते, अगर उना सारे कम्मा जो लिखया जांदा, तां मिजो लगदा की सारे संसार च इतणी भी जगा नी होणी थी की उना सारियां कताबां जो रखी सके।

# प्रेरितां दे कम्म

1 प्रिय थियुक्लिफ्स, मैं अपणिया पेलिया कताबा च उना सारियां गल्लां दे बारे च दसया है, जडियां यीशुए स्वर्ग च जाणे ला पेहले करणा कने सिखाणियां शुरू कीतियां। 2 पर परमेस्वर दे जरिये यीशुए जो स्वर्ग च चुकणे ला पेहले, यीशुए दुख झेले कने मरी गया। उनी मते पक्के सबूतां ला उनी अपणे आपे जो जिन्दा दसया, कने चालियां रोजां दीकर सै उना चुणयां चेलयां जो मिलदा रिया, कने परमेस्वर दे राज्य दियां गल्लां करदा रिया। यीशुए पबित्र आत्मा दिया सहायता ला प्रेरितां जो हुकम दिता कने उदे बाद परमेस्वर उसयो स्वर्ग च चुकी लिया। 4 इक बरी यीशुए चेलयां ला मिली करी उना जो हुकम दिता की, “यस्शलेमे शेहरे ला बाहर मत जांदे, पर उस दान दी नियाल रखा जडा मेरे पिता परमेस्वर तूहांजो देणे दा बायदा कितया था, तुसां मिंजो उदे बारे च पेहले भी बोलदे सुणया है। 5 यहन्ने तां पाणिणे ला बपतिस्मा दितया है, पर थोडे रोजा बाद परमेस्वर तूहाडे सोगी रेणे तांई पबित्र आत्मा जो भेजणा।” 6 बादे च जालू प्रेरित दोबारा यीशुए जो मिल्ले, तां उना यीशुए जो पुछया, “प्रभु जी, क्या तू हण ही इस बकत इसाएले जो रोमियां दी गुलामी ला अजाद करणे कने साडे राज्य जो फिरी ला बसाणे दी योजना बणा दा है?” 7 यीशुए उना जो बोलया, “ऐ सारियां चिंजा कालू होणियां कने कुस बकत होणियां, ऐ सब कुछ तय करणे दा हक सिर्फ मेरे पिता परमेस्वर जो है, ऐ सब कुछ जाणने दी तूहांजो जरूरत नी है। 8 पर जालू पबित्र आत्मा तूहाडे पर ओणा तालू तूहांजो शक्ति मिलणी; कने यस्शलेमे शेहरे च कने सारे यहूदिया कने सामरिया प्रदेशां च, कने संसारे दियां हर जगा दे लोकां मेरे बारे च गबाही देणी है।” 9 ऐ बोली करी उना दे दिखदे-दिखदे ही परमेस्वर यीशुए जो स्वर्ग च लेई गया, कने इक बदले दिया बजा ला सै उसयो दिखी नी सके। 10 उदे जांते बेले जालू सै अम्बरे पासे दिखा दे थे, तां अचानक दो माणू चिट्टे कपडे पाई करी उना बखे प्रगत होए। 11 कने बोलणा लग्गे, “हे गलीली प्रदेशे दे माणूआं, तुसां कजो खडोई करी अम्बरे पास्से दिखा दे न? ऐई यीशु, जिसयो परमेस्वर स्वर्ग लेई गया है, जियां तुसां उसयो स्वर्ग जांते दिखया तियां ही उनी फिरी ओणा है।” 12 ऐ सारियां गल्लां जैतुन नापे दे पहाडे पर होईयां जडा यस्शलेमे शेहरे ला लगभग इक किलो मीटर दिया दुरिया पर था कने प्रेरित पहाडे ला यस्शलेमे शेहरे जो बापस आई गे। 13 कने जालू प्रेरित शेहरे च पुज्जे तां सै उपरे बाले कमे च गे, जिथू सै रे दे थे। जडे प्रेरित ओथू मोजूद थे सै ऐ न पतरस कने यहन्ना कने याकूब कने अन्ड्रियास कने फिलिपुस कने थोमा कने बरतुलमै कने मत्ती कने हलफाईए दा पुत्र याकूब, शमौन जडा क्रान्तिकारी था कने याकूब दा पुत्र यहूदा थे। 14 ऐ सारे हमेशा गिठे होंदे थे कने सारे इक मन होईकरी लगातार प्रार्थना करदे थे। उना चे यीशू दे भाई कने यीशुए माता मरियम कने कुछ जनानियां भी थियां जिना यीशुए दी सहायता कितियो थी। 15 कने उना रोजां च इक रोज, जालू लगभग इक सौ बी मसीह भाई बेहण गिठे थे, तां पतरस उना दे बिच खडोई करी बोलणा लग्गा। 16 हे मसीह भाईयो बेहणे, पबित्र आत्मा बडे पेहले राजा दाऊदे दे जरिये यहूदा दे बारे च दसया था, जिनी यीशुए जो गिरफ्तार करणे बालयां दी अगुवाई कीती। ऐ जरूरी था की यहूदा दे बारे च पबित्र शास्त्रे च लिखया लेख पूरा हो। 17 बेशक यहूदा सांझो चे इक था, कने इसा सेवकाईया च भी हिस्सेदार बणया। 18 जियां की तुसां जाणने न की उस पेसे ला जडे यहूदा यीशुए जो चलाकिया ला पकडणे तांई लियो थे, उनी उस पेसे ला इक खेतार लिया। जालू यहूदा फा लेई लिया तां सै थिले सिरे भार पेई गया कने उदा पेट फटी गया, कने उदियां सारियां आंतडियां बाहर आई गियां। 19 कने इसा गल्ला दे बारे च यस्शलेमे शेहरे दे सारे लोकां जो पता लग्गी गया, इस तांई सै लोक उस जगा जो अपणी भाषा च हलकदमा मतलब की खूने दा खेतार बोलणा लग्गी पे। 20 क्योंकि राजा दाऊदे भजन सहिता दिया कताबा च लिखया है, “उदा घर उजडी जा कने उस घरे च कोई नी बसे,” कने राजा दाऊदे दुजडी जगा च ऐ भी लिखया है की, “उदी जगा कोई होर लेई ले।” 21 इस तांई ऐ जरूरी है की प्रभु यीशु जो मरयां चे जिन्दे होणे दा, साडे सोगी गबाह बणने तांई इक माणूए जो चुणयां जा। सै माणू ऐसा होणा चाईदा जडा प्रभु यीशु दे सारे कम्मा दे बकते च मतलब की प्रभु यीशु जो यहन्ना ला बपतिस्मा लेणे ला लेईकरी उसयो स्वर्ग च जाणे दीकर साडे सोगी था। 23

तालू उना दों जणयां जो खरेडया इक यूसुफे जो, जिसयो बरसबवास बोलदे न, जिदा दुआ ना यूसुतस है, कने दुआ मत्तियाह जो। 24 कने ऐ बोली करी प्रार्थना कीती, “प्रभु जी, तू तां सारयां दे मना जो जाणदा है, ऐ प्रगत कर की इना दों जणयां चे तू कुण चुणया है, 25 की सै इस सेवा दे कम्मे जो कने उस प्रेरित दी सै खाली जगा ले, जिसा जगा जो यहूदा छडी करी चली गया जिथू उसयो जाणा चाईदा।” 26 तालू उना दोनो दे बारे च चिठियां पाईयां, कने चिठी मत्तियाह दे नापे दी निकली, कने सै उना गयारां प्रेरितां दे सोगी गणिया गया।

2 जालू यहूदियां दे पिन्तेकुस्ते त्योहारे दा दिन आया, तां सारे भरसा करणे बाले इकी जगा पर गिठे थे। 2 तालू अचानक अम्बरे ला इक अबाज सुणोई, सै अबाज तेज होआ सांई थी, कने उसा ने सारा घर जिथू सै बैठयो थे गुंजी पिया। 3 तालू उना दे सामणे अग्गी सांई चीजां दा झुण्ड प्रगत होया जडा जीभा दे अकारे दा लगा दा था, जडा लग होईकरी उना चे हर इक माणूए पर स्कूदी गई। 4 कने सै सारे पबित्र आत्मा ला भस्ई गे, कने जियां ही पबित्र आत्मा उना जो बोलणे दी शक्ति दिती, सै होर-होर भाषा च बोलणा लग्गे। 5 उस बकत परमेस्वर दा डर मनणे बाले केई यहूदी थे, जडे की संसारे दे हर इक देशे ला त्योहारे मनाणे तांई आयो थे कने यस्शलेमे शेहरे च रेंदे थे। 6 जालू उस तेज होआ दी अबाज होई थी तां भीड लग्गी गई कने लोक हेरान होई गे, क्योंकि हर इक अपणी-अपणी भाषा च चेलयां जो बोलदे सुणा दे था। 7 कने सै सारे हेरान होईकरी बोलणा लग्गे, “दिखा, ऐ जडे लोक इस तरिके ला बोला दे न ऐ गलील प्रदेशे दे बासी न।” 8 तां ऐ क्या होआ दा है, जडा सांझो चे हर इक जणा इना जो अपणी-अपणी बोली च गल्लां करदे होये सुणा दे है! 9 असां च कुछ लोक पारथी इलाके ला न; कने कुछ मेदी कने कुछ लोक एलामी कने मेसोपोटामिया कने यहूदिया प्रदेशे कने कपूदकिया कने पुतुस कने आसिया प्रदेश, 10 कने फ्रुगिया कने पंफुलिया कने मिस्र देश कने लीबिया देशे कुछ इलाकयां दे न। जडे कुरेने शेहरे दे बखे न, कने इना सारे देशां दे रेणेबाले कने रोम शेहरे ला ओणे बाले लोक, 11 मतलब की क्या यहूदी, कने क्या ही होर जातियां दे लोक जिना यहूदी धर्म अपनाई लिया था, केती टापू दे लोक कने अरबी देश दे लोक भी न, पर अपणिया-अपणिया बोलिया च उना ला परमेस्वर दे चमत्कारी कम्मा दी चर्चा सुणदे न। 12 कने सै सारे हेरान होए, कने उना जो समझ नी ओआ दा था की क्या होआ दा है। 13 पर केईयां मजाक करदे होए बोलया, “सै तां नोईया शराबा दे नशे च न।” 14 पतरस उना गयारां प्रेरितां सोगी खडोता, कने जौरे ला बोलणा लग्गा, “तुसां लोक जडे साडे सांई यहूदी न कने यस्शलेमे शेहरे दे बासियां, मेरियां गल्लां धयाने ला सुणा मै तूहांजो दसदा है की इसा घटना दा क्या मतलब है। 15 तूहांजो लगदा है की असां नशे च न, पर असां नशे नी न क्योंकि हले तां ब्यागा दे नौ बजे न। 16 पर ऐ चमत्कार जडा साडे सोगी होया है, ऐ उसा गल्ला जो पूरा करता है, जडी योएल परमेस्वर दा संदेश देणेबाले दे जरिये पबित्र शास्त्र च परमेस्वर बोलियो है: 17 परमेस्वर बोलदा है की, ‘आखरी दिना च ऐसा होणा है, की मै अपणी आत्मा सारे माणूए जो देणी है कने तूहाडे पुत्रां कने कुडियां भविष्यवाणियां करणियां, कने तूहाडे जवाना दर्शन दिखणे कने तूहाडे बुडे मर्दा सुपने दिखणे।’ 18 उना दिना च मै अपने नोकरां कने नोकराणियां जो अपणी आत्मा देणी, कने उना भविष्यवाणी करणी। 19 कने मै उपर अम्बरे च अनोखे कम्म, कने थले धरतिया पर चमत्कार, मतलब की खून कने अग कने धूँदे दे बदल दसणे। 20 प्रभु दा दिन ओणे ला पेहले सूरजे नेहरा होई जाणा कने चांदे खूने सांई होई जाणा। सै दिन महान कने तेजस्वी दिन होणा। 21 कने जडा कोई प्रभुए दा ना लेंगा, उदा उद्धार होणा।” 22 हे इस्राएल दे लोको इना गल्लां जो सुणा: परमेस्वर नासरत दे यीशू मसीह दे जरिये चमत्कार कने अनोखे कम्म किते कने तुसां अपु जाणदे न की ऐ सचच है। इयां करिरी परमेस्वर तुसां जो दसया की यीशू परमेस्वर दा भेजया माणू है। 23 उसयो ही, जालू सै परमेस्वर दी बणाईयो योजना कने पेहले ला ही जाने दे अनुसार पकडया गया, तां तुसां उसयो बुरे लोकां दे हथां ला किल्लां ठोकी करी सूली पर चढाई करी मारी दिता। 24 फिरी भी परमेस्वर उसयो मरणे दे बाद फिरी ला जिन्दा करी दिता। यीशू मरी गया था पर परमेस्वर उसयो मुर्दा रेणे ला बचाई लिया क्योंकि उदे तांई मरया रेणा संभव नी था। 25 क्योंकि राजा दाऊद यीशुए दे बारे च बोलदा है, “मै प्रभु जो हमेशा अपने सामणे दिखदा रिया क्योंकि सै मेरे सजे

पासे है, ताकि मैं उना लोकां ला नी डेरें जडे मिजो नुक्सान पूजाणा चांदे न। 26 मेरा मन बड़ा खुश होया, कने मैं खुशिया ला बोलदा है; कने मेरे शरीर जो भी आस लग्गी रेंगी। 27 क्योंकि तू मिजो मुर्दा नी रेणा देणा। कने ना ही अपने पबित्र जण दिया लाशा जो सडना देणा। (Hadēs g86) 28 तू मिजो जिन्दगिया दा रस्ता दसया है; तू मिजो अपणिया मोजुदगी च खुशिया ला भरी देणा।” 29 “हे मसीह भाईयो, मैं उस कुलपति राजा दाऊदे दे बारे च पुरिया हिम्मत ला बोली सकदा है की सै मरी गिया है कने दबया भी है कने उदी कबर अजे दीकर भी साडे बिच है। 30 सै परमेखरे दा संदेश देणेबाला भी था, कने सै जाणदा था की परमेखरे मिजो ने कसम खाई करी बायदा कितया है, “मैं तेरे बंशे चे इकी माणुणे जो तेरे सिंहासने पर बटांग्गा।” 31 ऐ जाणी करी की भविष्य च परमेखर क्या करणा जा दा था, राजा दाऊदे यीशु मसीह जो मरणे बाद जिन्दा होणे दी गल्ल किति है। उनी बोलया ना तां उनी उसयो मुर्दा रेणा दिता, कने ना ही अपने पबित्र जण दिया लाशा जो सडना दिता। (Hadēs g86) 32 इसी यीशुणे परमेखरे जिन्दा किता, जिदे असां सारे गबाह न। 33 हण सै स्वर्गे च परमेखरे दे सजे हथे सनना ला बाहु इज्जता दे पदे पर बैठया है। कने पिता परमेखरे जदिया उसला बायदा कितया था, उनी अपना पबित्र आत्मा यीशुणे जो दिता कने यीशुणे उदारता ला सै पबित्र आत्मा सांझो दिता है, जियां की तुसां अज दिखदे कने सुणदे न। 34 क्योंकि राजा दाऊद यीशु मसीह सांई शरीर च स्वर्गे पर नी चढया; पर सै अपु ही बोलदा है, प्रभु परमेखरे मेरे प्रभु ला बोलया; मेरे सजे पास्से बैठ, 35 जालू दीकर मैं तेरे दुशमणा जो तेरे पैरां थले दिया चौकिया सांई नी बनाई दे। 36 इस ताई इस्त्राएले दे सारे लोक इसा गल्ला दे बारे च पका ही जाणी लेन: की परमेखरे इसी यीशुणे जो जिसयो तुसां सूली पर चढया, उसयो प्रभु भी कने मसीह भी बणाया। 37 जालू लोकां ऐ सुणया तां उना अपने आपे जो दोषी महसूस किता, कने सै पतरस कने बाकी प्रेरितां ला पूछणा लागे, “हे मसीह भाईयो, असां क्या करन?” 38 पतरसे उना जो बोलया, “मन बदला, कने तुसां सारे अपने-अपने पापां दा माफि तांई यीशु मसीह दे नाए ला बपतिस्मा लिया; तां तुसां जो पबित्र आत्मा दा दान मिलणा। 39 क्योंकि ऐ प्रतिज्ञा तुसां, कने तुहाडिया ओलादा कने उना सारे दुरे-दुरे दे लोकां तांई भी है जिना जो तुसां प्रभु परमेखरे अपने बाल सदया।” 40 पतरसे होर भी मतियां गल्लां दी गबाई देईकरी उना जो समझाया कने बिनती किति की अपने इस्त्राएली साथियां सांई मत बना जडे परमेखरे पर भरोसा नी करदे कने परमेखरे ला बिनती करा की सै तुहांजो बचाए। 41 कने जडा कुछ पतरसे बोलया, उस पर जिना भरोसा किता कने उना बपतिस्मा लिया; कने उसी दिने लागमन तिन जार माणु उना ने शामिल होई गे। 42 कने सै प्रेरितां ला शिक्षा लेणे च, उना सोगी संगती रखणे च, प्रभु भोज कने प्रार्थना करणे च लीन रेंणा लागे। 43 कने प्रेरित जडे अनोखे कम्म कने अनोखे चमत्कार करदे थे, इना ला यस्शलेम शहर दे लोक डरे कने हेरान होए। 44 कने सै सारे भरोसा करणे बाले गिठे रेंदे थे, कने जडा कुछ भी उना बाल होंदा था सै सब कुछ सांझा करदे थे। 45 कने सै अपणिया-अपणिया जगा जमिना कने समाने जो बेची करी जडेई जिसयो जरूरत होंदी थी उसयो बंडी दिन्दे थे। 46 कने सै हर रोज इक मन होईकरी मंदरे च गिठे होंदे थे, कने रोटी खाणे तांई कने प्रभु भोज तांई इक दुज्जे दे घरे साफ मने ला खुशिया ला गिठे होंदे थे। 47 कने परमेखरे दी स्तुति करदे थे, कने सारे लोक उना ला खुश थे; कने जिना दा उद्धार होंदा था, उना जो प्रभु हर रोज उना च मिलाई दिन्दा था।

**3** इक दिन पतरस कने यहूना दोपहर दे तिन बजे प्रार्थना दे बेले मंदरे जो चलया थे। 2 कने लोक इकी जन्म ला ही लंगडे जो लोआ दे थे, जिसयो सै रोज ही मंदरे दे उस दरबाजे बाल बैठाई दिन्दे थे जिसयो सुंदर दरबाजा बोलंदे न, ताकि सै मंदर जाणे बालयां ला भीख मंगी सके। 3 जालू उनी पतरस कने यहूना जो मंदरे च जांदे दिखया, तां उनी उना ला भीख मंगी। 4 पतरसे कने यहून्ने उदे पास्से ध्यान ला दिखीकरी बोलया, “साडे पास्से दिख।” 5 सै उना ला कुछ मिलणे दी आसा च उना पास्से दिखणा लग्गा। 6 तालू पतरसे बोलया, “चांदी कने सोना तां साडे बाल है नी, पर जडा मेरे बाल है सै तिजो दिन्दा है; नासरत दे यीशु मसीह दे नाए ला उठ कने चल फिर।” 7 कने पतरसे उदा सजा हथ पकड़ी करी उसयो उठया; कने झट उदे पैरा कने गोडयां च जोर आई गिया। 8 कने सै उछली करी खडोई गिया, कने चलणा फिरणा लग्गी पिया; कने चलदा, कने छलांगा मारदे

परमेखरे दी स्तुति करदा होया उना सोगी मंदरे दे अंगणे च गिया। 9 सारे लोकां उसयो चलदे फिरदे कने परमेखरे दी स्तुति करदे दिखीकरी, 10 उसयो पछेणी लिया की सै ही लंगडा भिखारी है, जडा मंदरे दे सुंदर दरबाजे पर बेईकरी भीख मंगदा था; कने इसा घटना ला जडी उदे सोगी होईयो थी, बडे हेरान होए। 11 सै उस ओसारे च थे जिसयो सुलैमान दा ओसारा बोलंदे न, कने सै लंगडा भिखारी जडा ठीक होई गिया था सै पतरस कने यहून्ने दा साथ नी छडा दा था। सै सारे लोक उना पासे दौडे कने उसयो दिखीकरी बडे हेरान होए। 12 ऐ दिखीकरी पतरसे लोकां जो बोलया, हे इस्त्राएलियां, तुसां इस माणुणे पर कजो हेरान होआ दे, कने साडे पास्से कजो घुरा दे न, जियां मन्ना की असां ही अपणिया भक्तिया कने शक्तिया ने इसयो चलणे फिरणे जोगा बणाई दितया है। 13 साडा परमेखर कने जडा अब्राहम, इसहाक, याकूब, कने साडे पूर्वजां दा भी परमेखर है उनी अपने सेवक यीशुणे दी महिमा किति, पर तुसां यीशुणे जो मरवाणे तांई रोमी अधिकारियां बाल पकडाई दिता, कने जालू पिलातुसे उसयो छडणे दा बिचार किता, तालू तुसां उदे सामणे यीशुणे जो नकारी दिता। 14 तुसां यीशु मसीह जो नी अपनाया, जडा पबित्र कने धर्मी था। कने तुसां पिलातुसे ला चांदे थे की इक हत्यारे जो तुहाडे तांई छडी दिया। 15 कने तुसां उसयो जडा हमेशा दी जिन्दगी दिन्दा है मारी दिता, पर परमेखरे उसयो फिरी ला जिन्दा किता, कने इसा गल्ला दे असां गबाह न। 16 यीशुणे दे नाए पर भरोसा करणे दे जरिये ही इस माणुणे जो ताकत मिल्ली है, जिसयो तुसां जाणदे न कने हण तुहाडे सामणे है। ऐ यीशु दा ना है कने जडा भरोसा उदे जरिये ओदा है जिनी उसयो बिलकुल ठीक-ठाक करी दितया है, जियां की तुसां अपु भी दिखी सकंदे न। 17 कने हे भाईयो, मैं जाणदा है की जालू तुसां कने तुहाडे अगुवां यीशु मसीह जो मारी दिता तालू तुसां उदे बारे च अनजाण थे की सै कुण था। 18 पर जिना गल्लां जो सारे परमेखरे अपने संदेश देणेबाले दे जरिये पेहले ही दसया था, की उदे मसीह जो दुख होणा कने सै मारी देणा है; तुहाडे जरिये परमेखरे इना गल्लां जो पूरा करी के दसया। 19 इस तांई मन बदला कने परमेखर बाल बापस ओआ ताकि तुहाडे पाप मिटी जान, तालू परमेखरे दिया तरफा ला आत्मिक शान्ति दा बकत ओणा। 20 कने उनी यीशुणे जो भेजणा, जडा सै मसीह है जिसयो परमेखरे तुहाडे तांई चुणया है। 21 यीशुणे दा स्वर्गे च रेणा उस बेले दीकर जरूरी है जालू परमेखर उना सारियां चिंजा जो नोआ बणाई दीगा जडियां उनी बणाईयां न। बडे बकत पेहले परमेखरे लोकां जो ऐ दसणे तांई पबित्र परमेखरे दे संदेश देणेबाले दे जरिये ऐसा करणे दा बायदा किता। (aiōn g165) 22 जियां की मूसा बोलया, “प्रभु परमेखरे तुहाडे भाईयां चे तुहाडे तांई मिजो सांई इक परमेखरे दा संदेश देणेबाला भेजणा,” जडा कुछ सै तुसां ने बोलणा, उदी सुणनयो। 23 पर हर इक माणु जडा उस परमेखरे दा संदेश देणेबाले दी नी सुणे, लोकां चे उदा नाश होई जाणा। 24 कने शमूएल ला लेईकरी उदे बाद बालयां दीकर जितणे भी परमेखरे दे संदेश देणेबालयां ऐ गल्ल बोली उना सारयां इना दिना दा संदेश दितया है। 25 तुसां सारे परमेखरे दे संदेश देणेबालयां दी ओलाद कने उस बायदे दे हिस्सेदार न, जडा परमेखरे तुहाडे पूर्वजां ला किता, जालू उनी अब्राहमे जो बोलया, “तेरे खानदाने ला धरतियां दे सारे घरानयां जो आशीष मिलणी।” 26 जालू परमेखरे अपने सेवक यीशुणे जो चुणया, कने उनी उसयो सबना ला पेहले तुसां इस्त्राएली लोकां बाल भेजया, ताकि परमेखर तुसां चे हर इक जणे जो पाप दे रस्ते ला दुरे करिरी आशीष दे।

**4** जालू पतरस कने यहूना लोकां जो ऐ बोला दे थे, तां याजक कने मंदरे दे रखबालयां दा सरदार कने सदूकी उना बाल ओए। 2 क्योंकि सै बडे गुस्सा होए की पतरस कने यहूना लोकां जो यीशुणे दे बारे च सिखान्दे थे, की जडे लोक मरी गियो न परमेखरे उना जो फिरी जिन्दा करी देणा, जियां उनी यीशुणे जो मरयां चे फिरी जिन्दा करी दिता। 3 कने उना पतरस कने यहूना जो गिरफ्तार करी अगले रोजे दीकर जेला च रखया क्योंकि संज होई गियो थी। 4 पर संदेश सुणने बालयां चे मतयां यीशुणे पर भरोसा किता, उना भरोसा करणे बाले माणुआं दी संख्या लगभग पंज हजार होई गेई। 5 अगले रोजे उना दे सरदार कने यहूदी अगुवे कने व्यवस्था जो सिखाणे बाले यस्शलेम शहर च इकी जगा पर गिठे होए। 6 कने जडे लोक ओथु गिठे होए उना चे महायाजक हन्ना कने सारे महायाजके दे घराने दे लोक, जिना चे कैफा, यहूना, सिकन्दर भी ओथु थे। 7 कने पतरस कने

यहूना जो बिच खरेडी करी पृछणा लग्गे, “इस माणुए जो ठीक करणे तांई कुनी शक्ति कने हक दिता?” 8 तालू पतरसे पबित्र आत्मा ला भई करी उना जो बोलया, “हे लोकां दे सरदारो कने यहूदी अगुवां, 9 असां इक कमजोर माणुए दी भलाई किती है, कने अज सांझो ला इंदे बारे च पृछताछ करा दे न, की सै कियां ठीक होया। 10 तां तुसां सब कने सारे इस्त्रापले दे लोक जाणी लिया की ऐ नासरत दे यीशू मसीह दे नाए ला ठीक होया है। इसी यीशुए जो तुसां सुली पर चढाया था, पर परमेश्वरे उसयो मरयां चे जिन्दा किता। अज उसी दे नाए ने ऐ माणु तुहाडे सामणे भला चंगा खडोतया है। 11 यीशू मसीह से ही पथर है जिसयो तुसां भिक्षियां फेक्री दितया था कने सेई पथर कुणे दा सिरा बणी गिया। 12 यीशू जो छडी करी होर कुसी दुज्जे ला उद्धार नी है, क्योकि स्वर्ग दे हेठ माणुए चे कोई होर दुआ ना नी दितया है, जिसला असां उद्धार पाई सकन।” 13 जालू उना पतरसे कने यहूना दी हिम्मत दिखी, कने उना जो ऐ पता लग्गा की ऐ पढयो लिखयो नी न कने आम माणु न, फिरी उना जो ऐहसास होया, ऐ इस तांई है क्योकि ऐ यीशुए सोगी थे। 14 पर उस माणुए जो जडा खरा होया था, पतरस कने यहूना सोगी खडोतया दिखीकरी, सै सभा उना दे खिलाफ कुछ नी बोली सकी। 15 पर उना जो महासभा ला बाहर जाणे दा हुकम देईकरी, सै अपु चे बिचार बिमर्श करणा लग्गे, 16 “असां इना माणुए सोगी क्या करन? क्योकि ऐ तां साफ है की इना ऐ अदभुत चमत्कार कितया है कने सारे यस्त्रालेम शेर दे रेणे बालयां जो पता है, कने असां ऐ दाबा नी करी सकदे की ऐ गल्ल नी होइयो है। 17 पर लोकां च ऐ गल्ल होर जादा नी फेलणा चाइदी, असां इना जो धमकाने, की ऐ इसी नाए ला फिरी कुसी माणुए ने गल्ल ना करन।” 18 तालू उना पतरस कने यहूना जो सदया कने चेताबनी देईकरी बोलया, “यीशुए दे नाए ला कुछ नी बोलणा कने ना सिखाणा।” 19 पर पतरस कने यहूने उना जो जबाब दिता, “तुसां ही न्याय करा, की क्या ऐ परमेश्वरे दिया नजरा च ठीक है, की असां परमेश्वरे दिया गल्लां ला बडी करी तुहाडियां गल्लां मनन? 20 क्योकि ऐ तां सांझो ला होई नी सकदा, की जडा असां दिखया कने सुणाया है, सै ना बोलन।” 21 तालू उना पतरस कने यहूना जो दुबारा धमकाना कने छडी दिता। ऐ प्रेरित लोकां बिच मशहरे थे इसा बजा ला उना जो इना प्रेरितां जो सजा देणे दा कोई तरिका नी मिला, इस तांई की जडी घटना होईयो थी उदिया बजा ला सारे लोक परमेश्वरे दी बडाई करदे थे। 22 सै माणु, जडा अदभुत चमत्कारे ला ठीक होया था, उदी उग्र चाली सालां ला जादा थी। 23 पतरस कने यहूना छुटी करी अपने साथियां बाल आये, कने जडा कुछ बड़े याजकां कने यहूदी अगुवां उना ने बोलया था, उना जो सुणाई दिता। 24 ऐ सुणीकरी, उना इक मन होईकरी उच्चिया अबाज ला परमेश्वरे ला प्रार्थना किती, “हे प्रभु, तू ही है जिनी स्वर्ग कने धरती कने समुंद्रे कने जडा कुछ उना च है बणया है।” 25 तू पबित्र आत्मा ला अपने सेवक कने साडे पूर्वज राजा दाऊदे दे मुए ला बोलया, “होरनी जातियां कजो गुस्सा किता? कने देशां-देशां दे लोकां कजो बेकार गल्लां सोचियां? 26 कने राजा दाऊदे ऐ भी बोलया था की, धरतिया दे राजयां अपने आपयो तैयार करणा, कने हाकिमा, प्रभु कने उदे मसीह दे बिरोध च गिठे होणा।” 27 कने ऐ गल्ल यस्त्रालेम शेरहे च सच्च होई की तरे पबित्र सेवक यीशुए दे खिलाफ, जिदा तू अभिषेक किता, राजा हेरोदेसे कने पुन्तियस पिलातुस राज्यपाल भी होर जातियां कने इस्त्रापलियां सोगी इसी शेरहे च गिठे होए, 28 उना सेई कितया जडा तेरिया शक्तिया कने इच्छा पहेले ही तय करी लिया था की होणा चाइदा। 29 प्रभु जी हण, उना दियां धमकियां जो सुण कने अपने दासां जो ऐ बरदान दे की तेरा बचन बडिया हिमां ने सुणा। 30 कने ठीक करणे तांई अपना हथ गां कर ताकि चमत्कार कने अनोखे कम्म तरे पबित्र सेवक यीशु दे नाए ला होन। 31 जालू सै प्रार्थना करी बैठे, तां सै जगा जिथु सै गठयो थे हिली पेई, कने सै सारे पबित्र आत्मा ला भई गे, कने परमेश्वरे दा बचन हिम्मत ने सुणादे गे। 32 भरोसा करणे बालयां दी मंडली इक चित कने इक मने दे थे, उना दा सब कुछ साझे दा था कने ऐथू दीकर की कोई भी अपणिया धन दौलता पर अपना होणे दाबा नी कदा था। 33 कने प्रेरित बडिया शक्तिया ला प्रभु यीशुए दे मरी करी जिन्दा होणे दी गवाई दिन्दे रे कने उना सारयां पर परमेश्वरे दा बडा अनुग्रह था। 34 कने उना चे कोई भी गरीब नी था, क्योकि जिना बाल जर्मान या घर थे, सै उना जो बेची करी, बिकियां चिजां दे पैसे लोदे थे कने उसयो प्रेरितां बाल जमा

करवाई दिन्दे थे। 35 कने जदेई जिसयो भी जरूरत होदी थी उसयो बंडी दिन्दे थे। 36 कने यूसफ नाए दा इक माणु था, सै लेवी गोत्र दा था कने साइप्रस टापू ला था। जिदा ना प्रेरितां बरनबास रखया, जिदा मतलब ऐसा माणु जडा दुजयां जो प्रोत्साहित करदा है। 37 उदे बाल कुछ जमीन थी, जिसा जो उनी बेचया, कने सै पैसे लोकां जो बंडणे तांई प्रेरितां जो देई दिते।

**5** हनन्याह नाए दे इकी माणुए, कने उदिया घरे बालिया सफ़ीरा अपणिया जमिना दा छोटा दिया हिस्सा बेचया। 2 कने हनन्याये जो जडे पैसे बेची करी मिल्ले उदे चे उनी कुछ अपने तांई रखी लिया; कने ऐ गल्ल उदी घरे बाली भी जाणदी थी कने उना बाकी बचयो पैसे प्रेरितां जो देई दिते। 3 पर पतरसे बोलया, “हे हनन्याह! जडा शेताने तरे मने च पबित्र आत्मा ला झूठ बोलणे दा बिचार पाया है कने तू अपना बेचियो जमिना दे पैसे चे इक हिस्सा अपना तांई रखी लिया है?” 4 क्या बेचणे ला पहेले सै जर्मान तेरी नी थी? कने जालू जर्मान बिकी गई तां उसा दी कीमत क्या तरे बशे च नी थी? तिजो इस बुरे कम्मे दे बारे च कदी नी सोचना चाइदा था! तू सांझो ला नी, पर परमेश्वरे ला झूठ बोलया। 5 ऐ गल्लां सुणादे ही हनन्याह जमिना पर पेई गिया, कने सै मरी गिया; कने जिना भी इस बारे च सुणया सै सारे डरी गे। 6 फिरी जवान माणु आऐ कने उसयो कफन च लपेटया करी कने बाहर लेईजाई करी दबी दिता। 7 लगगा तिन घंटे बाद उदी घरे बाली अंदर आई, ओथु जडा कुछ होया था उसा जो नी पता था। 8 तालू पतरसे उसा जो बोलया, “क्या तुसां दोना सै जमीन इतणे च ही बेचियो थी?” उना बोलया, “हाँ, इतणे च ही।” 9 पतरसे उसा जो बोलया, “ऐ क्या गल्ल है, की तुसां दोना प्रभुए दिया आत्मा जो परखने तांई इक सलाह कितयो है? दिख, जिना जवान माणुआं तरे घरे बाले जो दबया है सै दरबाजे बार खडोतयो न, कने इना तिजो भी बाहर लेई जाणा।” 10 तालू सै झूठ जमिना पर पेई गई, कने मरी गई, कने उना जवान माणुआं अंदर आई करी दिखया तां सै मरी गियो थी, कने उना उसा जो बाहर लेईजाई करी उसा दे घरे बाले दे बखे दबाई दिता। 11 कने कलीसिया दे सारे लोक कने जितणयां इना गल्लां जो सुणया सै बडे डरी गे। 12 प्रेरित मते चिन्न कने अदभुत कम्म लोकां दे बिच करदे थे, कने जडे मसीह च भरोसा करणे बाले थे। सै अक्सर सारे इक चित होईकरी सुलमाने दे ओसारे च गिठे होदे थे। 13 पर जिना हल्ले दीकर यीशुए पर भरोसा नी कितया था उना चे कुसयो भी ऐ हिम्मत नी हौदी थी की, उना सोगी जाई मिलन; फिर भी लोक उना दी बडी इज्जत करदे थे। 14 कने प्रभु पर भरोसा करणे बाले मर्दा कने जनानियां दी गिणती बददी ही गई। 15 जडा कुछ प्रेरित करा दे थे उसा बजा ला लोक बिमारां जो सडका पर आंणी करी, मंझे कने पन्दी पर सुआई दिन्दे थे, ताकि जालू पतरस उस रस्ते ला जाणा, तां उदा प्रछोआ उना चे कुसकी पर पेई जा। 16 कने यस्त्रालेम शेरहे दे अगे बखे दे नारां दे लोक भी गिठे होदे थे। कने सै बिमारां कने बुरियां आत्मा ला सताए लोकां जो लोदे थे, कने सै सारे ठीक होई जांते थे। 17 तालू महायाजक कने सारे यहूदी अगुवां दी टोली जिना जो सडकी बोल्दे न दे, सै प्रेरितां ला जलन करणा लग्गे। 18 तां अगुवां मंदरे दे रखबालयां जो हुकम दिता की प्रेरितां जो पकडी करी जेला च बंद करी दिया। 19 पर राती दे बकत प्रभु दे इकी स्वर्गदूते जेला दे दरबाजे खोली करी उना जो बाहर कडया कने प्रेरितां जो बोलया, 20 “जा कने मंदरे च खडे होईकरी, लोकां जो इस हमेशा दिया नोईया जिन्दगीया दा पूरा संदेश सुणा।” 21 कने प्रेरित बडी ब्यागा ही मंदरे च गे जियां उना जो स्वर्गदूते दसया था जाई करी सिखाणा शुरू किता। जालू महायाजक कने उदे साथी आऐ कने उना महासभा जो कने इस्त्रापलियां दे सारे यहूदी अगुवां जो गिठा किता, कने जेला च बोली भेजया की प्रेरितां जो लोआ। 22 पर मन्दरे दे रखबालयां ओथु पुजिकरी दिखया की सै जेला च नी न, कने उना बापस आई करी दसया, 23 “जेल ढंगे ला बंद थी, कने बाहर दरबाजे पर पेहेदर खरेडयो थे, पर जालू असां दरबाजा खोलया, तां अंदर कोई नी था।” 24 जालू मंदरे दे रखबालयां दे सरदारां कने बड़े याजकां ऐ खबर सुणी, तां हेरान होई गे कने उलझन च पेई गे की इदा क्या नतीजा होणा। 25 इतणे च कुनकी आई करी उना जो दसया, “दिखा, जिना जो तुसां जेला च बंद कितया था, सै माणु मंदरे च खडोई करी उपदेश देद न।” 26 जालू उना ऐ सुणया, तालू मंदरे दे रखबालयां दा सरदार कुछ रखबालयां जो सोगी लेईकरी मंदरे च गिया, कने प्रेरितां जो पकडी करी महासभा च लेई आया, पर

उना सोगी कोई जोर जबरदस्ती नी किती, क्योंकि रखवाले लोकां ला डरा दे थे की लोक पथर मारी-मारी करी उना जो मारी ना देना। 27 जालू उना प्रेरितां जो महासभा दे सामणे खरेडया तालू महायाजके उना ला पुछया, 28 “क्या असां तृहांजो हुकम नी दितया था, की तृसां इस नाए ला शिक्षा मत दिन्दे? फिरी भी, तृसां सारे यस्शलेम शेहरे जो अपणिया शिक्षा ला भरी दिता है कने तृसां उस माणुए दी हत्या दा दोष जबरदस्ती सांझो पर लांणा चांदे न।” 29 तालू पतरसे कने, बाकियां प्रेरितां जबाब दिता, “माणुए दे हुकमे ला बदीकरी परमेश्वरे दे हुकमे जो मणणा ही साडा कम्म है। 30 साडे पूर्वजां दे परमेश्वरे यीशुए जो मरयां चे जिन्दा करी दिता, जिसयो तृसां सूली पर लटकाई करी मारी दितया था। 31 उसयो ही परमेश्वरे प्रभु कने उदार करणे बाला बणाया है, कने अपने सजे हथे ने सारयां ला उच्चे सिंहासन पर बैठया है, ताकि इस्राएले दे लोक अपने बुरे सोच बिचार कने बुरे रस्तयां जो छडी करी परमेश्वरे बाल मुडी ओन कने उदे जरिये उना जो अपने पापां दी माफी मिल्ले। 32 असां कने पबित्र आत्मा भी इना गल्लां दे गबाह न, जिसा जो परमेश्वरे उना जो दितया है, कने जडे उदा हुकम मंदे न।” 33 जालू महासभा दे लोकां ए सुणया तां उना जो बडा जादा गुस्सा आई गिया, कने प्रेरितां जो मारी देणा चांदे थे। 34 पर गमलीएल नाए दा इक फरीसी था, जडा व्यवस्था जो सिखाणे बाला कने सारे लोक उसयो बडा मंदे थे, उनी महासभा च खडाई करी प्रेरितां जो थोडिया देरा तांई बाहर करी देंगे दा हुकम दिता। 35 तालू उनी महासभा दे लोकां जो बोलया, “हे इस्राएलियो, जडा कुछ भी इना माणुए ला करणा चांदे न सोची समझीकरी करनयो। 36 क्योंकि इना रोजां ला पेहले थियुदास ए बोलदा था, की मैं भी कुछ है; कने कोई चारसो माणु उदे सोगी होई गे, पर सै मारी दिता, कने जितणे लोक उदी मंदे थे सारे तितर बितर होई गे कने खत्म होई गे। 37 उदे बाद जनगणना दे दिना च गलील प्रदेशे दा बासी यहूदा आया, कने कुछ लोक अपने पास करी ले, सै भी मरी गिया, कने जितणे लोक उदे चले थे, सारे लोक तितर बितर होई गे। 38 इस तांई तां मैं हण तृसां जो बोला दा है, इना माणुए ला दूर ही रिया कने उना ला हाँई कम्म मत अखा; क्योंकि अगर ए कम्म कने योजना माणुए दिया तरफा ला कोई तां इना रणजे अपने आप ही खत्म होई जाणा; 39 पर अगर परमेश्वरे दिया तरफा ला है, तां तृसां कदी नी मिटाई सकणा है, कुथीं इयां ना हो की तृसां परमेश्वरे ला लडने बाले बंणन।” 40 तालू महासभा गमालिएल दी गल्ल मनी लेई, कने इस तांई प्रेरितां जो सदीकरी मारया कुटया; कने उना जो ए हुकम दिता की सै हण यीशुए दे नाए च कुछ मत बोलदे कने फिरी उना जो छडी दिता। 41 कने जालू सै महासभा जो छडी करी चली गे, तालू प्रेरित इसा गल्ला ला खुश होए की परमेश्वरे उना जो यीशुए तांई बेइजत होणे जोगे समझया। 42 कने हर रोज मंदरे च कने घरे-घरे च, प्रेरित लोकां जो सिखांदे र कने श्भसमाचार दा प्रचार करदे रे की यीशु ही मसीह है।

6 उना रोजां च चेलयां दी गिणती लगातार बदा दी थी, तालू यूनानी बोली बोलणे बाले यहूदी विश्वासि इब्रानी बोली बोलणे बाले यहूदी विश्वासियां दे खिलाफ शिकायत करणा लग्गे, की रोज खाणा कने पैसे बंडदे बकते यूनानी बिधवां जो सबना सांई खाणा कने पैसे नी दिन्दे। 2 तालू बाहरां प्रेरितां यस्शलेम शेहर दे बाकी चेलयां दी मंडलिया जो अपने बाल सदीकरी बोलया, “असां प्रेरितां जो अपना बकत परमेश्वरे दा बचन सिखाणे च लाणा चांईदा, ना की खुआणे पियांणे दी सेवा करणे च। 3 इस तांई हे मसीह भाईयो, अपने के सत ऐसे माणुआं जो चुणा जिना दे बारे च सब जाणदे न की सै पबित्र आत्मा ने कने अकला ने भरयो न, ताकि असां ए जिम्मेदारी उना जो देई दें। 4 पर असां तां प्राथना, बचन दा प्रचार कने शिक्षा देणे च लग्गी रेन।” 5 ए गल्ल सारिया मंडलिया जो खरी लग्गी, कने उना स्तिफनुस नाए दे इक माणुए जो जडा भरोसे कने पबित्र आत्मा ला भरई गिया था, कने फिलिप्पुस कने प्रूखुस कने निकानोर कने तीमोन कने परमिनास कने अन्ताकिया बासी नीकुलाउस जो जडा यहूदी धर्म च आई गिया था, इना जो चुणी लिया। 6 कने इना जो सै प्रेरितां दे सामणे लेई आये कने उना तांई प्राथना किती कने उना पर हाथ रखीकरी उस कर्मे तांई नियुक्त किता। 7 कने परमेश्वरे दा बचन पेलदा गिया कने यस्शलेम शेहरे च चेलयां दी गिणती बढ़ती गेई, कने केई यहूदी याजकां भी यीशु मसीह पर भरोसे दे इस संदेशे जो मन्नी लिया। 8 स्तिफनुस अनुग्रह कने शक्तिया ला भरई करी लोकां च बड़े-बड़े अनोखे कम्म कने

चमत्कार दसदा था। 9 पर कुछ लोक जडे उस यहूदी जंज घरे दे थे, जिसयो गुलाम मुक्त यहूदी जंज घर बोलेते थे, सै स्तिफनुसे दे खिलाफ होई गे। कने इना चे कुछ लोक कुरेने कने सिंकंदरिया दे शेहरां ला आयो थे, कने कुछ लोक किलिकिया प्रदेश कने आसिया प्रदेश ला आयो थे। ए लोक स्तिफनुसे सोगी बेहस करणा लग्गे। 10 स्तिफनुसे जडा कुछ भी बोलया सै उदा जबाब नी देई सके क्योंकि पबित्र आत्मा उसयो बडी ही समझा ला बोलणे च सहायता किती। 11 इस तांई गुलाम मुक्त लोकां छुपके ला केई मर्दां जो रिश्त देईकरी स्तिफनुसे दे बारे च झूठ बोलणे तांई भडकाया, “की असां इसयो मूसा कने परमेश्वरे दे खिलाफ च निंदा करदे सुणया है।” 12 कने उना स्तिफनुसे दे खिलाफ लोकां जो, यहूदी अर्वां जो, कने व्यवस्था जो सिखाणे बालयां जो भडकाया कने उना आई करी स्तिफनुसे जो पकडया कने उसयो महासभा दे सामणे लेई आये। 13 कने ओथु जडे गबाह पत्र किते, जिना स्तिफनुसे पर ए इलजाम लाया, “ए माणु इस पबित्र मन्दिर कने मूसा दिया व्यवस्था दे खिलाफ बोलणा नी छडदा है। 14 क्योंकि असां इसयो ए बोलेदे सुणया है, की नासरत बासी यीशुए इम मंदरे जो ढाई देणा है, कने रीती रिबाजां जो बदली देणा है जडे मूसा सांझो दितयो न।” 15 तालू सारयां लोकां जडे महासभा च बैठयो थे, उदे पासे घुरी करी दिखया तां उदा मु स्वर्गदूते दे मुए सांई चमका दा था।

7 तालू महायाजके स्तिफनुसे ला पुछया, “क्या ए इलजाम सच्च न?” 2 उनी बोलया, “हे भाईयो कने पितरो सुणा, साडे पूर्वज अब्राहम जो हारान यां च आई करी बसणे ला पेहले जालू सै मेसोपोटामिया प्रदेश च था; कने तेजोमय परमेश्वरे उसयो दर्शन दिते। 3 कने उसयो बोलया, ‘तू अपने देशे कने अपने रिश्तेदारां ला निकली करी उसी देशे जो चली जा, जिसयो मैं तिजो दसगा।’ 4 तालू सै कसदियां दे देशे ला निकली करी हारान यांए च जाई बसया; कने उदे पिता दिया मौता दे बाद परमेश्वरे उसयो ओथु ला आणी करी इस देशे च बसाया जिदे च हण तृसां बसदे न, 5 पर परमेश्वरे उसयो ऐथु विरासत च कुछ नी दिता, ऐथु दीकर की इक फुट जगा भी नी दिती, कने उस बेले उदी कोई ओलाद भी नी थी। फिर भी परमेश्वरे बायदा किता, की मैं ए देशे तैरे कने तैरे बाद तैरे बंशे दे हथे दिगा।” 6 कने परमेश्वरे ए भी बोलया, तैरे बंशे दे लोक पराये देशे च परदेशी होणे, कने उना लोकां उना जो गुलाम बणाई लेणा, कने चारसो सालां दीकर उना सोगी बुरा बताब करणा। 7 फिरी परमेश्वरे बोलया, “जिसा जातियां दे उना गुलाम होणा है, उना जो मैं सजा देणी, कने उना उस देशे ला निकली करी इसी इस्राएल च मेरी भक्ति करणी।” 8 कने परमेश्वरे अब्राहम सोगी इक बायदा किता कने उसने बोलया की सै अपने घरे दे सारे मर्दां दा खतना बायदे दे चिन्ह दे तौर पर करबाए; कने बादे च जालू इसहाक पैदा होया, तां अठमे रोजे उदा खतना किता, कने इसला बाद ए परमपरा चलदी रेई कने इसहाक ला याकूब कने याकूब ला साडे बारा पूर्वज पैदा होए। 9 जलन दिया बजा ने यूसुफे दे भाईयां उसयो मिश्र देशे जाणे बालयां जो इक गुलाम दे स्मे च बेची दिता, पर परमेश्वर उदे सोगी था। 10 कने परमेश्वरे यूसुफे जो उदे सारियां मुसीबां ला छुडाई करी मिश्र दे राजा फिरोन दे अग्रे अनुग्रह कने अकल दिती, कने फिरोन राजे उसयो मिश्र देशे पर कने अपने सारे घरे दा अधिकारी बणाया। 11 जालू यूसुफ मिश्र देशे दा गवर्नर था तालू सारे मिश्र कने कनान देशे च अकाल पिया; जिसने बडा भरी क्लेश होया, कने साडे पूर्वजां जो खाणे जो नी मिलदा था। 12 पर याकूबे ए सुणाया, की मिश्र देशे च अनाज है, उना साडे पूर्वजां जो अनाज लेणे तांई भेजया कने सै यूसुफे ने मिल्ले कने अनाज खरीदया पर उना यूसुफे जो नी पछेणया। 13 कने दुई बरी जालू सै अनाज लेणा के, तां यूसुफ अपने भाईयां जो दसया की मैं तुहाडा भाई यूसुफ है, कने यूसुफे दे परिबार दे बारे च फिरोन जो पता लग्गी गिया। 14 तालू यूसुफे अपने पिता याकूब कने अपने सारे रिश्तेदारां जो, जडे पचतर माणु थे, उना जो मिश्र देशे च ओणे तांई बुलाबा भेजया। 15 तालू याकूब मिश्र देशे गिया; कने ओथु कुछ बकते बाद सै कने साडे बाप दादे मरी गे। 16 कने उदे बंशज याकूब कने उदे पुत्रां दियां लाशां जो साडे देशे कनान च लेई गे, कने याकूब दिया लाशा जो उसा ककरा च दफनाया, जिसा जो अब्राहमे इक सही कीमता च खरीदया था, कने उना याकूब दे पुत्रां जो शकमे शेहरे दिया उसा जमिना च दफनाया, जिसयो याकूबे हामौर दे पुत्रां ला खरीदया था। 17 पर जालू उस बायदे जो पूरा होणे दा बकत नेडे

आया जडा परमेश्वरे अब्राहम ने कितया था, तां मिश्र देश च लोक बदी गे, कने मते सारे होई गे। 18 तालू मिश्र देश च दुआ राजा राज करणा लग्ना जडा यूसुफे जो नी जाणदा था। 19 उनी साडिया जातियां सोगी चलाकी करिरी साडे पूर्वजां ला इसा हदा दीकर बुरा व्यवहार कितया की, उना दे माता पिता जो अपने बचयां जो फेंकणा पेई गिया ताकि सै मरी जान। 20 कने उस बेले मूसा पैदा होया, कने सै परमेश्वरे दिया नजरा च बडा ही छेल था; कने उसयो उना तिन मिहनयां दीकर उसयो उदे माता-पिता लुकाई करी पालया। 21 पर जालू सै उसयो होर जादा लुकाई नी सके, तां उना उसयो घरे बाहर रखी दिता कने तालू फिरोने दीया कुडिया उसयो गोद लेई लिया, कने उसयो अपने पुत्रे साईं पालया। 22 कने मूसा जो मिस्रियां दी सारी बिधा पडाई, कने सै बडा ही प्रभावशाली तरीके ने गल्लां कने कम्म करदा था। 23 जालू मूसा चालियां सालां दा होया, तां उदे मने च आया की अपने इझ्राएली रिशतेदारां ने मिल्ले। 24 कने उनी ओथु इक मिश्री माणुए जो इक इझ्राएली माणुए सोगी बदसलकी करदे दिखया, कने उसयो बचाया, कने मिश्री माणुए जो मारी करी उदा बदला लिया। 25 उनी सोचया, की मेरे भाईयां समझणा की परमेश्वरे मेरे हथे ने उना जो गुलामी ला अजाद करदा, पर उनी समझया। 26 दुए रोजे मूसा दो इझ्राएलियां बाल आया जडे अपु च लडा दे थे, कने उना बिच सुला करणे तांई ऐ बोलया, की हे मर्दां, तुसां तां भाई-भाई न, तुसां कजो इकी दुए जो मारा दे न? 27 पर जडा अपने पडोसीऐ जो मारा दा था, उनी मूसा जो धक्का दिता कने बोलया, तिजो कुनी सांझो पर राजा कने न्याय करणे बाला बणाया है? 28 क्या जियां कल तू मिश्र देशे दे माणुए जो मारी दिता क्या मिजो भी मारणा चांदा है? 29 ऐ गल्ल सुणीकरी, मूसा मिश्र देश ला मठया कने मिघान देशे च परदेसी बणी करी रेणा लग्ना: कने ओथु उदे दो पुत्र पैदा होए। 30 मिघान देशे च पुरे चाली साल रेहणे बाद, मूसा जो परमेश्वरे इक स्वर्गदूते दे स्पे च सीने पहाडे दिया सुनसान जगा च जलदिया झाडिया दिया अगी बिच दर्शन दिते। 31 जालू मूसा उसा अग लगियो झाडिया जो दिखया जडी भस्म नी होआ दी थी, तां सै हेरान होया, कने जालू दिखणे तांई बखे गिया, तां प्रभु दी ऐ अबाज सुणोई, 32 "मै तरे पूर्वज, अब्राहम, इसहाक कने याकूब च परमेश्वर है, जिदी सै आराधना करदे थे।" तालू तां मूसा डरे ने कमी पिया, ऐथु दीकर की उसयो दिखणे दी हिम्मत नी रेई। 33 तालू प्रभुऐ उसयो बोलया, अपने पैरां ला जूतयां उतारी दे, क्योंकि जिसा जगा तू खडोतया है, सै पबित्र जगा है। 34 मै सची अपने लोकां दी दुर्दशा जो दिखया है, जडी मिश्र देश च है, कने उना दी तकलीफ कने उना दे रोणे जो सुणया है, इस तांई उना जो छुडणे तांई उतरया है। हुण आ, मै तिजो मिश्र देश च भेजणा। 35 ऐ सै ही मूसा है जिसयो इझ्राएलियां नकरी दितया था कने जिना बोलया, तिजो कुनी सांझो पर राजा कने न्याय करणे बाला बणाया है? उसयो ही परमेश्वरे राजा कने छुडणे बाला बणाई करी, उस स्वर्गदूते दे जरिये भेजया जिनी उसयो झाडिया च दर्शन दिते थे। 36 सै उना जो मिश्र देशे ला बाहर लेई आया कने उनी मिश्र देशे च कने लाल समुद्रे पर कने सुनसान जगा च चालियां सालां दीकर अदभुत कम्म कने चिन्ह दर्से। 37 ऐ सेई मूसा हे, जिनी इझ्राएली लोकां जो बोलया, परमेश्वरे तुहाडे भाईयां च तुहाडे तांई मिजो सांई इक परमेश्वरे दा संदेश देणेबाला बणाणा है। 38 मूसा इक अगुवे दे स्पे च साडे पूर्वजां दे सोगी था जालू सै सुनसान जगा च गिठे थे, तालू स्वर्गदूते सीने पहाडे पर मूसा ने गल्लां कितियां, कने ओथु मूसा जो जिन्दगी देणेबाले बचन मिल्ले कने उनी सै बचन सांझो दीकर प्जाऐ। 39 पर साडे पूर्वज उदी मनगा नी चांदे थे; सै मने-मने च ही मिश्र देशे जो बापस जाणा चांदे थे, 40 कने उना मूसा दे भाई हान्क ने बोलया, साडे तांई पैसा देवता बणा, जडा मिश्र देशे जो बापस जाणे तांई साडे अग्गे-अग्गे चले; क्योंकि ऐ मूसा जडा सांझो मिश्र देशे ला कडी लेई आया है, असां नी जाणदे उसयो क्या होया है। 41 उना रोजां च उना इक बछडे दी मूर्ति बणाई करी, उदिया मूर्तियां अग्गे बलि चढाई, कने अपने हथां दे कम्मा पर खुश होणा लग्गे। 42 फिरी परमेश्वरे उना जो अम्बरे दे तारे, चन्द्रमा, सूरजे जो अपने देवतयां दे स्पे च पूजणे तांई छडी दिता, जियां परमेश्वरे दे संदेश देणेबालयां दीया कताबा च परमेश्वरे बोलया है, हे इझ्राएल दे लोको, क्या तुसां सिर्फ मेरे तांई ही चालियां सालां दीकर सुनसान जगा च पशु बलि कने अन्नबली चढादें रे? 43 नही, तुसां उस तम्बुऐ जो डोता जिदे च तुहाडे देवता मोलेक दी मूर्ति थी; कने तुसां अपने देवता रिफान दे तारे जो चुकया, मतलब की उना मूर्तियां जो

जिना जो तुसां भक्ति करणे तांई बणाया था। इस तांई मै तुहांजो बाबेल देश च गुलाम बणाणा। 44 गाराई दा तम्बु रेगिस्तान च साडे पूर्वजां बिच था; जियां की परमेश्वरे मूसा जो बोलया, जडा अकार तू दिखया है, उदे सांई इसयो बणा। 45 बडे सालां बाद उसी तम्बुऐ जो साडे पूर्वज यहोशुऐ सोगी ऐथु लेई आये। उस बकत ऐ देश होरनी जातियां दे हथे च था, पर परमेश्वरे उना जो साडे पूर्वजां दे सामणे ला कडी दिता, कने सै तम्बु राजा दाऊदे दे बकते दीकर रिया। 46 दाऊद पर परमेश्वरे अनुग्रह किता; दाऊदे याकूब दे परमेश्वरे जो रेहणे तांई मंदर बणाने दी बीनती किती। 47 पर जिनी परमेश्वरे दे मंदरे जो बणाया सै दाऊदे दा पुत्र सुलैमान था। 48 पर परमेश्वर हथा ने बणायो मंदरा च नी रँदा है, जियां की यशायाह परमेश्वरे दे संदेश देणेबाले बोलया की, 49 परमेश्वर बोलदा है, स्वर्ग मेरा सिहांसन है कने धरती मेरे पैरां थल्ले दी चौकी है, मेरे तांई तुसां कदिया मंदर बणागे? कने मिजो अराम करणे दी कुण देई जगा होणी? 50 मै खुद स्वर्ग कने धरती दोनां जगा पर सब कुछ बणाया है। 51 "हे जिदी लोको, तुसां परमेश्वरे दियां गल्लां मनणे कने सुणने ला मना करदे न, तुसां हमेशा पबित्र आत्मा दा बिरोध करदे न। जियां तुहाडे पूर्वज करदे थे, तिजां ही तुसां भी करदे न। 52 तुहाडे पूर्वजां परमेश्वरे दे संदेश देणेबालयां च हर कुसी जो सताया कने जिना ऐ भविष्यबाणी किती की मसीह जडा धर्मी है ओणा है, उना जो भी मारी दिता, पर जालू मसीह आया, तां तुसां उसयो धोखा दिता कने उदी हत्या करी दिती। 53 तुहांजो स्वर्गदूते दी बणाईयो व्यवस्था तां मिली, पर उदा तुसां पालन नी किता।" 54 ऐ गल्लां सुणीकरी यहूदी अगुवे स्तिफनुसे पर बडे जादा गुस्सा होए कने स्तिफनुसे पर ददां जो पिणा लग्गे। 55 पर स्तिफनुसे पबित्र आत्मा ने भस्ई करी स्वर्ग पासे दिखया कने परमेश्वरे दिया महिमा जो कने यीशुऐ जो परमेश्वरे दे सजे पासे खडोतया दिखीकरी, 56 बोलया, "दिखा, मै स्वर्ग जो खुलया कने माणुऐ दे पुत्रे जो परमेश्वरे दे सजे पासे खडोतया दिखा दा है।" 57 जालू उना ऐ सब सुणया तालू उना जोरे ला चिलया कने अपने कना पर हथ रखी ले, ताकि सै स्तिफनुसे दी नी सुणन कने गिठे होईकरी स्तिफनुसे पर टूटी पे। 58 कने उसयो यस्शलेम शेहरे दे बाहर कडी करी पथर मारणा लग्गे, कने स्तिफनुसे पर इलजाम लगाणे बाले लोकां अपने बाहरे बाले कपडे खोली करी शाऊले नांऐ दे जवान आदमिये बाल रखी दिते। 59 कने सै स्तिफनुसे जो पथर मारदे रे, कने सै ऐ बोली करी प्राथना करदा रिया, "प्रभु यीशु, मेरिया आत्मा जो लेई ले।" 60 फिरी गोडे भार बेईकरी जोरे ने पुकारया, "प्रभु जी, इस पापे तांई इना जो सजा मत दिन्दे।" कने ऐ बोली करी मरी गिया।

**8** शाऊल स्तिफनुसे दिया हत्या च पूरा सहमत था। उसी रोजे ला यस्शलेम शेहरे दिया कलीसिया पर बडा जुलूम होणा लग्ना कने प्रेरितां जो छडी करी सारे दे सारे यहूदिया प्रदेशे च कने सामरिया प्रदेशां च तितर बितर होई गे। 2 कने कुछ मर्दां जडे परमेश्वरे दी इज्जत करदे थे उना स्तिफनुसे जो दफनाई दिता, कने उदे तांई मते रोये। 3 शाऊल कलीसिया जो सता दा था, कने घरे-घरे जाई करी विश्वासी मर्दां कने जनानिया जो घसीटी-घसीटी करी जेलां च पाई दिन्दा था। 4 जडे भरोसा करणे बाले तितर बितर होयो थे, सै जिथु कुथु भी गे लगातार शुभसमाचार सुणादे गे। 5 कने फिलिप्पुस सामरिया प्रदेशे दे इक शेहरे च जाई करी लोकां च मसीह दा प्रचार करणा लग्ना। 6 जालू उना फिलिप्पुसे जो बोलदे सुणया कने उदे कितयो चिन्हा जो दिखया, तां उना सारयां मिलिकरी उदे संदेशे जो ध्याने ला सुणया। 7 क्योंकि जालू फिलिप्पुसे हुकम दिता तां मतयां च बुरियां आत्मा जोरे ने चिलादियां होइयां निकली गियां कने मते लकवे दे रोगी कने लंगडे भी ठीक होए। 8 तां उस शेहरे दे मते सारे लोक खुश होऐ। 9 उस शेहरे च इक शमीन नापे दा माणु था, कने सै काफी बकत ला सामरियां दे लोकां पर जादू टोणा करा दा था, सै उदी काबिलियत ला बडे हेरान थे, कने सै दावा करदा था की सै इक महान आदमी है। 10 कने सारे छोटयां ला लेईकरी बडे दीकर उसयो इज्जता ने बोलदे थे, "ऐ माणु परमेश्वरे दी सै शक्ति है, जिसयो महान बोलदे न।" 11 उनी मते रोजां ला उना जो अपने जादुऐ दे कम्मा ने हेरान करी रखया था, तां तां सै उसयो बडे मंदे थे। 12 पर जालू लोकां परमेश्वरे दे राज्य कने यीशु मसीह दे ना दा शुभसमाचार फिलिप्पुस ला सुणया कने भरोसा किता, तालू सारे मर्दां कने जनानिया बपतिस्मा लिया। 13 तालू शमीने अपु भी फिलिप्पुसे दे शुभसमाचार



पर भरोसा किता कने बपतिस्मा लेईंकरि हर जगा फिलिप्पुसे सोगी जाणा लग्गा कने चमकार कने बड़े-बड़े कम्म होंदे दिखीकरि सै हेरान होंदा था। 14 जालू यस्शलेम शेहर च प्रेरितां सुणयां की सामरिया प्रदेश दे लोकां परमेश्वरे दा बचन मन्नी लिया है तां पतरसे कने यहन्ना जो उना बाल भेजया। 15 कने उना ओथु जाई करि उना तांई प्राथना किती ताकि उना जो पबित्र आत्मा मिल्ले। 16 क्योकि पबित्र आत्मा हले दीकर उना च कुसदे पर भी नी उतरया था, उना तां बस यीशुए दे नाए ने बपतिस्मा लिया था। 17 तालू पतरस कने यहन्ने तिना पर हथ रखे कने उना जो पबित्र आत्मा मिल्ली। 18 जालू शमौने दिखया की प्रेरितां दे हथ रखणे ने पबित्र आत्मा मिलदी है, तां उनी पेसे देईंकरि बोलया, 19 “ए शक्ति मिंजो भी दिया, ताकि मै जिसदे पर हथ रखें, उसयो पबित्र आत्मा मिल्ले।” 20 पतरसे उसयो बोलया, “तू कने तेरे पेसे दोनो नाश होन, क्योकि तू परमेश्वरे दा दान पैसया ने खरीदणे दा बिचार किता। 21 इसा सेबा च ना तेरी हिस्सेदारी है, ना हिस्सा है; क्योकि तेरा मन परमेश्वरे दे सामणे सच्चा नी है। 22 इस तांई तू अपने मने ला इसा बुरिया सोचा जो कडी दे कने प्रभु ने प्राथना कर, तां होई सकदा प्रभु तेरी इसा बुरिया सोचा तांई तिजो माफ करे। 23 तू अपने पापां ला पश्चाताप कर क्योकि तू कडवाट ने भरया है कने पाप ने जकडया होया है।” 24 शमौने जबाब दिता, “तुसां मेरे तांई प्राथना करा ताकि जडियां गल्लां तुसां बोलियां न, ऐसा कुछ भी मेरे सोगी न हो।” 25 पतरस कने यहन्ना उस शेहरे च गबाई दिती कने प्रभु दे बचना दा प्रचार किता कने फिरी यस्शलेम शेहरे जो बापस चली गे। कने जांदे-जांदे बेले सामरिया प्रदेशे दे मतयां ग्रां च शुभसमाचार दा प्रचार किता। 26 फिरी प्रभु दे इकी स्वर्गदूते फिलिप्पुसे जो बोलया, “उठी करी दक्षिणे पासे उस रस्ते पर जा, जडा यस्शलेम शेहरे ला गाजा शेहर जो जांदा है, ए रेगिस्तानी रस्ता है।” 27 फिलिप्पुस उठी करी चली पिया, कने उसयो रस्ते च इक माणू मिल्ला सै इक खोजा कने कृशियां दी राणी कन्दके दा मंत्री कने खजांची था, कने भक्ति करणे तांई यस्शलेम शेहर आया था। 28 कने सै रथे पर अपने देशे जो बापस चलया था, कने परमेश्वरे दा संदेश देणेबाले यशायाह दी कताबा जो जोरे ने पढा दा था। 29 तालू पबित्र आत्मा फिलिप्पुसे ने बोलया, “नेडे होईकरि इसी रथे ने चली पो।” 30 फिलिप्पुस डोडी करी उस रथे बखे आया कने उसयो परमेश्वरे दा संदेश देणेबाले यशायाह दी कताबां जो पढे सुणया, तां उसला पुछया, “तू जडा पढा दा है क्या उसयो समझदा भी है?” 31 उनी बोलया, “मै इसयो नी समझी सकदा जालू दीकर मिंजो कोई इसयो समझांगा नी।” कने उनी फिलिप्पुसे ने बिनती किती की, रथे पर चढी करी मेरे बखे बो। 32 पबित्र शाब्दे दा जडा अध्याय सै पढा दा था, सै ए था, “उसयो भेडां सांई मारणे तांई लेईं गे, कने जियां मेमना उन कतरने बाले दे सामणे चुपचाप रेंदा है, तियां ही जालू लोकां उसयो दुख दिता तां उनी भी अपना मु नी खोलया, 33 उदिया दीनता दिया बजा ला उदी बेईजती किती कने उसयो न्याय नी मिल्ला, शायद कोई भी उदे बंशजा दे बारे च नी दस्सी सकदा है, क्योकि इदे ला पहले की धरती पर उदा कोई बंश होंदा, लोकां उसयो मारी दिता।” 34 इसी पर खोजे फिलिप्पुसे ला पुछया, “मै तिजो ने बिनती करदा है, मिंजो ए देस की परमेश्वरे दा संदेश देणेबाला कुसदे बारे च बोला दा है, अपना या कुसी होरसी दे बारे च?” 35 तालू फिलिप्पुसे बोलणा शुरू किता, कने इस पबित्र शाब्दे ला शुरू करिरी उसयो यीशुए दा शुभसमाचार सुणया कने उनी खोजे ए गल्लां समझी लियां कने यीशुए पर भरोसा किता। 36 रस्ते च चलदे-चलदे सै कुसकी तलाबे बाल पुज्जे, तालू खोजे बोलया, “दिख ऐथू तलाब है, हुण मिंजो बपतिस्मा लेणे तांई क्या कर्मी है?” 37 फिलिप्पुसे बोलया, “आमर तू सारे मने ने भरोसा करदा है तां लेईं सकदा है।” उनी जबाब दिता “मै भरोसा करदा है की यीशु मसीह ही परमेश्वरे दा पुत्र है।” 38 तालू उनी रथ खरेडने दा हुकम दिता, कने फिलिप्पुस कने खोजा दोनो तलाबे दे पाणिणे च उतरी गे, कने फिलिप्पुसे उसयो बपतिस्मा दिता। 39 जालू सै तलाबे ला निकली करी उपर आये, तां प्रभुए दी आत्मा फिलिप्पुसे जो चुकी लेईं गेईं, कने खोजे उसयो दोबारा नी दिखया, कने सै खुश होया की प्रभुए उसयो बचाया है कने अपने देशे जो बापस चली गिया। 40 फिरी फिलिप्पुस अश्रदोह शेहर च प्रगत होया कने तालू ओथु ला यात्रा शुरू किती कने ग्रां-ग्रां च कने नगरां-नगरां च शुभसमाचार दा प्रचार करदा रिया जालू दीकर सै कैसरिया शेहरे च नी पुजी गिया।

9 शाऊल पर हले दीकर प्रभु यीशु दे चेलयां जो धमकाणे कने मारणे दा खुन सवार था, इस तांई सै महायाजक बाल गिया। 2 कने उसला दमिशक शेहरे दे यहूदी जंज घरा दे नाए पर अधिकार पत्र मंगे, की कोई भी मर्द कने जनानी जडे यीशु मसीह दी शिक्षा जो मंदे न उना जो बन्नी करी यस्शलेम शेहर जो लेईं ओए। 3 पर जालू शाऊल कने उदे साथी दमिशक शेहरे बखे पुज्जे, तां अचानक अम्बरे ला शाऊले दे चारो पासे इक लौ चमकी, 4 सै धरती पर पेई गिया, कने अबाज सुणी, जडी उसयो बोला दी थी, “हे शाऊल, हे शाऊल मिंजो कजो सता दा है?” 5 शाऊले पुछया, “प्रभु जी, तू कुण है?” उनी बोलया, “मै यीशु है, जिसयो तू सता दा है।” 6 पर हुण उठी करी शहरे जो जा, कुनी तिजो दस्सी देणा, की तिजो क्या करणा है। 7 जडे माणू उदे सोगी गे, चुपचाप रेंईं गे, क्योकि उना जो अबाज सुणोदी थी, पर कोई मिलदा नी था। 8 तालू शाऊल धरती ला उठया, पर जालू हखी खोलियां तां उसयो कुछ भी नी मिल्ला दा था कने सै उदा हथ पकडी करी दमिशक शेहर लेईं गे। 9 कने सै तिन्ना रोजां दीकर दिखी नी सकया, कने ना उनी कुछ खादा कने ना पीता। 10 दमिशक शेहर च हनन्याह नाए दा इक चेला था, उसयो प्रभु यीशुए दर्शण च बोलया, हे हनन्याह। उनी बोलया, “हांजी प्रभु जी।” 11 तालू प्रभु यीशुए उसयो बोलया, “उठी करी सीधा नाए दिया गलिया च जा, कने यहदा दे घरे शाऊल नाए दे इकी तरससु शेहरे दे बासिये जो पछी ले; क्योकि सै प्राथना करा दा है, 12 उनी दर्शण च दिखया है की हनन्याह नाए दे इकी माणूए आई करी उस पर हथ रखे ताकि सै दोबारा दिखणा लग्गी पोए।” 13 हनन्याह जबाब दिता, “प्रभु जी, मै इस माणूए दे बारे च मतयां लोकां ला सुणया है, की इनी यस्शलेम शेहर च तेरे पबित्र लोकां सोगी बडा बुरा कितया है; 14 कने ऐथू भी इसयो बड़े याजकां दिया तरफा ला हक मिलया है, की जडे लोक तिजो पर भरोसा करदे न, उना जो बन्नी करी यस्शलेम शेहर जो लेईं जा।” 15 पर प्रभुए उसयो बोलया, “तू चली जा; क्योकि ए तां, मै होरनी जातियां, कने राजयां, कने इझ्राएलियां दे सामणे मेरे बारे च प्रचार करणे कने मेरी सेबा करणे तांई चूंणया है। 16 कने मै उसयो दसणा है, की लोकां जो मेरे बारे च प्रचार करणे दिया बजा ला उसयो कदिया-कदिया दुख झेलणा पोणा है।” 17 तालू हनन्याह उठी करी उस घरे च आया, जिथू शाऊल रे दा था, कने उदे पर अपना हथ रखीकरि बोलया, “हे भाई शाऊल, प्रभु यीशुए मिंजो तेरे बाल भेजया है, जडा तिजो उस रस्ते च मिलया था, जालू तू ऐथू ओआ दा था। कने उनी मिंजो इस तांई भेजया ताकि तू फिरी दिखी सके, कने पबित्र आत्मा ने भरई जाऐ।” 18 कने झट उदियां हखी ला छिलकयां सांई कुछ पिया, कने उसयो मिलणा लग्गी पिया, कने सै उठया कने उनी बपतिस्मा लिया, 19 फिरी खांणा खाई करी उसयो जोर आया। सै केईं रोजां दीकर उना चेलयां सोगी रिया जडे दमिशक शेहर च थे। 20 कने झट दमिशक शेहरे दे यहूदी जंज घरां च यीशुए दा प्रचार करणा लग्गी पिया, की यीशु ही परमेश्वरे दा पुत्र है। 21 कने सारे सुणनेबाले हेरान होईकरि बोलणा लग्गे, “क्या ए सेईं माणू नी है, जडा यस्शलेम शेहरे च उना जो सातांदा था, जडे लोक यीशु नाए दे बंदे पर भरोसा करदे थे, कने ऐथू भी तांई ही आया था, की उना लोकां जो बन्नी करी बड़े याजकां बाल लेईं जाऐ?” 22 पर शाऊल प्रचार करणे च होर भी जादा सामर्थी होंदा गिया, कने इसा गल्ला दा सबूत देईं-देईंकरि की यीशु ही मसीह है, दमिशक शेहरे दे रेहणे बाले यहूदियां दा मु बंद करदा रिया। 23 जालू शाऊले जो दमिशक शेहरे च रेंदे होए मते रोज होईं गे, तां यहूदियां मिली करी उसयो मारणे दी तरकीब बणाई। 24 कने सै उसयो मारणे तांई दिन रात फाटकां पर इंतजार करदे रे, पर उना दी तरकीब शाऊले जो पता चली गेईं। 25 इक राती चले शाऊले जो पधरे दिया उचिया दिबारा पर लेईं आऐ, जडी शेहरे दे चारो पासे बणियो थी। तालू उना दिबारां दे खुले हिस्से ला रस्सियां दे सहारे इक बडिया दिया टोकरिया च उसयो थले उतारी दिता। इयां करिरी सै दमिशक शेहरे ला बची करी निकली गिया। 26 शाऊल यस्शलेम शेहरे जो गिया कने ओथु पुज्जी करी उनी चेलयां सोगी मिलणे दी कोशिश किती, पर सारे उसला डरदे थे, क्योकि उना जो भरोसा नी होंदा था, की सै भी चेला है। 27 पर बरनबासे उसयो अपने सोगी प्रेरितां बाल लेईंजाईं करी उना जो बोलया, की इनी कियां दमिशक शेहर जाणे बाले रस्ते च प्रभु जो दिखया, कने प्रभु यीशुए उसला गल्लां कितियां; कने फिरी दमिशक शेहरे च इनी कितणिया हिम्मता ला यीशुए दे नाए दा प्रचार किता। 28 प्रेरितां बरनबास पर यकीन किता,

इस ताई शाऊल स्की गया कने उना सोगी यस्त्रालेम शेहरे दियां हर जगा पर गया कने बिना डरयो यीशु मसीह दे बारे च प्रचार करता था। 29 कने यूनानी बोली बोलणे बाले यहूदियां सोगी गल्ल बात कने बेहस करता था; पर सै उसयो मारणे दी कोशिश करणा लग्गे। 30 तालू बाकी चेलयां जो इसा गल्ला दे बारे च पता चला तां सै शाऊले जो कैसरिया शेहरे च लेई आये, कने ओथु उना उदे ताई जहाजे ला तरसूस शेहर जाणे दा इंतजाम किता, जडा उदा अपना शेहर था। 31 इयां सारे यहूदिया प्रदेश, कने गलील प्रदेश, कने सामरी प्रदेशां च कलीसिया जो चैन मिल्ला, कने सै मुजबुत होदे गे, कने सै प्रभु यीशु मसीह दे डेरे च जिन्दगी जिन्दे थे कने उना जो पबित्र आत्मा दे जरिये सहायता मिल्ली कने मतयां लोकां यीशु मसीह पर भरोसा किता। 32 फिरी इयां होया की पतरस हर प्रदेशे च फिरदा होया, इक रोज लुडा शेहरे च रेणेबाले पबित्र लोकां ला मिलणे ताई उना बाल पुज्जा। 33 ओथु उसयो ऐनियास नापे दा इक लकवे दा रोगी माणू मिल्ला, सै अठां सालां ला मंजे पर पिया था। 34 पतरसे उसयो बोलया, “हे ऐनियास। यीशु मसीह तिजो ठीक करता है। उठ कने, अपना बछण चुक।” तालू सै झट उठ। 35 उसयो ठीक होया दिखीकरी सारे लुडा कने शौनम शेहरां दे सारे रेहणे बालयां प्रभु यीशु पर भरोसा किता। 36 याफा शेहरे च इक तबीता नापे दी जनानी रेंदी थी, जडी यीशु पर भरोसा करदी थी, जिसा दा यूनानी भाषा च ना “दोरकास” था। (जिदा मतलब की इक हिरण।) कने सै बडे भरी भले कम्म कने गरीबां दी सहायता करदी थी। 37 उना रोजां च ही जालू पतरस लुडा शेहरे च था, तालू तबीता बीमाह होईकरी मरी गई, कने लोकां उसा जो नोहाई करी उपरे बाले कम्मे च रखी दिता। 38 लुडा शेहर याफा शेहर दे नेडे था, चेलयां ऐ सुणीकरी की पतरस ओथु है तां दो माणू भेजी करी उसला बिनती किती की, “साडे बाल ओणे जो देर मत कर।” 39 तालू पतरस उठी करी उना सोगी चली पिया, कने जालू पुज्जी गया, तां सै उसयो उसी उपरे बाले कम्मे च लेई गे। कने सारियां बिधवा रोंदिया उदे बाल आईयां, कने जडे कपडे दोरकास उना सोगी रेंदे बनायो थे, उना जो दसया लगिया। 40 तालू पतरसे सारयां जो बाहर करी दिता, गोडयां दे भार बेईकरी प्राथना किती, कने लाशा पासे दिखीकरी बोलया, “हे तबीता उठ।” तालू उना अपणिया हखी खोली दितियां, कने पतरसे जो दिखीकरी उठी बैठी। 41 उनी हथ देईकरी उसा जो उठया कने पबित्र लोकां कने बिधवां जो सदीकरी उसा जो जिन्दा करी दसया। 42 ऐ गल्ल सारे याफा शेहर च फेली गई, कने मतयां प्रभु यीशु पर भरोसा किता। 43 कने पतरस याफा शेहरे च शमौन नापे दे कुसकी चमडे दा धंधा करणे बाले दे ओथु मते रोजां दीकर रिया।

**10** कैसरिया शेहरे च कुरनेलियुस नापे दा इक माणू था, सै इतालियानी नापे दिया पलटना दा सखेदार था। 2 सै परमेश्वरे दा भक्त था, कने सै कने उदा सारा खानदान परमेश्वरे ला डरदा था, कने सै गरीब यहूदी लोकां जो बडा दान दिन्दा था, कने हर बकत परमेश्वरे ला प्राथना करणा लग्गी रेंदा था। 3 इक रोज, उनी दिने दे लगभग तिन बजे दे करीब इक दर्शण च बिलकुल साफ दिखया की परमेश्वरे दे इकी स्वर्गदूते उदे बाल अंदर आई करी बोलया, “हे कुरनेलियुस।” 4 कुरनेलियुसे स्वर्गदूते जो ध्याने ला दिखया कने डरीकरी बोलया, प्रभु जी क्या हुकम है? उनी उसयो बोलया, “तेरियां प्राथना कने तेरे दान याद ताई परमेश्वरे सामणे पुज्जे ना। 5 हुण याफा शेहर च माणू भेजी करी शमौन जो, जिसयो पतरस बोलदे न, सदी ले। 6 सै शमौन, चमडे दा धंधा करणे बाले दे ओथु परोंणा है, जिसदा घर समुदे बखे है।” 7 जालू सै स्वर्गदूत जिनी उसला गल्लां कितियां थियां चली गया, तां उनी दो सेवकां कने इक भक्त सिपाइरे जो सदया जडे उदी सेबा ताई ओथु रेंदे थे, 8 कने उसयो सारियां गल्लां दसी करी याफा शेहरे जो पतरसे जो लौणे ताई भेजया। 9 दुपे रोजे कुरनेलियुसे दे भेजयो सै तिन माणू चलदे-चलदे लागमग दोपेरा दे बकत शेहरे बखे पुज्जे, तां उसी बकत पतरस छूती पर प्राथना करणा चढया। 10 उसयो भूख लग्गी कने सै कुछ खाणा चांदा था, कने जालू सै खाणा तैयार करा दे थे, तां सै बेसूध होई गया। 11 कने उनी दिखया, की अम्बर खुली गया, कने इक बडिया चादरा सांई कोई चीच चारो कुंणा ला रसिया ला बनियो धरती पासे उतरा दी है। 12 जिसा च धरतिया दे सै चार पेरों बाले कने रेणेबाले जानवर कने अम्बरे दे पंडी थे, जिना दे बारे च मूसा दिया व्यवस्था च लिखया है की सै अशुद्ध कने अपबित्र न कने यहूदिया जो इना जो खाणे ताई मना

है। 13 कने उसयो इक अबाज सुणोई, “हे पतरस उठ, मार कने खा।” 14 पर पतरसे बोलया, “नी प्रभु, कदी नी, क्योकि मैं कदी भी कोई अपबित्र या अशुद्ध चीज नी खादियो है।” 15 फिरी दूजी बरी उसयो अबाज सुणोई, “जडा कुछ परमेश्वरे शुद्ध करी दितया है, उसयो अशुद्ध मत बोल।” 16 तिन बरी इयां ही होया, तालू सै चादर अम्बरे जो बापस चली गया। 17 जालू पतरस अपने मने च परशानिया च था, की ऐ जडा मैं दर्शण दिखया ऐ क्या है? उसी बकत सै माणू जिना जो कुरनेलियुसे भेजया था, शमौन दे घरे दा पता लगाई करी दरबाजे पर आई खडोते। 18 कने पुकारी करी पृछणा लग्गे, “क्या शमौन जिससयो पतरस बोलदे न, ऐथु प्रोंणा है?” 19 पतरस जडा उस दर्शने दे बारे च सोचा दा ही था, की पबित्र आत्मा उसयो बोलया, “दिख, तिन माणू तिजो तोपा दे न। 20 भले ही सै होर जाति दे न, उठी करी थले जा, कने बिना सोचया उना सोगी चली जा, मैं ही उना जो भेजया है।” 21 तालू पतरसे थले उतरी करी उना माणू ऐ जो बोलया, “दिखा जिसयो तुसां तोपा दे न, सै मैं ही है, तुहाडे ओणे दी क्या बजा है?” 22 उना बोलया, कुरनेलियुस सबेदार जडा धर्मी कने परमेश्वरे ला डरने बाला कने सारिया यहूदी जाति च सुनाम माणू है, उसयो इक पबित्र स्वर्गदूते ऐ बोलया है, की तिजो अपने घरे सदीकरी तिजो ला उपदेश सुणे। 23 तालू उनी उना जो अंदर सदीकरी उना जो रेहणे ताई जगा दिती। कने दुपे रोजे सै उना सोगी गया, कने याफा शेहरे दे मसीह भाईयां च कुछ उदे सोगी चली पे। 24 तिजे रोजे सै कैसरिया शेहरे च पुज्जे, कने कुरनेलियुस अपने रिशेदारां कने प्यारे दोस्तां जो गिठे करिरी उना दा इंतजार करा दा था। 25 जालू पतरस अंदर ओआ दा था, तां कुरनेलियुस उसने मिल्ला, कने उदे पैरां च पेईकरी नमस्ते किता। 26 पर पतरसे उसयो चुकी करी बोलया, “खडा हो, मेरी अराधना मत कर मैं भी तां माणू ही है।” 27 कने उसने गल्लां करदे अंदर गया, कने मतयां लोकां जो गिठे दिखीकरी 28 पतरसे उसयो बोलया, तुसां जाणदे न, की होरनी जातियां दी संगती करणा या उना दे ओथु जाणा भी असां यहूदियां ताई साडिया व्यवस्था दे खिलाफ है। पर परमेश्वरे मिंजो दसया है कुसी भी माणू ऐ जो अपबित्र या अशुद्ध नी बोलणा। 29 इस ताई जालू मिंजो सदया तालू मैं बिना कुछ बोलयो चली आया। हुण मैं पुछदा है की मिंजो कुसी कम्मे ताई सदया है? 30 कुरनेलियुसे बोलया, तिन रोज पेहले, इसी बकत, मैं अपने घरे च लगभग दोपेरा दे तिन बजे दे करीब प्राथना करा दा था, तां इक मर्द चमकीले कपडे पाई करी, मेरे सामणे आई खडोता। 31 कने उनी मिंजो बोलया, “हे कुरनेलियुस, तेरी प्राथना सुणी लियो है कने तेरे दान परमेश्वरे दे सामणे याद किते गे न। 32 इस ताई कुसकी जो याफा शेहर भेजी करी शमौन जो जिससयो पतरस बोलदे न, सद। सै समुदे दे बखे शमौन जडा चमडे दा धंधा करणे बाले दे घरे च परोंणा है, जालू उनी ओणा, तां उनी तिजो परमेश्वरे दिया तरफा ला इक संदेश दसणा। 33 तां मैं झट तेरे बाल लोक भेजे, कने तू खरा किता की जडा तू आई गया। हुण असां सारे ऐथु परमेश्वरे दे सामणे न, ताकि जडा कुछ परमेश्वरे तिजो बोलणे ताई बोलया है, असां उसयो सुणना।” 34 तालू पतरसे भू खोली करी बोलया, हुण मिंजो पवका यकीन होया, की परमेश्वर कूसदा भी पक्ष नी करता, 35 हर जातियां च जडा परमेश्वरे ला डरदा है कने धर्म दे कम्म करता है, उसयो परमेश्वर अपनाई लेंदा है। 36 तुसां उस संदेश जो जाणदे न जडा परमेश्वरे सांझो, मतलब की इस्राएल दे लोकां जो भेजया। उनी शान्ति दे बारे च शुभसमाचार सुणया जडी लोकां जो यीशु मसीह पर भरोसा करणे ला मिली सकदी है। सै सारयां दा प्रभु है। 37 तुहांजो उस बचने दे बारे च पता है, जडा यहूना दे बपतिस्मा दे प्रचारे बाद गलीले प्रदेश ला शुरू होईकरी सारे यहूदिया प्रदेशे च फेली गया, 38 तुसां नासरत बासी यीशु ऐ दे बारे च जाणदे न की परमेश्वरे कियां पबित्र आत्मा कने शक्तिया ला उदा अभिषेक किता; सै भलाई करता कने जिना जो शैताने तंग कितया था, उना सारयां जो ठीक करता गया, क्योकि परमेश्वर उदे सोगी था। 39 कने असां प्रेरितां उना सारियां चीजां दे बारे च लोकां जो दसया, जडियां यीशु ऐ साडे यहूदिया प्रदेश कने यस्त्रालेम शेहरे च कितियां, कने यस्त्रालेम शेहर च यहूदी अमुवां उसयो सूली पर लटकाई करी मारी दिता। 40 पर उसयो परमेश्वरे तिजे रोजे मरयां च जिन्दा करी दिता, कने उसयो प्राट भी किता है। 41 सारयां लोकां उसयो नी दिखया, पर उना गवाहां जो जिना जो परमेश्वरे पेहले ही प्रेरित चुणी लिया था, मतलब की सांझो जिना मरयां च जिन्दा होणे

बाद उदे सोगी खादा पीता। 42 कने उनी सांझो हुकम दिता की सारे लोकां जो शुभममाचार दा प्रचार करा कने गबाई दिया, की यीशु सेई है जिसयो परमेश्वरे जिंदे कने मरयां दा न्याय करणे तांई बणाया है। 43 उदी सारे परमेश्वरे दे संदेश देणेबाले गबाई दिन्दे न की जडा कोई उदे पर भरोसा करगा, उसयो जडा मसीह सली पर किता उदिया बजा ला ही पापां दी माफी मिलणी है। 44 जालू पतरस ऐ गल्लां बोला दा ही था की सारे बचन सुणने बालयां पर पबित्र आत्मा उतरी आई। 45 कने जितणे भी यहदी भरोसा करणे बाले पतरसे सोगी आयो थे, सै सारे हेरान होऐ की होरनी जातियां जो भी पबित्र आत्मा दा तोफा दिता है। 46 क्योकि उना जो भांति-भांति दियां बोलियां कने परमेश्वरे दी बडाई करदे सुणाया। इस पर पतरसे बोलया, 47 “क्या इना जो हण कोई पांणिए ला रोकी सकदा है की इना जो बपतिस्मा ना मिल्ले, जिना जो साडे सांई परमेश्वरे दिया तरफा ला पबित्र आत्मा मिलियो है?” 48 कने पतरसे उना जो हुकम दिता जडे लोक कुरनेलियुस दे घरे गठयो थे की यीशु मसीह दे नाऐ ने बपतिस्मा लिया। तालू उना पतरसे ला बिनती किती की थोडे रोज होर रेई जा साडे सोगी कने इस तांई सै कुछ रोजां तांई रेई पिया।

**11** प्रेरितां कने चेलयां जडे यहदिया प्रदेशे च थे, उना सुणाया, की होरनी जातियां भी परमेश्वरे दा बचन मनी लिया है। 2 कने जालू पतरस यस्शलेम शेहर च आया, तां यहदी विश्वासी उसला शिकायत करणा लगे, 3 “तू होर जातियां दे लोकां दे घरे जाई करी उना सोगी रोटी खादी।” 4 तालू पतरसे उना जो शूरू ला सारियां गल्लां सुणाईयां, जडियां ओथु होईयां थियां; 5 “मै याफा शेहरे च प्राथना करा दा था, कने बेसुध होईकरी इक दर्शण दिखया, की इक बडिया चादरा सांई कोई चीच चारो कुंणा ला रस्सियां ला बनईयो अम्बरे ला धरती पासे उतरी करी मेरे बाल आई। 6 जालू मै उस पर ध्यान दिता, तां मै धरतिया दे चारा पैरां बाले जानवर कने जंगली जानवर कने रेंगेणेबाले जीव कने अम्बरे दे पंछी दिखे; 7 कने मै इक अब्राज सुणी जडी मिंजो बोला दी थी की, हे पतरस उठ मार कने खा। 8 मै बोलया, “नी प्रभु जी! क्योकि कोई अपबित्र या अशुद्ध चीज मेरे मुरे च कदी नी गेई।” 9 इदे जबाब च अम्बरे ला दुर्जी अब्राज आई, जडा कुछ परमेश्वरे शुद्ध बणाया है, उसयो अशुद्ध मत बोला। 10 तिन बरी ऐदिया होया, तालू सारा कुछ अम्बरे पासे दोबारा चली गया। 11 कने झट तिन माणु जडे कैसरिया शेहरे ला मेरे बाल भेजयो थे, सै घरे दे दरबाजे पर आई खडोते, जिस घरे च असां थे। 12 तालू पबित्र आत्मा मिंजो बेझिझक उना सोगी चली जाणे जो बोलया, कने ऐ छे भाई भी मेरे सोगी चली पे, कने असां उस माणु दे घरे पुज्जी गे। 13 कने उनी दसया, की मै स्वर्गदूते जो अपने घरे खडोतया दिखया, जिनी मिंजो बोलया, याफा शेहर जो इक माणु भेजी करी शमौने जो जिसयो पतरस बोलदे न, सदी ले। 14 उनी तिजो ने ऐसिया गल्लां बोलणियां न, जिना ने परमेश्वरे तिजो कने तेरे सारे घराने दे लोकां जो बचाणा। 15 जालू मै गल्लां करणा लग्गा तां पबित्र आत्मा उना पर तियां ही उतरी, जियां शूरू च पिन्नेकुस दे त्योहारे दे बकत सांझो पर उतरियो थी। 16 तालू मिंजो प्रभु दा सै बचन याद आया, जडा उनी बोलया, यहून्ना तां पांणिए ला बपतिस्मा दिता, पर परमेश्वरे तुहाडे सोगी रेणे तांई पबित्र आत्मा जो भेजणा। 17 इस तांई ऐ साफ है की परमेश्वरे उना होर जातियां जो भी सेई दान दिता, जडा सांझो प्रभु यीशु मसीह दे नाऐ पर भरोसा करणे ला मिल्ला, तां मै कुण था जडा परमेश्वरे जो रोकी सकदा था?” 18 ऐ सुणीकरी, यहदी विश्वासी चुप रे, कने परमेश्वरे दी बडाई करी बोलणा लगे, “तां परमेश्वरे होर जातियां जो भी हमेशा दी जिन्दगी अपने बुरे कर्मा जो छडी करी यीशु मसीह पर भरोसा करणे ने दान दिता है।” 19 स्तिफनुसे दे मारे जाणे बाद, केई यीशु मसीह पर भरोसा करणे बालयां यस्शलेम शेहरे जो छडी दिता कने तितर बितर होई गियो थे, सै चलदे-चलदे फीनीके इलाके कने साइप्रस द्वीप कने सीरिया प्रदेशे दे अन्ताकिया शेहर च पुज्जे, पर यहदियां जो छडी करी कुसी होरसी जो परमेश्वरे दा बचन नी सुणां दे थे। 20 पर उना च कुछ विश्वासी साइप्रस बासी कने कुरेनबासी थे, जडे अन्ताकिया शेहरे च आए कने होर जातियां जो भी प्रभु यीशु दे शुभममाचार दियां गल्लां सुणाणा लगे। 21 कने प्रभु दिया शक्तिया दा हथ उना पर था, कने मते लोकां उना दे प्रचार पर भरोसा किता कने प्रभु यीशु मसीह पर भरोसा करणा लगी पे। 22 तालू इना होईयां गल्लां ती खबर यस्शलेम शेहरे दिया कलीसिया सुणी, कने उना

बरनबास जो अन्ताकिया शेहर भेजया। 23 सै ओथु पुज्जी करी, कने परमेश्वरे दे अनुग्रह जो दिखीकरी खुश होया, सारयां जो उपदेश दिता की तन मन लाईकरी प्रभु सोगी लिपटी रिया। 24 बरनबास इक भला माणु था, कने पबित्र आत्मा कने भरोसे ने भरई गिया था, कने होर मते लोकां प्रभु यीशु मसीह पर भरोसा किता। 25 तालू बरनबास अन्ताकिया शेहर छडी करी शाऊल जो तोपणे तांई तरसुश शेहर जो चली गिया। 26 कने जालू उसने मिल्ला तां उसयो अन्ताकिया शेहर जो लेई आया, कने इयां होया की शाऊल कने बरनबास इक साले दीकर कलीसिया सोगी मिलदे कने मते लोकां जो यीशु मसीह दे बारे च सिखदरे रे, कने चेलयां जो सारयां ला पहले अन्ताकिया शेहर च ही मसीही बोलया। 27 उना रोजां च केई भरोसा करणे बाले जडे परमेश्वरे दा संदेश देणेबाले थे, यस्शलेम शेहर ला अन्ताकिया शेहर जो आए। 28 उना चे अगबूसे नाऐ दे परमेश्वरे दा संदेश देणेबाले खडे होईकरी पबित्र आत्मा दिया प्रेरणा ला ऐ दसया, की सारे संसारे च बडा बड्हा अकाल पोणा है, कने सै अकाल सम्राट क्लौदियुस दे बेले पिया। 29 तालू चेलयां यहदिया प्रदेशे दे मसीह पर भरोसा करणे बालयां तांई अपणीं पीच दे साबे ला सहायता देणे दा फेसला किता। 30 कने उना इयां ही किता, कने बरनबास कने शाऊल दे हथे अगुवां बाल कुछ पैसे भेजी दिते।

**12** उस बकत हेरोदेस राजे कलीसिया दे कुछ लोकां जो दुख देणे तांई बन्दी बणाई लिया। 2 कने उनी प्रेरित याकूबे जो तलवारा ला मरवाई दिता, जडा प्रेरित यहून्ना दा भाई था। 3 जालू उनी दिखया, की यहदी लोक इसला खुश होंदे न, तां उनी पतरसे जो भी पकडी लिया। सै अखमीरी रोटीया दे त्योहारे दा बकत था। 4 कने राजा हेरोदेसे उसयो पकडी कर जेला च पाई दिता, कने उदी रखबालिया तांई, चार-चार सिपाईयां दे चार दलां दा पेहरा लाई दिता। कने सै चांदा था की फसह दे त्योहारे बाद लोकां सामणे उदा न्याय करे। 5 पतरसे जो कुछ दिना तांई जेला च रखया, पर कलीसिया उदे तांई मन लाईकरी परमेश्वरे ला प्राथना करा दी थी। 6 कने जालू राजा हेरोदेसे उदा न्याय करणे तांई उसयो लोकां सामणे लोंणे बाला था, उसला इक रात पहले पतरस दों सुंगला ला बनया, दों स्पाईयां दे बिच सुतया था, कने पहरे दार दरबाजे पर जेला दी रखबाली करा दे थे। 7 तां अचानक प्रभु दा इक स्वर्गदूत पतरसे बखे आई खडोता कने उस कोठरी च इक चमकलीली लौ होई गेई, कने उनी पतरसे दियां पसलिया पर हथ मारी करी उसयो जगाया, कने बोलया, “उठ, जल्दी उठ।” कने उदे हथां ला सुंगल खुली करी पेई गे। 8 तालू स्वर्गदूते उसयो बोलया, “लके बन, कने अपने जुतलां पाई ले।” उनी तियां ही किता, फिरी स्वर्गदूते उसयो बोलया, “अपणे बाहरी कपडे जो पाई करी मेरे पिच्छे चली पो।” 9 सै निकली करी उदे पिच्छे चली पिया, पर सै ऐ नी जाणदा था की जडा कुछ स्वर्गदूत करा दा है, ऐ सच्च था, पर सै ऐ समझा दा था की मै दर्शण दिख दा है। 10 तालू सै चली करी पहले कने दुऐ पहरे ला निकली करी उस लोहे दे फाटके पर पुज्जे, जडा शेहरे पासे लेई जांदा था, सै फाटक उना तांई अपु ही खुली गिया, कने सै निकली करी इकी गलिया च होईकरी गे, इतणे च स्वर्गदूत उसयो छडी करी चली गिया। 11 तालू पतरसे होशा च आई करी बोलया, “हण मिंजो सच्च पता लगी गिया है, की प्रभुऐ अपना स्वर्गदूत भेजी करी मिंजो राजा हेरोदेसे दे हथे ला छुड़ाई लिया है, कने यहदी अगुवां दी सारी आस तोडी दिती।” 12 ऐ जाणी करी की परमेश्वरे उसयो बचाई लिया है, तां सै मरियम दे घरे गिया, जडी यहून्ना दी माता थी, कने उदा दुज्जा ना मरकुस भी था। ओथु मते चले गिटे होईकरी प्राथना करा दे थे। 13 जालू पतरसे बाहरे बाले दरबाजे जो खडकाया तां स्दे नाऐ दी इक दासी सुणने तांई आई। 14 कने पतरसे दी अब्राज पछेणी करी, खुशिया दे मारे उना दरबाजा नी खोलया, पर दोडी करी अंदर गेई, कने दसया की पतरस दरबाजे पर खडोतया है। 15 उना उसा जो बोलया, तू पागल है। पर सै अडी रेई की सै पतरस ही है, तालू उना बोलया, “सै पतरसे दा स्वर्गदूत होणा।” 16 पर पतरस दरबाजा खडकांदा रिया कने उना दरबाजा खोलया, कने उसयो दिखीकरी हेरान होई गे। 17 तालू पतरसे उना जो हथे ला इशारा किता की चुप रिया, कने उनी दसया की प्रभुऐ कियां मिंजो जेला ला कडी लयोंदा है। फिरी बोलया, “याकूब कने भाईयां जो ऐ गल्ल दसी दिनयो।” तालू पतरस निकली करी दुज्जी जगा जो चली गिया। 18 ब्यागा जेला दे सिपाईयां च बडा हल्ला पेई गिया की, पतरस कुथु गिया। 19 जालू राजा

हेरोदेस उसयो तोपणे दा हुकम दिता पर सै तोपी नी सके, तां पहेरे दारां ला पृथलाख किती कने जालू सै जबाब नी देई सके तां उना जो मारणे दा हुकम देई दिता, कने पारस यहूदिया प्रदेशे जो छडी करी कैसरिया शेहरे च जाई करी रेंणा लगा। 20 राजा हेरोदेस सूर कने सैदा शेहरे दे लोकां ला बडा जादा गुस्सा था। इस तांई उना शेहरां दे लोक राजा हेरोदेस ला मिलणे तांई इक मन होईकरी आये। सारयां ला पेहले, उना बलास्तुस ला सहायता मंगी जडा राजे दा खास कर्मचारी था। तां उना राजा हेरोदेसे ला शान्ति स्थापना तांई बोल्या क्योकि सै अपने खाने पिणे दियां जुस्ततां तांई राजे दे देशे पर निर्भर थे। 21 जिस रोजे राजा हेरोदेसे उना शेहरे दे लोकां ने मिलणे दा फेसला किता, उस रोज सै राज कपडे पाई करी सिहांसने पर बैठा, कने प्रजा जो भाषण देणा लग्गा। 22 कने लोक उदी बडाई करणे तांई ऐ बोल्णा लगे कि, “ऐ तां माणुऐ दी नी, पर कुसी देवते दी अबाज है।” 23 उसी बेले प्रभुऐ दे इकी स्वर्गदूते आई करी राजा हेरोदेस पर वार किता क्योकि उनी परमेश्वरे दी महिमा नी किती कने उदे शरीर च कीडे शेऊं गे कने सै मरी गया। 24 पर परमेश्वरे दा बचन पल्लादा गिया कने भरोसा करणे बालयां दी गिणती बददी गेई। 25 जालू बरनबास कने शाऊले यहूदिया प्रदेशे च अपनी सेवा दे कम्मे जो पूरा करी लिया तां सै यरूशलेम शेहरे ला अन्ताकिया शेहरे जो मुडी आऐ। यहून्ना जिसयो मरकुस भी बोल्दे न सै सोगी था।

**13** अन्ताकिया शेहरे दिया कलीसिया च परमेश्वरे दा संदेश देणेबाले कने गुरु थे; मतलब की बरनबास कने शमौन जिदा दुज्जा ना निगर भी था; कने लूकियुस कुरेनी शेहर, कने चौथाई देशे दे राज हेरोदेसे दा दूध भाई मनाहेम कने शाऊल। 2 जालू सै बरत रखीकरी प्रभु दी भक्ति करा दे थे, तां पबित्र आत्मा बोल्या, “मेरे तांई बरनबास कने शाऊल जो मेरी सेवा करणे तांई लग करा जिदे तांई मैं उना जो सदया है।” 3 तालू उना बरत कने प्रार्थना करिरी कने उना पर हथ रखीकरी उना जो परमेश्वरे दा कम्म करणे तांई भेजया। 4 शाऊल कने बरनबास पबित्र आत्मा दे जरिये भेजे गे, सै अन्ताकिया शेहर ला सिलुकिया शेहरे दिया बन्दरगाह जो गे, कने ओथु ला जहाजे पर चढी करी साइप्रस टापू दी सलमीस बंदरगाह जो चली गे। 5 सलमीस शेहर च पुज्जी करी, उना परमेश्वरे दा बचन यहूदी जंज घरां च सुणाया, कने यहून्ना जिसयो मरकुस भी बोल्दे थे सै उना दी सहायता करणे तांई उना सोगी था। 6 इदे बाद उना पुरे टापूऐ च इक शेहर ला दुज्जे शेहर दी यात्रा किती कने आखिर च पाफुस शेहरे च पुज्जे। ओथु उना जो बार-यीशु नाऐ दा इक जादूगर मिल्ला जडा यहूदी कने झूठा संदेश देणेबाला था। 7 सै टापूऐ दे राज्यपाल सोगी था, जिदा ना सिरगियुस पौलुस था, कने सै बडा बुद्धिमान माणु थे। राज्यपाले बरनबास कने शाऊल जो परमेश्वरे दा बचन सुणने तांई अपने बाल सदया। 8 पर जादूगर बार-यीशु, जिसया युनानी भाषा च एलीमास बोल्दे न, उना दा बिरोध करदा रिया, उदी कोशिश थी की सै राज्यपाल जो यीशु मसीह पर भरोसा करणे ला रोके। 9 तालू शाऊले जिदा ना पौलुस भी है, पबित्र आत्मा ला भरूई करी जादूगरे पासे इक टक लाईकरी दिखीकरी बोल्या, 10 “हे सारे कपट कने चलाकिया ला भरुयो शैताने दी ओलाद, सारिया धार्मिकता दे दुशमण, क्या तू प्रभु दिया सचाइया जो भ्रष्ट करणा नी छडणा? 11 हुण दिख, प्रभु तिजे सजा देणे बाला है, कने तू थोडे बकते तांई अन्ना रेंणा कने तू सूरजे जो नी दिखी सकणा।” तालू झट धुंधलापन कने उदे अगे नेहेरा होई गया, कने सै रुंआं प्रां टटोलणा लग्गा ताकि कोई उदा हथ पकडी करी उदी सहायता करे। 12 तालू राज्यपाले जडा कुछ होया था, दिखीकरी कने प्रभु दियां शिक्षा ला हेरान होईकरी उनी यीशु मसीह पर भरोसा किता। 13 पौलुस कने उदे साथियां पाफुस शेहरे ला समुंद्री यात्रा शुरू किती कने सै पंफूलिया प्रदेशे दे पिरागा शेहरे च जाई पुज्जे, कने यहून्ना मरकुस उना जो छडी करी यरूशलेम शेहरे जो बापस आई गया। 14 कने पिरागा शेहरे ला अगे चली करी गलातिया प्रदेशे दे पिसिदिया जिल्ले दे बखे अन्ताकिया शेहर च पुज्जे; कने सन्ते दे रोजे च यहूदी जंज घर च जाई करी बैठी गे। 15 मूसा दी व्यवस्था कने परमेश्वरे दे संदेश देणेबालयां दी कताबां ला पढने बाद यहूदियों दे जंज घरे दे सरदारां उना जो बोली भेजया, “हे भाईयो, अगर तुसां चे कुसी बाल लोकां जो शिक्षा देणे तांई तुहाडे मने च कोई बचन है तां बोला।” 16 तालू पौलुस खडा होया कने उना जो हथे ला चुप रेणे दा इशारा करिरी बोल्या, “हे इस्राएलियां, कने परमेश्वरे ला डरने बाले होर जाति दे

लोको, सुणा।” 17 इना इस्राएली लोकां दे परमेश्वरे साडे पूर्वजां जो चूणी लिया है, कने जालू ऐ मिस्र देशे च परदेसी होईकरी रेंदे थे, तां उना जो गिणतिया च बदाई दिता; कने उना जो अपणिया शक्तिया ला उस देशे ला कडी लांदा। 18 कने सै कोई चालियां साला दीकर सुनसान जगा च उना दी सेहदां रिया, चाहे सै बार-बार परमेश्वरे दे हुकम दे खिलाफ जां दे थे। 19 कने कनान देशे च सत जातियां जो खत्म करिरी उना दा इस्राएली लोकां जो बिरासत च देई दिता। 20 साडे पूर्वजां मिस्र देशे च पुजणे बाद चार सौ पजां सालां बाद कनान देशे पर अधिकार करणा शुरू किता, इदे बाद परमेश्वरे दे संदेश देणेबाले शमूएल दे ओणे दीकर परमेश्वरे इस्राएल दे लोकां पर राज करणे तांई मुखिए नियुक्त किने। 21 जालू शमूएल हले दीकर उना दा अगुवा ही था, उना इक राजा मंगया, तालू परमेश्वरे बिन्यामीन दे गोत्र च इक माणुऐ जो मतलब की कीश दे पुत्र शाऊले जो उना दा राजा बणाया, उनी चालियां सालां दीकर इस्राएल दे लोकां पर राज किता। 22 फिरी परमेश्वरे शाऊल जो राजे दे पद ला हटाई करी उदीया जगा पर दाऊदे जो उना दा राजा बणाया, जिदे बारे च उनी गबाई दिती, मिजे इक माणु, किशे दा पुत्र दाऊद, मेरे मने दिया इच्छा दा माणु मिली गया है। उनी मेरियां सारियां इच्छा पुरियां करणियां। 23 उदे ही बंशे चे परमेश्वरे अपने बायदे दे अनुसार इस्राएले तांई इक उद्धारकर्ता, मतलब की यीशु भेजया। 24 जिदे ओणे ला पेहले यहून्ने प्रचार किता की सारे इस्राएली लोकां जो अपने पापां दा पश्चाताप करणे कने परमेश्वरे पासे फिरणे कने बपतिस्मा लेणे दी जरूरत है। 25 जालू यहून्ना अपनी सेवा पुरिया करणे पर था, तां उनी बोल्या, तुसां मेरे बारे च क्या सोचदे न? मै मसीह नी है! दिखा, मेरे बाद इक ओणे बाला है, सै बडा जादा तहान है, मै तां उदे जुतयां दे तस्मे खोलणे दे काबिल भी नी है। 26 “हे मसीह भाईयो, तुसां जडे अब्राहमे दी ओलाद न कने परमेश्वरे ला डरणे बाले होर जाति दे लोको, परमेश्वरे साडे बाल यीशु दे बारे च ऐ संदेश भेजया है जडा लोकां जो बचांदा है। 27 यरूशलेम शेहरे दे लोकां कने उदे अगुवां मसीह जो पछेणया नी कने उना परमेश्वरे दे संदेश देणेबालयां दे बचना जो नी समझया जिना जो सै हर सन्ते दे रोजे पढे थे। इस तांई उना उसयो दोषी बोली करी परमेश्वरे दे संदेश देणेबालयां दे बचना जो पूरा किता। 28 उना जो मौत दी सजा देणे दे लायक उदे च कोई दोष नी मिल्ला, फिरी भी उना राज्यपाल पिलातुसे ला बिनती किती, की उसयो मारी दे। 29 कने जालू उना सै सब कुछ किता जडा पबित्र शास्त्र उदे बारे च बोल्दा है, तां उदिया लाशा जो सुली ला उतारी करी कबरा च रखया। 30 पर परमेश्वरे उसयो मरयां चे जिन्दा किता, 31 कने जडे चेले यीशुऐ सोगी गलील प्रदेश ला यरूशलेम शेहरे च आयो थे, उना जो बडे रोजां दीकर मिलदा रिया; सै हण लोकां सामणे उदे गबाह न। 32 असां तुहांजो उसा प्रतिज्ञा दे बारे च जडी पूर्वजां ला कितियो थी, ऐ श्भसमाचार सुणां दे न, 33 की परमेश्वरे यीशुऐ जो मरयां ला जिन्दा करिरी, साडे सोगी बायदे जो पूरा कितया, जडे उना दी संतान न; जियां दुज्जे भजन संहिता च परमेश्वरे मसीह दे बारे च बोल्या है की, तू मेरा पुत्र है, अज ही मै तेरा पिता बणी गया है। 34 परमेश्वरे यीशुऐ जो मरयां चे जिन्दा करणे दा बायदा कितया था, कने उसयो कबर च सडना नी दिता, परमेश्वरे ऐ बोल्या है, मै तिजे सै पबित्र कने पक्की आशीष देणी जिना जो देणे दा बायदा मै राजा दाऊदे जो कितया था।” 35 राजा दाऊदे ऐ गल्ल होर भजन संहिता च भी बोल्दा है की, “तू अपने पबित्र जन जो सडना नी देणा।” 36 क्योकि राजा दाऊद तां परमेश्वरे दिया इच्छा दे अनुसार अपने बकते ने सेवा करिरी मरी गया, कने अपने पूर्वजां बाल जाई रिया, कने सडी भी गया, इसला सांजो पता लगदा है की दाऊद इस भजन च अपने बारे च गल्ल नी करा दा था। 37 पर सै यीशु मसीह दे बारे च बोला दा है जिसयो परमेश्वरे मरयां चे जिन्दा किता, कने सै सडया भी नी। 38 इस तांई, हे यहूदी भाईयो, मै चांदा है की तुसां ऐ जाणी लिया की यीशु मसीह दे जरिये ही तुहांजो पापां दी माफी मिलदी है। 39 तुसां कदी भी मूसा दिया व्यवस्था दे जरिये परमेश्वरे दिया नजरा च धर्मी नी बणी सकदे। पर हर इक जगा जडा यीशु मसीह पर भरोसा करदा है, सै परमेश्वरे दिया नजरा च धर्मी है। 40 इस तांई ध्यान रखा, की जडा परमेश्वरे दे संदेश देणेबालयां बोल्या है, सै तुहाडे सोगी ना हो: 41 हे निंदा करणे बालयो, दिखा, हेरान होआ, कने मिटी जा; क्योकि मै तुहाडे दिना च इक कम्म करदा है; ऐसा कम्म, की अगर कोई तुसां ला उदी चर्चा करे, तां तुसां कदी भरोसा नी करणा। 42 जालू

पौलुस कने बरनबास यहदी जंज घरे ला बाहर निकला दे थे, तां लोक उना ला बिनती करणा लग्गे की, अगले सब्दे दे रोजे ऐ गल्लां सांझो दोबारा सुणानयो। 43 जालू सभा खत्म होई, तां मते यहदी कने मते होर जातियां दे लोक जडे यहदी मते चे आयो थे पौलुस कने बरनबासे पिच्छे चलीं पे, कने उना जो गल्लां करिरी समझाया, की परमेश्वरे दे अनुग्रह च बणी रिया। 44 अगले सब्दे दे रोज शेहरे दे लगभग सारे लोक परमेश्वरे दा बचन सुणने जो गिठे होईं गे। 45 पर जालू यहदी अगुवां बडिया भिडा जो दिखया तां सै प्रेरितां ला जलना लग्गे, कने पौलुसे दे बचना दे बिबिध च बोल्या कने उदी बेईजती किती। 46 तालू पौलुस कने बरनबासे बिना डरयो बोल्या, जरूरी था, की परमेश्वरे दा बचन पेहेले तूहांजो सुणया जांदा, पर तुसां उसयो नकारी दिता, कने अपने आपे जो हमेशा दिया जिन्दगिया दे लायक नी समझदे न, तां हुण, असां होरनी जातियां बाल जाणा। (aiōnios g166) 47 क्योकि प्रभु यीशुऐ सांझो ऐ हुकम दितया है, “मैं तिजो होरनी जातियां तांई ज्योति बनाया है, तूहांजो संसार च हर जगा लोकां जो दसणा है की मैं कियां उना जो बचाई सकदा है।” 48 ऐ सुणीकरी होर जातियां खुश होइयां, कने सै परमेश्वरे दे बचने दी बडाई करणा लग्गे, कने जितणे लोक हमेशा दिया जिन्दगिया तांई बनायो थे, उना भरोसा किता। (aiōnios g166) 49 तालू प्रभु यीशु दा बचन उस इलाके च सारे पासे फेलणा लग्गा। 50 पर यहदियां दे अगुवां भक्त कने कुलीन जनानिया जो कने शेहरे दे बडे लोकां जो भडकाया, कने पौलुस कने बरनबास पर हमला करवाई करी उना जो सीमा दे बार कडी दिता। 51 तालू पौलुस कने बरनबासे उना सामणे अपने पैरां दी धुड झाडी, उना जो ऐ दसणे तांई की परमेश्वरे उना जो ठुकराई दितया है कने उना जो सजा देंगी। फिरी सै इकुनियुम शेहरे जो चलीं गे। 52 कने चेले अन्ताकिया शेहरे च आनंद ला कने पबित्र आत्मा ने भरई गे।

**14** इकुनियुम शेहर च ऐसा होया की पौलुस कने बरनबास यहदी जंज घर च सोगी-सोगी गे, कने ऐसियां प्रभावशाली गल्लां कितियां की, यहदियां कने होर जातियां दोना चे मतयां यीशु पर भरोसा किता। 2 पर भरोसा नी करणे बाले यहदियां होरनी जातियां दे मन मसीह भाईयां दे खिलाफ च भडकाए, कने उना दे मना च इना दे खिलाफ जहर भरी दिता। 3 कने पौलुस कने बरनबास मते रोजां दीकर ओथु रे, कने प्रभु यीशु दे भरोसे पर हिम्मत ला गल्लां करदे रे: कने प्रभु यीशुऐ उना जो अदभुत चिन्न चमत्कार करणे दी शक्ति दिती, ऐसा करी के यीशुऐ ऐ साबित किता की जिस अनुग्रह दे बारे च सै प्रचार करा दे न सै सच्चा है। 4 पर शेहरे दे लोकां च फुट पेई गियो थी, इसला कितणे ही तां यहदियां पासे, कने कितणे ही प्रेरितां दे पासे होईं गे। 5 तालू होर जातियां कने यहदी लोकां अपने सरदारां सोगी मिली करी उना पर हमला कने पथर मारणे फेसला किता। 6 जालू पौलुस कने बरनबास जो इसा गल्ला दे बारे च पता लग्गी गिया, कने सै लुकाउनिया प्रदेशे दे लुक्का कने दिखे शेहरां च, कने अखे बखे दे इलाके च नठी गे। 7 पौलुस कने बरनबासे ओथु पुज्जी करी लोकां जो शुभसमाचार सुणया। 8 लुक्का शेहर च इक माणू बैठया था, उदे पैर कमजोर थे। सै जन्मे ला ही लगडा था, कने कदी नी चलया था। 9 सै पौलुसे जो गल्लां करदे सुणांदा था कने पौलुसे दिखया की उनी भरोसा करी लिया है कने सै खरा होई सकदा है। 10 कने जौरे ला बोल्या, “अपणे पैरां भार सीधा खडा हो।” तालू सै उछली करी चलणा फिरणा लग्गी पिया। 11 लोकां पौलुस दा ऐ कम्म दिखीकरी लुकाउनिया बोलिया च जौरे ने बोल्या, “देवता माणुऐ दे स्मे च साडे बाल आया है।” 12 कने उना बरनबास जो यूनानी देवता ज्यूस दा ना दिता कने पौलुस जो हिर्मस दा ना दिता, क्योकि पौलुस मुख्य संदेश देणे बाला था। 13 कने ज्यूस दे उस मंदरे दा पुजारी जडा उना दे शेहरे सामणे था, दांद कने फुलां दे हार फाटके पर लेई आया क्योकि सै लोकां सोगी बलि चढाणा चांदा था। 14 पर बरनबास कने पौलुस प्रेरितां जालू सुणया, तां सै बडे परेशान होऐ कने अपने कपडे फाडीं दिते, कने भिडा च चलीं गे, कने पुकारी करी बोलणा लग्गे, 15 “हे लोको, तुसां क्या करदे न? असां भी तूहाडे सांई दुखे सुख भोगणे बाले माणु न, कने तूहांजो शुभसमाचार सुणादे न, ताकि तुसां इना बेकार दियां चीजां ला लग होईकरी जिदे परमेश्वरे पासे आईं जा, जिनी स्वर्ग कने धरती कने समुदे कने जडा कुछ उना च है बनाया है। 16 उनी होऐ युगां च सारियां जातियां जो अपने-अपने रस्ते च चलणा दिता। 17 सै हमेशा अपने होणे दा सबूत उना खरियां चीजां ला दिन्दा है जडा सै करदा है, कने अम्बरे

ला बरखा कने फलां बाली रित देईकरी तूहाडे तांई खाणा कने तूहाडे मना जो खुशिया ला भरदा रिया।” 18 ऐ बोली करी भी उना लोकां जो बडी मुक्किला ला रोकया की उना तांई बलिदान मत कर। 19 पर कितणे ही यहदियां अन्ताकिया कने इकुनियुम शेहरां ला आईं करी लोकां जो अपने पासे करी लिया, कने पौलुसे जो पथरा ने मारया कने उसयो मरया समझीकरी घसीटी करी शेहरे बाहर लेईं गे। 20 पर जालू चेले उदे चारो पासे आईं खडोते, तां सै उठी करी शेहरे जो बापस मुडी गिया कने दुऐ रोजे बरनबासे सोगी दिखे शेहरे जो चलीं गिया। 21 पौलुस कने बरनबास दिखे शेहरे दे लोकां जो शुभसमाचार सुणाईं करी कने मते चेले बणाईं करी। तालू सै लुक्का शेहरे जो बापस चलीं गे। कने फिरी ओथु ला इकुनियुम शेहरे जो गे, कने फिरी सै पिसिदिया प्रदेशे दे अन्ताकिया शेहरे जो गे। 22 कने हर शेहरे च चेलयां दे मना जो मजबूत करदे रे कने ऐ शिक्षा दिन्दे थे, की भरोसे च बणी रिया, कने ऐ बोलदे थे, “सांझो मते दुख झेली करी परमेश्वरे दे राज्य च दाखल होणा पोणा।” 23 कने उना हर इक कलीसिया च उना तांई अगुवे बणाऐ, कने प्राथना कने बरत करिरी उना जो प्रभु जो सोपया जिदे पर उना भरोसा कितया था। 24 कने पिसिदिया प्रदेशे ला होंदे होऐ सै पंफुलिया जिल्ले च जाईं पुज्जे; 25 कने उना पंफुलिया जिल्ले दे पिरागा शेहरे च परमेश्वरे दे बचने दा प्रचार किता कने अन्तलिया शेहरे जो आईं गे। 26 कने अन्तलिया शेहरे ला जहाजे पर अन्ताकिया शेहर जो मुडी आये, जिथु ला उना जो परमेश्वर दे अनुग्रह च सौपीकरी उस कम्मे तांई भेजया था जिसयो उना जो पूरा किता। 27 अन्ताकिया शेहरे च पुज्जी करी उना कलीसिया गठेरी कने दसया, की परमेश्वरे साडे सोगी होईकरी कदे बडे-बडे कम्म किते कने कियां परमेश्वरे होर जातियां जो यीशु मसीह पर भरोसा करणे दे काबिल बनाया। 28 ओथु पौलुस कने बरनबास चेलयां सोगी मते रोज रे।

**15** कुछ यहदी मसीह पर भरोसा करणे बाले यहदिया प्रदेशे ला अन्ताकिया शेहरे जो आऐ कने भरोसा करणे बालयां जो सिखाणा लग्गे: “अगर मूसा दिया व्यवस्था दे रिबाजे ला तूहाडा खतना नी होऐ तां तूहाडा उद्धार नी होई सकदा।” 2 जालू पौलुस कने बरनबास दा उना सोगी झगडा कने बडी बेहस होई तां कलीसिया दे अगुवां पौलुस कने बरनबास जो कने उना सोगी कुछ होर चेलयां जो यरूशलेम शेहरे जो जाणे तांई चुणया, ताकि सै इसा गल्ला दे बारे च प्रेरितां कने कलीसिया दे अगुवां सोगी चर्चा करन। 3 कलीसिया उना जो यात्रा तांई पैसे कने रोटीयां दा इंतजाम कराई करी भेजया, कने सै फीनीके कने सामरिया प्रदेशां ला होंदे होऐ कने ओथु दे भरोसा करणे बालयां जो दसया की होर जातियां दे लोकां कियां अपने पापां जो मन्नी लिया कने गलत कम्म जो छडी करी यीशु मसीह पर भरोसा किता है। 4 ऐ शुभसमाचार सुणीकरी सारे भरोसा करणे बाले भाईं बडे खुश होऐ। 4 जालू सै यरूशलेम शेहरे च पुज्जे, तां कलीसिया कने प्रेरित कने अगुवे उना सोगी खुशिया ला मिल्ले, कने पौलुस कने बरनबासे दसया की परमेश्वरे उना सोगी होईकरी कदे-कदे कम्म किते थे। 5 पर फरीसियां दे दले दे लोकां चे जिना भरोसा कितया था, उना चे कितणयां ही उठी करी बोल्या, “होर जातियां जो खतना करणे कने मूसा दी व्यवस्था जो मणणे दा हुकम देणा चाईदा।” 6 तालू प्रेरित कने अगुवे इसा गल्ला दे बारे च बिचार करणे तांई गिठे होऐ। 7 तालू पतरसे बडी लम्बी बेहस होई जाणे बाद खडोई करी उना जो बोल्या, “हे मसीह भाईयो, तुसां जाणदे न, कि मते रोज होऐ न, की परमेश्वरे तुसां चे मिजो चुंणी लिया है, ताकि मेरे जरिये होर जातियां शुभसमाचार दा बचन सुणीकरी भरोसा करन।” 8 कने मने जो जाणने बाले परमेश्वरे उना जो भी साडे सांई पबित्र आत्मा दिता, इयां करिके उनी दसया की उनी होर जातियां जो अपने लोक होणे तांई चुंणी लिया है। 9 कने भरोसे दे जरिये उना दे मन शुद्ध करिरी सांझो च कने उना च कोई भी फरक नी रख्या। 10 तां हुण तुसां कने परमेश्वरे जो परखदे न, की साडी यहदी व्यवस्था कने रिती रिबाजां जो मणने तांई इना होर जातियां दे भरोसा करणे बालयां पर भारी बोज पान, जिसयो ना साडे बाप दादे चुकी सकदे थे कने ना असां चुकी सकदे न। 11 इयां करणा ठीक नी है, साडा भरोसा तां ऐ है कि जियां उना जो प्रभु यीशुऐ दे अनुग्रह ला उद्धार मिलणा, तियां ही सांझो भी मिलणा, ना की मूसा दिया व्यवस्था जो मन्नी करी। 12 तालू सारी सभा चुपचाप होईकरी बरनबास कने पौलुस दी सुणा लग्गी, जियां ही उना अदभुत चिन्न चमत्कारां दे बारे दसया जडे

परमेश्वरे उना दे जरिये होर जातियां च किते। 13 जालू उना बोलणा बंद कित्ता, तां याकूब बोलणा लग्गा, “हे मसीह भाईयो, मेरी सुंणा।” 14 शमीन पतरसे समझाया, कि परमेश्वरे पेहली बरी होर जातियां चे कुछ लोकां जो अपने लोक होणे तांई चुणी करी उना जो आशीष दिती। 15 कने होर जातियां दा परमेश्वरे दे लोक बणना ऐ उसा गल्ला ला सहमत होदा है, जिदे बारे च परमेश्वरे दे संदेश देणेबालयां पबित्र शास्त्र च बडे पेहेले लिखया था। 16 “तालू मैं बापस ओणा कने दाऊद दे राज्य जो दुबारा बाणाणा जडा उदे दुशमणा वरबाद करी दितया है, कने उसयो दुबारा बणाई देणा। 17 इस तांई होर सारे लोक कने सारियां होर जातियां दे लोक जिना जो मैं अपने लोक होणे तांई चुणया है, उना प्रभु जो तोपणा, 18 ऐ सेई प्रभु बोलदा है जडा बडे पेहेले ला इना गल्लां दा समाचार दिन्दा आया है। (aiōn g165) 19 इस तांई मेरा बिचार ऐ है, कि सांझो होर जातियां तांई परमेश्वरे बाल मुडना कठिन नी बणाणा चाईदा; 20 पर असां उना जो इक चिट्ठी लिखी भेजन, की सै उस खाणे जो ना खान जिसयो लोकां मूर्तियां जो चढाया हो, कने ना व्यभिचार करदे कने ना ही गल्लां घोट्टी करी मारयो जानवरां दा मांस खादे कने ना ही खून खादे। 21 क्योकि पुराणे बकते ला शेहरे-शेहरे च मूसा दिया इस व्यवस्था दे प्रचार करणे बाले होंदे आये न, कने सै हर सब्ते दे रोजे यहदी जंज घरां च पढी जांती है।” 22 तालू यरूशलेम शेहरे दिया सारिया कलीसिया कने प्रेरितां कने अगुवां जो ऐ खरा लग्गा, कि अपने चे कुछ माणुआं जो चुणी करी पौलस कने बरनबासे सोगी अन्ताकिया शेहरे जो भेजन, उना इस तांई यहदा जो, जिसयो बरअब्बा भी बोलदे न, कने सीलास जो चुणया, कने ऐ दोनो कलीसिया च सारयां ला इज्जतदार अगुवे थे। 23 कने सै इसा चिठिया जो अपने सोगी लेई गे जिसा च लिखया था की, “ऐ चिट्ठी प्रेरितां कने अगुवां दिया तरफा ला है जडे तुहाडे भाई न, असां अन्ताकिया शेहरे दे कने सीरिया कने किलिकिया प्रदेशां दे होर जातियां दे लोकां जो जडे यीशु मसीह पर भरोसा करदे न, उना जो नमस्ते भेजदे न। 24 असां सुणया है कि, साडे ऐथु यरूशलेम ला कुछ अगुवे ओथु गे कने उना दियां गल्लां ला तुहांजो बुरा लग्गा कने तुसां दुखी होऐ, पर असां उना जो हुकम नी दितया था। 25 इस तांई असां इक मन होईकरी यहदा कने सीलास जो चुणने दा फेसला लिया, ताकि उना जो अपने प्यारे भाई बरनबास कने पौलसे सोगी तुहाडे बाल भेजन। 26 ऐ तां ऐसे माणु न, जिना अपने प्राण साडे यीशु मसीह दी सेवा तांई खतरे च पायो न। 27 कने असां यहदा कने सीलास जो भेजया है, जिना तुहाडे सामणे अपने मुरे ला ऐ गल्लां दर्सी देणियां न। 28 पबित्र आत्मा जो कने सांझो भी ऐ ठीक लग्गा कि इना जरूरी गल्लां जो छडी करी, तुहांजो पर होर बोझ ना पान; 29 कि तुसां मूर्तियां अगो चढायो खाणे जो मत खादे, कने व्यभिचार कने मला घोट्टी करी मारयो जानवरां दा मांस कने उना दा खून मत खादे। अगर तुसां इना ला दूर रेंगे तां तुहाडा भला होणा। शुभकामना।” 30 फिरी कलीसिया उना जो ओथु ला भेजी दिता कने अन्ताकिया शेहरे च पुज्जे, कने सभा जो गठेरी करी उना जो चिट्ठी देई दिती। 31 कने सै उस उपदेशे जो पढी करी बडे खुश होऐ। 32 कने यहदा कने सीलासे जडे अनु भी परमेश्वरे दे संदेश देणेबाले थे, मतियां गल्लां ला भरोसा करणे बाले भाईयां जो सिखा देईकरी प्रोत्साहित कने मजबूत कित्ता। 33 (यहदा कने सीलास थोडे हप्तें ओथु र, कने मसीह भाईयां उना जो शांति दी आशीष देईकरी यरूशलेम शेहरे दिया कलीसिया च बापस भेजी दिता।) 34 पर सीलासे अन्ताकिया शहरे च रेणे दा फेसला कित्ता, इस तांई यहदा किल्ला ही यरूशलेम शेहरे जो बापस चली गिया। 35 कने पौलस कने बरनबास अन्ताकिया शेहरे च रेई पे, कने होर मते लोकां सोगी प्रभु यीशु दे बचना दी शिक्षा कने शुभसमाचार सुणादें रे। 36 थोडे बकत बाद पौलसे बरनबासे जो बोलया, “जिना-जिना शेहरां च असां प्रभु दे बचन सुणयो थे, ओआ, ओथु बापस जाई करी अपने विवासी भाईयां जो दिखदे न कि सै कदे न।” 37 तालू बरनबासे यहन्ना जो जिसयो मरकुस बोलदे न, सोगी लेई जाणे दा बिचार कित्ता। 38 पर पौलसे बोलया यहन्ने हार मन्नी लियो है कने सांझो छडी करी चली गिया है जालू असां पफूलिया इलाके च थे, इस तांई उसयो सोगी लेई जाणा खरा नी समझया। 39 ऐसी बेहस होई कि पौलस कने बरनबास इकी दुज्जे ला लग होई गे, कने बरनबास, मरकुस जो लेईकरी जहाजे पर साइप्रस टापु जो चली गिया। 40 पर पौलसे सीलास जो चुणी लिया, कने मसीह भाईयां उना जो परमेश्वरे दे अनुग्रह च सौपी दिता कने फिरी सै दोनो ओथु ला अन्ताकिया

शेहरे ला चली गिया। 41 कने फिरी सै पुरे सीरिया कने किलिकिया प्रदेशां च गे कने कलिसियां दे भरोसा करणे बालयां जो प्रोत्साहित करदे गे।

**16** फिरी पौलस दिरबे कने लुक्का शेहरे च भी गे, कने ओथु तीमुथियस नाऐ दा इक चेला था। उदी माता यहदी विवासी थी, पर उदा पिता युनान देशे दा था। 2 सै लुक्का इकनियम शेहरां दे भरोसा करणे बाले भाईयां चे इज्जतदार था। 3 पौलसे दी इच्छा थी कि तीमुथियस उदे सोगी चले, कने उनी तीमुथियस दा खतना इस तांई करया ताकि उस जगा दे यहदी लोक उदी सुणन, क्योकि सै सारे जाणदे थे, कि उदा पिता युनानी था। 4 पौलस कने उदे सोगी शेहरे-शेहरे जाई करी सै उना नियमां जो जडियां यरूशलेम शेहरे दे प्रेरितां कने अगुवां बणाईयां थियां, उना जो विवासायां बाल पुजादे थे ताकि सै उना नियम दा पालन करन। 5 इयां कलीसिया भरोसे च मजबूत होंदी गेई कने हर रोज गणतिया च बददी गेई। 6 कने सै फ्रूगिया कने गलातिया प्रदेशां चे होईकरी गे, क्योकि पबित्र आत्मा उना जो आसिया प्रदेशे च बचन सुणणे तांई मना कित्ता। 7 कने उना मूसिया प्रदेशे दे बखे पुज्जी करी, बितुनिया प्रदेश जाणा चांदे थे; पर यीशुऐ दिया आत्मा उना जो जाणा नी दिता। 8 तां सै मूसिया प्रदेशे ला होईकरी बंदरगाह बाले शहर त्रोआस जो आऐ। 9 ओथु पौलसे राती इक दर्शन दिखया कि इक मकिदुनी प्रदेशे दा मर्द खडोतया, कने उसला बिनती करी के बोलदा है, “समुन्द्रे पार उतरी करी मकिदुनिया प्रदेशे च आ, कने साडी सहायता कर।” 10 जालू पौलसे ऐ दर्शन दिखया, तालू असां झट मकिदुनिया प्रदेशे जो जाणे दी योजना बणाई, ऐ समझीकरी कि परमेश्वरे सांझो शुभसमाचार सुणणे तांई सदया है। 11 इस तांई असां त्रोआस शेहरे ला जहाजे जरिये समात्राके टापु च आऐ कने दुज्जे रोजे नियापुलिस शेहरे दिया बंदरगाह च आये। 12 ओथु ला असां फिलिप्पी शेहरे च पुज्जे, जडा मकिदुनिया प्रदेशे दा मुख्य शहर, कने रोमियां दी बस्ती है, कने असां उस शेहरे च थोडे रोजां दीकर रे। 13 सब्ते दे रोजे असां शेहरे दे फाटके बाहर खड्डा बखे ऐ सोची करी गे कि ओथु यहदियों दी प्राथना करणे दी जगा होणी, कने बेईकरी उना जनानिया ने गल्लां करणा लग्गे, जडियां ओथु गडुइया थियां। 14 कने ओथु इक लुदिया नाऐ दी जनानी उना दे बचन सुणा दी थी जडी थुआतीरा शेहरे ला बैजणी कपडे बेचदी थी, सै परमेश्वरे दी भक्त थी, कने परमेश्वरे उसा दा मन खोलया, ताकि सै पौलसे दियां गल्लां पर ध्यान लगाऐ। 15 कने जालू उना अपने पुरे टब्बरे समेत बपतिस्मा लिया, तां उना बिनती कित्ती, “अगर तुसां मिजे परमेश्वरे पर भरोसा करणे बाली समझदे न, तां मेरे घरे रेणा चला,” “कने सै कालियां कने मन्ना करी अपने घरे लेई गेई।” 16 इक रोज जालू असां प्राथना करणे बालिया जगा जो चलयो थे, तां सांझो इक दासी मिली, जिसा च इक ऐसी बुरी आत्मा थी, जिदिया सहायता ला सै भविष्य दिखी लेंदी थी, कने सै अपने स्वामियां तांई मतां कुछ कमाई लेंदी थी। 17 सै पौलसे कने साडे पिच्छे आई करी चिलाणा लग्गी, “ऐ माणु परम प्रधान परमेश्वरे दा दास है, सै तुसां जो दसा दे न कि कियां बची सकदे न।” 18 सै मते रोजां दीकर इयां ही करदी रेई, कने पौलस दुखी होई गिया, कने मुडी करी बुरी आत्मा जो बोलया, “मैं तिजो यीशु मसीह दे नाऐ ने हुकम दिन्दा है, कि इसा चे निकली जा, कने सै तालू ही निकली गेई।” 19 जालू उसा दे मालिके दिखया कि, साडिया कमाईयां दी आस तां चली गेई, तां सै पौलस कने सीलासे जो पकडी करी चौके च प्रधान बाल खिची लेई गे। 20 कने उना जो फौजदारिया दे हाकिमा बाल लेईजाई करी बोलया, “ऐ लोक जडे यहदी न, साडे शेहरे च बडा हंगामा करा दे न, 21 कने ऐसे तरीके दसा दे न, जिना जो अपनाना कने मन्ना रोम देश च रेणे बालयां तांई ठीक नी है।” 22 तालू लोकां दी भीड पौलस कने सीलासे दे बरोध च गिठी होईकरी चढी आई, कने हाकिमा उना दे कपडे फाडी करी उतारी दिते, कने उना जो डंडे मारणे दा हुकम दिता। 23 कने मते डंडे मारी करी उना जो जेला च पाई दिता, कने जेल अधिकारिये जो हुकम दिता कि साबधानी ला उना दी रखबाली करा। 24 कने ऐसा हुकम मिलणे ला उनी उना जो अंदरे बालिया कोठडिया च रखया कने उना दे पैरां जो लकडिया दियां बेडियां ला जकडी दिता। 25 लगबग अधिया राती पौलस कने सीलास प्राथना करदे होऐ परमेश्वरे दे भजन गा दे थे, कने कैदी उना दी सुंणा दे थे। 26 कने इतणे च अचानक इक बडा बडा हिलण होया; ऐथु दीकर कि जेला दियां नियां भी हिली गिईयां, झट सारे दरबाजे खुली गे, कने सारयां दे बंधन खुली गे। 27 कने दरोगा उठी होया, कने जेला दे

दरबाजे खुले दिखीकरी समझया कि सारे कैदी नठी गियो न, कने सै तलबारा कडी करी अपने आपे जो मारणा लग्गा। 28 पर पौलसे जेरे ने पुकारी करी बोलया, “अपणे आपे जो कुछ मत करदा, क्योंकि असां सारे ऐथू ही न।” 29 तालू सै दिव्या मंगाई करी अंदरे गिया कने कमदा होया पौलसे कने सीलासे अग्रे पेई गिया, 30 कने उना जो बार आंणी करी बोलया, “हे सजने, उद्धार पाणे तांई मै क्या करे?” 31 उना बोलया, “प्रभू यीशू पर भरोसा कर, तां तेरा कने तेरे घराने दा उद्धार होणा।” 32 कने उना उसयो कने उदे सारे घरे दे लोकां जो प्रभू दे बचन सुणाए। 33 कने राती उसी बेले उना जो लेईजाई करी उना दे जखम धोते, कने उनी कने उदे लोकां उसी बेले बपतिस्मा लिया। 34 कने उनी उना जो अपने घरे लेईजाई करी, उना अग्रे खांणा रखया, कने सारे घराने समेत परमेश्वर पर भरोसा करिरी खुशी मनाई। 35 जालू अगलिया ब्यागा हकीमा सिपाईयां जो ऐ बोली भेजया कि उना माणूए जो छडी दिया। 36 दरोगे ऐ गल्ल पौलसे जो सुणाई, “कि हाकिमा तुहांजो छडी देण दा हुकम भेजी दितया है, इस तांई हण निकली करी शांतिया ने चली जा।” 37 पर पौलसे उना जो बोलया, “उना सांजो जडे रोम देश च रेणेबाले माणु न, बिना दोष साबित कितयो सांजो लोकां दे सामणे मारया कने जेला च पाया, कने हण क्या सै चुपचाप बाहर निकाली देणा चांदे न? ऐसा नी होणा, पर सै अपु आई करी सांजो बार लेई जान।” 38 सिपाईयां ऐ गल्लां हाकिमा ने बोली दीतियां, कने सै ऐ सुणीकरी की सै रोम देशे दे नागरिक न, सै डरी गे, 39 कने आई करी उना ला माफी मंगी कने बार लेईजाई करी बिनती किती कि शेहेरे ला चली जा। 40 सै जेला ला निकली करी लुदिया दे ऐथू गे, कने चेलयां ला मिली करी उना जो शांति दीती, कने चली गे।

**17** फिरी पौलस कने सीलास अम्फिपुलिस शेहेर कने अपुल्लोनिया शेहेरे ला होईकरी थिस्सलूनिके शेहेरे च आऐ, जिथू यहूदी जंज घर था। 2 कने पौलस रोजे सांई उना बाल गिया, कने तिन सत्तां दे रोजां पर पबित्र शाब्दां ला उना सोगी चर्चा किती। 3 कने उना गल्लां दा मतलब खोली-खोली करी समझांदा था कि मसीह जो दुख होणा, कने मरयां च जिन्दा होणा जरूरी था; “ऐई यीशू जिदे बारे च मै प्रचार करता है, सेई मसिहा है।” 4 उना चे कुछ यहूदियां, कने परमेश्वर दा डर मणणे बाले यूनानियां कने मतिंयां खास जनानियां भरोसा उना दे बचना पर भरोसा करी लिया, कने पौलसे कने सीलासे सोगी जुडी गे। 5 पर यहूदियां जलना ने भरई करी बजास लोकां चे केई बुरे माणूए जो अपने सोगी लेई लिया, कने भीड लगाई करी शेहेरे च दंगे करणा लग्गे, कने उना यासोने दे घरे पर हमला किता, सै पौलस कने सीलासे जो लोकां दे सामणे लोणा चांदे था। 6 कने सै उना जो नी मिल्ले, कने सै चिलांदे होए यासोन कने उदे कुछ मसीह भाईयां जो शेहेरे दे हाकिमा सामणे छिची लेई आये, “ऐ लोका जिना सारियां जगा च परेशानी पाईयो है, ऐथू भी आयो न।” 7 कने यासोने उना दा अपने घरे च स्वागत किता, कने ऐ सारे महाराजा कैसरे दे हुकमा दा बिरोध करदे न कने बोलंदे न कि इक होर राजा है जिदा ना यीशू है। 8 जालू लोकां कने शेहेरे दे हाकिमा ऐ गल्लां सुणियां तां सै परेशान होई गे। 9 कने उना यासोन कने बाकी लोकां जो जमानता पर छडी दिता। 10 चेलयां झट रातो रात पौलस कने सीलास जो बिरिया शेहेरे च भेजी दिता, कने सै ओथू पुज्जी करी यहूदी जंज घर च गे। 11 ऐ लोक तां थिस्सलूनिके शेहेरे दे यहूदियां लोकां ला खुले दिले दे थे कने उना बडिया लालसा ला बचन जो अपनया कने रोज पबित्र शाब्दां च इना गल्लां जो तोपदे रेंदे कि ऐ गल्लां ऐसियां हेन कि नी न। 12 इस तांई उना चे मतयां, कने यूनान देशां दियां इज्जतदार जनानिया चे कने मर्दां चे मतयां भरोसा किता। 13 पर जालू थिस्सलूनिके शेहेरे दे यहूदियां जो पता चला कि पौलस बिरिया शेहेरे च भी परमेश्वर दा बचन सुणा दे है, तां सै ओथू आई करी भी लोकां जो भडकाणा कने हंगामा करणा लग्गे। 14 तालू चेलयां झट पौलसे जो ओथू ला भेजी दिता कि तू समुंद्रे कंडे चली जा; पर सीलास कने तीमुथियस बिरिया शेहेरे च ही रेंडे गे। 15 सै लोक जडे पौलसे जो लेई चलयो थे, सै उस सोगी एथेंस शेहेरे दीकर गे, पर पौलस दे इसी हुकमे सोगी सै बिरिया शेहेरे जो मुडी गे कि सीलास कने तीमुथियस जो झट ही उदे बाल भेजी दिया। 16 जालू पौलस एथेंस शेहेरे च उना दा इंतजार करा था, तां शेहेरे जो मूर्तियां ला भुस्या दिखीकरी उदा मम बडा दुखी होया। 17 इस तांई सै हर सन्त दे दिन यहूदी जंज घरे च यहूदियां कने परमेश्वर दा डर मणणे बाले होर जाति दे लोकां सोगी

बाद-बिबाद करदा कने चौका पर जडे भी लोक मिलदे थे, उना ला हर रोज चर्चा करदा था। 18 तालू सै गुरू जडे इपिकूरी कने स्तोइकरी करी के जाणे जांदे थे, इना चे कुछ उसला बेहस करणा लग्गे, कने केईयां बोलया, ऐ बकवास करणे बाला क्या बोलणा चांदा है? पर दुजयां बोलया, ऐ कुसी होरसी देशे दे देवतयां दा प्रचारक लग्गा दा है, क्योंकि सै यीशू दा कने मरयां चे जिन्दा होणे दा श्भसमाचार सुणादां था। 19 तालू सै उसयो अपने सोगी अरियुगुस नाये दे यहूदी महासभा जो लेई गे कने पुछया, “क्या असां जाणी सकदे न, कि ऐ जडी नोई शिक्षा तू सिखा दा है, सै क्या है? 20 क्योंकि तू सांजो अनोखियां गल्लां सुणादा है, इस तांई असां जाणना चांदे न की इना सारियां गल्लां दा क्या मतलब है?” 21 इस तांई की सारे एथेंस शेहेरे दे बासी कने परदेसी जडे ओथू रेंदे थे, नोईयां-नोईयां गल्लां बोलणे कने सुणने दे सिवा होर कुसी कम्मे च बकत नी बितांदे थे। 22 तालू पौलसे अरियुगुस नाये दी सभा दे बिच खडोई करी बोलया, हे एथेंस शेहेरे दे लोको, मै दिखा दा है कि तुसां हर गल्ला च देवतयां जो बडा मदे न। 23 क्योंकि मै गुम्दे होए तुहाडियां अराधना करणे बालियां चीजां जो दिखा दा था, तां इक ऐसी वेदी भी मिली, जिसा पर लिखया था, “अनजाणे ईश्वरे तांई।” इस तांई तां जिसयो तुसां बिना जाणयो अराधना करदे न, मै तुसां जो उदा समाचार सुणादा है। 24 जिनी परमेश्वरे धरतिया कने उदियां सारियां चीजा जो बनाया है, सै स्वर्ग कने धरतिया दा मालिक होईकरी हथे ला बनायो मंदरा च नी रेंदा है। 25 ना ही कुसी चिजा दिया जरूरता दिया बजा ला उसयो माणूए दिया सहायता दी जरूरत नी है, क्योंकि सै तां अपु ही सारयां जो जिन्दगी कने सारयां प्राणियां जो सांस कने सब कुछ दिन्दा है जडा उना जो जरूरत है। 26 उनी शुरू च इक ही माणूए ला सारे माणूआं दियां सारियां जातियां सारिया धरतिया पर रेणे तांई बनाईयां न; कने उनी माणूए जो जिणे तांई उना दी उमर कने उना दिया जगा जो तय कितया, 27 परमेश्वरे इस तांई किता ताकि लोक उसयो तोपन, कने होई सकदा है। सै उना जो तोपदे-तोपदे मिली जाऐ, असल च सै सांजो ला कुसी ला भी दूर नी है। 28 क्योंकि सै सेई है जडा साडे जिणे कने चलणे-फिरणे दी बजा बपदा है कने सै बणादां है जडे असां असल च हेन; कने ठीक तियां ही जदिया तुहाडे कवियां बोलया भी है, “असां तां उदे ही वंश भी न।” 29 इस तांई परमेश्वरे दी ओलाद होईकरी सांजो ऐ समझणा ठीक नी कि परमेश्वर, सोने या चांदी या पथरे सांई है, जडे माणूए दिया सोचा कने कारिगिरिया ला बनायो न। 30 इस तांई परमेश्वरे लोका दिया अज्ञानता दे युगां उपर ध्यान नी दिता, पर हण हर जगा सारे माणूआं जो, अपने पापां जो मन्नी करी कने गलत कम्मो जो छडी देणे दा हुकम दिन्दा है। 31 क्योंकि उनी इक दिन तय कितया है, जिदे च उनी उस माणूए जरिये धार्मिकता ला संसारे दा न्याय करणा है, जिसयो उनी नियुक्त कितया है, कने उसयो मरयां चे जिन्दा करी के, इसा गल्ला दा सबूत सारयां लोकां जो देई दितया है। 32 कितणे ही लोक उस बकत मजाक उडणा लग्गे, जालू उनी मरयां चे जिन्दे होणे दी गल्ल बोली, पर कितणे ही बोलणा लग्गे, “ऐ गल्लां असां तिजो ला फिरी कदी सुणो।” 33 ऐ सुणी करी पौलस उना दे बीचे ला चली गिया। 34 पर कुछ लोक उस सोगी मिली गे, कने प्रभु पर भरोसा किता; जिना च दियुनुसियस जडा अरियुगुस दा सदरस था, कने दमरिस नाऐ दी इक जनानी थी, कने उना सोगी होर भी कुछ लोक थे।

**18** इदे बाद पौलस एथेंस शेहेरे जो छडी करी कुरिन्थस शेहेरे जो आया। 2 कने ओथू उसयो अक्विला नाए दा इक यहूदी मिल्ला, जिदा जन्म पुन्तस प्रदेश च होया था; कने अपनी घरे बाली प्रिस्किल्ला सोगी इतालिया प्रदेश ला थोडे बकत पहेले ही आया था, क्योंकि महाराजा क्लौडियुस सारे यहूदियां जो रोम देशे ला निकली जाणे दा हुकम दितया था, उसी हुकमे दिया वजा ला सै कुरिन्थस शेहेरे जो आये। 3 पौलस उना ला मिलणा गिया। पौलस कने अक्विला दा इक ही कारोबार था; इस तांई तां सै उना सोगी रेंडकरी कम्म करणा लग्गा, सै दोनो तम्बू बनाणे बाले थे। 4 कने पौलस हर सन्ते दे रोजे यहूदी जंज घर च चर्चा करिरी यहूदियां कने यूनानियां जो भी यीशू मसीह पर भरोसा करणे तांई समझांदा था। 5 जालू सीलास कने तीमुथियस मकिदूनिया प्रदेशे ला आये, तां पौलसे तम्बूआं बनाणे दा कम्म छडी दिता कने अपना सारा बकत बचन सुणाणे च कने यहूदियां जो गबाई देणे च लाई दिता कि यीशू ही मसीहा है। 6 पर जालू यहूदी पौलस दी बेइज्जती कने बिरोध करणा लग्गे, तां उनी अपने कपडयां दी धुड झाडी करी ऐ

दसया की परमेश्वरे उना ला खुशु नी है कने बोल्या, “परमेश्वरे दे संदेशे जो नी मनणे दिया बजा ला तुसां अपु ही उसा सजा तांई जिम्मेबार न, जडा तुसां जो परमेश्वर दी तरफा ला मिलणी है। मैं निर्दोष है। हुणे ला मैं होर जातियां बाल जाणा कने उना जो परमेश्वरे दे संदेशे दा प्रचार करणा।” 7 कने पौलस होर जाति दे लोकां जो बचन दी शिक्षा देणे तांई यहदियां दे जंज घरे ला चली करी तितुस युस्तस नापे दे इक होर जाति दे माणुपे दे घरे होर जातियां दे लोकां जो बचन दी शिक्षा देणा आया, कने से माणु परमेश्वरे दी अराधना करता था, कने उदा घर यहदी जंज घरे ला नेडे ही था। 8 तालू यहदियों दे जंज घरे दे सरदार क्रिस्तुसे अपने सारे परिवारे समेत प्रभुपे पर भरोसा कित्ता; कने मतयां कुरिन्थस शेहरे च रेणे बालयां लोकां पौलसे जो सुणीकरी भरोसा कित्ता कने बपतिस्मा लिया। 9 कने प्रभुपे राती जो दर्शन देईकरी पौलसे ने बोल्या, “डर मत, बोली जा चुप मत रे; 10 क्योंकि मैं तेरे सोगी है, कने कोई तिजो पर हमला करी कि तेरा नुकसान नी करी सकदा है, क्योंकि इस शेहरे च मते ऐसे लोक न जडे मेरे लोक न।” 11 तांई तां पौलस ओथु डेड सालां दीकर परमेश्वरे दा बचन सिखांदा रिया। 12 जालू गल्लियो अखाया प्रदेशे दा हाकिम था तां यहदी लोकां गिठे होईकरी पौलसे दे खिलाफ खडे होई गे, कने उसयो कचेरी च लेई गे कने बोल्या लगे, 13 “कि परमेश्वरे दी भक्ति ऐसिया रितिया ला करा, जडा व्यवस्था ला बिलकुल उलटा है।” 14 जालू पौलस बोल्या ही लग्गा, तालू ही गल्लिया यहदियां ला बोल्या, “हे यहदियों, अगर ऐ कोई अन्याय या बुराईया दी गल्ल होंदी तां ठीक था कि मैं तुहाडी सुणदा। 15 पर अगर ऐ बाद-बिबाद अखरां कने ना दा है, कने तुहाडे यहदी दी व्यवस्था दे बारे च है, तां तुसां ही जाणा; क्योंकि मैं इना गल्लां दा न्यायी नी बणना चांदा।” 16 कने गल्लियो हुकम दिता कि सै उना जो कडी दे कने उनी उना जो कचेरिया ला कडी दिता। 17 तालू सारे लोकां यहदियों दे जंज घरे दे सरदार सोस्थेनेस जो पकडी करी कचेरिया सामणे ही मारणा शुरू करी दिता। पर गल्लिया इसा गल्ला दी कोई भी चिंता नी किती। 18 पौलस मते रोजां दीकर कुरिन्थस शेहरे च रिया, फिरी मसीह भाईयां ला विदा लेईकरी क्रिश्चिया शेहरे दिया बंदरगाह च जहाज तोपणे तांई चली गिया। कने उसी शेहरे च पौलसे अपना मुंडन कराई लिया, क्योंकि उनी इक सखण सुखियो थी। बादे च सै पाणिये दे जहाजे ला सीरिया प्रदेशे जो चली गिया। उदे सोगी प्रिस्किल्ला कने अक्विला भी थे। 19 कने सै इफिसस शेहरे च आये कने पौलसे प्रिस्किल्ला कने अक्विला जो ओथु ही छडी दिता। कने अपु इफिसस शेहरे दे यहदी जंज घर च जाई करी यहदियां ने बाद-बिबाद करणा लग्गा। 20 उना उसला बिनती किती की, “साडे सोगी थोडे रोज होर रेई ले।” पर सै नी मनया; 21 पर पौलस उना ला ऐ बोली करी विदा होया की, “अगर परमेश्वरे चाया तां मैं तुहाडे बाल फिरी आंगा।” तालू सै इफिसस शेहरे ला जहाजे पर चढी करी चली गिया; 22 कने सै कैसरिया शेहरे च उतरी करी यस्शलेम शेहरे जो गिया कने ओथु सै कलीसिया दे लोकां ला मिली करी अन्ताकिया शेहरे च आया। 23 फिरी थोडे हफते ओथु रेईकरी अन्ताकिया शेहरे ला चली गिया, कने गलातिया कने फ्रूगिया इलाकयां ला जादे बेले ओथु दे सारे चेलयां जो मजबूत करदा गिया। 24 अपुल्लोस नापे दा इक यहदी जिसदा जन्म सिक्ंदरिया शेहरे च होया था, सै बडा अकला बाला माणु था कने पबित्र शाब्बां जो ढंगे ने जाणदा था, सै इफिसस च आया। 25 उनी प्रभु दे रस्ते दी शिक्षा लियो थी, कने मन लाईकरी यीशुपे दे बारे च सुणदा कने सिखांदा था, पर सै सिर्फ यहन्ना दे बपतिस्मे दी गल्ल जाणदा था। 26 सै यहदी जंज घरां च बिना डरयो बोल्या लग्गा, जालू प्रिस्किल्ला कने अक्विला उदियां गल्लां सुणीकरी, तां उना उसयो अपने घरयो सदया कने परमेश्वरे दा रस्ता उसयो होर भी ढंगे ला दसया। 27 कने जालू अपुल्लोस अखाया प्रदेशे जो जाणा चांदा था, तां मसीह भाईयां उसयो प्रोत्साहित करिरी चेलयां जो लिखया कि सै उसला अच्छे ला मिलन, कने उनी ओथु पुज्जी करी उना लोकां दी बडी सहायता किती जिना अनुरह दिया बजा ला भरोसा कितया था। 28 क्योंकि सै सरेआम साबित करदा था की यहदियां दी शिक्षा गलत है कने पबित्र शाब्बाे ला इदे सबूत भी दिन्दा था कि यीशु ही सै मसीहा है।

**19** कने जालू अपुल्लोस कुरिन्थस शेहरे च था, तां पौलस सडका दे जरिये अंदरूनी इलाके ला होईकरी इफिसस शेहरे जो आया कने उदी मुलाकात

कुछ चेलयां ला होई। 2 उनी बोल्या, क्या तुहांजो भरोसा करदे बेले पबित्र आत्मा मिल्ली? उना उसयो बोल्या, “असां तां पबित्र आत्मा दे बारे च सुणया भी नी है।” 3 तालू पौलसे उना जो पुख्या, “तां फिरी तुहाडा बपतिस्मा कियां होया?” उना बोल्या, “असां यहन्ना दा बपतिस्मा लिया।” 4 पौलसे बोल्या, “यहन्ना उना लोकां जो बपतिस्मा दिता जिना पाप करणा छडी दितयो थे कने परमेश्वरे पासे मुडी गे, पर उनी इस्राएल दे लोकां जो बोल्या कि उसी इकी पर विश्वास करा जडा मेरे बाद ओणे बाला है, सै ही यीशु है।” 5 ऐ सुणीकरी उना प्रभु यीशु दे नापे दा बपतिस्मा लिया। 6 कने जालू पौलसे उना पर हथ रखया, तां उना पर पबित्र आत्मा उतरी, कने सै होर-होर बोलियां च बोल्या कने भविष्यवाणी करणा लगे। 7 सै सारे लगभग बारा मर्द थे। 8 कने तालू पौलस यहदी जंज घरे च जाई करी बिना डरयो तिन मिनयां दीकर बोल्दा रिया, कने परमेश्वरे दे राज्य दे बारे च बेहस करदा कने समझांदा रिया। 9 पर उना बिचे ला कुछ लोक बडे जिदी थे उना भरोसा करणे ला मना करी दिता, कने लोकां सामणे यीशु मसीह दे इस रस्ते जो भुरा बाला बोल्या लगे, इस तांई पौलस अपने चेलयां जो सोगी लेईकरी ओथु ला चली गया, कने हर रोज तरन्नुस दे स्कूले च जाई करी भरोसा करणे बालयां जो परमेश्वरे दे बारे शिक्षा दिन्दा कने समझांदा था। 10 दो सालां दीकर ऐई होंदा रिया, कने आसिया प्रदेशे दे रेहणे बाले सारयां यहदियां कने सारे युनानियां प्रभु दा बचन सुणी लिया। 11 कने परमेश्वर पौलसे दे जरिये अनोखे चमत्कार दसदा था। 12 ऐथू दीकर कि रूमालां कने तौलियां जो उदे शरीर ला छुआई करी बिमारां पर रखदे थे, तां उना दियां बिमारियां खरियां होई जांदियां थियां; कने बुरियां आत्मा उना ला निकली जांदियां थियां। 13 पर कुछ यहदी मर्द जडे जादू टोणा करिरी बुरियां आत्मा जो कडदे थे, सै यीशु दा ना बुरियां आत्मा जो कडणे तांई करदे थे, कने सै ऐ बोल्दे थे की, “मैं तुहांजो उस यीशु मसीह दे नापे ला जिदा प्रचार पौलस करदा है बाहर निकलने दा हुकम दिन्दा है।” 14 कने स्किक्वा नापे दे इक यहदी बड़े याजके दे सत पुत्र थे, जडे इयां ही करदे थे। 15 पर बुरियां आत्मा जबाब दिता, “यीशुपे जो मैं जाणदी है कने पौलसे जो भी जाणदी है, पर तू कुण है?” 16 कने उनी माणुपे जिदे च बुरी आत्मा थी; उना पर झपटी करी, उना जो काबू करी लिया, कने उना दी ऐसी हालत किती, कि सै नगे कने जखमी होईकरी उसी घरे ला नठी गे। 17 कने जालू ऐ गल्ल इफिसस शेहरे दे रेहणे बाले सारे यहदी कने युनानी जांणी गे, कने से सारे डरी गे; कने प्रभु यीशुपे दे नापे दी महिमा किती। 18 कने जिना भरोसा कितया था, उना चे मतयां लोकां आई करी सबना सामणे अपने गलत कम्मा जो मन्नी लिया। 19 कने जादू टोणा करणे बालयां चे मतयां अपणियां-अपणियां पोथियां गिठियां करिरी सारे सामणे फुकी दितियां; कने जालू उना दी कीमत जोडी, तां सै पंजा झार चांदिये दे सिक्कां बराबर निकलीं। 20 इयां मतयां लोकां प्रभु यीशु दे बचना दे बारे च सुणया, कने बचन शक्तिशाली तरिके ला उना दियां जिंदगियां जो बदलदा गिया। 21 जालू ऐ गल्लां होई गियां तां पौलसे मकिदूनिया प्रदेशे कने अखाया प्रदेशे दे भरोसा करणे बालयां ला मिलणे बाद यस्शलेम शेहरे जो जाणे दा फेसला कित्ता, कने उनी बोल्या, “यस्शलेम शेहरे जो जाणे बाद मिजो रोम शेहरे जो जाणा भी जरूरी है।” 22 इस तांई उनी अपने साथियां चे तीमथियस कने इरास्तुस जो मकिदूनिया प्रदेशे अपु ला पेहेले भेजी दिता, कने अपु कुछ बकत आसिया प्रदेशे दे इफिसस शेहरे च रेई पिया। 23 उस बेले यीशु मसीह दे रस्ते दे बारे च बडा हंगामा होया। 24 क्योंकि देमेत्रियस नापे दा इक चांदी दा कारीगर था, जडा अरतिमिस युनानी देवी दे मंदरे दे चांदी दे ढांचे बणवादे था, कने कारीगरां जो उना बणणे तांई बडे पैसे दिन्दा था। 25 देमेत्रियसे अपने कारीगरां जो सदया कने इयोदियां चीजां दे कारीगरां जो गिठे करिरी बोल्या, “हे भाईयो, तुसां जाणदे न कि इसी कम्मे ला सांडो कितणा पैसा मिलदा है। 26 कने तुसां दिखदे कने सुणदे न कि सिर्फ इफिसस शेहरे च ही नी, बल्कि सारे आसिया प्रदेशे दे सारे गां च, इनी पौलसे ऐ बोली करी मते लोकां जो समझाया कने भटकाया भी है, कि जडी हयां दी कारीगिरी है, सै ईश्वर नी है। 27 कने सिर्फ इसा इकी गल्ला दा ही डर नी है, कि साडे इस कम्मे दी इज्जत मान चली जाणा; बल्कि ऐ की हूण लोकां महान देवी अरतिमिसा दे मंदरे जो भी महत्व नी देणा कने खुद देवी अरतिमिसा जिजा जो पूरे आसिया प्रदेशे च कने सारे संसारे दे लोक पूजदे न उसा दी इज्जत मान नी होणा।” 28 सारे कारीगर ऐ सुणीकरी गुस्से



च आई गे कने चीलाई-चीलाई करी बोलणा लग्गे, “इफिसियों दी अरतिमिस, महान है।” 29 शेहरे दे केई होर लोकां चिल्लाने दियां अब्जां सुणियां कने सै भी जाई करी भिडा सोगी मिलीं गे कने सारे शेहरे च हंगामा होई गिया कने लोकां गयुस कने अरिस्तार्बुस कने मकिदुनिया प्रदेशे दे रेणे बालयां जो जडे पौलुसे सोगी यात्री थे, पकडी लिया, कने गिठे होईकरी रंगशाला च दोडी गे। 30 पौलुस भी रंगशाला दे अंदर जाई करी लोकां ला गल्ल बात करणा चांदा था, पर चेलयां उसयो जाणा नी दिता। 31 आसिया दे हकीमा चे भी उदे दोस्तां उसयो बोली भेजया कने बिनती कीती, की रंगशाला दे अंदर जाई करी अपणी जान खतरे च मत पांदा। 32 रंगशाला दे अंदर, सारे लोक चिल्ला दे थे, कोई कुछ बोला दा था कने कोई कुछ होर। सारा कुछ गड बड था, कने मते लोक तां ऐ जाणदे भी नी थे कि असां कजो गिठे होयो न। 33 तालू यहदी लोकां सिकन्दरे जो भिडा चे धक्का देईकरी अग्गे करी दिता, कने सिकन्दरे लोकां जो चुप रेणे तांई हथे ला इशारा किता कने लोकां जो समझाणे दी कोशिश कीती कि क्या होआ दा है। 34 पर जालू उना जो पता लग्गा कि सै यहदी है, कने जडे मसीही लोकां सांई मूर्तिपूजा नी करदे थे, तां सारे दे सारे इकी अब्जा च कोई दो घटे दीकर चिलांदे रे, “इफिसियों दी अरतिमिस, महान है।” 35 तालू शेहरे दे मंत्रिऐ लोकां जो शांत करिरी बोलया, “हे इफिसियों दे वासियों, सारे जाणदे न कि इफिसुस शेहरे दे लोक महान देवी अरतिमिस दे मंदरे दी कने उदिया मूर्तिया दी रखबाली करदे न जडी अम्बरे ला पियो थी। 36 जालू कोई इना गल्लां ला इनकार नी करी सकदा है, तां ठीक है कि तुसां चुप रिया, कने बिना सोचया बिचारयो कुछ मत करा। 37 क्योकि तुसां इना माणुऐ जो लेईकरी आयो न, जडे ना ता मंदरे जो लटूणे बाले न, कने ना ही साडिया देविया दी बुराई करणे बाले न। 38 इसी वजा ला अगर देमेत्रियुस कने उदे साथी कारीगरां जो कुसी ला कोई दिक्कत है तां कचेरी खुली है, उना दे मुकदमे दा इन्साफ करणे तांई अधिकारी भी हेन; ओथु लोक इकी दुज्जे पर इलजाम लगाई सकदे न। 39 पर अगर तुसां कुसी होर गल्ला दे बारे च कुछ पूछणा चांदे न, तां शेहरे दिया सभा च फेसला होणा। 40 क्योकि मिजों डर है की राज्यपाले इस सारे हंगामे दे बारे च सुणना कने बोलणा कि असां रोमी सरकार दे खिलाफ विद्रोह करणे दी कोशिश करा दे थे। इस तांई कि इदी कोई बजा नी है, कि असां इसा भिडा दे गिठे होणे दा जबाब नी देई सकणा।” 41 कने ऐ बोली करी उनी सभा जो बीदा किता।

**20** जालू हंगामा स्की गिया तां पौलुसे चेलयां जो सदीकरी उत्साहित किता, कने उना जो अलविदा बोली करी मकिदुनिया प्रदेश जो चली गिया। 2 सै उस सारे प्रदशे चे होईकरी कने चेलयां जो बडा उत्साहित करिरी सै य्तान प्रदेश च आया। 3 तिन्न महतीने रेईकरी जालू सै ओथु ला जाजे पर सीरिया प्रदेश जो जाणा लगया था, पर उनी सुणया कि यहदियां उसयो रस्ते च मारणे दी सलाह बणाईयो है, इस तांई उनी फेसला किता की मकिदुनिया प्रदेशे ला बापस ओदे होए सीरिया प्रदेशे जो जाऐ। 4 इसा यात्रा च बिरिया शेहरे दे वासी पुरर्स दा पुत्र सोपनूस कने थिस्सलूनिकिया शेहरे ला अरिस्तार्बुस कने सिकुन्दुस कने दिरबे शेहरे दा गयुस, कने तीमुथियुस कने आसिया प्रदेशे दा तुखिकुस कने रुफिमूस उदे सोगी चलीं पै। 5 कने सोगी यात्री सांझो ला अग्गे चलीं गे कने त्रोआस शेहरे च पुज्जी करी सांझो नियालाना लग्गे। 6 कने अखमरीं रीटियां दे त्योहारे दे बाद फिलिप्पी शेहरे ला जाजे पर चडी करी उना बाल पंजा रोजां बाद त्रोआस शेहरे च पुज्जे, कने सत रोज ओथु ही रे। 7 हप्तते दे पेहेले रोजे असां जालू प्रभु भोज खाणे तांई गिठे होए, तां पौलुसे जिनी दूरे रोजे चली जाणा था, उना ला गल्लां कितियां, कने अधिया राती दीकर उना जो उपदेश दिन्दा रिया। 8 जिस उपरे बाले कम्परे पर असां गिठे होयो थे, ओथु मते दिव्ये बल्यो थे। 9 कने यतुखुस नाऐ दा इक जवान खिडकिया च बेईकरी निन्दा ने झुला दा था, कने जालू पौलुस बडिया देरा दीकर गल्लां करदा रिया, तां सै निन्दा दे झुटारे ने तिजिया मंजली ला पेई गिया, कने जालू कुछ लोकां आई करी उसयो चुकयां तां तालू दिकर सै मरी गिया था। 10 पर पौलुस थले उतरया कने उदे बाल जाई करी उसयो गले ने लाईकरी बोलया, “धबरा मत; क्योकि ऐ हल्ले भी जिंदा है।” 11 कने उनी दुबारा उपर जाई करी प्रभु भोज किता, कने अमली भयागा होणे दिकर गल्लां करदा रिया; कने फिरी सै चलीं गिया। 12 फिरी सै उस जवाने जो ओथु ला जिन्दा लेईं गे, कने बडे खुश

होए। 13 पौलुसे अस्सुस शेहरे तांई जमिनी यात्रा करणे दा फेसला किता, बाकी असां लोक समुन्दी जाजे ला अग्गे चलीं गे, कने असां ओथु ला उसयो अग्गे सोगी जहाजे च लेईं जाणे दी योजना बणा दे थे। 14 जालू पौलुस अस्सुस शेहरे च सांझो मिल्ला तां असां उसयो जाजे पर चढाई करी मिल्लेने शेहरे जो आयो। 15 दूरे रोजे ओथु ला यात्रा करदे होये असां खियुस टापू च पुज्जे कने उसला अगले रोजे उदे बखे ला होईकरी सामुस टापू च पुज्जे कने उसला अगले रोजे मीलेतुस शेहरे जो आऐ। 16 क्योकि पौलुसे इफिसुस शेहरे च नी जाणे दा फेसला किता क्योकि सै आसिया प्रदेशे च होर जादा बकत नी बिताणा चांदा था, ताकि कुथी ऐसा ना होए कि, उसयो आसिया शेहरे च देर लग्गे; क्योकि सै जल्दिया च था, कि अगर होई सके, तां सै पिन्तेकुस्त दे त्योहारे बाले रोजे यस्शलेम शेहरे च बकते पर पुज्जे। 17 कने जालू असां मीलेतुस शेहरे च उतरे, तालू पौलुसे इफिसुस शेहरे दिया कलीसिया दे अगुवां जो संदेशा गलाई भेजया की, सै आई करी उसयो मिलन। 18 जालू सै उदे बाल आये, तां उनी उना जो बोलया, “तुसां जाणदे न, कि मै कियां तुहाडे सोगी रिया, पेहले ही रोजे ला जालू मै आसिया प्रदेशे च पुज्जा, तां मै सारा बकत तुहाडे सोगी ही बिताया। 19 मतलब की बडिया दीनता ला, कने रोई-रोई करी, कने उना परीक्षां च जडियां यहदी लोकां दिया साजिशा दिया बजा ला मिंजो पर आईयां, मै तमी प्रभु दी सेवा करदा रिया। 20 कने जडियां-जडियां गल्लां तुहाडे फायदे दियां थियां, उना जो दसणे तांई कने लोका दे सामणे कने घरे-घरे जाई करी सिखाणे ला भी कदी नी डरया। 21 कने यहदी लोकां कने होर जातियां सामणे गबाई दिन्दा रिया कि परमेश्वरे सामणे अपने पापां जो मनी लिया कने गलत कम्मा जो छडी दिया, कने साडे प्रभु यीशु पर भरोसा करा। 22 कने हण, मै पबित्र आत्मा दे जरिये मजबूर होईकरी यस्शलेम शेहरे जो चलया है, कने मिंजो नी पता कि ओथु मिंजो पर क्या-क्या बितणी है, 23 सिर्फ ऐई कि पबित्र आत्मा हर शेहरे च चेताबनी देईकरी मिंजो ला बोलदा है कि बंधन कने क्लेश तिजो तांई तैयार न। 24 पर मिंजो अपणी जिन्दगी ला कोई प्यार नी है, मै तां बस अपणिया उसा दोडा जो, कने उस सेवा जो पूरा करणा चांदा, जडी मिंजो परमेश्वरे दे अनुरह दे शुभसामाचार पर गबाई देणे तांई प्रभु यीशुऐ ला मिलियो है। 25 कने मै तुसां सारयां बिच परमेश्वरे दे राज्य दा प्रचार किता, कने हण मै जाणदा है तुसां चे कोई भी मिंजो दुबारा नी दिखणा। 26 इस तांई अजे दे दिन तुसां ला गबाई देईकरी बोलदा है, कि तुसां च अगर कोई भी यीशु पर भरोसा कितयो बिना मरी जादां है, तां से मेरी गलती नी है। 27 क्योकि मै तुसां जो सै सब कुछ दसया है जडा परमेश्वर चांदा है कि तुसां जाणन। 28 इसी तांई अपणी कने अग्गे झुंटे दी देखभाल करा; जिना च पबित्र आत्मा तुहांजो अगुवा बणाया है ताकि तुसां परमेश्वरे दिया कलीसिया दी रखबाली करन, क्योकि परमेश्वरे उना जो अपने पुत्रे दा खून देईकरी खरीदया है। 29 मै जाणदा है, कि मेरे जाणे बाद तुसां बिच झुंटे गुरूआं ओणा है कने उना भरोसा करणे बालयां दा बडा नुकसान करणा। सै उना फाडने बाले भेडियां सांई होणे जडे भेडां जो मारी दिन्दे न। 30 ऐथु दिकर की तुहाडे अपने भरोसा करणे बालयां दे दले चे ऐसे लोक ओणे न, जिना चेलयां जो अपने पिच्छे खीचणे तांई उलटियां सिदियां गल्लां करणियां न। 31 इस तांई ध्यान रखा, कने याद रखा कि मै तिन्ना सालां दीकर रात दिन रोई-रोई करी, हर इकी जो चेताबनी देणा नी छडया। 32 कने हण मै तुहांजो परमेश्वरे जो, कने उदे अनुरह दे बचना जो सौपी दिन्दा है; जडा तुसां दे भरोसे जो मजबूत करी सकदा है, कने परमेश्वरे तुसां जो सै बिरासत देणी जिसा दा बायदा उनी उना सारयां लोकां ला कितया है जडे उदे जरिये पबित्र कितयो न। 33 मै कुदे भी सोने, चांदी या कपडे दा लालच नी किता। 34 तुसां तां अपु ही जाणदे न कि इना हथां ही मेरी कने मेरे साथियां दी जरूरतां पुरियां कितियां न। 35 मै तुहांजो सब कुछ करिरी दसया है की, कडी मेहनत करिरी सांझो कमजोरां दी सहायता करणी चाईदी कने प्रभु यीशु दे बचना जो याद रखणा जरूरी है, प्रभुऐ अपु ही बोलया है: लेणे ला देणा धन्य है।” 36 ऐ बोली करी उनी घुटणे टेके कने उना सबना सोगी प्राथना कीती। 37 तालू सै सारे बडे रोए कने पौलुसे दे गले लगी करी उसयो चुमणा लग्गे। 38 सै खासकर इसा गल्ला तांई दुखी थे, जडी उनी बोली थी, तुसां मिंजो फिरी दुबारा नी दिखणा। कने उना उसयो जाजे दीकर पूजाया।

**21** असां जालू उना ला विदा लेईकरी समुंद्री यात्रा शुरू किति, तां असां सीधे रस्ते ला कोस टापू च आणे, कने दूरो रोजे स्टुस टापू च, कने ओथु ला पतरा शेहेर च पुज्जी गे; 2 कने पतरा शेहेर ला इक जाज सांझो फीकीक प्रदेश जो जांदा होया मिल्ला, कने असां उदे पर चढी करी यात्रा शुरू करी दिती। 3 असां खबे पासे साइप्रस टापू दिखया कने असां ओथु ला निकली करी सीरिया प्रदेशे दिया सीमा पासे अग्रे चली गे कने सूर शेहेर च जाई पुज्जे क्योंकि ओथु जाजे ला समान उतारणा था। 4 कने ओथु असां कुछ चेलयां जो तोपया कने असां ओथु उना सोगी सत रोजां दीकर रे। उना पबित्र आत्मा दे जरिये हर बार पौलुसे ला यस्शलेम शेहेर जो नी जाणे दी विनती करदे रे। 5 सत रोज बाद जालू ओथु ला साडे जाणे दा बकत आया, कने सै सारे जनानिया कने बचयां समेत सांझो शेहेर ला बारे दीकर पुजाया कने असां समुंद्रे बखे घुटणे टेकी करी प्राथना किति। 6 तालू इकी दुज्जे ला विदा होईकरी, असां तां जाजे पर चढी गे, कने सै अपने-अपने घरे जो बापस चली गे। 7 जालू असां सूर शेहेर ला शुरू कितियो यात्रा पुरी करिरी असां पतुलिमयिस शेहेर च पुज्जे, कने मसीही भाईयां जो नमस्ते करिके उना सोगी इक रोज रे। 8 दूरे रोजे असां ओथु ला चली करी कैसरिया शेहेर च आये, कने फिलिप्पुस शभसामाचार प्रचार करणे बाले दे घरे जाई करी रे, सै उना सतां मर्दां चे इक था जिना जो यस्शलेम शेहेर च प्रेरितां विधवां दी देखभाल करणे तांई चुण्यां था। 9 उदियां चार कुआरियां कुडियां थियां; जडियां भविष्यवाणी करदियां थियां। 10 जालू सांझो कैसरिया शेहेर च रेंदे होए मते रोज होई गे, तां ओथु अगबुसे नाए दा इक परमेश्वर दा संदेश देणे बाला यहूदिया प्रदेशे ला आया। 11 उनी साडे बाल आई करी पौलुसे दा कमरबंद लिया, कने उसयो अपने हथा पैरां च बन्नी करी बोलया, “कि पबित्र आत्मा ऐ बोलदी है, कि जिस माणुए दा ऐ कमरबन्द है, उसयो यस्शलेम शेहेर च यहूदियां इयां ही बनणा है कने होर जातियां दे हथे देई देणा है।” 12 असां जालू ऐ गल्लां सुणियां, तालू असां कने ओथु दे लोकां पौलुसे ला बिनती किति कि, यस्शलेम शेहेर जो मत जांदा। 13 पर पौलुसे जबाब दिता, तुसां क्या करा दे न, रोई-रोई करी मेरा मत तोडा दे न? मै तां प्रभु यीशुए दे नाए तांई यस्शलेम शेहेर च सिर्फ बनणे तांई ही नी बल्कि मरणे तांई भी तैयार है। 14 जालू सै नी मनया तां असां ऐ बोली करी चुप होई गे, “प्रभुए दी इच्छा पुरी हो।” 15 थोडे रोजां बाद असां तैयारी किति कने यस्शलेम शेहेर जो चली पे। 16 कैसरिया शेहेर दे भी कुछ चले साडे सोगी चली पे, कने सै सांझो मनासोन नाए दे बंदे दे घरे लेई गे, जडा यस्शलेम शेहेर च रेंदा था कने साइप्रस टापू दा था, सै सबना ला पहले दे चेलयां चे इक था। 17 असां जालू यस्शलेम शेहेर च पुज्जे, तां भरोसा करणे बाले भाईयां साडा बडिया खुशिया ला स्वागत किता। 18 दूरे रोजे पौलुस सांझो सोगी याकूबे दे घरे गया, जिथु सारे अगुवे गिटे होयो थे। 19 तालू पौलुसे उना जो नमस्कार किता, कने जडे-जडे कम्म परमेश्वरे पौलुसे दिया सेवकाईया दे जरिये होरनी जातियां च कितयो थे, सै सारे कम्म इक-इक करिरी उना जो दरसे। 20 अगुवां ऐ सुणीकरी परमेश्वरे दी महिमा किति, फिरी उना बोलया, हे भाई पौलुस, तू जाणदा है न, कि यहूदियां चे केई हजारों लोकां भरोसा किता है; कने सै सारे मूसा दिया व्यवस्था दा पालन बडिया बफादारिया ला करदे न। 21 कने कुछ लोकां उना यहूदियां जो दसया जिना दा तरे बारे च ऐ विश्वास है, कि तू होर जातियां च रेणेबाले यहूदियां जो मूसा दी व्यवस्था जो छडी देणे तांई सिखांदा है, कने बोलदा है, कि ना बचयां दा खतना करा कने ना ही इना यहूदी रिती-रिवाजां पर चला। 22 तां फिरी क्या करणा चाईदा? उना जो पक्का ऐ पता लगणी जाणा है कि तू ऐथू आया है। 23 इस तांई जडा असां तिजो बोलदे न, सै करा। साडे ऐथू चार माणु न, उना जो सै मन्तन पूरी करणी है जडी उना परमेश्वरे दे सामणे मनियो है। 24 उना जो लेईकरी उना सोगी अपने आपे जो शुद्ध करणे दिया बिधिया जो पूरा कर; कने उना तांई खर्चा दे, ताकि सै सिर मुंडवाई सकन। तालू सारां जो पता लगणा, कि जडियां गल्लां उना तरे बारे च सुणियां न, सै गल्लां सच नी न, कने तू अपु भी मूसा दिया व्यवस्था जो मन्नी करी उदे अनुसार चलदा है। 25 पर उना होर जातियां दे बारे च जिना भरोसा कितया है, असां ऐ फेसला करिरी चिठ्ठी लिखी भेजी है, की सै उस खाणे जो ना खान जिसयो लोकां मूर्तियां जो चढाया हो, कने व्यभिचार मत करदे कने गल्लां घोटी करी मारयो जानवरां दा मॉस कने खून मत खांदा। 26 दूरे रोजे पौलुसे उना माणुआं

सोगी जाई करी अपु जो शुद्ध किता, तां सै मंदरे जो गे, कने ऐ घोषणा किति, कि शुद्धी दे रोज कालू मुकणे न, मतलब की उना चे हर इकी तांई भेच चढणे दे दिन कालू पुरे होणे। 27 जालू सै सत रोज पुरे होणे बाले थे, तां आसिया प्रदेशे दे कुछ यहूदियां पौलुसे जो मंदरे च दिखीकरी सारां जो भडकाया, फिरी पौलुसे जो पकडी लिया कने चिल्लाणा लग्गे, 28 “हे इझ्राएलियां, सहायता करा; ऐ सै ही माणु है, जडा हर जगा साडे यहूदी लोकां दे, कने मूसा दिया व्यवस्था दे कने इसा जगा दे खिलाफ च सारे लोकां जो सिखांदा है, ऐथू दीकर की होर जाति दे लोकां जो भी इस मंदरे च आणी करी इस पबित्र जगा जो अपबित्र करी दिता है।” 29 उना ऐसा बोलया क्योंकि इसला पहले इफिमस शेहेर दे वासी वृफिमस जो पौलुस सोगी शेहेर च दिखया था, कने समझदे थे कि पौलुस उसयो मंदरे च लेई आया है। 30 तालू शेहेर च हल्ला पेई गया, कने लोक दोडी करी गिटे होए, कने पौलुसे जो पकडी करी मंदरे बार घसीटी लेई आये, कने झट दरबाजे बंद करी दिते। 31 जालू सै पौलुसे जो मारी देंगे दी कोशिश करा दे थे, तां रोमी सिपाइयां दे सरदारे जो खबर पुज्जी कि यस्शलेम शेहेर च मते सारे लोक हंगामा करा दे न। 32 तालू सै झट सिपाइयां कने सुबेदारां जो लेईकरी उना बाल आया; कने लोकां दिया भीडा सरदारे जो कने सिपाइयां जो दिखीकरी पौलुसे जो मारणा बंद करी दिता। 33 तालू पलटना दे सरदारे पौलुसे बाल आई करी उसयो पकडी लिया; कने दो सुंगला ला बनणे दा हुकम देईकरी पछणा लग्गा, “ऐ कुण है, कने इनी क्या कितया है?” 34 पर भिडा चे कोई कुछ बोलणा लग्गा कने कोई कुछ, कने जालू रोले दिया बजा ला सच्चाई पता नी लग्गी, तां उसयो किले च लेई जाणे दा हुकम दिता। 35 जालू सै पोडियां पर पुज्जा, तां इयां होया कि भिडा दिया बजा ला सिपाइयां जो उसयो चुकी करी लेई जाणा पिया। 36 क्योंकि लोकां दी भीड ऐ बोली करी पिच्छे पियो थी, इसयो मारी दिया। 37 जालू सै पौलुसे जो किले च अंदर लेई जाणा लगयो थे, तां उनी पलटना दे सरदारे जो बोलया, क्या मिंजो इजाजत है कि मैं तिजो कुछ बोले? उनी बोलया, “क्या तू युनानी भाषा जाणदा है? 38 क्या तू सै मिश्र देशे दा माणु नी है, जिनी कुछ बकत पहले सरकारा दे खिलाफ बिरोध कितया था कने चार जार आतंकियां जो सुसनान जगा च लेई गया था?” 39 पौलुसे बोलया, “नी, मै तां इक यहूदी है, कने किलिकिया प्रदेशे दे खास तरसस शेहेर दा रेणे बाला है। कने मैं तिजो ला बिनती करदा है, कि मिंजो लोकां ने गल्लां करणा दे।” 40 जालू उनी हुकम दिता, तां पौलुसे पथरे दिया पोडियां पर खडोई करी लोकां जो चुप रेणे तांई हथे ला इशारा किता। तालू सै चुप होई गे, तां सै इब्रानी भाषा बोलणा लग्गा।

**22** “हे भाईयां कने बजुर्गो सुणा, जडे इल्जाम मिंजो पर लगयो न, उदे बचाव च मैं कुछ तुहाडे सामणे बोलणा है।” 2 सै ऐ सुणीकरी कि सै सांझो ला इब्रानी भाषा च बोला दा है, सै होर भी चुप होई गे। तालू उनी बोलया: 3 मैं यहूदी है, मेरा जन्म किलिकिया प्रदेशे दे तरसस शेहेर च होया है; पर इस शेहेर च गमलीएल दे पैरां बाल बेईकरी शिक्षा लियो है, कने पूर्वजां दी व्यवस्था भी मिंजो ठीक रीतिया ला सिखाई; कने हण जदिया उत्साह परमेश्वरे तांई तुहाडा है, तदिया ही मेरा भी था। 4 मैं प्रभु यीशु मसीह दे रस्ते जो खत्म करणे तांई इंदे चेलयां जो बडा सताया। मै मर्द कने जनानिया दोनो जो बन्नी करी, जेला च पाई करी, उना जो मरवाई भी दिता। 5 खुदू महायाजक कने अगुवां दी सारी सभा भी गबाह न कि, मैं उना ला यहूदी भाईयां तांई चिठियां लेईकरी दमिशक शेहेर जो चलयया था, ताकि जडे ओथु न उना जो सजा देणे तांई बन्नी करी यस्शलेम शेहेर जो लेई ओए। 6 जालू मैं चलदे-चलदे दमिशक शेहेर बखे पुज्जा, तां इयां होया कि लगबाग दोपहर दे बकते अचानक अम्बरे ला मेरे चारो पासे इक लौ चमकी। 7 कने मै जमिना पर पेई गिया: कने ऐ अबाज सुणेई, हे शाऊल, हे शाऊल, तू मिंजो कजो तंग करदा है? 8 मैं जबाब दिता, हे प्रभु जी, तू कण है? उनी मिंजो बोलया, मैं नासरत शेहेर दा रेणे बाला यीशु है, जिसयो तू तंग करदा है। 9 कने मेरे साथियां लौ चमकदी तां दिखी, कने जडा मिंजो सोगी बोला था उना उदी अबाज सुणी, पर सै समझी नी सके की अबाजा मिंजो ला क्या बोलया। 10 तालू मैं बोलया, प्रभु जी मैं क्या करे? प्रभुए मिंजो ने बोलया, उठी करी दमिशक शेहेर जो जा कने जडा कुछ तू करणा है सै तिजो ओथु दर्सी देणा है। 11 जालू उसा लोई दिया चमका दिया बजा ला मिंजो कुछ भी मिल्ला दा नी था, तां मैं अपने साथियां दा हथ

पकड़ी करी दमिश्के शेहरे जो आया। 12 तालू हनन्याह नाए दा व्यवस्था दे अनुसार इक धर्मी माणू, जड़ा ओथु रेजोबले सारे यहदियां च इजजतदार था, सै मेरे बाल आया, 13 कने मेरे बखे खडोई गया कने मिंजो ला बोलया, हे भाई शाऊल, दुबारा दिखणा लगगी पो। तालू ही मेरियां हखी खली गियां कने मिंजो दुबारा मिलणा लगगी पिया। 14 तालू उनी बोलया, साडे बाप दादयां दे परमेस्वरे तिजो इस ताई चुण्या है ताकि तू उदिया इच्छा जो जाणै, कने उस धर्मी जन जो दिखे, कने उदी अबाज सुणे। 15 कयोकि तू उदिया तरफा ला सारे माणुआं सामणे इना गल्लां दा गबाह होणा, जडियां तू दिखियां कने सुणियां न। 16 हुण कजो देर करा दा है? उठ, कने बपतिस्मा ले, कने प्रभू दा ना लेईकरी अपने पापां जो धोई ले। 17 मै जालू फिरी यरुशलैम शेहरे च आई करी मंदरे च प्राथना करा दा था, तां मै बेसुध होई गिया। 18 कने मै प्रभू जो दिखया कने उसयो ऐ बोलेदे सुणया, “झट पट करिरी यरुशलैम शेहरे ला निकली जा; कयोकि जडे लोक ऐथु न उना मेरे बारे च तेरी गबाई नी मनगी है।” 19 मै बोलया, प्रभू जी मिंजो समझ नी आया की यरुशलैम शेहरे च यहदियां मिंजो पर भरोसा कनी करणा कयोकि सै तां अनु ही जाणदे न की मै तिजो पर भरोसा करणे बालयां जो जेला च पांदा कने मारदे-मारदे यहदी जंज घरां ला लेई जांदा था। 20 कने जालू तैरे गबाह स्तिफनुसे जो मारा दे थे, तालू मै भी ओथु खडोतया था, कने उसा गल्ला ला राजी था, कने उसयो मारणे बालयां दे कपडयां दी रखवाली करा दा था। 21 कने प्रभुये मिंजो बोलया, तू चली जा: कयोकि मै तिजो होरनी जातियां बाल दूर-दूर भेजणा है। 22 ऐथु दीकर तां लोक पौलसे दिया गल्ला जो ध्याने ला सुणदे रे पर, फिरी सै जोरे ला बोलणा लग्गे, “ऐसे माणुऐ जो मारी दिया, इदा जिन्दा रेणा ठीक नी।” उना ऐसा इस ताई बोलया कयोकि सै नी मंदे थे की परमेस्वर यहदियां जो छडी करी कुसी होरसी जातिया जो बचाई सकदा है। 23 जालू सै चिलांदे कने अपने कपडे फेंकदे कने अपना गुस्सा दसणे ताई होआ च धुड उडांदे थे; 24 तां पलटना दे सुबेदारे बोलया, “इसयो किले च लेई जा; कने कोडे मारी करी परखा, ताकि मै भी जाणै कि लोक कुसा बजा ला बदे खिलाफ ऐसा बोला दे न।” 25 जालू सै उसयो कोडे मारणे ताई बनना दे थे तां पौलसे उस सुबेदारे ने बोलया जड़ा उदे बखे खडोतया था, “क्या ऐ ठीक कि तुसां इक रोमी माणुऐ जो, बिना दोष साबित होयो कोडे मारन?” 26 सुबेदारे ऐ सुणीकरी सरदारे बाल जाई करी बोलया, “तू ऐ क्या करा दा है? ऐ तां रोमी माणू है।” 27 तालू सरदारे उदे बाल आई करी बोलया, मिंजो दस, क्या तू रोमी है? “उनी बोलया, हौं।” 28 ऐ सुणीकरी सरदारे बोलया, मै रोमी होणे दा पद मते पेसे देईकरी लिया है। पौलसे बोलया, “मै तां जमदा ही रोमी है।” 29 तालू जडे लोक उसयो परखा दे थे, सै झट उदे बखे ला हटी गे; कने सरदार भी ऐ जाणी करी कि ऐ रोमी है, कने मै उसयो बनया है, सै डरी गे। 30 सुबेदारे ऐ जाणना चांदा था कि यहदी लोक उदे पर कजो दोष ला दे न, इस ताई उनी बड़े याजकां कने सारिया महासभा जो गिठे होणे दा हुकम दिता। उना जो रिहा किता, पौलसे जो थले आंणी करी उना दे सामणे खडा किता।

**23** पौलसे महासभा पासे ध्यान लाईकरी दिखया, कने बोलया, “हे भाईयो, मै अजे दीकर परमेस्वरे ताई बिलकुल सच्ची अंतरात्मा ला जिन्दागी कटी है।” 2 पौलसे जड़ा बोलया सै सुणीकरी हनन्याह महायाजके, उना जो जडे उदे बखे खडोतयो थे, पौलस दे मुऐ पर थपुड मारणे दा हुकम दिता। 3 तालू पौलसे उना जो बोलया, “है पाखंडी, परमेस्वरे तिजो मारणा। तू मूसा दी व्यवस्था दे अनुसार मेरा न्याय करणे जो बैठया है, कने फिरी भी मिंजो मारणे दा हुकम देईकरी व्यवस्था दे खिलाफ जा दा है?” 4 जडे बखे खडोतयो थे, उना बोलया, “क्या तू परमेस्वरे दे महायाजक दी बेईजती करदा है?” 5 पौलसे बोलया, “हे भाईयो, मै नी जाणदा था, कि ऐ महायाजक है; कयोकि पबित्र शांष च लिखया है, अपने लोकां दे प्रधाने जो बुरा मत बोला।” 6 तालू पौलसे ऐ जाणी करी, कि कुछ सदकी लोक न कने कुछ फरीसी लोक न, महासभा च पुकारी करी बोलया, “है भाईयो, मै फरीसी कने फरीसियां दे बंशे दा है, कने मेरा मुकदमा इस ताई होआ दा है कयोकि मिंजो आस है की परमेस्वरे मरयो लोकां जो दुबारा जिन्दा करणा।” 7 जालू उनी ऐ गल्ल बोलीं तां फरीसियां कने सदकियां च होणा लगगी, कने सभा च फुट पेई गे। 8 कयोकि सदकी लोक ऐ भरोसा करदे न की लोकां मरणे बाद जिन्दा नी होणा, ना कोई स्वर्गदूत न कने ना आत्मा है; पर फरीसी लोक इना

सबना पर भरोसा करदे न। 9 तालू बड़ा रोला पिया कने कुछ व्यवस्था जो सिखणे बाले जडे फरीसी थे, उदी करी ऐ बोली करी बेहस करणा लग्गे, “सांझो इस माणुऐ च कोई बुराई नी मिली है; कने होई सकदा है की इक आत्मा या स्वर्गदूते उसला गल्ल किती हो।” 10 जालू लड़ाई बडी बदी गेई, तां पलटना दे सरदारे इसी डरे ला कि सै पौलसे दे टोटे-टोटे नी करी दें, इस ताई उनी पलटना जो हुकम दिता की सभा दे लोकां बीचे ला पौलसे जो बचाई करी किले च लेई जा। 11 उसा ही राती प्रभू यीशुऐ पौलस दे बखे आई करी बोलया, “हे पौलस, हिम्मत रख; कयोकि जियां तू यरुशलैम शेहरे च मेरी गबाई दितियो है, तियां ही तिजो रोम शेहरे च भी मेरी गबाई देणी पोणी है।” 12 जालू भयाग होई तां कुछ यहदी माणुआं गिठे होईकरी सलाह किती, कने कसम खादी कि जालू दीकर असां पौलसे जो मारी ना देन, अगर असां खादा या पीता तां सांझो पर लानत है। 13 जिना ऐ कसम खादियो थी, सै चालियां जणयां ला जादा थे। 14 उना बड़े याजकां कने यहदी अणुवां बाल आई करी बोलया, “असां ऐ कसम खादियो है कि जालू दीकर असां पौलसे जो मारी नी दें, तालू दीकर असां अगर कुछ भी चखन तां सांझो पर लानत है। 15 इस ताई हुण तुसां कने महासभा मिलिकरी पलटना दे सरदारे जो समझा कि पौलसे जो तुहाडे बाल लेई ओऐ, भाना मारा कि तुसां उदे बारे च होर भी ठीक तरीके ला जांच करणा चांदे न, कने असां उदे पूजणे ला पेहेले ही उसयो रस्ते च मारणे ताई तैयार रेगे।” 16 पर पौलसे दे भांजे सुणया कि यहदी लोक उसयो मारणे दी योजना बणा दे न, तां उनी किले च जाई करी पौलसे जो खबर दिती। 17 पौलसे सुबेदारां च इकी जो सदीकरी बोलया, “इसी जवाने जो पलटना दे सरदारे बाल लेई जा, ऐ उसला कुछ बोलणा चांदा है।” 18 इस ताई सुबेदार पौलसे दे भांजे जो पलटना दे सरदारे बाल लेईजाई करी बोलया, “केदी पौलसे मिंजो सदीकरी बिनती किती, कि ऐ जवान पलटना दे सरदारे ला कुछ बोलणा चांदा है, इसयो उस बाल लेई जा।” 19 पलटना दे सरदारे उसयो हथ पकड़ी करी, कने उसयो लग लेईजाई करी पुछया, “तू मिंजो ला क्या बोलणा चांदा है?” 20 उनी बोलया, “यहदियां गिठे होईकरी योजना बणाईयो, कि तिजो ला बिनती करन कि कल पौलसे जो महासभा च लोऐ, कने ऐसा लगे कि तू होर ठीक ढंगे ला उदी जांच करणा चांदा है। 21 पर कृपा करिरी तू उना दिया बिनतिया पर ध्यान मत दिन्दा, कयोकि उना चे चालियां ला जादा माणू पौलसे जो मारणे दिया ताका पर न, उना ऐ कसम खादियो है कि जालू दीकर असां पौलसे जो नी मारगे, तालू दीकर ना खणा है ना पिणा है, कने सै हुण तैयार न कने तैरे बचने दा इंतजार करा दे न।” 22 तालू पलटना दे सरदारे जवाने जो ऐ हुकम देईकरी भेजया, “कुसी ला मत बोला कि तू मिंजो ला ऐ गल्लां बोलियां न।” 23 तालू पलटना दे सरदारे दो सुबेदारां जो सदीकरी बोलया, “अज राती नी बजे दीकर दो सो सपाई, सत्तर सवार, कने दो सो भाले बाले, कैसरिया शेहरे जो जाणे ताई तैयार रखा।” 24 कने पौलसे दिया सवारिया ताई घोडे जो तैयार रखा ताकि उसयो फेलिक्स राज्यपाले बाल ठीक-ठाक पुजाई सकन। 25 पलटना दे सरदारे राज्यपाले जो इक चिड्डी भी लिखी: 26 “महाप्रतापी फेलिक्स राज्यपाले जो क्लौदिउस लुसियास दिया तरफा ला नमस्कार; 27 इस माणुऐ जो यहदी पकड़ी करी मारणा चांदे थे, पर जालू मिंजो पता लग्गा कि ऐ रोमी है, तां पलटन भेजी करी छुड़ाई लांदा। 28 कने मै जाणना चांदा था, कि सै इस पर कुसा बजा ला दोष लांदे न, इस ताई उसयो उना दी महासभा च लेई गिया। 29 तालू मै जाणी लिया, कि सै अपणिया यहदी व्यवस्था दे विवादां दे बारे च उदे पर दोष लगा दे न, पर ऐ कोई ऐसा दोष नी है, जिदे ताई उसयो मौत दी सजा या जेल होए। 30 कने जालू मिंजो दसया कि सै इस माणुऐ जो मारणे दिया ताका पर न, तां मै झट उसयो तैरे बाल भेजी दिता; कने उना यहदियां जो जिना उस पर दोष लाया है हुकम दिता, कि तैरे सामणे उदे पर दोष लान।” 31 सिपाइयां जो जड़ा हुकम दितया था तियां ही सै पौलसे जो लेईकरी रातो रात अन्तिपत्रिस शेहरे च लेई आए। 32 दूऐ रोजे उना सुडसवारां जो पौलसे सोगी कैसरिया शेहर जाणे ताई छडी दिता कने सपाई अनु पैदल यरुशलैम शेहरे दे किले जो मुडी आए। 33 उना कैसरिया शेहरे च पुज्जी करी राज्यपाले जो चिड्डी दिती, कने पौलसे जो भी उदे सामणे खडा किता। 34 राज्यपाले चिड्डी पढी करी पुछया, “ऐ कुसी देशे दा है? कने जालू ऐ सब जाणी लिया कि सै किलिकिया प्रदेशे दा है।” 35 तां उसयो बोलया, “जालू सै लोक ओगे जिना तिजो पर दोष

लाया है, तालू मैं तेरा मुकद्दमा सुणना है।” कने उनी पौलुसे जो राजा हेरोदेसे दे किले च पेहेरे च रखणे दा हुकूम दिता।

**24** पंजा रोजा बाद हनन्याह महायाजक केई यहदी अगुवां कने तिरतल्लुस नाए दे बकिले जो सोगी लेईकरी कैसरिया शेहेरे च आया; उना राज्यपाल दे सामणे पौलुसे पर दोष लाए। 2 जालू पौलुसे जो ओथु सदया, तां तिरतल्लुसे उस पर दोष लाईकरी बोलया, “हे महाप्रतापी फेलिक्स, तेरिया बजा ला असां बडिया शांतिया ला रे दे न, कने तेरे इंतजाम ला इसा जातियां तांई कितियाणां बुराइयां सुधरा दियां न। 3 इसयो असां हर जगा कने हर तरीके ला धन्याबाद सोगीं मदे न। 4 पर मैं तेरा जादा बकत नी लेंगा चांदा है, मैं तिजो ला बिनती करदा है, कि कृपा करिरी थोडी देर साडी सुणी ले। 5 ऐ माणु संसारे दे सारे यहदियां बिच मतभेद कने मुसीबत पैदा करा दा है, कने ऐ इक ऐसे कुपंथे दे अगुवां च भी है, जिस पंथे जो लोक नासरत दे यीशुए दे पिच्छे चलणे बाला पंथ बोलदे न। 6 उनी मंदरे जो अशुद्ध करणा चाया, कने तालू असां उसयो बंदी बनाई लिया। असां उसयो अपणिआ व्यवस्था दे अनुसार सजा देणा चांदे थे; 7 पर पलटना दे सरदारो लुसियासे आई करी जबरदस्ती उसयो साडे हथा ला छुड़ाई लिया, 8 कने इंदे पर दोष लांणे बालयां जो तेरे बाल ओणे दा हुकूम दिता। इना सारियां गल्लां जो जिना दे बारे च असां उदे पर दोष ला दे न, तू अपु ही उसयो जाँची करी सच्चाईया जो जाणी लेंगा है।” 9 यहदियां भी उदा साथ देईकरी बोलया, ऐ गल्लां बिलकुल ठीक न। 10 जालू राज्यपाले पौलुसे जो बोलणे तांई इशारा किता तां उनी जबाब दिता: “मैं ऐ जालू करी कि तूसा इस देशे दा बडे सालां ला न्याय करा दा है, इस तांई मैं खुशिया ला अपना जबाब दिन्दा है।” 11 तू अपु ही पता लगाई सकदा है, कि जालू ला मैं यस्शलेम शेहेरे च अराधना करणा मन्दरे च आया है, मिजो बारा रोजां ला उपर नी होए न। 12 उना मिजो ना मंदरे च, ना यहदी जंज घरां च, कने ना शेहेरे च कुसी ने बेहस करदे या ना भिडा जो गिठा करदे दिखया; 13 कने ना ही से उना गल्लां जो, जिना दे बारे च से हनु मिजो पर दोष ला दे न, तेरे सामणे सच्च साबित करी सकदे न। 14 पर मैं तेरे सामणे ऐ मनी लेंदा है, कि मैं मसीह दे पंथे दा चेला होईकरी अपने पूर्वजां दे परमेश्वरे दी सेवा करदा है, जिसी पंथे जो ऐ माणु यहदी झूठा पंथ बोलदे न: कने जडियां गल्लां मूसा दिया व्यवस्था च कने परमेश्वरे दा संदेश देणेबालयां दियां कताबां च लिखियां न, उना पर भरोसा करदा है। 15 कने परमेश्वरे पर आस रखदा है, जडी से अपु भी रखदे न, कि परमेश्वरे धर्मी कने अधर्मी दोनो जो मरयां चे जिन्दा करी देणा। 16 इस तांई मैं अपु भी परमेश्वरे कने लोकां सामणे अपना अंतरात्मा जो निर्दोष रखणे दी पूरी कोशिश करदा है। 17 मतयां सालां बाद मैं अपने गरीब लोकां जो दान कने परमेश्वरे जो बलिदान चढाणे तांई यस्शलेम शेहेरे च आया था। 18 उसी बकत उना मिजो मंदरे च शुद्ध होणे दे रिबाजां जो पूरा करदे दिखया। ओथु ना तां कोई भिड थी कने ना ही कोई हल्ला था। 19 पर ओथु आसिया प्रदेशे दे कुछ यहदी लोक थे, जिना हांगामा किता। अगर मैं कुछ गलत कितया था, तां उना जो मिजो पर दोष लांणे तांई ऐथु तेरे सामणे होणा चाईदा था। 20 या इना माणुआं जो अपु ही बोलणा चाईदा, कि जालू मैं महासभा दे सामणे खडोतया था, तां उना जो मिजो पर कृण दिया दोष मिल्ला? 21 सिर्फ इक दोष है जडा से मैं खेलाफ लाई सकदे न, से ऐ है जालू मैं अंगणे च जोरे ला बोलया था, “पर ऐ मुकदमा मेरे पर इस तांई चलया है क्योकि मैं भरोसा करदा है की परमेश्वरे उना लोकां जो जडे मरी गियो न दुबारा जिन्दा करणा।” 22 राज्यपाल फेलिक्से जडा इसी पंथे दियां गल्लां जो अच्छे ला जाणदा था, उनी सुणवाई जो ऐ बोली करी स्थगित करी दिता, “कि जालू पलटना दा सरदार लुसियास ओगा, तां तुहाडिया गल्लां दा न्याय करगा।” 23 कने सुबेदार जो हुकूम दिता, कि पौलुसे जो थोडी छुट देईकरी उसयो पेहेरे च रखा, पर उदे दोस्तां चे कुसयो भी इदी सेवा करणे ला मत रोके। 24 थोडे रोजां बाद राज्यपाल फेलिक्स अपना घरे बाली दूसिल्ला जो, जडी यहदी थी, सोगी लेईकरी पौलुसे ला मिलणा आया कने पौलुसे जो सदया, कने उस भरोसे दे बारे च उसला सुणया जडा यीशु मसीह पर है। 25 जालू पौलुसे धार्मिकता कने अपनी इच्छां पर काबू रखणा कने परमेश्वरे जरिये होणे बाले न्याय दे बारे च दसणा शुरू किता, तां फेलिक्से डरीकरी जबाब दिता, “इस बकत तां तू जा; जालू मेरे बाल बकत होगा तां मैं तिजो दुबारा सदी लेंगा।” 26 हालांकि फेलिक्स उना गल्लां दे

बारे च डरदा था जडियां पौलुसे बोलियां थियां, फिरी भी से पौलुसे जो सददा था, कने उस सोगी गल्लां करदा था क्योकि से सोचदा था की से जेला ला छुटणे तांई उसयो कुछ पैसे दिगा। 27 पर जालू दो साल बीती गे, तां पुरकियुस फेस्तुस, फेलिक्से दिया जगा पर राज्यपाल बणी गया, कने फेलिक्स यहदियां जो खुश करणे दिया इच्छा ला पौलुसे जो केदी ही छडी गया।

**25** उना रोजां बाद राज्यपाल फेस्तुस दे स्पे च यहदिया प्रदेश च आया। फिरी से कैसरिया शेहेरे ला यस्शलेम शेहेरे जो गया। 2 तालू बडे याजकां, कने यहदियां दे अगुवां, उदे सामणे पौलुसे पर दोष लाए; 3 कने उसला बिनती किती की उना दा समर्थन करे कि से पौलुस जो यस्शलेम शेहेरे च सदे, क्योकि उना उसयो रस्ते च ही मारी देणे थी योजना बनाईयो थी। 4 फेस्तुसे जबाब दिता, “पौलुस कैसरिया शेहेरे च केदी है, कने मैं अपु जल्दी ओथु जाणू है।” 5 फिरी बोलया, “तूसां ने जडे बडे माणु न, से मेरे सोगी चलन, कने अगर उनी माणुए कुछ गलत कम्म कितया है, तां उस पर दोष लगाना।” 6 यस्शलेम शेहेरे च कोई अठ दस रोजे रेईकरी से कैसरिया शेहेरे जो गया: कने दूए रोजे न्याय-आसने पर बेईकरी पौलुसे जो लोणे दा हुकूम दिता। 7 जालू से आया, तां यहदी अगुवे जडे यस्शलेम शेहेरे ला आयो थे, उना अखे बखे खडोई करी उदे पर बडे भरी दोष लाए, पर उना बाल इना दोषां जो सच्च साबित करणे तांई कोई सबूत नी था। 8 पर पौलुसे जबाब दिता, “मैं ना तां यहदियां दिया व्यवस्था दे कने ना मंदरे दे, कने ना महाराजा कैसरे दे खिलाफ कोई अपराध कितया है।” 9 तालू फेस्तुसे यहदी अगुवां जो खुश करणे दिया इच्छा ला पौलुसे जो पुच्छया, “क्या तू चांदा है की तेरे इना दोषां दी सुणवाई मेरे सामणे यस्शलेम शेहेरे च हो?” 10 पौलुसे बोलया, “मैं महाराजा कैसरे दे न्याय-आसने सामणे खडोतया है: ठीक ऐई है की मेरे मुकद्दमे दी सुणवाई ऐथु ही होणा चाईदी। मैं यहदी लोकां दे खिलाफ कोई भी अपराध नी कितया है, कने इसा गल्ला जो तू भी अच्छे ला जाणदा है। 11 अगर अपराधी है कने मौत दी सजा देणे जोगा कोई कम्म कितया है, तां मैं मरणे ला नी मकरदा है; पर जिना गल्लां दा ऐ मिजो पर दोष ला दे न, अगर उना चे कोई गल्ल सच्च नी है, तां कुसी जो भी ऐ हक नी है की मिजो इना दे हथे देई दे। मेरी बिनती है की मेरा न्याय महाराजा दे हथे ला होणा चाईदा।” 12 तालू फेस्तुसे अपणिआ सभा सोगी बिचार करिरी जबाब दिता, “तू महाराजा कैसरे दे हथे ला न्याय होणे दी मांग किती है, तां तिजो महाराजा कैसरे बाल ही भेजणा है।” 13 थोडे रोजे होणे बाद राजा अग्रिप्पे कने उदी छोटी बेहन बिरनीके कैसरिया शेहेरे च आई करी राज्यपाल फेस्तुसे ला मिल्ले। 14 उना जो ओथु मते रोजे रहणे बाद फेस्तुसे उना ने पौलुसे दे बारे च दसया, “इक माणु है, जिसयो फेलिक्स केदी छडी गया है। 15 जालू मैं यस्शलेम शेहेरे च था, तां बडे याजकां कने यहदी अगुवां उस पर दोष लाए कने चांदे थे, कि उसयो मौत दी सजा हुकूम मिल्ले। 16 पर मैं उना जो जबाब दिता, कि रोमियां दा ऐ रिबाज नी है, कि कुसी माणुए जो सजा देणे तांई सौपी दें, जालू दीकर आरोपी जो अपने दोष लांणे बालयां सामणे खडे होईकरी दोषां दे जबाब देणे दा मोका ना मिल्ले। 17 इस तांई जालू यहदी अगुवे मेरे सोगी ऐथु कैसरिया शेहेरे च आये, तां मैं कोई देर नी किती, कने दूए ही रोजे न्याय-आसने पर बेईकरी, पौलुसे जो अदालता च लोणे दा हुकूम दिता। 18 जालू उस पर दोष लांणे बाले खडुते, तां उना ऐसिया बुरियां गल्लां दा दोष नी लाया, जदिया मैं समजदा था। 19 पर उना बिच अपने धर्म जो लेईकरी कने यीशु नाए दे माणुए दे बारे च कुछ झगडा था, जडा मरी गया था, पर पौलुस दाबा करदा था की यीशु जिन्दा है। 20 क्योकि मिजो नी पता था की इना गल्लां दी जांच पडताल कियां करे, इस तांई मे पौलुसे जो पुच्छया, क्या तू यस्शलेम च शेहेरे च मुकदमे दी सुणवाई तांई राखी है। 21 पर जालू पौलुसे बिनती किती की महाराजा कैसर ही मेरा न्याय करे, तां मैं हुकूम दिता, कि जालू दीकर मैं उसयो महाराजा कैसरे बाल नी भेजे, उदी रखबाली किती जाऐ।” 22 तालू अग्रिप्पे फेस्तुसे जो बोलया, “मैं भी उस माणुए दी सुणना चांदा है।” उनी बोलया, “तू कल सुणी लियां।” 23 दूए रोजे, जालू अग्रिप्पे कने बिरनीके बडी धूम धाम ला आई करी पलटना दे सरदारों कने शेहेरे दे खास-खास लोकां सोगी दरबारे च पुज्जे। तालू फेस्तुसे हुकूम दिता, कि से पौलुसे जो लेई ओआ। 24 फेस्तुसे बोलया, “हे राजा अग्रिप्पे, हे सारे लोक जडे ऐथु साडे सोगी न, तूसां इसी माणुए जो दिखा दे न, जिदे बारे च सारे यहदियां

यस्त्रशलेम शेहरे च कने ऐथू भी चिलाई-चिलाई करी मिंजो ला बिनती किती, कि इदा जिन्दा रेंगा ठीक नी है। 25 पर मै जांपी लिया कि उनी ऐदिया कुछ नी कितया है कि इसयो मौत दी सजा मिल्ले; कने जालू की उनी अपु ही बिनती किती की महाराजा धिराज मेरा न्याय करे, तां मै उसयो भेजणे दा फेसला किता। 26 पर मिंजो उदे बारे च कोई भी पक्की गल्ल नी लगी कि महाराजा जो लिखें, इस ताई तां मै उसयो तुहाडे सामणे कने खास करिरी राजा अग्रिपे तेंरे सामणे लांदा है, ताकि जांचणे बाद मिंजो कुछ लिखणे जो मिल्ले। 27 क्योकि केदिये जो भेजणा कने जडे दोष उदे पर लायो न, उना जो नी दसणा, मिंजो ठीक नी लग्गा दा है।”

**26** राजा अग्रिपे पौलसे जो बोलया, “तिजो अपने बारे च बोलेणे दी इजाजत है।” तालू पौलसे हथ चुकी करी लोकां जो शांत किता, तालू से अपने बचाव च बोलणा लग्गा, 2 हे राजा अग्रिपे, जितपियां गल्लां दा यहदी अगुवे मिंजो पर दोष लांदा न, अज तेंरे सामणे उना दा जबाब देणे तां मै अपने आपयो जो धन्य समझदा है, 3 क्योकि तू यहदियां दे सारे रिबाजां कने समस्यां जो अच्छे ला जाणदा है। इस ताई मै बिनती करदा है, अच्छे ला मेरी सुणी ले। 4 जदिया मेरा चाल-चलण बचनन ला लेईकरी अजे दीकर अपने लोकां च कने यस्त्रशलेम शेहरे च था, ऐ सब यहदी जाणदे ना। 5 से मिंजो तालू ला जाणदे न जालू मै बच्चा था, सै चांदे न तां इसा सच्चाईया दी गबाई भी देई सकंदे न की, मै फरीसियां दा इक सदस्य रिया है, जडा साडे धर्म दा सारायां ला कट्टर पंथ है। 6 अज मै परमेश्वरे जरिये साडे पूर्वजां जो दितयो बायदे दिया आसा दिया बजा ला ऐथू दोषिऐ दे से च खडोतया है। 7 उसी बायदे जो पूरा होणे दी आसा च, साडे बारा गोत्र अपने सारे मने ला दिन रात परमेश्वरे दी सेवा करदे आये न। हे राजा, ऐ उसा आशा दिया बजा ला है की परमेश्वरे सेई करणा जडा उनी बायदा कितया था की ऐ यहदी मिंजो पर दोष ला दे न। 8 तालू पौलसे सुणने बालयां च सारे यहदियां जो बोलया, तुसां लोक भरोसा करदे न की परमेश्वर मरयां जो दुबारा जिन्दा करी सकदा है, तां तुसां इसा गल्ला पर भरोसा करणे जो कजो मना करदे न की उनी यीशू मसीह हो मरयां च जिन्दा किता? 9 “मेरा भी पक्का भरोसा था कि नासरत बासी यीशुऐ दे खिलाफ मिंजो मता कुछ करणा चाईदा।” 10 कने मै यस्त्रशलेम शेहरे च इयां ही कितया; कने बड़े याजकां ला हक पाई करी बडे पबित्र लोकां जो जेला च पाया, कने जालू उना जो मारी दिन्दे थो, तां मै भी उना दे खिलाफ अपनी सेहमती दिन्दा था। 11 कने मै हर यहदी जंज घर च उना जो सजा दिलादां कने उना जो यीशुऐ दी निंदा करणे तांई मजबूर करदा था, ऐथू दीकर गुस्से ला ऐसा पागल होई गिया था कि दुज्जे शेहरां च जाई करी उना जो तंग करदा था। 12 “इसी ही मकसदे सोगी जालू मै बड़े याजकां ला अधिकार कने हुकम दी चिठी लेईकरी दमिश्के शेहरे जो चलया था; 13 तां हे राजा, रस्ते च लगभग दोपेरा दे बेले मै अम्बरे ला सूरजे दिया चमका ला भी जादा चमकदी इक लौ अपने कने अपने सोगी चलणे बालयां दे चारो पासे चमकदी दिखी। 14 कने जालू असां सारे धरती पर डेई पे, तां मै इब्रानी भाषा च, मिंजो ला बोलदे इक अबाज सुणी, ‘हे शाऊल, हे शाऊल, तू मिंजो कजो तंग करदा है? हरबरी जालू तू मिंजो दुखी करणे दी कोशिश करदा है, तालू तू अपु जो ही दुखी करदा है।’ 15 मै बोलया, प्रभु जी, तू कुण है? प्रभुऐ बोलया, मै यीशू है जिसयो तू तंग करदा है। 16 पर तू उठ, अपने पैरां पर खडा हो; क्योकि मै तिजो दर्शण इस ताईं दिता है ताकि तिजो उना गल्लां दा भी सेवक कने गबाह बणां, जडियां तू दिखियां न, कने उना दा भी जिना तांई मै तिजो दर्शण देण है। 17 कने मै तिजो तेंरे लोकां ला कने होर जातियां ला बचादा रेंगा, जिना बालू मै तिजो इस ताईं भेजणा है। 18 कि तू उना दियां हखी खोले, ताकि सै नेहरे ला लौईं पासे, कने शैताने दे अधिकारे ला परमेश्वरे पासे ओन; तां परमेश्वरे उना दे पाप माफ करणे, कने उना लोकां सोगी बिरासत मिल्ले, जडे मिंजो पर भरोसा करणे ला पबित्र होयो न। 19 इस ताईं हे राजा अग्रिपे, मै उस स्वर्गीय दर्शन दी गल्ला दा पालन किता, 20 मै पहले दमिश्के शेहरे दे, फिरी यस्त्रशलेम शेहरे दे रेणे बालयां जो, फिरी सारे यहदिया प्रदेश च कने होर जातियां जो प्रचार किता, कि पाप करणा छडी दिया कने परमेश्वरे पासे फिरी करी ऐसे कम्म करा ताकि तुहाडिया जिन्दगिया ला पता लगे की तुसां अपने पापां ला पश्चाताप करी लिया है। 21 इसा गल्ला दिया बजा ला यहदी मिंजो मंदरे च पकडी करी मारी देणे दी कोशिश करा दे थे। 22 पर

परमेश्वरे दिया सहायता ला मै अजे दीकर ठीक है कने छोटे बड़े सारायां दे सामणे गबाई दिन्दा है। कने मै इना गल्लां दे सिवा कुछ नी बोलणा है, से परमेश्वरे दे संदेश देणेबालयां कने मुसा भी बोलया है कि होणे बालियां न, 23 कि मसीह जो दुख झेलणा पोणा है, कने सै मरयां च जिन्दा होणेबाला पैला जन होणा, इस तरीके ला उनी यहदियां च कने होर जातियां च ज्योति दा प्रचार किता।” 24 जालू पौलस इसा रीतिया ला जबाब दे दा था, तां फेस्तुसे जेरे ला बोलया, “हे पौलस, तू पागल है। मतिया बिधा तिजो पागल करी दितया है।” 25 पर उनी बोलया, “हे महाप्रतापी फेस्तुस, मै पागल नी है, पर सच्चाईया कने अकली दियां गल्लां बोला दा है। 26 राजा भी ऐ गल्लां जाणदा है जिदे सामणे मै बिना डरयो बोला दा है, कने मिंजो भरोसा है इना गल्लां च कोई भी गल्ल उसला छुपियो नी है, क्योकि जडा यीशुऐ सोगी होया सै गुप्त च नी होया है। 27 हे राजा अग्रिपे, क्या तू परमेश्वरे दा संदेश देणेबालयां दा भरोसा करदा है? हां, मै जाणदा है, कि तू भरोसा करदा है।” 28 हुण अग्रिपे पौलसे जो बोलया, “कि तू क्या थोडे दे समझणे ला मिंजो मसीही बणाणा चांदा है?” 29 पौलसे बोलया, “मेरी परमेश्वरे ला ऐ प्राथना है कि क्या थोडे च, कने क्या मते च, सिर्फ तू ही नी, पर जितणे भी लोक मेरी सुणदे न, मेरे इना बंधणा जो छडी करी मेरे सांई मसीह पर भरोसा करणे बाले होई जान।” 30 तालू राजा अग्रिपे कने राज्यपाल फेस्तुस कने उदी छोटी बेहण बिरनीके कने उदे सोगी बैठयो सारे उठी होऐ कने चली गे; 31 जालू सै बाहर जा दे थे, सै इक दुज्जे ला बोलणा लगे, “इनी माणुऐ ऐसा कोई अपराध नी कितया है जिदिया बजा ला उसयो मौत दी सजा या जेल हो।” 32 राजा अग्रिपे राज्यपाल फेस्तुसे जो बोलया, “अपार ऐ माणु महाराजा कैसरे ला अपने न्याय दी मांग नी करदा, तां छुटी सकदा था।”

**27** जालू फेस्तुस राज्यपाले ऐ गल्ल पक्की किती कि असां जाजे पर इतालिया प्रदेशे जो जाणा है, तां उना पौलसे कने कुछ होर केदियां जो भी युलियस नाऐ दे महाराजा औगुस्तुसे दिया पलटन दे इक सरदार दे हथे सौपी दिता। 2 अद्रमुतियुम शेहरे दे इक जाजे पर जडा आसिया प्रदेशे दे कंठे दिया जगा जो जाणे तांई तैयार था, असां उस पर चढी करी समुंद्री यात्रा शुरू किती, कने अरिस्तर्खुस नाऐ दा इक माणु जडा मकिदुनी प्रदेशे दे थिस्सलुनीके शेहरे दा बासी था, सै साडे सोगी था। 3 दुऐ रोजे असां सैदा शेहरे च पुज्जी गे कने युलियसे पौलसे पर कृपा करिरी उसयो दोस्तां बाल जाणा दिता ताकि उना ला जरूरी चीजां लेई ओऐ। 4 ओथू ला असां दुबारा यात्रा शुरू किती कने होआ दा सख उलटा होणे दिया बजा ला असां साइप्रस टापू दिया आडा च होईकरी चले; 5 कने असां समुंद्री यात्रा करदे होऐ किलिकिया प्रदेश कने पंफुलिया शेहरे दे तट दे बखे ला होईकरी लूसिया प्रदेशे दे मुरा शेहरे च पुज्जे। 6 ओथू सुबेदारो जो सिक्ंदरिया शेहरे दा इक जाज इतालिया प्रदेशे जो जांदा होया मिल्ला, कने उनी सांझो उस जाजे पर चढाई दिता। 7 असां बडे रोजा दीकर बले-बले यात्रा किती। साडा कनिदुस शेहरे दीकर पुजणा मुशकिल होई गिया था क्योकि होआ उलटी दिशा च चलिया थी, इस तांई असां क्रेते टापू दिया आडा च, सलमोने दे इक छोटे दे टापू दे बखे ला होईकरी अगो बदे। 8 कने मुशकिला ला उदे किनारे-किनारे चली करी शुभलंगरबारी नाऐ दिया इकी जगा च पुज्जे, जिथू ला लसया शेहरे नेडे था। 9 जालू मते रोज बिती गे थे, कने समुंद्री यात्रा हुण बडी खतरनाख होई गियो थी क्योकि सर्दियां दे मौसमे च होणे बाला पश्चाताप दी बलि दा त्योहारे होई गिया था, कने ऐ सेई मौसम ला ऐसा मौसम शुरू होई गिया था जालू समुन्द्र च मौसम बडा टफानी होई जांदा है, इस तांई पौलसे उना जो चैताबनी देईकरी बोलया, 10 “हे सज्जने, मिंजो ऐसा लग्गा दा है कि साडी ऐ यात्रा बडी नुकसानदायक है। ना सिर्फ जाजे कने समाने दा पर साडे प्राणा दा भी नुकसान होणेबाला है।” 11 पर सुबेदारां जाजे दे कपताने कने जाजे दे मालिके दियां गल्लां जो पौलसे दियां गल्लां ला बदीकरी मनया। 12 कने ऐ शुभलंगरबारी बन्दरगाह सर्दियां कटणे तांई खरी नी थी; इस तांई मतयां दा बिचार होया कि ओथू ला अगो चली करी कुसी तरिके ला होई सके तां फिनिक्स बन्दरगाह च पुज्जी करी सर्दियां कटन। ऐ तां क्रेते टापू दी इक बन्दरगाह है जिसा दा दरबाजा दक्षिण-पश्चिम कने उत्तर-पश्चिम दिशा च है। 13 जालू थोडी-थोडी दक्षिण होआ चलणा लग्गी, तां उना सोचया की उना दी योजना पूरी करणे तांई ठीक बकत है, इस तांई उना लंगर चुकया कने क्रेते टापू दे किनारे ला होंदे होऐ

अग्ने बढणा लाग्मे। 14 पर अचानक क्रेते टाप् दिया जमिना ला इक बडा त्फान उठया, जिसयो उतरपुर्वी त्फान बोलेदे न। 15 जालू त्फान जाजे ला टकराया, तां जाज त्फाने अग्ने नी टिकी सकया, इस ताई असां उसयो होआ दे साबे जाणा दिता, कने इयां ही होआ सोगी चलंदे गे। 16 तालू असां कौदा नापे दे इक टाप्पे दिया आडा च अग्ने बदे कने बडिया मुशकिला ला जाजे दी जीववरक्षक किस्तिया जो बचाया। 17 फिरी जाजे च कम्म करणे बालयां जीववरक्षक किस्तिया जो चुकी करी ठीक किता, कने उना मजबूती ताई पतवार जो चारो पासे ला रस्सियां ला बन्नी दिता, कने सुरतिस दिया खाडिया दिया रेता च फस्ती जाणे दे डेरे ला, उना लंगरे जो थोडा थले उतारी करी जाजे जो होआ दे बहाबे सोगी-सोगी रूडने ताई छडी दिता। 18 कने जालू दुज्जे रोजे सांझो त्फाने दिया बजा ला धक्के लगे लगणा, तां सै जाजे ला माल फेकणा लाग्मे; 19 कने तरिऐ रोजे उना अपने हथा ला जाजे दा साजो समान भी फेकी दिता। 20 कने जालू मतायां रोजां दीकर ना सूरज ना तारे मिल्ले, कने त्फान लगातर चलाया था, तां आखरी च साडे बचणे दी सारी अस खतम होई गेई। 21 जालू उना मते रोजां दीकर कुछ नी खादा, तां पौलसे उना दे बिच खडोई करी बोलया, "हे लोको, तुहांजो मेरी सलाह मनणी चाईदी थी, क्रेते टाप् ला अग्ने नी जांदे, तां ना ऐ मुसीबत ओंदी कने ना ऐ घाटा होँदा। 22 पर मैं हूण तुसां जो समझांदा है कि हिम्मत रखा, क्योंकि तुसां दे कुसी दे भी प्राण नी जाणे, पर सिर्फ जाजे दा नाश होणा। 23 क्योंकि परमेस्वर जिदा मैं है, कने जिदी सेबा मैं करदा है, उदे स्वर्गदूते पिछली राती मेरे बाल आई करी बोलया, 24 हे पौलस, डर मत। तिमो महाराजा कैसरे दे सामणे खडा होणा जरूरी है। कने परमेस्वर सबना जो बचाई लेंणा है जडे तेरे सोगी यात्रा करदा दे न। 25 इस ताई, हे भाईयो, हिम्मत रखा; क्योंकि मैं परमेस्वर पर भरोसा करदा है, कि जियां मिजो ला बोलया है, तियां ही होणा है। 26 पर साडा जाज कुसी टाप्पे पर टकराई टूटी जाणा।" 27 जालू चौदमी रात होई, कने असां अदिया समुद्रे च भटका दे थे, तां अधिया राती जाजे च कम्म करणे बालयां अणदाजा लाया कि असां कुसी देशे दे बखे पुजणे बाले न। 28 उना समुद्रे दी गेहराई नापीं तां सेती मीटर निकली कने थोडा अग्ने जाई करी फिरी नापया तां सताईस मीटर निकलया। 29 तालू पथरीली जगा ला टकराणे दे डेरे ला उना जाजे दे पिच्छे चार लंगर पापे, कने ब्याग होणे दी कामना करदे रे। 30 पर जाजे पर कम्म करणे बाले जाजे ला नठणा चांदे थे, कने उना जाजे दे सामणे लंगर पाणे दे बहाने जान बचाणे वाली किस्ती समुद्रे च उतारी दिती; 31 तां पौलसे सिपाईयां कने सुबेदारां जो बोलया, "अगर ऐ जाजे पर नी रे, तां तुसां भी नी बची सकने।" 32 तालू सिपाईयां रसियां बडी करी सै किस्ती फेकी दिती। 33 जालू ब्याग होणे वाली थी, तां पौलसे ऐ बोली करी, सबना जो रोटी खांणे ताई बिनती किती, "अज चौदा रोज होए कि तुसां चिंता करिरी भूखे रे, कने कुछ नी खादा। 34 इस ताई तुहांजो ला बिनती करदा है कि कुछ खाई लिया, जिसला तुसां बची सकन, क्योंकि तुसां चे कूसदा भी कोई बाल बांका नी होणा।" 35 कने ऐ बोली करी उनी रोटी लेईकरी सबना दे सामणे परमेस्वर दे धन्याबाद किता कने तोडी करी खांणा लग्गा। 36 तालू उना सारयां जो हिम्मत मिल्ली कने रोटी खांणा लग्मे। 37 असां सारे मिली करी जाजे पर दो सो छिहरत जणे थे। 38 जालू सै रोटी खाई करी रजी गे, तां कणका जो समुद्रे च फेकी करी जाजे जो हलका करणा लग्मे। 39 जालू दिन निकलया, तां उना उसी देशे जो नी पछेणया, पर इक खाडी दिखी जिसा दा चौरस किनारा था, कने बिचार किता कि होई सके तां जाजे जो ओथु लेईकरी चलन। 40 तालू उना लंगरा जो खोली करी समुद्रे च छडी दिता कने उसी बेले पाल दे रस्से खोली दिते, कने होआ दे सामणे अगला पाल चढाई करी किनारे पासे चले। 41 पर जाज रते दे डेरे ला टकराई गया कने जाजे दा अगला हिस्सा रते च फस्ती गया, पर जाजे दा पिछला हिस्सा लेहरां दे जोरे ला टूटना लगी पिया। 42 तालू सपाईयां दा ऐ बिचार होया कि केदियां जो मारी दें, ऐसा ना होए कि कोई तेरी करी नठी जा। 43 पर सुबेदारां पौलसे जो बचाणे ताई उना जो इस बिचार ला रोकया, कने ऐ बोलया, कि जडे तेरी सकदे न, सै पेहले छाल देईकरी किनारे जो निकली जा। 44 कने बाकी कोई पटरां पर, कने कोई जाजे दिया होर चीजा दे सहारे निकली जा, कने इसा रीतिया ने सारे जमिना पर बची निकले।

28 जालू असां सारे सलामत बची करी किनारे पर पूजी गे, तालू सान्झो पता लग्गा कि इस टाप्पे दा ना माल्टा था। 2 कने ओथु रेणेबाले लोक बडे दयालू थे, क्योंकि उना बरखा कने ठंड दिया बजा ला अग्ने वाली करी साडा स्वागत किता। 3 जालू पौलसे लकडियां बटोली करी अग्नी पर रखियां, अग्नी दे सेके ला इक सप्प निकलया कने उदे हथे ने लिपटी गया। 4 जालू ओथु दे रेणे बालयां उस कीडे जो उदे हथे च लटकया दिखया, तां अपु चे बोलया, "सच्ची ऐ माणु हत्यारा है, कि समुद्रे च तां बची गया, पर साडी न्याये दी देवी नी चांदी की ऐ जिन्दा रे।" 5 तालू उनी कीडे जो अग्नी पर झटकी दिता, कने उसयो कोई नुकसान नी होया। 6 पर सै लोक नियाला दे कि उनी सूजी जाणा है, या इकदम थले पेई कि मरी जाणा है, पर जालू सै मतिया देरा दीकर दिखदे रे कने दिखया कि उसयो कुछ नी होया है, तां उना लोकां दे बिचार ही बदलूई गे कने बोलणा लग्मे, "ऐ तां कोई देवता है।" 7 उसा जगा दे अखे बखे उस टाप्पे दे प्रधान पुबलियुसे दी जमीन थी: उनी सांझो अपने घरे लेईजाई करी तिन रोजे साडी खातिरदारी कीती। 8 पुबलियुसे दे पिता जो बुखार कने पेनिश बिमारी थी। पौलसे उदे बखे जाई करी प्राथना किती, कने उदे पर हथ रखीकरी उसयो ठीक किता। 9 जालू इयां होया, तां उस टाप्पे दे बाकी बिमार लोक भी पौलसे बाल आये, कने ठीक होई गे। 10 उना साडी बडी इज्जत किती, कने तिन मिहने बाद जालू असां जाणा लग्मे, तां जडा कुछ साडे ताई जरूरी था, उना जाजे पर रखी दिता। 11 असां तीन मिहने बाद सिंकंदरिया जाजे पर यात्रा शुरू किती। ऐ जाज सर्दियां दिया बजा ला इस टाप्पे पर रुकया था, कने जाजे दे अगले हिस्से पर इक जोडी देवतयां दा इक निशाण दियुसकुरी बणया था। 12 सुरकुसा शेहेरे च लंगर पाई करी असां तिन दिन दीकर स्की रे। 13 असां ओथु ला अग्ने चली करी रेगियुम शेहेरे च पुज्जे; इक दिन बाद दक्षिण होआ चली, तां असां दुज्जे रोजे पुतियुली शेहेरे च पुज्जे। 14 ओथु सांझो कुछ मसीह भाई मिल्ले, उना दे बोलणे ला असां ओथु सत रोज रे; ओथु ला असां जमिनी रस्ते ला रोम शेहेरे पासे चले। 15 रोम शेहेरे दे कुछ मसीही भाईयां सणया की असां ओथु ओआ दे न, सै सांझो ला मिलणा कने सांझो रोम शेहेरे लेई जाणे ताई अप्पियुस शेहेरे दे बजार कने तीन-सराए शेहेरे दीकर आपे, उना जो दिखीकरी पौलसे परमेस्वर दे धन्याबाद किता कने बडा खुश होया। 16 जालू असां रोम शेहेरे च पुज्जे, तां पौलसे जो इक सपाईऐ सोगी जडा उदी रखवाली करदा था, किले रेणे दा हुकम मिल्ली गया। 17 तिन्ना रोजां बाद उनी यहदी अगुवां दी इक सभा सदी, कने जालू सै गिठे होए तां उना जो बोलया, "हे यहदी भाईयो, मैं अपने लोकां दे या अपने पूर्वजां दे रीती रिवाजां दे खिलाफ च कुछ नी किता, फिरी भी मिजो केदी बणाई करी यरुसलेम शेहेरे ला रोमी सरकार दे हथे देई दिता। 18 उना मिजो जाँची करी छडी देणा चाया, क्योंकि मिजो च मौत दी सजा देणे जोगा कोई दोष नी था। 19 पर जालू यहदी अगुवे इदे खिलाफ च बोलणा लग्मे, तां मिजो बिनती करणा पेई की महाराजा कैसर मेरा न्याय करे; इस ताई नी कि मिजो अपने लोकां पर कोई दोष लांणा था। 20 इस ताई मैं तुहांजो सदया है, ताकि तुसां ला मिल्ले कने गलतबात करे; क्योंकि इस्राएले दिया आसा ताई जडी की मसीह है, मैं इना जंजीरा ला जकडया होया है।" 21 उना उसयो बोलया, "ना सांझो कोई तेरे बारे च यहदिया प्रदेशे दे लोकां ला कोई चिठी मिली, कने ना साडे भाईयां च कुनी भी आई करी तेरे बारे च दसया, कने ना बुरा बोलया। 22 पर तेरा बचार क्या है? सेई असां सणना चांदे न, क्योंकि असां जाणंदे न, हर जगा इस मते दे बारे च लोक बिरोध करदे न।" 23 तालू यहदी लोकां जडे पौलसे सोगी थे, उना उदे ताई इक दिन तय किता, कने मते भरी लोक उना बाल गिठे होए। कने पौलस ब्यागा ला लेईकरी संज्ञा दीकर मूसा दी व्यवस्था ला कने परमेस्वर दा संदेश देणेबालयां दियां कताबां ला परमेस्वर दे राज्य दी गबाई, कने यीशु दे बारे च समझाई-समझाई करी दसदा रिया। 24 तालू थोडे लोकां पौलसे दियां गल्लां पर भरोसा किता, कने केईयां भरोसा नी किता। 25 जालू सै अपु चे सेमत नी होए, तां पौलसे दिया इसा इकी गल्ला पर चली गे, "पबित्र आत्मा यशयाह परमेस्वर दा संदेश देणेबाले दे जरिये तुहाडे पूर्वजां ला ठीक बोलया है, 26 जाई करी इना लोकां ने बोल: कि सुणदे तां रेणा, पर समझणा नी है, दिखदे तां रेणा है, पर जाणना नी है; 27 क्योंकि इना लोकां दा मन मोटा। कने उना दे कन भारी होई गियो न, कने उना अपणियां हखी बंद कितियां न, इयां ना हो कि सै

हखी ला दिखन, कने कना ला सुणन, कने मने ला समझन कने बदली जान, कने मै उना जो टीक करे। 28 इस ताई तुसां जाणा, कि परमेश्वरे दे इस उद्वारे दी कथा होर जातियां बाल भेजइयो है, कने उना मनणी।” 29 जालू उनी ऐ बोलया तां यहूदी अपु चे बेहस करणा लग्गे कने ओथु ला चली गे। 30 कने सै पुरे दो साल अपणे खर्चे पर किराए दे घरे च रिया, उना सबना दा स्वागत करदा था जडे उसला मिलणा ओदे थे, 31 कने बिना रोक टोक कने बिना डरयो होईकरी परमेश्वरे दे राज्य दा प्रचार करदा कने प्रभु यीशु मसीह दियां गल्लां सिखांदा रिया।

# रोमियो

**1** ऐ चिड़ी पौलस दिया तरफा ला है, जड़ा प्रभु यीशु मसीह दा सेवक है, कने परमेश्वरे उसयो प्रेरित होणे ताई चुणया है, कने परमेश्वरे दा शुभसमाचार दा प्रचार करणे ताई नियुक्त कितया है। **2** पबित्र शास्त्र च परमेश्वरे अपने संदेश देणेबालयां दे जरिये बड़े पेहले ही शुभसमाचार दा वायदा कितया था, **3** ऐ शुभसमाचार उदे अपने पुत्र, साडे प्रभु यीशु मसीह दे बारे च है, उदा जन्म इक इन्सान दे स्पे च राजा दाऊदे दे बन्धे च होया था, **4** कने पबित्र आत्मा दिया शक्तिया ला जालु सै मरयां च जिन्दा होया तालु उनी साबित किता की सै परमेश्वरे दा पुत्र है। कने सै यीशु मसीह साडा प्रभु है। **5** मसीह दे जरिये मिजो अनुग्रह कने प्रेरिताई परमेश्वरे ला मिली ताकि उदे नाए दिया बजा ने सारियां जातियां दे लोक मसीह पर भरोसा करन कने उदे हुकमा जो मनन, **6** तुसां क्विचारी जड़े रोम शेहर च रेंदे न इना ही लोकां च शामिल न जिना जो परमेश्वरे यीशु मसीह दे होणे ताई चुणया है। **7** ऐ चिड़ी रोम शेहर च रेणेबाले उना सारयां दे ना है जिना ने परमेश्वर प्यार करदा है, कने अपने पबित्र लोक होणे ताई सदया है, साडे पिता परमेश्वरे कने प्रभु यीशु मसीह दिया तरफा ला तुसां जो अनुग्रह कने शांति मिलदी रे। **8** पेहले मै तुसां सारयां ताई यीशु मसीह दे जरिये अपने परमेश्वरे दा धन्यवाद करदा है, क्योंकि मती सारियां जगां दे लोक तुसां दे यीशु मसीह पर भरोसे दे बारे च गल्लां करा दे न। **9** परमेश्वर जिसदी सेबा मै अपने पुरे मने ने उदे पुत्रे दे बारे च शुभसमाचार दा प्रचार करदा है, सेई मेरा गबाह है, की मै अपनी प्राथना च तुसां लोकां जो लगातार याद करदा है, **10** कने हर रोज बिनती करदा है, की परमेश्वरे दी इच्छा ने कुसी ना कुसी तरीके ने आखरी च तुसां ने मिलणे दा मौका मिलले। **11** क्योंकि मै तुसां ने मिलने दी बडी इच्छा है, ताकि मै तुसां जो कोई आत्मिक बददान दे जिसेने तुसां भरोसे च होर भी मजबूत होई जान, **12** मेरे बोलने दा मतलब ऐ की मै तुसां जो उरसाहित करी सकें क्योंकि तुसां जाणदे न की मै कियां भरोसा किता कने तुसां मिजो उरसाहित करी सकन क्योंकि मै जाणदा है की तुसां कियां भरोसा किता। **13** कने हे मसीह भाईयो, मै चांदा है की तुसां जाणी लिया की मै तुसां बाल बार-बार ओणा चांदा, की जियां मै होर जातियां च मसीह ताई चले बणाए, जियां ही तुसां च भी चले बणन, पर हले दीकर इदे च स्काबत ओदी रेई। **14** मेरी जिम्मेबारी सारयां लोकां जो शुभसमाचार सुणाणे दी है, चाऐ सै यूनानी भाषा जाणने बाले होन या नी जाणने बाले होन कने चाहे समझदार होन या नासमझ होन। इस ताई मेरी रोम शेहरे च तुसां ने मिलणे दी बडी इच्छा है। **15** इस ताई मै तुसां जो भी जड़े रोम शेहरे च रेंदे न, शुभसमाचार सुणाणे जो भरपूर तैयार है। **16** क्योंकि मै मसीह दे शुभसमाचार च घमंड करदा है, क्योंकि शुभसमाचार दी शक्ति ने ही परमेश्वरे शुरू ला यहूदियां जो बचाया कने हुण सारे संसारे दे लोकां जो बचांदा है। **17** क्योंकि शुभसमाचार च परमेश्वर दी धार्मिकता दे बारे च दसया है, ऐ धार्मिकता शुरू ला लेईकरी आखरी दीकर भरोसे दे जरिये होदी है, जियां पबित्र शास्त्र च लिखया है, “जड़ा माणु भरोसे दे जरिये परमेश्वरे सोगी सही बणी रेंदा है, उनी ही जिन्दा रेणा।” **18** परमेश्वरे दा गुस्सा तां, जडे बुराई कने अधार्मिक कम्म करदे न उना लोकां पर स्वर्ग ला प्रकट होंदा है, जडे बुरे कम्म करणे दे जरिये लोकां जो परमेश्वरे दिया सच्चाईयां जो जाणने ला रोकेदे न। **19** इस ताई की सै परमेश्वरे दे ज्ञाने दे बारे च असाना ने समझी सकदे न, क्योंकि परमेश्वरे ऐ ज्ञान उना पर प्राप्त कितया है। **20** क्योंकि परमेश्वरे दी हमेशा दी शक्ति कने चरित्र जो दिखी नी सकदे, पर संसार दी शुरूआत ला ही परमेश्वरे इना जो अपनी सृष्टियां ने दसया है, इस ताई उना बाल कोई भाना नी है की सै परमेश्वर जो नी जाणदे। (aidios g126) **21** इसा बजा ने की परमेश्वरे जो जाणने पर भी उना परमेश्वरे दे स्पे च इज्जत नी दिती, कने सोचणा लागे की ऐ बेकार गल्लां न, ऐथु दीकर की उना जो जियां सोचणा चाईदा तियां नी सोचया पर बेकार गल्लां सोचदे रे। **22** सै अपने आपे जो बुद्धिमान जताई करी मुर्ख बणी गे, **23** कने हमेशा जिन्दा रेणेबाले परमेश्वरे दिया महिमा जो हमेशा जिन्दा नी रेणेबाले, कने पछियां, कने चारां पैरां बाले, कने रेंगेणेबाले जानवरं दियां मूर्तियां सांई बदली दिता कने इना दी पूजा करणा लागे। **24** इसा बजा ला परमेश्वरे उना जो उना दे मने दिया इच्छा अनुसार यौन अशुद्धता ताई छडी दिता, ताकि सै अपु चे बुरे कम्म करी के अपने शरीरां दी अनाद करन।

**25** क्योंकि सै परमेश्वरे दे बारे दिया सच्चाईयां पर भरोसा करणे जो मना करदे न, कने से उसयो मंदे जडा जुठ है। कने उना संसारे दी पूजा कने सेबा किती, कने ना की उस सृष्टिकर्ता दी सेबा किती। उस सृष्टिकर्ता दी जिनी सारे संसारे दियां चिजां जो बणया है, उदी महिमा सदा होंदी रे। आमीन। (aiōn g165) **26** इस ताई तां परमेश्वरे उना जो उना दे बुरे बिचारां दे बशे च छडी दिता; ऐथु दीकर उना दियां जनानिया मर्दा सोगी जायज रिशतयां जो दुजियां जनानियां सोगी नाजायज रिशतयां च बदली दिता। **27** तियां ही मर्द भी जनानिया सोगी जायज रिशता छडी करी अपु चे व्यभिचार करिरी बरबाद होणे लागे, कने मर्दा-मर्दा सोगी व्यभिचार करिके अपने ही शरीर च अपाणिया इसा गलतियां दी ठीक सजा मिलली। **28** क्योंकि जालु उना परमेश्वरे जो अपनाणा मुखता समझया, तां परमेश्वरे भी उना जो सारे नकम्मे कम्म करणे ताई उना दे नकम्मे मने दे बशे च छडी दिता। **29** इस ताई सै हर तरा दे गलत कम्मा च, बुराई च, कने लालच, कने बैरभाव ने भरई गे; कने जलन, कने हत्या, कने लड़ाई इगडे, कने धोखा, कने जलन ने भरई गे, कने चुरालखोर, **30** गप्पां मारणे बाले, कने होरनीं दी बेस्ती करणे बाले, लडाके, घमंडी, झूठे, ढिंगमार, बुरियां गल्लां करणे बाले, कने माता पिता दी गल्ल नी मनणे बाले, **31** बेअकले, धोखेबाज, दया भाव नी है कने निर्दयी होई गियो न। **32** सै तां परमेश्वरे दे नियम जो जाणदे न की ऐसा कम्म करणे बाले मौत दी सजा जोगे न, तमि ना सिर्फ अपु ऐसे कम्म करदे न कने करणे बालयां ने खुश भी होंदे न।

**2** इस ताई तू सोचदा है की, तू ऐसे लोकां दी निंदा करी सकदा है, जडे दुज्यां पर दोष लांदे न; क्योंकि जिंसा गल्ला पर तू दुज्जे पर दोष लांदा है, उसा ही गल्ला च तू अपने आपे जो दोषी बणांदा है, क्योंकि तू जडा दोष लांदा है सेई कम्म तू अपु करदा है। **2** कने असां जाणदे न की परमेश्वर ऐसे बुरे कम्म करणे बालयां जो न्याय अनुसार सजा दिन्दा है। **3** कने तू जडा ऐसे-ऐसे कम्म करणे बालयां पर दोष लांदा है, कने अपु सेई कम्म करदा है; तू क्या ऐ समझदा है की तू परमेश्वरे दिया सजा ला बची जाणा है? **4** तू क्या परमेश्वर दी भलाई, कने सेहनशीलता, कने धीरज रूपी धने जो बेकार समझदा है? क्या ऐ नी समझदा की परमेश्वरे दी भलाई तिजो अपने पापां जो मनणा कने गलत कम्मा जो छडणा सिखांदी है? **5** पर क्योंकि तू जिदी कने अपने पापां दा पश्चाताप करणे ला मना करी दिता, जिंसा रोज परमेश्वरे अपना गुस्सा दसणा, उस रोज सच्चा न्याय होणा, जालू परमेश्वरे न्याय करणा तालू परमेश्वरे होर भी जादा दर्दनाक सजा देणी। **6** परमेश्वरे हर इकी जो उदे कम्मा दे अनुसार इनम देणी है। **7** जडे खरे कम्मा जो मेहनत करदे होऐ महिमा, कने आदर, कने अमरता दीया तोपा च न, उना जो परमेश्वरे हमेशा दी जिन्दगी देणी है; (aiōnios g166) **8** पर जडे मतलबी न कने सच्च जो नी मंदे न, पर बुरे कम्मा जो करदे न, उना पर परमेश्वरे दा गुस्सा कने प्रकोप पोणा है। **9** दुख कने मुशकिलां हर इक उस माणुऐ पर ओणियां न जडे बुरा करदे न, परमेश्वरे पेहले यहूदियां दा न्याय करणा है कने बादे च उना दा न्याय करणा जडे यहूदी नी न; **10** पर महिमा कने इज्जत कने शांती हर इकी जो मिलणी है, जडा भला करदा है, परमेश्वरे सारयां ला पेहले यहूदी लोकां जो देणा फिरी उना लोकां जो देणा जडे यहूदी नी न। **11** क्योंकि परमेश्वर सबना सोगी इकोदिया व्यवहार करदा है। **12** इस ताई की होर जाति दे लोकां बिना मूसा दी व्यवस्था मिलयो ही पाप किता, उना जो बिना व्यवस्था दे ही परमेश्वरे सजा देणी, कने जिना यहूदी लोकां मूसा दी व्यवस्था मिलणे बाद पाप किता, उना जो परमेश्वरे मूसा दी व्यवस्था दे अनुसार सजा देणी; **13** क्योंकि परमेश्वरे दी नजरा च धर्मी लोक सै नी न, जडे मूसा दी व्यवस्था जो सुननेबाले न, पर परमेश्वरे दी नजरा च धर्मी लोक सै न जडे व्यवस्था दा पालन करदे न। **14** फिरी जालू होर जातियां दे लोक जिना बाल मूसा दी व्यवस्था नी है, पर स्वभावे ने ही इना कम्मा जो करदे न जडे मूसा दी व्यवस्था च लिखयो न, तां उना बाल मूसा दी व्यवस्था नी होणे पर भी से साबित करदे न की उना दे मने च ही व्यवस्था है। **15** सै दसदे न की परमेश्वरे दी व्यवस्था उना दे मना च लिखियो है, क्योंकि उना दी अंतरात्मा भी ऐई गबाई दिन्दी है की ऐ सच्च है, क्योंकि उना दे बिचार ही उना जो दसदे न की सै सही करा दे न की गलत करा दे न। **16** ऐ सच्च उस रोज सामणे आई जाणा, जालू परमेश्वरे यीशु मसीह दे जरिये जिसदा मै शुभसमाचार सुणादा है सारे माणुआं दी गुण गल्लां दा न्याय करणा है। **17** अगर तू अपने आप जो यहूदी बोलदा है, कने



व्यवस्था पर भरोसा रखता है, कने घमंड करता है की तू परमेश्वर दा खास जन है, 18 कने तिजो परमेश्वर दी इच्छा पता है, तू खरियों-खरियों गल्लां दा साथ दिन्दा है, क्योंकि तिजो इना दे बारे च मूसा दी व्यवस्था च सिखाया है; 19 कने तिजो इसा गल्ला दा पक्का पता है की, तू अन्ने लोकां जो परमेश्वर दा रस्ता दसदा है, कने तू उना लोकां ताई लौई साईं है जडे नेहरे च रेंदे न, 20 कने बेअकलां जो सिखाणे बाला, कने बचयां दा गुरू है। तिजो पक्का पता है क्योंकि मूसा दी व्यवस्था तेरे बाल है, कने तू पूरी तरा सब कुछ जाणदा है कने तू जडा बोलदा है सै सच्च है। 21 इस ताई तू जडा बाकियां जो शिक्षा दिन्दा है, सै शिक्षा अपने आपे जो कनी दिन्दा? तू जडा चोरी नी करणे दी शिक्षा दिन्दा है, कने अपु ही चोरी करता है। 22 तू जडा ऐ सिखांदा है, “व्यभिचार मत करा,” अपु ही तां व्यभिचार करता है! तू जडा मूर्तियां ने नफरत करता है, अपु ही तां मंद्रा जो लुटदा है! 23 तू इसा गल्ला पर घमंड करता है की तेरे बाल परमेश्वरे दी व्यवस्था है, क्या तू अपु ही व्यवस्था की मन्नी करी, परमेश्वरे दा अनादर नी करता? 24 “क्योंकि तुसां यहदियां दिया बजा ने, होर जाति दे लोक परमेश्वरे दे बारे च बुरियां गल्लां करते दे,” तुहाडे इना कम्मा दिया बजा ने पबित्र शाब्ब दियां गल्लां सच्चा होइयां न। 25 मै तिजो समझांदा है, की तेरा खतना होणे दा फायदा तालू ही है अगर तू व्यवस्था जो पूरा करे, पर अगर व्यवस्था च जियां लिखया तू तियां नी करे, तां तुसां खतना होयो यहदी लोक भी होर जातियां साईं न जिना दा खतना नी होया। 26 तां इदा मतलब है की अगर कोई माणु जिदा खतना नी होया कने सै व्यवस्था दे नियमा जो मनदा है, तां परमेश्वर ऐसे माणुए जो भी उस माणुए साईं दिखदा है जिदा खतना होया है। 27 कने जडा माणु शरीरिक स्पे च बिना खतना रिया सै अगर व्यवस्था जो मनदा है, तां क्या उनी तिजो पर जिस बाल मूसा दी व्यवस्था है कने खतना होणे पर भी व्यवस्था जो नी मनदा है, दोष नी लाणा? 28 क्योंकि सच्चा यहदी सै नी जडा यहदी पैदा होया कने जिदा खतना होया। 29 क्योंकि इक सच्चा यहदी सै है जिदा मन परमेश्वरे सोगी सही है कने सच्चा खतना सिर्फ मूसा दे नियम-कानून मणणे नी है, पर मने दा बदलना है जडा की परमेश्वरे दी आत्मा ने होँदा है। ऐसे लोकां दी महिमा लोकां दे जरिये नी पर परमेश्वरे दिया तरफा ला होँदी है।

**3** तां कोई बोली सकदा है की अगर खतना होई जाणे पर भी परमेश्वर यहदियां जो अपनांदा नी तां यहदी दा यहदी होणे दा क्या फायदा, कने खतने दा क्या फायदा? 2 हॉ, इदा बडा फायदा है। क्योंकि सारयां ला जरूरी गल्ला ऐ है की, परमेश्वरे दा बचन यहदियां जो दितया है। 3 अगर कुछ यहदी परमेश्वर सोगी बफादार नी भी निकले तां भी क्या है? क्या इदा मतलब ऐ है की परमेश्वरे भी अपने वायदे ला मुकरी जाणा जडा उनी यहदी लोकां ने किता? 4 नी बिलकुल भी नी! परमेश्वर हमेशा सच्च बोलदा है, कने हर इक माणु झूठा होऐ, जियां पबित्र शाब्ब च परमेश्वरे दे बारे च लिखया है, “जिसने तू अपणियां गल्लां च धर्मी होऐ कने न्याय करदे बेले तेरी जय होऐ।” 5 पर अगर साडे बुरे कम्म परमेश्वरे दी धार्मिकता दसदे न, तां असां क्या बोलणा? क्या ऐ गलत है की परमेश्वर गुस्सा होई जाऐ कने सांझो सजा दे? (ऐ तां मै माणुए दिया रीतिया पर बोलदा है।) 6 नी बिलकुल भी नी! अगर परमेश्वर साडा यहदियां दा न्याय करणे च सही नी है, तां सै सारे संसारे दे लोकां दा न्याय कियां करगा? 7 कुछ लोक बोली सकदे न, “पर अगर मेरा झूठ परमेश्वरे दिया सच्चाईया जो उजागर करता है कने उसयो होर जादा महिमा मिलदी है तां सै कियां मेरा न्याय करी सकदा है कने मिजो इक पापी दे स्पे च दोषी बनाई सकदा है?” 8 असां बोली सकदे न की “चला असां बुरे कम्म करन, ताकि इदे च कोई भलाई निकले?” जियां की सांझो पर ऐई दोष लगादे भी न, कने थोडे बोलेदे न की इना दा ऐई बोलणा है। पर जडे मेरे बारे च इयदियां गल्लां करते न सै सजा दे काबिल न। 9 तां फिरी क्या होया? क्या असां यहदी लोक होर जातियां दे लोकां ला खरे न? नी बिलकुल भी नी! क्योंकि असां यहदियां कने होर जातियां दोनो पर ऐ दोष लाई बैठथो न की सै सारे लोक पाप दिया शक्तिया दे बसे च न। 10 जियां पबित्र शाब्ब च लिखया है: “परमेश्वर दे सामणे कोई भी धर्मी नी है, इक भी नी।” 11 ऐथू कोई भी माणु नी है जडा समझी सके की क्या सही है, कोई भी परमेश्वरे जो नी जाणना चांदा। 12 सारे परमेश्वरे ला दूर चली गे, कने सारे दे सारे परमेश्वरे ताई निकमे बणी गे; भलाई करणे बाला कोई भी नी, इक भी नी। 13 उना दा गला खुलियो कबरा साईं है

जिसा ला बडी बद्बू ओँदी है: क्योंकि सै अपणी जिना ने बुरा बोलेदे न, कने जडा बोलेदे न सै साणे दे जेहेर सांख खतरनाख होँदा है। 14 कने उना दे भाणु श्राप कने कडवाट ने भस्यो न। 15 सै हत्या करणे तांई फुर्तीले न। 16 जित्यु कृथी सै जादे न सै बुराई कने दुख जो लेई ओँदे न। 17 सै नी जाणदे न की कियां शांति ने जि न। 18 उना च परमेश्वर दा डर है ही नी। 19 असां जाणदे न, की व्यवस्था जडा कुछ भी बोलदी है सै उना ने ही बोलदी है, जडे व्यवस्था दे अधीन न, इस तांई की लोकां जो भाना बणने ला रोकया जाये, कने सारे संसारे दे लोक परमेश्वर दे सामणे हिसाब देणेबाले होई जान। 20 क्योंकि व्यवस्था च दितयो हुकमा जो मणणे ने कोई भी माणु परमेश्वरे सामणे धर्मी नी बणादा, क्योंकि मूसा दी व्यवस्था सांझो दसदी है की असां पापी न। 21 पर हुण बिना मूसा दी व्यवस्था दे हुकमा जो मनयो परमेश्वर दी धार्मिकता प्रकट होई है, ऐ मूसा की व्यवस्था कने परमेश्वरे दे संदेश देणेबालयां दिया कताबां च लिखया है की असां कियां परमेश्वरे दे जरिये धर्मी बणे, 22 मतलब की परमेश्वरे दे सामणे धर्मी तालू बणदे न जालू असां यीशु मसीह पर भरोसा करदे न। क्योंकि हुण यहदी कने होर जाति च कोई फरक नी है। 23 इस तांई की सारयां पाप कितया है कने परमेश्वरे दी उस महिमा ला दूर न जडी परमेश्वर दिदा है, 24 पर परमेश्वरे दे अनुग्रह ने उनी सांझो यीशु मसीह दे जरिये पाप दी सजा ला अजाद किता जडा यीशु मसीह च है, परमेश्वर सांझो बिना कुछ कितयो धर्मी घोषित करी दिन्दा है। 25 परमेश्वरे यीशु मसीह जो सूली पर चढना दिता ताकि उदा खून लोकां दे पापां जो माफ करणे दा जरिया बणी सके, जडे उस पर भरोसा करदे न। परमेश्वरे ऐसा ऐ दसणे तांई किता की सै धर्मी है। पूराणे बकने च परमेश्वरे सबर रखीकरी लोकां दे पापां जो अणदिखा किता, पर हुण सै लोकां दे पापां ने निपटदा है, ताकि सै अपणी धार्मिकता दस्सी सके। इयां परमेश्वर साबित करदा है की सै धर्मी है कने यीशु पर भरोसा करणे बालयां जो भी धर्मी बणादा है। 27 तां हुण ऐसा कुछ है जिस पर असां घमंड करन? नी, ऐसा कुछ नी जिदे बारे च असां घमंड करी सकन। कुण दे नियमा दिया बजा ने? क्या साडे व्यवस्था दे कम्मा जो पूरा करणे ने? नी, पर यीशु मसीह पर भरोसा करणे दी दिया बजा ने। 28 इस तांई असां जाणदे न की परमेश्वरे सांझो यीशु मसीह पर भरोसा करणे ने धर्मी घोषित करी दितया है, ना कि मूसा दी व्यवस्था जो मणणे ने। 29 परमेश्वर सिर्फ यहदियां दा ही परमेश्वर नी है, पर होर जातियां दा भी परमेश्वर है। 30 क्योंकि इक ही परमेश्वर है, जिनी खतने बालयां जो भरोसे ने कने जिना दा खतना नी होया उना जो भरोसे दे जरिये धर्मी घोषित किता है। 31 तां क्या असां व्यवस्था जो भरोसे दे जरिये बेकार बणादे न? नी बिलकुल भी नी! पर असां तां व्यवस्था जो उसा दा सही महत्व देदे न।

**4** तां असां यहदी होणे दे नाते अपने पूर्वज अब्राहमे दे बारे च क्या बोलन? की उसयो कुसा बजा ला धर्मी गिणया? 2 क्योंकि अगर अब्राहम भले कम्मा ने धर्मी बणादा, तां सै घमंड करी सकदा था, पर हुण सै परमेश्वरे सामणे अपने भले कम्मा पर घमंड नी करी सकदा। 3 पबित्र शाब्ब क्या बोलदा है? ऐ की “अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणाया।” 4 कम्म करणे बाले दी मजदूरी देणा दान नी है, पर ऐ हक समझया जांदा है। 5 कुण परमेश्वर दा अनुग्रह पाणे तांई कम्म नी करदा है, पर जडा पापी लोकां जो धर्मी ठहराणे बाले परमेश्वर पर भरोसा करदा है, उदा भरोसा उदे तांई धार्मिकता गिणया जांदा है। 6 जियां पबित्र शाब्ब च दाऊद उना आशीषां दे बारे च लिखदा है, जडियां उना लोकां जो मिलदियां न जिना जो परमेश्वरे धर्मी बणाई दिता, चाहे उना धर्मी बणने तांई कोई कम्म नी किता, दाऊद भी इना जो धन्य बोलदा है; 7 “धन्य सै न, जिना दे अधर्म परमेश्वरे माफ किते, कने जिना दे पाप भुलाई दिते। 8 धन्य न सै माणु परमेश्वर जीना दे पापां दा लेखा जोखा नी रखदा।” 9 तां क्या ऐ धन्य बचन खतने बालयां तांई ही है, या जिना दा खतना नी होया है उना तांई भी है? असां ऐ बोला दे न की पबित्र शाब्ब क्या बोलदा है, अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणाया। 10 तां सै धर्मी कालू बणया? क्या खतना होणे ला पेहले या खतना होणे बाद? अब्राहम खतना होणे ला बाद नी, पर खतना होणे ला पेहले धर्मी बणया। 11 परमेश्वरे उसयो पेहले ही अपनाई लिया था कने उसयो धर्मी घोषित करी दितया था, जबकि उदा हले भी खतना नी होया था, खतने दा निशाण उस

अपनाणे दी मोहर है। इस ताई सै उना लोकां दा पूर्वज है जिना बाल भरोसा है पर उना दा खतना नी होया है। इना जो इना दे भरोसे दिया बजा ने धर्मी गिणया जादा है। 12 कने अब्राहम उना खतना कितयो लोकां दा पूर्वज होया, जडे ना सिर्फ खतने पर आस रखदे न, पर उना बाल सियुदा ही भरोसा है, जडा साडे पूर्वज अब्राहमे खतना करणे ला पेहेले कितया था। 13 परमेश्वरे अब्राहम कने उदे बंशजा ने बायदा किता की सै पुरे संसार दे वारिस होणे न, परमेश्वरे ऐ बायदा इस ताई नी किता की अब्राहमे मूसा दे हुकमा जो मनया, पर अब्राहमे जो भरोसे दिया बजा ने परमेश्वरे धर्मी बनाया। 14 क्योकि अगर परमेश्वरे दा अब्राहम कने उदे बंशजा जो संसार देणे दा बायदा सिर्फ उना ही लोकां ताई है जडे मूसा दी व्यवस्था दे हुकमा जो मंदे न, तां भरोसा बेकार है कने परमेश्वरे दे बायदे दा भी कोई मतलब नी रिया। 15 परमेश्वर तां उना लोकां जो सजा दिन्दा जडे व्यवस्था जो पूरी तरा नी मंदे, पर जिथू व्यवस्था है ही नी, ओथ व्यवस्था दा उलंघन भी नी होँदा। 16 इस ताई लोकां जो परमेश्वरे दा बायदा उना दे भरोसे दे जरिये मिल्ला। ऐ इस ताई होया की परमेश्वरे दा बायदा अनुग्रह दे जरिये मिल्ले, तालू अब्राहम दे सारे बंश बाल ऐ बायदा हो, ऐ सिर्फ उना ताई ही नी है जडे मूसा दी व्यवस्था पर चलंदे न, पर हर इक उस माणू ताई जडा अब्राहमे साईं भरोसे सोगी जिन्दगी जिंदा है, जडा असां सारयां दा पूर्वज है। 17 जियां पबित्र शास्त्रां च लिखया है, “मै तिजो मतियां जातियां दा पूर्वज बनाया है” परमेश्वरे दे सामणे अब्राहम साडा पिता है। उना उस परमेश्वरे पर भरोसा किता, जडा मरयां जो फिर जिन्दा करदा है कने जडियां चीजां मोजूद भी नी न, उना दा ना इयां लेँदा है, की जियां की से चीजां मोजूद न। 18 परमेश्वरे अब्राहम जो बोलया की सै तिजो मते सारे बंशज दिगा, पर अब्राहमे सोचया की मै बडा बुडा होई गिया है, क्योकि उस बकत सै लगबग सौ सालां दा होई गिया था कने सारा भी बच्चे पैदा नी करी सकदी थी। तां ऐ पक्का ही था की अब्राहम कदी भी मतियां जातियां दा पिता नी बणी सकदा था, पर फिर भी अब्राहम अपने भरोसे च कमजोर नी होया कने सै लगातार भरोसा रखदा रिया कने उम्मीदा जो टुटणा नी दिता। 20 कने ना ही अविश्वासी लेईकरी परमेश्वरे दे बायदे पर शक किता, पर भरोसे च मजबूत होईकरी परमेश्वरे दी महिमा किती, 21 कने पक्का यकीन किता की जिसा गल्ला दा परमेश्वरे बायदा कितया है, सै इस बायदे जो पूरा करणे दे भी काबिल है। 22 उदे भरोसे दिया बजा ने ही परमेश्वरे अब्राहमे जो धर्मी बनाया, 23 कने इस बचन कने भरोसे दिया बजा ने ही परमेश्वरे अब्राहमे जो धर्मी बनाया, “ना सिर्फ उदे ताई लिखया गिया,” 24 बल्कि साडे ताई भी जिना जो परमेश्वरे धर्मी घोषित करणा, मतलब की अगर असां परमेश्वरे पर भरोसा करगे, जिनी साडे प्रभु यीशु मसीह जो मरयां चे जिन्दा किता, तां असां भी भरोसे दिया बजा ने धर्मी मन्ने जाणे। 25 यीशु मसीह साडे पापां ताई मरी गिया, कने परमेश्वरे उसयो दुबारा जिंदा किता ताकि परमेश्वर सांझो धर्मी बनाऐ।

**5** इस ताई असां भरोसे ने धर्मी बणे, क्योकि जडा प्रभु यीशु मसीह साडे ताई कितया है, उदे जरिये असां परमेश्वरे सोगी शांति ने रेन, 2 क्योकि साडे भरोसे दिया बजा ला यीशु मसीह सांझो इस अनुग्रह च लेईकरी आया जिथू असां हण न, कने असां पूरी हिम्मत कने खुशिया ने परमेश्वरे दी महिमा च हिस्सेदार होणा। 3 सिर्फ ऐ ही नी, बल्कि सांझो दुखां च भी खुश रेणा चाईदा, क्योकि असां जाणदे न की दुख सेहणे ने असां होर जादा सहनशील बणदे न, 4 परमेश्वरे सांझो अपनाई लिया क्योकि असां दुखां च सेहणा सीखी लिया है, कने परमेश्वर सांझो अपनांदा है इस ताई सांझो आस है; 5 कने आस ने सांझो शर्मिंदगी नी होँदी, क्योकि पबित्र आत्मा जडी परमेश्वरे सांझो दितियो है उदे जरिये परमेश्वरे साडे मना जो प्यार ने भरी दितया है। 6 क्योकि जालू असां कमजोर थे, तालू मसीह परमेश्वरे दे चुणयो बकत पर बुरे लोकां ताई मरया। 7 ऐ कुसी ताई कठिन है की कोई धर्मी माणूऐ ताई अपणी जान देई दे, होई भी सकदा है की भले माणूऐ ताई अपणी जान देणे दी इच्छा रखे। 8 पर परमेश्वर सांझो पर अपने प्यार दी भलाई इस तरीके ने प्रगट करदा है, की जालू असां पापी ही थे तालू मसीह साडे ताई मरया। 9 जालू असां हण धर्मी बणे क्योकि यीशु मसीह साडे ताई मरया कने साडे पापां ताई अपना खून बहाया, तां सांझो यकीन है की मसीह सांझो परमेश्वरे दे गुस्से ला बचाणा? 10 क्योकि जालू असां परमेश्वरे दे दुश्मन ही थे तमी उदे पुत्र यीशु दे मरणे ने साडा मेल परमेश्वरे सोगी होया, इस ताई सांझो पक्का पता है की

हण साडा मेल शान्ति ने परमेश्वरे सोगी है, मसीहे सांझो बचाणा क्योकि मसीह जिन्दा है। 11 कने सिर्फ ऐ ही नी, पर हण तां साडे प्रभु यीशु मसीह दे जरिये परमेश्वरे ने साडा मेल होई गिया है, इस ताई असां परमेश्वर च खुश न। 12 इस ताई जालू इक माणूऐ दिया बजा ने पाप संसार च आया, आदम पेहला माणू है जिसयो परमेश्वरे बनाया कने आदमे पाप किता कने मरी गिया, कने जिसदी बजा ने सै सारे लोक जडे इस संसार च पैदा होए, सै सारे मरे, क्योकि सब पापी बणी गे। 13 मूसा दी व्यवस्था दिते जाणे ला पेहेले ही लोकां पाप किता, पर इसयो पाप नी गिणया क्योकि तालू कोई व्यवस्था नी थी कने कोई नियम भी नी टुटया था। 14 तमी आदम ला लेईकरी मूसा दीकर सारयां लोकां पाप किता कने सारे मरी गे, जिना आदम साईं कुसी तरा दे हुकम नी मणणे ने पाप नी कितया था। आदम दे पापे इना सारयां लोकां पर प्रभाव पाया, ठीक तियां ही जियां मसीहे किता जडा उदे बाद आया। 15 पर आदम दा पाप उस बरदान साईं नी है जडा परमेश्वर सांझो अपने अनुग्रह ला दिन्दा है, क्योकि इक माणूऐ दा पाप मते लोकां ताई मौत लेईकरी आया। पर परमेश्वरे दा अनुग्रह बडा महान है, जडा उनी सांझो दितया है, उदी कीमत मतयां लोकां ताई उसला बडी जादा है। यीशु मसीह इक माणूऐ दे स्पे च अपने अनुग्रह ला जडा किता, उनी इसयो संभव किता। 16 जडा तोफा परमेश्वर सांझो दिन्दा है सै आदम दे पाप साईं नी है, क्योकि इक पाप सजा लेईकरी आया, पर चाहे असां मते सारे पाप किते न, परमेश्वरे सांझो सै तोफा दिता जिसने असां धर्मी बणदे न। 17 क्योकि जालू इक माणूऐ दे पापां दिया बजा ने मौत सारे लोकां पर आई गई, तां जिना लोकां जो अनुग्रह कने धार्मिकता दा बरदान मता सारा मिलदा है उना जो इक माणूऐ दे, मतलब की यीशु मसीह दे जरिये हमेशा दी जिन्दगी मिलणी कने उना राज्य भी करणा। 18 इस ताई जियां इक पाप सारे माणूआं ताई सजा लेईकरी आया, तियां ही इक धार्मिकता दा कम्म भी सारयां लोकां ताई धर्मी बणने दी बजा बणी जडा जिन्दगी दिन्दा है। 19 क्योकि जियां इक माणूऐ दे हुकम नी मणणे ने मते लोक पापी बणे, तियां ही इक माणूऐ दे हुकम मणणे ने मते लोकां धर्मी बणना है। 20 मूसा दी व्यवस्था दिती गई ताकि सारे लोक जाणी सकन की सै कितणे पापी न, पर जालू लोकां पाप पर पाप किते, तां परमेश्वरे अपणी दया कने अनुग्रह होर भी जादा दसया, 21 जियां सारयां पाप किता कने सारे मरी गे, तियां ही साडे प्रभु यीशु मसीह दे जरिये परमेश्वरे दे अनुग्रह ने उना जो धर्मी बनाणा कने उना जो हमेशा दी जिन्दगी देणी। (aiōnios g166)

**6** तू सोचदा है, की अगर परमेश्वरे अपने अनुग्रह ने साडे पापां जो माफ करी दितया है, पर असां ऐसा ना सोचन, चला असां पाप करदे रेन ताकि अनुग्रह होर जादा हो। 2 नी बिलकुल भी नी! अगर असां पाप ताई इक बरी मरी गे तां सांझो लगातार पाप नी करणा है। 3 असां जाणदे न की जालू असां यीशु मसीह सोगी इक होंणे ताई बपतिस्मा लिया, तां असां यीशु मसीह सोगी मरी गे। 4 जालू असां बपतिस्मा लिया तां ऐ ऐसा था जियां असां मसीह सोगी मरी गे कने उस सोगी दफनाई दिते, ताकि जियां मसीहा पिता परमेश्वर दिया महिमा दे जरिये मरयां चे जिन्दा किता, तियां ही असां भी नोई जिन्दगिया जो नोए तरीके ने जिन। 5 क्योकि अगर असां बपतिस्मे जरिये यीशु दी मौता च उदे सोगी इक होई गे, तां पक्का है की असां उदे जिन्दे होंणे पर उदे सोगी इक होई जाणा। 6 क्योकि असां जाणदे न की साडा पराणा पापी सभाब यीशु मसीह सोगी सुली पर चढाया गिया, ताकि शरिर दा पापी सभाब खत्व होई जाऐ, कने असां अग्रे जो पाप दे गुलाम नी रेन। 7 क्योकि जालू असां मसीह सोगी मरी गे तां असां पाप दी शक्ति ला मुक्त होई गे। 8 इस ताई अगर असां मसीह सोगी मरी भी गे, तां साडा भरोसा ऐ भी है की उदे सोगी जीणा भी है, 9 क्योकि असां जाणदे न की, मसीह मरी करी जिन्दा होया कने फिरी कदी नी मरणा है। मौत दा उस पर कोई हक नी है। 10 क्योकि यीशु मसीहा जडा मरी गिया तां पाप ताई इक ही बरी मरी गिया; पर जडी जिन्दगी से जी दा है, सै परमेश्वर दे आदर ताई जिंदा है। 11 इयां ही तुसां भी अपने आपे जो पापे दी शक्ति ताई मरया होया समझा, पर परमेश्वरे ताई यीशु मसीह जो इज्जत देणे ताई जिया। 12 इस ताई पापी इच्छां जो अपणिया जिन्दगिया पर राज करणा मत दिया, ताकि तुसां अपणियां पापी इच्छा दे अनुसार कम्म ना करन। 13 कने ना अपने शरिर दे अंगा जो बुरे कम्मा ताई इस्तेमाल करा, पर अपने आपे जो मरयां

चे जिन्दा समझीकरी अपने आपे जो परमेस्वर दे दिया, कने अपने शरीर दे अंगा जो धार्मिकता दे कम्मा जो पूरा करणे तांई अपनी जिन्दगी परमेस्वर दे जो दिया। 14 तां तुसां पर पाप दी शक्तिया राज्य नी करणा, क्योकिं तुसां मूसा दी व्यवस्था दे अधीन नी पर परमेस्वर दे अनुग्रह दे अधीन न। 15 तां क्या होया? अगर हुण असां व्यवस्था दे अधीन नी न पर परमेस्वर दे अनुग्रह दे अधीन न, तां सांझो पाप नी करणा चाईदा। 16 तुसां ऐ जाणदे न की जालू तुसां अपने आपे जो कुसी दा गुलाम बणाई दिन्दे न, तां फिरी सै माणू तुहाडा मालिक है कने तुसां जो सै करणा चाईदा जडा सै बोलदा है: तुसां पाप दे गुलाम बणी सकदे न, जडा तुसां जो मौता पासे लेई जांदा है, या तुसां परमेस्वर दे गुलाम बणी सकदे न, जडा तुसां जो धार्मिक जिंदगी जिणे च अगुवाई करदा है। 17 तुसां जडे पाप दे गुलाम थे, पर हुण तुसां उस शिक्षा जो मंदे न जडी तुसां जो मिल्ली है, इदे तांई मैं परमेस्वर दा धन्याबाद करदा है, 18 परमेस्वर तुसां जो पाप दी शक्ति ला अजाद करी दिता कने तुसां परमेस्वर दे गुलाम बणी गे, की सै करणे तांई जडा सही है। 19 मैं गुलामी दा ऐ उदाहरण तुसां जो इस तांई दिता ताकि तुसां असांनी ने समझी सकन की मैं क्या सिखा दा है। जियां तुसां अपने शरीर दे अंगा जो बुरे कम्म कने अपवित्रता दी गुलामी तांई देई दिता, तियां ही हुण अपने शरीर दे अंगा जो भले कम्म कने पवित्रता दे गुलाम होणे तांई देई दिया। 20 जालू तुसां पाप दे गुलाम थे, तां तुसां दी भले कम्मा जो करणे दी कोई इच्छा नी थी। 21 तुसां बुरे कम्म किते, कने तुसां हुण इना कम्मा ला शर्मिंदा होंदे न। तां तुसां जो क्या मिल्ला? ऐसे कम्म सिर्फ मौत लेईकरी ओंदे न। 22 पर हुण पाप ला अजाद होईकरी कने परमेस्वर दे गुलाम बणी करी तुसां दे ऐसे कम्म जिन्दगी च पवित्रता लेईकरी ओंदे न, कने उना दा अंत हमेशा दी जिन्दगी है। (aiōnios g166) 23 क्योकिं पाप दा नतीजा मौत है, पर सै बरदान जडा परमेस्वर सांझो दिन्दा है, सै हमेशा दी जिन्दगी है जडी साडे प्रभु यीशु मसीह च है। (aiōnios g166)

**7** हे मसीह भाईयो, तुसां जाणदे न (मैं व्यवस्था जो जाणने बालयां जो बोलदा है) की जालू दीकर माणू जिन्दा रेदा है, तालू दीकर ही उस व्यवस्था दा अधिकार उस पर है? 2 उदाहरण तांई, व्यवस्था दे अनुसार इक माणूऐ दी घरे बाली उदी ही घरे बाली बणी की रे जालू दीकर उसा दा घरेबाला जिन्दा है, पर जालू उसा दा घरेबाला मरी गया, तां सै कुसी होरसी ने बियाह करणे तांई अजाद है, पर अगर सै अपने घरे बाले दे होंदे होए कुसी होरसी माणूऐ सोगी चली जाए, तां उसयो व्यभिचारणी बोलदे न। 4 तां हे मेरे मसीह भाईयो, जालू तुसां मसीह सोगी मरी गे, तां तुसां व्यवस्था दे अधिकार तांई भी मरी गे। हुण तुसां मसीह दे न जडा मरयां चे जिन्दा होई गया ताकि तुसां परमेस्वर तांई फलदायक जिन्दगी जी सकन। 5 क्योकिं जालू असां पापी सभाब दे बशे होंदे न, तां पापी इच्छां साडे अंदर कम्म करदियां न कने व्यवस्था इना पापी इच्छां जो जगाई दिदिया न कने मौत दा फल पैदा करणे तांई साडे शरीर च कम्म करदियां न। 6 पर असां व्यवस्था तांई मरी गे जिना सांझो गुलाम बणया था, पर हुण व्यवस्था ला अजाद होई गे न, हुण असां लिखियो व्यवस्था जो परमेस्वर दी सेबा मन्नी करी नी करदे न, पर आत्मा दियां गल्लां जो मनी करी नोए तरीके ने सेबा करी सकदे न। 7 तां असां क्या बोलणा? क्या व्यवस्था पाप है? नी बिलकुल भी नी! पर व्यवस्था ने मिंजो पता चला की पाप क्या है। मिंजो समझ आया की लालच करणा पाप है क्योकिं ऐ व्यवस्था च लिखया है, की लालच मत कर। 8 पर पापे इना हुकमा दा इस्तेमाल करिके मिंजो च हर तरह दा लालच पैदा कित, क्योकिं बिना व्यवस्था दे पाप मुर्दा है। 9 मैं तां व्यवस्था बिना जाणयो जिन्दा था, पर जालू मैं व्यवस्था जो जाणी लिया, तां पाप करणे दी इच्छां मेरे अंदर बदी गियां, कने मैं परमेस्वर ला लग होई गिया। 10 कने सेई हुकम जिना जो परमेस्वर मिंजो जिन्दगी देणे तांई दितया था, इना ही मिंजो परमेस्वर ला लग करी दिता। 11 क्योकिं पापे इना हुकमा दा इस्तेमाल करिके मिंजो धोखा देई दिता, कने उनी ही मिंजो परमेस्वर ला लग करी दिता। 12 इस तांई व्यवस्था पाप नी पर पबित्र है, कने हुकम पबित्र, धर्मी कने सही है। 13 क्या व्यवस्था जडी खरी थी, मिंजो परमेस्वर ला लग होणे दी बजा बणी? सै जडी खरी थी, मिंजो परमेस्वर ला दूर करणे दी बजा बणी? नी बिलकुल भी नी! पर ऐ पाप था जिनी ऐ कित, पापे व्यवस्था जो इस्तेमाल कित जडी सही थी, ताकि सै मिंजो परमेस्वर ला लग करे, इस तरिके ने पापे दस्सी दिता की सै सच्ची च क्या है, कने

हुकम दस्सी दिता की पाप बुरा है। 14 क्योकिं असां जाणदे न की व्यवस्था तां आत्मिक है, पर मैं शारीरिक माणू कने पाप दा गुलाम है। 15 कने जडा मैं करदा है उसयो नी जाणदा, क्योकिं जडा मैं चांदा है सै नी करदा, बल्कि सै ही करदा है, जिसला मैं नफरत करदा है। 16 कने अगर, जडा मैं नी चांदा है सेई बुरे कम्म मैं करदा है, तां मैं मनी लेंदा है की व्यवस्था खरी है। 17 तां ऐसी हालत च जडा बुरे कम्म करणे बाला है सै मैं नी, पर पाप है जडा मिंजो च बसया है। 18 क्योकिं मैं जाणदा है, की मेरे पापी सभाब च कुछ भी खरा नी है, भले कम्म करणे दी इच्छा तां मिंजो च है, पर भले कम्म मिंजो ला होंदे नी। 19 क्योकिं जिस खरे कम्मे दी इच्छा मैं करदा है, सै तां नी करदा, पर जिसा बुराईया दी इच्छा नी करदा, सेई करदा है। 20 पर अगर मैं सेई करदा है जिसदी इच्छा नी करदा है, तां इसयो करणे बाला मैं नी है, पर सै पाप है जडा मिंजो च बसया है। 21 ऐथू मिंजो इस सच दा अहसास होंदा है की जालू भी मिंजो खरा करणे दी इच्छा होंदी है, तां मैं सेई करदा है जडा बुरा है। 22 क्योकिं मैं अपने पुरे मने ला तां परमेस्वर दिया व्यवस्था ला बडा खुश रेदा है। 23 पर मिंजो अपने शरीर दे अंगा च कोई होर ही व्यवस्था मिल्ला दी है, जडी मेरिया मने दिया व्यवस्था ला लडटी है कने ऐ शक्ति मिंजो पाप दा गुलाम बणादी है जडी हले भी मेरे शरीर दे अंगा च कम्म करदी है। 24 मैं कदिया अभागा माणू है! मिंजो इस शरीर ला कुण छुडागां, जडा मिंजो परमेस्वर ला लग करदा है? 25 मैं मने ला तां परमेस्वर दिया व्यवस्था जो मनदा, पर शरीर ला पाप दिया व्यवस्था जो मनदा है। मैं परमेस्वर दा धन्यबाद करदा है जिनी मिंजो प्रभु यीशु मसीह दे जरिये बचाई लिया।

**8** इसा बजा ला हुण जडे यीशु मसीह च न, उना जो सजा दा हुकम नी है। 2 क्योकिं पबित्र आत्मा तुसां जो सै जिन्दगी दिन्दा है, जडी यीशु मसीह ला ओंदी है कने सै तुसां जो पाप कने मौत ला अजाद करदी है। 3 क्योकिं जडा कम्म मूसा दी व्यवस्था साडा पापी सभाब होणे दिया बजा ने नी करी सकी, सै परमेस्वर कित, मतलब की अपने ही पुत्रे जो साडे पापी शरीर सांई बणाई करी साडे पापां तांई बलिदान होणे तांई भेजी दिता, परमेस्वर मसीह दे शरीर च पाप जो सजा दिती। 4 इस तांई की व्यवस्था जडी धर्मी होणे तांई जिना गल्लां दी मांग करदी है, पर असां पापी सभाब दे अनुसार नी पर पबित्र आत्मा दे अनुसार चली करी इना गल्लां जो पूरा करदे न। 5 क्योकिं जडे लोक पापी सभाब दे बशे च रेंदे न, सै पापी गल्लां दे बारे च सोचदे न, पर जडे पबित्र आत्मा दे बशे च रेंदे न सै उना गल्लां दे बारे च बिचार करदे न जडियां आत्मा जो खुश करदियां न। 6 अगर तुसां अपने मन जो पापी सभाब दे बशे च रखदे न तां उदा नतीजा मौत है, पर अगर तुसां अपने मने जो पबित्र आत्मा दे बशे च रखणे तां उदा इनाम जिन्दगी कने शांति है। 7 क्योकिं पापी सभाब दे बशे च रेणा तां परमेस्वर ने बैर रखणा है, क्योकिं पापी सभाब ना तां परमेस्वर दिया व्यवस्था दे अधीन है, कने ना ही उदिया व्यवस्था दा पालन करी सकदा है। 8 कने जडे पापी सभाब दे बशे च न, सै परमेस्वर जो खुश नी करी सकदे। 9 पर जालू परमेस्वर दी आत्मा तुसां च बसदी है, तां तुसां पापी सभाब दे बशे च नी न, पर आत्मा दे बशे च न। अगर कुसी च मसीह दी आत्मा नी है तां सै मसीह दा नी है। 10 अगर मसीह तुसां च है, तां पाप दिया बजा ने शरीर मरया होणे पर भी धार्मिकता दिया बजा ने तुहाडी आत्मा जिन्दा है। 11 कने अगर परमेस्वर दी आत्मा जिना यीशुऐ जो मरी करी जिन्दा कित जडी तुसां च बसियो है; तां जिनी यीशु मसीह जो मरयां चे जिन्दा कित उनी तुहाडे मरणे बाले शरीर जो अपणिया आत्मा दे जरिये जिन्दा करणा। 12 तां हे मसीह भाईयो, सांझो हुकम करणा चाईदा, पर सै नी जडा साडा पापी सभाब चांदा है की असां करन। 13 क्योकिं अगर तुसां पापी सभाब दे अनुसार जिन्दगी जीगे, तां तुसां परमेस्वर ला लग होई जाणा, अगर तुसां पबित्र आत्मा दिया शक्तिया ला सै सब करणा बंद नी करणे जडा तुहाडा पापी सभाब करणा चांदा है, तां तुसां जिन्दा रेणा। 14 इस तांई की जितणे लोक परमेस्वर दिया आत्मा दे चलणे ने चलदे न, से ही परमेस्वर दे बच्चे न। 15 क्योकिं तुसां जो गुलामी दी आत्मा नी मिलियो है, की तुसां फिरी परमेस्वर ला डउन, पर तुहांजो परमेस्वर दी आत्मा मिल्ली है जालू उनी तुसां जो अपने बच्चे होणे तांई गोद लिया, जिसने असां हे बापू, हे पिता बोली करी पुकारदे न। 16 पबित्र आत्मा अपु ही साडिया आत्मा सोगी गबाई दिन्दा है, की असां परमेस्वर दी ओलाद न। 17 कने अगर ओलाद न, तां वारिस भी न,

बल्कि परमेश्वर दे वारिस कने मसीह सोगी वारिस न, अगर असां यीशु सांई दुखां जो सेहन करते न। तां असां भी उदी महिमा च हिस्सा लेणा। 18 भिजो पक्का यकीन है, की जिना दुख तकलिफां जो असां इस बकत सेहन करा दे न, ऐ दुख तकलीफ उस महिमा दे सामणे बडे घट न जडी सांझो परमेश्वर बादे च देणे बाला है, 19 क्योकि सारी सृष्टि बडिया आसा सोगी उस बकत दा इंतजार करा दी है, जालू परमेश्वर प्रगट करणा है की उदे बच्चे कुण न। 20 क्योकि परमेश्वर जडा कुछ भी संसार च बनाया, सै बेकार होई गया, इस तांई नी होया की सै चांदे थे, पर ऐ इस तांई होया की परमेश्वर ऐसा किता। पर फिर भी इक आस है। 21 की संसार उस दिने दा इंतजार करा दा है, जालू संसारे मौत कने बिनाश दी गुलामी ला अजाद होई जाणा कने परमेश्वर दे बचयां दी महिमामय आजादी च हिसेदार होणा। 22 क्योकि असां जाणदे न, जालू ला आदमे पाप किता, तालू ला लेइकरी हुणे दीकर जितणियां भी चीजां जो परमेश्वर बनाया, सै पीडा ने इयां चिखदियां न जियां इक जनानी बच्चे जो जमणे बकत चिखदी है। 23 कने सिर्फ संसार ही नी जडा पीडा सेहन करा दा है, पर असां तिरिफ आत्मा जरिये होणे बाली महिमा दा स्वाद चखणा है, हालांकि असां अंदर-अंदर ही पीडा सेहन करते न; पर असां हुण भी उस बकते दा इंतजार करते न जालू परमेश्वर सांझो अपने बच्चे होणे तांई उपर लेई जाणा है कने साडे शरिरे जो उना सारियां बुरियां चीजां ला छुटकारा देई देणा कने सांझो नोऐ शरीरां जो देईकरी साडे शरीरां जो अजाद करणा है। 24 परमेश्वर जालू सांझो बचाया तालू सांझो ऐ आस दिती, की हल्ले दीकर सांझो सै सब कुछ नी मिल्ला जिसदा परमेश्वर वायदा कितया, इस तांई सांझो अजे भी आस है की सै सब कुछ मिलणा है। इस तांई हुण असां सब रखीकरी इंतजार करते न जालू दीकर सै मिल्ला ना जाऐ। क्योकि कोई भी उसा चिजा जो पाणे दी इच्छा नी करदा जडी पेहले ला ही उदे बाल है। 26 इयां ही पबित्र आत्मा भी साडी तालू सहायता करदा है जालू असां अपने परमेश्वर पर भरोसे च कमजोर होदे न, क्योकि असां नी जाणदे की प्राथना कियां करणा चाईदी, पर पबित्र आत्मा अपु ही रोई-रोई करी साडे तांई बिनती करदी है, सै असां दरसी नी सकदे न। 27 कने मना जो जाणने बाला परमेश्वर जाणदा है, की पबित्र आत्मा क्या बोला दी है? क्योकि सै पबित्र लोकां तांई परमेश्वर दिया इच्छा अनुसार बिनती करदा है। 28 कने असां जाणदे न, की जडे लोक परमेश्वर ला प्यार रखदे न, उना लोकां तांई सारियां गल्लां मिलिकरी भलाई जो ही पैदा करदियां न, मतलब की उना तांई जडे उदिया इच्छा अनुसार चुणयो न। 29 क्योकि जिना जो उनी पेहले ला ही चुणया है, उना तांई पेहले ला ही निर्णय भी लिया है, की सै उदे पुत्रे सांई बणी जान ताकि सै मते भाईयां चे जेठा पुत्र बनान। 30 फिरि जिना तांई परमेश्वर पेहले ला ही तय कितया है, उना जो ही चुणया भी, कने जिना जो चुणया है, उना जो धर्मी भी बनाया है, कने जिना जो धर्मी बनाया, परमेश्वर अपणी महिमा उना सोगी बंडणी है। 31 तां असां इना गल्लां दे बारे च सोची करी इसी नतीजे पर ओदे न, अगर परमेश्वर साडे पासे है, तां कोई भी दुशामण सांझो हराई नी सकदा। 32 जिनी परमेश्वर अपने इकलोते पुत्रे जो साडे तांई बलिदान करी दिता, कने साडे तांई उसयो दुशामणा दे हथे देई दिता, तां उनी सांझो सै सब कुछ भी देणा जिसदा उनी सांझो ने वायदा कितया है। 33 कोई भी परमेश्वर दे सामणे सांझो पर दोष नी लगाई सकदा, क्योकि सेई है जडा अपने सोगी सांझो धर्मी बनादा है। 34 कोई भी साडी बुराई नी करी सकदा, क्योकि ऐ यीशु मसीह है, जडा साडे तांई मरी गया कने मरी करी जिन्दा होई गया था, कने जडा साडे तांई परमेश्वर ला बिनती करदा है। 35 कोई भी सांझो मसीह दे प्यार ला लग नी करी सकदा, ना ही दुख, ना ही मुसिबतां, ना ही सताया जाणा, ना ही अकाल, ना ही गरीबी, ना ही खतरा, कने ना ही तलवार इना चे इक भी नी। 36 जियां पबित्र शास्त्र च लिखया है, “परमेश्वर तांई हर दिन लोक सांझो जानी ला मारणे दी धमकी दिन्दे। सांझो बलि देणे बालियां भेडां सांई समझया गया।” 37 पर इना सारे बुरे हालातां च उदे जरिये साडी पूरी जित है, जिनी सांझो ने प्यार किता है। 38 क्योकि मै पक्का जाणदा है की, कुछ भी सांझो प्यार करणे बाले मसीह ला दूर नी करी सकदा, इसला कोई फरक नी पौदा की असां जिन्दे न या मुर्दा, स्वर्गदूत, अधिकारी, कने अम्बरे दियां शक्तियां इस काबिल नी की उदे प्यार ला लग करी सकन कने जडा कुछ हुण होआ दा है कने जडा कुछ अग्रे होणा, कने सारे संसारे च जडा सब

कुछ है इस काबिल नी है की सांझो परमेश्वर दे प्यारे ला जडा साडे प्रभु यीशु मसीह च है लग करी सके।

9 हुण कुछ भी नी है जडा सांझो परमेश्वर दे प्यार ला लग करी सकदा है, तां फिरि कजे इस्त्राएली लोक, मेरे यहूदी भाई परमेश्वर ला लग न? मेरा मन मेरे अपने लोकां तांई बडा दुखी होदा है, क्योकि मै ऐथू दीकर चांदा की अपने लोकां दा उद्धार करणे तांई मै मसीह ला लग होई जां कने आरोपी बणी जां, मै ऐ करणे तांई तैयार भी है। मै मसीह जो गवाह मन्नी करी सच्च बोला दा है। पबित्र आत्मा कने मेरी अंतरात्मा भी ऐ जाणदे न की मै झूठ नी बोला दा है। 4 सै मेरे सांई इस्त्राएली लोक न, इना जो परमेश्वर अपने गोद लियो बच्चे होणे तांई चुणया, महिमा, बाचा, मूसा दी व्यवस्था, परमेश्वर दी भक्ति कने बायदा उना दी है। 5 अब्राहम, इसहाक कने याकूब उना दे पूर्वज न, जडे शरीरिक तौर पर प्रभु यीशु मसीह दे भी पूर्वज न कने पिता परमेश्वर जडा सबना पर राज करदा है, उदी महिमा युगां-युगां दीकर होदी र। आमीन। (aiōn g165) 6 पर ऐ नी की, परमेश्वर अपने वायदे पूरे नी करी सकया, इस तांई होया की जडे इस्त्राएले दे बंशज न सै असल च सारे इस्त्राएली नी न; 7 कने अब्राहम दे बंशे च पैदा होणे ने ही सारे उदी सच्चवी ओलाद नी बणदे, क्योकि परमेश्वर अब्राहम ने बोलया “जडे इसहाक दे बंश च पैदा होंदे न, सेई तेरे बंश मन्ने जाणे न।” 8 मतलब की जडे शरिरे ने पैदा होंदे न, सै परमेश्वर दी ओलाद नी है, पर सिर्फ बायदा कितयो ओलाद ही अब्राहम दे बंश मन्ने जान। 9 क्योकि बायदे दा बचन ऐ है, “मै अगले साल इस बकत दुबारा ओणा कने तालू सारा जो इक पुत्र होणा।” 10 कने सिर्फ ऐई नी, पर रिबका दे जूडवा जागतां दा इक ही पिता था, साडा पूर्वज इसहाक। 11 कने ऐथू दीकर उना दे पैदा होणे ला पहले परमेश्वर रिबका ने बोलया, की उदे बडे जागते छोटे जागदे दी सेवा करणी। परमेश्वर ऐसा इस तांई बोलया की परमेश्वर अपणी इच्छा ने ही चुणदा है, ऐ इस तांई नी होया की इना बचयां चे कुनी कुछ कितया था, पर परमेश्वर ही है जडा ऐ चुनब करदा है। 13 जियां पबित्र शास्त्र च लिखया है, “मै याकूब ने प्यार किता, पर एसाब ने प्यार नी किता।” 14 ता असां इदे बारे च क्या बोलन? क्या परमेश्वर उना लोकां जो चुणने च अन्याय करदा है जिना जो सै चुणना चांदा है? नी बिलकुल भी नी! 15 क्योकि परमेश्वर मूसा ला बोलया, “मै जिस पर दया करणा चांगा उस पर दया करणी, कने जिस कुसी पर कृपा करणा चांगा उस पर कृपा करणी।” 16 इस तांई परमेश्वर उसी जो ही चुणदा है जिस पर दया दसणा चांदा है, परमेश्वर चांदा चुणना इसा गल्ला पर निर्भर नी करदा है की लोक क्या चांदे न या क्या करणे दी कोशिश करदे न। 17 क्योकि पबित्र शास्त्र च परमेश्वर मिस्र दे राजा फिरौन जो बोलया, “मै तिजो इसी तांई राजा बनाया है, की तिजो पर अपणी शक्ति दरसे, कने मेरे नाऐ दा प्रचार सारे संसार दे लोकां च हो।” 18 कने सै जिसयो चांदा है, उस पर दया करदा है, कने जिसयो चांदा है, उसयो जिद्दी बनाई दिन्दा है। 19 फिरि कुछ लोकां मिजो ने बोलणा, “अगर ऐसा है तां परमेश्वर कियां बोली सकदा है की असां गलत न? क्योकि कोई भी उसयो नी रोकी सकदा जडा सै करणा चांदा है।” 20 हे भाई, तू कुण है, जडा परमेश्वर ने बेहस करदा है? क्या बनाई होई चीज बणाणे बाले पुच्छी सकदी है, “की तू मिजो ऐसा कजे बणाया?” 21 कुम्हारे जो क्या मीटिया पर हक नी, की सै इकी ही मीटिया ला, इक बांदा आदर तांई, कने दूजा अनादर तांई बणाऐ, 22 तां इदे च कुण देई हेरानी दी गल्ल है की परमेश्वर अपना गुस्सा दसणे तांई कने अपणी शक्ति प्रगट करणे दिया इच्छा ला गुस्से दे भांडयां दी, जडे विनाश तांई तैयार कितयो थे, बडे सबर ने सेहन किती। 23 जिना लोकां पर परमेश्वर दया करणा, जिना जो उनी अपणी महिमा च हिस्सेदारी तांई पेहले ही चुणया है, उना पर अपणिया बडी जादा महिमा दे धने जो प्रगट करणे दी इच्छा किती? 24 मतलब की असां पर जिना जो उनी ना सिर्फ यहूदियां चे बल्कि होर जातियां चे भी चुणया। 25 जियां होर जातियां दे बारे च, परमेश्वर उदा संदेश देणेबाले होशे दिया कताबां च भी बोलदा है, “जडी मेरी प्रजा नी थी, उना जो अपणी प्रजा बोलणा, कने जडे मेरे प्यारे लोक नी थी, उना जो मै प्यारे बोलणा; 26 कने इयां होणा की जिसा जगा च परमेश्वर उना जो ऐ बोलया था, की तसां मेरे लोक नी न, उसा ही जगा च जिन्दा परमेश्वर उना जो अपणी संतान बोलणा।” 27 कने परमेश्वर दा संदेश देणेबाले यशायाह इस्त्राएल दे लोकां बारे च पुकारी करी बोलदा है, “चाऐ

इसाएले दे लोक गिणतिया च समुद्रे दे कंडे दिया रेता सांई मते भरी न, तमी उना चे थोडे ही बचणा।” 28 क्योंकि प्रभुए जल्दी ही संसारे लोकां दा अन्याय सच्चाईया ने करणा। 29 जियां परमेश्वरे दा संदेश देणेबाले यशायाह पेहेले भी बोलया था, “अगर सबदे शक्तिशाली प्रभु इस काबिल नी बणांदां की साडे कुछ बंश होन, तां असां सदोम कने अमोरा शेहरां दे लोकां सांई खत्म होई जांते।” 30 तां असां इदे बारे च क्या बोलन? ऐ की होर जातियां अपने आप जो परमेश्वरे सोगी ठीक करणे दी कोशिश नी करते थे, पर परमेश्वरे उना जो अपने सोगी धर्मी बणाया क्योंकि उना उस पर भरोसा किता; 31 पर इस्राएली लोक, जडे मूसा दी व्यवस्था जो मन्नी करी परमेश्वरे दे जरिये धर्मी होणा चांदे थे, पर सै धर्मी बणने च सफल नी होए। 32 ऐ कियां होई सकदा है? इस तांई की इस्राएली लोक भरोसे ने नी, पर भले कम्मा धर्मी होणा चांदे थे: उना मसीह जो नी अपनाया जिदी उस पथरे सोगी तुलना करी सकदे न जिसला लोकां जो ठोकर लगदी है। 33 जियां पबित्र शास्त्र च लिखया है, “दिखा मैं यरूशलेम शेहर च लोकां जो ठोकर लगणे तांई इक पथर खादा है जिसला लोकां डेई पोणा है, कने जडा इस पर भरोसा करणा, उनी शरमिदा नी होणा।”

**10** हे मसीह भाईयो, मेरे मने दी इच्छा कने इस्राएली लोकां तांई परमेश्वरे ने ऐ मेरी प्रार्थना है, की परमेश्वर उना जो बचाई ले। 2 क्योंकि मैं उना दी गबाई दिन्दा है, की सै परमेश्वरे तांई उत्साहित रेंदे न, पर परमेश्वर दी सेवा करणे दी उना दी समझ सही नी है। 3 क्योंकि इस्राएली लोक परमेश्वरे दिया उसा धार्मिकता ला अनजाना होईकरी कने अपने ही तरीके ने धर्मी बणने दी कोशिश करते न, उना अपने आपे जो परमेश्वरे दिया धार्मिकता दे अधीन नी किता। 4 क्योंकि व्यवस्था दा मकसद हण पूरा होई गया है की मसीह आई गया है। इस तांई हर कोई जडा मसीह पर भरोसा करदा है, उसयो परमेश्वर धर्मी बणादा है। 5 क्योंकि मूसा व्यवस्था ला मिलियो धार्मिकता दे बारे च परमेश्वरे दे बचन च ऐ लिखया है, “की जडा माणु इना गल्लां जो मनदा है, उसयो इसी ने ही जिन्दगी मिलणी।” 6 पर जडी धार्मिकता सांझो मसीह पर भरोसा करणे ने मिलदी है, इदे बारे च पबित्र शास्त्र ऐ बोलदा है, “तू अपने मने च ऐ मत बोलदा की कुण स्वर्ग पर चढगा कने मसीह जो थले धरती पर उतारणा?” 7 या कुण अधोलोक च उतरणा कने कुण मसीह जो मरयां चे जिन्दा करिरी उपर लेई ओंगा? (Abyssos g12) 8 क्या है इदा मतलब? “ऐ की परमेश्वरे दा बचन तेरे बाल है, तेरे मुए कने तेरे मने च,” ऐ सेई भरोसे दा संदेश है, जडा असां प्रचार करते न। 9 इस तांई अगर तू अपने मुए ला यीशु मसीह जो प्रभु मन्नी लेदां है कने अपने मने ने भरोसा करे, की परमेश्वरे उसयो मरयां चे जिन्दा कितया है, तां पक्का परमेश्वरे तिजो बचणा। 10 जालू असां अपने मने ला भरोसा करदे न तां असां परमेश्वरे असां परमेश्वर दी नजरा धर्मी बणदे न, कने जडा भरोसा असां अपने मने च कितया उसयो मुए ला बोलदे न, तां असां बचाये जाणे न। 11 क्योंकि परमेश्वरे दा संदेश देणेबाले यशायाह पबित्र शास्त्र च मसीह दे बारे च ऐ लिखदा है, “जडा कोई उस पर भरोसा करणा उनी शरमिदा नी होणा।” 12 यहदियां कने होर जातियां च कोई फरक नी, क्योंकि परमेश्वर सारयां दा प्रभु है, कने जडे भी उसला सहायता मंगदे न, सै उना जो बचादां है। 13 क्योंकि पबित्र शास्त्र च ऐ लिखया है “जडा कोई भी उसला सहायता मंगदा है प्रभु उना जो बचादां है।” 14 पर इसला पेहेले की लोक प्रभु ला सहायता मंगन, उना जो प्रभु पर भरोसा करणा है, इसला पेहेले की सै प्रभु पर भरोसा करन, उना जो उदे बारे च सुणना है कने लोक प्रभु दे बारे च सुणन, तां कुसी जो उना जो यीशु मसीह पर भरोसा करणे दे बारे च दसणा है। 15 कने इसला पेहेले कोई जाई करी उना जो बोले, की उस माणुए जो प्रचार करणे तांई भेजणा चाईदा, इस तांई पबित्र शास्त्र च लिखया है, “क्या ही छेल उना दे पैर न जडे शुभसमाचार लेईकरी ओदे न।” 16 पर सारयां उस शुभसमाचार पर भरोसा नी किता। परमेश्वरे दा संदेश देणेबाले यशायाह बोलदा है, “हे प्रभु, थोडे लोकां साडे संदेश पर भरोसा किता है?” 17 इस तांई भरोसा तालू ओदा है जालू असां संदेश सुणदे न, कने यीशु मसीह दे बचन सुणने ला ओदा है। 18 पर मैं बोलदा है, की इस्राएली लोकां पक्का ही यीशु मसीह दे संदेश दे बारे च सुणया है, क्योंकि ऐ पबित्र शास्त्र च लिखया है, “उना दे बचन सारिया धरती पर न, कने उना दे बचन धरतिया दे कुणे-कुणे दीकर पुज्जी गियो न।” 19 मैं फिरी बोलदा है, की ऐ सच

है की इस्राएल दे लोक मसीह दे संदेश दे बारे च समझदे थे, पेहेले तां प्रभुए मूसा दे जरिये ऐ बोलया, “तुसां यहदी लोकां मेरा होर जातियां तांई प्यार दिखीकरी जलना है, मैं तुसां जो मुख होर जातियां ला गुप्सा चडाणा।” 20 फिरी परमेश्वरे दा संदेश देणेबाला यशायाह बडिया हिम्मत ला ऐ बचन सुणया की, “जडे मिजो नी तोपदे थे, उना मिजो पाई लिया; कने जडे मिजो पछदे भी नी थे, उना पर मैं प्रगत होई गया।” 21 पर परमेश्वरे संदेश देणेबाले यशायाह दे जरिये इस्राएली लोकां दे बारे च बोलया है, “मैं सारा दिन अपने हथ इक हुकम नी मणणे बाली कने बेहस करणे बाली प्रजा पासे फेलादां रिया की सै मेरे पासे मुडन।”

**11** इस तांई मैं पछदा है, क्या परमेश्वरे अपणिया प्रजा जो छडी दिता? नी बिलकुल नी! मैं भी तां इस्राएली है; अब्राहम दे बंश कने बिन्यामीन दे गोत्र दा है। 2 परमेश्वरे अपणिया उस प्रजा जो नी छडया, जिसा जो उनी पेहेले ला ही चुणया था: तुसां जाणदे न की पबित्र शास्त्र परमेश्वरे दा संदेश देणेबाले एलिय्याह दे बारे च क्या बोलदा है: की सै इस्राएली लोकां दे खिलाफ परमेश्वरे ने बिनती करदा है। 3 उनी बोलया “प्रभु जी, उना तेरे संदेश देणेबालयां जो मारी दिता, कने उना तेरिया बेदिया जो डाई दितया है, मैं ही सिर्फ किला बचया जडा तिजो पर भरोसा करदा है, सै मिजो भी मारणे तांई तोपा दे न।” 4 पर परमेश्वरे एलिय्याह ने बोलया, “मैं अपने तांई सत हजार माणुए जो रख्या है, जडे बाल देवता दी मूर्तिया अगे नी झुके।” 5 इयां ही हण भी, परमेश्वर दे अनुग्रह ने ऐथु थोडे दे यहदी न जिना जो परमेश्वरे अपने सच्चे लोक होणे तांई चुणया है। 6 परमेश्वरे उना जो अनुग्रह दे जरिये चुणया है, ऐ भले कम्म करणे ने नी होया है। अगर ऐ भले कम्मा ने है, तां अनुग्रह फिरी अनुग्रह नी रिया। 7 इदा नतीजा ऐ होया: की इस्राएली लोकां परमेश्वर दिया नजरा च धर्मी बणने दी कोशिश किती, पर कामयाब नी होए, पर जिना लोकां जो परमेश्वरे चुणया, सै परमेश्वरे दिया नजरा च धर्मी बणे। दूजयां जो जिदी बणाई दिता कने उना परमेश्वरे दी सुणने ला मना करी दिता। 8 जियां पबित्र शास्त्र च यशायाय लिखया है, “परमेश्वरे उना जो हले दीकर सुस्त दिमाग दितया है, उना दियां हखीं तां हेन पर उना जो सच्चाई नी मिलदी कने कन्ना ला सुणदे तां हेन, पर समझदे नी न।” 9 कने राजा दाऊद बोलदा है, “मैं विनती करदा है की उना लोकां दियां सारियां अशीषां उना जो खत्म होणे दी बजा बणी जा, ऐथु दीकर की सै उजडी जान कने उना जो सजा मिल्ले। 10 कने उना दियां हखी अनिया होई जान, ताकि सै दिखी नी सकन, कने हर बकत अपणी मुसीबतां च दबुई रेन।” 11 तां मैं पछदा है, की उना क्या इस तांई: “क्या इस्राएली लोक ठोकर लगणे दिया बजा ने हमेशा तांई खत्म होई गियो न? नी बिलकुल नी! पर उना दे अविश्वास दिया बजा ने होर जातियां जो उद्धार मिल्ला, ताकि इस्राएली लोकां जो होर जातियां ला जलन हो।” 12 अगर इस्राएली लोकां दा अविश्वास होर जातियां दी भलाई दी बजा बणादा है, तां इस्राएली लोकां दा परमेश्वरे बाल बापस ओणे पर बडा अच्छा होणा। 13 मैं होर जातियां ने ऐ गल्लां बोलदां है। हण जालू मैं होर जातियां तांई प्रेरित है, मिजो अपणी सेबकाई पर घमंड है। 14 ताकि मैं कियां भी करिरी यहदी लोकां जो जलन करवाई करी उना चे केईयां जो बचाई सके। 15 क्योंकि जालू की उना दा परमेश्वरे जो छडी जाणे दिया बजा ने संसारे दे लोकां दा परमेश्वरे सोगी मेल होया था, तां उना दा मसीह जो अपनाणा, इक मरयो होए माणुए सांई होणा जडा दुबारा जिन्दा होई गया है। 16 मैं इस्राएली लोकां दे बारे च तुसां जो इक उदाहरण दिन्दा है। ऐ साडा इस्राएली लोकां दा रिबाज है, असां जालू रोटी बणाने तांई आटा गुनदे न, तां असां परमेश्वरे जो भेंट चढाणे तांई मुठी भर आटा लेदे न, अगर सै इक मुठी परमेश्वरे दी है, तां इदा मतलब है की पूरा आटा भी परमेश्वरे दा है। तियां अगर सखे दी जड परमेश्वरे दी है, तां इदा मतलब है की सखे दियां सारियां डालियां भी परमेश्वरे दियां न। 17 इस्राएली लोक इक अच्छे जैतून सखे दियां डालियां सांई न कने उना दे पूर्वज अब्राहम, इसहाक कने याकूब उस सखे दियां जडा सांई न। होर जातियां जंगली जैतून सखे दियां डालियां सांई न, जडियां कलम करी के उना बडियां डालियां दिया जगा च उस अच्छे जैतून सखे च लाइयां न, हण सै डालियां उस सखे दिया जडा दियां हिस्तेदार न। 18 तां तू अपने आप जो उना बडियां डालियां ला जादा मत समझदे। अगर तू जादा समझदा है, तां याद रख की तू जडा जो नी सम्भालदा, पर जड तिजो सम्भालदी है। 19 तां तू अपने मने च ऐ मत सोचदा की परमेश्वरे

झाएली लोकां जो उना डालियाँ साँई ठुकराई दिता जडियां इक रखे ला तोडी दितियां जादियां, ताकि सै होर जातियां जो अपनवाई सके, जडियां उना डालियाँ साँई न जिना जो कलम कितया है। 20 ऐ सचच है, सै तां अक्विवास दिया बजा ने तोडियां, पर तू अपने भरोसे दिया बजा ने टिकी रेंदा है, इस ताँई घमंड मत कर, पर परमेस्वरे दा डर मन, 21 क्योंकि जालू परमेस्वरे असली डालियाँ पर दया नी किती, तां तिजे पर भी दया नी करणी। 22 इस ताँई तू परमेस्वरे दिया कृपा कने सकताई पर बिचार कर! पर जडे डेई पियो न उना पर सकताई कने तिजे पर दया, अगर तू उदिया दया च बणी रे, नी तां तू भी कटी करी लग करी देणा। 23 अगर झाएली लोक भी भरोसा करणा शुरू करगे तां उना जो फिरी ला कलम लगाई देणे न, क्योंकि परमेस्वर उना जो फिरी कलम करी सकदा है। 24 कुसी जंगली डालिया द्या अच्छे रखे दा हिस्सा बणना स्भाभिक नी है। कने तुसां जडे यहदी नी न इक जंगली जैतन रखे ला बडियां डालियाँ साँई न कने इक अच्छे जैतन रखे ने जुडी गियो न। पर सै यहदी इक डालिया साँई न जडी अच्छे रखे च बडई थी, उना जो पक्का ही दुबारा ला अपणे रखे ने जोडया जाई सकदा है। 25 हे मेरे मसीह भाईयो, मै नी चांदा की तुसां इसा गल्ला ला अनजण रिया, इयां ना हो की तुसां अपने पर घमंड करणा लगी पोन, ऐ सचच है की झाएल दे केई लोक भरोसा करणे ताँई तैयार नी न, पर जालू परमेस्वरे पर भरोसा करणे बाली होर जातियां दे लोकां दी संख्या पुरी होई जांगी, तां झाएल दे लोकां भरोसा करणा कने परमेस्वरे बाल बापस आई जाणा। 26 इयां होणे बाद सारे झाएली लोकां दा उद्धार होणा, जियां पबित्र शाश्र च लिखया है, “छुडाणे बाले यस्खलेम शेहर ला ओणा है, कने अभक्ति जो याकुबे दे बंश ला दूर करणा। 27 कने उना सोगी मेरा ऐई बायदा होणा, जालू की मै उना दे पापां जो माफ करी देणा।” 28 यहदी लोक परमेस्वरे दे दुशमण न, क्योंकि सै श्भसमाचार पर भरोसा नी करणा चांदे न, कने ऐ तुहाडे ताँई फायदा बणी गिया है। पर परमेस्वर उना ने प्यार करदा है क्योंकि परमेस्वरे उना जो अपने ताँई चुंगी लिया। इसा गल्ला दा परमेस्वरे उना पूर्वजां ने बायदा कितया था। 29 क्योंकि परमेस्वर अपने बरदाना ने, कने बुलाहट ला कदी भी अपणा मन नी बदलदे। 30 क्योंकि जियां होर जातियां दे लोकां पेहेले परमेस्वरे दा हुकम नी मनया पर झाएली लोकां दे हुकम नी मनणे दिया बजा ला हण तुसां पर दया होई है। 31 तियां ही उना भी हण हुकम नी मनया की तुसां पर जडी दया होई है इसला उना पर भी दया हो। 32 क्योंकि परमेस्वरे सारायां जो हुकम नी मनणे दी आजादी दिन्दे है, ताकि परमेस्वर सारायां लोकां पर अपणी दया दर्सी सके। (eleese g1653) 33 वाह, परमेस्वरे दे अनुग्रह दा धन कने अकल, कने ज्ञान कितणा ही गंभीर है! कोई भी उदे सोच बिचार जो नी जाणी सकदा, कने ना ही उदे रस्तयां जो जाणी सकदा है! 34 “प्रभु दे बिचारां जो कोई भी नी जाणी सकदा, ना ही कोई उदा सलाहकार बणी सकदा है,” 35 कने कुनी भी परमेस्वरे जो कुछ नी दितया की परमेस्वरे जो सै उसयो बापस करणा पोए। 36 क्योंकि सब कुछ परमेस्वरे ला ओंदा है। उनी सब कुछ बणाया है, सब कुछ उदा है। उदी महिमा युगां-युगां दीकर होदी रे। आमीन। (aiön g165)

**12** इस ताँई हे मसीह भाईयो, मै तुसां ला परमेस्वरे दी दया याद करवाई करी बिनती करदा है, की तू अपणी जिन्दगिया जो जिन्दी, पबित्र, कने परमेस्वरे जो खुश करणे बाला बलिदान करिरी चढा; परमेस्वरे दी सेवा करणे दा ऐई सही तरिका है। 2 कने इस संसारे दे लोकां साँई मत बणा; पर तुहाडे सोचणे दे तरीके जो परमेस्वरे जो बदलना दे ताकि तुहाडा चाल चलण भी बदली जाऐ, इयां करिके तुसां जो पता लगी जाणा की परमेस्वर क्या चांदा है, कने उदिया नजरा च क्या भला, सिद्ध कने सही है। (aiön g165) 3 क्योंकि मै उस अनुग्रह दिया बजा ला जडा परमेस्वरे ला मिंजो मिलया है, तुसां च हर इकी जो बोलदा है, की जियां समझणा चाँईदा, उसला बदीकरी कोई भी अपने आपे जो ना समझे; पर जियां परमेस्वरे हर इकी दे उदे भरोसे दे अनुसार बंडया है, तियां ही अच्छी समझने अपने आपे जो समझ। 4 क्योंकि जियां साडे इक शरिरे च मते भरी अंग न, कने सारे अंगा दा कम्म इकोदिया नी है; 5 तियां ही, असां जालू मसीह पर भरोसा करदे न, असां सारे मसीह दे शरिरे दे अंग न, कने असां सारे इक दुज्जे ने जुडयो न। 6 कने जालू की उस अनुग्रह दे अनुसार जडा परमेस्वरे सांझो दितया है, सांझो लग-लग बरदान मिलयो न। तां जिसयो भविष्यदाणी दा बरदान मिलया हो, उसयो

सै बोलणा चाँईदा जिसदा उसयो भरोसा है की सै परमेस्वरे उसयो बोलया है। 7 अगर दुज्जयां दी सहायता करणे दा बरदान मिलया हो, तां इस कम्मे च लगी रे, अगर कोई सिखाणे बाला हो, तां सिखाणे च लगी रे; 8 अगर कुसी जो लोकां जो उत्साहित करणे दा बरदान मिलया हो, सै उत्साहित करणे च लगी रे, अगर कुसी जो दुज्जयां दी जरूरतां जो पूरा करणे दा बरदान हो, तां उस दान जो जादा ला जादा दे कर, अगर कुसी जो अगुवाई करणे दा बरदान मिलया हो, तां सै पूरी लगन ने करे, जडा दया करे, सै खुशिया ने दया करे। 9 दुज्जयां ने प्यार करणे दा दिखबा ना करे, बुराईया ने नकरत करा, जडा परमेस्वरे दिया नजरा च अच्छा है, उसयो करणे च लगी रिया। 10 परिबारे साँई इक दुज्जे ने प्यार करा; अपु चे इकी दुज्जे दी इज्जत बदीकरी करा। 11 सकत मेहनत करा कने आलसी मत बणा; उत्साह च बणी रिया, पुरे मने ने प्रभु दी सेवा करदे रिया। 12 तुहाडे बाल जडी आस है, उदे च खुश रिया; कला कलेश च सबर रखा, हर बकत प्राथना च लगी रिया। 13 पबित्र लोकां जो जडा कुछ जरूरी हो, उना दी सहायता करा; मेहमाना दा आदर स्तक्रार करदे रिया। 14 अपयों जो परेशान करणे बालयां जो आशीष दिया; आशीष दिया पर श्राप नी। 15 खुशी मनाणे बालयां सोगी खुशी मना, कने रोंणे बालयां सोगी रोआ। 16 इक दुज्जे दा उतणा ही ध्यान रखा जितणा की अपणा रखदे न; घमंड मत करा, पर गरीबां ने मिली जूली करी रिया; अपने आपे जो अकलमंद मत समझा। 17 बुराईयां दे बदले कुसी ने बुराई मत करा; जडियां गल्लां सारे लोकां ताँई खरियां न, उना दी चिंता करा। 18 जिथू दीकर होई सके, तुसां सबना लोकां सोगी मेल जोल रखा। 19 हे प्यारो अपना बदला मत लेंदे; पर परमेस्वरे जो अपने ताँई बदला लेणा दिया, क्योंकि पबित्र शाश्र च प्रभु बोलदा है, “बदला लेणा मेरा कम्म है, प्रभु बोलदा है मै ही बदला देणा।” 20 पर पबित्र शाश्र च ऐ भी लिखया है, “अगर तेरा दुशमण भूखा है तां उसयो खणां दे, अगर प्यासा है तां उसयो पाणी पिया; क्योंकि इयां करणे ने तू उसयो शर्मिंदा करी देणा।” 21 बुराईयां जो अपने पर जितणा मत दिया पर भलाईयां ने बुराईयां जो जीती लिया।

**13** हर इक माणू शासन दे अधिकारियां दे अधीन रे; क्योंकि सारे अधिकार परमेस्वर दिया तरफा ला होंदे न; कने जडे अधिकार न, सै परमेस्वरे ही दितयो न। 2 इस ताँई जडा कोई ऐसे लोकां दा बिरोध करदा है जिना बाल शासन करणे दा अधिकार है, सै परमेस्वरे दे नियमां दा बिरोध करदा है, कने बिरोध करणे बालयां जो सजा मिलणा। 3 क्योंकि अगर कोई अच्छे कम्म करदा है तां, उना जो अधिकारियां ला डरने दी जरूरत नी है; अगर सै बुरे कम्म करदा है तां उसयो डरने दी जरूरत है, अगर तुसां अधिकारियां ला डरणा नी चांदे न तां भले कम्म करा जिसला सै तुहाडी तारीफ करन। 4 क्योंकि अधिकारी लोक तेरिया सहायता ताँई परमेस्वरे दे सेवक न। पर अगर तू बुराई करे, तां तू डर; क्योंकि अधिकारियां बाल तुसां जो सजा देणे दा हक है कने सै परमेस्वरे दे सेवक न, जिना जो इस ताँई भेजया है की सै उना लोकां जो सजा देन जडे गलत कम्म करदे न। 5 तुसां जो ऐसा सिर्फ सजा ला बचणे ताँई ही नी करणा चाँईदा, पर इस ताँई भी की तुहाडी अंतरात्मा साफ रे। 6 इस ताँई करी भी दिया, क्योंकि शासन करणे बाले परमेस्वरे दे सेवक न, कने हमेशा अपणी जिम्मेबारियां जो निभाणे च अपणी जिन्दगी लाई दिन्दे न। 7 इस ताँई जिसयो जडा मिलणा चाँईदा, तुसां जो सै उसयो देणा चाँईदा; जिसयो कर चाँईदा, उसयो कर दिया, जिसयो चुंगी चाँईदी, उसयो चुंगी दिया; जिसला डरणा चाँईदा उसला डरा; जिसला इज्जत करणा चाँईदी उनी इज्जत करा। 8 तुसां सारायां जो सिर्फ इक ही गल्ला दा कर्जदार होणा चाँईदा कने सै ऐ है, की तुसां सारे इक दुज्जे ने प्यार रखा; क्योंकि जडा दुज्जयां ने प्यार रखदा है, उनी ही व्यवस्था पुरी किती है। 9 क्योंकि मुसा दी व्यवस्था च मते हुकम न, “ब्यभिचार नी करणा, हत्या नी करणी, चोरी नी करणी, लालच नी करणा,” इना जो छडी के होर कोई भी हुकम हो तां सारायां दा निचोड इस हुकम च है, “की जितणा अपने आपे ने प्यार करदे न, दुज्जयां ने भी उतणा ही प्यार करा।” 10 प्यार पडोसियां दी कुछ बुराई नी करदा, जडा प्यार करदा है, सै व्यवस्था जो पूरा करदा है। 11 तुसां च हर इक जणे जो इक दुज्जे ने प्यार करदे रेणा चाँईदा क्योंकि सै बकत नेडे है, जालू परमेस्वरे सांझो इसा बुरिया दुनिया ला बचाणा है। जालू असां पैली बरी यीशु मसीह पर भरोसा किता, उस बकते ला तां ऐ होर भी नेडे है। इसयो समझीकरी तुसां जो अपणी निंदा ला जाणा कने साबधान रेणा चाँईदा। 12 “इसा

बुरी दुनिया च रेणे दा साडा बकत लगभग खत्म होई गिया है इक रात सांई, जडी लाभग खत्म होई गेई है, कने सै बकत भी नेडे है जालू मसीहे बापस ओणा है।” सांझो उना चीजां जो भी करणा बंद करी देणा चाईदा जडियां बुराईया ने जुडियां न, कने सांझो लौई च इस्तेमाल होणे बाले हथियारां दा इस्तेमाल करणा चाईदा। 13 असां जो लौई च रेणेबाले लोकां सांई अपना चाल चलन ठीक करणा चाईदा, ना की खेलेणे कृदणे च, ना खाणां पीणे च, ना व्यभिचार च, ना लुचापन च, कने ना ही लडाई झगडे कने जलन च। 14 पर प्रभु यीशु मसीह तुहाडा कवच बणी जा, ताकि तुहाडी रक्षा करी सके, कने पापी सभाव दियां इच्छां जो पूरा करणे दी कोशिश मत करा।

**14** जडा मसीह भाई भरोसे च कमजोर है उदियां मानयता दे बारे च कुसी भी शके दे विना ही अपनाई लिया, उदे सोगी बेस मत करा की क्या करणा चाईदा या क्या नी करणा चाईदा। 2 क्योंकि इकी जो भरोसा है, की सब कुछ खाणा ठीक है, पर जडा भरोसे च कमजोर है, सै सिर्फ साग पते ही खांदा है। 3 जडे मास खांदे न, सै मास नी खाणे बालयां जो नीच ना समझन कने मास नी खाणे बाला, मास खाणे बालयां पर दोष ना लाए, क्योंकि परमेस्वरे दोनो जो अपनांदा है। 4 इस ताई तिजो कुसी दे भी सेवके दा न्याय नी करणा चाईदा, उदा सफल होणा या नी होणा दोनो उदे मालिके नी ह सम्बन्ध रखदा है, उनी पक्का ही सफल होई जाणा क्योंकि प्रभु उसयो सफल करी सकदा है। 5 इयां ही कोई तां इक दिने जो दुज्जे दिने ला बढियां मंदा है, कने कोई सारे दिना जो इकोदे मंदा है, हर इक जो यकीन होणा चाईदा की जडा सै सोचदा है सै सही है या नी। 6 जडा कोई कुसी दिने जो मनदा है, सै इस ताई करदा है क्योंकि सै प्रभु दी इज्जत करणा चांदा है, जडे मास खांदे न, सै भी प्रभु ताई खांदे न, क्योंकि सै परमेस्वरे दा धन्यवाद करदा है, कने जडा मास नी खांदा है, सै प्रभु तांई नी खांदा है कने परमेस्वरे दा धन्यवाद करदा है। 7 असां सारे प्रभु दे न। इस ताई साडी जिन्दगी च कने साडिया मीत च सांझो सिर्फ प्रभु जो खुश करणा चाईदा ना की अपु जो। 8 क्योंकि अगर असां जिंदे न, तां प्रभु ताई जिंदे न, अगर असां मरदे न, तां प्रभु ताई मरदे न; तां असां जिन या मरन, असां प्रभु दे ही न। 9 क्योंकि मसीह इसी ताई मरया कने फिरी जिन्दा होई गिया क्योंकि सै सेई है, सै जिन्दे कने मरयो दोनो दा प्रभु हे। 10 तू कजो अपने मसीह भाईए पर दोष लगांदा है? या तू कजो अपने मसीह भाई जो बुरा समझदा है? साडा सारयां दा परमेस्वरे न्याय करणा। 11 क्योंकि पबित्र शास्त्र च लिखया है, “प्रभु बोलदा है, मैं अपनी जिन्दगी दी कसम खांदा है की हर इकी माणुए मेरे सामणे गोडे टेकणे न, कने हर इक माणुए परमेस्वरे जो अपनाणा।” 12 असां च हर इकी जणे जो अपने-अपणे करमा दा लेखा परमेस्वरे जो देणा पोणा। 13 तां असां अग्ले ला इकी दुज्जे पर दोष नी लान, पर तुसां ऐई टांगी लिया की कोई भी अपने भाई या बेहणा दे पाप करणे दी बजा ना बणे। 14 मैं जाणदा है, कने प्रभु यीशु ला मिजो ऐ पक्का होया है, की सारे खाणे बालियां चीजां ठीक न, पर जडा उसयो अशुद्ध समझदा है, उदे ताई अशुद्ध है। 15 अगर तेरा भाई या बेहण तेरे खाणे दिया बजा ला उदास होंदा है तां तेरे अंदर प्रभु दा प्यार नी है, तां अपने खाणे दिया बजा ला उदा विनाश मत कर, जिदे ताई मसीह मरी गिया था। 16 इस ताई भले ही जडा तुसां करा दे न सै खरा है, पर अगर कोई उसयो बुरा मनदा है, तां उस कम्मे जो मत कर। 17 क्योंकि परमेस्वरे दा राज्य सिर्फ खाणे पिणे दे बारे च नी है, पर पबित्र आत्मा च धार्मिकता, शांति कने खुशी च। 18 जडा कोई इस तरीके ने मसीह दी सेवा करदा है, परमेस्वर उसला खुश होंदा है कने लोक भी उदे बारे च खरा बोलदे न। 19 इस ताई सांझो हमेशा सेई करणे दी कोशिश करणी चाईदी जडा लोकां बिच शांति दी बजा बणे कने इक दुज्जे जो भरोसे च मजबूत करे। 20 तुहाडे खाणे पिणे दिया चिजां ला परमेस्वरे दा कम्म ना बिगडे, सब कुछ ठीक तां है, पर कुछ ऐसी चीज खाणा गलत है अगर सै दुज्जे माणुए जो पाप करणे दी बजा बणे। 21 खरा तां ऐ है, की तू ना मांस खाये, कने ना दाखरस पिऐ, कने ना कुछ ऐसा करे, जिसने तेरा भाई या बेहण पाप करे। 22 तुसां भरोसा करी सकदे न, की तुसां जडा करा दे न, उस सोगी कुछ भी गलत नी है, पर इसयो अपने कने परमेस्वरे दे बिच रखा। धन्य है सै, जडा उसा गल्ला च, जिसयो सै ठीक समझदा है, अपने आप जो दोषी नी बणादा। 23 पर साडे मने च कुछ भी खाणे दे बारे च शक है कने आखरी च अगर असां फिरी उसयो खाई

लेदे न, तां असां गलत न, क्योंकि सांझो जडा साडे मने च भरोसा है उदे अनुसार नी किता है, कने अगर तुसां कुछ सै करदे न जडा तुसां जो लगदा है की ठीक नी है, तां तुसां पाप करदे न।

**15** असां जडे भरोसे च पक्के न, असां जाणदे न, की इना गल्लां ला कुछ खास फरक नी पौंदा है, पर असां सिर्फ अपने आप जो खुश करणे ताई ऐसा नी करी सकदे। सांझो उना लोकां दे शक कने कमियां दे बारे च बिचार करणा चाईदा जडे इना गल्लां जो गलत मंदा न। 2 असां च हर इक जो ऐसा करणा चाईदा जडा साथी मसीह भाई या बेहणा जो खुशी दे कने दुज्जयां जो भरोसे च मजबूत करणे च सहायता करा। 3 क्योंकि मसीह अपने आपे जो खुश नी किता, पर जियां पबित्र शास्त्रां च लिखया है, “तेरी निंदा करणे बालयां मेरी निंदा भी किती।” 4 जितणियां गल्लां पेहले ला पबित्र शास्त्रां च लिखियां न, सै साडिया ही शिक्षा ताई लिखियां न ताकि असां सबर कने पबित्र शास्त्र ला मिलणे बाले होसले दे जरिये आस रखी सकन ताकि परमेस्वरे जडा बायदा कितया था, सै करणा। 5 मैं प्राथना करदा है की परमेस्वर तुसां जो सबर कने उत्साहित करे, की तुसां यीशु मसीह सांई बणी करी अपु चे इक जुट होईकरी रेन। 6 ताकि तुसां सारे सोगी मिली करी साडे प्रभु यीशु मसीह दे पिता परमेस्वरे दी महिमा करन। 7 इस ताई इक दुज्जे जो अपनाई लिया जियां मसीह तुसां जो अपनाई लिया है, ताकि लोक परमेस्वरे दी तारीफ करन। 8 मैं बोलदा है, की जडे बायदे पूर्वजां जो दितयो थे, उना वायदयां जो सच्च करणे ताई कने ऐ दसणे ताई की परमेस्वर भरोसे दे लायक है, मसीहा यहूदी लोकां दा सेवक बणया। 9 कने होर जातियां भी परमेस्वरे दी दया दिया बजा ने परमेस्वरे दी स्तुति करन, जियां पबित्र शास्त्र च लिखया है, “इस ताई मैं कने होर जातियां दे लोकां च तेरी स्तुति करांगा, कने तेरे भजन गांगा।” 10 पबित्र शास्त्र च ऐ भी लिखया है, “होर जातियां दे सारे लोक, परमेस्वरे दी प्रजा सोगी खुशी मना।” 11 कने फिरी ऐसा भी लिखया है, “हे होर जातियां दे सारे लोको, प्रभु दी स्तुति करा; कने हे राज्य-राज्य दे सारे लोको; उदी स्तुति करा।” 12 कने फिरी परमेस्वरे दा संदेश देणेबाला यशायाह भी बोलदा है, “यिषै दी इक जड पैदा होणी है, कने होर जातियां पर शासन करणा, उस पर होर जातियां दे लोकां आस रखणी की उनी सांझो बचाणा।” 13 मैं प्राथना करदा है की परमेस्वर जडा साडा दाता है, तुसां जो पूरे तरीके ला खुशी कने शांति दा आनंद लेणे ताई सहायता करी सके, ताकि पबित्र आत्मा दिया शक्तिया ने तुहाडी आस बढदी जा। 14 हे मेरे मसीह भाईयो; मैं अपु भी तुसां दे बारे च पक्का जाणदा है, कने तुसां भी अच्छे ने जाणदे न की परमेस्वर क्या चांदा है, की तुसां जो क्या करणा चाईदा कने इक दुज्जे जो सिखाई सकदे न। 15 तमी मैं कुथी-कुथी तुसां जो याद दिलाणे ताई तुसां जो बडी हिम्मत करिके लिखया है, ऐ उस अमग्रह दिया बजा ने होया है, जडा परमेस्वरे ला मिजो मिलया है। 16 ताकि मैं होर जातियां ताई मसीह यीशु मसीह दा सेवक होईकरी मैं इक याजक सांई परमेस्वरे ला मिलियो शुभसमाचार सुणाणे दी सेवा करदा है; ताकि होर जातियां जो परमेस्वरे दे सामणे भेट दे स्पे च दितया जाए जिसने सै खुश है, कने जिना जो पबित्र आत्मा पबित्र बणया है। 17 मैं यीशु मसीह दिया बजा ने हर इक उसा गल्ला दे बारे च जडी परमेस्वरे दी सेवा ने जुडियो है उसा पर धमंड करी सकदा है। 18 क्योंकि जडा मसीह मेरे ताई कितया है, इसा ही बजा ने मैं ऐ हिमता ने बोली सकदा है की मैं होर जाति दे लोकां जो परमेस्वरे दे हुकमा दा पालन करबाणे दे काबिल है। जालू सै मेरियां गल्लां जो सुणदे न कने मेरे कम्मा जो दिखदे न तां सै यीशु मसीह पर भरोसा करदे न। 19 पबित्र आत्मा दे जरिये मिजो दितियो शक्ति ने मैं अनोखे कम्म कने चमत्कार करदा है, इस ताई जिथू भी मैं यरूशलेम ला इलिरिकम दीकर गिया है, ओथु मैं सारे लोकां जो, यीशु मसीह दे बारे च शुभसमाचार सुणांदा है। 20 पर मेरे मने दी इच्छा ऐ है, की शुभसमाचार दा प्रचार उना जगां च हो, जिथू यीशु मसीह दे बारे च हले दीकर सुणया ना हो; मैं ओथु शुभसमाचार दा कम्म नी करी सकदा जिथू कुनी होरनी पेहले ही शुरू करी दितया हो। 21 मैं उसा गल्ला जो पूरा करणा चांदा है जडा पबित्र शास्त्र च लिखया है, “जिना जो शुभसमाचार दे बारे च दसया ही नी है, उना दिखणा है कने जिना कदी उदे बारे च सुणाया नी है, उना भी समझणा।” 22 ऐ सेई बजा है की तुसां ने मिलणे ताई मेरे ओणे च मुशकिल ओदी रेई। 23 पर हुण इना प्रदेशां च, मैं अपना कम्म पूरा करी लिया है, कने बडे सालां ला मिजो

तुहाडे बाल ओणे दी इच्छा है। 24 इस ताँई जालूँ मैं इसपानिया देश जो जांगा तां तुहाडे बाल होंदा जांगा क्योंकि मिजो आस है, की उस यात्रा च तिजो ने मिल्ले, कने तुहाडे सोगी संगती करिके खुश होई जां, मैं चांदा है की तुसां मिजो मेरी इसपानिया देश दी यात्रा ताँई सहायता करन। 25 पर हण ताँ मैं परमेश्वरे दे पबित्र लोकां ने मिलणे ताँई यस्शलेम शेर जो चलया है। 26 क्योंकि मकिदुनिया कने अखाया प्रदेशे दे लोकां ऐसा करणा इक खरी गल्ल समझी, की जडे यस्शलेम शेर दे परमेश्वरे दे लोक न कने गरीब न उना ताँई कुछ चंदा भेज न। 27 उना ऐ खुशिया ने कितया है, सै यस्शलेम शेर दे लोकां दे कर्जदार न, क्योंकि होर जातियां जो यस्शलेम शेर च रेणेबाले विश्वासियां ला खुशाखबरी दी आत्मिक आशीषां मिलियां न, इस ताँई उना जो लगदा है की इदे बदले च उना दी कुछ चंदा देईकरी सहायता करी सकदे न। 28 इस ताँई मैं सबते पहले यस्शलेम शेर चलया है ताकि उना जो ऐ गठेया चंदा देई सकें। उदे बाद, फिरी मैं रोम देश च आई करी तुसां ने मिलणे बाद इसपानिया देश जो जांगा। 29 कने मैं जाणदा है, की जालूँ मैं तुहाडे बाल ओणा, तां मसीह दी खास आशीष जो तुहाडे सोगी बंडगा। 30 कने हे मसीह भाईयो; प्रभु यीशु मसीह च साडे भरोसे कने पबित्र आत्मा सांझो जडा प्यार दितया है उदिया बजा ने, मैं तुसां ने बिनती करदा है की तुसां मेरे ताँई परमेश्वरे ला बडी इमानदारिया ने प्राथना करा। 31 की मैं यहूदिया प्रदेशे दे अविश्वासियां ला बची रे, कने इस ताँई भी प्राथना करा की ओथु दे विश्वासी भी मेरे इस तोफे जो ग्रहण करी लेन जडा मैं अपने सोगी यस्शलेम शेर जो लेई चलया है। 32 कने मैं परमेश्वरे दिया इच्छा ने तुहाडे बाल खुशिया ने आई करी तुहाडे सोगी अराम करे। 33 मैं प्राथना करदा है की परमेश्वर, जडा शांति दिन्दा है, तुसां सारयां सोगी हो। आमीन।

**16** मैं तुसां ने फीबे ताँई बिनती करदा है, जडी साडी साथी विश्वासी बेहण है कने क्रिखिया शेर दिया कलीसिया दी सेविका है, मैं चांदा है की तुसां इसा दी इज्जत करा। 2 जडा प्रभु दा है, उदा स्वागत करा; कने जिसा गल्ला च उसा जो तुहाडी सहायता चाईदी होगी, तां उसा दी सहायता करा; क्योंकि उना मतयां दी सहायता कितियो है कने मेरी भी। 3 बेहण प्रिस्का कने उसा दे घरे बाले अक्विला जो मेरी तरफा ला नमस्कार जडे यीशु च मेरे सोगी प्रभु दी सेवा करदे न। 4 उना मेरी जान बचाणे ताँई अपनी जान खतरे च पाई थी, कने सिर्फ मैं ही नी पर होर जातियां दियां सारियां कलीसियां भी उना दा धन्यवाद करदियां न। 5 कने उसा कलीसिया जो भी नमस्कार जडी उना दे घरे च गिठी होंदी है। मेरे प्यारे इपेनितुस जो नमस्कार जडा आसिया प्रदेश ला मसीह पर भरोसा करणे बाला पहला माणु है। 6 मरियम जो नमस्कार, जिना तुहाडे ताँई बडी मेहनत कितियो है। 7 भाई अन्दरुनिकुस कने बेहन युनियास जो नमस्कार, जडे मेरे यहूदी विश्वासी भाई न, कने जडे मेरे सोगी जेला च थे, कने प्रेरित उना जो अच्छे ने जाणदे न, कने मिजो ला पहले मसीह पर भरोसा करदे थे। 8 अम्पलियातुस जो नमस्कार, जडा प्रभु च मेरा प्यारा भाई है। 9 उरबानुस जो नमस्कार, जडे मसीह च साडे सोगी प्रभु दी सेवा करदा है, कने मेरे प्यारे भाई इस्तखुस जो भी नमस्कार। 10 अपिल्लेस जो नमस्कार, जडा परखे जाण बाद भी मसीह पर भरोसा करदा रिया। अरिस्तुबलुस दे परिवारे जो नमस्कार। 11 मेरा रिशतेदार यहूदी भाई हेरोदियोन जो मेरा नमस्कार। नरकिस्सुस दे परिवारे दे लोकां जो मेरा नमस्कार, जडे प्रभु यीशु मसीह जो मं दे न, 12 बेहण त्रुफेना कने बेहण त्रुफोसा जो मेरा नमस्कार, जडियां प्रभु दी सेवा ताँई मेहनत करदियां न। प्यारी बेहण पिरसिस जो मेरा नमस्कार जिना प्रभु च बडी मेहनत किती। 13 स्कुस जो जिसयो प्रभुऐ अपनी सेवा ताँई चुणया है, कने उदी माता जो भी जडी मेरे ताँई भी माता साँई है, दोनो जो मेरा नमस्कार। 14 असुकितुस कने फिलगोन कने हिर्मस कने पत्रुबास कने हिमास कने उदे सोगी दे विश्वासी भाईयां जो मेरा नमस्कार। 15 फिल्लुगुस कने यूलिया कने नेर्युस कने उदी बेहन, कने उलुम्पास कने उदे सोगी दे सारे परमेश्वरे दे लोकां जो मेरा नमस्कार। 16 अपु चे इक दुज्जे जो गले लाईकरी नमस्कार करा: तुसां जो मसीह दी सारी कलीसियां दिया तरफा ला नमस्कार। 17 हण हे मसीह भाईयो, मैं तुसां ने बिनती करदा है, की जडे लोक कलीसिया च इक दुज्जे ने लडाई झगडा करदे न कने जिना दिया बजा ने दुज्जयां लोकां दा भरोसा खतम होई जांदा है, ऐ लोक उसा सच्ची शिक्षा दे खिलाफ चलदे न जडी तुसां जो

मिलियो है, ऐसे लोकां ला साबधान कने दूर रिया। 18 क्योंकि ऐसे लोक साडे प्रभु यीशु मसीह दी नी पर अपने आप दी सेवा करदे न; सै खेल-खेल गल्लां करी के लोकां दी चापलूसी करदे न, इयां करी के सै सीधे-साधे लोकां जो धोखा दिन्दे न। 19 हर कोई जाणदा है की तुसां कितणे अच्छे ला प्रभु दे हुकम मं दे न; इस ताँई मिजो तुहाडे बारे च खुशी होंदी है, पर मैं ऐ चांदा है, की क्या खरा है ऐ जाणने ताँई बुद्धिमान न, पर बुराईयां ताँई भोले बणी रिया। 20 शांति दे परमेश्वरे शैताने जो तुहाडे अधीन करी देणा। मैं प्राथना करदा है की साडे प्रभु यीशु मसीह दा अनुग्रह हमेशा तुसां सबना पर होंदा रे। 21 तीमथियुस मेरे सोगी कम्म करणे बाले दा, कने लुकियुस कने यासोन कने सोसिपत्रुस मेरे यहूदी भाई दा, तुसां जो शुभकामनाए दे दा है। 22 मैं तिरतियुस जडा पौलुस ताँई ऐ चिट्ठी लिखा दा है, अपनी शुभकामनाए तुसां जो भेजा दा है। मैं भी प्रभु दा इक सेवक है। 23 गयुस भी तुसां जो अपनी शुभकामनाए भेजा दा है। मैं भी इदे घरे रंदा है जिथू कलीसिया गिठी होंदी है। इरास्तुस जडा इस शेर दे भाण्डारी है, कने साडे भाई क्वारतुस भी तुहां जो अपनी शुभकामनाए भेजदा है। 24 मैं प्राथना करदा है की साडे प्रभु यीशु मसीह दा अनुग्रह तुसां पर रे। 25 हण सारी महिमा परमेश्वरे जो मिल्ले जडी तुसां जो मजबूत बणाणे च काबिल है कने जिस शुभसमाचार दा मैं प्रचार करदा है, इस संदेश च यीशु मसीह अपनी उस योजना जो होर जातियां ताँई प्रगट कितया है, जडी शुरू ला गुप्त थी। (aiōnios g166) 26 पर हण प्रगट होईकरी हमेशा दे परमेश्वरे दे हुकमे ने परमेश्वरे दे संदेश देणेबालयां दियां कताबां दे जरिये सारियां होर जातियां जो दसया है, की सै भरोसे ने हुकम मंणे बाले होई जान। (aiōnios g166) 27 उसी इकमात्र बुद्धिमान परमेश्वरे दी यीशु मसीह दे जरिये युगां-युगां दीकर महिमा होंदी रे। आमीन। (aiōn g165)



# 1 कुरिन्थियों

**1** मैं, पौलस जडा प्रभु यीशु दा प्रेरित होणे तांई परमेश्वरे दिया इच्छा ला चुणया है कने मैं ऐथु साडे मसीह भाई सोस्थिनेस सोगी है। **2** मैं ऐ चिट्ठी परमेश्वरे दिया कलीसिया जो लिखा दा है, जडी कुरिन्थुस शहर च है, मतलब की उना लोकां जो जिना जो परमेश्वरे यीशु मसीह सोगी इक करिरी अपने लोक होणे तांई लोक कितया है कने उनी तुहांजो अपने पबित्र लोक होणे तांई सदया है; उनी तुहांजो तियां ही पबित्र कितया है, जियां सै हर जगा दे लोकां जो पबित्र करदा है जडे यीशु मसीह पर भरोसा करदे न, जडा साडा सारयां दा प्रभु है। **3** मैं प्राथना करदा है की साडे पिता परमेश्वरे कने प्रभु यीशु मसीह तुहांजो अनुग्रह कने शांति दे। **4** मैं तुहाडे बारे च अपने परमेश्वरे दा हमेशा धन्यवाद करदा है, क्योंकि उनी अपने अनुग्रह ला तुसां जो यीशु मसीह च इक करी दिता कने मतियां सारियां आशीषां दितियां। **5** मसीह सोगी इक करणे दा मतलब ऐ है, की परमेश्वरे तुसां जो सै बडा जादा दिता जिदी तुहांजो जरूरत थी, खासकर, उदा संदेश सुणणे कने उदे बनन दे ज्ञान दियां केई आत्मिक आशीषां दितियां। **6** इना आत्मिक आशीषां ला जडियां परमेश्वरे तुहांजो दितियां न, तुहांजो साबित कित्ता की मसीह दे बारे च संदेश सच्चा है। **7** कने इसा बजा ला पबित्र आत्मा तुहांजो सै सारे हुनर दिते जिना दी तुहांजो जरूरत थी, क्योंकि तुसां प्रभु यीशु मसीह दे मुडी ओणे दा इंतजार करा दे थे। **8** कने परमेश्वरे तुसां जो आखरी दीकर भरोसे च मजबूत करणा, की तुसां साडे प्रभु यीशु मसीह जो धरती पर मुडी ओणे दीकर निर्दोष बणी रेन। **9** परमेश्वरे ऐसा करणा, क्योंकि जडा सै बोलदा है उसयो पूरा करणे तांई सै भरोसे दे काबिल है, कने उनी तुहांजो अपने पुत्र यीशु मसीह सोगी रिशता बनाणे तांई सदया है। **10** हे प्यारे भाईयो, मैं साडे प्रभु यीशु मसीह दे अधिकारे ला तुहांजो ला बिनती करदा है, की तुसां सब इक दुज्जे सोगी सेहमत रखा, कने तुसां च फूट ना होऐ, पर इक ही मन कने इक ही सोच च होईकरी मिली करी रिया। **11** क्योंकि हे मेरे मसीह भाईयो, खलोए दे परिबारे दे लोकां मिंजो तुहाडे बारे च दसया है, की तुसां च झगडे होआ दे न। **12** मेरे बोलणे दा मतलब ऐ है, की तुसां चे कोई अपने आपे जो बोलदा है की मैं "पौलस दा चेला है," कोई बोलदा, "अपुल्लोस दा चेला है," कोई बोलदा, "कैफा दा," कोई बोलदा, "मसीह दा चेला है।" **13** ऐ गल्ल खरी नी है, क्योंकि मसीह लोग-लगा टोलियां च नी बंड्या है। शायद तुसां गलतिया ला ऐ सोचदे न की मैं, पौलस तुहांजो अजाद करणे तांई सूली पर चढया था। कने शायद तुसां गलतिया ला ऐ भी सोचा दे है की तुहांजो इस तांई बपतिस्मा दितया है ताकि तुसां मेरे चेले बनन। **14** मैं परमेश्वरे दा धन्यवाद करदा है, की क्रिस्पुस कने ग्युस इना दोनो भाईयां जो छडी करी, मैं तुसां चे कुसी जो भी बपतिस्मा नी दितया है। **15** इस तांई कोई ऐसा नी बोली सकदा की तुसां मेरे चेले बणने तांई बपतिस्मा लिया है। **16** कने मिंजो हुणी याद आया, की मैं स्तिफनास दे परिबारे जो भी बपतिस्मा दितया; इना जो छडी करी, मैं नी जाणदा कि मैं कुसी होरसी जो भी बपतिस्मा दितया है। **17** क्योंकि मसीह मिंजो बपतिस्मा देणे तांई नी, पर श्भसमाचार सुणणे जो भेजया है, जालू मैं श्भसमाचार सुणांदा है, तालू बोलणे च मैं अपने हुनर दा इस्तेमाल नी करदा है, अगर लोक सिर्फ मेरे हुनर दिया बजा ला मिंजो मंदे न, तां सै सूली पर मसीह दी मौत दी शक्ति जो नी जाणदे न। **18** क्योंकि जडे लोक परमेश्वरे ला लग होई जाणे, उनी जो सजा मिलणी, सै सूली पर मसीह दी शिक्षा दी कोई कीमत नी समझदे, पर साडे तांई जडे बचायो न, असां जाणदे न की ऐ परमेश्वरे दिया शक्तियां दा सबूत है। **19** क्योंकि पबित्र शाश्व च परमेश्वर बोलदा है, "मैं दसणा है की जिना लोकां दे बिचारां जो संसारे दे लोक बुद्धिमानां बोलदे न, असल च सै बिचार मुर्खता दे न। मैं साबित करणा है की असल च सै बिलकुल भी समझदार नी न।" **20** तां फिरी, असां बुद्धिमान लोकां दे बारे च क्या बोली सकदे न? कने असां व्यवस्था जो सिखणे बालयां दे बारे च बोली सकदे न? कने असां उना लोकां दे बारे च क्या बोली सकदे जडे बोलणे च बडे चलाक न? परमेश्वरे उना सारयां जो मुर्ख बणाई दितया है, कने उना दी बुद्धिमानां जो बेकार कने बकवास दसया है। (aiōn g165) **21** मैं ऐसा इस तांई बोलदा है क्योंकि परमेश्वरे समझदारिया ला ऐ फेसला लिया की इस संसारे दे लोक अपनी काबलियात ला उसयो नी जाणी सकदे न, इस तांई परमेश्वर उना जो

बचादां जडे श्भसमाचार पर भरोसा करदे न जिदा असां प्रचार करदे न, चाहे कोई भरोसा नी करणे बाला बोले की ऐ मुर्खता दियां गल्लां न। **22** यहदियां तांई ऐ इस तांई मुर्खता है, क्योंकि सै इसयो सच्च साबित करणे तांई स्वर्ग ला कोई निशाण मंगदे न, कने होर जातियां तांई भी जडे इन्सानी ज्ञान दिया तोपा च रेदे न। **23** पर असां तां ऐ प्रचार करदे न की मसीह साडे पापां ला सांझो छुडणे तांई सूली पर मरया, जडा यहदियां तांई ठोकर दी बजा है, कने होर जातियां दिया तांई मुर्खता है; **24** पर जिना जो परमेश्वरे अपने लोक होणे तांई सदया है, क्या यहदी, क्या होर जातियां दोना तांई ऐई मसीह परमेश्वरे दी शक्ति, कने परमेश्वरे दा ज्ञान है। **25** ऐ परमेश्वरे दी मुर्ख योजना बुद्धिमान माणुआं दी योजना ला जादा बुद्धिमान है, कने परमेश्वरे दी कमजोरी भी माणुआं दी सबना ला बडी ताकत ला भी बदीकरी ताकतबर है। **26** हे मसीह भाईयो, अपने उना हालतां जो याद रखा जालू परमेश्वरे तुसां जो मसीह दे पिच्छे चलणे तांई सदया, अगर असां इन्सानी सोचा ला सोचन, तां तुसां चे मते बुद्धिमान नी थे, कने तुसां चे कोई भी राजा महाराजे दे खानदान ला नी थे। **27** पर बुद्धिमान लोकां जो शरमिन्दा करणे तांई, परमेश्वरे उना लोकां जो चुणया जडे संसारे दिया नजरा च मुर्ख न कने ताकतबर लोकां जो शरमिन्दा करणे तांई, परमेश्वरे उना लोकां जो चुणया जडे संसार दिया नजरा च कमजोर न। **28** कने परमेश्वरे उना जो चुणया जडे संसारे दे लोकां दिया नजरा च निच न, कने जिना दी संसार च कोई कीमत नी है उना जो चुणी लिया ताकि जडे अपने आप जो कीमती समझदे न उना जो बेकार करी दे। **29** परमेश्वरे ऐसा इस तांई कितया ताकि कोई भी माणु परमेश्वरे सामणे घमंड ना करे। **30** पर परमेश्वरे तुहांजो यीशु मसीह सोगी इक कित्ता, कने मसीह दे जरिये सांझो बुद्धि दिन्दा है। परमेश्वर सांझो धर्मी बणांदा है, कने मसीह दे जरिये सांझो पबित्र, कने पापां ला छुडदां है। **31** ताकि जियां पबित्र शाश्व च लिखया है, तियां ही हो, "जडा घमंड करे सै उस पर घमंड करे जडा परमेश्वरे कितया है।"

**2** हे मसीह भाईयो, जालू मैं तुहांजो परमेश्वरे दे बारे च संदेश सुणया, तां मैं बड़े-बड़े ज्ञान दे अखरां दा इस्तेमाल नी कित्ता कने ना ही समझदार लगणे दा दिखबा कित्ता। **2** क्योंकि मैं तुहाडे बिच ऐ फेसला करी के आया था, की मैं यीशु मसीह कने उदी सूली पर मौत दे बारे दे इलाहा होर केसी दे भी बारे च गल्ल नी करणी है। **3** कने जालू मैं तुहाडे बाल था, तां मैं अपने आप जो मसीह दा कम्म करणे दे काबिल नी समझदा था, इसा बजा ला मैं बडा कमजोर कने डरदा होया तुहाडे सोगी रिया। **4** कने मेरी शिक्षा कने मेरे प्रचार च संसारिक ज्ञान कने लोकां जो खुश करणे बालियां गल्लां नी थियां; पर पबित्र आत्मा बडिया शक्तिया ला प्रगट कित्ता की जडी शिक्षा मैं तुहांजो दिती सै सच्ची है, **5** इस तांई की तुहाडा भरोसा माणुए दे ज्ञान पर नी पर परमेश्वरे दिया शक्तियां पर निर्भर हो। **6** फिरी भी मैं उना लोकां जो, जडे भरोसे च मजबूत न, ज्ञान भरी शिक्षा दिन्दा है; पर ना ही संसारिक ज्ञान कने ना ही इस संसारे दे हाकिमा दा ज्ञान, जिना दा नाश होणेबाला है। (aiōn g165) **7** पर असां परमेश्वरे दे उस ज्ञान दी गल्ल करदे न जडा गुप्त था। हल्ले दीकर इसयो कोई नी जाणदा था, परमेश्वरे धरती बणणे ला पेहले ही फेसला लिया था, की उदे ज्ञान ला सांझो महिमा मिल्ले। (aiōn g165) **8** परमेश्वरे दिया इसा योजना जो संसारे दे हाकिमा चे कुनी भी नी समझया, क्योंकि अगर जाणदे, तां महिमामय प्रभु जो सूली पर नी चढादे। (aiōn g165) **9** पर जियां पबित्र शाश्व च लिखया है, "ना कदी कुनी दिखया है, ना कदी कुनी सुणया, कने ना कदी कुनी उना भली चीजां दे बारे च सोचया, जडियां परमेश्वरे उना लोकां तांई तैयार कितियां न जडे उदे ने प्यार करदे न।" **10** परमेश्वरे ऐ गल्लां पबित्र आत्मा जरिये असां प्रेरितयां जो दसियां; क्योंकि ऐसा कुछ नी है जडा परमेश्वरे दी आत्मा नी जाणदा हो। ऐथु दीकर की सै परमेश्वरे डुगे बिचारां जो भी अच्छे न जाणदा है। **11** तुसां सेई न जडे जाणदे न की तुहाडे अपने मने च क्या है, तियां ही परमेश्वरे दिया आत्मा दे सिबाये कोई भी परमेश्वरे दे बिचारां जो नी जाणी सकदा। **12** पर साडी सोच कने बिचार संसारे दे माणुआं सांई नी न, पर परमेश्वरे सांझो अपनी आत्मा दितियो है, ताकि असां उना गल्लां जो जाणन, जडियां परमेश्वरे अपने अनुग्रह ला दितियां न। **13** कने इस तांई असां इना गल्लां जो दुज्जे लोकां जो दसदे न तां असां ऐसे अखरां दा इस्तेमाल नी करदे, जडे माणुआं दे ज्ञाने ला मिलदे न, पर असां उना अखरां दा इस्तेमाल करदे न जडे परमेश्वरे दिया जरिये मिलदे

न, जडा आत्मिक ज्ञाने दे जरिये आत्मिक गल्लां जो समझांदा है। 14 पर सै माणु जिसयो परमेश्वरे दी आत्मा नी मिलियो है, सै परमेश्वरे दिया आत्मा दियां गल्लां जो नी मंदा, क्योंकि सै उदिया नजरा क मुखता दियां गल्लां न कने सै इना गल्लां दी कीमत नी समझदा। 15 जिना जो पबित्र आत्मा मिलया, सै उना चीजां जो समझी सकदे न, जडा पबित्र आत्मा सिखांदी है। पर जिना लोकां बाल पबित्र आत्मा नी है सै उना लोकां दे बिचारां जो नी समझी सकदे जिना बाल पबित्र आत्मा है। 16 ऐ सच्च है क्योंकि पबित्र शास्त्र क लिखया है की, “कोई भी ऐ नी जाणी सकदा की परमेश्वरे दे मने क क्या है कने कोई भी उसयो सिखाई नी सकदा।” पर असां भरोसा करणे बाले समझदे न की मसीह दे मने क क्या है।

**3** हे मसीह भाईयो, मैं जालू तुहाडे सोगी था, तालू मैं तुसां जो गेहरी गल्लां नी सिखाईयां, जियां की मैं आत्मिक लोकां जो सिखांदा है, मैं तुसां लोकां ला इयां गल्लां कितियां जियां की तुसां इसा दुनिया दे लोकां सांई न, या इयां जियां की तुसां मसीह जिन्दगी क बच्चे न। 2 मैं तुहांजो परमेश्वरे दे बचने ला सिर्फ बुनियादी शिक्षा दीनी, कने गेहरी शिक्षा नी दीनी, क्योंकि उस बकत तुसां इसा शिक्षा जो पाणे तांई तैयार नी थे, 3 क्योंकि तुसां हल्ले दीकर भी संसारे दे लोकां सांई जिन्दगी जिया दे न। इस तांई की जालू तुसां च इक दुज्जे सोगी जलन कने झगडा होंदा है, तां ऐ साबित करादा है की तुसां संसार दे लोकां सांई न। कने तुसां उना लोकां सांई जिन्दगी जिन्दे न जडे लोक प्रभु दे लोक नी न। 4 इस तांई की जालू इक बोलदा है की, “मैं पौलुस दा है,” कने दुज्जा बोले कि, “मैं अपुल्लोस दा है,” तां क्या तुसां संसार दे लोकां सांई नी करदे न? 5 तां फिरी सोचा की अपुल्लोस कुण है? कने मैं पौलुस कुण है? असां तां सिर्फ परमेश्वरे दे सेवक न, जिना दे जरिये तुसां मसीह पर भरोसा किता, असां चे हर इक जणे सेई कम्म किता जडा परमेश्वरे सांझो करणे तांई दिता। 6 अगर मैं तुसां दी तुलना खेते सोगी करे, तां मैं उस माणुऐ सांई है जिनी पेहले तुसां क शुभसमाचार दा बी राया, कने अपुल्लोस उस माणुऐ सांई है जिनी उस बूटे जो खाद पाणी दिता ताकि सै बदी सके, पर परमेश्वर ही है जडा तुसां जो आत्मिक रूप ला बदांदा है, जियां परमेश्वर उस बूटे जो बदांदा है। 7 इस तांई ना तां बूटे जो लगाने बाला कुछ है, कने ना ही सै कुछ है जिनी खाद पाणी दिता, पर परमेश्वर ही सब कुछ है जिनी उस बूटे जो बदाया। 8 मैं तुहांजो शुभसमाचार सुणया कने परमेश्वरे दे बचना को सिखाणा शुरू किता कने अपुल्लोस तुहांजो सिखांदा रिया पर साडा दोनो दा इक ही मकसद है, कने हर इक माणुऐ जो उदिया मेहनता दे सबे ला परमेश्वरे इनाम देणा। 9 क्योंकि असां परमेश्वरे दे सहकमीं न; कने तुसां सारे मसीह लोक परमेश्वरे दिया खेतिया सांई न, कने मैं तुहाडी तुलना इक घरे सांई करी सकदा है, जिसयो परमेश्वर बणांदा है। 10 परमेश्वरे जडा बरदान मिजो दिता, उदे जरिये मैं इक खरे राज मिश्रीऐ सांई उस घरे दिया नियां पाईयां कने होर दुज्जे लोकां इसा नियां पर घर बणाया। पर हर इक माणु ध्यान रखे की सै कियां घर बणांदा है। 11 क्योंकि नि जडी पहले ला ही रखियो है, सै यीशु मसीह है, कने होर कोई भी दुज्जी नि नी रखी सकदा। 12 कने अगर मसीह सेवक खारियां गल्लां सिखाऐ जडियां परमेश्वरे उना जो दीतियां, सै उना घर बणाणे बालयां सांई न जडे उसा नियां पर होर चीजां न जियां सोना या चांदी या कीमती पथरां ला घर बणांदा है। पर अगर सै झूठियां गल्लां सिखाऐ तां सै उना घर बणाणे बालयां सांई है जडे घटिया चीजां ने जियां लकडी, भू कने घाऐ ने घर बणांदा, 13 पर न्याय बाले रोजे अग्गी हर कुसी दे कम्म प्रांट करणे न की कुदे कम्म खे थे कने कुदे कम्म बुरे थे; कने असां एदसाणा है की उसा माणुऐ दे कम्मा दी कोई कीमत है की नी। 14 अगर कुसी घर बणाणे बाले दा कम्म जडा उनी उसा नियां पर घर बणांदा बकत कितया हो, कने अगर सै नी फकुंगा तां मसीह उसयो इनाम देणा है। 15 पर अगर कुसी घर बणाणे बाले दा कम्म फकुई जांगा तां मसीहे उसयो इनाम नी देणा। पर उसयो हमेशा दी जिन्दगी मिली जाणी जडी परमेश्वरे उस तांई रखियो है। 16 तुसां जो पक्का पता है, की तुसां परमेश्वरे दा मन्दिर न, कने परमेश्वरे दी दितियो आत्मा तुहाडे बिच वास करदी है। 17 तुसां परमेश्वरे दे मंदरे सांई न, अगर कोई माणु तुहांजो मिली जुली करी रेंणा नी दिन्दा है। तां परमेश्वरे उसयो सकत सजा देंगी, क्योंकि परमेश्वरे दा मंदर पबित्र है, कने सै मन्दिर तुसां न। 18 कोई अपने आपे जो धोखे च ना रखे। अगर तुसां चे कोई अपने आप जो इस संसारे दे लोकां सामणे ज्ञानी समझे, तां सै उना दिया नजरां च

मुखई बणी जाऐ, ताकि तुसां परमेश्वरे दिया नजरा च ज्ञानी बणी सकन। (aiōn g165) 19 क्योंकि इस संसारे दे लोक जिना गल्लां जो ज्ञान समझदे न, सै सारियां गल्लां परमेश्वरे दिया नजरां क मुखता है, जियां पबित्र शास्त्र क लिखया है की, “परमेश्वर ज्ञानी लोकां दी चलाकियां च उना जो फसाई दिन्दा है।” 20 कने पबित्र शास्त्र ऐ भी लिखया है की, “प्रभु ज्ञानी लोकां दे बिचारां जो जाणदा है की सारे बेकार न।” 21 इस तांई तुसां घमंड मत करा की तुसां कुसी खास माणुऐ दे चले न, मैं पौलुस, अपुल्लोस, पतरस, सारे तुसां दे न, ऐथू दीकर की सारा कुछ तुसां दा है मतलब की संसारे दियां चीजां, अगर तुसां जिन्दे न या मरी गियो, अज या भविष्य सब कुछ तुहाडा है। 23 कने तुसां मसीह दे अधिकारे दे अधीन न, कने मसीह परमेश्वरे दे अधिकारे अधीन न।

**4** तुसां सांझो मसीह दे सेवक समझा जिना जो परमेश्वरे शुभसमाचार दे भेदां दी सच्चाई जो समझाणे दा कम्म दिताया है। 2 परमेश्वरे जिसयो ऐ कम्म करणे जो दिताया, जरूरी है की सै भरोसे लाइक हो, ताकि दितयो कम्मे जो पूरा करी सके। 3 पर मैं इसा गल्ला दी फिकर नी करता की, तुसां या होर कोई मेरे बारे च ऐ बोले की ऐ भरोसे दे लायक है की नी है, सच्च तां ऐ है की मैं अपने बारे च भी नी बोलदा की मैं भरोसे दे लायक है की नी। 4 क्योंकि मेरी अंतरात्मा मिजो कुसी भी गल्ला च दोषी नी बणांदा, पर इसला मैं निर्दोषी नी बणदा, क्योंकि परमेश्वर मिजो परखणेबाला है कने सेई मिजो बेकसूर साबित करादा है। 5 इस तांई साडे प्रभु यीशु मसीह दे बापस ओणे दीकर कोई कुसी दा न्याय ना करे, क्योंकि परमेश्वरे साफ तरीके ला उना सारे बिचारां जो दसणा जडे लोकां दे मना च न, जिना दे बारे च कोई नी जाणदा है, उनी उना दे मने दे सारे इरादयां जो प्रांट करणा है, तालू परमेश्वरे दिया तरफ ला हर इक्की दी तारीफ होणी। 6 हे मसीह भाईयो, मैं अपुल्लोस कने अपने बारे च तुहांजो इस तांई दसया ताकि तुसां सांझो इक उदाहरण सांई लेई सकन, “पबित्र शास्त्र क जडा लिखया है, उसला अग्गे मत बदा।” ऐ खरा नी है की तुसां कुसी इकी जो इज्जत देईकरी बडा बणा, कने दुज्जे दी बेजती करिरी निचा दस्सा। 7 कुण बोलदा है की तू दुज्जे ला खरा है? कने जडा कुछ तरे बाल है सै परमेश्वरे तिजो दितया। कने जालू परमेश्वरे ही सब कुछ तिजो दितया, तां तिजो कोई हक नी है की तू कुसी गल्ला च घमंड करे। 8 तुहांजो लगदा है की तुहाडे बाल आत्मिक रूप च सारियां चीजां न। कने तुहांजो लगदा है की पेहले ही सारे बरदान तुहांजो मिली गियो न, जडे पबित्र आत्मा अपने लोकां जो दिन्दी है, कने तुहांजो लगदा की तुसां साडे बिना राजयां सांई शाशन करणा लगगी पियो न, मैं खुश होई जांदा अगर तुसां सच्ची राजयां सांई राज करणा लगगी पियो होदे ताकि असां भी तुहाडे सोगी शाशन करी सकन। 9 मिजो पैसा लगना दा की परमेश्वरे असां प्रेरितां जो जित दिया यात्रा च सारयां ला आखरी जगा च उना केदियां सांई रखया है जिना जो मौत दी सजा मिलियो हो। असां सारी दुनिया, स्वर्गदां कने माणुआं सामणे तमाशा बणी गियो न। 10 लोक सांझो मुख समझदे न क्योंकि असां मसीह दा प्रचार करदे न, पर तुसां गलत सोचदे न की तुसां बुद्धिमान मसीह न। मते लोक मंदे न की साडे बाल कोई हक नी है। पर तुसां घमंड ला बोलदे न की तुहाडे बाल परमेश्वरे दी शक्ति है। लोक साडी इज्जत नी करदे पर लोक तुहाडी इज्जत करदे न। 11 असां उस रोजे दीकर भूखे प्यासे कने फटयो कपडे पायो न, कने लोकां सांझो मारया कृतया, कने साडे तांई रेणे जो घर नी था। 12 कने अपने ही हथां ला कम्म करिके मेहनत करदे न, लोक बुरा बोलदे न, असां आशीष दिन्दे न, सै सतादे न असां सेहन करदे न। 13 जालू लोक बदनाम करदे न, तां असां उना जो बडे प्यारभाव ला जबाब दिन्दे न। अजे भी लोक साडी इज्जत नी करदे कने सै बोलदे न की साडी कोई कीमत नहीं है। 14 मैं तुहांजो शरमिंदा करणे तांई ऐ गल्लां नी लिखदा है, पर मेरा मकसद तुहांजो सुधारणा है क्योंकि तुसां मेरे बचयां सांई न जिना जो मैं बडा प्यार करादा है कने चेताबनी दिन्दा है। 15 भले ही तुहाडे बाल सिखाणे तांई हजारो गुरु होन, सिर्फ मैं ही तुहाडे पिता सांई है, क्योंकि मैं पेहला माणु है, जडा तुहाडे तांई शुभसमाचार लेईकरी आया, जिसदी बजा ला तुहांजो मसीह यीशु पर भरोसा होया। 16 इस तांई मैं तुहांजो बिन्ती करादा है, की जियां मैं मसीह च जिन्दगी जिया दा, तियां ही तुसां भी जिन्दगी जिया। 17 इस तांई मैं तीमथियुस जो तुसां बाल भेजया है, जडा प्रभु यीशु च मेरा प्यारा कने भरोसे बाला पुत्र है, उनी तुहांजो दसणा की मैं क्या करादा

है कने यीशु मसीह दा चेला बणी करी जिया दा, ठीक ऐई गल्लां मै हर जगा कने सारी कर्लीसियां जो सिखांदा। 18 तुहाडे बिच कुछ लोक सोचंदे न की तुहांजो मिलणा नी ओणा, इस तांई सै घमंडी होई गियो न। 19 पर प्रभुऐे दी इच्छा होई तां मै तुहाडे बाल जल्दी ओणा है, कने उना घमंडियां दियां सिर्फ शिक्षा जो ही नी, पर उना दिया शक्तिया जो भी जाणी लेंगा है। 20 क्योंकि परमेश्वरे दा राज्य सिर्फ बडियां भरी गल्लां करणा ही नी, पर ऐ परमेश्वरे दिया शक्तिया ला जीणा है। 21 जालू मै तुहाडे बाल ओणा तां तुसां क्या चांदे न की मै करां? अगर तुसां अपणियां बुरियां गल्लां ला नी सुधारयो होंगे, तां मै तुहांजो अपने तरीके ला सुधारणा, पर अगर सुधरी गियो होंगे तां मै तुसां पर दया दसणी, कने दसणा की मै तुहांजो ने कितणा प्यार करता है।

**5** मै लोकां जो तुहाडे बारे च बोल्दे सुणया है, की तुसां के कुछ लोक व्यभिचार करंदे न, कने ऐसा व्यभिचार तां होर जाति दे लोकां च भी नी होंदा। सै ऐे है की इकी माणुऐे अपणी सौतेली माऊ सोगी नाजायज रिशता रखया है। 2 कने तुसां जो तां इसा गल्ला दा दुख होणा चाईदा था, पर इदे बजाये तुसां इसा गल्ला च घमंड करंदे न। तुहांजो इयुदे माणुआं जो कर्लीसिया ला कडी देणा चाईदा। 3 भले ही मै ओथु तुहाडे सोगी नी है, पर ऐसा लगदा है कि मने ला मै ओथु ही है, कने मै इयुदे कम्म करणे बालयां दे खिलाफ फेसला करी दितया है। 4 कने तुहांजो ऐसा करणा चाईदा की तुसां सारे भरोसा करणे बाले होणे दे नाते गिटे होन, ऐ जाणदे होऐे की तुहाडे बाल असल च साडे प्रभु यीशु मसीह दा हक है। 5 उस पाप करणे बाले माणुऐे जो अपणी कर्लीसिया ला कडी दिया, कने बापस उस जो शैतान दे बशे च देई दिया। क्या पात सै पाप करणा छडी दे। क्योंकि अगर सै पाप करणा छडी दिगा, तां जिस दिन प्रभुऐे न्याय करणा पक्का उस दिन उनी बची जाणा। 6 तुहाडा घमंड करणा बिलकुल भी ठीक नी है, क्या तुसां नी जाणदे की थोडा दिया खमीर पुरे गुनयो अटे जो खमीर करी दिन्दा है? अगर कुसी माणुऐे जो पाप करणे दी इजाजत मिलदी है, तां झट सारयां पाप करणा लगी पोंणा। 7 जियां यहदी लोक अपने घरां ला फसह दा त्योहार मनाणे ला पहले सारा खमीर कडी दिन्दे न, तियां ही तुसां भी इस पापी माणुऐे जो कर्लीसिया ला कडी दिया, तां तुसां इक ताजी रोटीया सांई होणा, जडी बिना खमिरे ला बणियो है, कने असल च तुसां सेई न। क्योंकि साडे फसह दा त्योहार असल च मसीह दे बलिदाने दे जरिये पूरा होया है। 8 इस तांई ओआ की असां अपने फसह दा त्योहार मनान। जियां यहदी खमीर बाहर कडया, तियां अपने पापी सभाब जो छडी दिया, कने जियां यहदी खमिरे बाली रोटी खांदे थे, सांझो भी परमेश्वरे दे लोकां सांई जीणा चाईदा, जिना च कोई बुगई नी होंदी, मतलब की अपने मने ला चलाकिया दियां गल्लां जो कडी करी कने सच्चाईया कने यीशु मसीह सोगी चला। 9 मै अपणिया पिछलिया चिठिया च तुहांजो लिखया था, की व्यभिचारियां सोगी संगती मत करंदे। 10 ऐ नी की तुसां बिलकुल ही इस संसारे दे व्यभिचारियां, या लोभियां, या दुज्जयां जो धोखा देणेबाले, या मूर्तिपूजा करणे बालयां दी संगती नी करणी, क्योंकि इयां तां तुहांजो इस संसारे ला निकलना पेई जाणा। 11 पर मेरे बोलणे दा मतलब ऐे है, ऐसे माणुऐे सोगी कोई रिशता मत रखा जडा अपने आपे जो मसीही बोलदा है, पर व्यभिचार, या लालची, या मूर्तिपूजक, या गाली देणे बाला, या शराबी, या दुज्जयां जो धोखा देणेबाला हो, तां उस माणुऐे सोगी संगती मत करंदे। 12 क्योंकि कर्लीसिया ला बाहर बालयां दा फेसला करणा मेरा कम्म नी है, पर तुहांजो उना जो जरूर सुधारणा चाईदा जडे तुहाडे कर्लीसिया दे लोक न। 13 पर कर्लीसिया ला बाहर बालयां दा फेसला परमेश्वर करता है: पर जियां पबित्र शाब् च लिखया है, की कुसी भी बुरे कम्म करणे बाले माणुऐे सोगी रिशता मत रखा।

**6** अगर तुहाडा कुसी दुज्जे मसीह भाई या बेहणा सोगी झगडा होंदा है, तां तुसां जो कचेरी च नी जाणा चाईदा। तुहांजो अपणी कर्लीसिया चे कुसी जो बोलणा चाईदा की, सै तुहाडे झगडे दा फेसला करे की कुण सही है कने कुण गलत है। 2 तुसां जाणदे न की, ओणे बाले दिना च परमेश्वरे दे लोकां इस संसारे दे लोकां दा न्याय करणा। इस तांई जालू तुसां बिच छोटे मोटे झगडे होन तां तुसां जरूर फेसला करी सकन की कुण गलत है कने कुण सही है। 3 तुसां जाणदे न की, ओणे बाले दिना च असां शैताने दे दूतां दा न्याय करणा, तां असां जरूर इसा जिन्दगिया च होणे

बालियां छोटियां-छोटियां गल्लां दा फेसला करी सकंदे न। 4 अगर एसियां गल्लां सामणे ओदियां न, तां उना दा फेसला करणे तांई ऐसे लोकां बाल नी जाणा चाईदा, जिना दी कर्लीसिया दे लोक इज्जत नी करंदे होन। 5 मै ऐे गल्लां तुहांजो शरमिदा करणे तांई बोला दा है; क्या सच्ची तुसां के कोई भी समझदार नी है, जडा अपने मसीह भाईयां कने बेहणा दा न्याय करी सके? 6 बल्कि इक मसीह भाई दुज्जे मसीह भाई दे खिलाफ मुकदमे जो लेईकरी भरोसा नी करणे बाले बाल जाऐे। 7 पर सच्ची गल्ल तां ऐे की तुसां बिच मुकदमे चलणे दा मतलब है की तुसां इक मसीही जिन्दगी जिणे च हारी गियो न। इस तांई अगर कोई होर मसीह भाई या बेहण तुहाडे सोगी गलत करे, कने धोखे ने तुहाडा कुछ लेई ले, तां तुसां इदे बदले च कुछ मत करा। 8 पर तुसां तां अपु ही गलत करा दे न कने धोखा दे न कने सै भी अपने ही मसीह भाई बेहणा जो। 9 तुसां पक्का जाणदे न की, बुरे कम्म करणे बाले लोक परमेश्वरे दे राज्य दे हकदार नी होणे न। कोई तुसां जो ऐे गल्ल बोली करी धोखा ना दे, की तुसां बुरे कम्म करी के भी परमेश्वरे दे लोक बणी रई सकंदे न। इस धोखे च मत रंदे की, बेइयागामी, मूर्तिपूजा करणे बाले, परसीगामी, लुच्चे, पुस्यगामी, 10 चोर, लालची, शराबी, गाली देणेबाले, दुज्जयां जो धोखा देणेबाले परमेश्वरे दे राज्य दे हकदार नी होणे न। 11 कने तुसां के कुछ लोक पेहले ऐसे ही थे, पर प्रभु यीशु मसीह दे नाऐे ला कने साडे परमेश्वरे दिया पबित्र आत्मा तुहाडे पाप धोई दितयो न, ताकि तुसां पबित्र कने परमेश्वरे दिया नजरा च धर्मी बणन। 12 तुसां बोली सकंदे न की, मै सारियां चीजां करी सकदा है क्योंकि मै इक मसीह पर भरोसा करणे बाला है; पर सारियां चीजां भरे फायदे दियां नी न। पर मै कुसी भी गल्ला दे बशे नी होणा। 13 तुसां बोली सकंदे न की, खांणा पेटे तांई, कने पेट खांणे तांई है, ऐ तां सच्च है पर परमेश्वरे ऐे दोनो खत्म करी देणा। साडे शरीर व्यभिचार तांई नी न, बल्कि प्रभु तांई है, कने इसला प्रभु दी सेवा करणी चाईदी। 14 पर साडा शरीर इस तांई भी खस है क्योंकि जियां परमेश्वरे अपणिया शक्तिया ला प्रभु जो मरयां के जिन्दा किता, तियां ही उनी सांझो भी मरयां के जिन्दा करणा। 15 तुसां जाणदे न की, तुहाडे शरीर मसीह दे अंग न। तां क्या इक माणुऐे अपने शरीर जो लेईकरी, बेइया सोगी जोडना चाईदा? नी बिलकुल भी नी। 16 तुसां जाणदे न की पबित्र शाब् च लिखया है, “उना दोनो इक बणी जाणा।” इस तांई तुहांजो पता होणा चाईदा की जडा कोई बेइया ला जुडी जांदा है सै बेइया सोगी इक बणी जांदा है। 17 कने जडा प्रभु सोगी जुडी जांदा है, उदी आत्मा कने प्रभु दी आत्मा इक होई जादियां न। 18 व्यभिचार ला बची रिया; माणुऐे दे कितयो होर पाप उदे शरीर जो उतणा प्रभावित नी करंदे जितणा ऐे करता है, पर व्यभिचार करणे बाला अपने ही शरीर दे खिलाफ पाप करता है। 19 तुसां जाणदे न की, तुहाडा शरीर सै मंदर है जिदे च पबित्र आत्मा बसदी है; जडी परमेश्वरे तुहांजो दितियो है, कने हुण तुसां अपने नी न, पर परमेश्वरे दे न। 20 क्योंकि जालू परमेश्वरे प्रभु यीशु मसीह जो भेजया, तालू उनी तुहाडे तांई बडी बड़ी कीमत चुकाई है, इस तांई अपने शरीर ला परमेश्वरे दी महिमा करा।

**7** हुण जडे सबाल तुसां मिंजो ला चिठिया च पृथयो थे हुण मै उना दा जबाब दिन्दा है। तुसां पृथया था कि, “क्या असां लोकां तांई ऐे खरा है की असां बियाह ना करन?” 2 क्योंकि ऐे आम गल्ल है की लोक नाजायज रिशते बणाई लेंदे न, इस तांई मै सलाह दिन्दा है की हर इक मर्द बियाह करे, कने अपणी घरे बालिया सोगी बफादार रहे। 3 इक माणु पति होणे दे नाते अपणिया जिम्मेबारियां पुरियां करे; कने तियां ही इक जनानी भी घरे बाली होणे दे नाते जिम्मेबारियां पूरी करे, कने दोनो इक दुज्जे दियां जरूतां जो पूरा करन। 4 घरे बालिया जो अपने शरीर पर हक नी है, पर उसा दे घरे बाले जो है; तियां ही घरे बाले जो भी अपने शरीर पर हक नी है, पर उदी घरे बालिया जो है। 5 तुसां इकी दुज्जे ला लग मत रिया; पर सिर्फ कुछ बकत दीकर अपु चे सलाह करिके लग रिया, ताकि प्राथना करणे तांई कुछ बकत मिल्ली सके, कने फिरी द्वारा सोगी रिया, इयां ना हो की अपने पर काबू नी रखणे दिया बजा ला शैतान तुसां जो नाजायज रिशता रखणे तांई परखे। 6 पर मै जडा कुछ बोला दा है सै मेरी सलाह है ना की मेरा हुकम। 7 मै ऐे चांदा है, की जियां की मै बियाह नी कितया, तियां ही तुसां सारे भी बियाह मत करा, पर परमेश्वरे कुछ लोकां जो खस बरदान दितया है। परमेश्वरे कुछ लोकां जो बियाह करणे दा बरदान दितया, कने कुसी जो बगेर बियाये रेणे दा बरदान

दितया है। 8 पर कुआरयां कने बिधवां जो मेरी सलाह ऐ है की, उना तांई ऐई खरा है की से बगेर बियाह कित्तयो रिया, जियां मै है। 9 पर अगर से सबर नी रखी सकन, तां उना जो बियाह करी लेणा चाईदा, क्योकि शरि रिया इच्छा ला लडने ला खरा है की बियाह करी लिया। 10 जिना दा बियाह होई गिया है, उना जो मै नी, बल्कि प्रभु यीशु मसीह हुकम दिन्दा है, की घरे बाली अपने घरे बाले जो तलाख ना दे। 11 कने अगर तलाख होई भी जा, तां सै दुज्जा बियाह ना करे; या अपने घरे बाले सोगी दुबारा मिली करी रे। कने ना घरेबाला अपणिया घरे बालिया जो तलाख दे। 12 पर हुण ऐ प्रभु दा हुकम नी है, पर मै उना भरोसा करणे बाले लोकां जो बोलणा चांदा है, जिना दा बियाह भरोसा नी करणे बाले लोकां ने होई गिया है; अगर कुसी मसीह भाई ऐ दी घरे बाली मसीह पर भरोसा नी करदी है, कने उदे सोगी रेणा चांदा है, तां सै उसा जो तलाख ना दे। 13 कने जिना मसीह जनानिया दा घरेबाला भरोसा नी करदा हो, कने उसा सोगी रेहणे च खूश हो, तां सै अपने घरे बाले जो तलाख ना दे। 14 क्योकि इक मसीह पर भरोसा करणे बालिया दे घरे बालिया दिया बजा ला परमेश्वरे उसा दे घरे बाले जो अपनाई लेणा है, अगर ऐ सच्च नी होंदा की तुहाडा भरोसा नी करणे बाला घरेबाला या घरे बाली परमेश्वरे दे न, तां तुहाडे बाल बच्चे परमेश्वरे दे नी होंदे, पर हुण तां तुहाडे बाल बच्चे भी परमेश्वरे दे न। 15 अगर कोई भरोसा नी करणे बाला भाई या बेहण तलाख देणा चांदा है, तां सै ऐसा करी सकदा है। ऐसे हालातां च इक भरोसा करणे बाले घरे बाले या घरे बालिये जो इस रिशते जो निभाणे दी जरूरत नी है, क्योकि भरोसा नी करणे बाला ऐ तलाख दे दा है; परमेश्वरे सांझो शांति ला जिन्दगी जिणे तांई सदया है। 16 हे घरेबालिये तुहांजो याद रखणा चाईदा की तुहाडिया बजा ला तुहाडे घरे बाले दियां जिन्दगिया भी बची जान कने हे घरे बालयो तुहांजो भी याद रखणा चाईदा की तुहाडिया बजा ला तुहाडे घरे बालियां दी जिन्दगी बची सके। 17 मेरा इतणा सब कुछ बोलणे दा मतलब ऐ की जियां प्रभुऐ हर इकी जो जिना हलातां च रखया है, सै उना ही हालातां च अपनी जिन्दगी जिये, जिस तांई परमेश्वरे उना जो अपने लोक होणे तांई सदया है। कने ऐई जिले मै सारियां कर्त्सीयां दे लोकां जो सिखांदा है। 18 इक उदाहरण तांई, अगर कोई यहदी माणु प्रभु यीशु मसीह भरोसा करदा है, तां उसयो उदी यहदी होणे दी पछेण नी छडणी चाईदी, कने तियां ही अगर कोई होर जाति दा माणु यीशु मसीह पर भरोसा करे तां उसयो यहदी बणने तांई खतना करबाणे दी जरूरत नी है। 19 इक माणु दा खतना होया हो या नी होया हो इसला कोई फर्क नी पोंदा। पर परमेश्वरे दे हुकमा जो मन्गा ही सारयां ला जरूरी है। 20 परमेश्वरे जिस माणुऐ जो जिना हलातां च अपने लोक होणे तांई सदया है, सै माणु उना ही हलातां च ही अपनी जिन्दगिया जो जिये। 21 अगर तू नोकर होंदे होऐ परमेश्वरे पर भरोसा किता है, तां तू इस बारे च चिंता मत कर; अगर तेरा मालिक बोले की तू अजाद है, तालू तू जाई सकदा है। 22 क्योकि जिसयो नोकरे दिया हालता च प्रभु दे लोक होणे तांई सदया हो, सै अजाद माणुऐ सांई है, क्योकि प्रभु यीशु मसीह उसयो उदे पापां ला आजादी देई दितियो है। कने इयां ही जिसयो आजादी दिया हालता च सदया हो, सै मसीह दे सेवक बणी रे। 23 क्योकि परमेश्वरे तुसां तांई बडी बडी कीमत चुकाईयो है, जालू उनी यीशु मसीह जो सूली पर बलिदान किता; इस तांई माणुआं दे गुलाम नी पर परमेश्वरे दे गुलाम बणा। 24 हे मसीह भाईयो, परमेश्वरे जिस माणुऐ जो जिना हलातां च अपने लोक होणे तांई सदया है, सै उना ही हलातां च अपनी जिन्दगी जिये। 25 कुआरियां दे बारे च मिंजो प्रभुऐ दा कोई हुकम नी मिलया, पर प्रभुऐ अपनी दया ला मिंजो भरोसे दे काबिल ज्ञान दितया, उदी बजा ला मै तुहांजो अपनी सलाह दिन्दा है। 26 क्योकि इना रोजां च भरोसा करणे बाले लोकां सोगी हर जगा बडियां परेशानिया बालियां गल्लां होआ दियां न, इस तांई मिंजो लग्गा दा है की ऐ खरा है की कुआरे लोक कुआरे ही रेन। 27 अगर तेरी घरे बाली है, तां उसा जो तलाख देणे दी कोशिश मत कर; कने अगर तेरी घरे बाली नी है, तां तू बियाह करणे दी कोशिश मत कर। 28 अगर तू बियाह भी करे, तां कोई पाप नी है; कने अगर कुआरियां दा बियाह होई जा, तमी कोई पाप नी है; पर बियायो लोकां जो इस संसारे च रेंदे होयो दुखां दा सामणा करणा पोणा, कने मै चांदा है की तुसां इना दुखां ला बची रिया। 29 हे मसीह भाईयो, मै तुहांजो ऐ बोलदा है, की इस संसार च साडे बाल जादा बकत नी है, इस तांई तुहाडे बाल घरे बाली है या

नी, इस बारे च जादा फिकर मत करा; पर प्रभु दी सेवा करणे दे बारे च सोचदे रिया। 30 कने जडे लोक दुखी न, सै अपना दुख ना दसन; जडे खुश न, उना दी खुशी लुकी रे, कने जडे खरीदारी करणे बाले न, सै ऐसे होई जान की उना बाल कुछ ना हो। 31 कने जडा कुछ इस संसारे च साडे बाल है, सांझो इना चिंजा जो जादा कीमत नी देणी चाईदी, क्योकि इस संसारे च जडा कुछ साडे बाल है, सै जल्दी ही खत्म होणेबाला है। 32 इस तांई मै चांदा है, की तुसां संसारिक जिन्दगी दी इच्छां ला अजाद रिया। कुआरा माणु परमेश्वरे दे बारे च सोचदा रेंदा है की सै कियां प्रभु जो खुश करे। 33 पर बियाया माणु संसारे दियां गल्लां दे बारे च सोचदा रेंदा है, की अपणिया घरे बालिया जो कियां खुश रखे। 34 इस तांई सै दो गल्लां दे बारे च सोचदा रेंदा, इक तां अपनी घरे बालिया जो खुश करणा कने दुज्जा प्रभु जो खुश करणा। बियाइयो कने नी बियाइयो च भी फरक है; कुआरी प्रभु दी सेवा दे बारे च सोचदी रेंदी, ताकि सै कियां शरि कने आत्मा ला परमेश्वरे जो खुश करी सके; पर बियाइयो जनानी संसारे दियां चीजां दे बारे च सोचदी रेंदी, की सै अपने घरे बाले जो कियां खुश करी सके। 35 मै ऐ गल्लां तुहाडिया भलाईया तांई बोला दा है, ना कि तुसां जो बियाह करणा ला रोकणे तांई। पर इस तांई की तुसां ढंगे ला जिन्दगी जी सकन; ताकि तुसां इक मन होईकरी परमेश्वरे दी सेवा च लगी रेन। 36 कने अगर कुसी पिता जो ऐ लग्गे की सै अपणिया कुआरिया कुडिया दा बियाह बडा बादे च करणे ला उसा सोगी अन्याय करा दा है, क्योकि उसा दी उमर जादा होआ दी है, तां उस पिता जो सैई करणा चाईदा जडा उसयो खरा लग्गे। तां सै पिता अपणिया कुडिया दा बियाह करी सकदा है, इदे च कोई पाप नी है। 37 अगर सै अपने मने च पक्का करी ले की, उदिया कुडिया तांई कुआरा रेणा ही खरा है, कने ऐसा करणे तांई उस पर कुसी दा दबाब न होऐ, तालू जडा फेसला उनी लिया है, तां उस पिता बाल ऐसा करणे दा पूरा हक है। कने अगर उनी अपणिया कुडिया जो कुआरा रखणे दा फेसला करी लिया है, तां सै परमेश्वरे दिया नजरा च खरा करदा है। 38 इस तांई जडा अपणिया कुवारिया कुडिया दा बियाह करी दिन्दा है, तां सै खरा करदा है, कने जडा उसा दा बियाह नी करदा है, सै होर भी जादा खरा करदा है। 39 जालू दिकर कुसी जनानिया दा घरेबाला जिन्दा है, तालू दीकर उसा उस सोगी बियाह दा रिशता निभाणा पोणा, पर जालू उसा दा घरेबाला मरी जाऐ, तां सै अजाद है, कने जिसला बियाह करणा चांदा उसला करी सकदी है, पर उस सोगी ही जडा मसीह पर भरोसा करदा है। 40 पर मेरे बिचार ला, अगर सै दुबारा बियाह ना करे, तां उना होर भी जादा खुश रेणा, कने मै समझदा है, की जालू मै इयुदियां गल्लां बोलदा है, तां परमेश्वरे दी आत्मा मिंजो जरिये बोलदी है।

**8** तुसां दी चिठिया च तुसां मिंजो ला मूर्तियां दे सामणे बलि कितियां चीजां दे बारे च पछया था। हां, असां इना गल्लां दे बारे च कुछ ना कुछ जाणदे न। पर जालू ऐई ज्ञान लोकां जो घमंड करणे बाला बणाई दिन्दा है, तां प्यार च अग्रे बढणे च असां इक दुज्जे दी सहायता करी सकदे न। 2 अगर कोई माणु ऐ समझे की, सै बडा बुद्धिमान है, तां सै असल च हल्ले दीकर सियुदा जाणी नी सकया है, जदिया जाणना उस तांई जरूरी है। 3 पर अगर कोई परमेश्वरे ला प्यार रखदा है, तां उसयो परमेश्वर जाणदा है। 4 हुण खांणे दे बारे च तुहांजो जबाब देणा चांदा है। मूर्तियां दे सामणे बलि दीतिया चिजां दे बारे च असां जाणदे न, की इस संसारे च कुधी भी मूर्तियां च परमेश्वर नी है, कने सिर्फ इक ही सच्चा परमेश्वर है। 5 पर स्वर्ग कने धरतिया पर मतियां चीजां जो, जिना जो लोक ईश्वर कने प्रभु बोलदे न। पर साडा तां इक ही परमेश्वर है: कने सै साडा पिता है; कने उनी ही सारियां चीजां बणाईयां न, कने असां उदे जरिये ही जिन्दे न, तियां ही साडा इक ही प्रभु है, कने सै यीशु मसीह है। उदे जरिये सारियां चिजां बणाईयां गियां थियां, कने उदे जरिये असां जिन्दे न। 7 पर साडे भरोसा करणे बाले लोकां जो हल्ले दीकर ऐ नी पता की मूर्तियां बाल कोई शक्ति नी है। क्योकि सै पेहले मूर्तियां दी पूजा करदे थे, कने हुण जालू सै मूर्तियां जो चढाया खाणा खादे न, तां सै गलत सोचदे न की सै हल्ले भी मूर्तियां दिया पूजा च करदे न। कने सै ऐ सोची करी दुखी होंदे न की अगर सै मूर्तियां पर चढाया खाणा खादे न, तां सै पाप करदे न। 8 पर खांणा खांणे ला असां परमेश्वरे दे नेडे नी होंदे। कने खांणे जो खांणे तांई मना करणे ला असां परमेश्वरे जो घट खुश नी करदे न, कने खांणा खाणा सांझो परमेश्वरे दिया नजरा च

कुछ खास नी बणांदा। 9 पर ध्यान रखा की, ऐसा ना हो की, तुहाडी ऐ अजादी कुशी घट भरोसे बाले लोकां ताई उदे पाप करणे दी बजा ना बणी जाऐ। 10 तुसां जाणदे न की असल परमेश्वर नी न, इस तांसां तुसां मूर्तियां दे मंदे च खांणा खाई सकदे न। पर जडा कोई भरोसे च कमजोर है, सै तुसां जो ओथु खांणा खांदे दिखदा कने मूर्तियां पर बलि कितियां चीजां जो खाणे ताई हिममत करे, पर ऐ सोचे की ऐसा करणा पाप है। 11 इस तांसां तुजिना गल्लां जो जाणदा है, उसा बजा ला जडा मसीह भाई भरोसे च कमजोर है उनी माणुऐ मसीह पर भरोसा करणा छडी देणा, जिस ताई यीशु मसीह अपणी जान दिती। 12 कने अगर साडे इस कम्मे जो करणे दिया बजा ला साडे साथी मसीही भाई अपने आप जो पापी महसूस करदे न, तां असां उना दे खिलाफ कने यीशु मसीह दे खिलाफ पाप करदे न। 13 इस तांसां अगर मूर्तियां दे सामणे बलि चढाया खाणा खाणे दिया बजा ला कुसी भरोसा करणे बाले भाई या बेहणा दा भरोसा कमजोर होई जांदा है, तां मै कदी भी ऐसा खाणा नी खाणा जिसदी बजा ला उस माणु दा भरोसा कमजोर होई जाऐ। (aiōn g165)

**9** जडा कुछ मिजो खरा लगदा है, सै खाणे तांसां मै अजाद है। मै प्रेरित है। मै प्रभु यीशु मसीह जो दिखया है। प्रभुऐ जडी सेवा मिजो करणे तांसां दितियो है तुसां उस सेवा दा नतीजा न। 2 भले ही लोक ऐ नी मदे की मै प्रभु यीशु दा प्रेरित है, पर तुहांजो ऐ गल्ल मनणा चाइदी। क्योंकि मै ही तुसां बाल सारयां ला पहले शुभसमाचार लेईकरी आया था, तुसां दा भरोसा जडा यीशु मसीह पर है, सै इसा गल्ला दा सबूत है की मै सच्चवी तुसां तांसां परमेश्वरे दा चुण्या चला है। 3 जडे लोक मेरे प्रेरित होणे पर सबाल करदे न उना तांसां मेरा ऐई जबाब है। 4 मेरा कने बरनबास दा पूरा हक है की, असां तुसां लोकां ला पैसे कने खाणे तांसां सहायता लेई सकदे न। 5 जियां पतरस कने होर चेले कने प्रभु दे भाई जालू सेवा करणे तांसां अपणी घरे बालियां सोगी जांदे न, तियां ही मेरे बाल ही हक है की मै ऐसा करूं। 6 मिजो कने बरनबास जो भी होर प्रेरितां सांई आर्थिक सहायता लेणे दा हक है, कने अपणियां जुस्तरतां जो पूरा करणे तांसां कम्म करणे दी जरूरत नी है। 7 कोई भी माणु अपने खर्च पर सिपाई दा कम्म नी करदा। इक माणु जडा अंगूरा दा बाग लांदा है सै भी उदा फल खाणे दी उम्मीद रखदा। भेडां दी रखबाली करणे बाला भी उना दा दूध पिणे दी उम्मीद रखदा। 8 मै ऐ सारियां गल्लां माणुआं दिया सोचा दे मुताबिक नी बोलदा है। 9 मूसा दी व्यवस्था भी ऐई बोलदी है। क्योंकि मूसा दिया व्यवस्था च लिखया है, “गांण गांटे बकते दांटे दा मु मत बनदे।” क्या तुहांजो लगदा है की परमेश्वरे जो दांदा दी ही चिंता है? नी बिलकुल भी नही! 10 परमेश्वरे ऐ खासकर सांझो तांसां ही बोलया है। कने ऐ साडे तांसां ही लिखया है, क्योंकि हल बांणे बाला आस रखीकरी ही खतरां जो बांदा है, कने गांणे बाला फसल मिलणे दी आस रखीकरी ही फसल गांदा है। 11 असां तुहाडे बिच आत्मिक बी राया है, इस तांसां ऐ उम्मीद करणा बडी बड्डी गल्ल नी है, की तुसां साडे खर्च तांसां पैसे देना। 12 अगर तुसां दुज्जे लोकां दी सहायता किति है जिना तुसां बाल आई करी प्रचार किता, तां बरनबास कने मेरा जादा हक बणदा है की तुसां साडियां जुस्तरतां जो पूरा करा। क्योंकि असां सारयां ला पहले तुहांजो शुभसमाचार सुणाया, पर असां इसा गल्ला तांसां तुसां पर भोज नी पाया। इदे बजाऐ असां सब कुछ सेहन करणे तांसां तैयार थे, ताकि साडे मसीह दे बारे च शुभसमाचार पर भरोसा करणे ला कुसी जो भी परेशानी ना होऐ। 13 तुसां जाणदे न की, जडे लोक मंदरा च सेवा करदे न, उना जो उना दा खांणा मंदरा ला ही मिलदा है, कने जडे वेदी पर बलि चढांदे न, उना जो उस बलि दे चढावे चे ही हिस्सा मिलदा है। 14 इस तांसां प्रभुऐ हुकम दितया है की शुभसमाचार सुणणे बालयां दी रोजी रोटी उना लोकां ला मिलणी चाइदी जडे शुभसमाचार सुणदे न। 15 पर इना हकां चे मै कदी कुसी दा भी इस्तेमाल नी किता। कने ऐ गल्लां मै इस तांसां नी लिखियां की, हण तुसां मेरे तांसां ऐसा करा। नी बिलकुल भी नी! मेरे तांसां मरणा ठीक है, इदे बजाऐ की मै तुसां ला सहायता मंगे, अगर मै तुसां ला मुजुदरी लेई तां फिरी मै इसा गल्ला पर घमंड नी करी सकदा, की मै बिना कुछ लियो तुसां तांसां कम्म किता। 16 इस तांसां अगर मै शुभसमाचार सुणा, तां इदे च घमंड करणे बाली कोई गल्ल नी है, क्योंकि प्रभु यीशुऐ मिजो ऐ कम्म करणे दा हुकम दितया है, अगर ऐ कम्म मै नी करे तां मिजो बडा दुख होणा। 17 क्योंकि अगर मै अपणिया इच्छा ला ऐ कम्म करदा है, तां मिजो मजदूरी मिलणी। कने अगर ऐ कम्म बिना इच्छा ला करदा है, तां ऐ सिर्फ

परमेश्वरे दी दितियो जिम्मेबारियां जो पूरा करदा है, तां मै कोई भी मजदूरी दी उम्मीद नी करी सकदा। 18 तां क्या है मेरी मजदूरी? मेरी मजदूरी ऐई है की मै बिना मजदूरी लियो मुफ्त च शुभसमाचार दा प्रचार करूं। होर कुछ नी मिजो इदे च ही खुशी है की मै मुफ्त च ही शुभसमाचार दा प्रचार करूं, हालांकि मिजो बाल पूरा हक है की मै अपणी मजदूरी इना ला मंगी सके। 19 इदा मतलब ऐ है की मै लोकां दियां गल्लां जो मणणे तांसां मजबूर नी है, सिर्फ इस तांसां की सै मेरी सहायता करदे न, फिरी भी मै सारयां दा सेबक बणया, ताकि मै उना जो मसीह च लेई ओऐ। 20 जालू मै यहूदी लोकां सोगी था, तां मै उना सांई जिन्दगी जिन्दा था ताकि मै उना जो मसीह च लेई ओऐ; जालू मै यहूदी व्यवस्था जो मणणे बालयां सोगी रेंदा था, तां मै अपु भी उस व्यवस्था दे अधीन रेंदा था, हल्ले की मिजो उस व्यवस्था जो मणणे दी जरूरत नी है, पर मै सै इस तांसां मनदा है ताकि मै व्यवस्था दे अधीन रेणे बालयां जो मसीह च लेई ओऐ। 21 ठीक तियां ही होर जातियां सोगी था, तां उना सांई जिन्दगी थी, ताकि उना जो भी मसीह च लेई ओऐ, पर मै जाणदा की मै परमेश्वरे दी व्यवस्था दे बेग्नर नी जिन्दा था, क्योंकि मै, मसीह दी व्यवस्था दे अधीन ही है। 22 जालू मै उना लोकां सोगी होदा है, जिना दा भरोसा कमजोर है, तां मै उना सांई व्यवहार करदा है, ताकि मै उना जो मसीह दे पिच्छे चलणे च सहायता करी सकूं, मै हर इक माणुऐ तांसां कुछ न कुछ बणया है ताकि कुसी न कुसी तरीके ला कुछ लोकां दा उद्धार होई सके। 23 कने मै सारा कुछ मसीह दे बारे च शुभसमाचार जो सुणणे तांसां करदा है, ताकि मिजो शुभसमाचार दी आशींयां च हिस्सा मिली जाऐ। 24 तुसां जाणदे न की, दौडा च तां सारे दौडदे न पर इनाम इकी जो ही मिलदा है। तुसां इयां दौडा की इनाम तुहांजो मिल्ले। इयां ही सांझो सै सब कुछ करणा चाइदा जिदे ला असां परमेश्वरे जो खुश करी सकन। ताकि सांझो सै इनाम मिली सके जडा परमेश्वरे ओणे बाले बकत च सांझो देणा। 25 कने जडे लोक दौडा च हिस्सा लेणा चांदे न, सै पहले इदी तैयारी करदे न, अपणी इच्छां पर काबू रखदे न, सै ऐसा इस तांसां करदे न ताकि जिति सकन कने इज्जत मिल्ले। उना दी इज्जत करणे तांसां पतरयां दी बणियो माला दिन्दे न, जडी जल्दी सुकी जांदी है। पर असां जडे यीशु मसीह पर भरोसा करदे न, साडी इज्जत होणी है जडी, कने सांझो ऐसी आशींया मिलणी है, जडी युगां-युगां तांसां बणी रेणी है। इस तांसां सांझो होर भी जादा सबर रखणा चाइदा। 26 इस तांसां मै अपणी मसीह जिन्दगी जो इक पक्के मकसद सोगी जी दा है, जियां इक कुशती लडने बाला पलबाण लडदा है कने सै होआ च मुक्के नी मारदा है। 27 मै अपने शरीर जो काबू च रखदा है, ताकि मै शरीर दियां इच्छा पर काबू करी सकूं; इयां ना हो की मै होरां जो शुभसमाचार दा प्रचार करूं, मिजो अपु जो ही इनाम नी मिल्ले।

**10** हे मसीह भाईयो, मै चांदा है, की तुसां इसा गल्लां जो याद रखा की बडे पहले साडे बाप दादयां सोगी जंगला च क्या होया था। परमेश्वरे इक बदल भेजी करी अगुवाई किति, जडा उना दे अग्गे-अग्गे चलदा था। कने उना जो लाल समुंद्र ला निकाली करी सुक्की धरतिया पर लेई आया। 2 जियां असां प्रभु यीशु दे चेले बणने तांसां बपतिस्मा लेंदे न, तियां ही सै भी सारे बदला दिया छांआ च थे कने मूसा दे चेले बणने तांसां लाल सागरे चे गे। 3 कने सारयां सेई रोटी खादी, जडी परमेश्वरे उना जो स्वर्ग ला दिती। 4 कने उना सबना सेई पाणी पीता जडा परमेश्वरे उना जो दितता था, उना इक चट्टान ला निकलने बाले पाणिऐ जो पीता, कने उस चट्टाना दी तुलना मसीह सोगी करी सकदे न जिना उना सोगी रेईकरी उना जो जिन्दगी दिती। 5 पर परमेश्वर उना चे मतयां ला खुश ना था, इस तांसां तां सै सुनसान जगा च मरी गे। 6 ऐ सारियां गल्लां साडे बाप दादयां नै इस तांसां होईयां ताकि सांझो चित्तबनी मिल्ले की अगर असां भी इना सांसां बुराई करणे दी इच्छा करगे, तां जडा उना सोगी होया सै साडे सोगी भी होई सकदा है। 7 कने तुसां मूर्तियां दी पूजा मत करा, जियां उना चे मते लोकां किता था, ऐ ठीक तियां है जियां पबित्र शाब् च लिखया है, “लोक धामा च खांणा पीणा बैठे, कने रंगरलियां मनाणे तांसां उटे।” 8 कने शरमिंदा होणेबाला कम्म कोई मत करा; जडा साडे बाप दादयां चे केईयां किता; कने इक ही रोजे तेरेई हजार लोक मरी गे। 9 कने प्रभु जो मत परखा; जियां उना चे मते लोकां किता, कने जहरीले सपां सै डस्से कने सै मरी गे। 10 बुडबुडा मत जियां उना चे मते लोकां किता, कने परमेश्वरे इक स्वर्गदूते जो भेजी करी सै मारी दिते। 11 पर ऐ सारियां गल्लां, जडियां साडे बाप दादयां

सोगी हुईयां, सै इस ताई हुईयां ताकि ऐ सारे लोकां ताई उदाहरण बणे, कने ऐ गल्लां सांझो चेताबनी देणे ताई लिखियां न, जडे इस संसारे च इना आखरी दिना च रे दे न। (aiōn g165) 12 इस ताई अगर ऐथु कोई ऐसा माणु है जडा बोलदा है की, परमेस्वरे पर उदा भरोसा मजबूत है, तां सै ध्यान रखे की, कुथी ऐसा ना हो की सै अचानक भरोसे ला भटकी जा कने पाप करी ले। 13 पाप करणे दियां इच्छां साडे बाल जर्र ओदियां न, पर परमेस्वर भरोसे दे लायक है; क्योंकि सै तुसां जो कदी एसियां परखा च नी पोणा दिन्दा, जिसदा तुसां सामणा नी करी सकदे, पर इदे बजाए उनी तुसां जो शक्ति देणी, जिसदी तुसां जो जर्रत है, ताकि तुसां पापां ला बची सकन। 14 इस ताई, हे मेरे प्यारे भाईयो, मूर्तियां दियां पूजा करणे ला बची रिया। 15 मै तुहांजो समझदार समझीकरी गल्लां बोला दा है, इस ताई इना गल्लां पर ध्याने ला सोच बिचार करा जडियां मै हण बोलणा लगया की सै सही न या गलत न। 16 जालू असां प्रभु भोज च इस्तेमाल होणे बाले कटोरे ला अंगूरा दा रस्स पिदे न, कने जिस ताई असां परमेस्वरे दा धन्यवाद करदे न, तालू असां सच्ची मसीह दे खूने जो साझा करदे न। कने जालू असां रोटी तोडदे न कने खांदे न, तां असां सच्चे मसीह दे शरीर जो साझा करदे न। 17 इस ताई की, इक ही रोटी है जडी की मसीह है, भले ही असां केई न, असां इक शरीर बणी जांदे न; क्योंकि असां सारे उसा इकी रोटियां चे खांदे न। 18 इस्राएल देशे दे लोकां दे बारे च सोचा, जालू सै परमेस्वरे जो चढाणे बाले खाणे जो खांदे न, तां परमेस्वरे दी पूजा च हिस्सा लेंदे न, इयां ही जडे लोक मूर्तियां जो चढाणे बाले खाणे जो खांदे न, सै भी उना मूर्तियां दिया पूजा च हिस्सा लेंदे न। 19 मेरे बोलणे दा मतलब ऐ नी की मूर्ति या मूर्तियां सामणे चढाईयां बलियां दी कोई कीमत है। 20 पर मै ऐ बोला दा है की, जडे लोक उना मूर्तियां ताई चीजां दियां बलियां चढांदे न, सै परमेस्वरे ताई नी पर बुरियां आत्मा ताई चढांदे न, मै ऐ नी चांदा की तुसां बुरियां आत्मा दे हिस्सेदार बणा। 21 ऐ होई नी सकदा की तुसां प्रभु दे कटोरे चे पीया कने बुरियां आत्मा दे कटोरे चे भी पीया; इयां ही ऐ भी नी होई सकदा की तुसां प्रभु दी मेज च हिस्सेदार होआ कने बुरियां आत्मा दे मेज च भी। 22 अगर असां ऐसा करदे न तां असां प्रभु दे गुस्से जो भडकांदे न। याद रखा असां परमेस्वरे ला जादा शक्तिमान नी न। 23 तुसां बोलदे न की, साडे बाल सारियां चीजां करणे दी अजादी है, हां पर सारियां चीजां साडे फायदे ताई नी न। असां सब कुछ करणे ताई अजाद, पर सारियां चीजां परमेस्वरे पर भरोसे जो नी बदादियां। 24 तुसां चे हर कुसी जो अपने बारे च ही नी सोचना चाईदा, पर दुज्जे दिया भलाईया ताई भी सोचना चाईदा। 25 पर जालू तुसां बजारां च मास खरीददे न, तां उसयो खरीदी करी खाई लिया, ऐ मत पुच्छा की ऐ मूर्तियां सामणे बलि कितया था की नी, तां तुसां दिया अंतरात्मा परेशान नी होणा। 26 तुसां इसयो खाई सकदे न, क्योंकि पबित्र शास्त्र च लिखया है की, “धरती कने जडा कुछ उसा च है; सै सब कुछ प्रभु दा है।” 27 कने अगर कोई भरोसा नी करणे बालयां चे तुहांजो खाणे ताई सदे, कने तुसां जाणा चना, तां जडा कुछ तुहाडे सामणे खाणे ताई रखणे तां उना ला ऐ मत पुछदे की ऐ खाणा बलि कितया है की नी, ताकि अगर सै बलि कितया होंगा, तां उस खाणे दिया बजा ला तुसां दिया अंतरात्मा तुहांजो दोषी नी बणाणा। 28 पर अगर कोई तुसां जो बोले, “ऐ तां मूर्तियां जो चढाया खाणा था,” तां तुसां उस खाणे जो मत खांदे, अपनी अंतरात्मा दिया बजा ला नी, पर उदिया अंतरात्मा दिया बजा ला जिनी तुहांजो ऐ गल्ल दस्सी थी। क्योंकि मेरी अपनी खाणे दी अजादी जो कुसी होरसी माणुए दिया अंतरात्मा जरिये न्याय नी कितया जाणा चाईदा। 30 अगर मै धन्यवाद करिरी मूर्तियां सामणे बलि कितियां चीजां खाई लेंदा है, तां उस ताई मिंजो पर कजो दोष लगांदे न, जिस खाणे ताई मै परमेस्वरे दा धन्यवाद कित्या? 31 कने इदा जबाब ऐ है, चाऐ तुसां खा, या पिया, चाहे जडा कुछ करा, पर सारा कुछ परमेस्वरे दिया महिमा ताई करा। 32 मै जडा कुछ भी करता है, उदे च मै सारयां जो खुश करणे दी कोशिश करता है; मै अपनी भलाई नी सोचदा पर सारयां दी भलाई सोचदा है ताकि सारे बची सकन। इस ताई तुसां भी इस तरीके ला जिया की तुसां यहदी लोकां ताई, या होर जाति दे लोकां ताई, या परमेस्वरे दिया कलीसिया दे लोका ताई कोई परेशानी खडी ना होऐ, जिसा बजा ला सै मसीह पर भरोसा करणा छडी देन।

11 जियां मै मसीह सांई जिन्दगी जिंदा है, तियां ही तुसां भी मेरे सांई जिन्दगी जिया। 2 हे मसीह भाईयो, मै तुहाडी तारीफ करता है, क्योंकि तुसां मिंजो सारियां गल्लां च याद करदे न, कने जडियां शिक्षा मै तुसां जो दीतियां न, उना दा ध्याने ला पालन करा दे न। 3 पर इक गल्ल है जडी मै चांदा है की तुसां ऐ जाणी लिया की, हर इक मर्द दा मुंड मसीह है, कने इक घरे बालिये दा मुंड उदा घरेबाला है, कने मसीह दा मुंड परमेस्वर है। 4 इस ताई अगर कोई मर्द कलीसिया च प्राथना करदे बकत या परमेस्वरे दा संदेश सुणांदे बकत अपना सिर ढकदा है, तां सै मसीह दा आनाद करता है जडा उदा सिर है। 5 पर जडी जनानी कलीसिया च बिना सिर ढकयो प्राथना या परमेस्वरे दा बचन सुणा दी है, इदा मतलब ऐ है की सै अपने घरे बाले दा आनाद करदी है जडा उसा दा सिर है। सै उसा जनानिया सांई है जिसा जो शर्मिंदा करणे ताई उसा दा मुंडन करी दिन्दे न। 6 अगर सै जनानी मुंड नी ढकणा चांहीदी, तां सै अपने बाल कटाई दे; पर अगर जनानिया ताई बाल कटवणा सरमा दी गल्ल है, तां सै प्राथना या भविष्यवाणी करदे बकत सिर ढकी ले। 7 मर्दे ताई अगर सिर ढकणा खरा नी है, क्योंकि कने परमेस्वरे दी महिमा है, जिसयो परमेस्वरे अपने स्पे च बणाया है; पर जनानियां मर्दा दिया महिमा जो जाहिर करदियां न। 8 क्योंकि पेहला मर्द जनानिया ला नी अया था, पर पैली जनानी मरदे ला आईयो थी। 9 परमेस्वरे पेहले मरदे जो जनानिया दिया सहायता ताई नी बणाया, पर जनानिया जो मरदे ताई बणाया। 10 इसा बजा ला कने स्वर्गदूतां दिया बजा ला भी, इक जनानिया जो अपने सिरि जो ढकणा चाईदा, अपने अधिकारे दे चिन्न दे स्पे च। 11 तमी अगर असां भरोसा करणे बाले लोकां दी गल्ल करदे न, तां ना जनानियां मरदा ला अजाद न, कने ना ही मरद जनानिया ला अजाद न। 12 हालांकि परमेस्वरे पैली जनानी मरदे ला बणाई, पर हण जनानियां ही मर्दा जो जमादियां न; कने सै दोनो परमेस्वरे दिया तरफा ला न जिनी सारयां जो बणाया है। 13 मै चांदा है की तुसां अपु ही फेसला करा, की क्या इक जनानिया जो उघडे सिरि सभा च परमेस्वरे दी प्राथना करणा सही है? 14 कुदरती तुसां ऐ जाणदे की, की अगर कोई मर्द लम्बे बाल रखे, तां उदे ताई ऐ सरमा दी गल्ल है। 15 अगर जनानी लम्बे बाल रखे तां उदे ताई शोभा है, कने उना जो अराधना च सिर ढकणा चाईदा। 16 पर अगर कुसी जो लग्गा दा है मै गलत बोला दा है, तां तुसां ऐ जाणी लिया की साडी कलीसिया कने परमेस्वरे दियां कलीसियां दे ऐई रिबाज न। 17 जिना गल्लां दे बारे च हण मै तुहांजो बोलणा लगया, उना दी मै तारीफ नी करी सकदा है, क्योंकि कलीसिया च तुहाडे गिठे होणे ला तुहाडी भलाई नी पर बुराई ही होई है। 18 क्योंकि सारयां ला पैली गल्ल तां ऐ है, मै ऐ सुणया है, की जालू तुसां कलीसिया च अराधना ताई गिठे होंदे न, तां तुसां बिच अपु चे बगपदी नी, कने मिंजो भरोसा है की उना दियां गल्लां च कुछ सच्चाई है। 19 तुसां जो क्या लगदा, की तुसां बिच जालू बटवारा होणा, तालू ही पता लगणा है की कुण परमेस्वरे दे चुणयो लोक न? नी ऐसा बिलकुल नी है। 20 जालू तुसां इक जगा च गिठे होंदे न, तां तुहांजो इस गल्ला दी चिंता नी है, कि प्रभु यीशु मसीह दी मौत जो याद करणे ताई प्रभु भोज कियां खाणा चाईदा। 21 क्योंकि मिंजो पता लगया की तुसां चे केई लोक दुज्जयां सोगी बंडणे ला पेहले अपना खाणा खाई लेंदे न, जिसा बजा ला कुछ लोक भूखे ही चली जांदे न, कने केई शराबी होई जांदे न। 22 तुसां अपने घरां च खाई पी सकदे न! तुसां परमेस्वरे दिया कलीसिया दा निरादर कने गरीबां दी बेईजती करदे न। क्या मै इस कम्मे ताई तुहाडी तारीफ करां? मै ऐसा करणे ताई तुहाडी तारीफ नी करणी। 23 जडी शिक्षा मै तुहांजो दितियो थी, सेई शिक्षा है जडी मिंजो प्रभु ला मिलियो है, की प्रभु यीशु मसीह जिस राती पकडवाया गिया, तां उनी रोटी लेंदे, 24 कने परमेस्वरे दा धन्यवाद करिरी तोडी, कने बोलया, “ऐ मेरा शरीर है, जडा तुहाडे उदार ताई बलिदान कितया जाणा, कने मिंजो याद करणे ताई इयां ही करदे रिया।” 25 कने जालू सै रोटी खाई बैठे तां यीशुए अंगूरा दे रस्से ला भस्म कटोरा लिया, कने बोलया, “ऐ कटोरा मेरे खूने च नोई बाचा है, जालू कदी तुसां इसयो पीणे, तां मेरी याद ताई इयां ही करदे रिया।” 26 क्योंकि जालू भी तुसां इसा रोटियां चे खाणे, कने इस कटोरे चे अंगूरा दा रस पीणे, तां जालू दीकर प्रभु मुडी नी ओऐ तां उदिया मौता दा प्रचार करदे रिया। 27 इस ताई जडा कोई इस तरीके ला जडा मसीह दा निरादर करता है प्रभु दी रोटी खा, या उस कटोरे चे पिऐ, तां सै प्रभु दे शरीर कने खूने दे

खिलाफ पाप करता है। 28 इस ताँई हर इक माणु इसा रोटीया जो खाणे कने इस कटोरे चे अंगूरा दा रस पिणे ला पेहले अपने आपे जो जाँची परखी ले की उदे अपने बिचार सही न। 29 क्योंकि जडा कोई रोटी जो खाणे कने कटोरे च पिदे बेले प्रभु दे शरीर दी इज्जत ना करे, ताँ सै इस तरीके ला खाई पी करी अपने उपर सजा लेई ओदा है। 30 ऐई बजा है की तुसां चे केई बीमार न, कने तुसां लोकां बाल कमजोर शरीर भी है कने केई लोक मरी भी गियो न, क्योंकि ऐ परमेश्वरे दी सजा है। 31 इस ताँई अगर असां पेहले अपने आपे जो परखी लेदे न, ताँ परमेश्वरे सांझो सजा नी देणी। 32 पर अगर परमेश्वर इस तरीके ला सांझो सजा दिन्दा है, ताँ सै सिर्फ सांझो सुधारदा है, ताकि सांझो न्याय बाले दिने संसारे दे लोकां सोगी सजा ना मिल्ले। 33 इस ताँई, हे मेरे मसीह भाईयो, जालू तुसां प्रभु भोज खाणे ताँई गिठे होदे न, ताँ इक दुज्जे ताँई स्का करा ताकि सोगी रोटी खाई सकन। 34 अगर कोई भूखा हो, ताँ अपने घरे खाई ले ताकि जालू तुसां गिठे होदे न ताँ सही ढंगे ला व्यवहार करी सकन, ताकि परमेश्वर तुहांजो सजा ना दे, कने बाकि गल्लां दे बारे च जडियां तुसां लिखियां थियां, सै मै ओथु आई करी समझाई दिया।

**12** हे मसीह भाईयो, तुसां मिजो ला पबित्र आत्मा दे बरदाना दे बारे च पृथया था, मै चांदा की तुसां इना बरदाना दे बारे च अच्छे ला जाणी लिया। 2 तुसां जाणदे न, की परमेश्वरे पर भरोसा करणे ला पेहले कियां जिन्दगी जिन्दे थे। तुसां भटकाई दितयो थे की तुसां बेजान मूर्तियां दी पूजा करन। 3 इस ताँई मै चांदा है तुसां इसा गल्ला जो जाणी लिया की परमेश्वरे दी दितियो पबित्र आत्मा दे जरिये कोई भी माणु ऐसा नी बोलदा की यीशु श्रापित है, कने पबित्र आत्मा दे जरिये ही सै बोली सकदा है की “यीशु ही प्रभु है।” 4 कने हुण केई क्रिस्मा दे बरदान न, पर इना जो सारे बरदाना जो देणेवाला सिर्फ इक ही है, कने सै पबित्र आत्मा है। 5 कने लग-लग तरीके ला असां प्रभु दी सेवा करी सकदे, पर असां सारे इक ही प्रभु दी सेवा करदे न। 6 कने परमेश्वर भी केई तरीके ला साडियां जिन्दगिया च कम्म करता है, पर ऐ सेई परमेश्वर है जडा असां सारयां दे जरिये कम्म करता है। 7 परमेश्वरे सांझो सारयां जो इक दुज्जे विस्वासी भाई बेहणा दी सहायता ताँई ऐसा बरदान दितया है, जडा पबित्र आत्मा दी हाजरी जो प्रकट करता है। 8 क्योंकि पबित्र आत्मा कुसी इक्की माणुऐ जो अकली दियां गल्लां बोलणे दा बरदान दिन्दी, कने होर कुसी माणुऐ जो ज्ञान दियां गल्लां बोलणे दा बरदान दिन्दी है। 9 कने कुसी माणुऐ जो मसीह पर बडा जादा भरोसा करणे दा बरदान दिन्दा, कने कुसी जो ऐई पबित्र आत्मा दुज्जे माणुआं जो ठीक करणे दा बरदान दिन्दी है। 10 पबित्र आत्मा कुसी जो चमत्कार करणे दी शक्ति दिन्दी; कने कुसी जो परमेश्वरे दा संदेश देवे दा बरदान दिन्दी, कने कुसी जो ऐ परखणे दी समझ दिन्दी की पबित्र आत्मा दिया तरफ ला कने बुरियां आत्मा दिया तरफ ला मिलणे बाले बरदाना च क्या फर्क है। कने कुसी जो लग-लग भाषा बोलणे दा बरदान दिन्दी, जडी उना कदी नी सिखियो हो; कुसी जो इना भाषा दा मतलब दसणे दा बरदान दिन्दी। 11 पर ऐ सारे बरदान इक ही पबित्र आत्मा दे कम्म न, सै सारे मसीह पर भरोसा करणे बालयां जो बरदान दिन्दा है जदिया पबित्र आत्मा चांदा है। 12 क्योंकि जियां माणुऐ दा शरीर ताँ इक है पर उदे अंग मते न, कने मते सारे अंग मिली करी इक शरीर बणादे न, इयां ही मसीह भी कने उस पर भरोसा करणे बाले भी इक न। 13 क्योंकि असां सारयां जडे यहदी न, या होर जाति न, या गुलाम न, या अजाद न, इक ही पबित्र आत्मा जरिये इक शरीर होणे ताँई बपतिस्मा लिया, कने सांझो सारयां जो इक ही आत्मा मिलीईयो, जियां असां सारयां इक ही कटोरे चे पिदे न। 14 साडे शरीर च इक ही अंग नी है, पर मते सारे अंग न। 15 सोचा, अगर पैर बोले की, “मै हथ नी है, इस ताँई मै शरीर दा अंग नी है,” ताँ क्या उदे ऐसा बोलणे दिया बजा ला सै शरीर दा अंग नी है? 16 कने अगर कन बोले, “मै हथ नी है, इस ताँई मै शरीर दा अंग नी है,” ताँ क्या सै कन्ना दा ऐसा बोलणे दिया बजा ला सै शरीर दा अंग नी है? 17 अगर सारा शरीर हथ ही होदी ताँ सणना कुथु ला था? अगर सारा शरीर कन ही होदा ताँ सिंघना कुथु ला था? 18 पर परमेश्वरे अपनी इच्छा अनुसार शरीर दे सारे अंगा जो इक-इक करिरी ठीक जगा च रखया है। 19 अगर सारे इक ही अंग होदे, ताँ कोई शरीर नी होणा। 20 इस ताँई, भले ही शरीर दे मते अंग होदे न, पर शरीर इक ही है। 21 हथी हथयां ला नी बोली सकदियां की, मिजो तेरी जरूरत नी है, कने ना सिर पैरां जो बोली सकदा है की, “मिजो तेरी

जरूरत नी है।” 22 पर शरीर दे सै अंग जिना जो असां कमजोर समझदे न, सै बडे जरूरी न। 23 कने शरीर दे जिना अंगा जो असां आदर दे काबिल नी समझदे न उना जो असां बडे ध्याने ला ढकी करी रखदे न। इस ताँई उना अंगा दी रक्षा करदे न जिना जो दुज्जयां जो नी दस्सी सकदे, जालू की जादा आदर दे काबिल अंगा जो खास देखभाल दी जरूरत नी होदी। इस ताँई परमेश्वरे शरीर जो इस तरीके ला बणाया है की उना अंगा जो जादा आदर कने देखभाल होजे घट इज्जत दे काबिल न। 25 परमेश्वरे ऐ इस ताँई किता की शरीर दे सारे अंग इक दुज्जे ला मिल्ली करी रेन, कने शरीर दे सारे अंग इक दुज्जे दी देखभाल करन। 26 अगर साडे शरीर दा इक अंग बीमार है, ताँ उस सोगी शरीर दे सारे अंग दुखी होदे न, कने इयां ही साडे शरीर दे इक अंगे दी अच्छे ला देखभाल होदी है, ताँ पूरा शरीर खुश है। 27 इयां ही तुसां भी सारे मिली करी मसीह दे शरीर न, कने तुसां सारे उदे शरीर दे अंग न। 28 कने मसीह दे इस शरीर च जडी कलीसिया है, परमेश्वरे लग-लग लोकां जो लग-लग कम्म दितया है। पेहले सै लोक जडे उदे प्रेरित न, दुज्जे परमेश्वरे दे संदेश देणेवाले, तीजे सै लोक न जडे सिखदिे न। उदे बाद सै लोक न जिना जो उनी चमत्कार करणे दा हक दितया है, कने सै लोक न जिना जो लोकां जो ठीक करणे दा हक दिता, फिरी सै न जिना जो दुज्जयां दी सहायता करणे दी ताकत मिलियो, फिरी सै न जडे अगुवे न, फिरी सै न जिना जो पबित्र आत्मा जरिये लग-लग भाषा बोलणे दा बरदान मिलया, जडियां उना कदी सिखियां नी थियां। 29 हर कोई प्रेरित नी होदा। हर कोई परमेश्वरे दा संदेश देणेवाला नी होदा। कने हर कुसी बाल चमत्कार करणे दा हक नी होदा। 30 हर कुसी जो लोकां जो ठीक करणे दा बरदान नी मिलया होदा। कने हर कुसी जो लग-लग भाषा बोलणे दा बरदान नी मिलया होदा, जडियां उनी कदी भी नी सिखियां होन। 31 हर कुसी जो लग-लग भाषा दा मतलब दसणे दा बरदान नी मिलया, जडियां उनी कदी नी सिखियां। इस ताँई पबित्र आत्मा ला बडे ला बडा बरदान पाणे दी इच्छा रखा! पर मै हुण तुसां जो दसणा की इदे ला भी खरा क्या है।

**13** अगर मै माणुआं, कने स्वर्गदूतां दी भाषा बोले, कने मै लोकां सोगी प्यार ना करे, ताँ मेरा बोलणा ठण-ठण करदी पितल कने छण-छण करदी झांझ साँई है। 2 कने अगर मै परमेश्वरे दा संदेश देई सके, कने सारे भेदां कने हर तरा दे ज्ञाने जो समझी सके, कने ऐथु दीकर की मेरा परमेश्वरे पर पूरा भरोसा हो की, मै पहाडे जो हटाई दे, पर दुज्जे सोगी प्यार नी करे, ताँ मेरी कोई कीमत नी। 3 कने अगर मै अपनी सारी जमीन जायदाद गरीबां जो बंडी दे, या उना जो अपना शरीर फुकणे ताँई देई दे, कने दुज्जे सोगी प्यार नी करे, ताँ इदे ला मिजो कोई फायदा नी। 4 जडे लोक दुज्जयां सोगी प्यार करदे न, सै सब रखणेवाले कने दयालू होदे न, सै लोक जलन नी करदे; कने ना सै अपनी बडाई करदे न कने न अपने बारे च घमंड करदे। 5 सै लोक कुसी सोगी भी बुरा व्यवहार नी करदे, सै अपनी ही खुशी दे बारे च ही नी सोचदे, सै झट गुस्सा नी करदे, कने सै उना बुरियां गल्लां जो याद नी रखदे, जडियां उना दे खिलाफ कितियां होन। 6 जालू लोक बुरे कम्म करदे न ताँ सै खुश नी होदे, पर सै तालू खुश होदे जालू लोक सही कम्म करदे न। 7 सै कदी हार नी मदे, प्यार सांझो हर तरा दे हालातां च परमेश्वरे पर भरोसा करणा कने आस रखणे दे काबिल बणादा है, ऐ दुख कने परेशानियां च सबर रखणा सिखांदा है। 8 सै बकत ओणा जालू लोकां परमेश्वरे दे संदेश दा प्रचार होर-होर भाषा च नी करणा, कने परमेश्वरे दे बारे च खास ज्ञाने दी जरूरत नी होणी, पर प्यार हमेशा ताँई बणी रेणा। 9 क्योंकि साडा खास ज्ञान कने परमेश्वरे दे संदेश दे बारे च प्रचार करणे दी शक्ति, दोनो अश्रूयां न। पर जालू उनी ओणा है जडा पूरा कने सिद्ध है, तालू जडा अधुरा है उदी जरूरत नी रेणी। 11 ऐ इक माणुऐ दे बडे होणे साँई। जालू मै इक बच्चा था, ताँ मै बच्चे साँई बोलदा कने सोचदा समझदा था, पर जालू मै बडा होई गया, ताँ मै बचपने दे तरीके छडी दिते। 12 इसा जिन्दगी च असां सब कुछ पूरी तरा नी समझदे न। ऐ तियां है जियां कोई माणु अपनी शकल धुन्दले सीसे च दिखदा है। पर जालू असां स्वर्ग च जांटे न, तालू असां सब कुछ साफ-साफ समझणा। ऐ कुसी सोगी आणणे सामणे गल्ल करणे साँई होणा। हुण असां सब कुछ जाणदे न जडा परमेश्वर सांझो सिखाणा चांदा है। तालू असां सब कुछ जाणी जाणा, जियां परमेश्वर सांझो जाणदा है। 13 इस ताँई हुण असां तिन गल्लां जो

करने दे: परमेश्वरे पर भरोसा रखा, परमेश्वरे दे बायदे पर आस रखा। पर इना गल्लां च सारयां ला बडी गल्ल इक दुज्जे ला कने परमेश्वरे ला प्यार करणा।

**14** इक दुज्जे ला प्यार करणे दी कोशिश करा, कने पबित्र आत्मा दे बरदान पाणे दी बडी इच्छा रखा, खासकर परमेश्वरे दा संदेश देणे दा बरदान पाणे दी इच्छा रखा। 2 क्योंकि जडा होर-होर भाषां च गल्लां करदा है, उसा भाषा जो कोई नी समझी सकदा, सै माणुऐ ला नी, पर परमेश्वरे ला गल्लां करदा है। इस ताई कोई भी नी समझदा की सै क्या बोला दा है, क्योंकि सै पबित्र आत्मा दिया शक्तिया ला गुण गल्ला बोलदा है। 3 पर जडा भविष्यवाणी करदा है, सै भरोसा करणे बाले लोकां जो उना दे भरोसे च मजबूत करदा, कने उना दे मना जो होंसला कने तसल्लती देणे ताई सहायता करदा है। 4 होर-होर भाषां च गल्लां करणे बाला माणु अपने आप दा भरोसा मजबूत करदा है, पर जडा भविष्यवाणी करदा है, सै कलीसिया दे सारे भरोसा करणे बाले लोकां दे भरोसे जो मजबूत करदा है। 5 मै चांदा है, की तुसां सारे होर भाषा च गल्लां करा, पर इसला बडिया गल्ल ऐ की तुसां भविष्यवाणी करा। क्योंकि सै जडा भविष्यवाणी करदा है, उस होर भाषा च बोलणे बाले ला, जडा मतलब दसयो बिना होर भाषा च बोलदा है, बेहतर है क्योंकि मतलब पता लगणे ला ही कलीसिया दे लोकां दी तरक्की होई सकदी है। 6 इस ताई हे मसीह भाईयो, अगर मै तुहाडे बाल आई करी होर भाषा च गल्लां करे, कने इदा मतलब नी समझाई सके तां इदे ला तुहांजो क्या फायदा होणा? इदे बदले अगर मै तुहांजो सै दस्से जिदा परमेश्वरे मिजो प्रकाशन दितया, या सच्चाईया दा ज्ञान, भविष्यवाणियां, या उपदेश दियां गल्लां दस्से, इदे ला तुहांजो जादा फायदा होणा। 7 इयां ही अगर कोई बिण या बंसरी बजांदा है, कने अगर इना दिया अबाजा च कोई फर्क नी है, तां बाकियां कियां पछेणना की ऐ बिण या बंसरी है? 8 कने अगर लडाई दे बकत तुरही दी अबाज साफ नी सुणुऐ, तां सिपाई लडाईऐ ताई तैयार नी होई सकदा। 9 इयां ही, जालू तुसां ऐसे शब्द बोलदे न जिना जो लोक समझी नी सकदे न, तां ऐ होआ च गल्लां करणे साई है कने जडा तुसां बोला दे न उदी कोई कीमत नी होणी। 10 इस संसारे च मतियां लग-लग भाषां न कने हर भाषा दा अपना मतलब है। 11 पर अगर असां उस भाषा दा मतलब नी समझदे न, जडे दुज्जे बोलदे न, तां ऐ ऐसा होणा मन्ना की सै साडे ताई परदेसी न, कने असां उना ताई परदेसी न। 12 इस ताई जालू तुसां आत्मिक वरदान पाणे दी इच्छा रखदे न, तां पबित्र आत्मा तुहांजो बरदान दिन्दा है, तां उना बरदान दा इस्तेमाल करणे ताई कोशिश करदे रिथा ताकि इना बरदान ला कलीसिया दे लोकां दा भरोसा होर जादा मजबूत हो। 13 इस ताई जडे होर भाषा च परमेश्वरे ला गल्लां करदे न, सै प्राथना करन की जडा सै बोला दे न उदा मतलब दुज्जयां जो समझाई सकन। 14 क्योंकि जालू मै होर भाषा च प्राथना करे, तां मेरी आत्मा प्राथना करदी है, पर मेरा मन इसयो नी समझदा है। 15 कने इसा बजा ला जालू मै प्राथना करे तां मै पबित्र आत्मा दी अगुवाई च प्राथना करे, पर मै ऐ भी चांदा है की दुज्जे लोक समझी सकन की मै क्या बोला दा है। कने जालू मै भजन गां ता सै भी पबित्र आत्मा दी अगुवाई च हो, पर ऐ भी जरूरी है की जडा मै भजन गा दा है सै भी दुज्जे लोक समझन। 16 मना की कोई आम बन्दा तुहाडिया अराधना च है कने तुसां अपनी आत्मा ला परमेश्वरे दी अराधना करा दे न। अगर सै तुहाडियां गल्लां जो नी समझदा, तां तुहाडा परमेश्वरे जो धन्यवाद देणे बाद, उसयो कियां पता लगणा की आमीन कालू बोलणा जिस बारे च तुसां बोलया। 17 तू तां सही ढंगे ला परमेश्वरे दा धन्यावाद करदा हौगा, पर इदे ला दुज्जे लोकां दा भरोसा मजबूत नी हौंदा। 18 मै अपने परमेश्वरे दा धन्यवाद करदा है, की मै तुसां ला जादा होर भाषा च गल्लां करदा है। 19 पर जालू मै कलीसिया दे लोकां च हौंदा है, तां मेरे ताई ऐई खरा है की उना जो सिखाणे ताई समझणे दे पंज अखर बोलें जडे सै समझी सकन। ना कि इदे बजाए होर भाषा च दस हजार गल्लां बोलें, जिना जो कोई नी समझे। 20 हे मसीह भाईयो, तुसां इना गल्लां जो समझणे ताई बचयां सांई मत बणा; पर बुवाईया ताई बचयां सांई मासूम बणा, पर इना गल्लां जो समझणे ताई सियाणे बणा। 21 पबित्र शास्त्र च लिखया है, की प्रभु बोलदा है की, “मै बिदेशी कने अजनबी लोकां दे जरिये अपने लोकां ला गल्लां करणियां, जिना अजीब या लग भाषा बोलणियां, तमी उना मेरियां गल्लां नी सुणनियां।” 22 इस ताई होर भाषां भरोसा करणे बालयां ताई नी, पर भरोसा नी करणे बालयां ताई इक निशाण

है, कने परमेश्वरे दे संदेश दसणा भरोसा नी करणे बालयां ताई नी, पर भरोसा करणे बालयां ताई इक निशाण है। 23 इस ताई अगर कलीसिया दे लोक इक जगा गिठे होंन, कने सारे होर भाषा च परमेश्वरे ला गल्लां करन, कने कोई जडे ऐ भाषा नी समझदे होन या कोई भरोसा नी करणे बाले अंदर आई जान तां उना पक्का सोचना की तुसां पागल होई गियो न। 24 पर अगर सारे परमेश्वरे दे संदेश दसणा लग्गे, कने अगर कोई भरोसा नी करणे बाला या इस बरदान दे बारे च अनजान माणु अंदर आई जा, तां उसयो ऐहसास होई जाणा की सै पापी है, कने उनी अपनी जिंदगी तुसां दे बोलणे दिया बजा ला बदली देणी। 25 परमेश्वरे दे शुभसमाचार दिया बजा ला उसयो उदी बुराई कने उदे मने दे बुरे बिचारां दा ऐहसास होणा, कने उसयो ऐहसास होणा की सै पापी है कने उनी पापां दा पछताप करणा, कने गोडे भार बेईकरी परमेश्वरे दी अराधना करणी। कने मन्नी लेणा की, सच्ची परमेश्वर तुहाडे बिच है। 26 इस ताई हे मसीह भाईयो, सुणा तुहांजो क्या करणा चाईदा? जालू तुसां अराधना ताई गिठे होंदे न, तां तुसां चे इकी माणुऐ प्रभु दे भजन गाऐ, कने इक ही परमेश्वरे दे दितयो प्रकाशन दस्से, कने इक ही होर भाषा च परमेश्वरे ला गल्लां करे, कने होर दुज्जे इदा मतलब दसन। ऐ सारा कुछ तुहांजो भरोसा करणे बाले लोकां जो मजबूत करणे ताई करणा चाईदा। 27 अगर होर भाषा च परमेश्वरे सोगी गल्लां करणियां चांदे न, तां सिर्फ दो या तिन जणे बारी-बारी बोलन, कने इक माणु इना भाषा दा मतलब दसणे बाला होणा जरूरी है। 28 पर अगर होर भाषा दा मतलब दसणे बाला कलीसिया च कोई नी है, तां सै माणु कलीसिया च चुप रे, कने अपने मने च परमेश्वरे ला गल्लां करे। 29 परमेश्वरे दा संदेश देणेबालयां चे दो या तिन ही परमेश्वरे दा संदेश देन, कने बाकी लोक ऐ दीखन की जडा सै बोला दे न सै पबित्र शास्त्रे अनुसार ठीक है की नी है। 30 पर अगर कुसी दुज्जे माणुऐ जो जडा कलीसिया च बैठया हो, उसयो परमेश्वरे दिया तरफा ला कोई संदेश मिल्ले, तां जडा पेहले बोलणा लगया हो सै चुप होई जाऐ कने उसयो बोलणा दे। 31 क्योंकि तुसां सारे परमेश्वरे दा संदेश देई सकदे न, पर इक-इक करिरी, ताकि हर कोई सिखे कने सारयां जो हिम्मत मिल्ले। 32 कने परमेश्वरे दा संदेश देणेबाला अपने आप पर काबू रखे; सै अपणिया इच्छा ला बोली सके कने अपणिया इच्छा ला बोलणा बंद भी करी सके। 33 क्योंकि परमेश्वर गडबडी दा नी पर शांति दा परमेश्वर है। इसी नियमे जो परमेश्वरे दियां सारियां कलीसियां मंदियां न। 34 जनानिया कलीसिया च चुप रेंन, क्योंकि उना जो गल्लां करणे दा हुकम नी है, पर अधीन रेणे दा हुकम है। जियां मूसा दिया व्यवस्था च भी लिखया है। 35 अगर सै कुछ सिखणा चांदिना न तां सै कलीसिया च जादा सबाल जबाब ना करन, पर घरे जाई करी अपने घरे बाले ला पछन, क्योंकि जनानिया दा कलीसिया च गल्लां करणा सही नी है। 36 ऐसा क्या है की तुसां चे कुछ लोक पेहले दसियो व्यवस्था जो नी मण्णा चांदे? क्या तुहांजो लगदा है की तुसां पेहले न जिना जो परमेश्वरे दा बचन दितया है? या सिर्फ ऐ तुहांजो ही दितया था? 37 अगर कोई माणु अपने आप जो परमेश्वरे दा संदेश देणेबाला या ऐसा माणु समझे जिसयो पबित्र आत्मा बरदान दितया हो, तां ऐ समझी लिया की, जडियां गल्लां मै तुहांजो लिखियां न, सै प्रभु दा हुकम है। 38 अगर कोई माणु मेरियां लिखियां गल्लां जो ना मन्ने, तां तुसां भी उदियां बोलियां गल्लां मत मन्ना। 39 हे मसीह भाईयो, परमेश्वरे दा संदेश देणे दी इच्छा रखा कने होर भाषा च परमेश्वरे ला गल्लां करणे ताई कुसी जो भी मना मत करा। 40 पर जडा कुछ भी तुसां अराधना करदे बकत करदे न, उना सारियां गल्लां जो पुरे सभ्य तरीके ला करा।

**15** हे मसीह भाईयो, मै तुहांजो सै ही शुभसमाचार याद करांदा है, जडा मै पेहले सुणाई बैटया है, जिस पर तुसां पेहले भरोसा भी किता था कने जिदे च तुसां टिकयो भी न। 2 अगर तुसां उस शुभसमाचार पर जिदा मै प्रचार किता, तुहाडा भरोसा उस पर बणी रेंगा तां परमेश्वरे तुहाडा उदार करणा; अगर तुहाडा भरोसा कमजोर होई जांगा तां उदी कोई कीमत नी कने सै बेकार है। 3 इसा बजा ला मै तुहांजो सारयां ला जरूरी संदेश दसया, जडा मिंजो प्रभु यीशु मसीह ला मिलया। कने सै संदेश ऐ है पबित्र शास्त्रे दे बचने अनुसार यीशु मसीह साडे पापां ताई मरी गिया। 4 कने धरती च दबया; कने पबित्र शास्त्रे दे अनुसार त्रिऐ रोजे मरयां चे जिन्दा भी होई गिया। 5 कने फिरी सै पतस जो मिल्ला कने उदे बाद सै



बारं चेलयां जो मिल्ला। 6 फिरी उदे बाद से पंज सौ ला जादा चेलयां जो मिल्ला, जिना चे मते लोक हले दीकर जिंदे न पर केई मरी गियो न। 7 फिरी उदे बाद याकूबे जो मिल्ला कने सारे चुणयो प्रेरितां जो भी मिल्ला। 8 कने सारयां ला बादे च उनी अपने आप जो मिंजो पर प्रगट किता, जडा उस बच्चे साईं है जिना जन्म सही बकत पर नी होया हो। 9 क्योंकि मैं प्रेरितां च सारयां ला घट खास है, बल्कि प्रेरित बणने जोगा भी नी है, क्योंकि मैं परमेश्वरे दिया कलीसिया दे लोकां जो सताया था। 10 पर अगर अज मैं प्रेरित है तां सै परमेश्वरे दा अनुग्रह है: कने उनी जडा अनुग्रह मिंजो पर कितया है, सै बेकार नी होया। पर मैं उना दुज्जे प्रेरितां ला जादा बदीकरी मेहनत किती; तमी ऐ मेरिया तरफा ला नी होया, पर परमेश्वरे दे अनुग्रह मेरी बड़ी सहायता किती की मैं उदा कम्म करी सकें। 11 इस ताई अगर चाऐ मैं है, या दुज्जे प्रेरित न, असां सारे मसीह दे बारे च प्रचार करदे न, कने इसी पर तुसां भरोसा किता। 12 हुण मैं तुहांजो ऐ बोल्णा चांदा; क्योंकि असां सारयां तुहाडे बिच ऐई प्रचार किता की जालू मसीहा मरया तां परमेश्वरे उसयो जिन्दा किता, तां तुसां चे कोई भी ऐ ना बोले की परमेश्वरे भरोसा करणे बाले दे मरणे बाद उना जो जिन्दा नी करणा। 13 अगर मरणे बाद जिन्दा होणा नी होंदा, तां फिरी मसीह भी मरयां चे जिन्दा नी होया। 14 कने अगर मसीह मरयां चे जिन्दा नी होया, तां जिस संदेश दा असां प्रचार करदे न कने मसीह पर तुहाडा भरोसा करणा दोनो बेकार न। 15 इसला भी बदीकरी ऐ की असां परमेश्वरे दे झूठे गबाह साबित होआ दे न क्योंकि असां उदे बारे च ऐ गबाई दीतियो है की उनी मसीह जो मरयां चे जिन्दा कितया है, पर अगर मरयो असल च जिन्दे नी होदे न तां परमेश्वरे मसीह जो भी जिन्दा नी कितया है। 16 अगर मरयो लोक मौत ला बाद जिन्दा नी होंदे न, तां मसीह भी मौत ला बाद जिन्दा नी होया है। 17 कने अगर मसीह जिन्दा नी होया, तां मसीह पर तुहाडा भरोसा करणा बेकार है; कने तुसां हले दीकर भी अपने पापां च जिया दे न। 18 अगर मसीह मरयां चे जिन्दा नी होया है, तां जडे मसीह च भरोसा करणे बाले लोक मरी गियो न, सै बचायो नी न, बल्कि नाश होई गियो न, मतलब की ऐ की हमेशा ताई परमेश्वरे ला लग होई गियो न। 19 अगर असां सिर्फ ऐथू दी जिन्दगिया ताई मसीह पर आस रखदे न, तां इस संसारे दे माणुऐ ला साडी हालत जादा बुरी है। 20 पर सच्चाई ऐ की परमेश्वरे मसीह जो सारयां ला पेहेले मरयां चे जिन्दा कितया है, सै इसा गल्ला दा सबूत है उनी सै जिन्दे करणे जडे मरी गियो न। 21 इस ताई जियां इक माणु आदम दे जरिये मौत इस संसारे च आई कने हुण मरयां दा जिन्दा होणा भी इक माणुऐ जरिये है मतलब की यीशु मसीह जरिये शुरू होया है। 22 जियां आदम दिया बजा ला सारयां दी मौत होंदी है, क्योंकि असां उदे बंश न, तियां ही दुज्जे माणु मतलब की मसीह सोगी जितणे भी लोक जुडयो न, उना सारयां मरयां चे जिन्दे होई जाणा है। 23 पर हर इक जणा अपणिया-अपणिया बारिया पर जिन्दा होणा; इदा सबूत ऐ है की मसीह सारयां ला पेहेले जिन्दा किता, फिरी जालू मसीह मुडी करी ओणा है, तां जडे लोक उदे सोगी मजबूत रिशता रखदे न उना जो मरयां चे जिन्दा करणा है। 24 कने फिरी जालू मसीह परमेश्वरे दा बिरोध करणे बालियां सारियां बुरिया शक्तियां दा नाश करी देणा उदे बाद संसारे दा अंत होई जाणा। तालू मसीह अपने पिता परमेश्वरे जो अपना राज्य सौंपी देणा ताकि सै उस पुरे तरीके ला राज्य करे। 25 पर जालू दीकर परमेश्वर उदे सारे दुशमणा जो पुरे तरीके ला राई नी दे, तालू दीकर मसीहा जो उस राज्य पर राज करणा चाईंदा। 26 सारयां ला आखरी दुशमण खत्म करी देणा है, सै मौत है। 27 पबित्र शास्त्र च भजनकार लिखदा है की, “परमेश्वरे सब कुछ मसीह दे अधिकारे थले करी देणा है,” पर इदे च परमेश्वर अपु शामिल नी है क्योंकि सै ही है जिनी मसीह जो अधिकार दितया था। 28 कने जालू सारा कुछ मसीह दे मतलब की पुत्रे दे अधीन होई जाणा, तां पुत्रे भी अपु जो परमेश्वरे दे अधीन करी देणा। ताकि परमेश्वर जिनी अपने पुत्रे जो सारियां चीजां पर हक दितया है, ताकि परमेश्वर ही सारयां ताई सारा कुछ होणा। 29 अगर मरयो लोक जिन्दे नी होंदे तां उना दा क्या होणा, जडे मरयो लोकां ताई बपतिस्मा लेदे न? अगर परमेश्वर मरयो लोकां जो जिन्दा नी करदा तां लोक हुण भी ऐसा कजो करदे न? 30 अगर मरयो लोकां दा जिन्दा होणा नी होंदा है, तां ऐ साडे ताई मुखता दी गल्ल है की असां अपने आपे जो बार-बार कजो खतरे च पांदे रेंदे? 31 हे मसीह भाईयो, जियां ऐ गल्ल पक्की है की तुसां दे यीशु मसीह ला जुडने दिया

बजा ला मैं घमंड करदा है, तां ऐ गल्ल भी पक्की है की मिंजो हर रोज मरणे दा खतरा है। 32 ऐथू इफिसस शेरें च जिना लोकां मेरा जंगली जानवरं साईं बिरोध किता, कने जडे दुख उना मिंजो दिते उना जो सेहन करणे दा क्या फायदा होया? कुछ भी नी! अगर ऐ सचच होंदा की मरयो लोक दुबारा जिन्दा नी होंदे न, तां खरा होंदा की मैं उना लोकां दी गल्ल मन्नी लेंदा जडे ऐ बोलेदे न की, “ओआ असां खांदे-पिंदे क्योंकि अगर असां कल मरी गे तां सब कुछ खत्म होई जाणा।” 33 जडे इयुदियां गल्लां करदे न उना ला मुखं मत बणदे, “बुरी संगती खरे चरित्र जो बिगाडी दिन्दी है।” 34 तुसां होसा च ओआ कने पाप करणा छडी दिया; मैं तुहांजो ऐ गल्ल शरमिंदा करणे ताई बोला दा है, क्योंकि तुसां बिच केई ऐसे न जिना दा परमेश्वरे सोगी रिशता ठीक नी है। 35 उदाहरण ताई अगर तुसां चे कोई पुच्छे की, “कियां परमेश्वर मरयां जो जिन्दा करदा या उना दा शरीर कदिया होणा,” 36 जडा भी इस तरीके दे सबाल पुछदा है तां सै मुखं है। तुसां जाणदे न की इक बी जालू उसयो जमिना च रांदे न, तां सै जालू दीकर सडी नी जांदा है, अंकुरित नी होंदा है। 37 अगर तुसां धान या कोई होंर भी रांदे न, तां तुसां पेहेले ला ही उगया बूटा नी लांदे न, बल्कि सिर्फ इक बी रांदे न। 38 पर परमेश्वर अपणिया इच्छा अनुसार उसयो बूटे दा रूप दिन्दा है; कने हर किस्मा दे बी अपने स्पे च बददे न। 39 संसार च सारे प्राणियां दा शरीर इकोदिया नी हुंदा, माणुआं दा शरीर डंगरां साईं नी हुंदा; चिडुआं पखेरूआं दा शरीर मछियां साईं नी हुंदा। 40 कने जियां संसार दे प्राणिया दे शरीर केई तरा दे होदे न, तियां ही अम्बरे च भी है, जियां की सूरज, चाँद कने तारे। आसमाने दियां चीजां दी सुन्दरता इको देई होंदी, कने धरती दियां चीजां चे इक होर तरा दी सुन्दरता होंदी है। 41 सूरजे दी सुन्दरता लग है, चन्द्रमे दी सुन्दरता लग है, कने तारयां दी सुन्दरता लग है, क्योंकि इक तारे ला दुज्जे तारे दी सुन्दरता च फरक है। 42 इस ताई जालू मरयां लोकां दुबारा जिन्दे होणा, तालू उना सोगी भी ऐसा होणा। जिस शरीर जो सै दफनांदे न, सै ऐसा शरीर है जडा सडी जांदा है, पर जालू ऐ दुबारा जिन्दा होंदा है, तां ऐ ऐसा शरीर होणा है जडा सडी नी सकदा है। 43 जालू असां मरी जांदे न, तालू साडा शरीर बदसूरत कने कमजोर होंदा है, पर जालू उना मरयां चे जिन्दा होणा, तां उना छेल कने ताकतवर होणा। 44 जियां साडे बाल मास कने खुने दा शरीर है, इयां ही ऐसे शरीर भी न जिना जो परमेश्वरे दी आत्मा जरिये जिन्दगी मिलदी है; साडे ऐ मास कने खुने दे शरीर उना शरीर च बदलई जाणा जिसयो परमेश्वर दी आत्मा जरिये जिन्दगी मिलदी है। 45 पबित्र शास्त्र च भी लिखया है, “पेहला माणु, मतलब की आदम, जिन्दा माणु बणया” कने आखरी आदम, मतलब की यीशु मसीह हमेशा दी जिन्दगी देणेवाला बणया। 46 सारयां ला पेहला मांस कने खुने दा शरीर आया, फिरी सै शरीर आया जिसयो परमेश्वरे दिया आत्मा जिन्दगी दिती। 47 पेहला माणु आदम था धरतिया ला मतलब की मीटिया दा बणया था। दुज्जा माणु मसीह है जडा स्वर्ग ला आया है। 48 संसारे दे पेहेले माणु आदम साईं न जडा मीटिया दा बणया था, पर जडे स्वर्ग दे लोक न, सै स्वर्ग ला आयो माणु मतलब की मसीह साईं न। 49 असां सारयां बाल आदम दा रूप है जिसयो मीटिया ला बणया था, इयां ही इक रोज सांझो मसीह दा रूप भी मिलणा, जडा स्वर्ग ला आया था। 50 हे मसीह भाईयो, मैं तुसां जो बोलदा है, इसा धरती पर साडे शरीर मांस कने खुने ला बणयो न; असां स्वर्ग च परमेश्वरे दे राज्य च अपने इस शरीर सोगी नी रेई सकदे जडा मरी सकदा है, क्योंकि ओथु कोई भी मौत नी है। 51 इस भेद दिया गल्लां जो सुणा, साडे चे कुछ भरोसा करणे बालयां केई लोकां नी मरणा। ऐ सारियां गल्लां पलक झपकदे ही होई जाणियां न। जालू आखरी तरुही बजाई जाणी, तां जडे लोक मरी गियो न, सै हमेशा दी जिन्दगी ताई दुबारा जिन्दे करणे न कने असां जडे जिन्दे न, साडे शरीर बदलई जाणे। 53 क्योंकि साडा शरीर जडा तोल्लनी ही मरणे बाला कने सडने बाला है, जरूरी है की ऐ इक ऐसे शरीर च बदलई जा जडा कदी नी मरदा कने सडदा हो। 54 कने जालू ऐसा होणा तालू ऐ गल्ल पुत्री होई जाणी जडी परमेश्वरे पबित्र शास्त्र च लिखियो च, “मौत जो हराई देणा कने उना कदी नी रेणा।” कने इयां पबित्र शास्त्र च लिखिया पूरा होई जाणा। 55 “हे मौत तेरी जित कथु है? हे मौत तेरा डंक कथु रिया?” इस तरीके ला पबित्र शास्त्र च जडा लिखिया था सै पूरा होया। (Hades 986) 56 क्योंकि पाप ऐसा डंक है जिना नतीजा मौत है, कने व्यवस्था दिया बजा ला पाप दी शक्ति साडिया जिन्दगिया च

औदी है। 57 पर परमेश्वरे दा धन्यबाद हो, जडा सांझो साडे प्रभु यीशु मसीह दे मरणे जरिये पाप कने मोत पर जितांदा है। 58 इस तांई हे मेरे मसीह भाईयो, अपने भरोसे च मजबूत रिया कने कोई तसां जो न भडकाए, कने प्रभु दे कम्मा च हमेशा बदे जा, क्योंकि तसां ऐ जाणदे न की तसां प्रभु तांई मेहनत करदे न कने सै बेकार नी है।

**16** यरूशलेम शेहरे दे परमेश्वरे दे पबित्र लोकां दी सहायता तांई जडा चंदा तसां गठेरया, इदे बारे च तसां मिजो ला सुआल पछया था, कने हण मैं इदे बारे च बोलणा चांदा है, इदे बारे च जडियां गल्लां मैं गलातिया प्रदेशे दिया कलीसिया दे लोकां जो करणे तांई बोलया था तसां भी इयां ही करा। 2 हर तुओरे बाले रोजे तसां चे हर इक माणु अपणिया कमाईया चे कुछ पैसे कडी करी लगा रखी ले, ताकि जालू मैं ओगा तां उस बकत तसां जो दान गिठा करणे च परेशानी ना हो। 3 कने जालू मैं ओथु रेंगा तां मैं उना लोकां जो भेजगा जडे तुहाडिया नजरा च भरोसेमंद न की सै यरूशलेम शेहर जो दान लेईकरी जान। मैं उना सोगी इक चिट्ठी भी भेजी दिंगा ताकि ओथु दे भरोसा करणे बाले लोकां ने उना दी पछेण कराई सके। 4 अगर तसां जो लगा दा है की मिजो जाणा चाईदा, तां सै मेरे सोगी जाई सकदे न। 5 कने मैं मकिदुनिया प्रदेशे च जाणे बाद आई करी तुहांजो ने मिलणा है। क्योंकि मैं मकिदुनिया प्रदेशे जो जाणे दी योजना बना दा है। 6 पर होई सकदा की कुछ लम्बे बकते दीकर मैं तुहाडे सोगी रें, या होई सकदा की सर्दियां तुहाडे बाल कटें, कने उदे बाद मेरिया अगलिया यात्रा तांई तसां मिजो भेजी सकदे न। 7 मैं नी चांदा की मकिदुनिया प्रदेशे च जादे बेले सिर्फ कुछ बकते तांई तसां सोगी रें। अगर प्रभु दी इच्छा होई तां मैं आस रखदा है की कुछ लम्बे बकते दीकर ओथु तसां सोगी रें। 8 पर मैं पेन्तिकुस्त त्योहारे दे रोजे दीकर इफिसस शेहरे च ईरेणा। 9 क्योंकि हल्ले भी ऐथु मते लोक न जडे परमेश्वरे दा बचन सुणना चांदे न, मेरा ऐथु रेंगा बडा जरूरी है। हालांकि ऐथु मते लोक ऐसे न जडे मेरा बिरोध करदे न। 10 अगर तीमुथियस तुहाडे बाल कुरिन्थस शेहरे च ओगा, तां उदी खातिरदारी इज्जता ला करनयो, क्योंकि सै मेरे सांई प्रभु दा कम्म करदा है। 11 इस तांई कोई उदी बेईजती ना करे, पर यात्रा तांई जरूरतां दियां चीजां देईकरी बिदा करा, ताकि सै मेरे बाल आई जा; क्योंकि मैं उदी कने दुज्जे भरोसा करणे बाले भाईयां जो भी नियाला दा जडे उना सोगी आयो न। 12 कने मैं मसीह भाई अपुल्लोस ला बडी बिनती किती है की सै भी होर भरोसा करणे बालयां सोगी तुहांजो ला मिलणा ओए, पर सै इस बकत नी ओणा चांदा, पर जालू उसयो खरा मोका मिलगा, तालू उनी आई जांगा। 13 साबधान रिया, लगातार भरोसा करदे रिया, साहसी माणु बना, कने परमेश्वरे सोगी अपने रिशते जो मजबूत रखा। 14 तसां जडा कुछ भी करदे न सै प्यारे ला करा। 15 हे मसीह भाईयो, तसां स्तिफनास जो कने उदे परिबारे जो जाणदे न की, उना अखाया प्रदेशे च उना ही सारयां ला पेहले मसीह पर भरोसा कितया था, कने सै परमेश्वरे दे लोकां दी सहायता तांई तैयार रेदे न। 16 इस तांई मैं तुहांजो ने बिनती करदा है की ऐसे अगुवां दियां गल्लां मन्ना, बल्कि ऐसे सारे लोकां दी सुणा जडे प्रभु दी सेबा जो बडी मेहनता कने बडी भक्ति ला करदे न। 17 कने मैं स्तिफनास फूरतनातुस कने अखईकुस मसीह भाईयां दे मेरे बाल ओणे ला खुश है, क्योंकि उना मेरी सै सहायता किती, जिसा जो करणे तांई तसां ऐथु नी थे। 18 कने उना मेरे मने जो हिम्मत दिती ठीक तियां ही जियां उना तुहाडे तांई भी करणा जालू उना तुहाडे बाल ओणा। इस तांई तुहांजो भी ऐदे लोकां दी इज्जत करणी चाईदी। 19 आसिया प्रदेशे दिया कलीसिया दे लोकां दिया तरफा ला तुहांजो नमस्कार; अक्विला कने उदी घरे बाली प्रिस्का दा कने उना दे घरे च गिठी होणे बाली कलीसिया दे मसीह भाई बेहणा दिया तरफा ला भी तसां जो प्रभु च नमस्कार। 20 ऐथु ला जितणे भी मसीह भाई बेहणा न, उना सारयां दिया तरफा ला तुहांजो नमस्कार। गले लगगी करी इक दुज्जे जो नमस्कार करा। 21 कने हुण मैं पौलुस, इसा चिठिया दे आखरी च अपने हथां ला इस नमस्कार जो लिखा दा है। अगर कोई प्रभु ला प्यार नी करे, तां सै श्रापित हो। 22 हे साडे प्रभु, आई जा! 23 मैं प्रार्थना करदा है साडा प्रभु यीशु मसीह तुहांजो पर अपना अनुग्रह करदा रे। 24 मैं तसां सारयां ला प्यार करदा है, जिना दा यीशु मसीह सोगी गेहरा रिशता है। आमीन।

## 2 कुरिन्थियों

**1** मैं, पौलस, परमेश्वर दिया इच्छा ला यीशु मसीह दा प्रेरित है, कने साडा मसीह भाई तीमथियुस मेरे सोगी मैं है। मैं ऐ चिठी कुरिन्थुस शेर च परमेश्वर दिया कलीसिया जो, कने अखाया प्रदेशे दे सारे परमेश्वर दे लोकां जो लिखा दा है। **2** मै प्राथना करदा की साडा पिता परमेश्वर कने प्रभु यीशु मसीह त्हांजो पर अनुग्रह करे कने त्हांजो शांति दे। **3** साडे प्रभु यीशु मसीह दे पिता कने परमेश्वर दा धन्यवाद हो, जडा सांझो पर दया कने सांझो हमेशा तसल्ली दिन्दा है। **4** सै सांझो साडे सारे दुखां च तसल्ली दिन्दा है; ताकि असां दुर्जयां दे दुखां च उना जो इयां ही तसल्ली देई सकन जियां परमेश्वर सांझो दुखां च तसल्ली दिन्दा है। **5** जितणा जादा असां यीशु मसीह तांई दुख सेहन करदे न, परमेश्वर मसीह दे जरिये उतणी ही जादा तसल्ली सांझो दिन्दा है। **6** असां दुख सेहन करदे न, ताकि परमेश्वर त्हांजो तसल्ली दे कने तुहाडा उद्धार करे। क्योंकि परमेश्वर सांझो तसल्ली दिन्दा है इस तांई उनी त्हांजो भी तसल्ली देणी क्योंकि त्हांजो बडे सबर सोगी साडे सांई दुख सेहन किते। **7** कने साडी आस तुहाडे बारे च पक्की है, क्योंकि असां जाणदे न, की जियां त्हांजो साडे दुखां च साथी थे, तियां ही त्हांजो साडिया तसल्लिया च साथी होणा, जडी परमेश्वर सांझो देणी। **8** हे मसीह भाईयो, मैं चांदा की त्हांजो साडिया उना मुसीबतां दे बारे च जाणा, जडियां आसिया प्रदेश च सांझो होईयां। असां ऐसे बोझो ला दबूई गियो थे, जडा सांझे सेहणे ला बाहर था, असां तां जिणे दी पूरी उम्मीद ही छडी दितियो थी। **9** असां तां अपने मने च ऐ सोची लिया था, की असां मरणे बाले न। ऐ इस तांई होया की असां अपने आपे पर नी पर परमेश्वर पर भरोसा रखन, जडा मरयां जो जिन्दा करदा है। **10** परमेश्वर ही सांझो इतणिया बडिया मुसीबता ला बचाया, कने बचाणा भी; कने सांझो ऐ आस है की उनी अग्रे भी बचादे रेणा है। **11** जियां त्हांजो साडे तांई प्राथना करिरी साडी सहायता करदे न, तियां ही मते लोकां दियां प्राथना ला सांझो परमेश्वर दियां आशीषा मीलियां न, उदिया बजा ला साडिया तरफा ला परमेश्वर दा धन्यवाद करनयो। **12** क्योंकि असां अपनी अंतरात्मा दिया सच्चाईया पर घमंड करदे न। संसार च कने खासकर त्हांजो लोकां बिच साडी जिन्दगी पबित्र कने सच्ची थी, जडा परमेश्वर दिया तरफा ला सांझो मेलिया था। असां माणुआं दे ज्ञान पर भरोसा नी रखया है, पर परमेश्वर दे अनुग्रह पर भरोसा रखया है। **13** असां हमेशा त्हांजो अपनी चिठियां च उना ही गल्लां जो लिखेदे न जडियां त्हांजो पढी कने मनीं सकन। भले ही त्हांजो हण इना गल्लां जो अच्छे ला नी समझदे, पर मिंजो आस है की प्रभु यीशु मसीह दे दुबारा मुडी ओणे दीकर त्हांजो इना गल्लां जो अच्छे ला समझणा कने मणणा ताकि उस रोज त्हांजो साडे पर तियां ही घमंड करन, जियां असां तुहाडे पर घमंड करदे न। **15** मिंजो इसा गल्ला दा भरोसा था की त्हांजो सांझो समझणा, इस तांई हण मै चांदा है की मै सारयां ला पहले तुहाडे बाल ओऐ ताकि तुहाडे बाल दो बरी ओणे ला त्हांजो दो गुणी आशीष मिलले। **16** मै सोचा दा था की तुहाडे बाले ला होईकरी मकिदुनिया प्रदेश जो जां, कने मकिदुनिया प्रदेशे ला बापस मुडदे फिरी तुहाडे बाल ओऐ, कने त्हांजो मिंजो यहूदिया प्रदेशे दीकर सफर करणे तांई समान देईकरी मेरी सहायता करनयो। **17** मेरी योजना ऐं थी। तां, क्या मैं बिना कुसी बजा दे ही अपना बिचार बदली दिता? क्या मैं संसारिक माणुआं सांई योजना बणादां है? क्या मैं इक बकत च, हां कने बादे च ना बोलदा है? **18** परमेश्वर पर भरोसा करी सकदे न, तियां ही त्हांजो भी सांझो पर भरोसा करी सकदे न, हालांकि असां तुहाडे बाल ओणे दा बायदा करा दे न। **19** क्योंकि परमेश्वर दा पुत्र यीशु मसीह जिदा प्रचार मै, सिलवानुस कने तीमथियुस दे जरिये तुहाडे बिच होया, सै प्रभु यीशु मसीह सच्चा है, क्योंकि उदे च कदी हां कने कदी ना बाली कोई गल्ल नी है, उदे च सिर्फ हां ही है। **20** क्योंकि पिता परमेश्वर दे जितणे भी बायदे न, सै सारे बायदे मसीह च पुरे होदे न कने इस तांई असां “आमीन” बोलदे, की साडे जरिये पिता परमेश्वर दी महिमा हो। **21** परमेश्वर ही है, जडा तुहाडे सोगी सांझो मसीह च मजबूत करदा है। परमेश्वर सांझो पर अपनी मोहर लाईकरी ब्याने दे स्पे च अपनी आत्मा साडे मना च रखीकरी सांझो अपने तांई चुणया। **23** परमेश्वर मेरिया इसा सच्चाईया दा गबाह है की मैं हले दीकर कुरिन्थुस शेर च इस तांई नी आया की, मैं त्हांजो दुख देणा

नी चांदा था। **24** इदा मतलब ऐ नी की, असां तुहाडे भरोसे पर अपना हक जानन, क्योंकि त्हांजो अपने ही भरोसे च टिकयो न। असां तां तुहाडिया खुशिया तांई तुहाडे सोगी न।

**2** मै अपने मने च ऐं ठाणी लिया था की मै इक बरी दुबारा ओथु आई करी त्हांजो दुख ना दे। **2** क्योंकि अगर मै ओथु आई करी त्हांजो दुखी करे, तां त्हांजो दे सिवा मिंजो खुशी देणे बाला होर कोई नी है, सिर्फ त्हांजो ही न जिना जो मै दुखी किता है। **3** कने मै ऐं गल्ल त्हांजो इस तांई लिखी, की कुथी इयां ना हो, की मेरे ओणे पर जिना ला मिंजो खुशी मिलणा चाईदी, सेई मेरे दुखी होणे दी बजा न बाणी जान। क्योंकि मिंजो त्हांजो पर इसा गल्ला दा भरोसा है की, जडी मेरी खुशी है, सेई त्हांजो सारयां दी भी खुशी है। **4** बडे दुखी मने ला, कने रोई-रोई करी ऐ चिठी मै त्हांजो लिखी है, इस तांई नी की, त्हांजो दुखी होई जा, पर इस तांई की त्हांजो उस बडे प्यार जो जाणी लिया, जडा मिंजो त्हांजो सोगी है। **5** अगर कोई दुखे दी बजा है, तां सै ऐ की जिनी माणुऐ ऐ सारियां पेशानियां खडियां कीतियां, उनी मिंजो दुखी करणे ला जादा त्हांजो सारयां जो दुखी किता है। मै इदे बारे च इसला जादा होर कुछ नी बोलणा चांदा। **6** ऐसे माणुऐ तांई ऐ सजा काफी है, जडी त्हांजो चे मते विश्वासी लोकां उसयो दितरी। **7** इस तांई इदे बजाए तां ऐ खरा है की उदिया गलतिया जो माफ करी दिया कने उसयो तसल्ली दिया। अगर त्हांजो उसयो माफ नी किता तां शायद सै इतणा दुखी होई जाए कने परमेश्वर पर भरोसा करणा बिलकुल ही छडी दे। **8** इसा बजा ला मै त्हांजो ला बिनती करदा है, की उसयो यकीन दिला की त्हांजो हले भी सच्ची उसला प्यार करदे न। **9** क्योंकि मै ऐ इस तांई भी लिखया था की, त्हांजो जो परखी लें की, त्हांजो मेरे सारे हुकमा जो मंदे न की नी। **10** जिसयो त्हांजो माफ करदे न उसयो मै भी माफ करदा है, क्योंकि जालू मिंजो माफ करणे दी जरूरत होंदी है, तां मै तुहाडे फायदे तांई मसीह दे हके सोगी ऐसा करदा है। **11** ताकि शैतान साडे हालातां दा फायदा ना लेई सके, क्योंकि असां उदे बुरे इरादे जो जाणदे न। **12** कने जालू मै मसीह दा शुभसमाचार सुणणे तांई नोआस शेर च आया, तां परमेश्वर मिंजो शुभसमाचार दा प्रचार करणे दे बडे मौके दिते। **13** तां मेरा अपना मसीह भाई तीतस तुहाडी खबर लेईकरी मेरे बाल नी आया, जिदे ला मेरे मने जो चेन नी मिला। इस तांई मै तीतस जो तोपणे तांई नोआस शेर दे मसीह लोकां ला बिदा लेईकरी मकिदुनिया प्रदेश जो चली गया। **14** पर परमेश्वर दा धन्यवाद हो, जडा मसीह सोगी साडे रिशते दिया बजा ला हमेशा साडे सोगी चलदा है, कने सांझो जिवांदा है। इदा मतलब है की असां जिथू भी जांदे न, असां शुभसमाचार दी खुशबू फेलांदे न, ताकि सारे लोक परमेश्वर जो जाणन कने सुणन। **15** क्योंकि असां परमेश्वर तांई मसीह दे जरिये बढायो धुपे सांई न। कने साडे जरिये प्रचार किताया संदेश सारे लोकां च फेलियो खुशबू सांई है, जडी उद्धार पाणे बाले, कने नाश होणे बाले लोकां बिच बिखरदी है। **16** पर ऐ खुशबू नाश होणे बालयां लोकां तांई तां मौता दी मुस्क है, जडी उना जो मौत दिया तरफा लेई जांदी है; पर उद्धार पाणे बाले लोकां तांई ऐ जिन्दगी दी ऐसी खुशबू है, जडी उना जो हमेशा दिया जिन्दगिया पासे लेई जांदी है। असल च कोई भी अपने आप ला इसा खुशबूआ जो फेलाणे दे काबिल नी है। **17** क्योंकि असां उना सांई नी न, जडे पैसयां तांई परमेश्वर दे बचना दा प्रचार करदे न; पर असां सच्चाईया ला परमेश्वर दे बचना दा प्रचार करदे न, ऐ जाणी करी की परमेश्वर सांझो दिखदा है।

**3** मै अपने बारे च इना गल्लां जो लिखी करी अपनी बडाई नी करा दा है। या कुछ होर माणुऐ सांई सांझो भी तुहाडे बाल सिफारिश दियां चिठियां लियोणे कने या तुहाडे ला लेणे दी जरूरत नी है। **2** त्हांजो अपु ही इक चिठिया सांई न जडी साडे तांई सिफारिश करदी है, जडी साडे दिले च लिखियो है, तुहाडी बदलुइयो जिन्दगी तुहाडे बिच साडे कम्मा दिया बजा ला है, जडा इक चिठिया सांई है जिसा जो हर कोई पढी सकदा है। **3** ऐ तां मिलदी गल्ल है, की तुहाडी बदलुइयो जिन्दगी इक चिठी है जडी मसीह लिखियो है, कने ऐ चिठी साडे कम्मा दा नतीजा था। सै स्याईया ला या पथरे दियां पटियां पर नी, पर जिन्दे परमेश्वर दिया आत्मा जरिये साडे दिले दियां पटियां पर लिखियो है। **4** असां ऐसा इस तांई बोलदे न क्योंकि असां मसीह दे जरिये परमेश्वर पर भरोसा रखदे न। **5** असां ऐ

नी बोलते न की साडे बाल अपु ला कुछ करणे दी काबलियत है। पर परमेवरे ही ऐ जडा सांझो इस काबिल बणादां है। 6 जिनी सांझो नोई बाचा दे सेबक होणे दे काबिल किता, कने मूसा दी व्यवस्था दे सेबक नी पर पबित्र आत्मा दे सेबक न, क्योंकि मूसा दी लिखियो व्यवस्था जो नी मनणे दी सजा मौत है, पर पबित्र आत्मा हमेशा दी जिन्दगी दिन्दी है। 7 मूसा दी व्यवस्था जालू इस्त्राएल दे लोकां जो दिती जडी पथरां दियां पटियां पर लिखियो थी, उस बकत परमेवरे दी महिमा प्रगट होई। इस्त्राएल दे लोक लम्बे बकते दीकर मूसा दे मूरे पासे नी दिखी सके क्योंकि सै चमका दा था, हालांकि सै जादी देर दीकर नी चमकदा रिया। अगर मौता पासे लेई जाणे बाली मूसा दी व्यवस्था पर आधारित सेवा इतणी तेजोमय थी, तां नोई बाचा पर आधारित सेवा होर भी जादा तेजोमय होणी। 9 क्योंकि जालू दोषी बणाणे बाली मूसा दी व्यवस्था तेजोमय थी, तां नोई बाचा जडी सांझो परमेवरे सामणे धर्मी बणांदि है तां सै होर भी जादा तेजोमय कनी होणी। 10 कने मूसा दी व्यवस्था जडी बडी तेजोमय थी, पर हण उस नोई बाचा दे तेज सामणे मूसा दी व्यवस्था दा कोई तेज नी रिया क्योंकि ऐ नोई बाचा दे मुकाले जादा तेजोमय नी है। 11 व्यवस्था उस तेज सोगी दितियो थी जडी घटदी जांदि थी, पर नोई बाचा दा तेज होर भी जादा बडी करी है क्योंकि ऐ हमेशा दीकर बणी रेंपी है। 12 इस तांई ऐसी आस रखीकरी असां हिम्मत सोगी बोलदे न। 13 कने असां मूसा सांई नी न, जिनी अपने मूरे पर परदा पाया था ताकि इस्त्राएली लोक उसा घटदी चमका जो गायब होदे ना दिखी लेंन। 14 पर इस्त्राएल दे लोकां दे मन कठोर होई गियो थे, क्योंकि अजे दीकर पुराणे नियम जो पढ़ने ला उना दे मने च सै ही पडदा पिया रेंदा है, पर सै परदा मसीह च भरोसा करणे ला उठी जांदा है। 15 कने अजे दीकर भी जालू कदी मूसा दी व्यवस्था पढी जांदि है, तां उना दे मने च परदा पेई रेंदा है इस तांई सै इसयो पुरे तरीके ला नी समझदे। 16 पर जालू सै प्रभु यीशु मसीह पर भरोसा करगे, तालू सै परदा उठी जाणा। 17 प्रभु तां आत्मा है: जिथू कुथी प्रभु दी आत्मा है, ओथू मूसा दी व्यवस्था ला अजादी है। 18 क्योंकि असां सारे इक सीसे सांई परमेवरे दे तेज जो ऐसे चेरयां ला दसदे न जिना पर परदा नी पिया है, तां परमेवरे सा-झो लगातर बाद दे तेज च जांदा ला जादा अपने सांई बणा दा है। ऐ तेज प्रभु ला ही मिलदा है, जडा पबित्र आत्मा है।

**4** इस तांई जालू सांझो पर परमेवरे दी ऐसी दया होई की, सांझो परमेवरे दे शुभसमाचार दा प्रचार करणे दी सेवा मिलली, तां असां हिम्मत नी छडदे न। 2 पर असां सरमा बाले गुण कम्मा जो भी करणा छडी दिता, कने ना असां चलाकी करदे न, कने ना ही परमेवरे दे बचना च मिलावट करदे न, बल्कि असां परमेवरे दे सामणे सिर्फ सचच सिखादे न। कने हर इक माणू इसा गल्ला दी गबाई देई सकदा है की ऐ सचच है। 3 अगर लोक उस शुभसमाचार जो नी समझी सकदे न जिदा असां प्रचार करदे न, तां ऐ सै लोक न जडे खत्म होणे बाले न। 4 कने उना भरोसा नी करणे बाले लोकां तांई, जिना दिया अकला जो इस संसारे दे ईश्वर शैताने अन्ना करी दितया है, इस तांई सै मसीह कने उदी महिमा दे बारे च शुभसमाचार जो नी समझी पांदे की मसीह परमेवरे दा रूप है। (aiōn g165) 5 क्योंकि असां अपने आपे दा नी, पर यीशु मसीह दा प्रचार करदे न की, यीशु मसीह ही प्रभु है। कने उनी ही सांझो तुहाडे सेबक होणे तांई भेजया है। 6 इस तांई परमेवरे बोलया की, “नेहेर च लौ चमके,” कने परमेवरे लौई सांई साडे मना च समझ दिती, ताकि असां परमेवरे दिया महिमा जो पछेणी सकन, जडी यीशु मसीह दे मूरे च मिलदी है। 7 असां उसा मीटिया दे भांडयां सांई न जिना च ऐ खजाना रखया है। इसला ऐ गल्ल साफ होई जांदि है की, ऐ असीम शक्ति साडिया तरफा ला नी है, पर परमेवरे दिया तरफा ला है। 8 असां चारो पासे ला परेशानियां ला धरियो रेंदे न पर कदी हार नी मंदे; धबगंदा तां हेन, पर हिम्मत नी छडदे। 9 असां सताये तां जांदे न, पर परमेवरे सांझो छडदा नी है; डापे तां जांदे न पर, पर परमेवरे सांझो खत्म नी होणा दिन्दा। 10 असां हमेशा उना दुखां जो अपने शरीर च महसूस करदे न, जडे दुख यीशुऐ मरदे बकत महसूस किते थे; ताकि जडा कम्म असां करदे न उदे जरिये लोक यीशु दी जिन्दगी जो दिखी सकन। 11 क्योंकि असां जिंदा यीशु दिया बजा ला मौत दे खतरे च रे, ताकि यीशुऐ दी जिन्दगी भी साडे मरणे बाले शरीर पर प्रगट होऐ। 12 इस तांई असां मौत दे खतरे च रेंदे न, पर इदिया बजा ला तुहांजो हमेशा दी जिन्दगी मिली। 13

पर असां प्रचार करदे रे क्योंकि सांझो च सेई भरोसा था, जदिया भजन लिखणे बाले च था, जालू उनी पबित्र शास्त्र च ऐसा लिखया की, “मै भरोसा किता, इस तांई मै बोलया।” असां भी भरोसा करदे न, इस तांई बोलदे न। 14 क्योंकि असां जाणदे न, जिनी प्रभु यीशु मसीह जो मरयां चे जिन्दा किता, उनी ही सांझो भी यीशु मसीह सांई जिन्दा करणा, कने परमेवरे सामणे खडे होणे तांई सांझो तुहाडे सोगी लेई ओणा है। 15 क्योंकि जडे दुख असां सेहन किते, सै तुहाडे फायदे तांई न, ताकि परमेवरे दा अनुग्रह जादा ला जादा मतयां लोकां जो मिल्ले, कने मते सारे लोक परमेवरे दिया महिमा तांई धन्यबाद करन। 16 इस तांई असां हिम्मत नी छडदे; भले ही साडे शरीर दी ताकत घटदी जा दी है, पर साडी अंदरूनी आत्मा रोज-रोज नोई हौंदि जा दी है। 17 क्योंकि साडा ऐ हुणे दा घट कने थोडे बकते दा दुख साडे तांई ऐसी हमेशा दी महिमा जो पैदा करदा है, जिदे बारे च असां सोची भी नी सकदे। (aiōnios g166) 18 कने असां दिखियां चीजां जो नी पर अणदिखियां चीजां जो दिखदे रेंदे न, क्योंकि दिखियां चीजां थोडे ही दिना दियां न, पर अणदिखियां चीजां सदा बणी रेंदियां न। (aiōnios g166)

**5** क्योंकि असां जाणदे न, की धरतिया पर साडे शरीर इक तन्बूऐ सांई न जिदे च असां रेंदे न। कने जालू असां मरी जाणा, तां परमेवरे दिया तरफा ला सांझो स्वर्ग च इक ऐसा शरीर मिलणा है, जडा माणूआं दे हयां ला नी बणया पर स्वर्गीय कने हमेशा तांई होणा है। (aiōnios g166) 2 इस शरीर च तां असां रेंदे न, कने बडी इच्छा रखदे न, की सांझो इक ऐसा शरीर मिल्ले जडा साडे स्वर्ग दे घरे सांई हो। 3 जालू सांझो सै स्वर्ग दा शरीर मिलणा, तां असां नगे नी रेंणा। 4 कने असां इस घरे च रेंदे होऐ भोजे हेठ दबुई करी रेंदे रेंदे न; क्योंकि असां इना संसारिक शरीरां जो नी छडणा चांदे न, पर असां चांदे न की परमेवरे सांझो स्वर्ग दा शरीर दे ताकि ऐ मरी जाणे बाले शरीर, नी मरणे बाले शरीर च बदलुई जान। 5 कने परमेवरे सांझो अपु नोपे शरीर रेंणे तांई तैयार कितया है कने उनी ही सान्झो बयाने दे स्पे च पबित्र आत्मा भी दितियो है, जडा ऐ यकीन दुआंदा है की परमेवरे उसयो जस पूरा करणा। 6 इस तांई असां हमेशा सबर रखदे न कने ऐ जाणदे न; की जालू दीकर असां शरीर च रेंदे न, तालू दीकर असां प्रभु ला दूर न जडा स्वर्ग च रेंदा है। 7 क्योंकि असां प्रभु यीशु मसीह दे रूप जो दिखीकरी नी, पर उस भरोसे करणे दिया बजा ला जिन्दे न। 8 इस तांई असां सबर रखदे न, कने शरीर दे घरे जो छडी करी परमेवरे सोगी रेंणा जादा खरा समझदे न। 9 इस बजा ला साडे मने दी इक ही इच्छा है की, चाहे असां उदे सोगी स्वर्ग च होन, या असां इसा धरती पर होन, असां प्रभु जो खरे लगदे रेंन। 10 क्योंकि जरूरी है, की मसीह साडा सारयां दा न्याय करे, कने हर इक माणूऐ जो उदे अपने भले बुरे कम्मा दा इनाम मिल्ले जडे उनी शरीर दे जरिये कितयो है। 11 सांझो पाता है की परमेवरे दा डर क्या है, इस तांई असां सचच पर भरोसा करणे तांई लोकां जो समझादे न कने परमेवरे सांझो पुरे तरीके ला जाणदा है कने मिंजो उम्मीद है की तुहाडिया अंतरात्मा भी सांझो ढंगे ला पछेणी लिया है। 12 असां फिर भी अपनी प्रशंसा तुहाडे सामणे नी करदे बल्कि असां तुहांजो अपने बारे च घमंड करणे दा मोका दिन्दे न, ताकि तुसां उना जो जबाब देई सकन, जडे मने पर नी, बल्कि दिखवाटी गल्लां पर घमंड करदे न। 13 अगर कोई बोलदा है की असां पागल न, तां सै परमेवरे तांई न; अगर कोई बोले की साडे दिमाग खरे न, तां सै तुहाडे भले तांई न। 14 क्योंकि मसीह दा प्यार सांझो मजबूर करी दिन्दा है, इस तांई की असां ऐ भरोसा करदे न, की जालू इक माणू सारयां तांई मरी गया, तां सारे मरी गियो न। 15 कने मसीह इस तांई सारयां तांई मरया, ताकि जडे जिंदा न, सै अगो जो सिर्फ अपु जो खुश करणे तांई ना जीन पर उना जो उदे तांई जीणा चांई। मसीह उना तांई मरया कने परमेवरे उसयो जिन्दा करी दिता। 16 इस तांई हुणे ला असां कुसयो भी संसारिक नजरा ला नी दिखणा, अगर असां पेहले मसीह जो भी संसारिक नजरा ला दिखया था, पर हण नी दिखणा क्योंकि हण उसयो जाणी गियो न। 17 इस तांई, अगर कोई मसीह पर भरोसा करदा है, तां उसयो इक नौआ सभाब मिलया है, पुराणा सभाब खत्म होई गया है; कने हण नौआ सभाब होई गया है। 18 कने सारियां गल्लां परमेवरे दिया तरफा ला न जिनी मसीह दे जरिये सांझो अपने बाल बापस लौंदया है, कने लोकां जो परमेवरे सोगी मेल मिलाप करणे दी सेवा सांझो देई दिती है। 19 परमेवरे सारे लोकां तांई इक रस्ता बणा दा था की जडा कुछ मसीह कितया है,

उदे जरिये परमेश्वरे सोगी मेल मिलाप करी सकन। परमेश्वरे लोकां दे पापां दा दोष उना पर नी लाया कने उनी शान्ति दे बारे च संदेश बंधणे दा कम्म सांझो देई दियाया है। 20 इस तांई असां मसीह दे राजदूत ना। परमेश्वर उदे संदेश जो अपनाणे तांई साडे जरिये लोकां ला बिनती करदा है। असां मसीह दिया तरफा ला बिनती करदे न की परमेश्वरे बाल आई जा। 21 मसीह जडा पाप ला अनजान था, उसी जो ही परमेश्वरे साडे तांई पाप बणाया, ताकि असां परमेश्वरे दिया नजरा च धर्मी बणी जान क्योंकि मसीह साडे पापां दी सजा अपने उपर लेई ली।

**6** परमेश्वरे सोगी कम्म करणे बाले होणे दिया बजा ला असां तुसां ने बिनती करदे न, की परमेश्वरे दा अनुग्रह जडा तुसां पर होया है, उसयो तुसां बेकार मत जाणा दिया। 2 क्योंकि पबित्र शास्त्र च परमेश्वर बोलदा है, “सही बकत पर मैं तेरी सुणी, कने उद्धार दे रोजे मैं तेरी सहायता कित्ती।” सुणा; हुण ही सही बकत है; सुणा, ऐ ही है उद्धार दा दिन। 3 परमेश्वरे सोगी कम्म करदे होऐ साडा व्यवहार कुसी तांई कोई भी स्क्राबट नी बणदा है, ताकि ऐसा ना हो की कोई साडिया सेबा पर दोष लाऐ। 4 असां हर इक तरीके ला दसदे न की असां परमेश्वर दे सच्चे सेवक न। क्योंकि असां बडा सबर रखीकरी कलेशां जो, दरिद्रता कने मुसीबतां जो सेहन करिरी, 5 असां कोडे खादे, जेला च गे, कने दंगे फसादां च चोटां लगियां, असां बडी मेहनत कित्ती, बगेर सोऐ कने बगेर खादे-पिते रे, 6 पर असां अपु जो बडा पबित्र रखया, अकली ला कम्म किते, सबर रखया कने दुज्यां पर दया कित्ती, पबित्र आत्मा दे हुकम मने, 7 सच्चा प्यार कित्ता, असां सच्चाई दा संदेश सुणाया, परमेश्वरे दिया शक्तिया साडे च कम्म कित्ता। असां सज्जे हथे च धार्मिकता दे हथियारे जो हमला करणे तांई कने खबे हथे जो बचाव तांई इस्तेमाल करदे न, 8 चाहे लोकां साडी इज्जत कित्ती या बेइज्जती कित्ती, तारीफ या बुराई कित्ती, पर असां इमानदार न, पर सै बोलदे न की असां झूठे न। 9 भले ही लोक सांझो अनजान समझदे न, पर फिरी भी असां प्रसिद्ध न; भले ही लोक सांझो मरयां सांई समझदे न, पर फिरी भी असां जिंदे न; सांझो सजा तां मिलदी है पर जानी ला नी मारी सके। 10 सांझो बडे दुख थे, पर असां हमेशा खुश रेंदे थे। असां अपु तां गरीब थे, पर बाकियां जो आत्मिक से च अमीर बणाई दिन्दे न। इयां न जियां साडे बाल कुछ नी फिरी भी साडे बाल सब कुछ है। 11 हे कुरिन्थुस शेरह दे मसीह लोको, असां खुली करी तुसां जो सच्चियां गल्लां बोलदे न, असां पुरे दिले ला तुहांजो प्यार करदे न। 12 तुहाडे तांई साडा प्यार कदी घट नी होया, पर तुसां दा प्यार साडे तांई घटी गिया है। 13 पर अपने बाल बच्चे समझीकरी मैं तुहांजो बोलदा है, की तुसां भी साडे प्यार दे बदले च साडे सोगी पुरे दिले ला प्यार करा। 14 भरोसा नी करणे बाले लोकां सोगी कोई रिशता मत रखा, क्योंकि धार्मिक कम्मा दा कने बुरे कम्मा दी कोई बराबरी नी। लौई दा कने नेहरे दा कोई रिशता नी। 15 कने मसीह दा शैताने सोगी कोई रिशता नी है। कने भरोसा करणे बाले लोकां दा भरोसा नी करणे बाले लोकां सोगी कोई रिशता नी। 16 कने मूर्तियां दी परमेश्वरे दे मंदरे च कोई जगा नी। क्योंकि असां तां जिंदे परमेश्वरे दे मंदर न; जियां परमेश्वरे पबित्र शास्त्र च बोलया है, “मैं इना लोकां सोगी रेंणा कने उना बिच ही चलणा फिरणा; कने मैं उना दा परमेश्वर होणा, कने सै मेरे लोक होणे।” 17 इस तांई प्रभुऐ सांझो ला पबित्र शास्त्र दे जरिये बोलया है की, “उना लोकां ला लग होई जा जडे परमेश्वरे पिच्छे नी चलदे। कने गंदिया चीजां सोगी कोई रिशता मत रखा, तां मैं तुहांजो अपनाणा।” 18 “कने मैं तुहाडा पिता होणा कने तुसां मेरे बेटे कने बेटियां होणे: ऐ सारयां ला शक्तियाली प्रभु परमेश्वर दा बचन है।”

**7** हे प्यारो भाईयो, क्योंकि परमेश्वरे सांझो अपने बच्चे दे से च अपनाणे दा बायदा कित्या है, इस तांई ओआ असां अपने शरिरे दे सारे बुरे कम्म कने आत्मा दे गंदे बिचारां जो करणा बंद करी देन कने परमेश्वरे दा डर मन्नी करी कने उदी इज्जत करा। कने सांझो पुरे तरीके ला पबित्र जिन्दगी जिणे तांई मेहनत करणी चाईदी। 2 तुसां सांझो ला अपने पुरे दिले ला प्यार करा, असां ना कुसी ने अन्याय कित्ता, ना कुसी दा कुछ बिगाडया, ना कुसी सोगी बेईमानी कित्ती। 3 मैं ऐ तुसां पर दोष लाणे तांई नी बोला दा है, क्योंकि मैं पेहले ही बोली बैठया है की, असां तुसां सोगी पुरे दिले ला प्यार करदे न कने असां लग नी होणा है चाहे असां जिन्दे रेन या मरी जान। 4 मैं तुसां ला बडे भरोसे सोगी बोला दा है, मिंजो तुसां पर बडा घमंड है. मिंजो बडी तसल्ली मिली, कने मैं अपने सारे दुखां च भी बडा जादा खुश रेदा

है। 5 क्योंकि जालू असां त्रोअस शेरह जो छडी करी मकिदुनिया प्रदेश च आये, ओथु सांझो कोई अराम नी मिल्ला, बल्कि हर पासे ला परेशानियां झेलदे थे; कने हर पासे लडाई-झगडे थे कने साडे मना च डर था। 6 पर उदास लोकां जो तसल्ली देणेबाले परमेश्वरे तीतुस जो साडे बाल भेजी करी सांझो तसल्ली दिती। 7 ऐ सच्च है की तीतुस सोगी मिली करी असां खुश होऐ। पर इसला भी जादा असां इसा गल्ला पर खुश होऐ की तुसां लोकां उसयो बडी हिम्मत दिती। कने उनी मिंजो दसया की तुसां मिंजो ला मिलणे दी कितणी इच्छा रखदे न, मेरे तांई दुखी न कने मेरे तांई कितणी लगन रखदे न, इना गल्लां ला मिंजो होर भी खुशी होई। 8 मिंजो कोई पछताबा नी है की मैं तुहांजो ऐ सकत चिट्ठी लिखी, चाहे तुसां इसा दिया बजा ला दुखी होऐ। पर पेहले मिंजो पछताबा होया जालू मैं दिखया की इसा चिठिया जो पडी करी तुहांजो थोडे बकते तांई दुख तां होया पर ऐ थोडिया देरा तांई था, 9 पर हुण मैं खुश है इस तांई नी की तुहांजो बडा जादा दुख देईकरी बल्कि इस तांई की तुसां उस दुखे दिया बजा ला पाप करणा बंद करी दिता कने परमेश्वरे बाल मुडी आऐ, क्योंकि ऐ उस तरीके दा दुख है जडा परमेश्वर चांदा है की उदे लोकां जो हो, ताकि तुहांजो साडिया बजा ला कुसा भी गल्ला च तकलीफ ना हो। 10 क्योंकि सै दुख जडा परमेश्वर चांदा है की असां अनुभव करन, सै लोकां दे पञ्चाताप करणे दी बजा बणदा है, जिंदे ला उना दा उद्धार होंदा है, कने फिरी उसला पछताणा नी पोंदा: पर संसारे दे दुख लोकां जो हमेशा दिया मौता पासे लेई जांदे न। 11 ध्यान दिया की परमेश्वरे दिया तरफा ला आयो दुखां ला तुहाडे च क्या-क्या बदलाव आया है, इंदे ला तुहाडी हिम्मत बदी गई, अपने आप जो बेकसूर साबित करणे दी इच्छा, अन्याय तांई तुहाडा गुस्सा, परेशानियां तांई ऐसी साबधानी, मिंजो ला मिलणे दी इतणी जादा इच्छा, परमेश्वरे दी सेबा तांई तुहाडी फिकर, कने गलत माणुऐ जो सजा देणे तांई तैयार रेणा, इना कम्मा दे जरिये तुसां साबित करी दितया है की सब कुछ ठीक-ठाक करणे च तुसां कोई भी कमी नी छडी है। 12 हालांकि ऐ सकत चिट्ठी मैं तुहांजो इस तांई नी लिखी थी की मिंजो उना दी चिंता थी, जडे अन्याय करदे न कने ना ही उना तांई जडे अन्याय सेंदे न, पर इस तांई लिखी की तुसां अपु ही परमेश्वरे सामणे दिखी लेन की तुसां साडे तांई कितणे सच्चे न। 13 इस तांई सांझो इना गल्लां ला हिम्मत मिलली; कने साडी हिम्मत कने खुशी तीतुस जो दिखीकरी होर भी बदी गई; क्योंकि सै तुहाडिया बजा ला बडा खुश होई गिया था। 14 क्योंकि अगर तीतुसे सामणे मैं तुहाडे बारे च घमंड कित्ता है, तां मैं शर्मिदा नी होया, पर जियां असां तुसां सोगी सारियां गल्लां सच्च-सच्च बोली दितियां थियां, तियां ही साडा घमंड दसणा तितुसे सामणे भी सच्च साबित होया। 15 कने जालू सै याद करदा है की तुसां सारयां उदी गल्ल मन्नी कने डरदे कने कमेदे उसयो अपनाया तां उदा प्यार तुहाडे तांई होर भी बदी गिया है। 16 मिंजो इसा गल्ला दी भी खुशी होदी है की, हुण मैं हर गल्ला च तुसां पर भरोसा करी सकदा है।

**8** हे मसीह भाईयो हुण, मैं तुहांजो उस अनुग्रह दे बारे च दसणा चांदा है, जिसयो परमेश्वरे मकिदुनिया प्रदेश दिया कलीसिया जो दितया है। 2 जालू बडियां भरियां परेशानियां ला उना दी परिक्षा होई, तां सै बडे खुश होऐ कने हालांकि सै बडे गरीब थे, फिरी भी उना होर भरोसा करणे बालयां दिया सहायता तांई उदारता न पैसे दिते। 3 कने उना दे बारे च मेरी ऐ गबाई है की, उना ना सिर्फ जितणा होई सकदा था, बल्कि उना उसला भी जादा बदीकरी दिता, कने उना ऐ कम्म अपनाणी इच्छा ला कित्ता। 4 उना लोकां साडे ला बडी बिनती करिरी इजाजत मंगी की यस्शलेम शेरहे दे परमेश्वरे दे पबित्र लोकां दी सहायता करणे दा सांझो मौका दिया। 5 असां इदी उम्मीद बिलकुल भी नी कितियो थी। उना अपने आपे जो पेहले प्रभु जो कने फिरी सांझो देई दिता, ठीक बिलकुल तियां ही जियां परमेश्वर चांदा था की सै करन। 6 इस तांई असां तीतुस ला बिनती कित्ती की, जियां उनी पेहले दान गिठा करणे दा कम्म शुरू कित्या था, तियां ही तुहाडे बिच इस दान दे कम्मा जो पूरा करी ले। 7 पर जियां तुसां सारियां गल्लां च मतलब की भरोसे च, परमेश्वरे दे बचने दा प्रचार करणे च, ज्ञान कने तुसां दुज्यां दी सहायता करणे तांई कोशिश करणे च, कने उस प्यार च जडा सांझो ला करदे न, इना गल्लां च बदे जांदे न, तियां ही हुण इना भरोसा करणे बाले गरीब लोकां जो दान देणे दिया सहायता तांई भी बदे जा। 8 मैं तुहांजो कोई हुकम नी देणा लगया, मैं सिर्फ दुज्जे

लोकां दी हिम्मता दी तुलना तुहाड़े प्यार ला करा दा है, ताकि तुहाड़े प्यारे दिया सच्चाईया जो परखी सके। 9 तुसां साडे प्रभु यीशु मसीह दे अनुग्रह जो ढंगे ला जाणदे न की, सै अमीर होईकरी भी तुहाड़े ताई गरीब बणी गिया ताकि उदे गरीब होणे ला तुसां अमीर होई जान। 10 पिछले साल तुसां दान देणे कने ऐसी इच्छा रखणे च भी सारयां ला अग्ये थे। इस बारे च तुहाड़े ताई क्या खरा है, उदे बारे च मेरी ऐ सलाह है की; हण जडा तुसां शुरू कितया है, उसयो पूरा करा। शायद तुसां भी इस कम्मे जो खत्म करणे ताई उतणे ही उत्साही न जितणे तुसां इसयो शुरू करणे च थे। 12 क्योंकि अगर तुहाड़े मने च दुज्जयां जो दान देणे दी इच्छा है तां जडा उदे बाल है, उदे मुताबिक ही उदा दान ग्रहण होणा, ना की उदे मुताबिक जडा उदे बाल नी है। 13 मैं नी चांदा है की दुज्जयां दी जिन्दगी असान बणाणे ताई तुहाड़ी जिन्दगी मुशकिल होई जा। पर सारयां बाल इक बराबर होणा चाईदा। 14 पर इस बकत तुहाड़ी बढोतरी उना दी जरूरत पूरी करणे ताई भरोती है, पर कदी ऐसा भी होई सकदा है की तुहांजो जरूरत पेई जा, तालू सै तुहाड़ी सहायता करन, तालू दोनोँ इक बराबर होई जाणा। 15 जियां पबित्र शास्त्र च लिखया है, “जिनी बडा जाता गटेरया, उसयो जाता नी मिलया कने जिनी घट गटेरया, उसयो कुसी चिजा दा घाटा नी होया।” 16 कने परमेश्वर दा धन्याबाद हो की, जडी फिकर मिंजो तुहाड़े बारे च है, ठीक सियुदी ही फिकर परमेश्वर तुहाड़े बारे च तीतुस दे मने च पाई दिती है। 17 जालू असां तीतुसे जो तुहाड़े बाल जाणे ताई बोलया, तां उनी खुशिया ला साडी बिनती मन्नी लेई कने बडा उत्साही होईकरी अपणिया मरजिया ला तुहाड़े बाल आया है। 18 कने असां तीतुस सोगी इक होर मसीह भाईऐ जो भेजया है, कने सारियां कलीसियां दे भरोसा करणे बाले लोक उदी तारीफ करदे न क्योंकि सै श्भसमाचार दा प्रचार बडे अच्छे ला करदा है; 19 कने सिर्फ इतणा ही नी, पर उसयो कलीसिया दे लोकां ही चुणया है, ताकि इस दान देणेबाले कम्मे ताई साडे सोगी चले। असां ऐ दान दी सेवा इस ताई करदे न, ताकि प्रभु दी महिमा हो, कने ऐ दसणे ताई की असां यस्शलेम शेहरे दे भरोसा करणे बालयां दी सहायता करणा चांटे न। 20 तीतुस सोगी उस मसीह भाईये जो भेजणे जरिये असां इसा गल्ला दा ध्यान रखदे न, की इस दान देणे दिया सहायता दे बारे च जिदी सेवा असां करदे न, कोई सांझो पर दोष ना लाई सके। 21 क्योंकि असां सिर्फ उना गल्लां पर ही ढंगे ला ध्यान नी दिन्दे न, जडियां परमेश्वर दिया नजरा खरियां न, पर उना पर भी दिन्दे न जडियां माणुआं दिया नजरा च खरियां न। 22 कने असां इना सोगी अपणे इक होर मसीह भाईऐ जो भेजया है, असां उसयो बडी बरी बडियां गल्लां च परखया है कने सै सच्चा निकलया है। पर हण तुसां पर उसयो बडा भरोसा है, इसा बजा ला सै होर भी जाता उत्साही है। 23 अगर कोई तीतुस दे बारे च पुच्छे, तां सै मेरा साथी, कने तुहाड़े ताई मेरा सहकमी है, कने अगर साडे मसीह भाईयां दे बारे च कोई पुच्छे, तां सै कलीसिया दे भेजयो होऐ न कने उना दी जिन्दगी मसीह दी महिमा ताई है। 24 इस ताई अपना प्यार कने साडा सै घमंड जडा असां तुहाड़े बारे च करदे न, कलीसिया दे सामणे उना जो साबित करिरी दसा।

9 हण यस्शलेम शेहरे दे भरोसा करणे बाले लोकां जो दान देणेबाली सेवा दे कम्मे दे बारे च मिंजो तुसां जो लिखणा जरूरी नी है। 2 क्योंकि मैं तुहाड़े मने दिया इच्छा जो जाणदा है। कि तुसां उना दी सहायता करणे ताई तैयार न, इस ताई मैं तुहाड़े बारे च मकिन्दुनिया शेहरे दे भरोसा करणे बाले लोकां सामणे घमंड दसदा है की, तुसां अखाया प्रदेशे दे लोक पिछले इक साले ला तैयार थे, कने तुहाड़े उत्साह दिया बजा ला होर भी लोक उत्साहित होई गे। 3 मैं तीतुस कने दो होर मसीह भाईयां जो तुहाड़े बाल इस ताई भेजा दा है, ताकि असां जडा घमंड तुहाड़े बारे च दसया, सै इसा गल्ला च बेकार ना होई जाऐ; पर जियां मैं बोलया तियां ही तुसां यस्शलेम शेहरे दे भरोसा करणे बाले लोकां ताई दान देणे ताई तैयार रिया। 4 इयां ना हो की, अगर कोई मकिन्दुनी शेहरे दा मसीह भाई मेरे सोगी ओऐ, कने तुहाडा दान तैयार ना होऐ, तां साडा जडा तुसां पर भरोसा है, उदिया बजा ला असां बेईजत होणा, पर तुसां इदे ला भी जाता बेईजत होणा। 5 इस ताई मैं मसीह भाईयां ने बिनती करणा जरूरी समझया की सै पहले ही तुहाड़े बाल चली जान, कने जडा दान देणे दा बायदा तुसां कितया था, उसयो तैयार रखन, जडा तुसां प्यारभाव ला देणा है ना की कुसी मजबूरिया च। 6 पर इसा गल्ला जो याद रखा, की जडा

थोडा रांदा है सै बडदा भी थोडा है; कने जडा जादा रांदा है, सै जादा ही बडदा है। 7 इस ताई जिनी अपने मने च जितणे भी देणे दा पेसला कितया है, सै उतया ही दे, बिना इच्छा या मजबूरिया ला ना दे। क्योंकि परमेश्वर खुशिया ला देणेबालयां ला प्यार करदा है। 8 परमेश्वर तुहांजो तुहाडिया जरूरतां ला भी जादा हर तरा दा अनुग्रह देई सकदा है। जिदे ला हर गल्ला च कने हर बेले, सब कुछ, जडा तुहांजो जरूरी हो, सै तुहाड़े बाल रे, ताकि तुहाड़े बाल हर भले कम्मा ताई जरूरत ला जादा हो। 9 जियां की पबित्र शास्त्र च लिखया है, “परमेश्वर जरूरतमंदा जो उदारता ला दिन्दा है, कने जडे कम्म सै करदा है, सै सही न कने हमेशा होदि रेणे।” (aiōn g165) 10 परमेश्वर हमेशा किसाना जो राणे ताई बी दिन्दा है, कने खाणे ताई रोटी दिन्दा है। इयां ही परमेश्वर ऐ इंतजाम करणा की तुहाड़े बाल हमेशा इतणी धन दौलत हो ताकि तुसां होर जादा उदारता ला गरीब लोकां दी सहायता करी सकन। 11 परमेश्वर तुहांजो हर तरीके ला आशीर्वाद देणा ताकि तुसां हमेशा उदारता ला दान देई सकन। कने जालू असां तुहाड़े दाने जो जरूरतमंद लोकां जो देणा, तां उना परमेश्वर जो धन्याबाद देणा। 12 क्योंकि इसा सेवा जो पूरा करणे ला, ना सिर्फ परमेश्वर दे लोकां दियां जरूरतां पुरियां होदियां न बल्कि लोकां दिया तरफा ला परमेश्वर दा बडा जादा धन्याबाद होंदा है। 13 क्योंकि दुज्जयां दी सहायता करणे ताई दान देणे दी ऐ सेवा दसदी है की तुसां अपना बायदा पूरा कित है, क्योंकि तुसां मनन्या है की मसीह दा श्भसमाचार ही सच्च है कने खुद अपने बचना दा पालन कित है। कने गरीब भरोसा करणे बाले कने सोगी ही बाकी भरोसा करणे बालयां दी सहायता करणे च उदारता दसदे न। 14 कने उना तुहाड़े ताई परमेश्वर ला प्रार्थना करणी। सै तुहाड़े ने प्यार करदे न, क्योंकि सै जाणदे न की परमेश्वर तुहांजो बडा जादा अनुग्रह दितया है। 15 ओआ असां परमेश्वर दे उस दाने ताई धन्यबाद करन, जिसयो शब्दां च बयान नी करी सकदे।

10 मैं सेई पौलुस है, जडा तुहाड़े सामणे डरफोक लगदा है, पर तुहांजो ला दूर जाणे पर हिम्मता बाला होई जांदा है। तुहांजो ला मसीह दिया उदारता कने कोमलता दिया बजा ला बिनती करा दा है की, 2 कुछ लोक बोलदे न असां इस संसारे दे लोकां सांई कम्म करदे न। इस ताई जालू मैं ओणा है तां मिंजो उम्मीद है की मिंजो उना सोगी सकत होणा पोणा। मैं हथ जोड़ी करी बिनती करदा है की जालू मैं तुहाड़े बाल ओणा तां मिंजो तुहाड़े सोगी ऐसा बर्ताब ना करणा पोऐ। 3 क्योंकि असां इस संसार च रेंदे जरूर न, पर असां अपने दुश्मणा सोगी संसारे दे लोकां सांई नी लडदे। 4 क्योंकि जिना हथियारां ला असां लडदे न सै संसारे दे लोकां दे हथियारा सांई नी न, पर किलयां जो ढांणे ताई परमेश्वर दे शक्तिशाली हथियार न। 5 इना दे जरिये असां उस हर इक बिरोध जो कने उस हर इक घमंड करणे बालिया गल्ला जो, जडा परमेश्वर दे ज्ञान दे खिलाफ खडी होदी है, उना उच्छिया गल्लां जो असां डाई दिन्दे न, कने साडे हर इक बिचार जो काबू करिरी उना जो मसीह दा हुकम मनणे बाला बणाई दिन्दे न। 6 कने जालू तुसां मसीह दा हुकम मनणे बाले बणी जांटे न, तां असां सारे हुकम नी मनणे बालयां जो सजा देणे ताई तैयार रेंदे न। 7 तुसां सिर्फ बाहरी दिखावे जो ही दिखदे न, अगर कुसी जो अपने उपर ऐ भरोसा हो, की मैं मसीह दा है, तां सै ऐ भी जांणी ले, की जियां सै मसीह दा है, तियां ही असां भी मसीह दे न। 8 क्योंकि अगर मैं उस हके दे बारे च होर भी घमंड दससं, जडा तुहाड़े भरोसे जो खत्म करणे ताई नी, पर तुहांजो भरोसे च बढणे ताई दितया, तां इदे च मिंजो कोई शर्म नी होणी। 9 मैं नी चांदा की तुहांजो ऐ लगे की मैं ऐ चिठ्ठी तुहांजो डराणे ताई लिखा दा है। 10 क्योंकि तुहांजो चे कुछ लोक बोलदे न, “पौलुसे दियां चिठियां गंभीर कने प्रभावशाली न; पर जालू दिखदे न, तां बोलदे न सै कसजोर माणू है कने उदियां गल्लां बेकार न।” 11 इस ताई ऐसा बोलणे बालयां जो ऐ समझणा चाईदा की, जियां असां दूर रेंईकरी चिठिया दे जरिये तुसां सोगी गल्लां करदे न, तियां ही तुहाड़े सोगी रेणे पर साडे कम्म भी होणे। 12 क्योंकि सांझो ऐ हिम्मत नी है की असां अपने आपे जो उना सोगी गिणन, या उना जो अपने ला मिलान, जडे अपणी तारीफ करदे न, कने अपने आप जो अपु चे ही नापदे न, कने अपणी तुलना अपने आपे ने ही करदे न। तां सै अपने आपे जो मुख बणांटे न! 13 असां उस कम्मे ला बाहर जडा परमेश्वर सांझो दितया है कदी घमंड नी करदे, पर उसा ही मर्यादा दीकर असां घमंड करणा जडी मर्यादा परमेश्वर साडे ताई बणाईयो है, कने उदे च ही तुसा भी आई गियो न

कने उस मर्यादा दे अनुसार ही घमंड भी करणा। 14 क्योंकि असां अपने आपे जो मर्यादा ला बाहर नी बढाणा चांदे, जियां की तुहांजो दीकर पुज्जणे दिया हालता च होंदा, बल्कि तुहांजो मसीह दा शुभसमाचार सुणणे ताईं कुरिन्थुस शेहर दीकर यात्रा करणे बाले असां पहेले माणू थे। 15 कने असां मर्यादा ला बाहर होरनी दिया मेहनता पर घमंड नी करदे न; पर सांझो उम्मीद है, की जियां-जियां तुहाडा भरोसा बददा जाणा तियां-तियां असां अपणिया मर्यादा अनुसार तुहाडिया बजा ला तुहाडे अखे-बखे दे कने मते लोकां बाल पूजी सकदे न। 16 की असां तुहाडे इलाके ला बाहर दूर-दूर जगा च भी शुभसमाचार सुणान, कने ऐ नी की होरनी दे दायरे अंदर बणयो कम्मे पर घमंड करन। 17 पर जियां पबित्र शास्त्र च लिखया है की, “अगर कोई घमंड करणा चांदा है, तं सै प्रभु पर घमंड करे।” 18 क्योंकि जडा अपणी बडाई करदा है, सै नी, पर जिदी बडाई प्रभु करदा है, सै ही प्रभु दिया नजरा च खरा है।

**11** अगर तुसां उना दी सुणी लेंदे न जालू सै अपने बारे च खरियां गल्लां करदे न। इस ताईं मिजो उम्मीद है की तुसां मिजो भी बरदाश करी लेणा है जालू मै थोडा बेवकूफां सांई गल्लां करणा। 2 क्योंकि मै तुहाडे ला तियां ही प्यार करदा कने तुहाडी चिंता करदा है जियां परमेस्वर करदा है, इस ताईं की मै तुहांजो सिर्फ यीशु मसीह जो देणे दा बायदा कितया है, जियां इक पिता अपणिया कुआरिया कुडिया जो उसा दे लाडे जो देई दिन्दा है, जालू उना दा बियाह होंदा है। 3 पर मै डरदा है की जियां शैताने सपे दे से च अपणिया चलाकिया ला पेली जनानी हव्वा जो बेहकाई दिता, तियां ही शैतान तुहाडे मना जो उस सीधेपन कने पबित्रता ला मसीह दी सेवा ला दूर ना करी दे। 4 जालू कोई तुहाडे बाल आई करी कुसी होर यीशु दे बारे च दसदा है, तं तुसां उस नोए माणूणे जो अपणणे ताईं बडे उताबले रेंदे न। ऐ यीशु सै नी है जिदे बारे च असां तुहांजो प्रचार कितया था। कने तुसां खुशिया ला उस पर ध्यान दिन्दे कने सुणदे न जालू तुहांजो इक ऐसी आत्मा कने संदेश मिलदा है, सै यीशु दे शुभसमाचार कने आत्मा सांई नी होंदा जडा असां तुहाडे बाल लेईं करी आयो थे। 5 मै अपने आपे जो उतणा ही खरा समझदा है जितणा की सै प्रेरित जडे अपने आपे जो सारयां ला महान प्रेरित समझदे। 6 मै बोलणे च इतणा माहिर नी है, पर मै मसीह कने शुभसमाचार दे बारे च अच्छे ला जाणदा है; मै अपना ज्ञान उना सारियां गल्लां जरिये साबित कितया है जडियां मै सिखाईयां न। 7 मै तुहाडे बिच परमेस्वरे दा शुभसमाचार मुफ्त च प्रचार किता कने अपने आपे जो नम्र किता ताकि तुहाडी इज्जत हो। मै क्या ऐसा करिरी पाप किता? 8 तुहाडी सेवा करणे ताईं मै होर कलीसियां ला सहायता लेईं। तुहांजो ऐ नी बोलणा चाईंदा की ऐसा करणा गलत है। 9 कने जालू मै तुहाडे सोगी था, कने मिजो पैसयां दी कमी होई, तं मै कुसी पर भी भोजन नी बणया, क्योंकि मसीह भाईयां मकिदूनिया प्रदेश ला आई करी मेरिया कमिया जो पुरा किता: कने मै कुसी भी गल्ला च अपने आपे जो तुसां पर भोजन नी बणना दिता, कने ना अग्रे जो बणना देणा है। 10 मसीह दी सचाई मिजो च है, इस ताईं मिजो घमंड है की मै अखाया प्रदेशे च कुसी ला भी पैसे नी ले। 11 मै तुहाडे पैसे कनी ले? क्या मै ऐ इस ताईं किता की, मै तुहांजो ला प्यार नी करदा? ऐ तं परमेस्वर जाणदा है की मै तुहांजो ने प्यार करदा है। 12 पर जडा मै करदा है, सेईं करदे रेंणा है, ताकि मै उना लोकां जो रोकी सकें, जडे इस गल्ला पर घमंड करणे ताईं इक मोका तोपदे न की परमेस्वरे ताईं उना दा कम्म साडे कम्मे सांई है। 13 क्योंकि ऐसे लोक झूठे प्रेरित, कने धोखे न कम्म करणे बाले, कने मसीह दे प्रेरित होंणे दा झूठा दाबा करदे न। 14 कने ऐ कोई हेरानिया बाली गल्ल नी है, क्योंकि शैतान अपु भी परमेस्वरे दी महिमा दे स्वर्गदूत दा रूप धारण करिरी धोखा दिन्दा है। 15 इस ताईं अगर शैताने दे सेवक भी परमेस्वरे दे सेवकां दा रूप धारण करन, तं इदे च कोई बडी बडी गल्ल नी है, पर उना दा अंत उना दे कम्मा दे अनुसार होणा। 16 मै फिरी बोलदा है, कोई मिजो मुख ना समझे; नी तं मुख ही समझी करी मिजो अपनाई लिया, ताकि थोडा दिया मै भी घमंड करी सके। 17 बेधडक होईं करी मै जडा कुछ बोलदा है, ऐ मै तियां नी बोलदा जदिया प्रभु यीशु मसीह चांदा है, पर मन्ना मुखता दिया बजा ला बोलदा है। 18 जालू की बडे लोक इस संसारे दे लोकां सांई घमंड करदे न, तं मै भी घमंड करणा। 19 तुसां तं समझदा होईं करी भी खुशिया ला मूखी दी सेहन करी लेंदे न। 20 क्योंकि जालू तुहांजो कोई नोकर बणाई लेंदा है,

या तुहाडा सब कुछ लेईं लेंदा है, या तुहांजो धोखा दिन्दा है, या अपने आपे जो तुहांजो ला उपर रखदा है, या तुहाडे मुए पर शपथ मारदा है, तं तुसां सेहन करी लेंदे न। 21 मिजो ऐ सब करणे च शर्मिंदगी होंदी; पर जिसा कुसी गल्ला पर कोई घमंड करदा है, मै मुखता ला बोलदा है तं मै भी घमंड करदा है। 22 क्या सै ही इब्रानी न? मै भी इब्रानी है, क्या सै इस्पाएली न? मै भी इस्पाएली है, क्या सै अब्राहम दे बंशे दे न? अब्राहम दा बंशज मै भी है। 23 क्या सेईं मसीह दे सेवक न? मै पागला सांई बोलदा है, मै उना ला बदी करी है! मै उना ला जादा मेहनत कीतियो है, उना ला जादा बार जेला गिया है, बडी बरी कोडे खादे न, बडी बरी मेरिया जानी जो खरा होया। 24 यहूदी अगुवां मिजो पंज बरी उनताली-उनताली कोडे मारे। 25 तिन बरी मै बैता ने मार खादी; इक बरी पथरा ने मार खादी; तिन बरी मेरा जाज समुद्रे च टूटी करी डूबी गिया, इक रात दिन मै समुद्रे च कटी। 26 बार-बार मिजो सफर करणा पिया; कदी खड्डा च, कदी खूखार डाकुआं दे, कदी अपने देशे दे लोकां दे, कने कदी होर जातियां दे लोकां दे, कदी शेहरां च, कदी बणा च, कदी समुद्रे दे खतरयां दा कने कदी झूठे मसीह भाईयां दे खतरयां दा सामणा करणा पिया। 27 मै केईं रातां जागी करी, भूखा प्यास रेईं करी, सर्दियां च थोडे कपडयां च रेईं करी बडी मेहनत किती कने बडियां मुसीबतां झेलियां। 28 कने इना सारियां गल्लां दे इलाबा मिजो हर रोज सारियां कलीसियां दी भलाई दी चिंता दा भोजन बणी रेंदा है। 29 जालू कोई कमजोर होंदा था तं मै भी अपने आपे जो कमजोर महसूस करदा था। जालू कोई पाप करदा है, तं मै बडा परेशान होंदा है। 30 अगर घमंड करणा जरूरी है, तं मै भी अपणिया कमजोरियां दिया गल्लां पर घमंड करणा। 31 परमेस्वर, जडा साडे प्रभु यीशु मसीह दा पिता, जडा हमेशा धन्य है, सै जाणदा है, की मै जूठ नी बोलदा। (1aion G165) 32 जालू मै दमिश्क शेहरे च था, राजा अरितास दे राज्यपाले मिजो पकडने ताईं शेहरे च पैरा बठाई दितया था। 33 पर दोस्तां मिजो इक टोकरिया च इक लम्बा रस्सा बन्नी करी उदे च बैठया कने उसयो दिबारां दे इक सुराखे ला बाहर जमिना पर उतारी दिता कने इयां करिरी मै राज्यपाले दे हथे ला बची के निकली गिया।

**12** घमंड करणा मेरे ताईं ठीक नी है, पर तमी करणा पोंदा है; तं मै प्रभु दे दितयो दर्शन कने प्रकाशना दी चर्चा करणी। 2 मै इक ऐसे माणूणे जो जाणदा है, जडा मसीह पर भरोसा रखदा है, मसीह जो चौदा साल पहेले स्वर्ग जो चुकी लिया जिथू परमेस्वर रेंदा, मै नी जाणदा की सै अपने शरीर च था, या सिर्फ आत्मा च था, ऐ सिर्फ परमेस्वर ही जाणदा है। 3 मै दुबारा बोलदा है, मै जाणदा है की ऐ माणू स्वर्ग जो चुकी लिया (फिरी भी मिजो नी पता की ऐ सच्ची होया की या इक सपना था, ऐ तं परमेस्वर ही जाणदा) कने ऐशियां गल्लां सुणियां जिना दा शब्दां च बखाना नी करी सकदे कने जिना दे बारे च दुज्जयां जो दसणे दी लोकां जो इजाजत नी है। 5 ऐसे माणूणे पर तं घमंड करणा, पर अपने आपे पर अपणियां कमजोरियां जो छडी करी, अपने बारे च घमंड नी करणा। 6 क्योंकि अगर मै घमंड करणा चांगा भी तं मै मुख नी होणा, क्योंकि मै सच्च बोलणा; पर मै अपने आप जो घमंड करणे ला रोकदा है, इयां ना हो की, जियां कोई मिजो दिखदा है, या मिजो सुणदा है, मिजो उसला बदी करी समझे। 7 पर मिजो उना अनेखी चीजां दे बारे च घमंड नी करणा चाईंदा जडियां परमेस्वरे मिजो दसियां न। इस ताईं मेरे शरीर च कंडा चुभाया मतलब की मिजो बडी बडी मुसीबत दितियो है। शैताने दिया तरफ ला इक दूत मिजो मारणे कने मिजो घमंडी होणे ला रोकणे ताईं दितया है। 8 इदे बारे च मै प्रभु ला तिन्न बरी बिनती किती की, मिजो ला ऐ दूर होईं जा। 9 कने उनी मिजो ने बोलया, “मेरा अनुग्रह तेरे ताईं काफी है; क्योंकि मेरी शक्ति कमजोरियां च सिद्ध होदी है।” इस ताईं मै बडियां खुशियां ने अपणियां कमजोरियां पर घमंड करणा है, ताकि मसीह दी शक्ति मिजो मिलदी रे। 10 इसा बजा ला मसीह ताईं मै कमजोरियां च, कने निंदा च, कने दरिद्रता च, कने लडाई झगडयां च, कने मुसीबतां च खूश है, क्योंकि जालू मै कमजोर होंदा है, तालू मै मसीह दी शक्ति ने शक्तिशाली होंदा है। 11 मै मुख तं बणया, पर ऐ तुसां ही न जिना मिजो ऐसा करणे ताईं मजबूर किता: तुहांजो तां मेरी प्रशंसा करणी चाईं दी थी, क्योंकि अगर मै कुछ भी नी है, तमी उना महान प्रेरितां ला कुसी भी गल्ला च घट नी है। 12 मै तुहाडे बिच रेईं करी इक सच्चा प्रेरित होणे दे सबूत दिते, मै सबर रखया, चिन्न चमत्कार, अनेखे कम्म, कने शक्ति दे कम्म दस्से। 13 तुसां

कुसा दिया गल्ला च होर कलीसियां ला घट थे, सिर्फ इक ही गल्ल की जडी मैं बाकियां कलीसियां सोगी किती कने तुहाड़े सोगी नी किती की, मैं तुहाड़े ला अपणियां जरूरतां ताई पैसे नी मंगे, तुहाड़ा ऐ सोचना गलत है की मैं ऐसा करिरी तुहाड़े बिरोध च गलत कितया है। 14 दिखा मैं तीजी बरी तुहाड़े बाल ओणे ताई तैयार है, कने मैं इस बरी भी तुहाड़े ला कोई सहायता नी लेंगी; क्योंकि मैं तुहाड़िया संपतिया जो नी, पर तुहांजो चांदा है। क्योंकि बचयां जो अपने माता-पिता ताई धन नी गटेरणा चाईदा, पर माता-पिता जो बचयां ताई धन दौलत गटेरणी चाईदी। 15 मैं तुहाड़े ताई बडिया खुशिया ला अपना सब कुछ देई देणा बल्कि अपने आप जो भी देई देणा; क्योंकि मैं तुहांजो ने बडा प्यार करदा है, पर ऐसा लगदा है की तुसां मिजो ने घट प्यार करदे न। 16 कुछ भी हो, मैं तुहांजो पर भोज नी बणया, पर दुज्जयां जो लगदा है की मैं चलाक है कने मैं तुहांजो धोखा दिता है, पर ऐ झूठ है। 17 मैं तीतुस जो कने होर मसीह भाईयां जो कदी भी तुहांजो बाल भेजी करी पैसे दी सहायता नी मंगी। 18 मैं तीतुस जो कने उदे सोगी अपने मसीह भाईऐ जो भेजया था, तां क्या तितुसे धोखा देईकरी तुहांजो ला कुछ लिया? नी! क्योंकि साड़ा इक ही मकसद है कने साड़ा इक ही कम्म है। 19 मेरे प्यारे मसीह भाईयो, तुसां अपने मने च ऐ सोचा दे होंगे न की असां ऐ सब अपने बचाव ताई बोला दे न। पर असां ऐ सब परमेश्वरे दे सामणे यीशु मसीह च तुहाड़े भरोसे जो मजबूत करणे ताई बोला दे न। 20 क्योंकि मिजो डर है, कुथी इयां ना हो, की मैं तुहाड़े बाल ओऐ कने मैं जदेई उम्मीद कितियो है, तुसां सियुदे ना होन, कने जदेई उम्मीद तुसां मिजो ला कितियो कने मैं भी सियुदा नी होऐ। मिजो डर है, की ओथु झगडा, जलन, गुस्सा, मतलबीपन, चुगली, घमंड कने बखेडे ना पियो होन। 21 कने ऐसा ना हो की जालू मैं दुबारा बापस ओऐ, तां मेरा परमेश्वर मिजो बेइज्जत करे। कने फिरी मिजो केईयां ताई रोणा पोऐ, जिना पेहले गंदे कम्मा ला, कने व्यभिचार, कने लुचपन ने, कने जडे पाप उना कितया होन, उना ला पन्नाताप नी कितया हो कने पाप करणा नी छडया हो।

**13** पबित्र शास्त्र च लिखया है की, “हर इक गल्ल जो साबित करणे ताई दो या तिन गबाह दी जरूरत होंदी है,” जालू मैं दुज्जी बरी तुहाड़े बाल आया था, तालू मैं कुछ लोकां जो चेताबनी दिती थी, जडे पाप करदे थे। हुण मैं इसा चिठिया दे जरिये सारयां जो दुबारा चेताबनी दिन्दा है, जियां मैं पेहले भी दितियो थी। हुण मैं तीजी बरी तुहाड़े बाल लगया ओणा कने हुण भी उना लोकां पाप करणा नी छडया, तां कोई भी उना जो सजा ला नी बचाई सकदा। 3 मैं ऐ बोलदा है क्योंकि तुसां इदा सबूत चांदे न, की मसीह मेरे जरिये बोलदा है, कने मसीह तुहांजो सुधारदा है, तां ऐ साबित होंदा है की सै कमजोर नी है; पर तुहाड़े बिच शक्तिशाली है। 4 सै कमजोरिया दिया बजा ने सूली पर तां चढाया गया, पर परमेश्वरे दिया शक्तिया ला जिन्दा है, असां भी तियां ही कमजोर न, जियां मसीह था; पर परमेश्वरे दिया शक्तिया ने जडी तुहाड़े ताई है, असां उदे सोगी जीणा। 5 अपने आपे जो परखा, की तुहाड़ा भरोसा सच्चा है की नी; क्या तुहांजो ऐ अनुभव नी होंदा है की यीशु मसीह तुसां च है। अगर नी होंदा है तां तुसां निक्कमे निकलयो न। 6 पर मेरी आस है, की तुसां जाणी लेंणा है की असां निक्कमे नी न। 7 कने असां अपने परमेश्वरे ला प्राथना करदे न, की तुहांजो ला कोई गलती ना हो। ऐ दसणे ताई नी की साडी सेबकाई सफल रेई है, पर असां चांदे न की तुसां खरे कम्म करन, चाहे असां अपु निक्कमे ही लगन। 8 क्योंकि असां सचाइया दे खिलाफ कुछ नी करी सकदे न, पर सचाइया ताई ही करी सकदे न। 9 असां अपने कमजोर होंगे कने तुहाड़े भरोसे च ताकतबर होंगे पर असां खुश होंदे न। कने ऐ प्राथना भी करदे न की, तुसां भरोसे च सिद्ध होंदे जा। 10 इसा बजा ला मैं तुहाड़े बाल ओणे ला पेहले तुहांजो ऐ गल्लां लिखा दा है, ताकि मिजो तुहांजो सजा देणे दे हके जो इस्तेमाल करणे दी जरूरत ना पोऐ, जडा मिजो प्रभुऐ दितया है। पर मैं इना हका दा इस्तेमाल तुहाड़े भरोसे जो मजबूत करणे ताई करणा चांदा है ना की नाश करणे ताई। 11 हे मसीह भाईयो, खुश रिया, सिद्ध बणदे जा, सबर रखा, इक दुज्जे जो उत्साहित करा, इक ही मन रखा, मिल्ली जुली करी रिया कने शांति देणेबाले परमेश्वरे तुहाड़े सोगी रेंणा। 12 इक दुज्जे जो गल्ले लगी करी मसीह दे प्यार च नमस्कार करा। 13 सारे पबित्र लोक तुहांजो नमस्कार करदे न। 14 मैं

प्राथना करदा है की प्रभु यीशु मसीह दा अनुग्रह कने परमेश्वरे दा प्यार कने पबित्र आत्मा दा साथ तुहाड़े सोगी रे।



# गलातियों

**1** मैं, पौलस, तुहांजो ऐ चिट्ठी लिख्वा दा है, कने मैं इक प्रेरित है, मिंजो प्रेरित होणे ताई कुनी खास समूह या कुनी माणुऐ नी चुणया, पर यीशु मसीह कने परमेश्वरे पिता दे जरिये चुणया है, जिनी यीशु मसीह जो मरयां चे जिन्दा कित्ता। 2 कने मैं ऐ चिट्ठी गलातिया प्रदेशे दिया सारिया कलीसिया जो उना सारे मसीह भाईयां दिया तरफ ला लिखा दा है जडे मेरे सोगी ना। 3 मैं प्राथना करदा है की साडा पिता परमेश्वर कने प्रभु यीशु मसीह तुहांजो अनुग्रह कने शांति दे। 4 साडे पिता परमेश्वर दी इच्छा दे अनुसार यीशु मसीह अपने आपे जो साडे पापां दिया बजा ने बलिदान करी दिता ताकि असां इस संसार दे लोकां दे बुरे प्रभाव ला बचाई सके। (aiōn g165) 5 मैं प्राथना करदा है की परमेश्वर दी महिमा युगां-युगां दीकर हौदी रे। आमीन। (aiōn g165) 6 मिंजो इसा गल्ला दी हेरानी हौदी है, जिनी परमेश्वरे तुहांजो मसीह दे अनुग्रह दे जरिये अपने लोक होणे ताई सदया है, उसला तुसां इपणी जल्दी फिरी करी कुसी होर ही शिक्षा जो मनपा लगी पे। 7 पर सिर्फ इक ही सच्चा श्भसमाचार है, पर असल गल्ल ऐ है की कुछ लोक मसीह दे श्भसमाचार दी शिक्षा जो बिगाडना चांदे न कने उना लोकां ही तुहांजो भटकाई दिता है। 8 पर अगर असां चे कोई या स्वर्दातां चे कोई भी इस श्भसमाचार जो छडी करी जडा असां तुहांजो सुणया है, कोई होर शिक्षा दा प्रचार करे तां, परमेश्वरे उसयो सजा देणी। 9 जियां असां पेहले ही बोलया है, तियां ही मैं हुण फिरी बोलदा है, की उस श्भसमाचार जो छडी करी जिसयो तुसां अपनाया है, कोई होर शिक्षा दा प्रचार करे तां, परमेश्वरे उसयो सजा देणी। 10 मैं पक्के तौर पर लोकां दी नी मंदा है पर परमेश्वरे दी मंदा है, मैं लोकां जो खुश करणे दी कोशिश नी करा दा है, पर परमेश्वरे जो खुश करणा चांदा है। अगर मैं हले दीकर माणुऐ जो खुश करदा रेंदा तां मैं मसीह दा सेवक नी हौंदा। 11 हे मसीह भाईयो, मैं तुहांजो दसी दिन्दा हे की, जडा श्भसमाचार मैं सुणया है, सै माणुऐ दा बणया नी है। 12 क्योकि मैं ऐ अपने पूर्वजां या धार्मिक गुरुं ला नी सिखया है, बल्कि खुद यीशु मसीह श्भसमाचारे जो मिंजो पर प्रगट कितया है। 13 तुसां जाणदे न की मैं यहदी धार्मिक नियमा दे अनुसार जिन्दगी जिन्दा था, तां मेरे मते साथी जडे मेरिया उमरा दे थे, सै भी यहदी नियमा दा पालन करते थे, पर मैं उना सारयां ला जादा बदीकरी कने पुरे दिले ला अपने पूर्वजां दे रीती रिबाजां जो मंदा था। कने उस बकत मैं यीशु मसीह पर भरोसा करणे बालयां जो सतांदा था कने उना जो मारणे दी कोशिश करदा रेंदा था। 15 पर ताल परमेश्वरे ऐ फेसला कित्ता की अपने पुत्रे जो मिंजो पर प्रकट करे, ताकि मैं होर जातियां बिच यीशु मसीह दा प्रचार करी सके। परमेश्वर ही है जिनी मिंजो मेरे पैदा होणे ला पेहले ही चुणी लिया कने अपने अनुग्रह ने मिंजो अपनी सेवा ताई सदया। जाल् यीशुऐ अपने आप जो मिंजो पर प्रगट कित्ता, ताल् मैं सलाह लेणे ताई कुसी बाल नी गया, 17 कने ना ही जडे मिंजो ला पेहले प्रेरित थे, उना जो मिलणे ताई यस्शलेम गया, पर झट अरब नापे दे इलाके जो चल्ली गया, कने फिरी ओथु ला दमिशक शेहरे च दुबारा बापिस आई गया। 18 फिरी तिन्ना सालां बाद मैं पतरसे ने मिलणे ताई यस्शलेम शेहरे जो आया, कने उदे बाल पन्दरा रोज रिया। 19 कने मैं प्रभु यीशु दे भाई याकूब जो छडी करी कने कुसी भी होर प्रेरिते ने नी मिल्ला। 20 परमेश्वर मेरा गवाह है की तुहांजो जडियां गल्लां मैं लिखदा है, उस च कुछ भी झूठ नी है। 21 यस्शलेम शेहरे च मैं उना प्रेरितां ला मिलणे बाद सीरिया कने किलिकिया प्रदेशां च आया। 22 पर यहदिया प्रदेशे च मसीह पर भरोसा करणे बाले लोकां मिंजो कदी नी दिखया था। 23 पर उना भरोसा करणे बालयां मेरे बारे च ऐई सुणया था, की जडा पेहले सांझो मसीह पर भरोसा करणे ने सतांदा था, सै हुण इसी भरोसे दा प्रचार करदा है, इसला पेहले सै उना लोकां जो मारणे दी कोशिश करदा था जडे मसीह पर भरोसा करदे थे। 24 इस ताई सै परमेश्वरे दी महिमा करदे न क्योकि उनी मिंजो इक सतांणे बाले ला मसीह दा इक चेला बणाई दिता।

**2** चौदा साल बाद मैं बरनबास सोगी यस्शलेम शेहर गया कने तीतुस जो भी सोगी लेई गया। 2 मैं ओथु गया क्योकि परमेश्वरे मिंजो जाणे ताई बोलया कने जाल् मैं ओथु था, तां मैं कुछ बड़े अगुवां ने एकांत च मिलया कने उना जो उस श्भसमाचार दे बारे च दसया जिसदा मैं होर जातियां च प्रचार करा दा था। ताकि

इयां ना हो, की मेरी इस बकते दी, या पिछली मेहनत बेकार होए। 3 मेरा साथी तीतुस कने सै इक यूनानी है; उदा खतना कदी नी होया। पर यस्शलेम शेहरे दी कलीसिया दे अगुवां उसयो अपनाई लिया कने उना उसयो खतना करणे ताई मजबूर भी नी कित्ता। 4 तीतुस दा खतना नी होणे दा ऐ मामला कुछ झूठे भाईयां ताई इक मुदा बणी गया, जडे साडिया मंडलिया च चोरिया ला आई गियो न कने उसा अजादिया जो खत्व करणे दी कोशिश करा दे थे जडे साडे उधारकर्ता यीशु मसीह दितियो है, ताकि सै सांझो फिरी ला यहदी व्यवस्था दा गुलाम बणाई सकन। 5 पर असां थोडे बकते ताई भी उना दियां गल्लां ने सेहमत नी होए, ताकि तुसां लगातार सच्चे श्भसमाचार दी सचाई पर भरोसा करदे रेन। 6 यस्शलेम शेहरे दिया कलीसिया दे उना बड़े अगुवां मेरी शिक्षा च कुछ भी नी जोडया, मैं इसा गल्ला दी कोई चिंता नी करदा की सै अगुवे कुण न क्योकि परमेश्वर बाहरी रूप दिखीकरी न्याय नी करदा। 7 पर जाल् अगुवां दिखया की, जियां परमेश्वरे यहदी लोकां ताई श्भसमाचार प्रचार करणे दा कम्म पतरसे जो दितया है तियां ही होर जातियां जो श्भसमाचार प्रचार करणे दा कम्म मिंजो दितया है। 8 क्योकि जिनी परमेश्वरे पतरसे जो यहदी लोकां बिच प्रेरित होणे ताई चुणया, उनी ही मिंजो भी होर जातियां बिच प्रेरित होणे ताई चुणया है। 9 कने जडे लोक कलीसिया दे खम्बे समझे जांते थे, मतलब की पतरस, याकूब, कने यहन्ना, उना अनुग्रह दे उस बरदान जो पछेणी लिया जडा मिंजो मिलया है। उना मिंजो कने बरनबास जो अपना साथी समझीकरी सांझो हिस्सेदार बणया। सै इसा गल्ला ताई राजी होऐ की असां होर जातियां बाल जान कने सै यहदियां बाल जान। 10 उना सांझो ने ऐई विनती कीती की यस्शलेम शेहरे दे गली विव्वासियां दी सहायता करनयो, कने ऐ सेई कम्म था जिसयो मैं करणा चांदा था। 11 पर जाल् इक दिन पतरस अन्ताकिया शेहर च आया, तां मिंजो लोकां सामणे उसयो फटकार लाणा पेई क्योकि सै सही कम्म नी करा दा था। 12 पतरस पेहले होर जातियां सोगी खाणा खांदा था पर जाल् याकूब दे भेजयो कुछ विव्वासी यस्शलेम शेहर च आये तां उना सोगी मिलणा-जुलणा कने खाणा खाणा बंद करी दिता क्योकि सै उना यहदियां ला डरदा था, जडे चांदे थे की सारियां होर जातियां दा खतना होणा चाईंदा। 13 कने उदे सोगी अन्ताकिया शेहर दे कुछ यहदी विव्वासी भी ऐथु दीकर की बरनबास भी उना ला डरदा था कने उनी भी होर जातियां सोगी मिलणा-जुलणा बंद करी दिता। 14 पर जाल् मैं दिखया, की उना दा चाल चलण सियुदा नी है, जदिया श्भसमाचार सिखांदा है, ताल् मैं सारयां सामणे पतरसे जो फटकार लाईकरी बोलया, “तू इक यहदी होईकरी भी, होर जातियां दे रीती रबाजां जो मन्ना दा है,” कने यहदियां दे रीती रबाजां जो नी मन्ना दा है, अगर तू इक यहदी होईकरी ऐसा कितया है। तां तू फिरी होर जातियां जो असां यहदियां दे रीती रबाजां जो मन्णे ताई कजो मजबूर करदा है? 15 असां जडे जन्म ला ही यहदी न कने होर जाति नी न जिना जो यहदी पापी बोलदे न। 16 असां यहदी विव्वासी जाणदे न की मूसा दी व्यवस्था जो मन्नी करी कोई भी माणु धर्मी नी बणदा है, इस ताई असां भी यीशु मसीह पर भरोसा कित्ता, कम्म मिंजो दी व्यवस्था दा पालन करी के नी पर यीशु मसीह च भरोसा करणे ने धर्मी होए; इस ताई की मूसा दी व्यवस्था दे कम्मा ने कोई भी माणु धर्मी नी हौंदा। 17 कुछ यहदी सोचदे न की असां पाप कितया है, क्योकि असां व्यवस्था दा पालन करणे दिया बजापे, धर्मी होणे ताई मसीह पर भरोसा करदे न, इदा मतलब ऐ है की मसीह सांझो पापी बणादा है, नी बिलकुल भी नी। 18 पर असल च मैं पाप करणा अगर मैं इसा गल्ला जो दुबारा ला अपनाई लेंदा है की इक माणु व्यवस्था जो मन्णे ने ही परमेश्वरे दिया नजरा च सही हौंदा है। 19 मैं समझदा है की मिंजो मूसा दिया व्यवस्था जो मन्णे ने मैं धर्मी नी बणी नी सकदा। इस ताई मैं ऐसा मनदा है की मैं व्यवस्था दे बारे च मरी गया ताकि मैं परमेश्वरे ताई जिन्दा रेई सके। 20 ऐ इयुदा है जियां जाल् मसीह सूली पर मरी गया, तां मैं भी मसीह सोगी सूली पर मरी गया। हुण मैं जिन्दा नी है, पर मसीह मेरे अंदर जिन्दा है। हुण मैं परमेश्वरे दे पुत्रे पर भरोसा कररी जी दा है, जडा मिंजो ने इतना प्यार करदा है की उनी मेरे ताई अपनी जान देई दिती। 21 मैं इसा गल्ला ला मना नी करी सकदा की परमेश्वरे अपनी दया दिया बजा ने सांझो बचाया। क्योकि अगर लोक मूसा दी व्यवस्था जो मन्नी करी धर्मी बणी सकदे, तां मसीह जो मरणे दी जरूरत नी थी।

3 हे गलातिया शेहरे दे लोकों, तुहाडे दिमाग खराब होई गियो न, तुहांजो कुनी भटकाई दितया है, क्योंकि मैं तुहांजो बडे अच्छे तरीके ने समझाया की यीशु मसीह सूली पर कजो मरया कने उनी कुस कम्मे जो पूरा कित्या। 2 मिंजो इक गल्ल दस्सा, तुहांजो पबित्र आत्मा कियां मिलया? क्या मूसा दी व्यवस्था जो मन्नी करी तुहांजो पबित्र आत्मा मिलया? नि बिलकुल भी नी! तुहांजो पबित्र आत्मा इस तांई मिलया क्योंकि तुसां शुभसमाचार सुणी कने उस पर भरोसा कित्या। 3 क्या तुहाडा दिमाग खराब होई गिया की, तुसां पबित्र आत्मा दे जरिये नोई जिन्दगी शुरू करिरी क्या अपणिया ताकता ला इदा अंत करणा चांदे न? 4 विष्वासी बणने बाद तुसां बडे दुख झेले। मैं सच्ची आशा करता है की ए सब कुछ बेकार नी था। 5 जडा तुहांजो उदारता ला पबित्र आत्मा दिन्दा है कने तुहांजो च चमत्कार दे कम्म करता है, क्या ए इसा बजा ने है की तुसां मूसा दी व्यवस्था दा पालन कित्या या मसीह दे बारे च शोचना करणया कने उस पर भरोसा कित्या? 6 “हुण अब्राहम दे बारे च ही सोचा, उनी परमेश्वरे पर भरोसा कित्या, कने इसी ने ही परमेश्वरे अब्राहमे जो धर्मी बनाया।” 7 तां तुहांजो ऐ समझणा चाईदा की जडे लोक अब्राहम सांई परमेश्वरे पर भरोसा करदे न, सै अब्राहम दे सच्चे बंशज न। 8 कने परमेश्वरे पबित्र शास्त्र च बडे पेहले बोलया की, परमेश्वरे होर जातियां जो भरोसे करणे ने धर्मी बनाणा, परमेश्वरे पेहले ही ए शुभसमाचार अब्राहमे जो सुणाई दितिया था, की “तेरे जरिये सारे देशां दे लोकां जो आशीष मिलणी।” 9 परमेश्वरे अब्राहमे जो उडे भरोसे दिया बजा ला आशीष दिती, तियां ही जडा कोई भी मसीह पर भरोसा करता है उसयो पक्का ही अब्राहमे सोणी परमेश्वरे आशीष देणी। 10 पर मूसा दी व्यवस्था च लिखया है, जडा कोई धर्मी होणे तांई व्यवस्था दे नियमा पर भरोसा रखदा है, परमेश्वरे दा श्राप उस पर होँदा है। इस तांई उना सारे लोकां पर श्राप आई गिया जडे व्यवस्था जो मन्नी करी परमेश्वरे सामणे धर्मी बणने दी कोशिश करदे न। क्योंकि कोई भी हर बकत उस व्यवस्था दा पूरी तरीके ने पालन नी करी सकदा। 11 पर ए गल्ल सच्च है, की मूसा दी व्यवस्था दा पालन करणे ने कोई भी परमेश्वरे दिया नजरा च धर्मी नी बणी सकदा, क्योंकि पबित्र शास्त्र च लिखया है, “पर अगर कोई भी परमेश्वरे पर भरोसा करता है, तां परमेश्वरे उसयो धर्मी बनाणा कने हमेशा दी जिन्दगी देणी।” 12 मूसा दी व्यवस्था दा पालन करिरी जिणा कने परमेश्वरे पर भरोसा करिरी जिणा दोनो इकोदिया नी है, पर जियां की पबित्र शास्त्र च लिखया है की, जडा कोई इसा व्यवस्था दा पालन करता है, उनी जिन्दा रेणा। 13 पर मसीह सांझो उस श्राप ला छुडायया है जडा व्यवस्था नी मन्णे दिया बजा ने होँदा है, जालू सूली पर मसीह दी मौत होई तां उनी साडे पापां दिया बजा ने अपने उपर श्राप जो लेई लिया। क्योंकि पबित्र शास्त्र च लिखया है की जडा कोई सूली पर मरदा है, सै श्रापित है। 14 मसीह ऐसा इस तांई कित्या, की अब्राहम दी सारी आशीष यीशु मसीह दे जरिये होर जातियां दे लोकां दीकर पुज्जे, कने मसीह पर भरोसा करणे ने सांझो परमेश्वरे दी पबित्र आत्मा मिल्ले, उसा जो देणे दा बायदा परमेश्वरे कितया है। 15 हे मसीह भाईयो, मैं इक आम जिन्दगी ला उदाहरण दिन्दा है, जालू दो लोक इक समझौता करदे न, कने दोनो उस समझौते पर हस्ताक्षर करदे न, तां ऐसा कोई माणू नी जडा उसयो बदली सके। 16 परमेश्वरे अब्राहम ने बायदा कित्या की हर कुसी जो तेरे इक बंश दे जरिये आशीष मिलणी, पबित्र शास्त्र च ए नी लिखया, की “तेरे बंशजो को” जियां की मते लोकां तांई बोलया, पर ए इक माणू दे बारे च गल्ल करता है, जालू ए बोलदा है की “तेरे बंश जो” कने ए माणू यीशु मसीह है। 17 मैं जडा तुहांजो समझणा चांदा है सै ए हे; की परमेश्वरे अब्राहम सोणी बायदे दे 430 साल बाद मूसा दी व्यवस्था दिती। पर असां ए नी बोली सकदे की क्योंकि हुण व्यवस्था है इस तांई परमेश्वरे दे बायदे दी कोई कीमत नी। परमेश्वर दा बायदा हुण भी अटल है कने परमेश्वरे इसयो पूरा करणा। 18 क्योंकि अगर परमेश्वरे लोकां जो मूसा दी व्यवस्था दा पालन करणे दिया बजा ने आशीष दितियो होँदी, तां उनी वायदे जो हटाई देणा था, पर परमेश्वरे अब्राहम जो सै आशीष इस तांई दिती क्योंकि उनी पेहले उसला बायदा कितया था। 19 तां फिरी व्यवस्था दा क्या कम्म है? मूसा दी व्यवस्था जो तालू दीकर बणी रेणा था, की जालू दीकर की अब्राहम दा बंशज नी आया, जिसदे बारे च परमेश्वरे बायदा कितया था, परमेश्वरे व्यवस्था स्वर्गदूतां दे जरिये मूसा जो दिती, जडा परमेश्वर कने लोकां दे बिच बिचोला था। 20 जालू दो

लोकां बिच समझौता होँदा है, तालू समझौता करणे बाले दी जरूरत होँदी। पर परमेश्वर इक ही है, कने जालू उनी अब्राहमे ला बायदा कित्या तां उदे बिच कोई भी बिचोला नी था। 21 तां क्या इदा मतलब ए है की मूसा दी व्यवस्था परमेश्वरे दे बायदे दे खिलाफ है? नी कदी भी नी! क्योंकि अगर व्यवस्था सांझो हमेशा दी जिन्दगी देई सकदी, तां असां इदा पालन करिरी परमेश्वरे सामणे धर्मी होई सकदे थे। 22 पर पबित्र शास्त्र ए बोलदा है की इस संसारे दे लोक पाप दी शक्ति दे गुलाम न, ताकि परमेश्वरे जडा बायदा कितया है, सै उना लोकां जो देई सके जडे यीशु मसीह पर भरोसा रखदे न। 23 पर मसीह दे ओणे ला पेहले कने उस पर भरोसा करणे ला पेहले असां यहूदी लोक मूसा दिया व्यवस्था दे अधीन थे, कने मूसा दे नियम कानून साडी रखबाली करदे थे, कने मूसा दे नियम कानून सांझो तालू दीकर जेला च रखया जालू दीकर की परमेश्वरे सांझो पर मसीह जो प्राग नी कित्या। 24 मसीह दे ओणे दीकर व्यवस्था साडा मार्गदर्शन करणे तांई कने साडी देखभाल करणे तांई दितियो थी, ताकि असां यीशु मसीह च भरोसा करणे ने परमेश्वरे सामणे धर्मी बणी सकदा। 25 पर हुण जालू असां मसीह पर भरोसा करदे न, तां हुण सांझो मार्गदर्शन तांई मूसा दे नियम कानून दी जरूरत नी है। 26 क्योंकि तुसां सारयां मसीह च बपतिस्मा लिया कने मसीह दी जिन्दगी दे अनुसार चलदे न। इस तांई तुसां सारे यीशु मसीह च भरोसा रखणे ला परमेश्वरे दे पुत्र बणी गियो न। 28 मसीह च इक यहूदी या होर जाति या इक गुलाम या इक अजाद माणू ए च कोई अंतर नी। कने ना कोई मर्द है, ना कोई जनानी है। 29 अगर तुसां सारे यीशु मसीह च इक न, तां हुण तुसां अब्राहम दे परिवारे दा हिस्सा न कने तुसां जो सै सब कुछ मिलणा जिदा परमेश्वरे अब्राहम ने बायदा कित्या।

4 मेरे बोलणे दा मतलब ए है, की पुत्र अपने पिता दिया धन दौलत दा मालिक होँदा है, पर जालू दीकर सै इक छोटा बच्चा ही है तालू दीकर उदे च कने इक गुलाम च कोई फर्क नी होँदा। उदा हले दीकर इस पर हक नी है पर उनी सारे केसी दा मालिक बनाणा जडा उदे पिता दा है। 2 सै तालू दीकर घरे बालयां कने देखभाल करणे बालयां दे अधिकारां दे थले रेंदा है जालू दीकर सै उसा उमरा दीकर नी पुज्जी जांदा जालू उनी मालिक बणी जाणा। सै उमर उदा पिता तय करता है। 3 तियां ही असां भी, परमेश्वरे जो जाणने ला पेहले जालू असां बचयां सांई थे, तालू असां इस संसारे दे कुछ रीती रिबाजां दा पालन गुलामा सांई करा दे थे। 4 पर जालू सै सही बकत आई गिया जिसदी परमेश्वरे योजना बणाईयो थी, तां परमेश्वरे अपने पुत्रे जो इस संसार च भेजया, कने इकी जनानिया उसयो पैदा कित्या, सै इक यहूदी दे रूप च पैदा होया था कने मूसा दी व्यवस्था जो मनदा था। 5 ताकि सै सांझो अजाद करी सके, जडे मूसा दी व्यवस्था दे गुलाम थे। कने उनी सांझो गोद लेईकरी अपने बच्चे बच्चे बणाई लिया। 6 असां उदे बच्चे न, क्योंकि परमेश्वरे अपने पुत्रे दी पबित्र आत्मा जो साडे दिले च भेजया है, जडी आत्मा परमेश्वरे जो “मेरा पिता” बोली करी पुकारदा है। 7 इस तांई हुण असां गुलाम नी न, पर असां परमेश्वरे दे बच्चे बणी गियो न; क्योंकि तू परमेश्वरे दा बच्चा है, तां तिजो सै सारा कुछ मिलणा है जडा परमेश्वरे अपने बचयां जो देणे दा वायदा कितया है। 8 जालू तुसां परमेश्वरे जो नी जाणदे थे, उस बकत तुसां उना दे गुलाम थे जडे असल च परमेश्वर है ही नी। 9 पर हुण जालू तुसां परमेश्वरे जो जाणी लिया है या मिंजो ए बोलणा चाईदा की परमेश्वरे सांझो अपने बच्चे दे रूप च अपनाया है, तां फिरी तुसां कजो कमजोर कने उना बेकार पूराणी शिक्षां दे गुलाम होणे तांई बापस जा दे न? क्या तुहांजो दुबारा उना दे ही गुलाम बणने दी इच्छा है? 10 मैं ए सुणया की, तुसां जडे होर जातियां दे भरोसा करणे बाले न, यहूदी लोकां दे खास दिना च, मिनयां, मौसमा कने सालां जो ए सोची करी मदे न की इना ला परमेश्वर खुश होँदा है। 11 जडा कुछ तुसां करा दे न उदिया बजा ने चिंता करा दा है, की तुहाडे बिच सेवा कितियो है सै बेकार ना होई जाऐ। 12 हे मसीह भाईयो, मैं तुहांजो ने बिनती करता है, तुसां सियुदा ही व्यवहार करा जदिया व्यवहार मैं करता है, क्योंकि मैं व्यवस्था ला तियां ही अजाद है जियां तुसां होर जाति दे लोक न; तुसां मेरी अच्छे ने देखभाल कित्या। 13 पर तुहांजो याद होणा, ए इक बिमारिया दिया बजा ला था कि मैं पैली बरी तुहाडे बाल शुभसमाचार दा प्रचार करणा आया। 14 मेरी बिमारी तुहाडे तांई इक पेशानी थी, पर फिरी भी तुसां मिंजो ला नफरत नी कित्या कने ना ही मिंजो दूर जाणा दिता। तुसां मिंजो उसी

तरीके ने अपनाया जियां तुसां परमेश्वरे दे इक स्वर्गादूत जो या यीशु मसीह जो अपनादे न। 15 उस बकत तुसां बडे खुश थे! तुहाड़ी सै खुशी हुण कुथु है, मिंजो पूरा यकीन है की, तुसां भेरे ताई सब कुछ बलिदान करी दिन्दे, “पेथू दीकर की अपणी हखी भी कडी करी मिंजो देई दिन्दे!” 16 तां क्या तुसां सोगी सच्च बोलणे दिया बजा ला मै तुहाडा दूशमण बणी गिया? 17 झूठे गुरु तुहांजो अपने सोगी शामिल करणे दी पूरी कोशिश करा दे न, पर ए भले मकसद ताई नी है; उना दा मकसद तुहांजो मिंजो ला लग करणा है, ताकि तुसां उना दे चेले बणी जान। 18 हमेशा ही खरे मकसद ताई उत्साही होणा खरा हौंदा है कने सिर्फ उस बकत ही नी, जालू मै तुहाडे सोगी हौंदा है। 19 हे भेरे बचचयो, जियां इक जनानी बच्चा जम्मे बकत पीड महसूस करदी है, तियां ही मै इक बरी फिरी तुहाडे ताई दुख झेला दा है। तुहांजो मसीह च मजबूत होई जाणे दीकर, मै इसा पीडा च रेणा चांदा है। 20 मेरी बडी इच्छा है की हुण तुहाडे सोगी रें ताकि मै तुसां ने प्यारे ने गल्ल करी सके, क्योंकि मै असल च नी जाणदा की मै तुसां जो क्या बोलें। 21 जडे मूसा दी व्यवस्था दे गुलाम रेणा चांदि न, बिचार करा की मूसा दे लेख सांझो क्या दसंदे न। 22 पबित्र शाब्र च लिखया है, की अब्राहम दे दो पुत्र थे; उदा इक बच्चा हाजिरा ला पैदा होया, सै इक नेकराणी थी। कने दुज्जा बच्चा सारा ला पैदा होया था, सै उदी घरे बाली थी। 23 अब्राहम दा पुत्र, जडा उसयो नेकराणी हाजिरा ला पैदा होया था, सै सिर्फ माणुए दिया योजना ने पैदा होया था। पर अब्राहम दा दुज्जा पुत्र जडा सारा ला पैदा होया था, उदा जन्म परमेश्वरे दे बायदे जो पूरा करणे ताई होया था। 24 इना दोनो जनानियां दी तुलना दो बाचां ने करी सकदे न, सै बायदा जडा परमेश्वरे इस्राएल दे लोकां सोगी सीने पहाडे च किता था, सै हाजिरा साई है। सै उना बचयां जो पैदा करदी है जडे गुलाम बणदे न। 25 हाजिरा सीने पहाड जो दूशांटी है जडा अरब देश च है। सै अज दे यस्शलेम शेहर साई है जिदे लोक अपने बचयां समेत मूसा दिया व्यवस्था दे गुलाम न। 26 पर स्वर्गीय यस्शलेम अब्राहम दी घरे बाली सारा साई है, कने उदे बच्चे मूसा दिया व्यवस्था दे गुलाम नी न। ए यस्शलेम साडी मां साई है, जडी भरोसा करदी है। 27 क्योंकि पबित्र शाब्र च लिखया है, “हे जनानियां तुसां जिना दे कदी बच्चे नी होए,” कने जिना कदी बच्चे जमणे दी पीडा जो कदी महसूस नी किता, चिल्ला कने खुश होआ! क्योंकि छडियो जनानिया दे बच्चे, उसा जनानिया दे बचयां ला जादा न जडी अपने घरे बाले सोगी रेंदी है। 28 हे मसीह भाईयो, असां भी अब्राहम दे पुत्र इसहाक साई न, जडे परमेश्वरे दे बायदे दे अनुसार पैदा होयो न कने परमेश्वरे दी ओलाद बणी गे। 29 पर हुण तुहांजो सै लोक सतादे न जडे लोक चांदि न की तुसां व्यवस्था जो मन्ना, तियां ही जियां शरीर दिया इच्छा ने पैदा होए इस्राएले आत्मा दी इच्छा ने पैदा होए इसहाक जो सताया था। 30 पर पबित्र शाब्र च लिखया है, “गुलाम जनानी कने उदे पुत्रे जो दूर भेजी दे, क्योंकि गुलाम जनानिया दे पुत्रे जो पिता दी धन दौलत चे कुछ नी मिलणा चाईदा; ए पिता दी घरे बालिया दे पुत्रे जो मिलणा चाईदा।” 31 इस ताई हे मसीह भाईयो, असां गुलाम जनानिया दे बच्चे नी न, जिना जो मूसा दे नियम कनुना जो मणणा जरूरी है। पर असां उसा जनानिया दे बच्चे न, जडी पिता दी घरे बाली है।

**5** मसीह सांझो बचाई लिया है ताकि सांझो मूसा दिया व्यवस्था दा पालन करणे ताई गुलामा सांझे जिणे दी जरूरत नी है। इस ताई अजाद बणी रिया कने व्यवस्था जो मणणे ताई अपने आप जो दुबारा ला गुलाम बणना मत दिया। 2 मै पौलुस तुहांजो जडा बोलदा है, उसयो सुणा की परमेश्वरे दे सामणे धर्मीं होणे ताई अगर खतना करांगे, तां मसीह जडा कुछ कितया है, उसला तुहांजो कोई फायदा नी होणा। 3 मै दुबारा चेताबनी करी बोलदा है, की हर इक माणु जडा ए सोची करी खतना करवांदा है, की परमेश्वरे दिया नजरा च धर्मीं बणी सके, तां उसयो मूसा दिया व्यवस्था दे हर इक हुकमे जो मणणा चाईदा। 4 तुसां जडे मूसा दी व्यवस्था जो मन्नी करी धर्मीं बणना चांदि न, तां तुसां अपने आप जो मसीह कने उदे अनुग्रह ला लग करा दे न, जिसला परमेश्वर तुहांजो बचाई सकदा है। 5 क्योंकि सांझो पबित्र आत्मा दिया तरफा ला पूरी उम्मीद है, की परमेश्वरे सांझो धर्मीं दे स्वे च अपनाई लेणा क्योंकि असां परमेश्वरे पर भरोसा करदे न। 6 अगर तुसां यीशु मसीह दे चेले न, तां इसा गल्ला ला कोई फर्क नी पोंदा की तुहाडा खतना होया है या नी, जडी गल्ल मायने रखदी सै ए है की असां मसीह पर भरोसा

कने परमेश्वरे कने दुज्जे लोकां ताई प्यार रखदे न। 7 तुसां तां मसीह सोगी अपने रिशते च अच्छे ने अग्रे बदा दे थे, हुण तुसां जो मसीह दी सच्ची शिक्षा पर भरोसा करणे ला कुसी जो भी रोकणा नी देणा चाईदा था। 8 ऐसी झूठी शिक्षा परमेश्वर नी दिन्दा, जिनी तुहांजो अपने बच्चे होणे ताई चुणया है। 9 ऐसी झूठी शिक्षा इयां फेला दी है, जियां की इक कहाबत है, “की थोडा दिया खमीर पुरे गुनयो आटे जो खमीर करी दिन्दा है।” 10 मै परमेश्वरे पर भरोसा करदा है की उनी तुहांजो झूठी शिक्षा पर भरोसा करणे ला बचाई रखणा है। बल्कि तुसां मेरियां शिक्षां जो मणणा है। क्योंकि जडे तुहाडे ताई परेशानी खडी करदे न सै कोई भी कनी हो परमेश्वरे उसयो सजा देणी। 11 पर हे मसीह भाईयो, मै ए प्रचार करदा है, की खतना जरूरी नी है, कने इसा बजा ने ही यहूदी लोक मिंजो सतांदि न, अगर मै ए प्रचार नी करे की उद्धार सिर्फ यीशु मसीह दी सुली ने ही है, तां कुनी भी नराज नी होणा। 12 खरा हौंदा, की जडे तुसां जो झूठी शिक्षा दिन्दे न, सै अपने आपे जो नामद बणा लेंदे। 13 हे मसीह भाईयो, तुहांजो परमेश्वरे दे जरिये अजाद होणे ताई चुणया था, इस ताई सांझो मूसा दी व्यवस्था जो मणणे दी जरूरत नी है। पर अपणी आजादी जो शरीर दिया इच्छा जो पूरा करणे दा जरिया मत बणा, पर इक दुज्जे ने प्यार कने सेबा करा। 14 क्योंकि सारी व्यवस्था दा निचोड इकी ही हुकमे च पुरा होई जांटी है, “तू अपने पडोसियां ने अपने सांझे प्यार रखा।” 15 पर अगर तुसां इकी दुज्जे जो डंगरा सांझे मारदे बडदे न, तां तुसां जो ध्यान देणा चाईदा की कुथी तुसां इक दुज्जे दा सत्यानाश नी करी देन। 16 पर मै तुहांजो बोलदा है, की तुहांजो पबित्र आत्मा दी अगुवाई ने जिणे दी जरूरत है, तालू तुसां सै बुरे कम्म नी करणे जिना कम्मा जो तुहाडा पापी सभाब करणा चांदा है। 17 क्योंकि सै कम्म जडे साडा पापी सभाब सांझो ला करबाणा चांदा है, ए सेई चीजां न जडी पबित्र आत्मा नी चांहदी की असां नी करन, क्योंकि ए दोनो इक दुज्जे दे दुश्मण न; इस ताई हमेशा उना खरे कम्मा जो नी करी सकदे जडे असां करबाणा चांदि न। 18 कने अगर तुसां पबित्र आत्मा दी अगुवाई ला जिन्दगी जिन्दे न, तां तुसां मूसा दिया व्यवस्था दे गुलाम नी न। 19 तुसां दिखी सकदे न की पापी सभाब क्या-क्या करदा है, मतलब की व्यभिचार, गंदे कम्म, लुचापन। 20 मूर्तिपूजा, दुणा, बैर, लडाई, जलन, गुस्सा, बिरोध, फूट, अधर्म। 21 डाह, नशे च मतवाले होणा, ऐश मस्ती, कने ऐसे होर भी बडे कम्म करदे न, इना कम्मा दे बारे च मै चिताबनी दे दा है जियां मै पहले भी तुहांजो दिती थी, की ऐसे कम्मा करणे बालयां जो परमेश्वरे दे राज्य दे वारिस नी होणे। 22 सै गणु जडे परमेश्वरे दी आत्मा दे जरिये पैदा होंदे न, सै न प्यार, खुशी, शांती, सबर, कने दया, भलाई, दुज्जयां ताई भरोसेमंद, 23 दीनता, कने संयम; ऐसे व्यवहार पर रोक लागे ताई कोई भी व्यवस्था नी है। 24 सै लोक जडे यीशु मसीह ने रिशता रखदे न, उना अपणी पाप भरी जिन्दगीया दियां बुरियां इच्छां जो सुली पर चढाई दितया है। 25 क्योंकि परमेश्वरे दिया पबित्र आत्मा सांझो इक नोई जिन्दगी दितियो है, इस ताई सांझो पबित्र आत्मा दी अगुवाई ने जिणा चाईदा। 26 सांझो घमंड नी करणा चाईदा, कने इक दुज्जे ला जलन नी करणी चाईदी।

**6** हे मसीह भाईयो, अगर कुनी माणुए कोई पाप किता है, तां तुसां जडे पबित्र आत्मा दी अगुवाई ने चलदे न, उसयो प्यारे ने सही रस्ते पर बापस लोणे ताई उदी सहायता करा, ध्यान रखा की कुथी तुसां अपु ही उस पाप च ना पेई जान। 2 मुशकिलां दा सामणा करदे बकत इक दुज्जे दी सहायता करा। इयां करिरी तुसां मसीह दी व्यवस्था जो मंदे न। 3 अगर तुहांजो लागदा है कुसी दी सहायता करणे ताई तुसां बडे जरूरी न तां तुसां सिर्फ अपने आप जो मुर्ख बणा दे न। तुसां इतणे भी जरूरी नी न। 4 पर हर इक माणु अपने कम्मा जो परखे की क्या सै खरे न, अगर खरे न तां अपने कम्मा पर घमंड करी सकदा है। पर उसयो अपने कम्मा दी तुलना दुज्जे लोकां दे कम्मे सोगी नी करणी चाईदी। 5 सांझो चे हर इक जणा अपने कम्मा दा अपु जिम्मेवार है। 6 ए जरूरी है की जडे लोक परमेश्वरे दे बचन जो सिखदे न, उना दे लोकां जो उना ला खणे कने पैसे दी सहायता मिलणी चाईदी। 7 अपने आप जो धोखा मत दिया, कोई भी कदी भी परमेश्वरे जो धोखा नी देई सकदा है क्योंकि माणु जडा रांदा है सेई बडदा है। 8 क्योंकि अगर कोई माणु सै करदा है जडा उदा पापी सभाब चांदा है, उसयो हमेशा दी मौत मिलणी है पर जडा माणु पबित्र आत्मा दी इच्छा जो पूरा करदा है, उसयो पबित्र आत्मा हमेशा दी

जिन्दगी देणी। (aiōnios g166) 9 असां खरे कम्म करणे च हिम्मत ना छडन, क्योंकि अगर असां कदी हार नी मनगे, तां परमेश्वरे अपने बक्ते पर सांझो इनाम देणा। 10 इस ताई जालू भी सांझो मोका मिल्ले सारे लोकां सोगी भलाई करणी चाइदी; खासकर विश्वासी भाई बेहणा सोगी। 11 ध्यान दिया की कियां बड़े-बड़े अखरां च मै तुहांजो अपने हथां ला ऐ लिखया है। 12 इस ताई की यहदी तुहांजो अपनाई लेन, सै तुहांजो खतना करबाणे ताई बोलदे न, सै ऐसा इस ताई करदे न ताकि लोक उना जो ऐ प्रचार करणे दिया बजा ने तंग ना करन की परमेश्वर लोकां जो सिर्फ इस ताई बचांदा है क्योंकि सै भरोसा करदे न की मसीह सूली पर मरया। 13 क्योंकि ऐथू दीकर की यहदी विश्वासी भी मूसा दी व्यवस्था जो नी मंदे, पर सै चांदे न की तुहाडा खतना होऐ ताकि सै दुज्जे यहदियां सामणे घमंड ने ऐ बोली सकन की तुहाडा खतना उना दिया बजा ने होया है। 14 अगर मै घमंड करदा तां मै इसा गल्ला पर घमंड करदा की साडा प्रभु यीशु मसीह साडे ताई सूली पर मरया। जडा कुछ भी उनी कितया है, उदी बजा ने संसार दियां कुसी भी चिजा दा बश नी रिया, कने मिंजो च हुण धरती दे कम्मा जो करणे दी कोई इच्छा नी है। 15 क्योंकि ना खतना, कने ना जिसदा खतना नी होया कुछ मायने रखदे न, जस्री ऐ की क्या असां इक नोई सृष्टि च बदल्यो न। 16 परमेश्वर उना सारे लोकां पर दया करे कने अपनी शांति दे, जडे इस नियम जो मंदे न, कने उना जो आशीष देणी क्योंकि सै परमेश्वर दे चुणयो लोक न। 17 अगो जो मिंजो कोई दुख ना दे, क्योंकि मेरे शरीर च जडे दाग न सै दसदे न की मै यीशु दा सच्चा सेवक है। 18 हे मसीह भाईयो, मै प्रार्थना करदा है की साडे प्रभु यीशु मसीह दा अनुग्रह हमेशा तुसां सबना पर होदा रे। आमीन।

# इफिसियों

**1** मैं पौलस, परमेश्वर दिया इच्छा ने यीशु मसीह दा प्रेरित है, ऐ चिट्टी इफिसस शहर च रहेबाले परमेश्वर दे पबित्र लोकां जो लिखा दा है। **2** मैं प्रार्थना करता है की साडा पिता परमेश्वर कने प्रभु यीशु मसीह त्हांजो पर अनुग्रह कने शांति बणाई रखे। **3** साडे परमेश्वर कने प्रभु यीशु मसीह दे पिता दी महिमा हो, जिनी सांझो मसीह दे जरिये स्वर्ग ला मिलणे बालियां हर तरा दियां आत्मिक आशीषां दीतियां न। ऐ साडी मसीह सोगी एकता दिया बजा ला होया है। **4** मसीह सोगी इक होई जाणे दिया बजा ने परमेश्वर सांझो इस संसारे जो बणाणे ला पेहेले ही चुणी लिया है, ताकि असां उदे सामणे पबित्र कने निर्दोष होई सकन। **5** क्योकि परमेश्वर सांझो ला प्यार किता इस तांई परमेश्वर बडे पेहेले फेसला लिया की यीशु मसीह दे जरिये सांझो परमेश्वर दी ओलाद होणे तांई गोद ले। परमेश्वर ऐ अपणिया इच्छा ला कने खुशिया ला किता। **6** परमेश्वर ऐसा इस तांई किता की असां उदे अदभुत अनुग्रह तांई उदी स्तुति करन, जडा उनी सांझो मुप्त च देई दिता क्योकि असां उदे प्यारे पुत्रे ने जुडयो न। **7** यीशु मसीह दे खून बहाणे दिया बजा ने असां अजाद होयो न। मतलब की साडे पाप माफ किते न, परमेश्वर दा अनुग्रह बडा महान है जडा उनी सांझो पर दसया। **8** जिसयो परमेश्वर अपने ज्ञान कने समझ ने सांझो पर दसया। **9** परमेश्वर सेई किता, जडा उनी गुप्त रखया था, कने उस गुप्त योजना दे बारे च दसया जडी उनी पेहेले ला ही मसीह दे जरिये पूरा करणे दा फेसला लिया था। **10** जालु इस योजना जो पूरा करणे दा सही बकत आंगा, तालु परमेश्वर स्वर्ग कने धरती दी सारियां चीजां जो मसीह दे अधीन करणा, ताकि सब कुछ मसीह दे हक च हो। **11** परमेश्वर असां यहदियां जो भी मसीह सोगी जोडी करी अपने लोक होणे तांई चुणी लिया क्योकि शुरू ला उदी ऐई योजना थी। परमेश्वर सब कुछ अपणिया इच्छा ने ही करदा है। **12** असां यहदी पेहेले लोक न, जिना मसीह पर आस रखी, कने सांझो इस तांई चुणया था की असां परमेश्वर दी महिमा कने स्तुति करन। **13** तुसां सच्चा संदेश सुणया है, जडा इस बारे च दसदा है की परमेश्वर कियां तुहाडा उद्धार किता जालु तुसां यीशु मसीह पर भरोसा किता था, तां परमेश्वर तुहांजो पबित्र आत्मा दिती जडा उनी अपने लोकां जो देणे दा वायदा कितया था। ऐ दसणे तांई की तुसां परमेश्वर दे न। **14** परमेश्वर सांझो पबित्र आत्मा दिता, जडा इस गल्ला जो पक्का करदा है की परमेश्वर जडियां होर अच्छी चीजां दा वायदा कितया है, सै भी सांझो देणियां, ऐ तालु होणा जालु परमेश्वर अपने लोकां जो पूरी तरहा ने छुटकारा करणा, परमेश्वर दी महिमा कने स्तुति हो। **15** इसा बजा ने, जालु ला मैं यीशु मसीह पर तुहाडे भरोसे कने परमेश्वर दे लोकां तांई तुहाडे प्यार दे बारे च सुणया, **16** तालु ला मैं तुहाडे तांई परमेश्वर दा धन्याबाद करदा है कने अपणिया प्रार्थना च तुहांजो याद करदा है। **17** मैं प्रार्थना करदा है की परमेश्वर जडा साडे प्रभु यीशु मसीह दा महिमामय पिता है, तुहांजो आत्मिक ज्ञान कने समझ दे जिसने तुसां परमेश्वर जो अच्छे ने जाणी सकन। **18** कने मैं ऐ भी प्रार्थना करदा है की सै सच्चे जो समझणे तांई तुहाडी सहायता करे ताकि तुसां उस आस दे बारे च जाणी सकन जडी तुहांजो दिती थी जालु परमेश्वर तुहांजो चुणया था, कने तुसां उना महिमामय आशीषां जो समझी सकन जिसदा वायदा परमेश्वर अपने लोकां ने कितया था। **19** मैं चांदा है की तुसां उदी महानता कने उदी शक्तिया दे बारे च जाणी सका, जडी परमेश्वर बाल साडे तांई है जडे यीशु मसीह पर भरोसा रखदे न। ऐ सेई महान शक्ति है। **20** जिनी मसीह जो मरयां चे जिन्दा किता कने स्वर्गीय जाग च सजे कने आदर बालियां जाग च बठया। **21** ओशु परमेश्वर उसयो हर तरा दी प्रधानता, हक कने शक्ति, कने प्रभुता, कने उदी उपादी हर इक अधिकारिये दिया उपादिया ला उपर है, जडी ना सिर्फ इस लोक च पर ओणे बाले लोक च भी उपर ही रेणी। (aiōn g165) **22** कने परमेश्वर इना सारियां चीजां जो यीशु मसीह दी शक्ति दे अधीन करी दिता कने ऐ सेई है जिसयो परमेश्वर सारे भरोसा करणे बालयां पर अगुवा बणाई दिता। **23** असां भरोसा करणे बाले मसीह दे शरिरे दे अंगा सांई न, कने मसीह साडे बिच पूरी शक्ति दा इस्तेमाल करदा है, जियां सै अपनी शक्तिया दा इस्तेमाल पूरी दुनिया च करदा है।

**2** जालु तुहाडे बाल परमेश्वर दिया तरफा ला नोई जिन्दगी नी थी, तालु तुसां बुरे कम्मा कने पापां दिया बजा ने मरयो लोकां सांई थे। **2** उस बकत तुसां संसारे दे लोकां सांई चलदे थे, जडे परमेश्वर जो नी जाणदे थे कने तुसां शैताने दे हुकमा जो मंटे थे, मतलब की उस प्रधान दा जडा अम्बरे च बुरियां आत्मा पर शासन करदा है, जडा हुण भी उना लोकां दे मने च कम्म करा दा जडे परमेश्वर दे हुकमा जो नी मंटे। (aiōn g165) **3** असां भी उना सांई ही जिन्दे थे कने अपने पापी सभाव दियां इच्छा जो पूरा करदे थे कने जडियां भी साडे शरिरे दियां इच्छां कने बुरे बिचार सांझो ला करणा चांटे थे, असां सेई करदे थे कने बाकी सारयां सांई असां भी बुरे थे कने परमेश्वर दी सजा दे अधीन थे। **4** पर परमेश्वर बडा दयालु है। अपने उस बडे प्यार दिया बजा ने जिसने उनी सांझो ने प्यार किता; **5** जालु असां मसीह पर भरोसा नी कितया था, तालु असां बुरे कम्मा कने पापां दिया बजा ने मरयो लोकां सांई थे। तालु परमेश्वर सांझो जिन्दगी दिती जालु उनी मसीह जो मरयां चे जिन्दा किता; परमेश्वर दे अनुग्रह ने ही तुहाडा उद्धार होया है। **6** क्योकि यीशु मसीह सोगी जुडे होणे दिया बजा ने, परमेश्वर सांझो मरयां चे जिन्दा किता, कने सांझो स्वर्गीय जाग च मसीह सोगी बठया। **7** परमेश्वर ऐसा इस तांई किता ताकि ओणे बाले दिना च संसारे दे लोकां जो दस्सी सके की उदा अनुग्रह कितणा महान है, उस कम्मे दिया बजा ने जडा यीशु मसीह साडे तांई किता है। (aiōn g165) **8** क्योकि जालु तुसां भरोसा किता तां परमेश्वर अपने अनुग्रह ने तुहांजो बचाई लिया है, कने तुसां अपने आप जो नी बचाया पर ऐ परमेश्वर दा दान है; **9** कने ना ही तुहाडे किते भले कम्मा दिया बजा ने है कने इस तांई तुहाडे बाल धमंड करणे दी कोई बजा नी है। **10** क्योकि सांझो परमेश्वर नोए लोकां दे रूप च बणया है ताकि असां यीशु मसीह दे उना भले कम्मा जो करन जिना जो परमेश्वर पेहेले ला साडे तांई तैयार कितया है। **11** इसा बजा ने याद रखा, की तुसां होर जातियां दे रूप च पैदा होयो न, कने यहदी लोक तुहांजो ऐ बोली करी मजाक उडया की तुसां खतना नी करबांटे न कने असां करबांटे न। पर उना दा ऐ रिबाज सिर्फ उना दे शरीरां करदे न। **12** तुसां लोक उस बकत यीशु मसीह जो नी जाणदे न कने परमेश्वर दे चुणयो होयो इयाएली लोकां च शामिल नी थे कने तुसां उना चीजां दे हिस्सेदार नी थे, जिना दा वायदा परमेश्वर यहदियां ने कितया था, कने तुहाडे बाल कोई आस नी थी कने इस संसारे च बिना परमेश्वर दे रेंदे थे। **13** पर हुण तुसां मसीह सोगी इक न कने यीशु मसीह च उदे खून बहाणे दे जरिये नेडे आयो न। **14** क्योकि यीशु मसीह दिया बजा ने साडे बिच शांति होई। पेहेले ऐसा जियां इकी दिबारा यहदियां कने होर जातियां जो लग करी दितया था। सै इक दुज्जे ला नफरत करदे थे, पर हुण मसीह उसा दिबारा जो डाई दितया है कने यहदियां कने होर जातियां जो इक करी दितया है। **15** अपनी मौत दे जरिये उनी मूसा दी व्यवस्था दे सारे नियमा कने रिबाजां जो खत्म करी दिता है ताकि सै यहदियां कने होर जातियां दे बिच शांति करी सके ताकि इक नोआ झुण्ड बणाई सके, **16** कने अपनी मौत दे जरिये मसीह यहदियां कने होर जातियां जो इक करी दिता कने उना जो परमेश्वर मिलाई दिता, इयां करिके इना दोनो जातियां दिया नफरता जो खत्म करी दिता। **17** कने मसीह आई करी होर जातियां जो जडे परमेश्वर ला दूर थे, कने यहदियां जो जडे उदे नेडे थे, उना जो मेल जोल दा शुभसमाचार सुणया। **18** यीशु मसीह दिया बजा ने ही असां सारे इक ही पबित्र आत्मा ने पिता परमेश्वर बाल आई सकदे न। **19** इस तांई होर जातियो, तुसां हुण परदेसी या मुसाफिर नी रे, पर हुण तुसां परमेश्वर दे लोकां सांई स्वदेसी कने परमेश्वर दे परिबारे दे लोक बणी गियो न। **20** कने प्रेरितां कने परमेश्वर दे संदेश देणेबालयां दी नियां पर तुसां इक घरे सांई न जिसदा कुंणे दा पत्थर यीशु मसीह अपु ही है। **21** यीशु मसीह ही है जडा घरे जो इक सोगी जोडी करी रखदा है कने इसयो परमेश्वर तांई इक पबित्र मंदिर दे रूप च बणांदा है, **22** हे होर जाति दे विक्वासियो क्योकि तुसां मसीह सोगी इक न, इस तांई तुहांजो भी होर लोकां ने जोडया जा दा है। ताकि तुसां इक ऐसा घर बणी जान जियु परमेश्वर दी आत्मा रेदी है।

**3** इसा बजा ने, मैं पौलस तुहाडे तांई प्रार्थना करदा है। मैं जेला च कैद है क्योकि मैं होर जातियां च प्रभु यीशु मसीह दा शुभसमाचार दा प्रचार किता। **2** तुसां पक्का सुणया है की परमेश्वर अपने अनुग्रह दे जरिये तुहांजो शुभसमाचार दा प्रचार करणे दी जिम्मेदारी मिजो दितियो है। **3** जियां की मैं पेहेले तुहांजो थोडे

अखरां च लिखया था, की परमेश्वरे मिंजो अपु ही उस गुण योजना जो दसया है। 4 जियां ही तुसां चिड़ी पढणे, तालू ही तुहांजो पता लगणा की मैं उस गुण योजना जो कितणी अच्छे तरिके ने समझदा है। 5 इसा गुण योजना दे बारे च पुराणे बकते दे लोकां जो नी दसया था, पर हण परमेश्वरे पबित्र आत्मा दे जरिये अपने प्रेरितां कने परमेश्वरे दे संदेश देणेबालयां जो खुलासा किता है। 6 परमेश्वरे दी गुण योजना ऐ है, की यीशु मसीह दे श्भसमाचार दे जरिये होर जातियां भी उसा ही विरासत च हिस्सेदार होणा जडी विरासत यहूदियां बाल होगी, कने सै इक ही शरिर दे हिस्से कने परमेश्वरे दे उना वायदयां दे हिस्सेदार होणे जडे उनी यहूदियां ने किते। 7 कने परमेश्वरे जडा मिंजो मुफ्त अनुग्रह दा तोफा दितया है, जिसने मिंजो सौभाग्य मिलया की मैं उदे श्भसमाचार स्पाने दी सेवा करूं। 8 मैं परमेश्वरे दे सारे लोकां च सारयां ला घट काबिल है, पर परमेश्वरे दे अनुग्रह ने मिंजो ऐ सौभाग्य मिलया की मैं होर जातियां जो मसीह दी उस हमेशा दी आशीष दा श्भसमाचार सुंघाई सके जडा साडी सोच ला बाहर है, 9 कने हर कुसी जो ऐ गुण योजना समझाई सके, जिसयो परमेश्वरे जडा सारियां चिंजां जो बणाने बाला है, शुरू ला ही गुण रखया था। (aiōn g165) 10 परमेश्वरे दा मकसद था, की हण कलीसिया दे जरिये परमेश्वर दी अनन्त बुद्धि दा ज्ञान उना प्रधाना कने अधिकारियां पर प्रगट हो जडे अम्बरे दे अणदिकियां जगां च राज करदे न। 11 परमेश्वरे संसार जो बणाणे ला पेहले इसदी योजना बणाईयो थी, जिसयो उनी यीशु मसीह दे जरिये पूरा किता। (aiōn g165) 12 मसीह सोगी जुडने दिया बजा ला कने उस साडे भरोसे दिया बजा ला हण असां परमेश्वरे दिया हजुरी च हिम्मत कने भरोसे ला आई सकदे न। 13 इस ताई मैं बिनती करदा है की जडे दुख मिंजो तुहाडे ताई होआ दे न, उना दिया बजा ला सांझो होसला नी छडणा चाईदा क्योंकि ऐ सब कुछ तुहाडे फायदे ताई है। 14 इस ताई मैं पौलस गोडे भार बेईकरी तुहाडे ताई पिता परमेश्वरे ला प्राथना करदा है। 15 सै सेई है जडा मसीह पर भरोसा करणे बाले परिबारां दा पिता है, जडा स्वर्ग च है कने धरती पर है, 16 मैं प्राथना करदा है की सै अपणिया महिमामय आशीषां चे तुहांजो ऐ दान देई सके की उदिया आत्मा तुहाड शक्तियां ने तुसां अपणी आत्मा जो मजबूत करन, 17 भरोसे दे जरिये मसीह तुहाडे अंदर बसे। मैं प्राथना करदा है की परमेश्वर कने तुहाडा इक दुज्जे ताई प्यार तुहांजो मजबूत बणाए कने तुहांजो पोणे ला बचाये। 18 कने परमेश्वरे दे सारे लोकां सोगी, तुहांजो ऐ पता लगणा की मसीह सांझो ने कितणा प्यार करदा है, जिसदी कोई सीमा नी। 19 कने मैं प्राथना करदा है की तुहांजो मसीहे दे उस प्यारे दा पता लगे जडा माणुआं दिया समझा ला बाहर है, ताकि तुहाडा चरित्र परमेश्वरे दे चरित्र साई बणी सके। 20 परमेश्वरे दी शक्ति सोगी जडा सांझो च कम्म करा दा है, साडे मंगणे या सोचणे ला भी जादा परमेश्वर करी सकदा है। 21 उदी महिमा कलीसिया च कने मसीह यीशु च हमेशा कने केई पिढियाँ-पिढियां दीकर होंदी रे। आमीन। (aiōn g165)

4 इस ताई मैं जडा प्रभु यीशु दी सेवा करणे दिया बजा ला जेला च केदी है, तुहांजो ने बिनती करदा है, की जिसा बुलाहट सोगी परमेश्वरे तुहांजो अपने लोक बणने ताई सदया है, उसा दे काबिल अपणी जिन्दगी जीन, 2 मतलब की सारिया दया ने कने प्यारे ने, कने सबर रखीकरी इकी दुज्जे दे व्यवहार जो सेहन करा, 3 ऐसा करणे दी कोशिश करदे रिया ताकि तुसां लगातार इक दुज्जे ने मिली झुली करी रेन, क्योंकि तुसां परमेश्वरे दिया आत्मा जरिये इक कितयो न। 4 असां सारे विव्वासी इक ही शरिर दे अंगा सांई न, कने असां सारयां जो इक ही पबित्र आत्मा मिलया है। जियां तुहांजो इक आस दिती थी, जालू तुहांजो परमेश्वरे दे लोक बणने ताई चुणया था। 5 असां सबना दा इक ही प्रभु है, असां सिर्फ यीशु मसीह पर ही भरोसा करदे न, असां सारयां जो इक ही बपतिस्मा मिलया है, 6 कने इक ही परमेश्वर है जडा सब लोकां दा पिता है, सै असां सारयां पर राज करदा है, सै असां सारयां दे जरिये कम्म करदा है, कने सै असां सारयां च रेदा है। 7 पर मसीहे सांझो च हर इकी जो उदे माफ दे अनुसारा या उदारता दे कम्म करणे ताई लग-लग कने खास काबलियां त दितियां न। 8 इस ताई पबित्र शाब्द च लिखया है, “सै उचिया जगा च चढया, कने सै अपने सोगी केई कैदियां जो लेई गिया, कने माणुए जो दान दिता।” 9 जालू पबित्र शाब्द बोलदा है की, सै उचिया जगा च चढया, इदा मतलब सिर्फ ऐ है की, सै धरतिया दे सबते निचलिया जगां च उतरया भी था। 10 इस ताई मसीह जडा थले आया, कने सै सेई है जडा

स्वर्ग च सबना ला उचची जगा पर जाई करी बेई गिया। ताकि सै हर जगा होई सके। 11 ऐ मसीह था जिनी ऐ जिम्मेदारी कलीसिया जो दिती: उनी थोडयां जो प्रेरित बणाया, कने केईयां जो परमेश्वरे दा संदेश देणेबाला बणाया, कने केईयां जो श्भसमाचार स्पाने बाला, कने केईयां जो रखबाला, कने शिक्षक बणाया। 12 इना दी जिम्मेबारी ऐ है, की सै परमेश्वरे दे लोकां जो उदा कम्म करणे ताई तैयार करन कने मसीह दा शरिर जडा विव्वासियां दी मंडली है, सै मजबूतिया ला बददी जाऐ। 13 ऐ तालू दीकर होंदा रेणा जालू दीकर की असां अपने भरोसे कने परमेश्वरे दे पुत्रे दे बारे च अपणी समझ च इक होई जादे न। तालू असां काबिल होई जाणा, जियां की मसीह है कने असां पूरी तरा ने उदे सांई होई जाणा। 14 ताकि असां हण बचयां सांई नी रेन, हण असां उना किस्तियां सांई नी होन जिना जो लेहरां अण्णे पिच्छे धकेलदियां कने जिस पासे होआ चलदी उस पासे चली पोंदिया न। इदा मतलब है की सांझो धोखेबाज लोकां दी उना झूठी शिक्षा की नी फसणा चाईदा, जडियां सच्च लगदियां न। 15 पर प्यारे ने सच्च बोली करी कने सांझो हर तरहा ने काबिल होणा चाईदा ताकि असां मसीह सांई होई जान, जडा आणा शरिर दा, मतलब की कलीसिया दा सर है। 16 असां सारे जडे मसीह पर भरोसा करदे न, उदे शरिर दे अंगा सांई न। जियां इक माणुए दा शरिर उदे सारे जोडा ने इक सोगी जुडी करी रेदा है, कने जालू शरिर दा हर इक अंग ठीक तरीके ने कम्म करदा है तां शरिर बडूदां कने मजबूत होंदा है; तियां ही जालू सांझो च हर इक उस कम्मे जो करदा है जडा मसीहे सांझो दितया है तां असां मजबूत कने काबिल बणना कने इक दुज्जे ने होर जादा प्यार करणा। 17 इस ताई उस अधिकारे सोगी जडा मिंजो प्रभुए दितया है, मैं तुहांजो ऐ दसदा है, की भरोसा नी करणे बाले लोकां सांई, तुसां बेकार बिचारां सोगी अपणी जिन्दगी मत जिया। 18 क्योंकि सै समझणे दे काबिल नी न, कने उना दी नासमझी दिया बजा ने जडी उना च है कने सुणने ला मना करणे दिया बजा ने सै उस जिन्दगी ला लग होई गियो न जडा परमेश्वर दिन्दा है; 19 क्योंकि उना जो हण शर्म नी ओदी, इस ताई उना बुरे कम्म करणे ताई अपु जो बदली लिया है, सै लगातार हर तरा दे बुरे कम्म करदे रेदे न, कने सै केदी भी इना चीजां जो छडणा नी चादे न। 20 पर तुसां इस तरा दा व्यवहार करणा नी सिखया जालू तुसां मसीह दे बारे च सिखया। 21 जडा कुछ तुसां यीशु मसीह दे बारे च सुणया है कने जडा कुछ तुहाडे गुरूआं तुहांजो सिखया है, सै पक्का ही उदा सच्चा संदेश है। 22 तुहाडे गुरूआं तुहांजो उस तरिके जो छडणे दी शिक्षा दिती, जिसदे अनुसारा तुसां व्यवहार करदे थे। तुहाडियां बुरियां इच्छा तुहांजो धोखा दिता कने तुहाडी जिन्दगी खराब करी दिती। 23 हण तुहांजो परमेश्वरे जो तुहाडे सोचणे दे तरीके जो बदलना देणा चाईदा, 24 कने परमेश्वरे तुहांजो इक नोआ माणू बणाया है। इस नोए माणुए जो परमेश्वरे सांई बणने ताई बणाया है। मतलब की उसयो असल च धर्मी कने पबित्र होणे ताई बणाया है। 25 इसा बजा ने झूठ बोलणा छडी करी हर इक अपने साथी विव्वासी ने सच्च बोले, क्योंकि असां सारे इक ही शरिर दे अंग न। 26 अगर गुस्सा होई जान, तां ध्यान रखा की तुसां पाप ना करन: दिन मुकणे ला पेहले तुसां गुस्सा होणा बंद करी दिया। 27 कने तुसां शैताने जो धोखा देणे दा मौका मत दिया। 28 चोरी करणे बाला फिरी चोरी न करे; पर उसयो अपने हथां ने इमानदारियां ने कम्म करणा चाईदा, ताकि गरीब लोकां दी सहायता करणे ताई उस बाल कुछ हो। 29 कोई गंदी गल्ल तुहाडे मुए ला ना निकले, पर उना गल्लां जो बोला जडियां लोकां ताई जस्री न, जडियां की उना जो भरोसे च मजबूत करणे च सहायता करन। तालू तुसां जडा कुछ भी बोलगे उनी तुहाडे स्पाने बालयां दा भला करणा। 30 अपने कम्मा दे जरिये परमेश्वरे दिया पबित्र आत्मा जो दुखी मत करा जडा तुहाडे छुटकारे ताई बयाने दे स्पे च दितया है। 31 हर तरा दी कडवाट कने कोप कने गुस्सा, रोष, कने बैरभाव, कने निंदा तुहांजो ला दूर होई जा। 32 इक दुज्जे पर कृपा कने दया करा, कने जियां परमेश्वरे मसीह च तुहाडे पाप माफ किते, तियां ही तुसां भी इक दुज्जे दे पाप माफ करा।

5 तुसां परमेश्वरे दे प्यारे बच्चे न, इस ताई तुसां उदे सांई बणने दी कोशिश करा। 2 तुहाडा सभाब दुज्जयां ताई प्यार भरया हो जियां यीशु मसीहे तुहांजो ने प्यार किता कने तुहाडे पापां दी माफी ताई अपने आपे जो बलिदान करी दिता। परमेश्वर इस बलिदान ला खुश था, क्योंकि ऐ बलिदान उदे ताई खुशबू बाले इत्र सांई था। 3 जदिया की परमेश्वरे दे लोकां ताई सही है, तियां तुसां भी व्यभिचार, कने कुसी

भी तरा दे बुरे कम्म, या लालच दे दियां गल्लां दी चर्चा मत करदे। 4 कने ना ही अश्लील गल्लां करा, कने ना बेकार गल्लां, कने ना ही अश्लील मजाक करा, क्योंकि ऐ गल्लां शोभा नी दिदिया कने सही नी न, पर सिर्फ तुहाडे मुए ला धन्याबाद ही निकले। 5 क्योंकि तुसां ऐ अच्छी तरा ने जाणदे न की कुसी व्यभिचारी दी, बुरे या लालची माणुए दी, जडा मूर्ति पूजणे बाले साईं है, जडा इस संसारे दी चीजां दी अराधना करता है। इना मसीह कने परमेश्वर दे राज्य दा हिस्सा नी बनना। 6 उना लोकां दियां गल्लां ने मुख मत बना जडे इना पापां जो करणे ताईं बहाने बाणणे दी कोशिश करदे न; क्योंकि इना ही कम्मा दिया बजा ने परमेश्वर दे गुस्सा हुकम नी मनणे बालयां पर भडकदा है। 7 इस ताईं तुसां इना पाप भरे कम्मा जो करणे च उना सोगी मत जुडा। 8 तुसां अंधे च रेणेबाले लोकां साईं होदे थे, पर हुण तुसां लौईं च रेणेबाले लोक न, क्योंकि तुसां प्रभु दे लोक न। इस ताईं लौईं च रेणेबाले लोकां साईं कम्म करा। 9 क्योंकि अगर कोई माणु लौईं च है, तां उना चाल चलन अच्छा कने धार्मिक होदा है कने उस पर भरोसा करी सक्ते न, 10 कने ऐ सिखणे दी कोशिश करा की प्रभु जो क्या खुश करता है। 11 कने तुसां इना पाप भरे कम्मा जो करणे च उना सोगी मत जुडा, बल्कि लोकां जो दस्सा की ऐ कम्म बुरे न। 12 क्योंकि अविश्वासी लोकां दे गुण कम्मा दी चर्चा भी सरमा दी गल्ल है। 13 पर जालु कुसी चिजा पर लौ चमकदी है तां हर कोई दिखी सकदा है, की सै चीज कदेईं है क्योंकि जालु कुसी चिजा पर सै पोंदी है, तां चीज खुद लौ बणी जांदी है। 14 इसा बजा ने लोक बोलदे न, “हे सोणे बालयो जागी जा कने मरयां ला जिन्दे होईं जा; मसीह तुहांजो पर लौ चमकाणी।” 15 इस ताईं ध्याने ने दिखदे रिया की तुसां कदेईं जिन्दगी जी दे न। बेअकलयां साईं नी पर जानिया साईं जिन्दगी जिया। 16 कने भलाई करणे दे हर इक मौके दा अकला ने इस्तेमाल करा क्योंकि दिन बुरे न। 17 इस बजा ने अज्ञानी मत बना, पर ध्याने ने समझा की प्रभु तुहांजो ला क्या करवाणा चांदा है। 18 कने शराब पी करी मतबाले मत बणी रिया, क्योंकि इसला लोक असभ्य कने दुज्यां ने बुरा व्यवहार करते न, पर पबित्र आत्मा जो अपने आप पर काबू करणा दिया, 19 अगर तुसां पबित्र आत्मा दे काबू च न, तां तुसां इयां ही करणा; जालु तुसां अपु चे गिटे होंगे तां भजन कने स्तुति करा कने उना होर गाणयां जो गा जडा पबित्र आत्मा तुहांजो दिन्दा है। 20 कने जडा कुछ साडे प्रभु यीशु मसीह किता उदी बजा ने हमेशा सारियां गल्लां ताईं साडे पिता परमेश्वर दा धन्याबाद करते रिया। 21 असां मसीह ताईं श्रदा कने भक्ति रखणे दिया बजा ने इक दुज्जे दे अधीन रिया। 22 हे घरे बालियां, अपने-अपने घरे बालयां दे अधीन रिया, जियां तुसां प्रभु दे अधीन रेंदियां न। 23 क्योंकि घरेबाला तां घरे बालिया दा सिर है, जियां की मसीह कलीसिया दा सिर है; मसीह कलीसिया दा उद्धारकर्ता है, जडी उदा अपना शरीर है। 24 जियां कलीसिया मसीह दे अधीन न, तियां ही घरे बालियां भी हर गल्लां च अपने-अपने पति दे अधीन रेंन। 25 हे पतियो, अपणिया-अपणिया घरे बालिया ने प्यार रखा, जियां मसीह कलीसिया ने प्यार करिके साडे ताईं अपनी जिन्दगी देईं दिती। 26 ताकि उदा बचन कलीसिया दे लोकां पर प्रगट होईंकरी उना जो पाप ला शूद्र करे, जियां कोई माणु कुसी जिजा जो धोईं करी शूद्र करता है; 27 सै अपने लोकां ताईं मरी गया ताकि सै अपने लोकां जो सिद्ध बनाईं सके, कने सै सांझो अपनी ऐसी महिमामय कलीसिया बनाईं करी पेश करी सके, जिना च कोई दोष या पाप या होर कोई बुरी गल्ल नी होणी बल्कि सै पबित्र कने सिद्ध होंगे। 28 इयां होणा चाईंदा, की पति अपणिया-अपणिया घरे बालिया ने अपने शरीर साईं प्यार करे, जडा अपणिया घरे बालिया ने प्यार करता है, सै अपने आप ने प्यार करता है। 29 क्योंकि कुनी भी अपने शरीर ने बैर नी किता बल्कि उदी देखभाल करता है, जियां मसीह कलीसिया दी देखभाल करता है, तियां ही इक माणु खूद दी देखभाल करता है। 30 क्योंकि असां सारे मसीह दे शरीर दे अंगा साईं न। 31 जियां की पबित्र शास्त्र च लिखया है, “इसा बजा ने माणु अपने माता पिता जो छडी करी अपणिया घरे बालिया ने मिल्ली के रेंणा, कने उना दोनो इक तन होंगा।” 32 ऐ इक कीमती कने गेहरी शिक्षा है, कने मै इदी तुलना मसीह कने उस पर भरोसा करणे बालयां सोगी करता है। 33 पर तुसां पर भी लागू होदा है, की हर इक अपणिया घरे बालिया ने अपने साईं प्यार करे, कने घरे बाली भी अपने घरे बाले दी इज्जत करे।

6 हे बचचो, पबित्र शास्त्र च लिखया है; “अपणे माता पिता दी इज्जत करा, तालु तेरे सोगी सब भला होणा कने धरती पर तू जादा दिन जिणा।” ऐ पेहला हुकम है जिसयो परमेश्वर इक वायदे सोगी दितया है। इस ताईं हे बचचो तुसां जडे प्रभु पर भरोसा करदे न, तुसां ताईं ऐईं ठीक है की तुसां अपने माता पिता दी गल्ल मन्ना। 4 हे माता पिताओं, अपने बचयां जो अपने व्यवहार ने गुस्सा ना चढा पर प्रभु दी शिक्षा, कने चेतावनी देईंकरी, उना दी देखभाल करा। 5 हे नोकरो, जडे लोक संसारे दे अनुसार तुहाडे मालिक न, उना दा इमानदारी कने सच्चाईं ने हुकमा जो मन्ना, जियां यीशु मसीह दा मंदे न। 6 ऐ सब सिर्फ दिखाबे ताईं कने लोकां जो खुश करणे ताईं मत करा, तुसां मसीह दे सेवक न, इस ताईं तुहांजो अपने पुरे मने ने सेईं करणा चाईंदा जडा परमेश्वर चांदा है की तुसां करा। 7 तुसां खुशिया ने अपने सेबा दे कम्मा जो करदे रिया, जियां मन्ना तुसां लोकां दी नी पर प्रभु दी सेबा करा दे न। 8 क्योंकि तुसां जाणदे न, की जडा कोई जदिया खरा कम्म करगा, चाऐ सै नोकर हो, चाहे सै अजाद हो, प्रभुऐ उसयो उदा इनाम देणा है। 9 इयां ही हे मालिको, तुसां उना जो धमकियां नी देणिया चाईंदियां, पर तुहांजो अपने नोकरां सोगी सियुदा ही व्यवहार करणा चाईंदा, जियां मै उना ने बोल्या है की सै तुसां ने करन। क्योंकि तुसां जाणदे न की, उना दा कने तुहाडा दोनो दा मालिक स्वर्ग च है, कने सै कुसी दा पक्ष नी लेंदा। 10 आखरी च, आत्मिक रूप च प्रभु दी अपार शक्तिया ने मजबूत बना। 11 असां माणुआं दे खिलाफ लडाईं नी लडा दे न। असां प्रधाना कने अधिकारियां कने अंधेरे दे हाकिमा ने कने आत्मिक संसारे दिया शक्तिया दे खिलाफ लडा दे न। इस ताईं सारे हथियार पेहनी लिया जडा परमेश्वर दिदा है कने जालु सै बुरा दिन ओणा है तालु तुसां शैताने दियां चालां ने अपने आप जो बचाईं सक्ते न। कने जालु ऐ लडाईं खत्म होईं जाणी तालु भी तुसां मजबूतिया ने खडे रेईं सकणा। (aiōn g165) 14 इस ताईं जियां की इक सिपाईं लडाईं ताईं तैयार होंगे ताईं अपनी कम्मा च बेल्ट बनदा है, तियां ही परमेश्वर दी सच्चाईया जो बेल्टा साईं बन्नी लिया, कने जियां झिलम सिपाइये दी लडाईया च रक्षा करदी है, तियां ही जालु शैतान तुहांजो पर हमला करता है तालु तुहाडा धार्मिक व्यवहारे तुहाडी रक्षा करणी है। 15 कने परमेश्वर दी शांति दा शुभसमाचार सुणाणे ताईं तुहाडी इच्छा ठीक तियां ही होणी चाईंदी, जियां की इक सिपाईं लडाईं ताईं तैयार होंगे ताईं जूते पेहनदा है; 16 कने इक होर गल्ल है, जियां इक सिपाईं दुशमणे दे तीरां ला बचणे ताईं ढाल लेंदां है, तियां ही मसीह पर पक्का भरोसा रखा ताकि मसीह तुहांजो शैतान दे नुकसान करणे बाले जल्दे तिरां ला बचाईं रखे। 17 जियां इक सिपाईं अपने सिरे जो लडाईं च बचणे ताईं टोप लगाईं रखदा है, तियां ही परमेश्वर तुहांजो शैताने ला बचाणा। जियां इक सिपाईं अपने बचाब ताईं इक तलवार पकडदा है, तियां ही अपने बचाब ताईं परमेश्वर दे बचने दा इस्तेमाल करा। 18 कने हर बक्ते जियां पबित्र आत्मा अगुवाई करता है तियां प्रार्थना करा कने बिनती करदे रिया, कने जागदे रिया कने हमेशा पबित्र लोकां ताईं प्रार्थना करदे रिया, 19 कने तुसां मेरे ताईं भी प्रार्थना करा की परमेश्वर मिंजो बोलणे ताईं शब्द दे, ताकि मै हिम्मताने शुभसमाचार दे बारे च जडा सारे लोकां ताईं है, उदियां गुण गल्लां उना जो समझाईं सके, 20 इस ताईं मै जंजिबा च जकड़यो होऐ राजदूत साईं सेबा करा दा है। प्रार्थना करा की जियां मिंजो बोलणा चाईंदा तियां ही हिम्मताने शुभसमाचार दा प्रचार करी सके। 21 कने तुखिकुस जडा प्यारा भाई कने प्रभु च भरोसे झोंगा सेवक हे, उनी तुहांजो सारियां गल्लां दस्सी देणियां ताकि तुसां जांणी सकन की मेरी हालत क्या हे कने क्या करा दा है। 22 उसयो मै तुहाडे बाल इस ताईं भेजया हे, की तुसां साडिया हालता जो जाणन, कने सै तुहांजो उत्साहित करी सके। 23 मै प्रार्थना करता है की पिता परमेश्वर कने प्रभु यीशु मसीह तुसां भरोसा करणे बालयां जो शांति दे, ताकि इसा बजा ने तुसां इक दुज्जे ने प्यार करन कने लगातार प्रभु यीशु मसीह पर भरोसा करन। 24 परमेश्वर तुसां सारयां पर अनुग्रह करे जडे उस यीशु ने प्रभु यीशु मसीह जो प्यार करदे न जडा प्यार कदी खत्म नी होदा।

# फिलिपियों

**1** मैं पैलुस तीमुथियुस सोगी ए चिट्ठी लिखा दा है कने असां यीशु मसीह दे सेबक न। मैं ए चिट्ठी फिलिप्पी शोहरे च रेणे बाली कलीसिया दे अगुवां जो कने सेवकां समेत परमेस्वर दे पबित्र लोकां तांई लिखा दा है। **2** मैं ए प्रार्थना करता है कि, साडे पिता परमेस्वर कने प्रभु यीशु मसीह दी तरफा ला तुहांजो अनुग्रह कने शांति मिलदी रे। **3** पहेले दिने ला तुसां यीशु मसीह दे शुभसमाचार पर भरोसा किता, कने शुभसमाचार जो फेलाणे च साडे हिस्सेदार रे। इसा बजा ला मैं जालू भी तुहाडे बारे च सोचदा है, तां परमेस्वरे दा धन्यवाद करता है, कने मैं खुशिया सोगी तुहाडे सारयां तांई उदी सहायता तांई प्रार्थना करता है। **6** मिंजो इसा गल्ला दा भरोसा है की परमेस्वरे तुसां च खरा कम्म शुरू कितया है, उनी यीशु मसीह दे दुबारा मुडी ओणे दीकर उसयो पूरा भी करणा। **7** ठीक है कि मैं तुसां सारयां तांई ऐसा ही बिचार करे, क्योंकि मेरे मने च तुहाडे तांई खास जगा है, क्योंकि जालू मैं केद च है, ए शुभसमाचार दी सच्चाईया ला जबाब देणे तांई तुसां मेरे सोगी परमेस्वर दे अनुग्रह च साथी न। **8** इदे च परमेस्वर मेरा गबाह है कि मैं यीशु मसीह सांई प्यार करिरी तुसां सारयां जो मिलणे दी इच्छा करता है। **9** मैं ए प्रार्थना करता है, की तुसां पूरी समझ कने ज्ञान ला इक दुज्जे सोगी लगातार प्यार च बढे जा, **10** इस तांई की तुसां जडियां खरियाँ गल्लां न उना जो अपनाई करी योग्य बणी जा, ताकि मसीह दे मुडी ओणे दीकर सच्चे कने निर्दोष बणी रेई सकन। **11** कने मसीह यीशु दे जरिये पैदा होणे बाले धार्मिकता दे कम्मा ला अपणे जो भरी लिया, जिसला परमेस्वरे दी महिमा कने स्तुति होंदी रे। **12** है मसीह भाईयो, मैं चांदा है, की तुसां सारे भी ए जाणी लिया जडा मिंजो पर बितया है, उसने मतयां लोकां शुभसमाचारे पर भरोसा किता है। **13** ऐथू दीकर की महाराजा कैसरे दे राज्य दी सारी सेना कने बाकी सारे लोकां जो भी ए पता चली गिया कि मैं मसीह दे शुभसमाचार तांई जेला च है। **14** कने हुण मेरे केद च होणे दिया बजा ला, प्रभु यीशु च जडे भाई न, उना चे केई पुरे भरोसे सोगी परमेस्वरे दा बचन बिना कुसी डरे दे कने हिम्मत ला सुणा दे न। **15** कुछ लोक तां जलन कने लडाईया दिया बजा ला मसीह दा प्रचार करते न कने कुछ भली सोच ला प्रचार करणे च मेरी सहायता करे न। **16** जडे भली सोचा सोगी प्रचार करते न, सै ए इस तांई करते न क्योंकि सै मिंजो सोगी प्यार करते न कने सै जाणदे न मैं शुभसमाचारे दे जबाब देणे तांई जेला च रखया है। **17** पर जडे लोक जलन रखदे न, सै अपनी मतलबी इच्छा दिया बजा ला मसीह दा प्रचार करते न पर इमानदारिया ला नी करते, ए समझीकरी की सै जेला च मेरी परेशानियां जो बधाई सकन। **18** तां कया होया? बस इतना ही, की हर तरीके ला चाए इठिया बजा ला चाए सच्चाईया ला, मसीह दा शुभसमाचार सुणया जांदा है, कने मैं इसला खुश है, कने हमेशा खुश रेंणा। **19** क्योंकि मैं जाणदा है की तुहाडिया प्रार्थना ला, कने पबित्र आत्मा ला जडी यीशु मसीह भेजियो है, उदी सहायता ने कैदा ला अजाद होई जाणा। **20** मेरी दिले दी इच्छा कने आस है, की कदी भी मैं कुसी भी हालात च शर्मिंदा ना होए, पर मिंजो मसीह दे बारे च बोलणे दी हिम्मत होंदी है, जियां मैं पहले किता था, चापे मैं जिंदा रे या मेरी जां, मैं अपनी पूरी जिन्दगी ने मसीह दा आदर करते रे। **21** क्योंकि अगर मैं जिंदा रें, तां सिर्फ मसीह तांई है, कने अगर मेरी जां तां ए मेरे तांई होर जादा ठीक होणा क्योंकि तालू मैं मसीह सोगी रेंणा। **22** पर अगर शरीर च जिन्दा रें तां मैं मसीह तांई कम्म करी सकदा है, पर मैं नी जाणदा की कुसयो चुणे। **23** मन तां करता की मेरी जां, कने मसीह बाला जाई करी रें, क्योंकि ए बडा ही अच्छा है। **24** पर मेरा जिन्दा रेंणा होर भी जरूरी है, क्योंकि तुहांजो मेरी सहायता दी जरूरत है। **25** कने इस तांई की मिंजो इदा भरोसा है। की मिंजो पता है की मैं जिंदा रेंणा है, कने तुसां सबना सोगी रेंणा, मैं तुहांजो भरोसे च मजबूत होणे च कने खुश रेणे च तुहाडी सहायता करणा। **26** कने जालू मैं दुबारा ओगा, तां मेरिया बजा ने तुहाडे बाल यीशु मसीह पर घमंड करणे दी होर भी बजा होणी। **27** ध्यान रखा की तुहाडा सबाब मसीह दे शुभसमाचार दे अनुसार हो। चापे मैं आई करी तुहांजो ने मिल्ले या नी, मैं तुहाडे बारे च ऐं सणे की तुसां इक ही भाव च, कने इक मन होईकरी शुभसमाचार दे भरोसे तांई सोगी मेहनत करते न। **28** कने कुसी भी गल्ला तांई अपने विरोधियां ला डरदे नी। तुहाडी हिम्मत उना तांई खात्मे दा

साफ चिन्ह है, पर तुहाडे तांई उदारे दा, कने ए परमेस्वरे दिया तरफा ला है। **29** क्योंकि परमेस्वर तुहांजो ए मोका दितया है, की ना सिर्फ तुसां मसीह पर भरोसा करा, पर उस तांई दुख झेलणे तांई बरदान भी मिलया है। **30** कने तुहांजो तियां ही मेहनत करणी है, जियां तुसां मिंजो फिलिप्पी शोहरे च करते दिखया है, कने जिना दुखां दे बारे च तुसां सुणदे न जडे मिंजो जेला च हुण भी न।

**2** अगर तुसां मसीह च होणे दिया बजा ला उत्साहित न, या उदे प्यार ला अराम मिलया हो, पबित्र आत्मा सोगी संगती हो क्योंकि मसीह तुहाडे तांई कष्णामय कने दयालू है। **2** तां मेरी ए खुशी पूरी करा की इक मन रिया, कने इक ही प्यार, इक ही चित, कने इक ही इच्छा रखा। **3** मतलब कने घमंड सोगी कुछ मत करा, पर दीनता ला इक दुज्जे जो अपणे ला खरा समझा। **4** हर कोई अपने ही फायदे दी नी, पर दुजयां दे फायदे दी भी चिंता करा। **5** जदेया यीशु मसीह दा सबाब था तदिया ही तुहाडा भी हो; **6** यीशु मसीह पूरी तरह ला परमेस्वर था, पर उनी इस प्रभुता पर अपना हक नी रखणा चाया। **7** पर उनी अपना सारा ईश्वरिया हक छडी दिता कने इक दास सांई बणी गिया, कने इक आम माणू बणी गिया। **8** कने माणू बणी करी अपणे आपे जो दीन किता कने सै परमेस्वरे दा इतना आज्ञाकारी रिया कि सै मेरो तांई भी तैयार होई गिया, हां, उनी सूली दी मौत जो भी इक अपराधी सांई सेहन करी लिया। **9** इसा बजा ला परमेस्वरे उसयो सारयां ला उच्चे आदर दिया जगा च बैठया कने उसयो सै ना दिता जडा सारयां ना ला बढिया है, **10** कि जडे स्वर्ग च कने धरतिया पर न कने जडे धरतिया दे थले न; सै सारे यीशुए दे ना जो आदर देणे तांई गोडे टेकन, **11** कने परमेस्वर पिता दी महिमा तांई हर कोई मनी ले की यीशु मसीह ही प्रभु है। **12** इस तांई हे मेरे प्यारो, जालू मैं तुहाडे सोगी था तालू तुसां हमेशा परमेस्वरे दे हकमा जो मनया है। हुण जालू मैं तुहांजो ला दूर होई गिया है, तां तुहांजो होर भी गल्ल मनणा चाईदी। डरदे कने कम्मे होए तुसां सारयां जो उना चीजां जो करणा चाईदा जडियां उना लोकां तांई सही न जिना जो परमेस्वरे बचाया है। **13** क्योंकि परमेस्वर ही है, जडा तुहांजो च कम्म करा दा है, कने तुहांजो करणे दी इच्छा कने शक्ति दे दा है, जडा उसयो खुश करता है। **14** सारे कम्म बिना बुड-बुडाए कने बिना बेहसा ला करा, **15** ताकि तुसां इस बुरे कने पापी संसारे च परमेस्वरे दी सिद्ध ओलादी सांई पबित्र कने निर्दोष जिन्दगी जिया, इस संसारे दे लोकां बिच तुसां अन्धरे दे तारयां सांई चमका, जियां तुसां उना जो बचन सुणादे न जडा अनन्त जिन्दगी दिन्दा है। **16** कने जालू यीशु मसीह दुबारा मुडी करी ओणा तां मिंजो घमंड होणा की मेरी कोशिश कने मेरी मेहनत बेकार नी गई। **17** कने जालू मैं तुहांजो शुभसमाचार सुणया, तुसां प्रभु यीशु पर भरोसा किता कने तुसां सेवा तांई अपनी जिन्दगी देई दिती है। इस तांई, भले ही मिंजो शुभसमाचार सुणाणे दिया बजा ला मारी दिया, तभी मैं तुहाडे सोगी खुश रेंणा। **18** मेरी विनती है की तुसां भी इयां ही खुश रिया कने मेरिया खुशिया च शामिल होई जा। **19** मिंजो प्रभु यीशु मसीह च आस है की मैं तीमुथियुस जो तुहाडे बाल तोल्ली भेजणा, ताकि तुहाडा हाल सुणीकरी मिंजो उत्साहित होई जां। **20** क्योंकि मेरे बाल ऐसे सबाबे दा कोई नी है, जडा सच्चे मने ला तुहाडी चिंता करे। **21** क्योंकि सारे अपणे-अपणे फायदे दे बारे च सोचते रेंदे न, ना की यीशु मसीह दे बारे च। **22** पर तुसां जाणदे न की तिभोथियोसे कियां दसया की सै बफादार है, उनी शुभसमाचार दे प्रचार च मेरा इस तरिके ला साथ दिता, जियां इक पुत्र अपने पिता दा साथ दिन्दा है। **23** इस तांई मिंजो आस है की जियां ही मिंजो पता लगगा की मेरी क्या हालत होंगी, तियां ही मैं उसयो तोल्ली भेजी दिगा। **24** कने मिंजो प्रभु च भरोसा है की मैं अपु भी तोल्ली ओणा है। **25** पर मैं इफ्रुदितस जो तुहाडे बाल भेजणा जरूरी समझया। जडा मेरा भाई है, कने साथी कने सोगी लडणे बाला, तुहाडा संदेश मेरे बाल पुजाणे बाला, कने जरूरी गल्लां च मेरी सेवा टहल करणे बाला है। **26** उदा मन तुसां सारयां च लगया था, इस तांई सै बेचेन रेंदा था, क्योंकि तुसां उदिया बमारिया दा हाल सुणया था। **27** कने पक्का ही सै बिमार तां होई गिया था, ऐथू दीकर की मरणे वाला भी था, पर परमेस्वरे उस पर दया करिके उसयो ठीक किता। परमेस्वरे सिर्फ उस पर ही नि, पर मिंजो पर भी दया किती ताकि मैं पहले ला भी जादा दुख सेहन ना करे। **28** इस तांई मैं उसयो भेजणे तांई होर भी जादा उत्सुक है कि तुसां उसयो दुबारा दिखीकरी खुश होई जान कने तुहाडे बारे च मेरी चिंता भी घटी जा। **29** इस तांई तुसां प्रभु च उस सोगी बढिया



खुशिया ला मिलनयो, कने तहांजो उदा कने ऐसे लोकां दा आदर करणा है। 30 क्योंकि सै मसीह दे कम्मा ताई अपने प्राण खतरे च पाई करी मौत दे इतणे नेडे आई गिया था, ताकि सै मेरी सहायता करी सके, क्योंकि तसां मेरी सहायता दूर होणे दिया बजा ला नी करी सकदे न।

**3** इस ताई हे मेरे मसीह भाईयो, प्रभु यीशु च खुश रिया। सेई गल्लां तहांजो बार-बार लिखणे च मिंजो कोई तकलीफ नी होंदी, पर मैं तहांजो झूठे गुरूआं ला बचाणा चांदा है। 2 बुरे लोकां ला साबधान रिया जडे कुतयां साई न कने उना लोकां ला भी साबधान रिया जडे बोलंदे न की उद्गार ताई तहांजो खतना करणा जरूरी है। 3 क्योंकि सै बोलंदे न की असां ही परमेख्वरे दे सच्चे लोक न, जडे परमेख्वरे दी भक्ति उदी आत्मा ला करदे न, कने अपणी जिन्दगी च यीशु मसीह सोगी इक होईकरी खुश होंदे न, कने अपणियां खुद दियां कोशियां पर भरोसा नी करदे न। 4 पर मिंजो बाल अपणियां खुद दी कोशियां पर भरोसा रखणे दी खरी बजा है, अगर कोई इयां सोचदा है, की उदे बाल अपने आप पर भरोसा रखणे दी खरी बजा है, तां मेरे बाल उसला भी बदीकरी बजा है। 5 जालू मैं अठां रोजां दा होया तां परमेख्वरे दे हुकमा ला मेरा खतना होया, मैं जमींदा ही इस्पाएली है, कने बिन्ध्यामीन दे गोत्र दा है, मेरे माता पिता इब्रानी थे; मैं भी पक्का इब्रानी है; फरीसी होणे दिया बजा न मैं सकती ला मूसा दी व्यवस्था जो मनया। 6 अगर मैं अपणी जलन दे बारे च बोलें, तां मैं कलीसिया जो तंग करणे बाला था; कने यहूदी व्यवस्था दा पालन करणे च, मैं ईक धार्मिक माणु था कने सारी व्यवस्था दा पालन करदा था। 7 पर जडियां गल्लां मेरे फायदे दियां थियां, मैं उना जो मसीह दिया बजा ला नुक्सान समझया। 8 क्योंकि प्रभु यीशु मसीह जो जाणना बाकी सारियां चीजां जो जाणने ला बदीकरी है, कने मैं बाकी सारियां चीजां जो बेकार समझदा है। जिदिया बजा ला मैं सब कुछ छडी दिता कने मैं उना जो कूडा समझदा है, ताकि मसीह जो होर भी गहराई ला जाणे। 9 ताकि मैं उसी सोगी एकता च रेई सके, मेरी धार्मिकता मूसा दी व्यवस्था दे हुकमा पर आधारित नी है, पर ऐ सै धार्मिकता है, जडा सिर्फ परमेख्वर उना जो दिन्दा है, जडे मसीह पर भरोसा करदे न, 10 मैं ऐ चांदा है की मसीह जो होर जाणी लें कने उदे मरयां च जी उठणे दी शक्ति जो जाणी सके कने उदे दुखे च शामिल होईकरी उदी मौत च उदे साईं बणी जां, 11 ताकि मैं भी मरयां च फिरी जिन्दा होणे दा अनुभव करी सके। 12 मैं ऐ दाबा नी करदा की, मिंजो ऐ सब पेहले ही मिल्ली गिया है, पर मैं कोशिया करी के अग्रे बदा दा है, की मिंजो सै मिल्ली जाणे, जिस ताई प्रभु यीशु मसीह मिंजो चुणया है। 13 मेरे मसीह भाईयो, मैं ऐ दाबा नी करदा की मिंजो मेरा लक्ष्य मिल्ली गिया है; पर ऐ इक ही कम्म करदा है, की जडियां गल्लां होई गियां न, उना जो भुली करी अग्रे क्या होणा उस मकसदे ताई बडी मेहनत करा दा है, 14 कने निशाने पासे दोडदा जान्दा है, ताकि मैं स्वर्गे जाणे दा इनाम पाई सके, जिदे ताई परमेख्वरे मिंजो प्रभु यीशु दे जरिये स्वर्गे जो सदया है। 15 इस ताई असां चे जितणे भी आत्मिक स्ने च समझदार न, सै सारे इक मन रखन, कने अगर कुसी गल्ला च तहाडा होर ही बिचार हो, तां परमेख्वरे उसयो भी तहांजो पर प्रगट करी देणा। 16 इस ताई जिथू दीकर परमेख्वरे सांझो पर सच्चाई जो प्रगट कितया है, उसी दे अनुसार ही सांझो चलणा भी चाईदा। 17 हे मसीह भाईयो, तसां मेरे साईं व्यवहार करा कने उना लोकां पर ध्यान दिया जडे मेरे साईं व्यवहार करदे न, कने जिदिया व्यवहार तसां सांझो करदे दिखया जालू असां तहाडे सोगी थे। 18 क्योंकि मते न जिना दे बारे च मैं पेहले भी अच्छे न दसया है, कने हुण भी रोई-रोई करी दस्सा दा है, की ऐथू केई लोक न जडे ऐसी जिन्दगी जिन्दे न, जिसने पता चलदा है की सै मसीह ही सुली पर मौत दे खिलाफ न। 19 नाश होणा ही उना दा अंत है, सै शरिर दियां इच्छा जो पूरा करणे ताई जिन्दे न, कने अपने शर्मनाक कम्मा पर घमंड करदे न कने हमेशा संसारे दियां चीजां दे बारे च सोचदे रेंदे न। 20 पर असां स्वर्ग दे निबासी न, कने असां अपने उद्गारकर्ता प्रभु यीशु मसीह ही स्वर्ग ला बापस ओणे दा इंतजार करा दे न। 21 यीशु मसीह अपणियां उसा शक्तिया ने, हर इक चीजा जो अपने बसे च कितया है, कने साडे कमजोर, संसारिक शरिर दा रूप बदली कर, अपणी महिमा दे शरिर साईं बणाई देणा है।

**4** इस ताई हे मेरे प्यारे मसीह भाईयो, मिंजो तसां लोकां ने मिलणे दी बडी इच्छा है। तसां, जडे मेरी खुशी कने मुकुट न, प्रभु च लगातार टिकी रिया। 2 मैं

यहदिया कने सुन्तुखे दोनों बेहणा ला विनती करदा है, की प्रभु च इकी दुज्जे ला मिली जुली करी रिया। 3 हे सच्चे साथी सुन्तुखे, मैं तिजो ला भी विनती करदा है, कि तू उना जनानिया दी सहायता कर की सै मेल मिलाप करी लेन, क्योंकि उना मेरे सोगी श्भसमाचार प्रचार करणे च, क्लेमंस कने मेरे उना होर साथियां सोगी बडी मेहनत किति, जिना दे ना जिन्दगी दी कताबां च लिखयो न। 4 प्रभु च हमेशा खुश रिया; मैं फिरी बोलदा है, खुश रिया। 5 सारे लोक तहाडे कोमल सभाव जो जाणी सकन। प्रभु यीशु दा ओणा नेडे है। 6 कुसी भी गल्ला दी चिंता मत करा; पर हर इक हालात च तहाडे निवेदन, प्राथना कने विनतिया दे जरिये धन्याबाद सोगी परमेख्वरे सामणे रखे जान। 7 तालू परमेख्वरे दी शांति, जडी माणुआं दी समझा ला परे है, तहाडे दिले कने तहाडे बिचारां जो मसीह यीशु च संभाली करी रखगी। 8 इस ताई हे मसीह भाईयो, अंत च, जडियां-जडियां गल्लां सच्च न, कने जडियां-जडियां गल्लां आदरणीय न, कने जडियां-जडियां गल्लां धर्मी न, कने जडियां-जडियां गल्लां पबित्र न, कने जडियां-जडियां सुंदर न, कने जडियां-जडियां गल्लां प्रशंसा दे काबिल न, जडियां-जडियां गल्लां उत्तम कने आदर दियां गल्लां न, उना पर ही तहाडा मना लगी रे। 9 जडियां गल्लां तुसां मिंजो ला सिखियां, कने ग्रहण कितियां, कने सुणियां, कने मिंजो च दिखियां उना दा ही पालन करा, तां शांति दे परमेख्वरे तसां लोकां सोगी रेणा। 10 मैं प्रभु च बडा खुश है, की हुण तहांजो इतणे दिना बाद मिंजो पैसे भेजणे दे बारे च फिरी बिचार आया है; पक्का तहांजो शुरू च भी इदा बिचार था, पर तहांजो मौका नी मिल्ला। 11 ऐ नी की मिंजो कुसी जरूरत दिया चिजा दी कर्मी है क्योंकि मैं हर तरा दे हालतां च खुश रेणा सिखया है। 12 मैं बडे थोडे च भी जीणा जाणदा है, कने जरूरत ला जादा च भी रेणा जाणदा है; हर इक गल्ला च कने सारे हालतां च मैं रजणा कने जालू मेरे बाल खाणे ताई बडा कुछ होंदा है, कने जालू मेरे खाणे ताई बडा घट होंदा है, तां मैं दोनों हालतां च रेणा सीखी लिया है। 13 मसीह दे जरिये, जडा मिंजो शक्ति दिन्दा है, उदे च मैं सब कुछ करी सकदा है। 14 तमी तसां खरा किता कि मेरे इना मुश्किलां दे दिना च पैसे भेजी करी मेरी सहायता किति कने मेरे उना दुखां च मेरे साथी होणे। 15 हे फिलिप्पी शेहर दे लोकों, तसां तां अपु ही जाणदे न जालू मैं तहांजो यीशु मसीह दा श्भसमाचार सुणया था कने जालू मैं तहाडी जगा ला मकिदूनिया प्रदेश जो गिया, तालू तहांजो छडी होर कुनी भी कलीसिया च लगे-दगे दे बारे च मेरी सहायता नी किति। 16 इयां ही जालू मैं थिस्सलूनिकी शेहर च था, तालू भी तसां मेरी सहायता जो पूरा करणे ताई इक बरी नही पर दो बरी मिंजो पैसे भेजे थे। 17 मैं ऐ इस ताई नी बोलदा की मैं पैसा चांदा है की इसयो उना अच्छी चिजां दी सूची च शामिल करा, जिना जो तसां पेहले ही करी बैठयो न, कने जिस ताई परमेख्वरे तहांजो इनाम देणा। 18 मेरे बाल सब कुछ है, कने बडा जादा भी है; जडियां चीजां तसां इफ्रुदितस दे हथे ला भेजियां थियां उना जो पाई करी मैं रजी गिया है, ऐ इक तोफे साईं है, जिदे च मिठी खुशबू ओआ दी है, जिसयो सै ग्रहण करदा है कने ऐ परमेख्वर जो खुश करदा है। 19 मेरा परमेख्वर भी उस धने दे अनुसार जडा महिमा सोगी यीशु मसीह च है, तहाडी हर इक घाटे जो पूरा करगा। 20 साडे पिता परमेख्वरे दी महिमा युगां-युगां दीकर होंदी रे। आमीन। (aiōn g165) 21 यीशु मसीह च सारे पबित्र लोकां जो मेरा नमस्कार बोला। जडे मसीह भाई मेरे सोगी न, तहांजो नमस्कार बोलंदे न। 22 सारे पबित्र लोक, खासकर जडे महाराजा कैसरे दे घराने दे न, तहांजो नमस्ते करदे न। 23 मैं प्राथना करदा है की साडे प्रभु यीशु मसीह दा अनुग्रह हमेशा तसां सारयां सोगी रे।

# कुलस्सियों

**1** मैं, पौलस ए चिट्ठी लिखा दा है, जडा परमेस्वरे दी इच्छा ने चुणया होया यीशु मसीह दा प्रेरित है कने मसीह भाई तीमथियुस दिया तरफा ला, 2 मसीह च उना पबित्र कने भरोसे दे काबिल मसीह भाईयां दे ना जडे कुलस्से शेहर च रैंदे ना। साडे पिता परमेस्वरे दिया तरफा ला तुसां सारयां जो अनुग्रह कने शांति मिलदी रे। 3 जालू असां तुहाडे ताई प्राथना करदे न, असां अपने प्रभु यीशु मसीह दे पिता मतलब की परमेस्वरे दा धन्यवाद करदे न। 4 क्योकि असां सुणया है, की यीशु मसीह पर तुहाडा भरोसा है, कने सारयां पबित्र लोकां ला प्यार करदे न; 5 क्योकि तुसां उम्मीदा दिया बजा ला ऐसा करदे न, जडी परमेस्वरे स्वर्ग च तुहाडे ताई रखया है। जिदे बारे च तुसां पेहले ही सुणी बैठयो न जालू लोक पैली बरी तुहाडे बाल आये कने तुहांजो यीशु मसीह दे बारे च शुभसमाचार सुणया, जडा की परमेस्वरे दा सच्चा वदेश है। 6 ऐ शुभसमाचार सारे संसार च फेला दा है कने मते भरी लोक यीशु मसीह पर भरोसा करा दे न। ऐ हर जगा जिन्दगी बल्ला दा है, ठीक तियां ही जियां तुसां पैली बरी सुणया था, कने सच्चाई जो समझया था की परमेस्वर उना लोकां दे पापां जो माफ करता है, जडे यीशु मसीह च भरोसा करदे न। 7 उदी ही शिक्षा तुसां साडे प्रिय साथी इफ्रास ला सीखी है, जडा साडे ताई मसीह दा भरोसे दे लायक सेवक है। 8 उनी सान्जो दुज्जे लोकां ताई तुहाडे प्यार दे बारे च दसया है, जडा पबित्र आत्मा तुहांजो दितया है। 9 इस ताई जिस दिने ला ऐ सुणया है, असां भी तुहाडे ताई हमेशा प्राथना किती, की परमेस्वरे दी आत्मा तुहांजो अकल कने समझ दे, की उदी इच्छा जो पुरे तरिके ला समझी सकन। 10 असां ऐ प्राथना करदे न ताकि तुसां ऐसी ही जिन्दगी जी न जदिया परमेस्वरे दे लोकां दा होणा चाईदी, कने तुसां परमेस्वरे जो खुश करी सकन कने तुसां लगातार भले कम्मा जो करदे रिया जिसने तुसां परमेस्वर जो जाणने च बददे जा। 11 कने असां ऐ भी प्राथना करदे न की परमेस्वर अनेखी शक्तिया ला बडा जादा मजबूत बणाए, ताकि तुसां सबर कने खुशिया ला मुशकिलां जो सेहन करी सकन। 12 कने पिता परमेस्वर दा धन्यवाद करदे रिया, जिनी सांजो अपणी विरासत च हिस्सेदार होणे दे काबिल बणया, जिसयो उनी अपने पबित्र लोकां ताई स्वर्ग च तैयार कितया है। 13 क्योकि ओई सांजो शैताने दिया शक्तिया ला छुडाई करी अपने प्यारे पुत्रे दे राज्य च लेईकरी आया है। 14 परमेस्वरे अपने पुत्रे दा बलिदान करिरी सांजो शैताने दिया शक्तिया ला अजाद कित्ता कने साडे पापां जो माफ कित। 15 कोई भी परमेस्वरे जो नी दिखी सकदा है, जालू उदा इकलोता पुत्र माणू बणी गिया तां, उनी लोकां दे सामणे परमेस्वर जो प्रगट कित्ता कने सारा कुछ बणणे ला पेहले सै मौजूद था कने परमेस्वरे जडा कुछ बणया उस पर उदा सारयां ला बडा हक है। 16 क्योकि सै मसीह था जिनी सारा कुछ बणणे ताई परमेस्वरे सोगी कम्म कित्ता, स्वर्ग दी हो, या धरती दी हो, दिखियो हो या अणदिखयो हो, क्या सिंहासन, क्या प्रभुताएँ, क्या प्रधानताएँ, क्या हक, सारियां चिजां उनी ही बणाईयां कने उदे ताई ही बणियां न। 17 कुछ भी बणने ला पेहले, मसीह पेहले ला ही था, कने सारियां चीजां उदी बणाईयो व्यवस्था ला ही कम्म करदियां न। 18 मसीह कलीसिया दी अगुवाई करता है, जियां सर माणुए दे शरीर जो काबू च रखदा है; सैई आदि है कने मरी के जी उठणे बालयां लोकां च पेहला है, कने सारियां गल्लां च सैई प्रधान बणे। 19 क्योकि पिता परमेस्वर दी खुशी इसी च ही है, की परमेस्वर दा पूरा सभाब यीशु मसीह च हो। 20 परमेस्वरे अपना पुत्रे जो भेजणे दा फेसला लिया, जिनी अत्मा खून बहाया कने सूली पर उदी मौत होई। परमेस्वरे ऐ अपने कने सारियां चीजां बिच मेल मिलाप करणे ताई कित्ता, इयां करणे ला उनी अपने कने स्वर्ग च शामिल कने धरती च शामिल सबना च शांति बणाई। 21 इसला पहले तुसां परमेस्वरे ला बडे दूर थे। तुसां परमेस्वरे दे दुशमण थे क्योकि तुहाडे बिचार कने तुहाडे कम्म बुरे थे। 22 पर हण पिता परमेस्वरे अपने पुत्रे जो माणू बणाई करी मरणे ला तुहाडा भी मेल करी लिया है, ताकि तुहांजो अपने सामणे पबित्र, निष्कलंक कने निर्दोष बणाई करी पेश करी सके। 23 तुहाडा भरोसा मजबूत रेणा चाईदा, जियां की घर इक पक्की नी पर बणया जांदा है, हण साडे बाल आस है क्योकि असां शुभसमाचार पर भरोसा करदे न, जिसदा प्रचार सारी धरतिया पर कितया है, कने जिस शुभसमाचार दा सेवक मैं, पौलस बणया। 24

हण मैं तुसां लोकां ताई दुख झेलदा है, इदी बजा ला खुश है। कने मैं लगातार अपने शरीर च दुख सेहन करा दा है, जियां यीशु मसीह सेहन किते थे, कने ऐ दुख मैं मसीह दी कलीसियां ताई अपने शरीर च सेहन करा दा है, जडा उदा शरीर है। 25 इसा कलीसिया ताई तुहाडे ताई परमेस्वरे दी दितियो सेबा ताई सेबक चुणया है, ताकि मैं परमेस्वर दे शुभसमाचार जो पुरे तरिके ने प्रचार करी सके। 26 मतलब की उस भेद जो जडा पिछली पीढियां दे लोकां ला गुप्त रिया, पर हण परमेस्वरे दे उना पबित्र लोकां पर प्रकट होया है। (aiōn g165) 27 जिना पर परमेस्वरे प्रकट करणा चाया क्योकि परमेस्वर चांदा की इस भेद जो जाणन की मसीह दी महिमा दी क्या कीमत है, जडा सारयां ताई है, ऐ भेद यीशु मसीह खुद है, जडा तुसां च है, ऐई साडी इकलोती आस है जिसने महिमा होणी। 28 असां मसीह दे बारे च सारयां जो दसदे न, सारयां जो चेताबनी दिन्दे कने सारयां जो पुरिया समझा ला सिखां जडा परमेस्वरे सांजो दितया है, ताकि ऐ पक्का करी सकन की हर कोई मसीह च सिद्ध होई सके जालू सै परमेस्वरे दे सामणे खडे होंगे। 29 ऐई बजा है की मैं इतणी मेहनत करदा है। मैं ऐसा करणे ताई परेशनियां दा सामणे करदा है जडा की मसीह दिया शक्तिया ला ही होंदा है, जडा भेरे अंदर कम्म करदा है।

**2** मैं चांदा है की तुसां जाणी लिया की तुहाडे कने उना दे जडे लौदीकिया शेरे च न, कने उना सबना ताई जिना ला मैं नी मिलया है, मैं कडी मेहनत इस ताई करदा है, 2 मैं ऐसा इस ताई करदा है क्योकि मैं उना जो तेरे भरोसे च मजबूत करणा चांदा है, सै इक सोगी प्यार च शामिल होई जान, कने मैं चांदा है की उना जो पूरा भरोसा हो क्योकि उना जो परमेस्वर दे भेद दी योजना दे बारे च पूरी समझ है, जडा अपु मसीह है। 3 ऐ सै है जडा परमेस्वरे दी अकल कने ज्ञान जो जाणदा है, जडा की उस खजाने सांई है, जिसयो लुकाया गिया था। 4 ऐ मैं इस ताई बोला दा है, की कोई भी माणू तुहांजो उना दी झूठी शिक्षा पर भरोसा करणे ताई राजी करी के धोखा ना दे। 5 क्योकि मैं तुहाडे सोगी नी है, फिरी भी मैं लगातार तुहाडे बारे च सोचदा है, मिंजो खुशी है की तुसां इक न कने तुसां अपने भरोसे च जडा मसीह पर है, जिन्दगी जिन्दे रिया। 6 इस ताई, जियां तुसां प्रभु यीशु मसीह जो प्रभु मन्नी करी अपनाई लिया, तियां ही उदे पिच्छे चलंदे रिया। 7 तुसां मसीह दे भरोसे च मजबूत बणी रिया, जियां इक खूब जड पकड़दा कने इक घर इक नीयां पर मजबूत रेंदा है, इयां ही तुसां भी अपने भरोसे च बददे जा, कने जादा ला जादा धन्यवाद करदे रिया। 8 साबधान रिया की कोई तुहांजो संसारिक ज्ञान कने बेकार गल्लां ने मुखं नी बणाई ले, ऐ गल्लां सुणने जो तां ज्ञान बालियां लगदियां न, पर ऐ गल्लां सिर्फ संसार दे लोकां दिया तरफा ला न, ना की मसीह दिया तरफा ला। 9 इयां ना हो की ऐ लोक तुहांजो धोखा दे न, क्योकि जालू मसीह माणू बणया, तालू भी सै पूरी तरहा परमेस्वर था। 10 यीशु मसीह ही सारी शक्तियां कने अधिकारां दा प्रधान है, इस ताई अगर तुसां मसीह सोगी जुडयो न तां तुसां उदे च सिद्ध बणा। 11 जालू तुसां मसीह पर भरोसा कित्ता, तालू तुहाडा खतना कुसी माणुए ला नी होया है, जियां यहदी लोक करदे न, पर मसीह दे जरिये तुहाडा सै खतना होया है, जडा तुहाडे पाप करणे बाले सभाब जो दूर करदा है। 12 कने तुसां बपतिस्मा लिया, ऐ इसा गल्ला जो दसदा है की तुहाडा पापी सभाब मसीह सोगी कबरा च दबी दिता है कने जालू तुसां नोए सभाबे ने पाणुए ला बाहर आये। ऐ इस ताई होया क्योकि तुसां भरोसा कित्ता की परमेस्वरे अपणी शक्तिया ने मसीह जो मरयां च जिन्दा कित्ता। 13 जालू परमेस्वरे तुहांजो भी मसीह सोगी जिन्दा कित्ता, जडे अपने अपराधां कने अपने पापी सभाबे ला अजाद नी थे, कने साडे सारे अपराधां जो माफ कित्ता। 14 ऐ इयां था जियां परमेस्वरे साडे पापां दे दस्तावेज जो खत्म करी दिता, जिना च साडे खिलाफ दोष लिखयो थे। जालू मसीह जो सूली पर चढ़ाया तालू उनी उस देस्तावेज जो पुरे तरिके ने खत्म करी दिता। 15 परमेस्वरे मसीह दे सूली पर मरणे ने संसार दी सारी शक्तियां कने अधिकारां जो हराई करी उना जो सबना सामणे बेइज्जत कित्ता, कने उना जो हराई करी खुशी मनाई। 16 इस ताई तुहांजो कोई धोखा ना दे, कने कोई तुहाडे खाने पीणे जो लेईकरी, या त्योहारे, या नोआ चंद्रमा, या सब्ब दे दिना दे बारे च तुहाडा कोई न्याय ना करे। 17 क्योकि ऐ सारे नियम कने कानून इक छोआं दे सांई है, पर हकीकत मसीह च ही है। 18 कलीसिया इक शरीर है यीशु मसीह उस शरीर दा सर है, उसी ने ही शरीर दे सारे हिस्सायां दी देखे रख होंदी है कने जालू इना जो इक सोगी जोडदे न, तां सै बददे न

जियां परमेश्वर चांदा है की से बदे। कोई माणु दीनता कने स्वर्गदांतां दी भक्ति करिके तूहांजो दौड़ दे इनामे च दूर ना करे। ऐसे माणु दिखियां गल्लां दा दाबा करदे न, जिसने से घमंड ने भस्मो रेदे न, कने जडे मसीह जो छडी दिन्दे न। 20 जालू तूहाडा पापी सभाव मसीह सोगी मरी गया, तां तूहांजो होर भी जादा इस संसारे दियां शिक्षां जो नी मनणा पोणा। इस तांई कजो अजे भी इस संसारे दे नियमा जो मंदे न जियां अजे भी संसार तूहांजो काबू करा दा है। 21 से ऐसे नियम बणादें न की तूसां ऐ मत छुंटे, ऐसा मत खांदे, ऐ मत खांदे। 22 क्योंकि ऐ सारे नियम कुसी कम्मे दे नी, क्योंकि ऐ माणुआं दे हुकमा कने शिक्षा दे अनुसार न। 23 इना शिक्षां च अपनी इच्छा दे अनुसार बणाईं भक्ति दे रिबाज, कने जूटी दीनता, कने अपने शरिरी सोगी कठोर बर्ताब करणा ही इक ज्ञानी होणे दा डोंग करदा है, पर हकीकत च ऐ नियम लोकां जो उना दिया बुरियां जो रोकणे च मदद नी करदे।

**3** जियां परमेश्वरे यीशू मसीह जो मरयां चे जिन्दा किता तियां ही तूहांजो जिन्दा किता है, इस तांई उना चीजां दिया तोपा च लगी रिया जडियां स्वर्गे च रखियां न जिशू मसीह परमेश्वरे दे बखे सबे आदर बालिया जगा पर बैठया है। 2 धरतिया दियां चीजां नी स्वर्गे दियां चीजां पर ध्यान ला, 3 क्योंकि तूसां अपने पाप बाले सभावे तांई मरी गियो न, कने तूहाडी नोई जिन्दगी मसीह सोगी परमेश्वरे च लुकियो है। 4 जालू मसीह जडा तूहांजो नोई जिन्दगी दिन्दा है, बापस इसा धरती पर ओगा, तालू तूसां भी उदे सोगी कने उदी महिमा च भागिदार होई जाणा। 5 इस तांई तूसां बुरे कम्मा जो छडी दिया जडे तूहाडे पापी सभाव ला जुडया न। जियां, व्यभिचार, अशुद्धता, दुष्कामना, बुरी लालसा, कने लालच जो जडा मूर्तिपूजा दे बराबर है। 6 क्योंकि लोक इना बुरे कम्मा जो करदे न कने परमेश्वर उना जो सकत सजा देणी। 7 कने तूसां भी, जालू इना बुराइयां च जिन्दगी कटदे थे, तां तूसां भी ऐ कम्म करदे न। 8 पर हुण तूसां भी इना सबना जो मतलब की गुस्सा, रोष, बैरभाव, निंदा, कने गालियां बकणा, तूसां ऐ कम्म करणा छडी दिया। 9 इक दुज्जे सोगी झूठ मत बोला क्योंकि तूसां पुराणे पापी सभाव कने हुण सारे बुरे कम्मा जो छडी दिन्दा है। 10 हुण तूसां इक नोए माणु बणी गियो न, ऐ नोआ सभाव जडा अपने सृष्टिकर्ता सांई जादा ला जादा बणदा जांदा है ताकि तूसां उसयो होर भी अच्छे ला समझी सकन। 11 इसा बजा ला नोईया जिन्दगिया च ना तां कोई होर जाति दा रिया, ना यहूदी, ना खतना, ना बिना खतने बाला, ना जंगली, ना विदेशी, ना गुलाम कने ना अजाद बस मसीह ही है जडा सब कुछ है कने तूसां सारायां दे अंदर रेंदा है। 12 इस तांई परमेश्वर तूहांजो प्यार करदा है कने उनी तूहांजो अपने पबित्र लोक होणे तांई चुण्या है, इस तांई तूसां लोकां जो, कम्पा, भलाई, दीनता, कने नम्रता, कने सेहनशीलता बाला बणना चाईदा। 13 अगर कुसी जो कुसी पर दोष लागे दी कोई बजा हो, तां इक दुज्जे दी सेहन करी लिया, कने इक दुज्जे दे अपराध माफ करा: जियां प्रभुऐ साडे अपराध माफ किते, तियां ही तूसां भी माफ करा। 14 कने इना सारायां ला जरूरी गल्ले ऐ है की इक दुज्जे ला प्यार करा, इयां करणे ला तूसां पुरे तरीके ला इक झूट होई जाणा। 15 मसीह तूहाडे मना च शांति दे, तूसां सब इक ही शरिरे दे हिस्से न, इस तांई तूसां इक दुज्जे सोगी जडी शान्ति मसीह दिंदा है उसा शांतिया ला रणे तांई सदयो न, कने तूसां धन्यवादी बणी रिया। 16 मसीह दे बचना दे बारे च हर बकत सोचा, ताकि ऐ सब केसी जो काबू करे जडा तूसां सोचदे कने करदे न; सिद्ध ज्ञान ला इक दुज्जे जो सिखा, कने चेताबनी दिया, कने अपने-अपणे मने च धन्यवाद सोगी परमेश्वरे तांई भजन, स्तुतिगान कने आत्मिक गीत गा। 17 जडा भी तूसां बचना ला बोलंदे न या जडा भी कम्म करा सब प्रभु यीशू दे नाऐ ला करा, कने उसला प्रभु परमेश्वरे दा धन्यवाद करा। 18 हे पत्रियो, अपने-अपणे घरे बालयां दे अधीन रिया क्योंकि मसीह दे पिच्छे चलणे बालयां तांई ऐ ही ठीक है। 19 हे घरे बालयो, अपनी-अपणी लाडियां ने प्यार रखा, कने उना सोगी प्यारे ला बर्ताब करा। 20 हे बच्चो, सबना गल्लां च अपने-अपणे माता-पिता दे हुकमा जो मनना करा, क्योंकि प्रभु इसला खुश होंदा है। 21 हे माता पिताओं, अपने बचयां जो बार-बार डांटी करी तंग मत करा, इयां ना हो की उना दा दिल टूटी जा। 22 हे सेबकों, जडे इस संसारे च तूहाडे मालिक न, सारियां गल्लां च उना दे हुकमा दा पालन करा, माणुआं जो खुश करणे बालयां सांई दिखावे तांई नी, पर मने दिया सच्चाई कने परमेश्वरे दे डरे न करा। 23 जडा कुछ तूसां करदे न, पुरे मने न करा, ऐ सोची करी की माणुआं तांई नी पर प्रभु तांई

करा दे न। 24 क्योंकि तूसां जाणदे की तूसां जो इदे बदले च प्रभु ला सै आशीष मिलणी है जडी परमेश्वरे तूहाडे तांई रखियो है। तूसां जिस मालिक दी सेवा करा दे न, सै मसीह है। 25 क्योंकि जडा कोई बुरा करदा रेंदा है, उसयो परमेश्वरे ला सजा मिलणी क्योंकि परमेश्वर कुसी दा पक्षपात नी करदा।

**4** हे मालिकों, स्वर्गे च तूहाडा भी मालिक है, ऐ समझीकरी, अपने-अपणे दासां सोगी न्याय कने इकोदिया व्यवहार करा। 2 लगातार प्राथना करदे रिया, कने जालू तूसां प्राथना करन तां सतर्क रिया कने हमेशा परमेश्वरे दा धन्यवाद करदे रिया। 3 कने इदे सोगी-सोगी साडे तांई भी प्राथना करदे रिया, की परमेश्वर साडे तांई बचन दा प्रचार सुणने दा मोका दे, की असां मसीह दे उस भेद जो पुरे तरीके ला सुणाई सकन, इसा ही बजा ला मैं जेला च है। 4 कने प्राथना करा दा की मैं साफ तरीके ला कने खुलेआम मसीह दे बारे च दर्से। 5 हर मोके दा अच्छे ला इस्तेमाल करा ऐ दखणे तांई की तूसां विश्वासी न, कने जडे लोक यीशू मसीह पर भरोसा नी करदे उना सोगी समझदारिया ला बर्ताब करा। 6 उना ला हमेशा प्यारभाव ला गलबत करा, कने एसियां गल्लां करा जिसला सै तूहाडियां गल्लां च रची लेन, अगर तूसां ऐसा करदे न, तां तूहांजो पता लागणा की उना जो कियां जबाब देणा है, जडे तूहाडे भरोसे दे बारे सबाल च उठादें न। 7 प्यारे मसीह भाई कने भरोसे दे लाइक सेवक, तुखिकुस जडा प्रभु यीशू मसीह च मेरा साथी है, मेरियां सारियां गल्लां उनी तूहांजो दर्सी देणियां न। 8 उसयो मैं इस तांई तूहाडे बाल भेजया है, ताकि तूहांजो पता लगी सके की साडे क्या हलत न, कने सै तूहांजो भरोसे च मजबूत करी सके। 9 उदे सोगी उनेसिमस जो भी भेजया है; जडा भरोसे दे लाइक कने प्यारा मसीह भाई कने सै तूहाडे ही शेहरे दा है, उना तूहांजो ऐथू दियां सारियां गल्लां दे बारे च दर्सी देणा। 10 अरिस्तरखुस जडा मेरे सोगी कैदी है, कने बरनबास दा भांजा मरकुस तूहांजो नमस्कार बोलदा है। जिदे बारे च तूहांजो पेहले ही चिठी मिली बेठियो है की अगर से तूहाडे बाल ओपे, तां उसला ढगे ला व्यवहार करनयो। 11 कने यीशू जिसयो यरुसलम बोलंदे न, तूहांजो नमस्कार करदा है। यहूदी लोकां च बस ऐई तिन परमेश्वरे दे राज्य तांई मेरे साथी कने मिजो उत्साहित करणे बाले न। 12 इपफ्रास जडा तूहाडे ही शेहरे ला है, कने मसीह यीशू दा दास है, तूहांजो नमस्कार करदा है। कने हमेशा तूहाडे तांई प्राथना करदा है, ताकि परमेश्वर तूहांजो भरोसे च मजबूत कने सिद्ध करे की तूसां परमेश्वरे दी इच्छा दा पालन करा। 13 मैं उदा गबाह है, कि सै तूहाडे तांई कने लौदीकिया शेहरे कने हियरापुलिस शेहरे दे लोकां तांई लगातार प्राथना करदा है। 14 प्यारे वैध लूका कने देमास दा तूहांजो नमस्कार बोलंदे न। 15 लौदीकिया शेहरे दे मसीह भाईयां कने बेहणा जो कने नुमफास कने उदी घरे दी कलीसिया जो नमस्कार बोलनयो। 16 जालू ऐ चिठी तूहाडे ऐथू पढी जांगी, तां ऐसा करनयो की लौदीकिया शेहरे दिया कलीसिया च भी इसयो पढनयो, कने जडी चिठी लौदीकिया ला ओणी उसयो तूसां भी पढनयो। 17 फिरी अरखिपुसे ला बोलनयो की “जडी सेवा प्रभु च तिजो दितियो है, उसा सेवा जो अच्छे तरीके ने पूरी करनयो।” 18 मैं, पौलस तूहांजो नमस्ते करणे तांई चिठी दा ऐ हिस्सा तूहांजो अपने हथे ने लिखा दा है, याद रखणा की मैं जेला च है, कने मेरे तांई प्राथना करनयो, तूसां पर परमेश्वरे दा अनुग्रह होंदा रे। आमीन।

# 1 थिस्सलुनीकियों

**1** ऐ चिड़ी मैं पौलस, सिलवानसुस कने तीमथियसुस दिया तरफा ला थिस्सलुनीकिया शेहर दिया कलीसिया दे ना लिखा दा है, जडे पिता परमेस्वर कने प्रभु यीशु मसीह च न। मैं प्राथना करता है की पिता परमेस्वर तुहांजो पर अपना अनुग्रह कने तुहांजो शांति दे। 2 असां अपणियां प्राथना च तुहांजो याद करदे कने हमेशा तुसां सबना दे बारे च परमेस्वरे दा धन्यवाद करदे न, 3 कने जालू असां अपने पिता परमेस्वरे ने प्राथना करदे न, तालू असां तुहाडे उना कम्मा जो याद करदे न, जडे तुसां भरोसे दिया बजा ला करदे न, कने जडिया सकत मेहनता ने तुसां मसीह भाईयां दी सहायता करदे न क्योकि तुसां उना ने प्यार करदे न कने दुख तकलिफा जो सेहन करदे न क्योकि तुहांजो आस है, की प्रभु यीशु मसीह जल्दी बापस ओणे बाला है। 4 हे मेरे मसीह भाईयो, तुहांजो ने परमेस्वर बडा प्यार करता है, असां जाणदे न, की परमेस्वरे तुहांजो अपने लोक होणे ताई चुण्या है। 5 क्योकि प्रभु यीशु मसीह दा शुभसमाचार तुहाडे बाल सिर्फ अखरां च ही नी पर पबित्र आत्मा दिया शक्तिया, कने पूरी मजबुतिया ने तुहाडे बाल पुज्या है, तुहांजो पता है की तुहाडे उद्धार ताई तुसां बिच साडा चाल चलन कदिया था। 6 तुसां बडे भरी दुखां च थे पर तुसां पबित्र आत्मा दी दीतियो खुशिया सोगी शुभसमाचार जो अपनाई करी साडे उदाहरण कने प्रभु दे उदाहरण दा अनुसरण किता। 7 ऐथू दीकर की तुसां मकिदुनिया प्रदेश कने अखाया प्रदेशे दे सारे विन्वासियां ताई आदर्श बणी गे। 8 क्योकि तुहाडे ऐथू ला ना सिर्फ मकिदुनिया प्रदेश कने अखाया प्रदेशे च प्रभु दा बचन सुणया, पर तुहाडे भरोसे दी चर्चा हर पासे फेली गेई जडा परमेस्वरे पर है, हर जगा जिथू असां गे, ओथु सांझो लोक मिल्ले जिना सांझो तुहाडे भरोसे दे बारे च दसया, जडा परमेस्वरे पर है, इस ताई सांझो तुहाडे बारे च कुछ बोलणे दी जरूरत नी है। 9 क्योकि सै लोक अपु ही दुज्यां जो दसदे न की तुसां साडा स्वागत किता जालू असां तुहाडे बाल आणे; कने तुसां कजो मूर्तियां ला दूर होईकरी परमेस्वरे बाल आये ताकि तुसां जिन्दे कने सच्चे परमेस्वरे दी सेवा करन। 10 कने तुसां स्वर्ग ला परमेस्वरे दे पुत्रे दे ओणे दी आस रखा दे न, जिसयो परमेस्वरे मरयां चे जिन्दा किता, मतलब की यीशुए जो, जडा सांझो परमेस्वरे दे ओणे बाले गुस्से ला बचादां है।

**2** हे मसीह भाईयो, तुहांजो अपु ही पता है, साडा तुहाडे बाल ओणा फायदेमंद होया। 2 तुसां अपु ही जाणदे न की तुहाडे बाल ओणे ला पेला असां फिलिप्पी शेहेर च कितणे दुख झेले। फिर भी परमेस्वरे सांझो इतणी हिम्मत दिती, की तुहाडे शेहेर दे लोकां ला साडा इतणा बिरोध होणे बाद भी असां परमेस्वरे दा शुभसमाचार तुहांजो सुणया। 3 क्योकि साडा उपदेश ना तां धोखा था, कने ना ही गलत इरादे ने, कने ना ही छलावा है। 4 परमेस्वरे सांझो काबिल समझीकरी शुभसमाचार दितया है, इस ताई असां माणुआं जो नी, असां मना जो परखणे बाले परमेस्वरे जो खुश करणे ताई उपदेश दिन्दे न। 5 तुहांजो पता है, की असां कदी भी चापलूसी दियां गल्लां नी करदे थे, क्योकि असां ना ही कदी पैसे दे लालचे दे इरादे ने कुछ किता, परमेस्वर इसा गल्ला दा गबाह है की असां ऐसे नी थे। 6 असां ना माणुए ला, ना ही तुहाडे ला कने ना ही कुसी होरसी ला आदर नी चांदे थे। पर मसीह दे प्रेरित होणे दिया बजा ला तुसां ला सहायता मंगणा साडा हक था। 7 पर जियां माता-पिता अपने बचयां जो पालदे न, तियां ही असां भी तुहाडे बिच रेई के इद्दती दीनता दसियो है। 8 असां तुहांजो सोगी इतणा प्यार करदे न की सिर्फ परमेस्वरे दा शुभसमाचार सुणने ताई ही नी पर तुहाडे ताई अपनी जान देणे ताई भी तैयार थे। इस ताई की असां तुहाडे सोगी बडा प्यार करदे थे। 9 हे मसीह भाईयो, तुसां साडी मेहनत कने प्यारे जो याद रखदे न, की असां इस ताई रात दिन कम्म धंधे करदे होये परमेस्वरे दे शुभसमाचारे दा प्रचार तुहाडे च किता, ताकि असां अपनी जरूरतां ताई तुसां कुसी पर भी कोई बोझ ना बणन। 10 तुसां अपु भी कने परमेस्वर भी गबाह है, तुसां विन्वासियां सोगी साडा सभाव किताणा सच्चा, धर्मी कने निर्दोष था। 11 तुहांजो पता है, की जियां पिता परमेस्वर अपने बचयां सोगी बर्ताब करता है, तियां ही असां भी तुसां सबना जो उपदेश, कने प्रोत्साहित करदे, कने समझां दे थे। 12 की तुसां अपनी जिन्दगी इस तरीके ला जिया जडी परमेस्वरे जो खुश करे, जडा तुहांजो अपने राज्य कने माहिमा च हिस्सेदार होणे ताई सददा है। 13 इस

ताई असां भी हमेशा परमेस्वरे दा धन्यावाद करदे न; की जालू तुसां परमेस्वरे दा संदेश सुणया जडा असां प्रचार किता, तां तुसां उसयो माणुए दा नी पर परमेस्वरे दा सच्चा संदेश समझी के अपनाया, सै ही संदेश तुसां च कम्म करता है, जडे यीशु मसीह पर भरोसा रखदे न। 14 हे मसीह भाईयो, इस ताई तुसां भी परमेस्वरे पर भरोसा करणे बाले लोकां साई न, जडे यहदी प्रदेश च रेंदे न कने मसीह च न, क्योकि तुहांजो भी अपने लोकां ला तदिया ही दुख मिल्ला जदिया यहदी मसीह लोकां जो यहदियां ला मिल्ला था। 15 उना यहदियां जिना प्रभु यीशुए जो, कने परमेस्वरे दे संदेश देणेबालयां जो मारी दिता कने सांझो तंग किता, कने परमेस्वर उना ला खुश नी है, कने सै सारे माणुआं दा बिरोध करदे न। 16 सै सांझो होर जातियां जो ऐ दसणे ला रोकणे दी कोशिश करा दे थे की परमेस्वर उना जो कियां बचाई सकदा है कने सै अपने पाप पर पाप जोडदे जां दे न; कने हण अंत च परमेस्वर उना जो पक्का सजा देणेबाला है। 17 हे मेरे प्यारे मसीह भाईयो, जालू असां थोडी देरा ताई मने ला नी पर, असां शारीक रूप ला तुहाडे सोगी नी थे, तां असां बडी इच्छा ला तिजो दिखणे ताई होर भी जादा कोशिश किती। 18 इस ताई असां (मतलब की मैं पौलसे) इक बरी नी, पर केई बरी तुहाडे बाल ओणे दी सोची, पर शैतान सांझो तुहाडे बाल ओणे ताई रोकदा था। 19 साडी आस, खुशी या बडाई दा मुक्त कुण है? ऐ तुसां ही होणे जालू साडे प्रभु यीशु मसीह फिरी मुडी करी ओणा है। 20 साडी बडाई कने खुशी तुसां ही न।

**3** आखरी च जालू असां तुहांजो मिलयो बिना नी रेई सके, तां मैं पौलस कने सिलासे एथेस शेहेर च किल्ले रेणे दा फेसला किता। 2 कने असां तीमथियसुस जो जडा मसीह दे शुभसमाचारे च साडा भाई है, कने परमेस्वरे दा सेवक है, उसयो इस ताई तुहाडे बाल भेजया की सै तुहांजो प्रोत्साहित करे कने तुहाडे मसीह पर भरोसे जो मजबूत करे। 3 ताकि कोई इना दुखां दिया बजा ला भरोसे च कमजोर ना होई जाऐ; क्योकि तुसां अपु ही जाणदे न, की सांझो मसीह च दुख झेलणे पोणे न। 4 जालू असां तुहाडे ओथु रेंदे थे, उस बकत तुहांजो बोलदे थे कि, सांझो लोकां ला दुख झेलणे पोणे न, कने इयां ही होया, कने तुसां जाणदे भी हेन। 5 इसा बजा ला जालू मिजो ला तुहांजो मिलयो बिना नी रिया गिया, तां मैं तुसां लोकां दे भरोसे दा हाल जाणने ताई तीमथियसुस जो भेजया, क्योकि असां इरदे थे, कुधी इयां ना हो की परिक्षा करणे बाले शैताने तुहाडी परिक्षा लेई हो, कने साडी मेहनत बेकार होई गेई हो। 6 पर हण तीमथियसुस तुहाडे बखे ला आई करी तुहाडे भरोसे कने प्यार दा शुभसमाचार सुणया। कने ऐ ही इच्छाया, की तुसां हमेशा प्यारे ला मिजो याद करदे न, कने सांझो दिखणे दी इच्छा रखदे न, जियां असां तुहांजो दिखणे दी इच्छा रखदे थे। 7 इस ताई हे मसीह भाईयो, असां अपनी सारी दुख तकलिफां च जालू तीमथियसुस ला सुणया की तुसां भरोसे च मजबूत न, तां सांझो बडी शांति मिलली। 8 क्योकि हण तुसां प्रभु च टिकी रेगे, तां इसला सांझो नोई जिंदगी मिलदी है। 9 कने जदेई खुशी तुहाडिया बजा ला सांझो अपने परमेस्वरे सामणे है, इसा खुशिया ताई तुहाडे बारे च असां कियां परमेस्वरे अगो धन्यवाद करन? 10 असां लगातर ऐई प्राथना करदे रेंदे न, की तुहांजो सोगी दुबारा मिली सकन, कने जडा जरूरी है तुहांजो सिखाई सकन, ताकि तुसां पुरे तरीके ला प्रभु यीशु मसीह पर भरोसा करी सकन। 11 साडी ऐ प्राथना है, की साडा पिता परमेस्वर कने प्रभु यीशु मसीह, तुहाडे ऐथू ओणे ताई साडी सहायता करे की असां आई सकन। 12 असां ऐ भी प्राथना करदे न की प्रभु यीशु मसीह ऐसा करे कि, जियां असां तुहांजो ने प्यार करदे न, तियां ही तुसां भी इक दुज्जे ने प्यार करा, कने सारयां लोकां सोगी तुहाडा प्यार होर भी बदे कने बददा ही जा, 13 कने असां प्राथना करदे न ताकि सै तुहाडे मना जो ऐसा मजबूत करे, की जालू साडा प्रभु यीशु अपने सारे पबित्र लोकां सोगी बापस ओऐ, तां सै साडे पिता परमेस्वरे सामणे पबित्रता च निर्दोष साबित होन।

**4** आखरी च हे मेरे मसीह भाईयो, असां प्रभु यीशु मसीह दे नाऐ ला तुहांजो ला बिनती करदे न, की तुसां इस तरीके ला जिंदगी जिया, जडी परमेस्वरे जो खुश करे, जियां असां तुहांजो सिखाया, कने तुसां तियां जिंदगी जिं दे भी हेन कने असां तुहांजो ऐसा करणे ताई होर भी उत्साहित करदे न। 2 तुसां जाणदे न कि प्रभु यीशु मसीह सांझो जडा अधिकार दितया है, उदे जरिये असां तुहांजो निर्देश दितयो न। 3 परमेस्वरे दी इच्छा ऐ है, की तुसां पबित्र बणन कने व्यभिचार मत करा, 4

तुसां चे हर इक माणु अपणे शरिर पर काबू रखणा सीखी करी अपणे शरिर जो पबित्र बणाई रखे कने उदी इज्जत करे। 5 कने तुसां जो ऐ कम्म होर जातियां सांई वासना दी इच्छा ला नी करणे चाइदे, जडियां परमेश्वरे जो नी जाणदियां ना। 6 ऐसे कम्म करणे ला सै अपणे मसीह भाईं दे खिलाफ पाप करदा है, कने ना ही कोई उस सोगी चलाकी करा, क्योकि प्रभुये इना सारयां जो सजा देणी है, जडे इयुदियां चीजां करदे न; जदिया असां तुहांजो पेहेले भी बोलया कने समझाया था। 7 क्योकि परमेश्वरे सांझो अपबित्र जिन्दगी जिणे ताई नी पर पबित्र जिन्दगी जिणे ताई सदया है। 8 इस ताई जडा इना हुकमा जो नी मनदा है, सै साडे हुकमा जो नी, पर परमेश्वरे दे हुकमा जो नी मनदा है, जिनी अपणी पबित्र आत्मा तुहांजो दितियो है। 9 पर मसीह भाईयां दे प्यारे दे बारे च ऐ जरूरी नी है, कि मै तुहांजो कुछ लिखे, क्योकि इक दुज्जे सोगी प्यारे ला रेणा तुसां अपु ही परमेश्वरे ला सिखया है; 10 कने सारे मकिन्दुनिया प्रदेशे दे मसीह भाईयां सोगी प्यार रखया है, पर हे मसीह भाईयो, असां तुहांजो ला ऐ विनती करदे न की तुसां होर भी अग्रे बदे जा, 11 कने जदिया असां तुहांजो समझाया है, तियां ही शान्ति ने जिन्दगी जिया कने ना ही दुज्जयां दे कम्मा च दखल दिया कने अपणे हयां ला कमाणे दी कोशिश करा। 12 ताकि जडे लोक यीशु मसीह पर भरोसा नी करदे, सै दिखी सकन की तुहाडा व्यवहार कदिया है, कने लोक तुहाडी इज्जत करन, कने तुहांजो कुसी भी जरूरतां ताई दुज्यां पर निर्भर ना होणा पोए। 13 हे मसीह भाईयो, असां चां दे न, की तुसां ऐ जाणी लिया की जडे मसीह च मरी गियो न, इना सोगी क्या होणा; इयां नी हो की तुसां दुज्यां सांई शोक करा जिना जो आस नी है की मरणे बाद भी जिन्दगी है। 14 असां भरोसा करदे न की यीशु मरया, कने जिन्दा होया, तां तियां ही परमेश्वरे उना जो भी जडे यीशु च सोई गियो न, यीशु मसीह सोगी बापस लेई ओणा है। 15 असां प्रभु यीशु मसीह दे बचना दे अनुसार तुहांजो ऐ बोलदे न, की असां जडे जिं दे न, कने प्रभु यीशु मसीहे दे बापस ओणे दीकर बची रेंगे, तां जडे लोक पेहेले यीशु मसीह च मरी गियो न, उना पेहेले यीशु मसीह ने मिलणा। 16 क्योकि प्रभु यीशु मसीहे अपु ही स्वर्ग ला उतरणा; उस बकत प्रभु यीशुऐ जोरे ने हुकम देणा, कने प्रधान स्वर्गदत्तां जोरे ला बोलणा, कने परमेश्वरे दी तुरही बजाणी; कने उस बकत जडे पेहेले यीशु मसीहे पर भरोसा करदे होए मरी गियो न, उना मरयां चे जी पोणा है। 17 तालू इदे बाद असां जडे जिन्दे कने बचयो रेंगे, उना सोगी बदला च चुकी लेई जाणे, ताकि बदलां च प्रभु यीशु मिलन, कने उस बकते ला असां हमेशा प्रभु सोगी रेणा। 18 इना गल्लां ला इक दुज्जे जो दिलासा दिया करा।

**5** हे मेरे मसीह भाईयो, तुहांजो ऐ दसणे दी जरूरत नी है, की प्रभु यीशु मसीहे कालू ओणा है। 2 क्योकि तुसां अपु जाणदे न की जियां राती जो चोर अचानक आई जांदा है, तियां ही प्रभु यीशु मसीहे दा आगमन भी अचानक होणा। 3 जालू लोक बोलगे, ठीक ठाक है, कने कोई डर नी, तालू उना जो इकदम दुख तकलिफां दा सामणा करणा पोणा है, जियां गर्भवती जो इकदम पीड पौदी; तालू सै कुथी भी नठी नी सकदी, तियां ही सै उसा बडिया मुसीबता ला कुसी भी तरीके ला नी बची सकणा। 4 पर हे मसीह भाईयो, तुसां जडे नेहरे च नी न कने सै दिन तुहाडे पर चोरां सांई आई पोए जिस दिन यीशु मसीहे बापस ओणा। 5 क्योकि तुसां सारे जडे ज्योति ने रिशता रखदे न, कने दिने दी ओलाद न, असां ना तां राती ने, कने ना ही नेहरे ने रिशता रखदे न। 6 इस ताई सांझो अविश्वासियां सांई सोंदे नी रेन, पर जागदे कने सावधान रिया। 7 क्योकि जडे सोंदे न, सै राती ही सोंदे न, कने जडे मतवाले होंदे न, सै राती ही मतवाले होंदे न। 8 पर असां तां दिने दी ओलाद न, इस ताई सांझो अपणे पर काबू रखणा चाईदा। साडी भरोसा कने प्यार साडी रक्षा करे जियां कबच इकी सिपाइये दी रक्षा करदा है, कने साडे बाल उद्वारे दी आस है, कि असां हमेशा दिया सजा ला बची गियो न, जियां टोप सिपाइये जो बचादां है। 9 क्योकि परमेश्वरे सांझो सजा देणे ताई नी चुणया है, पर इस ताई रखया की असां अपणे प्रभु यीशु मसीहे ला उद्वार पाई सकन। 10 प्रभु यीशु मसीह साडे ताई इस बजा ने मरया, की असां चाऐ जिन्दे रेन, या मरी जान, जालू प्रभु यीशु मसीहे बापस ओणा तालू असां हमेशा उदे सोगी रेई सकन। 11 इसा बजा ने इक दुज्जे जो प्रोत्साहित करा, कने इक दुज्जे जो भरोसे च मजबूत होणे ताई सहायता करा, कने ऐसा तुसां करदे भी हेन। 12 हे मसीह भाईयो, असां तुसां ने विनती करदे न, की जडे तुहांजो चे बडी मेहनत करदे न, कने प्रभु च तुहाडे अगुवे

न, कने तुहांजो शिक्षा दिन्दे न, उना दे हुकम मन्ना। 13 क्योकि जडा सै तुहाडे ताई करदे न, उस ताई उना दी अच्छे ने इज्जत कने प्यार करा कने अपु चे मिली झुली की रिया। 14 हे मसीह भाईयो, असां तुहांजो ने विनती करदे न, उना जो चेतावनी दिया, जडे बडे आलसी न, डरफोकां जो होंसला दिया, जडे कमजोर न उना दी सहायता करा, सबना जो सेहनशीलता दस्सा। 15 ऐ ध्यान रखा! कोई कुसी ने बुराईया दे बदले बुराई ना करे; तुसां हमेशा इक दुज्जे कने सारयां ताई भले कम्म करणे च लगी रिया। 16 हमेशा खुश रिया। 17 लगातार प्राथना करदे रिया। 18 अपणे हर हालातां च परमेश्वरे दा धन्यावाद करा; क्योकि यीशु मसीह च तुहाडी ताई परमेश्वरे दी ऐई इच्छा है। 19 पबित्र आत्मा दे कम्मा जो लोकां दी जिन्दगी च होणे ला मत रोका। 20 ऐ मत सोचा की जडियां भविष्यवाणियां परमेश्वरे अपणे लोकां जो दितियां सै कुसी कम्मे दियां नी न। 21 पर हर इक गल्ला दी परख करा ऐ जाणने ताई की सै परमेश्वरे दा संदेश है की नी, जडियां गल्लां खरियां न उना गल्लां जो ही अपना। 22 सारियां बुराईयां ला बची के रिया। 23 परमेश्वर जडा शांति दिन्दा है, तुहांजो हर तरा ने पबित्र करे; कने तुहाडी आत्मा, प्राण कने शरीर साडे प्रभु यीशु मसीह दे बापस ओणे दीकर पूरे निर्दोष कने ठीक रेन। 24 तुहांजो सदणे बाला भरोसे दे काबिल है, क्योकि सै तुहांजो पबित्र होणे ताई सददा है, कने उनी पबित्र बणने दे काबिल भी बणाणा है। 25 हे मसीह भाईयो, साडे ताई प्राथना करा। 26 सारे मसीह भाईयां जो प्यारे ने नमस्ते करा। 27 मै तुहांजो प्रभु दा हुकम दिन्दा है, की ऐ चिट्ठी सारे मसीह भाईयां जो पढी करी सुणा। 28 मै प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होदा रे।

## 2 थिस्सलुनीकियों

**1** ऐ चिड़ी मैं पौलस सिलवानसुस कने तीमथियसुस दिया तरफा ला थिस्सलुनीकिया शेहरे दिया कलीसिया दे ना लिखा दा है, जडे पिता परमेस्वर कने प्रभु यीशु मसीह च न, 2 असां प्राथना करदे न की परमेस्वर तुसां पर अनुग्रह करे कने तुसां जो शांति है। 3 हे मसीह भाईयो, तुहाडे बारे च सांझो लगातार परमेस्वरे दा धन्यवाद करणा चाईदा। कने ऐ साडे ताई ठीक भी है, की तुहाडा भरोसा यीशु मसीह पर बढदा जा दा है, कने तुहाडा प्यार भी इक दुज्जे ताई बढदा जा दा है। 4 इस ताई परमेस्वरे दिया कलीसिया च तुहाडे बारे च धमंड करदे न, की चाहे तुसां पर जितणे दुख तकलीफ आऐ, पर तुसां लगातार सबर ने उना दा सामणा किता कने प्रभु यीशु मसीह पर भरोसा करदे रे। 5 तुहाडा दुखां जो सेहणा तुसां जो इस काबिल बणादा है की तुसां परमेस्वरे दे राज्य जा जाई सकन, ऐ ही सच्चा सबूत है, की परमेस्वर सच्चा न्याय करदा है। 6 क्योंकि परमेस्वर हमेशा सही न्याय करदा है, परमेस्वरे उना जो जस्र दुख देणे, जडे तुहांजो दुख दिन्दे न। 7 कने उनी तुसां जो सुख देणा जडे हण दुखे च न, कने सांझो भी सुख चैन देणा, ऐ उस बकत होणा जाल प्रभु यीशु मसीह अपने शक्तिशाली स्वर्गदूतां सोगी स्वर्ग ला धधगती होई अगगी चे प्रगत होणा। 8 कने जडे परमेस्वरे जो नी पछेण्डे, कने जिना साडे यीशु मसीह दे शुभसमाचारे जो नी मनया, परमेस्वरे इना जो सजा देणी। 9 परमेस्वरे उना जो अपणी मोजुदगी ला बाहर कडी देणा कने परमेस्वरे उना जो अपणिया शक्तिया कने महानता जो जाणने दी अनुमति नी देणी, कने उना जो हमेशा दी सजा देणी। (aiōnios g166) 10 ऐ उस रोजे होणा, जाल यीशु मसीह अपने पबित्र लोकां च महिमा कने इज्जत पाणे ताई बापस ओणा, जडे लोक उस पर भरोसा रखदे न, तुसां भी उना लोकां सोगी होणा है जिना प्रभु यीशु दी महिमा करणी है, क्योंकि तुसां साडी गबाइया पर भरोसा किता। 11 इस ताई असां लगातार तुहाडे ताई रोज प्राथना भी करदे न, की परमेस्वर तुहांजो उसा जिन्दगी जो जिणे दे काबिल बणाऐ जिस ताई तुहांजो सदया है, कने से तुहाडी हर इक भली इच्छा जो पूरा करे, कने हर उस कम्मे जो सफल करे जडा तुहाडे भरोसे दा नतीजा है। 12 असां ऐ प्राथना करदे न की लोक तुहाडिया बजा ने प्रभु यीशु मसीह दी महिमा करन, कने तुसां जो भी इज्जत मिलणी क्योंकि तुसां उदे न। ऐ सब कुछ परमेस्वरे कने यीशु मसीह दे अनुग्रह ने होणा।

**2** हे मसीह भाईयो, असां प्रभु यीशु मसीह दे बापस ओणे दे बारे च कुछ बोलणा चांदि न, जाल असां सबना उसला मिलणा है। 2 कोई भी भविष्यवाणी, या बचन, या उसा चिड़िया दिया बजा ने अपने मना जो दुखी कने बेचेन मत होणा दिन्दे, जिना चिड़िया जो साडी लिखियो समझदे होन, कने उसा च दसया हो की प्रभु यीशु मसीह बापस आई गिया है, कने तुसां घबराने मत। 3 उना लोकां दा कोई भरोसा मत करदे जडे इना चीजां दे बारे च बुरा बोलदे न, क्योंकि प्रभु यीशु मसीह दे बापस ओणे ला पेहेले लोकां परमेस्वरे दा बिरोध करणा है, कने से पापी माणु जिसयो परमेस्वरे नरक च नाश करणा, उनी जस्र प्रगत होणा। 4 उनी परमेस्वरे दा कने उना सारियां मूर्तियां दा कने बाकी सारियां चिजां दा जिना जो लोक पूजदे न कने प्रभु बोलदे न, बिरोध करणा है, कने उनी सारयां ला बडा होणे दा दाबा करणा, ऐशु दीकर की उनी पापी माणुऐ परमेस्वरे मंदरे च जाई करी बेई जाणा कने अपने आप जो परमेस्वर होणे दा दाबा करणा। 5 तुहांजो याद होणा है, जालु मैं तुहाडे सोगी था, तां तुहांजो मैं केई बार ऐ गल्ल बोलती थी। 6 हले दीकर से बुरा माणु प्रगत नी होया है, क्योंकि कुछ ऐसा है जिनी उसयो रोकी रख्या है, कने तुहांजो जस्र याद होणा से क्या है जिनी उसयो रोक्या है, फिरी जालु परमेस्वरे दा तय कितया बकत होणा तालु से बुरा माणु प्रगत होणा। 7 क्योंकि बुरे माणुऐ दी शक्ति पेहेले ला ही इस संसारे च कम्म करा दी है, पर कोई इक है जडा उदी शक्तिया जो रोकदा है। कने उनी इसयो लगातार रोकी रख्या जालु दीकर से अपने रस्ते ला ना हटी जाऐ। 8 तालु से बुरा माणु प्रगत होणा, पर जडे बाद प्रभु यीशु मसीह ओणा है, कने यीशु मसीह उसयो अपने हुकमे ने जडा यीशुऐ दे मारे ने निकलदा है कने अपने तेज ने भस्म करी देणा है। 9 बुरे माणुऐ शैतान दिया शक्तिया सोगी ओणा है, कने उनी हर तरा दे झूठे चमत्कार, कने अनोखे कम्म करणे न, कने इना

चमत्कारां जो दिखीकरी लोकां सोचना की ऐ सारे परमेस्वर करा दा है। 10 कने उनी बुरे माणुऐ हर तरा दे बुरे कम्म करणे न कने उना सारयां लोकां जो धोखा देणा जडे हमेशा दी मौत दे रस्ते पर चलदे न; क्योंकि उना उसा सच्चाईया पर भरोसा नी किता जिसा ने उना जो हमेशा दी जिंदगी मिलणी थी। 11 इसी बजा ला परमेस्वरे उना च भ्रम पैदा करी देणा ताकि से बुरे माणुऐ दियां गल्लां पर भरोसा करन जडा उना जो सचाई ला भटकाई दिता। 12 परमेस्वरे उना सारयां जो सजा देणी, जिना प्रभु यीशु मसीह दे संदेश पर भरोसा नी किता कने बुराई दे रस्ते पर चले। 13 हे मसीह भाईयो, तुहाडे ताई परमेस्वरे सामणे सांझो हमेशा धन्यवाद देणा चाईदा, तुसां प्रभु दे प्यारे न, क्योंकि परमेस्वरे शुरु ला पबित्र आत्मा दे जरिये तुहांजो पाप ला लग करी के कने सच्चाई पर तुहाडे भरोसे दिया बजा ने तुहांजो उद्धार ताई चुणी लिया है। 14 परमेस्वरे तुसां जो बचाणे ताई शुभसमाचारे दा इस्तेमाल किता जिसदा असां प्रचार करदे न, ताकि तुसां प्रभु यीशु मसीह दी महिमा च हिस्सेदार होई सकन। 15 इस ताई हे मसीह भाईयो, टिकी रिया; कने लगातार साडी शिक्षा पर भरोसा करा, जडी असां तुसां जो दिती जालु तुहाडे सोगी थे कने जडी चिड़िया च लिखी करी भेजी। 16 असां अपने प्रभु यीशु मसीह ला प्राथना करदे न, कने साडे पिता परमेस्वरे जडा सांझो ला प्यार करदा है, उना दे अनुग्रह ला सांझो हमेशा शांति, प्रोत्साहन कने सच्ची आस मिलली है। (aiōnios g166) 17 मैं प्राथना करदा है की परमेस्वर तुहाडे मना जो हिम्मत दे कने तुसां जो भले कम्मा कने बचन च मजबूत बणाऐ।

**3** आखरी च मेरे मसीह भाईयो, साडे ताई प्राथना करा की, प्रभु यीशु मसीह दा बचन जल्दी ही सारियां जगा च फैली जाऐ, कने जडा इसयो सुणे से इसयो मन्ने जियां तुसां बचन जो मनया। 2 कने ऐ भी प्राथना करा की परमेस्वर सांझो टेडे कने बुरे लोकां ला बचाये, क्योंकि मते सारे लोक न जडे यीशु मसीह दे बचना पर भरोसा नी करदे। 3 पर प्रभु सच्चा कने भरोसे लायक है; उनी तुहांजो शक्ति देणी कने उस शैताने ला तुहांजो बचाणा। 4 सांझो प्रभु च तुहाडे पर पूरा भरोसा है, कने असां जडा-जडा कुछ तुहांजो करणे जो बोलया है, तुसां सियुदा ही करा दे न कने करदे रेणा है। 5 असां प्राथना करदे न की परमेस्वर तुसां जो इस काबिल बणाई दे की तुसां समझी सकन की परमेस्वर अपने लोकां ने कितणा प्यार करदा है कने कियां बचांदा है। 6 हे मसीह भाईयो, असां तुहांजो हुकम दिन्दे न जडा सांझो प्रभु यीशु मसीह दितया है; कने अपने उना मसीह भाई बेहणा ने कोई रिशता मत रखा, जडे सुस्त कने उना शिक्षा जो नी मंदे जडियां असां तुहांजो दीतियां। 7 क्योंकि तुसां अपु ही ढंगे ने जाणदे न, की तुसां जो तियां ही जिंदगी जिना चाईदी जियां असां जिया दे न; क्योंकि असां तुहाडे सोगी रे दे थे, तां असां सुस्त नी पर कम्म करदे थे। 8 कने कुसी ला रोटी मुफ्त नी खादी, पर मेहनत कने तकलिफा ने रात दिन कमादे थे, ताकि असां अपणी कुसी भी झुरतरां ताई तुसां पर निर्भर नी होणा पोऐ। 9 असां जादा मेहनत, इस ताई नी किती, की सांझो तुसां ला कुछ मंगणे दा कोई हक नी है; पर इस ताई किती की असां अपने आपे जो तुहाडे ताई आदर्श बणाई सकन, जिसने तुसां साडे सांई जिन्दगी जीन। 10 कने जालु असां तुहाडे सोगी रे दे थे, तां तालु भी तुहांजो ऐई हुकम दिन्दे थे, की अगर कोई कम्म नी करणा चांदा, उसयो खाणां भी ना मिलले। 11 असां सुणदे न, की कितणे ही लोक तुहाडे बिच सुस्त कने कोई कम्म नी करदे न, कने होरनी दे कम्मा च दखल दिन्दे रेदे न। 12 ऐसे लोकां जो असां उस हक ने हुकम दिन्दे न, जडा प्रभु यीशु मसीह सांझो दितया है, की चुपचाप ने अपना कम्म कारिके अपणी रोटी खा। 13 कने हे मसीह भाईयो, चाहे तुसां जो कितणे भी दुख तकलीफ होन तुहांजो भले कम्म करणे दी कोशिश नी छडणी चाईदी। 14 अगर कोई साडिया इसा चिड़िया दे संदेश जो नी मन्ने, तां उस पर नजर रखा की से कुण है, कने उदे सोगी संगती छडी दिया, जिसने उसयो शर्मिंदगी महसूस हो। 15 उसने इयां बर्ताब मत करा की जियां से तुहाडा दुशमण है, पर उसयो समझा जियां तुसां अपने भाईऐ जो समझांदे न। 16 असां प्राथना करदे न की प्रभु यीशु मसीह जडा शांति दा दाता है, अपु ही तुहांजो हमेशा कने हर तरा ने शांति दे, प्रभु हमेशा तुसां सारयां सोगी रे। 17 मैं पौलस अपने हथे ने नमस्ते लिखदा है; हर चिड़िया दे आखरी च इयां ही लिखदा है, इस ताई की सारयां जो पता चली जाऐ की ऐ चिड़ी मेरिया तरफा ला है। 18 मैं

प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होदा रे।

# 1 तीमथियुस

**1** मैं पौलुस जडा साडे उद्धारकर्ता परमेस्वर दे हके ला, प्रभु यीशु मसीह, जिस पर साडी आस है, जिना मिंजो प्रेरित होणे ताई चुणया, **2** तीमथियुस मैं ऐ चिट्ठी तिजो लिखा दा है, तू मेरे अपने पुत्रे साईं है क्योंकि तू भी प्रभु यीशु मसीह पर भरोसा करदा है। मैं ऐ प्राथना करदा है की पिता परमेस्वर, कने साडा प्रभु यीशु मसीह, तिजो हमेशा अनुग्रह, दया कने शांति दिन्दा रे। **3** तीमथियुस जियां की तू जाणदा है, की इफिसुस शेहरे च कुछ ऐसे लोक न जडे झूठी शिक्षा दिन्दे न, सै लगातार झूठी कहाणियां कने पूर्वजां दियां लम्बियां सचियां दे बारे च सिखांटे न। जालू मैं इफिसुस शेहरे ला मकिदूनिया प्रदेश दिया जगा जो जाणे जो तैयार था, तां मैं तिजो इफिसुस शेहरे च ही स्क्रणे ताई बोलया ताकि तुसां उना लोकां जो बोली सकन की ऐसी शिक्षा मत दिया। जालू सै ऐसी शिक्षा दिन्दे न, तां लोक बेहस करदे न, जिसदा नतीजा ऐ निराल्पता है, की सै गुरु सै नी करदे जडा परमेस्वरे उना जो करणे ताई बोलया है, जिसयो सै परमेस्वरे पर भरोसे करणे ने ही करी सकदे न। **5** तिजो हुकम देणे दी बजा ऐ है की तू हर इक जणे ताई भले मने ने, खरी अंतरात्मा ने, कने सच्चे भरोसे ने प्यार पैदा हो। **6** झूठे गुरुओ इना सारियां चीजां जो करणा बंद करी दितया है, जडे बेकार दियां गल्लां बोलदे न, **7** ऐ झूठे गुरु उना व्यवस्था जो सिखाणे बालयां साईं बगना चांदे न, जडे मूसा दिया व्यवस्था जो अच्छे ला जाणदे न, पर सै असल च कुछ भी नी जाणदे न कि सै दुज्जयां जो क्या सिखाणे दी कोशिया करदे न न कने इधणे आत्मविश्वास सोगी उस पर अडई रेदे न। **8** असां जाणदे न की मूसा दी व्यवस्था अच्छी है अगर कोई इसा जो ढंगे ने सिखाए तां। **9** सांझो पता है की मूसा दी व्यवस्था धर्मी लोकां ताईं नी पर अधर्मियां, निरंकुशां, भक्तिहीनां, पापियां, अपबिन्न कने अशुद्ध लोकां, माता-पिता जो मारणे बाले, हत्यारे, **10** व्यभिचारियां, पुष्पगामियां, माणुए जो बेचेणे बाले, कने झूठ बोलणे बाले, कने झूठी कसम खाणे बाले, कने इना जो छडी करी खरे उपदेशां दे सोरे विरोधियां ताईं बणाइयो है। **11** ऐ शिक्षा धन्य परमेस्वरे दी महिमा दे शुभसमाचार पर आधारित है, जिनी मिंजो दुज्यां जो सृणाने ताईं शुभसमाचार दितया है। **12** मैं अपने प्रभु यीशु मसीह दा धन्याबाद करदा है, जिना मिंजो शक्ति दिती, कने मिंजो भरोसे दे काबिल समझीकरी अपनी सेबा ताईं चुणया। **13** मेरे विश्वासी बगने ला पेहले, मैं यीशु मसीह दी बुराई करदा था, विश्वासियां जो मारदा कुटदा था, कने उना ने बडा बुरा शतबं करदा था; तमी मिंजो पर दया होई, क्योंकि मैं तालू दीकर यीशु मसीह पर भरोसा नी कितया था, इस ताईं नी समझदा था की जडा मैं करा दा है सै गलत है। **14** कने साडे प्रभुये लगातार अपना अनुग्रह मिंजो पर कित्या, कने उनी मिंजो भरोसा कने प्यार दित्या क्योंकि मैं यीशु मसीह सोगी इक होई गया था। **15** ऐ गल्ल सचच है कने मनणे कने भरोसे दे काबिल है, की प्रभु यीशु मसीह पापियां दा उद्धार करणे ताईं इस संसारे च आया, कने उना चे सारयां ला बहू पापी मैं है। **16** पर यीशु मसीह दया मिंजो पर इस ताईं कितती, क्योंकि सै दसणा चांदा था की मिंजो माफ करणे ला सै कितणा सेहनशील है, जिनी सबना ला जादा पाप कितयो थे, मेरी जिन्दगी दुज्जयां ताईं उदाहरण है, जिना बादे च यीशु मसीह पर भरोसा करणा है, कने हमेशा दी जिन्दगी जो हासिल करणी है। (aiōnios g166) **17** हुण युगां-युगां दे राजा दी, कदी नी नाश होणे बाले कने कदी नी दिखयो कने इकलोते सच्चे परमेस्वरे दी इज्जत कने महिमा युगां-युगां दीकर हौदी रे। आमीनी। (aiōn g165) **18** हे पुत्र तीमथियुस, मैं तिजो ऐ हुकम दिन्दा है, की तू उना भविष्यवाणियां जो याद कर जडियां परमेस्वरे दे संदेशे देबालयां तरे ताईं कितियां थियां, तू इना गल्लां जो झूठे गुरुआं दे खिलाफ हथियारे साईं इस्तेमाल कर। **19** तुसां जो लगातार यीशु मसीह पर भरोसे च बणी रेणा कने साफ अंतरात्मा रखणी चाईदी। पर केई लोकां अपनी अंतरात्मा जो खराब करी दितया है कने उना मसीह पर भरोसा करणे दी काबलियत जो खत्म करी दितया है, ठीक तियां ही जियां इक जाज कुसी चिजा ने भजी करी डुडी जांदा है। **20** उना चे ही हुमिनयुस कने सिक्कंदर न, मैं उना जो कलीसिया ला बाहर कडी दित्या कने शैताने दिया शक्तिया दे हवाले करी दित्या, की सै परमेस्वरे दी बुराई करणा ला सिखन।

**2** सारयां ला जरूरी बिनती ऐ है की, प्राथना, निवेदन कने धन्याबाद सोरे माणुए ताईं करा। **2** कने राजयां कने सोरे उच्चे पदां दे अधिकारियां ताईं प्राथना

करा, की असां सुख शान्ति कने सुरक्षा ने अपनी जिन्दगी जी सकन, ताकि असां परमेस्वरे दी भक्ति करी सकन कने साडा बर्ताब दुज्जयां ताईं अच्छा होई सके। **3** लोकां ताईं इयुदियां प्राथना करणा साडे उद्धारकर्ता परमेस्वरे जो खरा लगदा है, **4** क्योंकि परमेस्वर चांदा है, की सारयां लोकां दा उद्धार हो कने सै यीशु मसीह दी सच्ची शिक्षा दा ज्ञान पाई सकन। **5** क्योंकि सिर्फ इक ही परमेस्वर है, कने इक ही माणु है जडा परमेस्वर कने माणुए जो मिलतां है, सै माणु प्रभु यीशु मसीह है जडा माणुए दे स्ने च पैदा होया, **6** यीशु मसीह अपने आपे जो सारयां लोकां दे पापां कने हमेशा दी मौत छुटकारे ताईं बलिदान करी दित्या, ऐ करिरी परमेस्वरे सही बकते पर साबित कित्या की, सै चांदा है की सोरे लोक बच्ची जान। **7** इसा बजा ने, परमेस्वरे मिंजो शुभसमाचार दा प्रचारक कने इक प्रेरित होणे ताईं चुणया है। उनी मिंजो होर जातियां ताईं भरोसे दा सच्चा संदेश देणे ताईं चुणया, मैं झूठ नी बोलदा, सचच बोला दा है। **8** मैं चांदा है की, जालू तुसां परमेस्वरे दी आराधना करणे ताईं गिठे होंदे न, कने सै मर्द जडे पबित्र जिन्दगी जिन्दे न, बिना गुरुसे कने पूरी शरदा ने अपने हथ उपर चुकी करी प्राथना करा। **9** इयां ही मसीह जनानिया जो भी सही ढंगे दे कपडे पांणा चाईदे, जडे तुहाडे शरीर जो ढंगे ने ढकी सकन, ना की ऐसे होन की सै मर्दा जो आकर्षित करन; कने तुहाडे बालां दा अंदाज ऐसा ना हो की लोकां जो आकर्षित करे, **10** पर अपने आपे जो दुज्जयां ताईं भले कम्म करी के छेल बना, क्योंकि परमेस्वरे दी भक्ति करणे बालियां जनानिया ताईं ऐई सही है। **11** जालू मर्द विश्वासी लोकां जो सिखा दे होन, तां सारी जनानियां जो चुपचाप कने बडी इज्जताने ने सृणाना कने सिखाणा चाईदा। **12** मैं बोलदा है, की जनानिया मर्दा जो शिक्षा ना देन कने ना ही उना पर हुकुम चलान जालू सै यहदी जंज घर च गिठे होंदे न, पर जनानिया चुपचाप रेन। **13** ऐ मैं इस ताईं बोलदा है क्योंकि परमेस्वरे पेहले मर्द बणाया जिसदा ना आदम था, उदे बाद जनानी बणाई जिसा दा ना हव्वा था। **14** कने इक होर बजा ऐ है, सै हव्वा ही थी जिसयो शैताने बहकाया था, आदम नी था। ऐसा करिके हव्वा परमेस्वरे दा नियम तोडया। **15** पर परमेस्वरे जनानिया जो बच्चे पैदा करणे दित्या बजा ने बचाई लेणा है, अगर उसा दा मन शुद्ध है कने मसीह च अपने भरोसे ला भटकदी नी है, होर लोकां ने प्यारभाव रखदी, कने इक निर्दोष जिन्दगी जिन्दियां न।

**3** ऐ गल्ल सचची कने भरोसे दे काबिल है, की जडा कलीसिया दा अगुवा बणना चांदा है, तां सै इज्जतदार कम्मा दी इच्छा रखदा है। **2** इस ताईं ऐ जरूरी है की अगुवा निर्दोष हो, इक ही घरे बाली हो, सेहनशील, अच्छा हो, इज्जतदार हो, पराणया दा इज्जत करणे बाला, कने परमेस्वरे दा बचन सिखाणे च काबिल हो। **3** शराबी या मारकुटाई करणे बाला ना हो; पर दयालू हो, शान्तिप्रिय हो, कने ना पैसे दा लालची हो। **4** अपने घर परिवार जो ढंगे ने सम्भालदा हो, कने अपने बचयां जो आदर ने अपना केहणा मनणा सिखांदा हो। **5** अगर कोई अपने ही घर परिवारे जो सम्भालना नी जाणदा हो, तां सै परमेस्वरे दी कलीसिया जो भी नी सम्भाली सकदा है। **6** कने ऐसा ना हो की जिनी नौआ-नौआ भरोसा कितया हो, सै घमंडी होई जाऐ कने उसयो शैताने साईं सजा मिलले। **7** कने संसारिक लोकां च भी उदी अच्छी इज्जत हो, इयां ना हो की लोक उदी बुराई करदे होन कने शैताने दे फंदे च फंसी जा। **8** इयां ही कलीसिया च सेवक भी इयोदे होन जिना दी लोक इज्जत करन, कने इमानदार होऐ, शराबी नी होऐ, सै ऐसा माणु नी होणा चाईदा जडा पैसे ताईं कुछ भी करे; **9** कने उस बाल साफ अंतरात्मा हो, जिसने सै लगातार ऐ भरोसा करे की परमेस्वरे जडी शिक्षा दितियो है सै सचची है। **10** कने ऐ भी सेवक बगने ला पेहले परखणे चाईदे, अगर कोई भी इना अंदर दोष नी तोपी सके, तां सै सेवकां दे कम्म करन। **11** इयां ही सेवका दियां घरे बालियां भी इयुदियां होणा चाईदियां जिना दी लोक इज्जत करन, दोष नी लाणे बाली हो, अकली ने कम्म करणे बाली हो कने सारियां गल्लां च भरोसे दे काबिल होणी चाईदी। **12** कलीसिया दे सेवक अपनी घरे बालिया ला बफादार हो कने अपने बाल-बचयां कने अपने परिवारे जो ढंगे ने सम्भालने बाला हो। **13** क्योंकि जडे सेवके दा कम्म अच्छे ने करी सकदे न, उना जो लोकां ला अच्छी इज्जत मिलदी है, सै हिम्मताने यीशु मसीह पर भरोसे दे बारे च बोली सकदे न। **14** मैं तैरे बाल तोल्ले ओणे दी आस रखीकरी भी ऐ गल्लां तिजो इस ताईं लिखा दा है, **15** अगर मेरे ओणे च देर होईया तां तिजो इसा गल्ला दी जानकारी रे की,



परमेश्वरे दे परिवारे दे लोकां दा बर्ताब कदिया होणा चाईदा। परमेश्वर दा प्यार जिन्दे परमेश्वर दी कलीसिया है, ऐ इयां ही सच्ची शिक्षा दा साथ दिन्दे न कने बणाई रखदे न, जियां इक मजबूत नि कने खम्बे घरे जो मजबूत करदे न। 16 इदे च कोई शक नी की जडी शिक्षा परमेश्वरे प्रगट किती सै सच्ची है, जिसयो मना नी करी सकदे मतलब की, यीशु मसीह माणु बणी करी आया कने, पबित्र आत्मा ला साबित होया की परमेश्वरे दा पुत्र है, कने स्वर्गदांतां जो मिल्ला, कने महिमा दे स्वर्ग च चुकी लिया, कने चेलयां उदा शुभसामाचार हर जगा प्रचार किता कने, मते सारे संसारे दे लोकां उस पर भरोसा किता।

**4** पबित्र आत्मा साफ-साफ बोलदी है, की आखरी बकते च कुछ लोकां मसीह शिक्षा पर भरोसा करणा छडी करी उना बुरियां आत्मा दिया शिक्षा पर भरोसा करी के अपनाई लेणा जिना उना जो भटकई देणा। 2 झूठे गुरु धोखेबाज न, उना जो नी पता लगणा की सै जडा करा दे न सै सही है की नी, क्योंकि उना दी अंतरात्मा जडी सही कने गलत च फेसला करदी है, सै मरी गियो है, जियां कि इक गर्म लोहे ला उना जो फुकी दितया हो, 3 इयोदे लोक सिखांदे न की बियाह करणा कने खाणे दियां केई-केई चिंजा खाणा गलत है, पर परमेश्वरे हर तरा दा खाणा मसीह पर भरोसा करणे बालयां ताई बणाया है, जडे प्रार्थना दे बाद धन्यवाद करिके खाणे दी सच्ची शिक्षा जो जाणदे न। 4 क्योंकि परमेश्वरे दी बणाईयो हर इक चीज खरी है, अगर असां परमेश्वरे जो धन्यवाद करी के खान तां असां हर तरा खाणा खाई सकदे न, 5 क्योंकि परमेश्वरे दे बचन कने प्रार्थना ला हर तरा दा खाणा शुद्ध होई जांदा है। 6 अगर तू मसीह भाई बेहणा जो लगातार ऐ शिक्षा याद दिलाना रे, की जडी शिक्षा मै तिजो दिती, कने तू मनी भी है कने तू भरोसे दे संदेश कने अच्छी शिक्षा ला मजबूत होया है, तां तू यीशु मसीह दा अच्छा सेबक है कने इसला तेरा पालण-पोषण हमेशा होंदा रे। 7 बणी बणाईयां कहाणियां च बकत खराब मत करा, जिना ला परमेश्वरे जो इज्जत नी मिलदी, तुहांजो अपने आपे जो लगातार सिखांदे रेणा चाईदा की अपनी जिन्दगी न कियां परमेश्वरे जो इज्जत देई सकदे न। 8 क्योंकि व्यायाम करणे न शरीर जो घट फायदा होंदा है, पर परमेश्वरे दी भक्ति सारियां गल्लां ताई फायदेमंद है, क्योंकि ऐ माणुऐ जो इनाम देणे दा बायदा करता है जालू सै इसा धरती च जिन्दा रेंदा है कने मरणे बाद भी ऐ इनाम मिलणा। 9 ऐ गल्ल सच्च कने भरोसा करणे दे काबिल है। 10 असां जादा मेहनत कने कोशिश इसी ताई करदे न की असां उसा जिन्दगी जो पाई सकन, जिदे ताई साडी आस जिन्दा परमेश्वरे पर है, जडा सारयां दा परमेश्वर है कने जडे उस पर भरोसा करदे न उना दा उद्धारकर्ता है। 11 भरोसा करणे बालयां जो इना गल्लां दा हुकम देईकरी सिखा की सै ऐ गल्लां जो मनन। 12 इस ढंगे न जिन्दगी जिया की कोई भी तेरी बेजती न ना करे; पर तुसां दे बचन, तुहाडा बर्ताब, तुहाडा दुज्जयां ताई प्यार, तुहाडा मसीह पर भरोसा कने तुहाडी निर्दोष जिन्दगी उना भरोसा करणे बालयां ताई इक आदर्श बणना चाईदी, जडे तुसां जो अगुवा मंदे न। 13 जालू दीकर मै तुहाडे बाल नी ओंदा तालू दीकर पबित्र शाश्र लोकां जो पढने, कने मतलब दसणे च कने सिखाणे च लगी रे। 14 उना गल्लां जो याद रख जालू अगुवां तिजो पर हथ रखे, कने परमेश्वरे उना जो इक संदेश दितया है की तिजो तेरी खास योग्यता दे बारे च दस्से, जडी परमेश्वरे तिजो दितियो है, इसा योग्यता जो भुलदा मत। 15 इना गल्लां पर लगातार ध्यान न अभ्यास कर, कने अपने आपे जो इना गल्लां ताई पुरे तरीके न समप्रित करी दे, ताकि हर कोई दिखी सके की तुसां अपने भरोसे च बदा दे न। 16 ध्यान रखा की तुसां कियां जिया दे न कने क्या सिखा दे न, इना गल्लां पर टिकी रिया, क्योंकि अगर तू ऐसा करता रेंगा, तां तू खुद जो कने जडे तिजो सुणदे न दोनां जो न्याय बाले दिने बचाई लेणा है।

**5** कुसी भी सियाणे माणुऐ दी बेजती करणे दे इरादे न मत झिडकां दिन्दे; उसयो इज्जता न समझा जियां की सै तेरा अपना पिता है, कने अपने ला छोटयां जो इयां समझा जियां की सै तेरा अपने भाई है; 2 बजुर्ग जनानिया जो इयां समझा जियां की सै तेरी अपनी माता है, कने जवान बेहणा जो पूरी पबित्रता न समझा जियां की सै तेरी अपनी बेहण है। 3 उना विधवां जनानियां दी इज्जत कने उना दी देखभाल करा जिना दी देखभाल करणे बाले कोई नी है। 4 अगर कुसी विधवा दे बच्चे, या नाती-पोते होन, तां सै पहले अपने घर परिवारे दी जिम्मेदारी पूरी करे,

जियां इक मसीह भरोसा करणे बालयां जो करणा चाईदा, कने अपने माता-पिता जो उना दा हक देणा सिखे, क्योंकि ऐ सब परमेश्वरे जो पसंद है। 5 जिना विधवा दा कोई देखभाल करणे बाला नी है, सै परमेश्वरे पर ही आस रखदी है, कने दिन रात बिनती कने प्रार्थना करिरी परमेश्वरे ला सहायता मंगदी है। 6 पर जडी विधवा अपना सारा बकत एणो अराम च करदी है, सै शारीरक स्मे च तां जिन्दा न, पर आत्मिक रूप च मरी गियां न। 7 भरोसा करणे बालयां जो इना गल्लां दा हुकम दे, ताकि उना पर कोई दोष नी लाई सके। 8 अगर कोई अपणयां रिशतेदारां दी, कने खासकर अपने परिवारे दी देखभाल ना करे, तां उनी अपना भरोसा छडी दितया है, कने भरोसा नी करणे बालयां ला भी बुरा बणी गिया है। 9 उना ही विधवा दे नां दर्ज करा जडियां सटा सालां ला जादा उमरा दिया होन, कने सै अपने घरे बाले ला बफादार रियो हो, 10 कने अपने भले कम्मा दिया बजा ला उदा ना हो, जिना अपने बाल बचयां दा अच्छे न पालन-पोषण कितया हो; कने प्रोणयां दी ठीक ठाक सेवा कीतियो हो, कने भरोसा करणे बालयां दी सेवा इक दासिया सांई किती हो, दुखी लोकां दी सहायता कितियो हो, कने हर इक भले कम्मा च मन लाया हो। 11 पर जवान विधवां दे ना दर्ज मत करदे, क्योंकि जालू उना की शारीरक इच्छां इक विधवा दे स्मे च मसीह दी सेवा करणे दे वायदे ला जादा बदी जांदियां न, तां सै मसीह ला दूर होईकरी के दुज्जा बियाह करणा चांदिया न, 12 दुज्जा बियाह करिके सै अपने आपे जो दोषी बणाई दिन्दी है, क्योंकि उना अपना पेहला बायदा पूरा नी किता। 13 इदे सोगी सै घरे-घरे फिरी करी सुस्त होणा सिखांदियां न, कने सिर्फ सुस्त होणा ही नी, पर दुज्जयां दे बारे च चुगली निदा करदियां न कने दुज्जयां दे कम्मा च दखल भी दीदियां न, कने बुरियां गल्लां बोलदियां न, कने ऐसियां गल्लां करदियां जडियां इना जो नी करणा चाईदियां। 14 इस तांई मै ऐ सलाह दिन्दा है, की जवान विधवां जो बियाह करी लेणा चाईदा; कने बच्चे जमन कने घरबार संभालन, कने कुसी भी दुशमणे करे, इना जो बदनाम करणे दा मौका नी दे। 15 मै ऐ इस तांई बोलदा है क्योंकि केई बिधवां ऐसियां न जिना परमेश्वरे दे हुकमा जो मणगा छडी दीतिया है, कने तियां ही करदियां न जियां शैतान चांदा है की सै करन। 16 अगर कुसी मसीही परिवारे च कोई विधवा हो, तां सेई उसा दी सहायता करन ताकि उसा दा भोज कलीसिया पर ना ओए, ताकि कलीसिया ऐसी विधवां दी देखभाल करी सके जिना दी देखभाल करणे बाला कोई नी है। 17 जडे अगुवे अपना कम्म अच्छे न करदे न, सै दू गुणा इज्जत कने मजदूरी दे काबिल समझे जान, खासकर सै जडे परमेश्वरे दे बचन जो मेहनता न सिखांदे कने प्रचार करदे न। 18 ऐ पबित्र शाश्र लिखया है, की गाण गांदे बेले दांटे दा मुं मत बनदे, होर ऐ भी लिखया है, "की इक मजदूरे जो उदी मेहनत दी मजदूरी लेणे दा हक है।" इस तांई कलीसिया जो अपने अगुवे जो मजदूरी देणी चाईदी। 19 अगर अगुवे पर कोई दोष लगांदा है तां तुसां तालू दीकर उस दोषे जो मत मन्ना जालू दीकर दो या तिन गबाह बोलन की असां इसयो खुद गलत कम्म करदे दिखया है। 20 तुसां जो उस भरोसा करणे बालयां जो जडा पाप करता है, सारयां सामणे डांटी करी समझाई दिया, ताकि होर भरोसा करणे बाले लोक पाप करणे ला भी डरन। 21 परमेश्वर, कने मसीह यीशु, कने स्वर्गदांतां दी मोजदूरी च, मै तिजो चेतावनी दिन्दा है, की तू कुसी इकी दा पक्ष मत ले, साबाना न इकोदिया बर्ताब कर। 22 कुसी पर भी तालू दीकर हथ रखीकरी अगुवा नियुक्त मत करा जालू दीकर सै साबित नी करे की सै प्रभु यीशु सोगी बफादार है, अगर तू इयां करता है तां तू भी उदे पापां दा हिस्सेदार है; अपने आपे जो पापां ला दूर रखा। 23 भविष्य च बस पाणी ही पिणे बाला मत बणदा, पर अपने पटे तांई कने बार-बार बीमार होणे दिया बजा न थोडा कदी-कदी दाखरस दवाई सांई पी लिया करा। 24 मै, जल्दबाजी च कुसी जो अगुवा नी बणाणे तांई इस तांई बोलया क्योंकि कुछ लोकां दे पाप तां जल्दी सामणे आई जांदे न, कने न्याय होणे ला पेहले ही सै सारे भरोसा करणे बालयां सामणे दोषी न, पर कुछ लोकां दे पाप बडे बकते बाद सामणे ओंदे न। 25 तियां ही कुछ भले कम्म करदे न, सै कम्म दुज्जे भरोसा करणे बालयां दे सामणे ओंदे न, अगर ऐ कम्म भरोसा करणे बालयां सामणे नी ओंदे न, फिरी भी उना इना कम्मा जो जाणी लेणा।

**6** जितणे भी भरोसा करणे बाले गुलाम न, इना जो अपने-अपणे मालिकां दी इज्जत करणी चाईदी, ताकि दुज्जे लोक परमेश्वर दी कने साडी शिक्षा दी

बुराई ना करना। 2 जिना दे मालिक भरोसा करणे बाले न, उना जो मसीह भाई होणे दिया बजा ला पूरी इज्जत दिया, कने उना दी होर भी जादा सेबा करा, क्योकि जडे सेबा ला फायदा लेंदे न, सै उना ला मसीह भाई साईं प्यार करदे न। इना गल्लां दा उपदेश करदे रिया कने लोकां जो भी करणे जो बोला। 3 अगर कोई झूठी शिक्षा दिन्दा है, कने साडे प्रभु यीशु मसीह दे संदेश कने परमेश्वरे दी भक्ति दी शिक्षा जो नी मनदा है, 4 तां सै घमंडी है, कने सै कुछ नी समझदे न, पर सै अखरां दे मतलब जो लेईकरी दुजयां सोगी बेहस कने झगडा करणा चांदे न, जिसा बजा ने जलन, लडाई, दुजयां दी निदा, 5 कने दिमागे च बेकार शक भई जांदा है, कने जडे सच्च ला भटकी गियो न उना माणुआं च लडाईयां होई जांदियां न, कने ऐ सै न, जडे परमेश्वरे दी भक्ति जो कमाईया दा जरिया समझदे न। 6 पर साडे ताईं ऐई खरा है की, असां सै कम्म करन जडे परमेश्वरे जो खुश करदे न, कने उस च खुश रिया जडा परमेश्वरे सांझो दितया है। 7 क्योकि असां इस संसारे च कुछ भी लेईकरी नी आयो न, इस ताईं ना ही कुछ लेईकरी जाई सकदे न। 8 अगर साडे बाल खने पीणे कने पाणे ताईं है, तां इसी पर सांझो खुश रेणा चाईंदा। 9 कने जडे बडे अमीर होणा चांदे न, सै लोक असानिया ला पाप दे जाले च फसी जांदे न, जियां इक जानवर फंदे च फसी जांदा है, सै ऐसियां चीजां करणा चांदे न जडियां बेकार कने नुकसानदायक न, इना इच्छा उना जो बर्बाद कने खत्म करी देणा। 10 क्योकि पैसयां दा लालच सारियां बुराईयां दी जड है, केई लोक मसीह दियां शिक्षा पर भरोसा करणा छडी दिन्दे न, क्योकि सै बडे जादा अमीर होणा चांदे न, कने सै बडे दुखां च पेई जांदे न, जियां इकी माणुएे अपने आपे जो हथियारे ने बिनी लियो हो। 11 पर तू, तीमुथियुस जडा परमेश्वरे दा सेवक है, तू इना सारियां गल्लां ला दूर रे; कने धर्म, भक्ति, भरोसा, प्यार, सबर, कने नम्रता दा पिच्छा कर। 12 जियां इक अच्छा सिपाई लडाईया दे बकत कदी भी हार नी मनदा; तियां ही तू भी परमेश्वरे पर भरोसा करणे कने उदे हुकम मनणे च कदी हार मत मन, कने हमेशा दी जिन्दगी जो पकडी रख, जिदे ताईं तिजो सदया कने मतयां गबाह दे सामणे तू प्रभु यीशु मसीह जो मनया है। (aiōnios g166) 13 पिता परमेश्वर जो गबाह मनी करी, जडा सारायां जो जिन्दगी दिन्दा है, कने यीशु मसीह जो गबाह मनी करी जिनी पुन्तियुस पिलातुस दे सामणे अपने बारे च सच्च बोलया, इना जो गबाह मनी करी तिजो ऐ हुकम दिन्दा है। 14 कि तू उना सारे कम्मा जो करी सके जिना जो करणे ताईं परमेश्वरे हुकम दितया है। इस ताईं की साडे प्रभु यीशु मसीह दे दुबारा मुडी ओणे दिकर कोई तिजो पर दोष ना लाई सके। 15 परमेश्वर, इकलोता राजा है जडा महिमा दे काबिल है, जडा राजयां दा राजा है कने प्रभुआं दा प्रभु है, उनी सही बकते पर प्रभु यीशु मसीह जो प्रगट करणा है, 16 कने इक सै ही है जिनी हमेशा जिदां रेणा है, कने सै ऐसी चमकदी लौई च रेंदा है इस ताईं कोई भी इदे बाल नी जाई सकदा है, कने उसयो ना कदी कुनी माणुएे दिखया कने ना ही कदी दिखी सकदा है। उदी महिमा कने शक्ति युगां-युगां तक रेणी है। आमीन। (aiōnios g166) 17 इस संसारे दे सारे अमीरां जो हुकम दे की सै घमंड ना करन कने अपनी धन धोलता पर भरोसा मत रखा जडी थोडे दिना ताईं है, पर परमेश्वरे पर भरोसा रखा जडा सांझो सब कुछ दिन्दा है, जिसदा असां सुख लेई सकदे न। (aiōn g165) 18 कने उना जो बोला की भलाई करा, कने मते सारे भले कम्म करा, कने दयालु बणा कने सहायता करणे ताईं हमेशा अगे रिया, 19 ऐ सब करणे ला तुसां अपने ताईं स्वर्गे च धन गठेरे न, कने ऐ चोरी नी होंदा कने परमेश्वरे उना जो सच्ची जिन्दगी देणी, जिसदा मतलब हमेशा दी जिन्दगी। 20 हे तीमुथियुस, तुसां सैई कर जडा परमेश्वरे करणे दा हुकम दितया है, कने बेकार गल्लां कने उना शिक्षा ला दूर रे, जडियां परमेश्वरे दी शिक्षा दे खिलाफ न, जिसयो सै गलती ने ज्ञान बोलदे न। 21 केई लोकां इसा गलत शिक्षा जो अपनाई लिया, कने इयां करणे ने सै मसीह दी शिक्षा ला भटकी जांदे न। मै ऐ प्राथना करदा है की परमेश्वरे दा अनुग्रह तुसां पर होंदा रे।

## 2 तीमथियुस

1 मैं पैलसुस जड़ा साडे पिता परमेष्करे दिया तरफा ला प्रभु यीशु मसीह दा प्रेरित होणे ताई चुणया है। ताकि मैं प्रचार करी सके, की यीशु मसीह पर भरोसा करणे पर हमेशा दी जिन्दगी देणे दा परमेष्करे बायदा कितया है, 2 मैं ऐ चिद्दी तीमथियुस जो लिखा दा है, जडा मेरे अपने प्यारे पुत्रे साईं है। मैं प्राथना करदा है की पिता परमेष्करे कने साडे प्रभु यीशु मसीह दिया तरफा ला तिजो अनुग्रह, दया कने शांति मिल्ले। 3 मैं परमेष्करे दा धन्यवाद करदा है, जिसदी सेवा मैं शुद्ध अंतरात्मा ला किती जियां मेरे पूर्वज करते थे, जालु भी मैं प्राथना करदा है, तां प्राथना च तिजो हमेशा याद करदा है, 4 मिंजो याद है की तू कितणा रोया था, जालु मिंजो तिजो छडी करी जाणा पिया था, कने तेरे आंसूआं जो याद करिरी दिन रात तिजो ने मिलणे दी इच्छा रखदा है, की मैं खुशिया ला भर्झ जां। 5 मैं यीशु मसीह च तेरे भरोसे जो भी याद करदा है, जडा सायां ला पहले तेरी नानी लोसुस, कने तेरी माता यूनीक च था, कने मिंजो यकीन है की सेईं भरोसा तेरे अंदर भी है। 6 इस ताईं मैं तिजो याद दिलादा है कि तू उना बरदाना जो दोबारा ला जगा कर जडे परमेष्करे तिजो उस बकत दितयो थे जालु मैं तेरे सिरे पर हथ रखे। 7 क्योंकि परमेष्करे सांझो डरफोक नी बणाया है, पर परमेष्करे दी आत्मा साडे मना जो मजबूत करदी है, कने दुज्जयां ने प्यार करणे च सहायता करदी है, कने सांझो सबर रखणा सिखादी है। 8 इस ताईं न तां साडे प्रभु दे बारे च गबाईं देणे च शर्म करा, कने ना मिंजो ला शर्म करा, जडा यीशु मसीह दी सेवा करणे ताईं जेला च है, पर उस परमेष्करे दी शक्तिया ला शुभसमाचारे ताईं दुख झेलणे ताईं मेरे सोगी जुडी जा। 9 परमेष्करे ही साडा उद्धार कितया है, कने पबित्र जिन्दगी ताईं सांझो सदया है, कने उनी सांझो इस ताईं नी चुणया की असां खरे कम्म किते न; पर संसार दे बणाने ला पहले परमेष्करे यीशु मसीह जो इस संसार च भेजणे दे जरिये अपना अनुग्रह दसणे दी योजना बणाई। (aiōnios g166) 10 पर हुण साडा उद्धारकर्ता प्रभु यीशु मसीह आईं गिया है, कने उनी मौत दी शक्ति जो हराईं दिता है, कने शुभसमाचारे दे जरिये सांझो हमेशा दी जिंदगी दा रस्ता दसया है। 11 कने परमेष्करे मिंजो इस शुभसमाचार दा प्रचार करणे कने प्रेरित बणने ताईं कने लोकां जो उपदेश देणे ताईं चुणयां है। 12 इसा ही बजा ने मैं दुखां जो भी झेलदा है, कने शरमांदा नी है, क्योंकि मैं यीशु मसीह जो जाणदा है जिस पर मैं भरोसा कित्या; कने मिंजो पक्का पता है, की यीशु मसीह उस दिने दीकर जालु दीकर सै बापास नी ओणा, उदी रक्षा करणे च सक्षम है, जडा उनी मिंजो दितया है। 13 जडीं सचची शिक्षा तू मिंजो ला सुणियो है, इसा जो उस भरोसे कने प्यारे ला जडा यीशु मसीह च बसया है, उना जो अपना आदर्श बणाईं कर रख। 14 पबित्र आत्मा दिया सहायता ला जडा सांझो च रेंदा है, सचचाईं दी रखबाली करा जडीं परमेष्करे सांझो दिती थी। 15 तू जाणदा है की मते सारे आसिया प्रदेश दे भरोसा करणे बालयां मिंजो छडी दितया है, जिना च फूगिलुस कने हिरमुगिनेस न। 16 अनेसिफरुस दे घरे पर प्रभु दया करे, क्योंकि सै मिंजो ने बडीं बरी मिलणे जो आया कने मेरी सहायता किती, कने सै जेला च भी मिंजो ने मिलणे ताईं शर्मिदा नी होया। 17 पर जालु सै रोम शहरे च आया, तां उनी मिंजो हर जगा च तोपया कने मिंजो ने मिल्ला। 18 प्रभु करे, की न्याय दे दिने उस पर बडीं दया करे। कने जडीं सेवा उनी मेरी इफिसुस शहरे च किती है, उसा जो तू अच्छे ने जाणदा है।

2 इस ताईं हे मेरे पुत्र तीमथियुस, ऐ जाणी करी तू अपने आपे जो मजबूत बणा की परमेष्करे तिजो अनुग्रह दितया है जडा सिर्फ यीशु मसीह दिया तरफा ला मिलदा है। 2 तू मिंजो मत्यां लोकां दे सामणे मसीह दे बारे च शिक्षा दिन्दे सुणया है, इस ताईं मैं चांदा की तू भी भरोसा करणे बालयां जो इस शिक्षा जो सिखा, जडे बाकियां जो भी सिखाणे दे काबिल न। 3 यीशु मसीह दे अच्छे सिपाईं साईं मेरे सोगी सबर ने दुवां दा सामणा कर। 4 अगर कोई सिपाईं जडा सेना च है, तां सै होर कोई कम्म धंदा नी करदा क्योंकि सै अपने बड़े अधिकारियां जो खुश करणा चांदा है। 5 इयां ही अगर कोई पेहनवान कुशती दे अखाडे च हिस्सा लेंदा है, कने नियमा दे अनुसार नी लडदा है, तां सै जीत दा इनाम नी जीती सकदा है। 6 जडा किसान मेहनत करदा है, फसल दा पेला हिस्सा उसयो ही मिलणा चाईंदा। 7 इना उदाहरणा दे बारे च सोच की ऐ क्या सिखाणा चांदे न, कने प्रभु तिजो इना गल्लां

जो समझणे च सहायता करे। 8 हमेशा यीशु मसीह दे बारे च सोचदारे, जडा राजा दाऊदे दे बंशे ला था, कने परमेष्करे उसयो मरयां चे जिन्दा कित्या; कने ऐ ही सै शुभसमाचार है, जिसदा मैं प्रचार करदा है। 9 इसी शुभसमाचारे दिया बजा ने मैं जेला च इक अपराधी साईं दुख झेला दा है, पर परमेष्करे दे शुभसमाचार जो प्रचार करणे ला कोई नी रोकी सकदा है। 10 इस ताईं मैं परमेष्करे दे चुणयो लोकां दे फायदे ताईं सारे दुखां जो सेहन करदा है, ताकि सै यीशु मसीह पर भरोसा करन कने बची सकन कने उना जो हमेशा दी महिमा मिल्ली सके। (aiōnios g166) 11 ऐ गल्ल सचच है कने भरोसा करणे दे काबिल है, की अगर असां यीशु मसीह सोगी मरी गियो न, तां उदे सोगी जिंदा भी होणे। 12 अगर असां यीशु मसीह दिया बजा ने दुख झेलणे, तां असां उदी बजा ने राज भी करणा है; अगर असां बोलणे की असां यीशु दे चेले नी न, तां उनी बोलणा की मैं इना जो नी जाणदा। 13 अगर असां मसीह सोगी बफादार नी न, फिरी भी सै साडे सोगी बफादार है, क्योंकि सै खुद अपने सभाव दे खिलाफ नी जाईं सकदा है। 14 बार-बार इना गल्लां दी शिक्षा भरोसा करणे बालयां जो दिया, जडियां मैं तुहांजो सिखाइयां न, कने प्रभु जो गबाह बणाईं करी उना जो चेतावनी दिया की अखरां दे मतलब पर बेहस मत करा, इयां करणे ने कोई फायदा नी होंदा; पर सुणनेवाले लोकां ताईं नुकसान है। 15 तुहांजो जितना जादा होईं सके मेहनत करणी चाईंदी की परमेष्कर तुहांजो ऐसा कम्म करणे बाला साबित करी दे, जडा कदी भी शर्मिदा ना होन, कने जडा परमेष्करे दे बचना जो ठीक तरीके ने सिखांदा हो। 16 पर संसारिक गल्लां कने बेकार गल्लां ला बची रिया, क्योंकि जडे लोक इयुदियां गल्लां च हिस्सा लेंदे न, सै होर भी जादा परमेष्करे ला दूर होईं जांदे न। 17 उना दी झूठी शिक्षा फैलीं करी लोकां दे भरोसे जो तोडी दिन्दी है, जियां खूला सडया होया जखम माणुऐ जो खत्म करी दिन्दा है: हुमिनयस कने फिलेतुस भी उना चे ही न, 18 उना सचचाईं पर भरोसा करणा छडी दितया है, सै ऐ बोलेदे न की परमेष्करे मरी गियो भरोसा करणे बालयां जो पहले ही हमेशा दी जिन्दगी ताईं जिन्दा करी दितया है, जिसदी बजा ने सै कुछ विश्वासियां जो यीशु मसीह पर भरोसा करणे ला भडकाईं दिन्दे न। 19 पर परमेष्करे दे लोक उसा पक्की नियां साईं न जडीं कदी हिलदी नी, उसा पक्की नियां पर खोदी करी लिखया है की, “प्रभु अपने लोकां जो जाणदा है” कने “जडा कोई प्रभु दी भक्ति करदा है, सै बुराईं ला बची रेंदा है।” 20 बड़े घरे च सिर्फ सोने या चांदी दे ही नी, पर लकडी कने मिट्टी दे भांडे भी होंदे न, कुछ भांडयां दा इस्तेमाल खास मौकयां ताईं होदा है, कने कुछ भांडयां दा इस्तेमाल आम कम्मा ताईं होदा है। 21 इस ताईं अगर कोई अपने आपे जो गंदगी ला साफ करगा, तां सै उस आदर दे भांडे साईं होईं जांणा जिसयो आदर ताईं इस्तेमाल करदे न, उदी जिन्दगी पबित्र होणी कने मालिक उसयो इस्तेमाल करी सकदा है। 22 इस ताईं उना पापी इच्छां ला बची रिया जडियां जवान लोकां जो अपने पाससे खिचदियां न; कने उना लोकां दी संगती करा, जडे धार्मिकता, भरोसा, प्यार कने शांत सभाव कने जडे साफ मने ला परमेष्करे दी भक्ति करदे न। 23 कने मुखता कने फालतू गल्लां ला दूर रिया, क्योंकि तू जाणदा है की इना ला झगडे होंदे न। 24 कने प्रभु दे दासे जो लडाका नी होणा चाईंदा, पर उसयो सबना ने प्यारभाव ने गल्ल बात करणे बाले, कने परमेष्करे दी शिक्षा जो अच्छे ने सिखाणे बाला, कने सेहनशील होणा चाईंदा। 25 कने जडे लोक इना दा बिरोध करदे न, उना जो प्यारभाव ने सचची शिक्षा जो समझांदा हो, क्या पता परमेष्कर उना दा मन बदली दे, जिसला उना जो यीशु मसीह दी सचचाईंया जो जाणने दा मौका मिले। 26 कने ताकि सै जागृसक होईं जान कने शैताने दे बंशे ला बाहर निकली सकन, जिनी उना जो धोखा दिता कने सेईं करवाया जडा सै चांदा था।

3 तीमथियुस, मैं चांदा की तू ऐ जाणे, की यीशु मसीह दे दुबारा मुडी करी ओणे दे आखरी रोजां च ऐसा बुरा बकत ओणा है। 2 क्योंकि लोक मतलबी, लालची, डींगमार, घमंडी, निंदा करणे बाले, माता-पिता दी गल्लां जो नी मनणे बाले, मतलबी, अपबित्र, 3 दुज्जयां ने प्यार नी करणे बाले, माफ नी करणे बाले, दोग लागे बाले, अपणियां इच्छां पर काबू नी रखणेबाले, झगडांला, अच्छाईं ला नफरत करणे बाले, 4 भरोसा तोडने बाले, ढीठ, घमण्डी, परमेष्करे जो नी पर अपने ऐशो अराम जो प्यार करणे बाले होंणे न। 5 इयोदे लोक दिखणे च तां परमेष्कर दे भक्त लगदे न, पर ऐ उसा शक्ति जो नी मंदे, जडीं उना जो परमेष्कर दा

भक्त बनाई सकदी है, ऐसे माणुआं ला दूर ही रैनयो। 6 इना चे ही कुछ लोक ऐसे भी न, जडे धोखे ला लोकां दे घरां च बडी जां दे न, कने उना मुर्ख जाननिया जो वशे च करी लेंदे न, जिना दा मन पापां दे भोज ने दबईया कने हर तरा दी वासना दे वशे च फसियां न। 7 कने सै हमेशा नोईयां शिक्षां जो सिखदियां रेंदियां न पर यीशु मसीह दी सच्चि शिक्षा जो कदी नी समझी सकदी। 8 कने ऐ झूठे गुरु न, जडे यीशु मसीह दियां सच्चियां शिक्षा दा बिरोध करदे न, जियां यन्से कने यम्बेसे मूसा दा बिरोध किता था, इना दी अकला जो कीडे पेई गियो न कने, प्रभु यीशु मसीह पर भरोसा नी करदे न। 9 सै लम्बे बकते दीकर लोकां जो धोखा नी देई सकदे, क्योकि जियां लोकां यन्से कने यम्बेसे दिया मुर्खाता जो पछेणी लिया था, तियां ही सारयां जाणी लेणा की ऐ भी मुर्ख न। 10 पर हे तीमुथियुस, तू अच्छे ने जाणदा है की मैं क्या सिखादां, कने मैं कियां जिन्दगी जिन्दा है, कने मेरियां क्या योजना थियां कने मेरा क्या भरोसा है। तू जाणदा है की मैं कितना सेहनशील कने दुज्जयां ने प्यार करदा है, कने दुख मुसीबां जो सेहन कितया है, 11 कने तू उना भयानक दुखां दे बारे च जाणदा है, जडे अन्ताकिया कने इकुनियुम कने लुन्ना दे शेहरां दे लोकां मिजो दिते कने मैं उना दुखां जो कियां झेलया, पर प्रभुऐ मिजो इना ला छुडाई लिया। 12 जितणे भी लोक परमेश्वर जो खुश करणा चां दे न कने यीशु मसीह पर भरोसा करदे न, उना सारयां जो दुख कने पेशानियां झेलणियां पोंणियां। 13 पर बुरे लोकां कने धोखा देणेबाले लोकां होर भी जादे बुरे कम्म करणे, उना लोकां जो धोखा देणा कने उना अपु भी होर लोकां ला धोखा खाणा। 14 पर हे तीमुथियुस, उना गल्लां पर जडियां तू मिजो ला सिखियां न, कने जिना पर तू भरोसा किता है, इना जो तू लगातार भरोसे ने मनदा रे। क्योकि तू जाणदा है की तिजो ऐ सच्चाईयां कुनी सिखाईयां न। 15 तालू ला जालू तू इक छोटा बच्चा था, तू पबित्र शास्त्र जो सिखया है, जडा तिजो ऐ समझणे च सहायता करदा है कि जालू तू यीशु मसीह पर भरोसा करदा है तां परमेश्वर तिजो बचांदा है। 16 सारा पबित्र शास्त्र सै बचन है जिसयो परमेश्वरे अपने पबित्र लोकां दे मने च पाया कने उना इस बचने जो इस तांई लिखया है, ताकि असां इदा इस्तेमाल लोकां जो सच्चि शिक्षा सिखांणे, कने जडे लोक गलत करदे न उना जो समझाणे, कने लोकां जो दसणे तांई की कियां अच्छी जिन्दगी जि सकदे न, 17 ताकि परमेश्वरे दे लोक तैयार होइ जान कने हर इक भले कम्म करणे दे काबिल होइ जान।

**4** जालू यीशु मसीह राजे सांई राज करणा ओणा है, तालू उनी उना दोनों दा न्याय करणा है, जडे लोक जिन्दे न कने उना दा भी जडे मरी गियो न, इस तांई पिता परमेश्वरे कने प्रभु यीशु मसीहे जो गबाह मन्नी करी मैं तिजो आदेश दिन्दा है। 2 की हर तरा दे हालातां च तू परमेश्वर दे बचना दा प्रचार करणे तांई तैयार रे, चाहे हालत अच्छे होन या हालात बुरे होन, तिजो लोकां जो दसणा है की उना क्या गलत किता, कने उना दे पांया तांई उना जो समझा, पर तिजो उना लोकां जो उत्साहित भी करणा है, जालू तू उना जो सबर ने सिखांदा है। 3 क्योकि ऐसा बकत भी ओणा, की जालू लोकां सच्चिया शिक्षा जो नी मनणा है, पर उना अपनी ही इच्छा दे अनुसार चलणा, कने उना ऐसे होर मते गुरूआं जो तोपणा है, जडे सेई सिखां दे जडा सै सुणना चां दे न। 4 ऐसे लोक परमेश्वरे दिया सच्चाई जो सुणना नी चां दे पर उना झूठ कने माणुआं दी बणी बनाईयां कहाणियां ही सुणनियां न। 5 पर तू सारियां गल्लां च शांत कने साबधान रे चाहे तिजो दुख तकलिफां जो झेलणा पोए, कने शुभसमाचारे दे प्रचार तांई मेहनत कर, कने परमेश्वरे दा सेवक होणे दे नांते न तू सै सारे कम्म करणे न जडे तिजो दितयो न। 6 मैं ऐ हुकम इस तांई दिन्दा है, क्योकि परमेश्वरे तांई मेरी जिन्दगी कने मेरे कम्म करणे दी ताकत घटा दी है, क्योकि मैं जाणदा है मैं जल्दी मरणे वाला है। 7 जियां इक सच्चा सिपाई लडाईया बकते हार नी मनदा तियां ही मैं भी कदी मसीह तांई मेहनत करणे ला हार नी मन्नी, मैं उना सारे कम्मा जो पूरा किता जडे यीशु मसीहे मिजो करणे जो दिते, मैं आखरी दीकर बफादार रिया। 8 प्रभु यीशु मसीहे मिजो धार्मिकता दा ताज देणा, जडा सच्चा न्याय करदा है, कने ऐ इनाम मिजो उस रोज मिलणा जालू उनी दुबारा मुडी ओणा है, कने ऐ इनाम सिर्फ मिजो ही नी पर उना सारे लोकां जो मिलणा है जडे चां दे न की यीशु मसीह दुबारा मुडी ओए। 9 तीमुथियुस, तू मेरे बाल जल्दी औणे दी कोशिश कर। 10 क्योकि देमास उना चीजां ने प्यार करदा है जडियां इस संसारे दियां न, कने मिजो छडी करी थिस्सलूनीके शेहरे जो चली गया है, भाई

क्रैसकेस गलातिया प्रदेशे जो कने भाई तीतुस दलमतिया शेहरे जो चली गया है। (aiōn g165) 11 सिर्फ लूका मेरे सोगी है, कने जालू तू ओणा तालू मरकुस जो सोगी लेई ओयां; क्योकि सै मेरी सेबकाई तांई बडे कम्मे दा बन्दा है। 12 तुखिकुस जो मैं इफिसस शेहरे च भेजया है। 13 जालू तू ओणा, तां मेरा गर्म कोट लेई ओयां जडा मैं त्रोआस शेहरे च करपुस दे घरे छडी आया है, कने सोगी मेरी चिट्ठिया जो लेई ओयां, खासकर उसा चिट्ठिया जो जडी भेदा दी खली ने बणियो है। 14 सिक्न्दर जडा तांबे दे भांडे बणादा था, उनी मिजो बडे दुख दिते, प्रभुऐ उसयो उदे बुरे कम्मा दे अनुसार फल देणा। 15 तू भी अपने आपे जो उसला बचाई रख, क्योकि उनी यीशु मसीह दिया शिक्षा दिया बजा ने साडा बडा बिरोध कितया है। 16 पैली बरी जालू मैं अपने बचाव तांई रोम शेहरे दी कचेरी च गया, तां कोई भी मेरे सोगी नी था, कने सारे मिजो छडी गे, परमेश्वरे इना दे इस कम्मे जो इना दे खिलाफ ना गिणे, मैं प्राथना करदा है की परमेश्वर इना जो माफ करी दे। 17 पर प्रभुऐ मेरी सहायता कित्ती कने मिजो शक्ति दिती, ताकि मैं होर जाति दे लोकां जो, जडे उस बकत कचेरी च थे, उना जो प्रभु यीशु दा प्रचार साफ-साफ सुणाई सके; कने उनी मिजो मौत ला बचाई लिया। 18 कने प्रभुऐ मिजो हर इक बुरे कम्मा ला बचांणा, कने मिजो स्वर्ग दे राज्य च लेई जाणा है: कने उदी महिमा युगां-युगां दीकर होंदी रे। आमीन। (aiōn g165) 19 प्रिस्का कने अक्विला जो, कने उनेसिफुरस दे परिवार जो मेरा नमस्कार। 20 इरास्तुस कुरिन्थुस शेहरे च रेई गया, कने मैं त्रुफिमस जो मीलेतुस शेहरे च छडी दिता क्योकि सै बीमार था। 21 सदियां ला पेहले औणे दी कोशिश कर। यूबूलुस, कने पदेंस, कने लीनुस कने क्लौदिया, कने सारे मसीह भाईयां दिया तरफा ला जडे ऐथू न तिजो नमस्कार। 22 मैं प्राथना करदा है की प्रभु तरे सोगी कने उदा अनुग्रह भी तरे सोगी रे।

# तीतुस

**1** मैं, पौलुस ऐ चिठ्ठी तिजो लिखा दा है, मैं पिता परमेश्वरे दा सेवक कने यीशु मसीह दा प्रेरित है, मिंजो परमेश्वरे दे चुणयो लोकां दे भरोसे जो मजबूत करणे कने उना जो सच्ची शिक्षा जो जाणने च सहायता करणे तांई चुणया है। ताकि सै ऐसी जिन्दगी जीन जडी परमेश्वरे जो खुश करदी हो। **2** जिदी बजा ने सै परमेश्वरे सोगी हमेशा दी जिन्दगीया दी आस रखन, क्योंकि परमेश्वर जडा कदी झूठ नी बोलदा है। उनी ही संसार बणने ला पहले ऐ बायदा कितया की परमेश्वरे दे लोकां जो हमेशा दी जिन्दगी मिलणी है। (aiōnios g166) **3** पर हण बिलकुल सही बकते च, परमेश्वरे ऐ श्भसमाचार सांझो पर प्रगट किता, कने असां सबना जो इदा प्रचार करदे न, साडे उद्धारकर्ता परमेश्वर मिंजो ऐ जिम्मेदारी दिती की मैं उदे तांई ऐ कम्म करी सके। **4** मैं चिठ्ठी तीतुस जो लिखा दा है, तू मेरे अपने पुत्रे सांई है क्योंकि तू मसीह पर भरोसा करदा है जियां मैं करदा है: मैं प्राथना करदा है की पिता परमेश्वर कने साडे उद्धारकर्ता मसीह यीशु तिजो हमेशा अनुग्रह, दया कने शांति दिन्दा रे। **5** मैं इस तांई तिजो क्रेते टापू च छडी अया था, ताकि तू ओथु पर साडे बचयो कम्मा जो पूरा करी सके, कने क्रेते टापू दे हर इक शेहरे च अगुवां जो नियुक्त करे, जियां करणे तांई तिजो मैं हुकम दितया है। **6** इक अगुवे जो निर्दोष, कने अपणी घरे बालिया ला बफादार, सेहनशील, जिना दे बच्चे भरोसा करणे बाले होन, कने शरिरी दी इच्छा पर नी चल्णे बाले हो, कने माता-पिता दी इज्जत करणे बाले होन। **7** क्योंकि अगुवे जो परमेश्वरे दा भंडारी होणे दिया बजा ला निर्दोष होणा चाईदा। ना हठी, ना गुस्से बाला, ना शराबी, ना मारकुटाई बाला, कने पैसे दा लालची हो। **8** पर परोणयां दी इज्जत करणे बाला हो, भलाई ने प्यार करणे बाला हो, अपने उपर सयम रखणे बाला हो, धर्मी हो, पबित्र हो, समझदार हो; **9** कने उसयो यीशु मसीह दे बारे च भरोसे दे काबिल संदेश पर मजबूतिया ला भरोसा करणा चाईदा, जडा असां उसयो सिखाया है, ताकि सै दुज्जयां जो सही शिक्षा मनणे तांई उरसाहित करी सके कने उना दियां गलतियां जो सही करी सके। **10** मैं ऐसा इस तांई बोलदा है, क्योंकि मते लोक सही शिक्षा दा बिरोध करदे न, जडे बकवास करदे, कने दुज्जयां जो धोखा दिन्दे न। खासकर यहूदी लोक जडे विस्वासी बणी गियो न कने उद्धार तांई खतना करणे पर जोर दिन्दे न। **11** तिजो इना लोकां जो शिक्षा देणे ला भरोसा चाईदा क्योंकि जालू सै ऐसी शिक्षा दिन्दे न, तां मतायां परिबारां दा भरोसा खत्म होई जांदा है, सै ऐ कम्म सिर्फ पैसा कम्पणे तांई करदे न। **12** उना चे ही इकी माणुऐ जडा क्रेते टापू ला है, जिसयो सै अकलमंद माणु मणु दे न, उनी ही बोलया है, “क्रेते टापू दे लोक हमेशा झूठ बोलदे न, सै डंगरा सांई बर्ताब करदे न, कने आलसी कने खान्द लोक न।” **13** ऐ गल्लां क्रेते टापू दे लोकां तांई अज भी सच्च न, इस तांई उना जो सकती ने चेतावनी दिया कर की सै यीशु मसीह दी शिक्षा पर भरोसा करन। **14** कने सै यहूदियां दी झूठी शिक्षा कने झूठी कहाणियां पर कने इना माणुआं दे हुकमा पर मन न लगान, जडियां सच्च दी शिक्षा ला भटकादियां न। **15** ऐसे लोक जिना दे मना च बुरे बिचार नी न, उना तांई सारियां चीजां शूद्र न, पर सै लोक जडे बुरे न कने यीशु मसीह पर भरोसा नी करदे, कने ना ही कोई अच्छा कम्म करदे न क्योंकि उना दे दिल कने दिमाग दोनो ही पुरे गंदे होई गियो न। **16** ऐ झूठे शिक्षक बोलदे न की असां परमेश्वरे जो जाणदे न, पर इना दे कम्मा कने चाल चलन ने पता लगदा है, की ऐ यीशु मसीह जो नी जाणदे न, क्योंकि सै नाफरताने भयो होया न कने आज्ञा नी मणने बाले न, कने कुसी भी खरे कम्म करणे दे काबिल नी न।

**2** पर तीतुस तिजो भरोसा करणे बालयां जो सेई सिखाणा है, जडा यीशु मसीह दी शिक्षा ने सहमत है। **2** बजुर्ग मर्द अपने उपर काबू रखणेबाले होन, दुज्जयां ने ऐसा बर्ताब करणे बाले होन की लोक इना दी इज्जत करन, इना दा भरोसा प्रभु पर मजबूत हो, कने दुज्जयां ने प्यार करणे बाला कने सबर रखणे बाला होन। **3** कने इयां ही बजुर्ग जाननिया दे चाल चलन कने जडा सै करदियां न उसला प्रभु जो इज्जत मान मिल्ले, दोष नी लागे बालियां होन, कने शराबी नी होन, कने दुज्जयां जो खरियां गल्लां सिखाणे बालियां होन। **4** ताकि सै जवान जाननिया तांई इक अच्छी मिसाल बणन, कने उना जो अपने घरे बालयां कने अपने बचयां सोगी प्यार करणे दी सलाह देन, **5** कने अपने उपर काबू रखणे बाली हो, अपने घरे

बाले ला बफादार हो, घर परिबार जो सम्भालने बाली होन, कने अपने-अपने घरे बालयां दे अधीन रहे बालियां होन, ताकि परमेश्वरे दे बचने दी बुराई नी होई सके। **6** इयां ही जवान मर्दां जो भी समझया कर, की सै अच्छे ने बर्ताब करन। **7** सारियां गल्लां च तू अपने आपे जो दुज्जयां तांई आदर्श बणा, ताकि सै भी इयां ही करन; कने जालू तू भरोसा करणे बालयां जो यीशु मसीह दे बारे च शिक्षा दे, तां तेरा सिखाणे दा मकसद अच्छा हो, ताकि लोक तिजो होर इज्जत देन, **8** कने तेरिया शिक्षा च ऐसी सच्चाई होणी चाईदी, की कोई भी उसा जो बुरा नी बोली सके, ताकि साडे बिरोधी शर्मिंदा होन क्योंकि कुछ भी बुरा नी होणा, जडा की सै साडे खिलाफ कुछ बोली सकन। **9** जडे दास गुलाम न उना जो सिखा की अपने-अपने मालिकां दी गल्ल मन्ना, कने उना जो ऐसा करणे तांई बोला जडा मालिकां जो खुश करे, कने मालिक उना दी शिकायत ना करन; **10** चोरी चलाकी ना करन, पर अपने आप जो साबित करा की इमानदार न, की लोक उना दा अच्छा बर्ताब दिखीकरी कने सै जडा कुछ भी करदे न, उसला लोकां जो परमेश्वरे दे बारे च संदेश सुणने तांई इच्छा होणी। **11** क्योंकि परमेश्वरे अपना अनुग्रह किता, कने साडे तांई इक इस्ता कडया, ताकि सारे लोक उद्धार पाई सकन। **12** कने इस अनुग्रह ला परमेश्वरे सांझो सिखाया की, उस तरीके ला बर्ताब करणा बंद करा जडा परमेश्वरे जो खुश नी करदा, कने उना चीजां दा लालच करणा बंद करी दिया जिना दी इच्छा भरोसा नी करणे बाले लोक करदे न, कने असां हले दीकर इसा धरती पर ही न तां बुद्धिमानी ला कने धार्मिकता सोगी इस तरीके ला कम्म करा जडे परमेश्वरे जो खुश करदे न। (aiōn g165) **13** असां ऐसा बर्ताब करदे न, जालू असां उम्मीद कने उस महान दिने दी निश्चल रखदे न, जिस दिन साडे महान परमेश्वरे कने उद्धारकर्ता यीशु मसीह दुबारा मुडी करी इसा धरती पर ओणा है। **14** यीशु मसीह साडे फायदे तांई मरी गिया, ताकि सांझो सारे पापां ला अजाद करे कने शूद्र करी सके ताकि असां उदे बडे खास लोक बणी जान। जडे भले कम्म करणे तांई पुरे तन मन ला समर्पित होन। **15** इस तांई तीतुस, मैं चांदा की तू ओथु दे भरोसा करणे बालयां जो इना गल्लां दे बारे च सिखा जडियां मैं तिजो दसियां न। कने लोकां जो इना गल्लां जो करणे तांई प्रोत्साहित कर, जिथु जरूरी हो ओथु उना जो सही कर, तिजो ऐसा करणे दा पूरा हक है, पक्का कर की तू जडा सिखांदा है, उसयो कोई भी तुच्छ नी समझे।

**3** मसीह पर भरोसा करणे बालयां लोकां जो याद दिलांदा रे, की हाकिमां कने अधिकारियां दे अधीन रिया, कने उना दी गल्ल मन्ना कने इज्जत करा, कने हर इक खरे कम्मे तांई तैयार रिया, **2** सै कुसी जो भी बदनाम ना करन, लडाई झगडे करणे बाले ना होन, पर दयालू सभावे दे होन, कने सारे लोकां सोगी बडे प्यारे ने रेन। **3** क्योंकि असां यीशु मसीह पर भरोसा करणे ला पहले मुर्ख कने परमेश्वरे दे हुकम नी मनणे बाले थे, कने लोकां ला धोखा खाणे बाले थे, असां बुरियां इच्छां कने संसारे दियां चीजां दे गुलाम थे, कने जलन करी के जिन्दगी कटदे थे, कने लोकां ला नाफरत कने इक दुज्जे सोगी दुशमणी रखदे थे। **4** पर फिरी भी साडे उद्धारकर्ता परमेश्वरे अपणी दया कने प्यार सांझो लोकां पर दस्सी। **5** तां उनी सांझो साडे पापां दी सजा ला बचाया कने ऐ धर्म दे कम्मा दिया बजा ने नी, जडे असां अपु किते, पर उनी अपणी दया दे अनुसार, उनी साडे पापां जो धोई करी दूर किता, कने पबित्र आत्मा ला सांझो नोआ सभाव कने नोई जिन्दगी दिती है। **6** साडे उद्धारकर्ता प्रभु यीशु मसीह जडा किता उदे जरिये परमेश्वरे सांझो पबित्र आत्मा दितया है, ताकि सै सांझो च सामर्थ्य बाले कम्म करी सके। **7** जिम्मेने असां उस हमेशा दी जिन्दगी दी आस रखी सकन जडी परमेश्वरे सांझो अपणी ओलाद दे स्मे च देणे दा बायदा कितया है। कने उदे बारे च असां जाणी सकदे न क्योंकि परमेश्वरे अपने अनुग्रह दे जरिये सांझो अपने सोगी सही बणाया है। (aiōnios g166) **8** ऐ गल्ल सच्ची है, जडी मैं हणी दस्सी है कने मैं चांदा है, की तू भरोसा करणे बालयां जो इना गल्लां दे बारे च मजबूती ने सिखा। इस तांई की जिना परमेश्वरे पर भरोसा रखया है, सै खरे-खरे कम्मा जो करणे च अपना बकत देणे च ध्यान लगान, ऐ गल्लां सारयां तांई खरियां न, कने फायदेमंद न। **9** पर मुर्ख गल्लां दी बेहसा ला दूर रिया, पूर्वजां दी लम्बियां सूचियां पर अपना बकत बर्बाद मत करा, कने बैर बिरोध, कने उना झगडयां ला बची के रिया जडे मूसा दे नियमा दे बारे च न, क्योंकि इना गल्लां दा कोई फायदा नी है। **10** जडे लोक

कलीसिया च फुट पादे न, तिजो उना लोकां जो कम्म से कम्म दो बरी चेतावनी देणी चाईदी, की सै ऐसा करणा बंद करी देन। उदे बाद उना पर होर बकत बर्बाद मत करदे कने उना ला दूर रेणा चाईदा। 11 तुसां ऐ पक्का करी लिया की ऐसा माणु जडा जाणी बुझी करी बुरे रस्ते पर चलदा है, तां उदे रूद दे बुरे कम्म ही साबित करदे न की सै दोषी है। 12 जालू मैं तेरे बाल क्रेते टापू पर अरतिमास कने तुखिक्स जो भेजगा, तालू तू मेरे बाल निकुपुलिस शेहर औणे दी कोशिश करयां, क्योंकि मैं ओथु ही सर्दियां कटणे दी सोचियो है। 13 जालू जेनास व्यवस्था जो सिखाणे बाला कने अपुल्लोस अपणी यात्रा ताई निकलगे, तां इना दी सहायता करणे ताई जडा कुछ तू करी सकदा है, सै तू करयां। कने ऐ ध्यान रखयां की उना जो कुसी भी चीजा दी कमी ना हो। 14 सिर्फ इतणा ही नी, पर तिजो भरोसा करणे बालयां जो सिखांदे भी रेणा चाईदा की भले कम्म करणे ताई लगातार मेहनत करदे रिया, ताकि उना लोकां दियां जरतां पुरियां होई सकन जिना बाल कुछ नी है, ऐ भरोसा करणे बालयां दी सहायता करदा है की, सारे इक ही मकसद ने जिन्दगी जी सकन। 15 मेरे सोगी ऐथू दे सारे भरोसा करणे बाले तिजो नमस्कार करदे न। ओथु क्रेते टापू च साडे भरोसा करणे बाले साथियां जो जडे सांझो ने प्यार करदे न, उना जो भी मेरी तरफा ला नमस्ते बोलयां। मैं प्राथना करदा है की, प्रभु तुसां सारयां पर अनुग्रह करे।

# फिलेमोन

**1** मैं, पौलुस इसा चिठिया जो लिखा दा है। मैं यीशु मसीह दिया सेबा ताई जेला च बन्द है। मैं कने साडा मसीह भाई, तीमुथियुस तुहांजो नमस्कार करदे न। कने मैं ऐ साडे प्यारे मित्र कने सोगी कम्म करणे बाले फिलेमोन जो लिखा दा है। 2 कने मैं साडी मसीह बेहण अफफिया कने मसीह भाई अरखिप्पुस, जडा योधा साई परमेश्वरे दी सेबा करदा है कने उसा कलीसिया दे ना जडी तुहाडे घरे गिठी होंदी है उसा जो भी लिखा दा है। 3 मैं प्रार्थना करदा है की साडे पिता परमेश्वर कने प्रभु मसीह यीशु दिया तरफा ला तुहांजो अनुग्रह कने शांति मिलदी रे। 4 क्योंकि मैं जालू भी तिजो ताई प्रार्थना करदा है, मैं हमेशा तेरे ताई परमेश्वरे दा धन्यवाद करदा है कने अपनी प्रार्थना च भी तिजो याद करदा है। 5 मैं प्रभु यीशु मसीह च तेरे भरोसे दी कने परमेश्वर दे सारे लोकां ताई तेरे प्यार दी चर्चा सुणदा है। 6 मैं प्रार्थना करदा है की तू अपने भरोसे च मजबूत होई जाऐ कने उना सारी अच्छी चिजां जो समझी सके जिना जो परमेश्वरे सांझो दितया है, इसी बजा ने लोकां मसीह दी महिमा करणी है। 7 क्योंकि हे मसीह भाईयो, तुहाडी इक दुज्जे ताई प्यारे दी भावना ने मैं बडा खुश है कने उत्साहित है, इस ताई की तेरे जरिये परमेश्वरे दे लोक उत्साहित न। 8 इसा बजा ला मैं तिजो मसीह च इक भरोसा करणे बाला होणे दे नाते खरे कम्म करणे ताई बडे हके सोगी हुकम देई सकदा है। मैं बजुंग पौलुस, जडा हुण यीशु मसीह दी सेबा करणे दिया बजा ला इक केदी भी है, फिर भी तिजो बडे प्यार ला बिनती करदा है। 10 मैं उनेसिमस ताई बिनती करदा है, जडा मेरे ताई पुत्रे साई है। जालू सै जेला च था तालू सै मसीह च मेरा पुत्र बणी गया। 11 सै तां पहले तेरे कुसी कम्मे दा नी था, पर हुण तेरे कने मेरे दोनो ताई बडे कम्मों दा है। 12 चाहे मैं उनेसिमस सोगी बडा प्यार करदा है, पर मैं उसयो तुहाडे बाल भेजा दा है। 13 मैं उसयो अपनी मदद ताई अपने बाल ही रखणा चांदा था, जबकि मैं शुभसमाचारे दा प्रचार करणे ताई जेला च था। से ऐशु मेरी मदद करणे ताई है तेरी जगा लेई सकदा है, क्योंकि मिंजो पता है की तू मेरी मदद करणा चांदा है। 14 अगर तू सेहमत नी है तां मैं उसयो ऐशु नी रखगा, मैं चांदा है की तू अपणिया खुशिया ला मेरी मदद करे क्योंकि इस ताई नी की मैं तिजो ऐ करणे ताई मजबूर किता है। 15 शायद ऐई बजा है की परमेश्वरे उनेसिमस जो थोडे बकते ताई तिजो ला दूर जाणे दा हुकम दिता ताकि सै मसीह पर भरोसा करे, इसा बजा ला तू उसयो अपने बाल रखणा है। (aiōnios g166) 16 तू उसयो दास ना समझन पर से दास ला भी बदीकरी है, से हुण विश्वासी साथी है कने प्यार भी है कने तुहांजो उसयो होर भी जादा प्यार करणा है, कने मैं उसयो बडा प्यार करदा है, पर तिजो उसयो दासे दे स्मे च होर भी जादा प्यार करणा चाईदा क्योंकि सै मसीह च इक भाई है। 17 अगर तू मिंजो अपना साथी समझदा है, जालू उनेसिमस बापस तेरे बाल ओंगा तां उदा खुशिया ला स्वागत करयां जियां मेरा स्वागत करदे न। 18 अगर उनी तेरा कुछ नुक्सान कितया या उस पर तेरा कोई कर्ज है तां उसयो मेरे नां लिखी दे। 19 मैं पौलुस अपने हथे ने लिखदा है की मैं उदा कर्ज भरी दिंगा; हालांकि तुसां पहले ला ही जाणदे न की, अगर मैं तुहाडी मदद नी कितियो होंदी तां तुहांजो खुद नोई जिन्दगी नी मिलियो होंदी इस ताई तुसां अपनी जिन्दगी ताई मेरे कर्जदार न। 20 मेरे प्यारे मित्र, ऐ खुशी मिंजो प्रभु च तेरिया तरफा ला मिल्ले, कने इक साथी विश्वासी दे स्मे च मिंजो उत्साहित करे। 21 जियां की मैं तुहांजो लिखया है, मिंजो यकीन है की तुसां तियां ही करणा जियां मैं करणे जो बोलया। मिंजो पता है की उसला भी बदीकरी करणा जितणा मैं तुहांजो बोलया। 22 इक होर गल्ल कने मेरे ताई अपने घरे च इक कमरा तैयार करा क्योंकि मैं उम्मीद करदा है की परमेश्वरे तुहाडी प्रार्थना दा जबाब देणा की मैं दुबारा तुहाडे बाल ओऐ कने मिली सके। 23 इपफ्रास, जडा यीशु मसीह दा प्रचार करणे दिया बजा ला मेरे सोगी जेला च है कने मसीह च तुहांजो नमस्कार करदा है। 24 कने मरकुस, अरिस्तर्खुस, देमास, लूका जडे मेरे सोगी प्रभु दा कम्म करदे न, इना दी तरफा ला तुहांजो नमस्कार। 25 मैं प्रार्थना करदा है की साडा प्रभु यीशु मसीह तुहांजो पर अनुग्रह करे। आमीन।

# इब्रानिया

**1** परमेश्वर पराणे जमाने च परमेश्वर दे संदेश देणेबालयां दे जरिये बडी बरी बडे तारिकां ला साडे पूर्वजां सोगी गल्लां कितियां, **2** पर इना आखरी रोजां च परमेश्वर साडे सोगी अपने पुत्रे जरिये गल्लां कितियां। परमेश्वर अपने पुत्रे जरिये सारियां चीजां जो बणाया कने उसयो सारे संसारे दा बारिस बणाया। (aiōn g165) **3** पुत्र ही परमेश्वर दी महिमा दी लौ, कने बिलकुल उदे साई ही है, कने अपने शक्तिशाली बचना ला सारे संसारे जो चलादा है। उनी लोकां जो उना दे पापां ला शुद्ध किता, कने इदे बाद स्वर्ग च महिमामय परमेश्वर दे सजे पासे जाई बैदा। **4** इस ताई परमेश्वर अपने पुत्रे जो ऐसा ना दिता जडा स्वर्गदूतां ला जादा महान है, इसला सांझो पता चलादा है की पुत्र उना ला कितणा जादा महान है। **5** क्योंकि पबित्र शास्त्र च ऐ कुशु भी नी लिखया है की परमेश्वर अपने कुसी स्वर्गदूते ला ऐसा कदी नी बोलया जडा उनी अपने पुत्रे ने बोलया, “तू मेरा पुत्र है; अज मैं घोषणा करता है की तू मेरा पुत्र है।” कने उनी फिरी कदी भी कुसी स्वर्गदूते ने ऐ नी बोलया की, “मैं तेरा पिता होणा, कने तू मेरा पुत्र होणा।” **6** परमेश्वर अपने बडे महान पुत्रे जो संसारे च भेजणे ला पहले बोलया की, “उदे सारे स्वर्गदूत उसयो अराधना करन।” **7** कने स्वर्गदूतां दे बारे च ऐ बोलदा है, “परमेश्वर अपने स्वर्गदूतां जो होआ साई बणादां है, कने अपने सेवकां जो बलदी अगीं साई बणादा है।” **8** पर पुत्रे दे बारे च बोलदा है, “हे परमेश्वर तेरा राज युगां-युगां दीकर बणी रेणा तू लोकां पर न्याय ला राज करणा। (aiōn g165) **9** तू भले कम्मा ला प्यार कने पाप दे कम्मा ला दुश्मणी रखी; इसी ताई तुहाडे परमेश्वर, तेरे साथियां बीचे ला तुहांजो चुण्या, कने बडिया खुशिया ला उना ला लग करिरी नियुक्त कितया।” **10** पबित्र शास्त्र ऐ भी बोलदा है की, “शुरूआत च तू धरती जो बणाया, कने तू सै सब कुछ भी बणाया जडा अम्बर च है। **11** इना तां सारयां खत्म होई जाणा; पर तू युगां-युगां दीकर बणी रेणा; कने उना सारयां कपडयां साई पुराणे होई जाणा। **12** कने तू उना जो चादरा साई बटोलणा, कने उना जो कपडयां साई बदलणा: पर तू हमेशा इकोदिया रेणा कने तू हमेशा जिन्दा रेणा।” **13** कने परमेश्वर कदी कुसी स्वर्गदूते जो ऐसा नी बोलया, “जालू दीकर मैं तेरे सारे दुश्मणो जो हराई ना दे, तालू दीकर तू मेरे सजे पासे बैठी रे कने इज्जत ले।” **14** तां स्वर्गदूतां दा क्या कम्म है? सै सिर्फ परमेश्वर दे सेवक न, कने परमेश्वर उना जो उना लोकां दी देखभाल करणे ताई भेजदा है, जिना दा उद्धार होणा है।

**2** इस ताई, जरूरी है की असां जडियां गल्लां सिखियां न, उना जो मनणे पर जादा ध्यान देन, तां असां सच्चाईया ला नी भटकणा। **2** क्योंकि जडी व्यवस्था स्वर्गदूतां दे जरिये बोलियो थी, सै हमेशा सच्च साबित होई, कने जडे इसा व्यवस्था जो नी मंदे थे, उना जो परमेश्वर ला सजा मिलदी थी। **3** तां सांझो भी सजा मिलणी, अगर असां इस महान उद्दारे जो नी मनणे। कने इस उद्धार दे बारे च सारयां ला पहले प्रभुऐ अपे बोलया था, कने जिना लोकां इस उद्दारे दे संदेश दे बारे च सुण्या उना सांझो साबित किता की ये सच्च है। **4** कने जालू भी परमेश्वर दी इच्छा होई तालू उनी चिन्न कने लग-लग चमत्कारां जरिये कने पबित्र आत्मा दे जरिये लोकां जो बरदान देईकरी इस उद्धार दे संदेश जो साबित किता है। **5** परमेश्वर उस ओणे बाले संसार जो जिदे बारे च असां बोला दे न, अपने स्वर्गदूतां दे अधीन नी कितया पर अपने पुत्र यीशु मसीह दे अधीन कितया है। **6** पर पबित्र शास्त्र च कुथी ऐ लिखया है की, माणु क्या न, की परमेश्वर तू उदी चिंता करता है या देखभाल करता है? सै माणुऐ ला जादा होर कुछ नी है। **7** तू उसयो स्वर्गदूतां ला घट शक्ति दितियो है; तू उसयो राजे साई महिमा कने इज्जत दिती कने उसयो अपने हथां दे कम्मा पर हक दिता। **8** तू सारियां चीजां पर उसयो हक दिता ताकि सै सारयां पर राज करे, इस ताई ऐसा लगदा है की परमेश्वर सारा कुछ माणुऐ दे बशे च करी दितया है। मतलब की ऐसा कुछ नी है, जडा उदे काबू च ना हो। पर असां दिखी सकदे न, की हले दीकर भी सारा कुछ माणुऐ दे बशे च नी है। **9** पर असां यीशुऐ जो दिखदे न! उसयो थोडे बकते ताई स्वर्गदूतां ला घट दर्जा दितया था, ताकि परमेश्वर दे अनुग्रह ला सै सारे लोकां ताई मरी जाए। इस ताई उनी दूख झेले कने मरी गिया कने परमेश्वर उसयो महिमा कने इज्जत दिती। **10** परमेश्वर सारा कुछ बणाया कने सारियां चीजां जो अपने ताई सम्भाली रख्या है। इसा बजा ला,

की लोकां जो अपनी महिमा च हिस्सेदार बणाऐ, परमेश्वर ऐ फेसला लिया की, ऐ सही होणा की प्रभु यीशु मसीह दूख झेली करी इक ऐसा माणु बणी जाए जडा चरित्र च सिद्ध है। क्योंकि यीशु ही है जडा उना दा उद्धार करी सकदा है। **11** क्योंकि सै जडा लोकां दे पापां जो माफ करता है, कने सै जिना दे पाप माफ होंदे न, उना दोना दा पिता इक ही है, इसा बजा ला यीशु उना जो भाई कने बेहण बोलणे ला नी शरमांदा। **12** कने इदे बारे च यीशु मसीह परमेश्वर ला बोलदा है, “मैं अपने मसीही भाईयां जो दसणा की तू मेरे ताई कितणे खरे कम्म किते, कने जालू सै तेरी अराधना करणे ताई गिठे होंगे तालू मैं तेरी महिमा उना सारे लोकां बिच करणा।” **13** सै दुबारा बोलदा है की, “मैं परमेश्वर पर भरोसा रखणा।” कने सै दुबारा बोलदा है की, “मैं उना लोकां सोगी है जिना जो परमेश्वर मिंजो दितया है।” **14** क्योंकि परमेश्वर दे बच्चे माणु न, मतलब की जडे मास कने खूदे दे बणयो न, कने पुत्र भी इक माणु बणी गिया, क्योंकि इक माणु बणी करी ही सै मरी सकदा था, कने मरणे जरिये ही सै शैतान जो हराई सकदा था, जिदे बाल मौत दी शक्ति है, **15** कने इस तरीके ला प्रभु यीशुऐ उना सारयां जो अजाद करी दिता जडे अपणी पूरी जिन्दगी मौत दे डरे च होईकरी गुलामा साई जी दे थे। **16** क्योंकि प्रभु यीशु तां स्वर्गदूतां जो नी बल्कि अब्राहम दे वंशा दी सहायता करता है। **17** इस बजा ला उस ताई जरूरी था की, यीशु हर तरीके ला बिलकुल साडे साई बणी जाए, कने इस तरीके ला सै परमेश्वर दा सच्चा कने दयालू महायाजक बणाया। कने जडा बलिदान सै उना ताई करता है ताकि उदे जरिये लोकां जो उना दे पापां ला माफी मिल्ली सके। **18** क्योंकि यीशु मसीह मुशकिलां कने दुखां जो सेहन किता इस ताई सै उना लोकां दी सहायता करी सकदा है जडे मुशकिलां कने दुखां जो सेहन करा दे न।

**3** इस ताई हे मसीह भाईयो जडे परमेश्वर ला रिश्ता रखदे न, तुहांजो स्वर्ग दी जिन्दगिया च हिस्सेदार बणने ताई सदया है। यीशु मसीह पर ध्यान दिया जिसयो असां मंदे न, जडा साडे ताई परमेश्वर दे शुभसमाचार दा दूत कने महायाजक है। **2** यीशु मसीह सै सारा कुछ किता जडा परमेश्वर उसयो करणे ताई बोलया, बिलकुल तियां ही जियां मूसा परमेश्वर दे परिबारे दे सारे लोकां दी सेवा करणे च भरोसे दे लायक था। **3** घर बणाणे बाले जो घरे ला जादा इज्जत मिलदी है। इयां ही यीशु मूसा ला जादा आदर दे काबिल है। **4** क्योंकि हर इक घरे जो बणाणे बाला कोई न कोई होंदा है, पर जिनी सब कुछ बणाया है सै परमेश्वर है। **5** मूसा परमेश्वर दे परिबारे दे सारे लोकां दी सेवा करणे च भरोसे दे लायक रिया। जडा मूसे किता सै उना गल्लां पासे इशारा करा दा था, जडा परमेश्वर बादे च बोलणे बाला था। **6** पर मसीह इक पुत्रे साई परमेश्वर दे परिबारे दे लोकां च भरोसे दे लायक है, अगर असां अपना हिम्मत कने उस आसा पर मजबूतिया ला आखरी दीकर टिकी रेंदे न, असां परमेश्वर दे लोक न। **7** जियां पबित्र आत्मा पबित्र शास्त्र च बोलदी है, “अज जालू तुसां परमेश्वर जो बोलदे सुणदे न, **8** तां तुसां उदे हुकम मनणे ला मना मत करदे, जियां तुसां दे पूर्वजां सुनसान जगा च परिक्षा बेले परमेश्वर दे खिलाफ किता।” **9** ओथु तुहाडे पूर्वजां चालियां सालां दीकर मेरे महान कम्मा जो दिखणे बाद भी, चुनौती देईकरी मिंजो परखया। **10** इसा बजा ला मैं उस बकते दे लोकां सोगी गुस्सा रिया, कने बोलया, हमेशा ही उना दा मन मिंजो ला दूर होई जांदा है, कने जडा करणे दा हुकम मैं दिता उसयो करणे ला मना करी दिता। **11** तालू मैं गुस्से च आई करी कम्म खादी की, उना उस जगा च दाखल नी होणा जिथू मैं उना जो अराम देणा। **12** हे मसीह भाईयो, ध्यान रखा, की तुसां च कुसी दा पापी कने बेबसआसी मन ना हो, जिसने तुसां जिन्दगी देणेबाले परमेश्वर जो मणणे ला मना करी देन। **13** तुसां इक दुज्जे जो हर रोज प्रोत्साहित करदे रिया, ऐसा ना हो की पाप दे थोखे च आई करी तुहाडे मन ढीठ बणी जाए। इस ताई जालू दीकर असां “अज” बोली सकदे न, तालू दीकर इक दुज्जे जो हर रोज प्रोत्साहित करदे रिया। **14** जडा भरोसा साडा मसीह जो अपनाने दे बकत था, अगर असां अपने उस भरोसे च आखरी दिने दीकर हिम्मत सोगी टिकी रेंगे, तां असां मसीह सोगी हिस्सेदार बणी जाणा। **15** तियां ही जियां पबित्र शास्त्र च लिखया, “अगर अज तुसां परमेश्वर दी अबाज सुणणे, तां तुसां मने च ढीठ मत बणदे, जियां तुहाडे पूर्वजां बणे च परमेश्वर दा विरोध किता था।” **16** भला सै कुण लोक न जिना परमेश्वर दी अबाज सुणीकरी भी उसयो मणणे ला मना करी दिता? क्या सै ऐ लोक नी थे जिना जो मूसे मिस्र देशे ला बाहर कडया था? **17** कने



परमेश्वर चालियां सालां दीकर कुना लोकां पर गुस्सा रिया? ऐ इस्त्राएली ही थे जिना सुनसान जगा च पाप किता कने बणे च मरी गे। 18 कने परमेश्वरे कुना लोकां सोगी कसम खादी थी, की तुसां उसा जगा च दाखल नी होणा जिथू मै उना जो अराम देणा? सै पक्का उना लोकां दे बारे च बोला दा था जिना उदा हुकम नी मनया था। 19 सांझो पता चली गिया की, सै लोक भरोसा नी करणे दिया बजा ला उसा अराम दिया जगा च नी जाई सके।

**4** परमेश्वरे बायदा कितया है की असां अरामे दिया जगा च जाणा, इस तांई अराम दिया जगा च जाणे दा बायदा अजे भी है, तां सांझो इसा गल्ला दा होर भी ध्यान रखणा चाईदा। तुसां चे कुसी जो भी उस अराम बाली जगा पर जाणे दा मौका नी छडणा चाईदा। 2 क्योंकि जियां असां मसीह दे बारे च श्भसमाचार सुणया, इयां ही इस्त्राएल दे लोकां अराम दी जगा दा श्भसमाचार सुणया, पर उना भरोसा नी किता। इस तांई उना जो इस श्भसमाचार ला कोई फायदा नी होया। 3 असां परमेश्वरे दियां बोलियां गल्लां पर भरोसा कितया है, इस तांई असां अराम दिया जगा च दाखल होणा; जियां परमेश्वरे दुज्जयां तांई बोलया है, “मै गुस्से च कसम खादी थी की उना मेरे अरामे बालिया जगा च दाखल नी होई सकणा।” पर परमेश्वरे ऐ इस तांई नी बोलया था की हले दीकर अराम दी जगा तयार नी थी, ऐ संसारे जो बणने ला पहले ही तैयार होई गियो थी। 4 क्योंकि सतमे रोजे दे बारे च पबित्र शास्त्र च इयां लिखया है, “परमेश्वरे सतमे रोजे अपने सारे कम्मा जो पूरे करिरी अराम किता।” 5 कने असां ऐ नी पढया की बादे च उनी बोलया, “उना मेरे अरामे दिया जगा च दाखल नी करी सकणा है।” 6 कने इस्त्राएल दे लोकां जिना सारयां ला पहले हे श्भसमाचार सुणयां, सै अराम दिया जगा च दाखल नी होई सके, क्योंकि उना परमेश्वरे दे हुकम नी मन्ने, पर बाकियां तांई अराम दिया जगा दा रस्ता हले दीकर खुलया है। 7 इस तांई परमेश्वरे अपने अराम दिया जगा च दुबारा दाखल होणे तांई इक होर बकत तय किता, कने सै बकत अज है। साडे पूर्वजां दे विद्रोह करणे दे केइयां सालां बाद, परमेश्वरे राजा दाऊद ला इना बचना जरिये बोलया, जडे पहले भी बोलयो थे की, “अगर अज तुसां परमेश्वरे दी अबाज सुणगे, तां तुसां अपने मेने जो कठोर मत करदे।” 8 कने असां ऐ भी जाणदे न की परमेश्वरे जिस अराम दिया जगा दा बायदा कितया है, सै कनान नी है, जिथू जाणे तांई यहोशूऐ उना दी अगुवाई किती थी। अगर ऐ कनान देश होंदा तां परमेश्वर बादे च ऐ नी बोलदा की इदे तांई इक होर बकत था। 9 परमेश्वरे दे लोकां तांई हुण भी इक जगा तैयार है, जिथू सै पूरे तरीके ला अराम करी सकदे न। उना तियां ही अराम करणा है जियां परमेश्वरे सतमे रोजे अराम किता। 10 परमेश्वरे अपना कम्म पूरा करिरी अराम किता था। कने सारे लोकां तांई ऐ इकोदिया है जडे परमेश्वरे बाल अराम करणा जांटे न। उना अपना कम्म पूरा करणे बाद अराम करणा। 11 इस तांई सांझो भी उस अराम बालिया जगा च दाखल होणे तांई जादा मेहनत करणी चाईदी। ऐसा ना हो की कोई उना लोकां सांई परमेश्वरे दे हुकम नी मणणे दिया बजा ला उस अराम दिया जगा च दाखल नी होऐ। 12 क्योंकि परमेश्वरे दा बचन जिन्दा कने असरदार है, सै कुसी भी दोधारी तलवारा ला भी पेना है। जडा साडी आत्मा, प्राण, जौडा जो कने गुरदयां जो बिनी दिन्दा है, कने सै मना दे बिचारां कने मने दी भावना जो जाणी लेंदा है। 13 परमेश्वरे दिया नजरा ला इस संसारे दा कोई भी माणू लुकया नी है, सांझो सारे कम्मा दा लेखा उसयो देणा पोणा है। उदे सामणे सारियां चीजां खुलियां कने प्रगट न। 14 परमेश्वरे दा पुत्र यीशू जडा साडा सारयां दा महायाजक है, स्वर्ग च परमेश्वरे बाल चली गिया। इस तांई ओआ जिस भरोसे जो सारयां सामणे मनया था, उस भरोसे च असां मजबूतिया ला टिकी रैन। 15 क्योंकि ऐ महायाजक जडा यीशू मसीह है, जडा साडियां हर इक कमजोरियां जो समझदा है। शैताने सै हर गल्ला च साडे सांई परखया, तमी उनी पाप नी किता। 16 इस तांई ओआ, असां बिना डरयो परमेश्वरे सामणे ओन, तालू परमेश्वरे सान्झो पर दया कने अनुग्रह करणा, कने जालू सांझो जस्तरत होणी तालू उनी साडी सहायता करणी।

**5** परमेश्वरे हर इक महायाजके जो इस्त्राएल दे लोकां च चुणया। सै लोकां दी भलाई तांई परमेश्वरे दिया तरफा ला कम्म करणे तांई चुणया जांदा है; सै इस तांई भेंट कने बलि चढांदा है ताकि परमेश्वर लोकां दे पापां जो माफ करी दे। 2 इक माणू होणे दे नाते सै अपु भी केई सारियां चीजां च कमजोर है। इसा बजा ला

सै मुर्ख कने भटकणे बाले लोकां ला प्यारे ला निपटी सकदा है। 3 इक महायाजक होणे दे नाते उसयो अपने पापां जो कने लोकां दे पापां जो दूर करणे तांई बलियां चढाणियां चाईदियां। 4 कोई भी माणू अपु महायाजक होणे दी पदवी अपने उपर नी लेई सकदा। जियां परमेश्वरे हास्ने जो पहले महायाजके दे स्पे च सदया कने चुणया था, तियां ही परमेश्वर दुज्जे महायाजकां जो सददा कने चुणदा है। 5 तियां ही मसीहे भी अपु जो महायाजक बणने तांई चुणी करी अपु अपना आदर नी किता। पर परमेश्वरे यीशू मसीहे जो ऐ बोली करी चुणया जडा उनी होर कुसी महायाजक जो कदी नी बोलया था, जडा की पबित्र शास्त्र च भजनकारे लिखया है, “तू मेरा पुत्र है, अज मै ऐ घोषणा करदा है की मै तेरा पिता है।” 6 इयां ही परमेश्वरे दुज्जिया जगा च दुबारा उसयो बोलया, “इयां ही जियां मलिकिसिदक इक याजक था, तियां ही तुमी हमेशा याजक बणी रेणा।” (aiōn g165) 7 जालू यीशू इस संसारे च जिन्दा था, तालू उनी जौरे-जौरे कने रोई-रोई के परमेश्वरे सामणे प्राथना कने बिनतियां कितियां जडा उसयो मौता ला बचाई सकदा था, कने इस बडे आदर कने अपने आपे जो परमेश्वरे जो सोपणे दिया बजा ला परमेश्वरे उदियां प्राथना कने बिनतियां सुणियां। 8 यीशू मसीह परमेश्वरे दा पुत्र होणे पर भी, उनी दुख सेहन करिरी सै करणा सीखी लिया जडा परमेश्वर उसला चांदा था। 9 परमेश्वरे मलिकिसिदक सांई उसयो इक महायाजक दी इज्जत दिती, कने उसयो सिद्ध बणाया कने सै उना सारयां लोकां तांई उद्वार दी बजा बणी गिया जडे उदे हुकमा जो मंदे थे। (aiōnios g166) 11 इदे बारे च बोलणे तांई बडियां सारियां गल्लां न, पर इना गल्लां जो समझणा बडा मुशकिल है, क्योंकि तुसां परमेश्वरे दा बचन सुणने च सुस्त होई गियो न। 12 तुसां इतणे लम्बे बकते ला भरोसा करदे न, तुहांजो तां हुण बाकियां जो सिखाणे बाला होणा चाईदा था। पर तुहांजो हले भी ऐसे माणूऐ दी जस्तरत है जडा तुहांजो दुबारा नोऐ सिरे ला परमेश्वरे दिया सिखा जो सिखाऐ। तुहांजो अनाज नी पर बचयां सांई दुधे दी जस्तरत है। 13 क्योंकि जडे लोके दूध पिंदे न, सै उना बचयां सांई न जडे असल च परमेश्वरे दिया नजरा च सही जिन्दगी जिणे दे बारे च नी जाणदे न। 14 पर अनाजे दी रोटी उना तांई है जडे भरोसे च पक्के न, जिनी अपने अनुभव ला भले बुरे च फर्क करणा सीखी लिया है।

**6** इस तांई जडा सारयां ला पहले असां मसीह दे बारे च सिखाया था, उना बुनियादी शिक्षां जो बार-बार दोहरांदे मत रिया, कने हुण अगे बदीकरी उच्च शिक्षां दे बारे च सोच बिचार करा। बुनियादी शिक्षां सांई मत बणा, जियां की पाप करणा छडी देणे दे बारे च, परमेश्वर पर भरोसा करणे दे बारे च, 2 कने बपतिस्मा देणे दे बारे च, कुसी पर हथ रखीकरी आशीष देणे दे बारे च, मरयां दा जिन्दा होणे देणे दे बारे च, कने हमेशा दी सजा देणे दे बारे च कने आखरी न्याय दिया शिक्षा दी नीई दुबारा ला पाणे दी जस्तरत नी है। (aiōnios g166) 3 कने अगर परमेश्वरे मौका दिता तां, मै तुहांजो उच्च शिक्षा दियां गल्लां सिखाणियां। 4 जिना अपना भरोसा गवाई दितया उना दा अपने पापां जो छडी करी दुबारा मुडी ओणा मुशकिल है। क्योंकि सै इक बरी परमेश्वरे दी लौइ च रेई बैठयो न, कने स्वर्ग दे वरदान लेई बैठयो न, कने उना जो होर लोकां सोगी पबित्र आत्मा मिली बैठया है, 5 उना अनुभव कितया था की परमेश्वरे दा बचन खरा है, कने ओणे बालिया शक्तिया जो अनुभव किता जालू परमेश्वरे राज करणा। (aiōn g165) 6 ऐसे लोकां जो परमेश्वरे बाल बापस लोणे दा कोई रस्ता नी है, क्योंकि सै खुद परमेश्वरे दे पुत्रे जो दुबारा ला सूली पर चढांदे न कने उसयो शरमिदा करदे न जिसा बजा ला होर लोक मसीह दा मजाक उडांदे न। 7 सै लोक जीना जो खरी शिक्षा मिलियो है, सै उसा जमिना सांई न जिसा पर बार-बार बरखा होंदी है। अगर जमीन खरी है तां ऐ किसाने जो फायदे वाली फसल दिन्दी है, कने इस पर परमेश्वरे दी आशीष होंदी है। 8 कने होर लोक उसा जमिना सांई न जडी झिल्ल, जाड-बसुट उगांटी है, जडा की कुसी कम्मे दा नी। इसा पर परमेश्वरे दा श्राप होणे दा खतरा है कने इदे च पैदा होणे बालियां बेकार चीजां जो अग्गी च फुकी देणा। 9 पर हे प्यारे भाईयो, तुसां खरे कम्म करा दे न, क्योंकि परमेश्वरे तुहांजो पहले ही बचाई लिया है। ऐ चेताबनियां तुहाडे तांई नी न। 10 तुसां परमेश्वरे दे खातिर परमेश्वरे दे लोकां दी सेबा बडे प्यारे ला करदे थे कने करा दे भी न, परमेश्वरे तुहाडे इना कम्मा जो नी भूलणा। क्योंकि परमेश्वर अन्याय करणे बाला नी है। 11 तुसां सुस्त मत बणा। पर कडी मेहनत

करणे बालयां सांई आखरी दीकर सबर कने भरोसे सोगी पक्की आस रखीकरी इना प्यार भरे कम्मा जो करदे रेणा चाईदा, ताकि सांझो परमेश्वरे दे बायदे मिली सकन। 13 कने परमेश्वरे अब्राहमे ला बायदा करदे बेले अपने नापे दी कसम खादी क्योकि उसला बडा ऐसा कोई नी, जिदा ना लेईरी कसम खाई सकन, कने उनी बोलया, 14 “मै सच्ची तिजो बडी आशीष देणी, कने मै तिजो मते बंश देणे।” 15 अब्राहमे बडे लम्बे बकते दीकर सबर रखया। तां जाई करी उसयो सै मिल्ला जिदा परमेश्वरे उसयो बायदा कितया था। 16 कसम खादे बकत लोक हमेशा अपने ला बडे कुसी माणुएं दी कसम खांदे ना। कसम खाणे ला ऐ यकीन होंदा है की जडा सै बोला दे न सै सच्च है, कने ऐ सारयां झगडयां जो खत्व करी दिन्दी है। 17 जालू परमेश्वरे अपने लोकां जो ऐ गल्ल बिलकुल साफ दसणा चाई की सै अपने कितयो बादयां जो कदी नी भुलदा; तां उनी बायदे सोगी अपने ना दी कसम जोडी। इसला पता चलदा है उदे बायदे सच्ची पुरे होंणे न। 18 तां ऐथू फिरी दो गल्लां न परमेश्वरे दा बायदा कने उदी कसम, जडी कदी नी बदली सकदी जिना दे बारे च परमेश्वर कदी झूठ नी बोली सकदा। इस तांई असां परमेश्वरे बाल बचणे तांई आयो न, कने जडी आस उनी सांझो दितियो है, उसा जो पकडी रखा कने जादा उत्साहित रिया। 19 जियां इक बडे किले ला बनियो रस्सी किस्तिया जो टिकाई रखदी है, तियां ही है आस साडिया जिन्दगिया जो टिकाई कने मजबूत बणाई रखदी है। जिदे च साडी आस है सै यीशु मसीह है, जडा स्वर्ग च बडिया पबित्र जगा च परमेश्वरे बाल गिया। 20 यीशु सांझो ला अग्ने कने साडे तांई स्वर्ग च गिया है। सै याजक मलिकिसिदक सांई हमेशा तांई महायाजक बणी गिया है। (aiōn g165)

7 ऐ मलिकिसिदक शालेम शेहरे दा राजा था, कने परम प्रधान परमेश्वरे दा याजक था, सारयां ला पेहले उदे नापे दा मतलब है, “धार्मिकता दा राजा” कने उदा ना “शालेम शेहरे दा राजा” जिदा मतलब है की शांति दा राजा। जिदा ना पिता, ना मां, ना खानदान दा कोई पता था, कने ना उदे जमणे दी कने ना मरणे दी खबर थी, फिरी भी सै परमेश्वरे दे पुत्रे सांई हमेशा तांई याजक बणी रेंदा है; मलिकिसिदक अब्राहम ने तालू मिल्ला जालू सै राजयां जो हराई करी मुडी करी ओआ दा था, कने उसयो आशीष दिती कने अब्राहमे उसयो हर चिजा दा दसमा हिस्सा दिता जडा उनी अपने दुशमणा लिया था। 4 हुण इसा गल्ला पर ध्यान दिया की मलिकिसिदक कितणा महान था, जिसयो साडे पूर्वज अब्राहमे अपने दुशमणा ला लुटयो माले दा दसमां हिस्सा देई दिता था। 5 मूसा दी व्यवस्था दसदी है की लेवी दे बंशे च जडे याजक बणदे न, उना जो हुकम मिलया है, की सै झ्माले दे लोकां ला दसमा हिस्सा लेन। पर सै याजक कने होर लोक भाईयां सांई न क्योकि सै सारे अब्राहम दे बंशे दे न। 6 पर फिरी भी मलिकिसिदक जडा लेवी दे बंशे दा नी था, उनी अब्राहम ला दसमा हिस्सा लिया, कने उनी अब्राहम जो आशीष दिती, हात्तांकि अब्राहम तां सै माणु था जिसयो परमेश्वरे बायदा दितया था। 7 कने असां पक्का जाणदे न की जडा आशीष दिन्दी है, सै आशीष लेणेबाले ला बडा होंदा है। 8 कने लेवी बंशे दे याजक जडे दसमा हिस्सा ले दे थे, कने ऐसे लोक थे जिना इक ना इक रोज मरी जाणा। पर मलिकिसिदक जिनी अब्राहम ला दसमां हिस्सा लिया, सै हल्ले भी जिदा है, जियां की पबित्र शास्त्र च लिखया है। 9 तां असां बोली सकंदे न, की लेवी जडा लोकां ला दसमा हिस्सा लेदा था सै अब्राहम दा बंशज था। इस तांई अब्राहम जालू मलिकिसिदक ला मिलया कने उसयो दसमां हिस्सा दिता, तां असां ऐ बोली भी सकंदे न की लेविए भी अब्राहमे जरिये मलिकिसिदक जो दसमां हिस्सा दिता। 10 क्योकि जिस बेले मलिकिसिदक अब्राहम ला मिल्ला, उस बकत तां लेवी जम्या भी नी था, पर सै तां अपने पिता दे शरीर च था। 11 लोकां जो उना याजकां दे आधार पर व्यवस्था मिलियो थी, जडे लेवी गोत्र दे हासन ला आयो थे। पर उना जो इसा व्यवस्था जरिये सिद्ध नी बणाई सके, इस तांई इक होर याजके दी ओणे दी जरूरत थी, इक ऐसा याजक जडा हासन सांई नी पर मलिकिसिदक सांई हो। 12 क्योकि जालू इकोदे याजक नी रेंदे, तां व्यवस्था जो बदलणा भी जरूरी होई जांदा है। 13 क्योकि असां ऐ गल्लां मसीह दे बारे च बोला दे न, जडा इक लग गोत्रे ला था। कने उस गोत्रे च कदी भी कुनी भी याजके दे स्पे च वेदिया पर सेबा नी कितियो थी। 14 सारे जाणदे न की, साडा प्रभु यीशु यहदा दे बंशे ला था कने मूसे इस

यहदा दे बंश दे लोकां दा याजक बणने दे बारे च कुछ नी बोलया, कने ना ही यहदा बंश दा कोई याजक बणया था। 15 हुण तुसां समझी सकंदे न की मै कुस बारे च बोला दा है। इस तांई ऐ गल्ल होर भी साफ है की मूसा दी व्यवस्था कने याजक दोनो जो साडे महायाजके तांई बदली दितया है, जडा मलिकिसिदके सांई याजक है। 16 यीशु कुसी खास माणु मतलब की लेवी दे बंशज दे नियमा कने विधियां दिया बजा ला याजक नी बणया, पर यीशु अपनी कदी खत्व नी होंणे बाली जिन्दगिया दिया शक्तिया दिया बजा ला याजक बणया। 17 क्योकि परमेश्वर उदे बारे च पबित्र शास्त्र ऐ गबाई दिन्दा है की, “तू मलिकिसिदके सांई युगां-युगां दीकर याजक बणी रेणा है।” (aiōn g165) 18 इस तांई मूसा दी व्यवस्था सै नी करी सकी जडा उसा जो करणा चाईदा था कने कुसी कम्मे दी नी थी इसा बजा ला बदली दिती। 19 इस तांई की मूसा दी व्यवस्था कुसी भी गल्ला जो सिद्ध नी बणाई सकी, कने उदिया जगा पर साडे बाल इक आस है, जडी यीशु मसीह च है, जिदे जरिये असां परमेश्वरे दे नेडे जाई सकंदे न। 20 इदे बाद जालू परमेश्वरे यीशु मसीह जो याजक बणया तां उनी इक कसम खादी। 21 क्योकि लेवी दे बंशे बगेर कसमदे दे याजक बणाए, पर यीशु मसीह कसमा सोगी परमेश्वरे दिया तरफा ला याजक बणया। परमेश्वरे यीशु मसीह दे बारे च बोलया, “मै परमेश्वर, मै ऐ कसम खांदा है, मै अपना फेसला कदी नी बदलणा, की तू युगां-युगां दीकर मलिकिसिदका सांई इक याजक है।” (aiōn g165) 22 इस तांई यीशु मसीह ही सै है, जडा इक खरी बाचा दे पूरा होंणे दी बजा बणदा है। 23 ऐथू यीशु मसीह दा याजक होंणे दा इक होर फायदा है, सै तां बडे जादा याजक बणदे आणे, क्योकि उना चे हर इक याजके दी मौत होई गेई कने इसा बजा ला सै अपना कम्म जारी नी रखी सकी। 24 पर यीशु युगां-युगां दीकर जिन्दा है, इस तांई उनी हमेशा याजक बणी रेणा, पर होर कोई उदा याजक होंणे दा पद नी लेई सकदा। (aiōn g165) 25 इसी तांई जडे यीशु जरिये परमेश्वरे बाल ओदे न, सै उना दा पूरा-पूरा उद्धार करी सकदा है, क्योकि सै उना तांई हमेशा विनती करणे तांई जिन्दा है। 26 क्योकि ऐसा ही महायाजक साडियां जरूरतां जो पूरा करी सकदा है, जडा पबित्र, जिस पर कोई दोष ना हो, शुद्ध हो, पापियां ला लग रेंदा हो, कने जडा स्वर्ग ला भी उच्चा हो। 27 कने सै महायाजक जडे हासन दे बंशे दे थे, उना सांई यीशुए तांई जरूरी नी है, की सै पेहले अपने पापां कने फिरी लोकां दे पापां तांई बलिदान चढाए; क्योकि यीशुए तां इक बरी सारे लोकां तांई अपने आपे जो बलि चढाई दितया। 28 क्योकि मूसा दी व्यवस्था तां कमजोर लोकां जो महायाजक बणांदी है; पर जडी कसम मूसा दी व्यवस्था दे बाद आई सै परमेश्वरे दे पुत्रे जो बडा याजक बणांदी है। कने सै हमेशा तांई साडे तांई इक सिद्ध महायाजक बणी गिया है। (aiōn g165)

8 हुण जडियां गल्लां असां करा दे न, उना चे सारयां ला बडी गल्ल ऐ है, की साडे तांई इक ऐसा महायाजक है, जडा स्वर्ग च उस महिमाय परमेश्वरे दे सिंहासने दे सजे पासे जाई बैदा है। 2 कने साडा महायाजक स्वर्ग च सच्चे मिलाप दे तम्बू च बडिया पबित्र जगा च सेबा करदा है जडी स्वर्ग च है, जिसयो परमेश्वरे बणया ना की कुनी माणुएं। 3 क्योकि हर इक महायाजक जिसयो इस तांई चुणदे न की सै लोकां दी माफी तांई भेंट कने बलिदान चढाए। इस तांई साडे महायाजक यीशु तांई भी ऐ जरूरी था की उस बाल भी कुछ चढाने तांई हो। 4 कने अगर मसीह धरतिया पर होंदा तां कदी भी याजक नी होंदा, क्योकि मूसा दी व्यवस्था दे अनुसार भेंट चढाने तांई पेहले ला ही याजक हेना। 5 जडे ऐ याजक करदे न, सै सिर्फ उदी इक नकल कने परछाई है जडा स्वर्ग च है। क्योकि जालू मूसा मिलाप दा तम्बू बणाणा चलया था, तालू परमेश्वरे उसयो ऐ चैतावनी दिती की, “तू हर चीज तियां ही बणायां जदिया उदाहरण तिजो पहाडे पर दसया था।” 6 पर जडा याजकां दी सेबा दा कम्म साडे महायाजक यीशुए जो मिलया, सै याजकां ला बदीकरी है। क्योकि सै जिस बाचा दा बिचोलिया है, सै परागिया बाचा ला खरी है कने खरियां चीजां दे बायदे पर अधारित है। 7 क्योकि अगर पेहलिया बाचा च कमियां नी होंदिया तां दुजिया बाचा दी जरूरत ही नी होंदी। 8 पर परमेश्वरे लोकां पर दोष लाईकरी बोलया, “सै दिन ओआ दे न की, मै इसाएल दे लोकां सोगी कने यहदा दे लोकां सोगी नोई बाचा करणी है। 9 ऐ बाचा उस बाचा सांई नी होंपी है, जडी मै उना दे पूर्वांकां सोगी कितियो थी, जालू मै उना जो

मिन्न देशे ला कडी लेई आया था, क्योंकि सै मेरी बाचा पर टिकी नी रे, कने मैं उना दी चिन्ता करना बंद नी करी दिता, प्रभु ऐई बोलदा है। 10 फिरी प्रभु बोलदा है की, जडी नौइ बाचा मैं ओणे बाले दिना च इशाएल दे लोकां सोगी करणी, सै ऐ है की मैं उना जो मेरी व्यवस्था दे बारे च सोचना देणा, कने उना उसा जो अपने मना च रखणा, कने मैं उना दा परमेस्वर बनाणा, कने उना मेरी अराधना करणी। 11 फिरी कुनी भी इशाएल दे लोकां अपने देशे बालयां जो, कने अपने रिशतेदारां जो ऐ शिक्षा देणे दी जरूरत नी पोणी, की तुसां प्रभु जो मन्ना, क्योंकि छोटे ला लेईकरी बड़े लोकां दीकर सारयां मन्नी लेणा की मैं उना दा परमेस्वर है। 12 क्योंकि मैं उना दे पाप माफ करी देणे, कने मैं उना दे पापां जो दुबारा फिरी याद नी करणा। 13 परमेस्वरे इसयो नोई बाचा बोलया, इस तांई उनी पेहेले बालिया बाचा जो पूराणा करी दिता। जडा कुछ भी पूराणा है कने घिस्या-पिटया है, सै खतम होई जाणा।

9 उसा पैली बाचा जो जडी बडे पेहेले, मूसा दे जरिये इशाएल दे लोकां जो दीतियो थी। उदे च परमेस्वरे दी अराधना करणे दे सारे नियम कने कनून थे कने इसा धरती पर अराधना तांई लोकां दा बनाया मिलाप दा इक पबित्र तम्बू भी था। 2 ऐ तम्बू जानवरां दिया खल्ली ला बनाया था, उस तम्बूऐ बिच उना इक पर्दा लटकाई दिता कने दो कमरे बनाई दिते, पेहेले कमरे च इक धूपदान, कने मेज थी जिसा पर परमेस्वरे जो चढाईयां रोटियां रखदे थे, कने इस कमरे जो पबित्र जगा बोलदे थे। 3 कने तम्बूऐ दे दुज्जे कमरे जो जडा परदे पिच्छे था, उसयो परम पबित्र जगा बोलदे न। 4 उस दुज्जे कमरे च सोने दी धूपदानी थी, कने चारो पासे ला सोने दा मढया सन्दुक था जिसयो बाचा दा सन्दुक बोलदे न। कने उदे च सोने दे भांडयां च मन्ना भरिरी रखया था, कने हास्न दा डंडा भी था जिदे पर खिलयो पते लगयो थे, आखरी च इदे च दो पथरे दियां पटियां थियां, जिना पर परमेस्वरे सै दस हुकम लिखयो थे, जडे मूसा जो दितयो थे। 5 इदे इलाबा सन्दुके प्राला दो फंगा बाले कस्ब बनयो थे, जडे इसा गल्ला दा संकेत था की परमेस्वर उस जगा पर था। उना अपने फंगा ला उसा जगा जो ढक्या था, जिस पर महायाजक खून छिडकदा था, ताकि लोकां दे पाप माफ होई सकन। पर हण असां इना चीजां दे बारे च इक-इक करिरी दर्सी नी सकदे। 6 इस तरीके ला उना इना सारियां चीजां जो तम्बूऐ दे दो कमरां च तैयार किता। याजक हर रोज उस पेहेले कमरे च जाई करी अपनी धार्मिक बिधियां जो पूरा करदा था। 7 पर दुज्जे कमरे च मतलब की उस बडी पबित्र जगा च सिर्फ महायाजक साले च इक ही बरी जांदा था। कने सै अपने सोगी जानवरां दे खने जो लेई जांदा था, जिसयो सै अपने तांई कने लोकां दे अनजाणे च कितयो पापां दी माफि तांई चढांदा था। 8 इना बिधियां जरिये पबित्र आत्मा सांझो ऐ समझांदा है, की जालू दीकर इसा धरती पर मिलाप बाले तम्बू कने इना दियां विधियां जो मंटे न, तालू दीकर स्वर्ग च परमेस्वरे दे परम पबित्र जगा च जाणे दा रस्ता हल्ले दीकर नी खुलया है। 9 ऐ सारियां चीजां सिर्फ इना गल्लां दा उदाहरण थियां, जडियां हण मसीह दे जरिये पुरियां होआ दियां न। क्योंकि सै चढाबे कने बलिदान जडे लोक परमेस्वरे जो चढादें थे, जडे उदी अराधना करते थे। सै लोकां दे मना कने दिलां जो शूद्र करणे दे काबिल नी थे। 10 क्योंकि ऐ लोकां दे खाणे पीणे दियां गल्लां दे बारे च, कने भौंती-भौंती दियां नोहणे दियां बिधिया दे बारे च दसदे न जिना ला लोक बाहरी तौर ला साफ होई जांदा न। इना विधियां जो तालू दीकर मनाथा जालू दीकर की परमेस्वर नोई बाचा जो शुरू नी करी दिंदा। 11 पर हण मसीह महायाजक सांई आया है, जडा नोईया बाचा दियां सारियां खरियां-खरियां चीजां दिन्दा है। सै होर भी जादा महान कने सिद्ध तम्बूऐ च दाखल होया। ऐ तम्बू माणुआं नी बनाया था मतलब की इस संसारे दा नी था। 12 यीशू मसीह परम पबित्र जगा च इक बकरी या बछडे दा खून लेईकरी नी गया, पर सै अपने ही खूने सोगी गया। उनी सै सिर्फ इक बरी ही किता, कने इसयो दुबारा करणे दी जरूरत नी होणी। उदे जरिये सांझो हमेशा दा उद्धार मिलया। (aiōnios g166) 13 मूसा दी व्यवस्था अनुसार जडे लोक अशुद्ध होंदे न, सै परमेस्वरे दी अराधना करणे दे काबिल नी होंदे। पर अगर उना पर बकरयां कने दांदा दा खून कने बछडयां दी राख छिडकी जाए तां सै शुद्ध होई जांदा न। अगर इदे च माणुआं दे शरीर जो शूद्र करणे दी शक्ति है, 14 तां जरा सोची की दिखा की मसीह दे खूने ला साडे दिलां जो उना कम्मा ला किताणा शूद्र करणा जडे मौत दे

पासे लेई जांदा न, ताकि असां जिन्दे परमेस्वरे दी अराधना करी सकन। क्योंकि अनन्त आत्मा दिया शक्तिया दे जरिये मसीह साडे पापां तांई अपने आपे जो निर्दोष बलिदान दे स्पे च परमेस्वरे जो भेंट चढाई दिता। (aiōnios g166) 15 इसा बजा ला यीशू मसीह लोकां सोगी इक नोई बाचा बन्नी, ताकि जिना लोकां जो परमेस्वरे सदया है, उना जो हमेशा दियां आशीषां मिली सकन जिदा परमेस्वरे बायदा कितया था। क्योंकि यीशू मसीह उना जो उना दे पापां दिया सजा ला अजाद करणे तांई मरी गया, जडे उना पैली बाचा दे अधीन रेईकरी कितयो थे। (aiōnios g166) 16 असां जाणदे न की अगर कोई माणु अपनी मौत ला बाद अपनी जमीन जयादाद जो बंडणे तांई बसियत लिखदा है, तां उस बटबारे जो करणे तांई उदा मरणा जरूरी है। 17 क्योंकि उसा बसियत दी कोई कीमत नी जालू दीकर जयादाद दा मालिक हल्ले जिन्दा है। उसा बसियत दी कीमत तालू ही है जालू उस मालिके दी मौत होई जांदी है। 18 इस तांई ऐथू दीकर परमेस्वरे दे जरिये दितियो पैली बाचा जो भी पक्की होणे ला पेहेले इक बलि दिती थी। 19 सारयां ला पेहेले मूसा सारयां लोकां जो व्यवस्था दे हुकम दे बारे च दसया। इदे बाद उनी बछडयां दा खून लेईकरी पाणिए च घोलया कने इदे बाद उनी इसयो लोकां कने व्यवस्था दिया कताबा च छिडकणे तांई लाल ऊन, कने जफा नापे दे बटे दियां डालियाँ दा इस्तेमाल किता। 20 कने जालू मूसा ऐ बोला दा था, उनी लोकां ने बोलया, “ऐ खून उस बाचा जो शुरू करदा है, जिसा जो मणणे दा हुकम परमेस्वरे तुहांजो दितया है।” 21 कने इयां ही मूसे तम्बूऐ च कने अराधना दियां सारियां चीजां पर खून छिडकया। 22 कने मूसा दी व्यवस्था बोलदी है की सारियां चीजां जो खून छिडकी करी शूद्र करणा चाईंदा, कने बिना खूने बहाए, परमेस्वर लोकां जो उना दे पापां तांई माफ नी करी सकदा। 23 इस तांई मिलाप बाले तम्बूऐ कने उदियां सारियां चीजां जो विधिया अनुसार बलि देईकरी शूद्र करणा जरूरी था, ऐ स्वर्ग दियां चीजां दी नकल है। पर स्वर्ग दियां चीजां जो विधिया अनुसार शूद्र करणे तांई, जानवरां दे खूने ला भी खरे बलिदाने दी जरूरत थी। 24 इसा बजा ला मसीह उस पबित्र जगा च नी गया जिसा जो माणुआं अपने हथां ला बनाया है, जडी सच्ची पबित्र जगा दी इक प्रतीक है। पर सै साडे फायदे तांई परमेस्वरे सामणे ओणे तांई सीधा स्वर्ग जो गया। 25 कने मसीह अपने आप जो बार-बार बलि चढाणे तांई स्वर्ग च नी गया, जिनां महायाजक हर साल जानवरां दे खूने सोगी परम पबित्र जगा च जांदा है, क्योंकि अगर इयां होंदा तां फिरी उसयो संसारे दे शुरू होणे ला ही बडे सारे दुख झेलणा पोंदे। पर मसीह इस संसार दे आखरी बकत च अपने आप जो बलिदान करणे तांई सिर्फ इक बरी आया ताकि पाप दा अंत होई सके। (aiōn g165) 27 क्योंकि ऐ पक्का है की असां सारे लोकां इक बरी मरणा, कने उदे बाद साडा न्याय होणा। 28 तियां ही मसीह भी सारे लोकां दे पापां जो माफ करणे तांई इक ही बरी बलिदान होया। पर उनी जालू दुबारा इसा धरती पर ओणा, तां उनी साडे पापां तांई बलिदान होणे तांई नी ओणा, पर उना लोकां जो बचाणे तांई ओणा जडे लोक उसयो नियाला दे न।

10 मूसा दी व्यवस्था तां सिर्फ अगो भविष्य च ओणे बालियां खरियां चीजां दी परछाई है, पर उना खरियां चीजां दा असली रूप नी है, जडियां मसीह साडे तांई कितियां न। इस तांई व्यवस्था जो मणणे बाले लोक हर साल इकोदियां बलियां चढादें न, पर ऐ बलिदान उना लोकां जो कदी सिद्ध नी करी सकदे जडे परमेस्वरे दी अराधना करणे तांई उदे नेडे ओंदे न। 2 अगर परमेस्वरे दी अराधना करणे बाले इना बलिदाना दिया बजा ला सिद्ध होई जांदे, तां सै अपने आप जो दोषी नी मंदे। तां फिरी हण बलिदान चढाणे दे बारे च गल्ल नी होंदी। 3 पर जानवरां दियां बलियां दा खून उना दे पापां जो दूर नी करी सकदा, पर ऐ हर साल उना जो उना दे कितयो पापां जो याद करांदा है। 5 इसा बजा ला जालू मसीह इस संसारे च आया तां उनी परमेस्वरे ला बोलया था, “तू नी चांदा की लोक तिजो बलियां चढान, पर तू मिजो इक आदमी बनाई दिता।” 6 कने ना सै बलियां जिना च जानवरे जो पूरा फूकी करी चढादें न कने ना ही पापां दिया माफिया तांई चढाईयां बलियां ला तू खूश होंदा है। 7 तालू मसीह परमेस्वरे ने बोलया, “हे परमेस्वर, मै तेरी इच्छा पूरी करणे तांई आई गया है, पबित्र शाश्व च मेरे बारे च ऐई लिखया है।” 8 मूसा दी व्यवस्था सिखांदी है बलियां कने भेदा पाप दिया बजा ला चढाणियां चाईदियां। पर मसीह इना गल्लां दे बारे च कजो बोलया की परमेस्वरे

इना ला खुश नी होंदा? 9 फिरि मसीह ऐ भी बोलदा है, "दिख, मैं सैयें करणा आया है, जडा तू चांदा है!" तालू परमेश्वर बलियां बाली पैली व्यवस्था जो खतम करी दिन्दा है, ताकि सै नोई व्यवस्था शुरू करी सके। इसी बजा ला असां उस बलिदान दे जरिये पबित्र होई गियो न जडा यीशु मसीहै अपने शरिर जो चढाई करी दिता। 11 हर इक यहदी याजक रोज ही वेदिया सामणे खडा होंदा है कने लोकां दे पापां जो दूर करणे दियां बिधियां जो पूरा करदा है। कने हमेशा ही इकोदे बलिदाना चढादां रेंदा है, जडे कदी भी उस माणुए दे पापां जो दूर नी करी सकदे न, जडे उनी कितयो न। 12 पर यीशु मसीहै साडे पापां दी माफी ताई अपने आप जो परमेश्वरे सामणे इक ही बरी कने हमेशा ताई बलिदान करी दिता कने। सै परमेश्वरे दे सजे पासे कने सिंहासने पर सारयां ला जादा इज्जता बालिया जगा च हमेशा ताई जाई बैठा। 13 क्योंकि मसीहै अपने आप जो सिर्फ इक बरी ही बलिदान दे स्पे च परमेश्वरे जो देई दिता कने इस बजा ला उदे लोकां जो पबित्र करी दितया है कने सै सच्ची हमेशा ताई धर्मी बणी गियो न। कने ओथु सै अपने सारे दुशमणा जो पूरे तरीकी ला अपने अधीन करणे ताई परमेश्वरे दा इंतजार करा दा। 15 कने पबित्र आत्मा भी सांझे ऐ दसदा है की, ऐ गल्ल सच्च है। कने प्रभु परमेश्वरे दे बायदे जो याद करा जिदे बारे च उनी पेहले ही बोलया था, 16 "प्रभु बोलदा है; की जडी बाचा मैं ओणे बाले दिनां च उना सोगी करणी है, की मैं उना जो अपणी व्यवस्था दे बारे च सोचना देणा कने उना उसा जो अपने मना च रखणा।" 17 फिरि परमेश्वर ऐ बोलदा है, "मैं उना दे पाप माफ करी देणे, कने मैं उना दे पापां जो दुबारा फिरि याद नी करणा।" 18 कने परमेश्वर साडे पापां जो माफ करादा है, तां हण कोई भी होर बलिदान देणे दी जरूरत नी है। 19 इस ताई हे मसीह भाईयो, जालू की यीशु मसीहै साडे ताई अपणी जिन्दगी बलिदान करी दिती, हण असां हिम्मत सागी स्वर्ग दिया परम पबित्र जगा च बिना डरयो जाई सकदे न। 20 जालू मसीह मरया तां उनी साडे ताई इक नोआ रस्ता खोली दिता ताकि असां ऐसी जिन्दगी जी सकन जिदा कोई अंत ना हो। उनी ऐ रस्ता पर्दे ला निकली करी खोली दिता, मतलब की अपने शरिर जो बलिदान करिरी रस्ता खोली दिता। 21 क्योंकि साड़ा ऐसा महान याजक है जडा परमेश्वरे दे सारे लोकां पर राज करादा है, 22 तां ओआ असां, मसीह दे खने जो छिडकी करी अपने मना जो शुद्ध करिरी कने साफ पाणिए ला अपने शरिर जो धोई करी साफ करिरी कने सच्चे मने कने पक्के भरोसे सोगी परमेश्वर दे नेडे जान। 23 कने असां बिना कुसी शक दे अपणी उस आस पर टिकी रेन, जिसा जो असां अपनाया है क्योंकि असां परमेश्वर पर उदे बायदयां जो पूरा करणे ताई भरोसा करी सकदे न। 24 ओआ असां इक दुज्जे सोगी प्यारभाव कने भले कम्मा जो करणे ताई इक दुज्जे जो प्रोत्साहित करन। 25 कने असां परमेश्वरे दी आराधना करणे ताई गिटे होणा बंद ना करन, जियां केई लोक करा दे न, पर ओआ असां इक दुज्जे जो होर भी जादा प्रोत्साहित कने समझान क्योंकि असां जाणदे न की प्रभु जल्दी मुडी करी ओणे बाला है। 26 सांझे इना कम्मा जो करणा चाईदा क्योंकि यीशु मसीहै दे शुभसमाचार दी सच्चाई जो जाणने बाद अगर असां जाणी बुझी करी पाप करदे न, तां कोई होर बलिदान नी है जडे साडे पापां जो माफ करी सके। 27 बल्कि डरी करी परमेश्वरे दा इंतजार करणा है की उना दा न्याय करे कने अग्नी च भस्म करी दे क्योंकि सै उदे दुशमण न। 28 जडा कोई मूसा दी व्यवस्था जो नी मंदा है, उस पर बगरे दया कितयो दो या तीन लोकां दी गबाई पर उसयो मारी दिन्दे न। 29 अगर मूसा दी व्यवस्था च ऐसी सजा थी, तां उस माणुए दी सजा बडी बड्डी होणी चाईदी जडा परमेश्वरे दे पुत्रे दी बेईजती करदा है कने परमेश्वरे दे पुत्रे जो अपने पैरां थले गेची दिन्दा है, कने मसीह दे खने जो पबित्र नी मंदा जिदे जरिये परमेश्वरे उसयो पबित्र करणे ताई नोई बाचा शुरू किति थी कने पबित्र आत्मा दी बेईजती किति जिदे जरिये उसयो अनुग्रह मिलया था। 30 क्योंकि असां जाणदे न की परमेश्वरे बोलया, "बदला लेणा मेरा कम्म है, मैं ही बदला लेणा।" कने उनी फिरि ऐ भी बोलया की, "प्रभुए अपने लोकां दा न्याय करणा।" 31 जिन्दे परमेश्वरे दे हथां ला सजा मिलणा इक बडी भयानक गल्ल है। 32 पर उना दिनां दे बारे च याद करा, जालू तूसां पैली बरी मसीह पर भरोसा कितया था। तूसां बडे भरी दुख तकलिफां जो झेलया, पर तूसां भरोसे च पक्के बणी रे। 33 कदी-कदी तां इयां भी होया की तूसां लोकां ला बेईजती कने अत्याचार झेली करी सारयां सामणे

तमाशा बणी गे, कने केई बरी तूसां मसीह भाईयां दा साथ दिता जडे तुहाडे साईं दुख मुसीबतां च थे। 34 तूसां केदियां दे दुखां च भी दुखी होए, कने जालू होरनी लोकां तुहाडी धन-दौलत जो लटया तां तूसां उना जो लटणा दिता। क्योंकि तूसां जाणदे न की तुहाडे बाल हल्ले की सारियां चीजां न, जिना दा परमेश्वरे बायदा कितया है, कने सै हमेशा ताई न। 35 इस ताई अपने भरोसे जो मत छडा चाहे कुछ भी होई जा। कने उस इनाम जो याद रखा जडा परमेश्वरे तुहांजो देणा। 36 हण तुहांजो सबर रखी करी सेहन करणे दी जरूरत है, ताकि तूसां परमेश्वरे दी इच्छा जो पूरा करी सकन। तां तुहांजो सै सारा कुछ मिलणा जिदा उनी बायदा कितया है। 37 क्योंकि जियां पबित्र शाश्व च मसीह दे बारे च लिखया है की, "हुण बडा ही घट बकत रेई गिया है, जालू की ओणे बाले ओणा है, कने देर नी करणी थोडे।" 38 कने मेरे धर्मी लोकां मिंजो पर भरोसा करणे ला ही जिदे रेणा, कने अगर सै मिंजो पर भरोसा करणे ला पिच्छे हटी जागे तां मैं उना ला खुश नी होंगा। 39 पर असां उना लोकां चे नी न जडे परमेश्वरे ला पिच्छे हटी जां दे, कने खतम होई जां दे। पर असां उना लोकां चे न जडे भरोसा रखदे न कने बची जां दे न।

**11** हण जडे लोक परमेश्वर पर भरोसा रखदे न, उना जो पक्का ही परमेश्वरे सारा कुछ देणा जिदी सै आस रखदे न; उना जो यकीन है की जिना चीजां जो उना दिखया नी है सै असली च हेन। 2 साडे पूर्वजां दा भी ऐसा भरोसा था कने इसी ताई परमेश्वर उना ला खुश था। 3 क्योंकि भरोसा करणे ला ही असां जाणी लेंदे न, की सारे संसार जो परमेश्वरे अपने बचना ला बनाया है। इस ताई असां जडा भी दिखदे न, सै उना चीजां ला नी बणयो न जिना जो दिखी नी सकदे न। (aiōn g165) 4 भरोसा करणे दिया बजा ला ही आदमे दे पुत्र हाबिले अपने बड़े भाई केन ला बडिया बलिदान परमेश्वरे ताई चढाया, कने उदे बलिदाने दे जरिये ही परमेश्वरे गबाई दिती की हाबिल धर्मी है, कने परमेश्वर उदे बलिदान ला खुश था। हाबिल अपणी मौत ला बाद भी सांझे सिखा दा है की भरोसा कदिया होणा चाईदा। 5 भरोसे दिया बजा ला ही परमेश्वरे हनोक नापे दे माणुए जो स्वर्ग च जिन्दा चुकी लिया, कने सै इस ताई मरया नी कने कुसी जो भी उदी लाश नी मिल्ली, क्योंकि स्वर्ग च जाणे ला पेहले हनोके परमेश्वरे जो खुश कितया, जियां पबित्र शाश्व च लिखया है। 6 परमेश्वरे पर भरोसा करिरी ही असां उसयो खुश करी सकदे न, क्योंकि परमेश्वरे बाल ओणे बाले लोकां जो पक्का भरोसा होणा चाईदा की, परमेश्वर है, कने सै उना जो इनाम दिन्दा है जडे उसयो जाणदे दी कोशिश करदे न। 7 भरोसा करणे दिया बजा ला ही नूह नापे दे माणुए जो बाढ दे बारे च चेतावनी मिल्ली जडी उनी कदी नी दिखियो थी। तां परमेश्वरे दा हुकम मन्नी करी अपने परिकार जो बचना ताई जाज बणया, कने जिना लोकां भरोसा नी कितया सै सारे दोषी होए कने सारे पाणिए च डूबी करी मरी गे। क्योंकि नूहे परमेश्वरे पर भरोसा कितया सजा बजा ला सै परमेश्वरे दिया नबरा च धर्मी बणया। 8 भरोसे दिया बजा ला ही अब्राहम नापे दे माणुए जो परमेश्वरे इक ऐसी जगा च जाणे ताई सदया जिसा जगा जो परमेश्वर बादे च उसयो विरासत च देणेबाला था। कने सै ऐ नी जाणदा था की कुथयो चलया है, पर फिर भी परमेश्वरे दा हुकम मन्नी करी सै उस देशे जो चली गिया। 9 परमेश्वरे जिस जगा दा बायदा कितया था, अब्राहम उस देशे च परदेसियां साईं तम्बूआं च रेंदा था, उदे सोगी उदा जागत इसहाक कने पोत्र याकूब भी तम्बूआं च रेंदे थे, जिना जो परमेश्वरे ला ऐई बायदा मिलया था। 10 क्योंकि सै स्वर्ग च इक ऐसे शोहे च रेणे दी उम्मीद रखदे थे, जिनी हमेशा बणी रेणा है, जिसयो बणाने बाला कने रचणे बाला परमेश्वर है। 11 भरोसे दिया बजा ला ही अब्राहम दी घरे बालिया सारा बड्डी होई के भी गर्भ धारण कितया, क्योंकि उसा जो भरोसा था की परमेश्वरे जडा बायदा कितया है सै उनी पूरा करणा। 12 कने इसा बजा ला जालू अब्राहम बडा बुडा होई गिया था की मरणे ही बाला था, फिरि भी अम्बरे दे तारयां सांके कने समुद्रे कंडे दे रेते सांके उदे अणगिनत वंश पैदा होए। 13 ऐ सारे लोक जिना परमेश्वरे पर भरोसे कितया, सै उना चीजां जो मिलयो बिना ही मरी गे, जिदा बायदा परमेश्वरे कितया था। सै उना चीजां जो दूरे ला दिखी करी खुश होए, कने उना ऐ गल्ल मन्नी लेंई की असां इसा धरती पर परदेसी कने अजनबी न। 14 सै लोक जडे ऐसा बोलदे न की असां परदेसी कने अजनबी न, सै इक ऐसे देशे दी मिलणे दी उम्मीद रखदे न जडा उना दा अपना होणा। 15 अगर सै उस देशे दे बारे च सोचदे, जिथू ला सै आयो थे, तां

सै मुडी करी जाई सकदे थे। 16 पर उना जो इक खरे देश जाणे दी इच्छा थी मतलब की स्वर्ग, इस ताई परमेश्वर उना दा परमेश्वर बोलया जाणे ला खुश था, क्योंकि उनी उना ताई इक शेहर तैयार कितया है। 17 भरोसे दिया बजा ला ही अब्राहम अपने पुत्रे दी बलि चढाणे ताई तैयार होई गिया था, जालू परमेश्वरे उदी परिक्षा लेई। परमेश्वरे अब्राहमे ला इस पुत्रे दे बारे च बायदा कितया था की, “इसहाक ला ही तेरा बंश बढणा है।” फिरी भी सै अपने इकलोते पुत्रे जो बलि चढाणे ताई तैयार था। क्योंकि उसयो पूरा भरोसा था की अगर इसहाक मरी भी जांगा तां परमेश्वर उसयो जिन्दा करी सकदा है। इस तरीके ला अब्राहमे जो उदा अपना पुत्र इसहाक जिन्दा मिली गिया था। 20 भरोसे दिया बजा ला ही इसहाके अपने दो पुत्रां मतलब की याकूबे कने एसाब जो औणे बाली जिन्दगी ताई जडा बायदा कितया था उदे बारे च आशीष दिती। 21 भरोसे करणे ला ही याकूबे मरदे बकत यूसुफे दे पुत्रां जो इक-इक करारी आशीष दिती, कने अपणिया सोठिया दे सारे ला झुकी करी परमेश्वरे दी आराधना किति। 22 भरोसा करणे ला ही यूसुफ नाणे दे माणुणे जालू सै मरणे बाला था, ता उनी बडे भरोसे ला इसा गल्ला जो बोलया था की इस्राएल देशे दे लोकां मिस्र देशे जो छडी करी कनान देशे जो चली जाणा। कने उनी एे हुकम भी दितया की जालू सै कनान देशे जो जांगे तां उदियां हडियां जो भी कनान देशे लेई जान। 23 जालू मिस्र देशे दे राजे एे हुकम दिता की इस्राएलियां दे सारे जमदे जागतां जो मारी दिया, तालू भरोसा करणे ला ही मूसा दे माता-पिता उसयो पैदा होणे बाद तिन्न महीने दीकर लुकाई रखया, क्योंकि उना दिखया की एे खास बच्चा है, कने सै राजे दे हुकम नी मणणे ला नी डे। 24 मिस्र देशे दे राजे दिया कुडिया मूसे जो पातया था। कने जालू मूसा बडा होया ता उनी भरोसा करणे ला ही राजे दिया कुडिया दा पुत्र होणे ला मना करी दिता। 25 एे इस ताई होया की मूसे पाप दे थोडे बकते दे सुखां दा आनंद लेणे दे बजाए परमेश्वरे दे लोकां सोगी दुख झेलणा जादा खरा समझया। 26 कने उनी मसीह ताई बेईजत होणा, मिस्र देशे दे धन दौलत ला भी जादा बदीकरी समझया, क्योंकि सै अपना इनम मिलणे दा इंतजार करा दा था, जडा परमेश्वरे उसयो देणा था। 27 भरोसा करणे दिया बजा ला ही सै मिस्र देशे दे राजे दे गुस्से ला नी डरया कने उनी मिस्र देशे जो छडी दिता, क्योंकि सै समझी गिया था कने मन्ना एे ऐसा था की जियां उनी परमेश्वरे जो दिखी लिया था, जिसयो कोई दिखी नी सकदा। 28 भरोसा करणे ला ही मूसे इस्राएल देशे दे लोकां दी पेहली ओलादी जो हुकम दिता की दरबाजे पर बकने दा खने छिडकी करी फसह दा त्योहारे मना, ताकि पैली ओलादा जो खत्म करणे बाला दूत इस्राएलियां दिया पेलिया ओलाद जो छुई ना सके। 29 भरोसा करणे ला ही इस्राएल दे लोकां लाल समुन्द इयां ही पार करी लिया, जियां की सै सुकियां जमिना पर चलयो न, पर जालू मिस्र देशे दे लोकां इयां करणा चाया तां सै सारे डुबी करी मरी गे क्योंकि समुंद पलटी गिया। 30 भरोसा करणे ला ही इस्राएल देशे दे लोकां परमेश्वरे दा हुकम मन्नी करी यरीहो शेहरे दिया कन्दा दे चारो पासे सतां दिनां दीकर चक्कर लांदे रे, तां सै कन्द डेई गेई। 31 भरोसा करणे ला ही रहाब वैश्यया परमेश्वरे दे हुकम नी मणणे बाले लोकां सोगी खत्म नी होई, क्योंकि उना इस्राएली गुप्चरां दा स्वागत कितया था जडे यरीहो शेहर दा भेद लेणा आयो थे। 32 हण मिंजे कुछे होर बोलणे दी जरूरत नी है, क्योंकि हण मेरे बाल बकत नी रिया की, मैं, गिदोन, बराक, शिमशोन, यिफतह, दाऊद, शम्भूएल, कने परमेश्वरे दे संदेश देणेबालयां दे भरोसे दे बारे च तहांजो दर्से। 33 इना भरोसा करणे ला ही राज्य जिते; सही कम्म किते; कने इना जो बायदा कितियां चीजां मिलियां; कने शेर इना जो खाई नी सके, 34 अग्य उना जो फुकी नी सकी, तलबारा दी धार उना जो मारी नी सकी, जालू इक बरी कमजोर होए तां दुबारा सै मजबूत बणे, लडाईया च वीर निकले, कने उना अपने दुशमणा दी सेना जो मारी दितया। 35 कुछे जनानियां अपने मरयां लोकां जो फिरी ला जिन्दा दिखया, कितणे तां मार खांदे-खांदे मरी गे, कने अपना भरोसा नी छडया ताकि उना जो जेला ला छुटकारा मिली जा; इस ताई की उना जो मरयां चे जिन्दे होई जाणे बाद इक खरी जिन्दा मिले। 36 केईयां दा मजाक उडायो, केईयां जो कोडे खणा पे, केईयां जो सुंगला ला बन्नी करी जेला च पाई दिता। 37 केईयां जो पथर मारी करी मारी दिता, कने आरे ला चिरी करी दो फाड करी दिते, तलबारा ने मारी दिते। सै गरीब थे, उना जो दुख दिते कने उना सोगी बुरा बर्ताब कितया। कने सै

भेडां बकरियां दी खली जो ओडी करी रूआं-परां भटकदे रे। 38 कने बाणा, पहाडा, गुफां च कने धरती दी दरारां च भटकदे फिरे। संसार इना भरोसा करणे बाले लोकां दे काबिल नी था। 39 कने भरोसे दे जरिये ही इना लोकां दी परमेश्वरे उना दी तारीफ कितियो, तमी उना जो सै चीजां नी मिलियां जिना दा परमेश्वरे उना ला बायदा कितया था। 40 क्योंकि परमेश्वरे बाल सांझे कुछे खरा देणे योजना है ताकि उना जो सिद्ध बनाई सके, पर सिर्फ साडे सोगी मिली करी ही।

**12** साडे अखे-बखे इयोदे लोक बडे भरी न, जिना दिया जिन्दगिया ला सांझे पता लगदा है की भरोसे दा क्या मतलब होदा है। तां ओआ, असां हर इक रोकणे बाले कने उलझाणे बाले पापां जो दूर करिरी, असां उस रस्ते पर चलन जिस पर सांझे जरू चल्णा चाईदा। 2 सांझे यीशु मसीह पाससे दिखदे रेणा चाईदा, जडा सांझे अगे बंदादा है कने साडे भरोसे जो पूरा करदा है। जिनी उसा खुशिया ताई जडी उसयो बादे च ओणे बाले बकते च मिलणी थी, बेईजती दी कोई परबाह नी करिरी सूली दे दुखे जो सेहन किता कने मरी गिया; कने हण सै परमेश्वरे दे सिंहासने दे सज्जे पास जाई बैठया है। 3 इस ताई यीशु दे उदाहरण दे बारे च सोचा, जिनी पापियां दे दितयो बडे बडे दर्द जो इस ताई सेहन करी लिया ताकि तुसां हारी करी हिम्मत ना छडी देन। 4 तुसां बुराईया दियां ताकता दे खिलाफ लडदे होए, तुसां हल्ले दीकर ऐसी लडाई नी लडी होणी जिसा च तुहाडी मौत होई गेई हो। 5 कने तुसां उस हिम्मत दियां गल्लां जो भूली गियो न जडियां परमेश्वरे तहांजो अपने पुत्र समझीकरी बोलियां थियां: “हे मेरे पुत्र, जालू प्रभु तिजो ऐहसास कराए की तू गलत कितया है तां उस पर पूरा ध्यान दिया, कने जालू प्रभु तिजो झिडकां दे तां दिखया हिम्मत छडदा।” 6 क्योंकि प्रभु जिसला प्यार करदा, उसयो सुधारदा भी है, कने जिसयो अपना पुत्र बनाई लेदा है, उसयो कोडे भी मारदा है। 7 जडा दुख तुसां झेला दे न उसयो परमेश्वरे दी सजा समझीकरी सेहन करी लिया। परमेश्वर तहांजो पुत्र समझीकरी तुहाडे सोगी बर्ताब करदा है। सै कुण दिया पुत्र है जिसयो उदा पिता सुधारदा नी है? 8 अगर परमेश्वर तहांजो नी सुधारे जियां सै अपने पुत्रे जो सुधारदा है, तां तुसां उदे असली बच्चे नी न। 9 फिरी जालू की साडे शरीरिक पिता भी सांझे सुधारणे ताई सजा दिन्दा है, असां फिरी भी उदी सुणदे कने इज्जत करदे न, इस ताई एे होर भी जादा जरूरी है की जालू साडा स्वर्ग दे पिता सांझे सुधारे तां तालू असां उदी सुणन ताकि सांझे हमेशा दी जिन्दगी मिल्ले। 10 साडे शरीरिक पिता तां अपनी-अपनी समझ दे सबे ला जडा उना जो टीक लगे, थोडे रोजां तां सांझे सुधारदे थे, पर परमेश्वर साडिया भलाईया तां सांझे सुधारदा है, ताकि असां भी उस सांझे पबित्र होई जान। 11 जिस बकत सै सांझे सुधारदा है, उस बकत सै सुधार सांझे खरा नी लगदा है, बल्कि बडा बुरा लगदा है, पर जालू बादे च असां इसला सिख लेंदे न, तालू सांझे शांति मिलदी है, क्योंकि असां सही तरीके ला जिणा शुरू करी दिन्दे न। 12 इना सारियां गल्लां दिया बजा ला मजबूत बना कने प्रोत्साहित रिया। 13 रूआं-परां दिखणे दिया बजाए, तुसां यीशु मसीह बाल जाणे बाले रस्ते पर जा, ताकि जडे साडे बिच आत्मिक रूप च कमजोर न, सै भटकी ना जान पर उना दा भरोसा मजबूत होई जाऐ। 14 सारयां सोगी मिली-जुली करी रिया, कने पबित्र जिन्दगी जिणे दी कोशिश करदे रिया। इदे बिना कोई भी प्रभु जो नी दिखी सकदा है। 15 कने ध्यान रखा की, ऐसा ना हो की कोई भी परमेश्वरे दे अनुग्रह ला छूटी जाऐ, कने तुहाडे बिच परेशानी खडी करी दे। ऐसा माणु तुहाडे चे मतयां जो बर्बाद करी सकदा है। 16 ऐसा ना हो, की कोई भी जणा व्यभिचारी, या अब्राहमे दे पोत्र एसाब सांई अधर्मी हो। क्योंकि सै जेठा पुत्र था, पर उनी अपनी पेहला पुत्र होणे दे सारे हकां जो अपने छोटे भाई याकूबे जो इक बकते दिया रोटिया ताई बेची दिता। 17 तुसां जाणदे न की बादे च जालू सै अपने पिता ला आशीष पाणा चांदा था, पर उसयो ऐ नी मिली, कने रोई-रोई करी भी उनी आशीष मंगी पर उसयो अपनी गलती सुधारणे दा दुबारा मौका नी मिलया। 18 तुसां सीने पहाडे सांई असली पहाडे पर नी आयो न, जिसयो छुई कने दिखी सकदे न। ऐयू कोई भखदी अग्य या काले बदल या तूफान नी है, कने लोक इक ऐसिया ही जगा च थे जालू परमेश्वरे उना जो अपनी व्यवस्था दिती। 19 कने ना ही तुरही दिया अबाजा कने बोलणे बाले दे बखे नी आयो न, जिसयो सुणने बालयां विनती किती की हण साडे ला जादा गल्लां मत करा। 20 उना ऐसा इस ताई बोलया क्योंकि सै उस हुकमे जो

सेहन नी करी सके जडा परमेश्वरे बोलया, “अगर कोई जानवर भी उस पहाड़े जो छुंणा तां उसयो पत्थर मारा।” 21 कने सै दर्शण इतणा डरावणा था, की मूसे भी बोलया, “मैं बड़ा डरा दा कने कमा दा है।” 22 पर तुसां सिय्योन पहाड़े पर आई गियो न जडा जिन्दे परमेश्वरे दा स्वर्गीय यस्शलेम शेहर है, जिथु लखां स्वर्गदूत त्योहारे कने खुशिया मनादे न। 23 तुसां परमेश्वरे दे पहिलौठां दिया सभा च आयो न, जिना दे ना स्वर्ग च लिखयो न। तुसां अपु परमेश्वरे बाल आयो न जडा सारियां चीजां दा न्याय करणे बाला है, सै स्वर्ग च उना धर्मी लोकां दियां आत्मा न जिना जो हण सिद्ध बनाया है। 24 तुसां यीशु मसीह बाल आयो न जडा लोकां कने परमेश्वरे बिच नोई बाचा दा बिचोलिया है। कने छिडकयो खूने बाल आयो न, जडा हाबिले दे खूने सांई न्याय तांई बिनती करणे दे बजाए पापां दी माफी दी गल्ल करदा है। 25 ध्यान रखा कने उस परमेश्वरे दी मन्ना जडा तुहाडे ने गल्ला करा दा है, क्योंकि इझ्राएल दे लोक परमेश्वरे दिया सजा ला नी बची सके जालु उना मूसा दी गल्ल नी मन्नी, इस तांई साडे तांई होर भी जादा बुरा होणा अगर असां परमेश्वरे दिया गल्लां जो सुणने ला मना करी दिगे जडा स्वर्ग ला चेटावनी दिन्दे है। 26 जालु परमेश्वरे सनि पहाड़े पर खडोई करी बोलया तां उदिया अबजा ला धरती हिल्ली पेई थी, पर हण उनी ऐ बायदा कितया है की, “मैं इक बरी फिरी सिर्फ धरती जो नी, पर अम्बरे जो भी हिलाई देणा है।” 27 कने ऐ गल्ल इक बरी फिरी इसा गल्लां जो दसदी है, की सारियां बणाईयां चीजां हिलाईयां कने हटाई जाणियां न, ताकि सै चीजां जडियां हिलाई नी जान्दियां न सै टिकी रेन। 28 इस तांई सांझो जडा राज्य मिलया सै हिलाया नी जाई सकदा, इसा गल्ला तांई सांझो परमेश्वरे दा धन्यवाद करणा चाईदा। कने इज्जत कने डरे सोगी, परमेश्वरे दी ऐसी अराधना करन, जिसला सै खुश होँदा। 29 क्योंकि जियां अग भस्म करदी है, तियां ही साडा परमेश्वर अपने दुशमणा जो खतम करदा है।

**13** इक दुज्जे सोगी अपना भाई कने बेहन समझीकरी प्यार करा। 2 अजनबी लोकां दी भी इज्जत कने खातिरदारी करदे रिया, क्योंकि ऐसा करणे ला केईयां लोकां अनजाणे च स्वर्गदूतां दी इज्जत कने खातिरदारी कितियो है। 3 कैदियां दा इयां हाल चाल पुछदे रिया, जियां मन्ना तुसां भी उना सोगी जेला च न, कने जडे दुख सेहन करा दे न, उना दा भी ऐ समझीकरी हाल चाल पुछदे रिया, जियां तुसां भी उना सोगी उना दे दुखे च शामिल न। 4 बियाये दा रिशता सारयां तांई आदरनीय हो, कने लाडा-लाडी इक दुज्जे सोगी बफादार रिया। क्योंकि परमेश्वरे व्यभिचारियां कने नाजायज रिशते रखणे बालयां दा न्याय करणा है। 5 अपणिया जिन्दगिया जो पैसयां दे लालचे ला दूर रखा, कने जडा तुहाडे बाल हो तुसां उसी च ही खुश रिया; क्योंकि परमेश्वरे अपु ही बोलया है, “मैं तिजो कदी भी नी छडगा कने ना ही कदी त्यागणा है।” 6 इस तांई असां बिना डरयो बोलदे न, “प्रभु, मेरी सहायता करदा है, मैं नी डरणा; माणु मेरा क्या बगाडी सकदा है।” 7 जडे तुहाडे अगुवे न, कने जिना तुहांजो परमेश्वरे दा बचन सुणाया है, उना जो याद रखा; कने ध्याने ने उना दिया जिन्दगिया जो दिखा की, कियां उना अपणी जिन्दगी जी कने मरणे दीकर भरोसे च बफादार रे, तियां ही तुसां भी परमेश्वरे पर भरोसा दस्सा जियां उना दसया था। 8 यीशु मसीह कल कने अज कने यूगां-यूगां दीकर इकोदिया है, क्योंकि यीशु मसीह कदी नी बदलदा। (aiōn g165) 9 इस तांई सांझो इना सारियां नोईयां कने लग-लग शिक्षां जो नी मणणा चाईदा, जडियां तुहांजो गलत रस्ते पर लेई जान्दियां न। तुहाडे मना तांई ऐ ही खरा है की सै अनुग्रह दे जरिये पक्के बणन, ना की उना खाणे बालियां चीजा दे रिबाजां जो मणणे ला, क्योंकि इना गल्लां जो मणणे ला उना दा कोई फायदा नी है जडे इना गल्लां जो मंदे थे। 10 साडे बाल इक ऐसी वेदी है, जिसा चे मिलाप दे तम्बूरे दे याजकां जो खाणे दा कोई हक नी है। 11 क्योंकि पैली बाचा अनुसार हर साल महायाजक जिना जानवरां दा खून पापां दी माफी तांई परम पबित्र जगा पर लेई जांदा था, उना दे शरीरां जो जिथु सै रेंदे ओथु ला बार लेईजाई करी फुकदे न। 12 इसी बजा ला, यीशुए भी लोकां जो अपने ही खूने ला पबित्र करणे तांई यस्शलेम शेहर ला बाहर दुख झेले कने मरी गिया। 13 इस तांई ओआ, असां यहदी रीतियां जो छडी करी, छावनी दे बार जान, कने यीशु मसीह पर भरोसा करदे होऐ जियां यीशुए बेईजती सेहन किती, तियां ही असां भी बेईजती सेहन करन। 14 क्योंकि इसा धरती पर साडे बाल हमेशा रेणे तांई कोई घर नी है, बल्कि असां तां उस स्वर्ग

दे घरे दा इंतजार करा दे न जडा हमेशा तांई है। 15 इस तांई असां यीशुए जरिये लगातार अपने ओठां ला परमेश्वरे दा गुणगान करन। ऐई उदे तांई साडा बलिदान है। 16 पर भलाई करणा कने जस्सतमंद लोकां दी सहायता करणा कदी मत भुलदे; क्योंकि परमेश्वर ऐसे बलिदाना ला खुश होँदा है। 17 अपने अगुवां दा हुकम मन्ना, कने उना दे अधीन रिया, क्योंकि तुहाडियां आत्मा दी रखबाली करणा उना दा कम्म है, उना जो तुहाडे बारे च परमेश्वरे जो लेखा देणा पौणा है। तुसां उना दी मन्ना ताकि सै इस कम्मे जो खुशिया ला करन, ना की दुखी होईकरी, क्योंकि दुखी होईकरी सेवा करणे दा कोई फायदा नी होणा। 18 साडे तांई प्रार्थना करदे रिया; क्योंकि सांझो इसा गल्ला दा पक्का पता है, की साडी अंतरात्मा शुद्ध है, कने असां हर बकत खरा ही करणा चांदे न जिदे जरिये परमेश्वरे जो इज्जत मिल्ले। 19 तुहाडे ला मेरी ऐ खास बिनती है की प्रार्थना करा की मैं तुहांजो ला मिलणा तोली आई सकें। 20 कने हण परमेश्वर जडा तुहांजो शांति दिन्दे है, कने जिनी साडे प्रभु यीशु जो मरयां चे जिन्दा किता, सै तुहांजो सारियां चीजां दे जिना दी जस्सत तुहांजो उदी इच्छा जो पूरा करणे तांई है। कने यीशु मसीह दिया शक्तिया जरिये सै तुहांजो हर इक खरिया गल्ला जो सिद्ध करे जडियां उसयो खुश करदियां न। यीशु मसीह सनातन बाचा दे जरिये भेडां दा महान पुहाल बणया, जिस पर उदे खने ला हस्ताक्षर कितया है। उदी महिमा हमेशा होँदी रे। अमीन। (aiōn g165, aiōnios g166) 22 हे मसीह भाईयो, मैं तुहाडे ला विनती करदा है, इस चिठिया दियां गल्लां जो सबर रखीकरी सुणी लिया, ऐ मैं तुहांजो होंसला देणे तांई लिखियां न। मैं इसा चिठिया च बडियां जादा गल्लां नी लिखियां न। 23 तुसां ऐ जाणी लिया की तीमथियुस साडा मसीह भाई जेला ला छुटी गिया है, कने अगर सै तौली मेरे बाल आई गिया तां मैं उदे सोगी तुहांजो ने मिलगा। 24 अपने सारे अगुवां जो कने परमेश्वरे दे सारयां लोकां जो नमस्कार बोला। इतालिया प्रदेशे दे भरोसा करणे बाले मसीह भाई कने बेहणा तुहांजो नमस्कार बोलदे न। 25 मैं प्रार्थना करदा है की, परमेश्वर दा अनुग्रह तुसां सारयां पर होँदा रे। अमीन।

# याकूब

**1** मैं, याकूब इसा चिठिया जो लिखा दा है, मैं परमेश्वर दा कने प्रभु यीशु मसीह दा सेवक है। मैं ऐ चिट्ठी इस्राएल दे लोकां जो लिखा दा है, जडे बाहरां गोत्रों च न कने दुनिया भर रूआं परां बिखरयो न, कने उना जो नमस्कार बोलदा है। 2 हे मेरे मसीह भाईयो, जालू तुहांजो पर लग-लग तरा दियां परेशानिया ओन, तां इसयो पूरी खुशिया दी गल्ल समझनयो, 3 क्योंकि तुसां जाणदे ही न, की तुहाडे भरोसे जो परखे जाणे ला होर जादा सबर बढ़दा है। 4 परमेश्वरे पर भरोसा करिरी सबर ला परेशानिया दा सामणा करदे रिया, ताकि तुसां आत्मिक स्पे ला परे समझदार कने सिद्ध होई जान कने तुहाडे च कुसा भी गल्ला दी कमी ना रे। 5 पर अगर तुसां चे कुसयो भी अकला दी कमी है, तां परमेश्वरे ला मंगा, जडा बिना दोष दितयो सबना जो प्यारे ला दिन्दा है, कने परमेश्वरे तुहांजो भी देणा है। 6 जालू तुसां परमेश्वरे ला मंगे, तां पूरा भरोसा करिके मंगनयो कने परमेश्वरे पर कोई भी शक मत करदे, क्योंकि शक करणे बाले समुन्दे दियां लैहरां सांई बदलदे रेदे न, जडियां होआ ने चलदियां कने उटकदियां न। 7 ऐसा माणू ऐ आस बिलकुल छडी दे, की उसयो प्रभु ला कुछ मिलगा, क्योंकि इदा मन घडी-घडी बदलुन्दा रेदा कने लोक इस पर भरोसा नी करी सकदे। 9 जडे विश्वासी भाई गरीब न, उना जो खुश होणा चाईदा की परमेश्वरे उसयो कदेई इज्जत दिती। 10 जडे विश्वासी भाई अमीर न, उसयो खुश होणा चाईदा, की परमेश्वरे उसयो दीन किता, क्योंकि उदी अमीरी नाश होणे बाले जंगली घांघे सांई है दे फुलां सांई झडी करी खत्म होई जांदी है। 11 क्योंकि सर्ज निकलदे ही जोरे दी धूप पौंटी कने सारा घा सूकी जांदा है, कने उसा दे सारे फुल झडी जांते न, कने उना दी शोभा मुकी जांदी है, तियां ही अमीर विश्वासिये भी मरी जाणा अगर सै अपने ही कम्मा च लगगी रेंगा। 12 धन्य है सै माणू, जडा परख च टिकी रेदा है, क्योंकि जालू सै परख च खरा निकली जांदा है, तां उसयो अनन्त जिंदगी दा सै मुकुट मिलणा जिसदा बायदा परमेश्वरे अपने प्यार करणे बालयां तांई किर्या है। 13 जालू कुसी दी परख हो, तां सै ऐ ना समझे, की मेरी परख परमेश्वरे करा दा है, क्योंकि ना तां बुरियां गल्लां ने परमेश्वरे दी परख होई सकदी है, कने ना ही परमेश्वर कुसी दी परख अपु लेंदा है। 14 पर हर माणू अपणियां ही बुरिया इच्छा च फसी करी परख च पौंदा है, जियां इक डंगर खाणे दे लालचे आई करी फाईया च फसी जांदा है। 15 फिरी सै बुरी इच्छा गर्भवती होई के पापे जो जन्म दिन्दी है, कने जालू पाप बढी जांदा है, तां सै हमेशा दी मौत दा रस्ता है। 16 मेरे प्यारे मसीह भाईयो, धोखा च मत रिया। 17 क्योंकि हर इक खरा वरदान कने हर इक खरा दान स्वर्ग ला ही है, कने ज्योतियां दे पिता ला ही मिलदा है, सै हमेशा इकोदिया रेदा कने ना ही छाया पौंटी है। 18 उनी अपणी ही इच्छा ने सांझो सच्चे बचना ने नोई जिन्दगी दितियो है, ताकि असां उदी बणाईयो दुनिया दे सारयां ला जरूरी हिस्सा बणन। 19 हे प्यारे मसीह भाईयो, ऐ गल्ल तुसां जाणी लिया हर इक माणू सुणने तांई हमेशा तैयार कने बल्ले बोलणे बाला कने घट गुस्से बाला हो। 20 क्योंकि जालू माणू गुस्सा करदा है तां, सै धार्मिक जिन्दगी नी जी सकदा, जडा परमेश्वरे जो खुश करदा है। 21 इस तांई मने दी सारी मेला जो कने दुशमणिया जो मुकाई करी परमेश्वरे दे बचने जो प्यारे ने अपनाई लिया, जडा तुहाडे दिले च रखया है, कने जडा तुहाडे प्राणा दा उद्धार करी सकदा है। 22 पर परमेश्वरे दे बचना दी शिक्षा दा पालन करणे बाला बणा, ना की सिर्फ सुणणे बाले, जडे अपने आपे जो धोखा दिन्ते न। 23 क्योंकि अगर कोई बचन दी शिक्षा जो सिर्फ सुणनेबाला है, पर मनदा नी है, तां सै उस माणूऐ सांई है, जडा अपना मूं शीशे च दिखदा है। 24 इस तांई की सै अपने आपे जो दिखीकरी चली जांदा है, कने झट भूली जांदा है, की मैं कदिया था। 25 पर जडा माणू परमेश्वरे दी पूरी व्यवस्था दा ध्याने ने अध्ययन करदा है, जडी लोकां जो पापां ला अजाद करदी है, सै इसयो सुणी के भुलदा नी है, पर इसदी शिक्षा दा पालन करदा है, उसयो अपने कम्मा पर परमेश्वरे ला आशीष मिलणी। 26 अगर कोई अपने आपे जो भक्त समझे, कने बुरियां गल्लां बोलणे च काबू नी रखे, तां सै अपने आपे जो धोखा दिन्दा है कने उदी भक्ति बेकार है। 27 साडे पिता परमेश्वर दिया नजरा च शूद्र कने सच्ची भक्ति ऐ है, की अनाथां कने विधवां दे दुखां च उना दा हाल चाल पुच्छन, कने अपने आपे जो संसारे दे बुरे कम्मा ला बचाई रखल।

**2** हे मेरे प्यारे मसीह भाईयो, तुसां साडे महिमामय प्रभु यीशु मसीह दे चले न, इस तांई तुसां च भेदभाव ना हो। 2 मन्नी लिया, अगर इक माणू सोने दे छल्ले कने छेल कपडे पाई करी तुहाडिया कलीसिया च ओपे कने इक गरीब माणू मैले कपडे पाई करी ओपे। 3 कने तुसां उस छेल कपडे बालयो बडिया इज्जता ला बोलन, की तू ओथु खरिया दिया जगा च बैठ, कने तू उस गरीब जो बोले, तू ऐथु खडोई रे, “या मेरे पैरां बाल बैठ।” 4 तां क्या तुसां इना दोनों च भेदभाव नी किता कने तुसां बुरे बिचारे ला न्याय करणे बाले नी बणी गे? 5 हे मेरे प्यारे मसीह भाईयो सुणा; इसा गल्ला पर ध्यान दिया, क्या परमेश्वरे इस संसारे दिया नजरा च गरीब लोकां जो भरोसे च अमीर होणे तांई नी चुणयो? परमेश्वरे उना जो स्वर्ग राज्य च वारिस बणने दा भी वायदा कितया है जडे उसयो प्यार करदे न। 6 पर तुसां उस गरीबे दी बेसती किती। तुसां जाणदे न अमीर लोक तुसां पर जुल्म करदे न कने सै तुहांजो कचेरिया च घसीटी-घसीटी के लेई जांते न। 7 सै सैई न जडे यीशु मसीह दे आदर योग्य नापे दे खिलाफ बुरियां गल्लां करदे न, जिना सोगी तुसां रिश्ता रखदे न। 8 अगर तुसां पबित्र शाब्दे दे इस बचने दे अनुसार की “तू अपने पडोसियां सोगी अपने सांई प्यार कर,” सच्ची उस राज्य दी व्यवस्था जो पूरा करदे न तां खरा करदे न। 9 पर अगर तुसां भेदभाव करदे न, तां पाप करदे न; कने व्यवस्था दे अनुसार तुसां दोषी न। 10 क्योंकि जडा कोई सारी व्यवस्था दा पालन करदा है, पर उदे इक हुकम जो तोडदा है, तां सै भी उसी सांई दोषी है जिनी सारिया व्यवस्था दा पालन नी किता। 11 इस तांई परमेश्वरे ऐ बोलया, तू व्यभिचार मत करदा, उनी ही ऐ भी बोलया की, “तू हत्या मत करदा” इस तांई अगर तू व्यभिचार नी किता, पर हत्या कितियो है, तां तू व्यवस्था दे अनुसार दोषी है। 12 इस तांई तुहाडा बचन बोलणा कने उना जो मणगा, उना लोकां सांई होऐ, जिना दा न्याय उसा व्यवस्था दे अनुसार होणा है, जडी सांझो अजाद करदी है। 13 क्योंकि जडा कोई दुज्जयां पर दया नी करगा, तां परमेश्वरे भी उस पर दया नी करणी। पर जडा कोई दुज्जयां पर दया करगा, तां परमेश्वरे भी उस पर दया करणी, जालू उनी न्याय करणा। 14 हे मेरे प्यारे मसीह भाईयो, अगर कोई बोले की मिजो यीशु मसीह पर भरोसा है, पर सै दुज्जयां तांई भले कम्म नी करदा हो, तां इसला क्या फायदा? क्या ऐसा भरोसा उदा उद्धार करी सकदा है? 15 अगर कुसी मसीह भाई या बेहणा बाल जरूरी कपडे ना होन, कने उना जो खाणे जो घट मिलदा हो, 16 कने तुसां चे कोई उना जो बोले कि, “प्रभु तुहांजो आशीष दे कने तुहांजो गर्म रखे कने खाणे जो रोटी दे,” पर जडियां चीजां साडे शररी तांई जरूरी न, अगर सै उना जो ना देन, तां इसला उदा कोई फायदा नी होणा। 17 तियां ही भरोसा भी, अगर भले कम्मा सोगी नी हो तां उदा भरोसा बेकार है। 18 “कोई बोलदा है की मैं यीशु मसीह पर भरोसा करदा है, कने दुज्जा माणू बोलदा है की मैं भले कम्म करदा है।” पर मैं बोलदा है, “क्या तुसां बिना भले कम्म करिरी मिजो ऐ साबित करी सकदे न की तुसां यीशु मसीह पर भरोसा करदे न? मैं अपने भले कम्मा करणे दे जरिये ऐ साबित करी सकदा है की मैं यीशु मसीह पर भरोसा करदा है।” 19 तियो भरोसा है, की इक ही परमेश्वर है; पर अच्छी गल्ल है: बुरियां आत्मा भी भरोसा रखदियां न, कने डरदियां न। 20 पर मुच्छ माणू क्या तू ऐ भी नी जाणदा, की भले कम्म बिना भरोसा बेकार है? 21 जालू साडे पूर्वज अब्राहमे अपने पुत्र इसहाक दी बलि वेदिया पर चढाई, तां उनी जडा भला कम्म किता, उसला ही सै परमेश्वरे दे सामणे धर्मी बणया था। 22 तू दिखी लिया की भरोसे उदे कम्मा सोगी मिली के प्रभाव पाया है, कने उदे कम्मा दे जरिये उदा भरोसा पूरा होया। 23 कने पबित्र शाब्दे दा ऐ बचन सच्च होया, अब्राहमे परमेश्वरे पर भरोसा किता, कने उदे भरोसे दिया बजा ला उसयो धर्मी माणू मणया, कने उसयो परमेश्वरे दा मित्र बोलया गिया। 24 तां तुसां दिखी लिया की माणू सिर्फ भरोसे ला ही नी पर भले कम्मा दिया बजा ला इक माणू धर्मी बणदा है। 25 तियां ही रहाब वैश्या भी, जालू उना संदेश देणेबाले दूतां जो अपने घरे रेणे दी जगा दिती कने दुज्जे रस्ते ला विदा किता, तां सै भी अपने इस भले कम्मे दिया बजा ला धर्मी मन्नी गईं। 26 जियां साडा शररी बिना सां दे मरया होया है, तियां ही भरोसा भी भले कम्मा दे बिना बेकार है।

**3** हे मेरे मसीह भाईयो, तुहाडे चे कलीसिया दे मते गुप्त मत बणदे, क्योंकि तुसां जाणदे न, की असां गुस्तां दा न्याय होर भी जादा सकतिया ला होणा है। 2

असां सारे बडी बरी गलतियां करी दिन्दे न; पर अगर कोई माणु जडा कुछ सै बोलदा है, उस च कोई गलती ना करे, तां सेई सिद्ध माणु है, कने अपने आपे जो पूरी तरह बशे च रखी सकदा है। 3 अगर असां घोटयां जो अपने वशे च करणे तांई उना दे मुंए च लगाम लांदे न, तां असां उना दे सारे शरीर जो कुर्सी भी पासे घुमाई सकंदे न। 4 दिखा, जाज भी कितणे बड़े होंदे न, कने तेज होआ ने चलाए जांदे न, तमी इक छोटी दिया पतवारा ने मौंझी अपणिया मरजिया ला मोडी दिदा है। 5 तियां ही जीभ भी साडे शरीर दा इक छोटा दिया अंग है, कने बडियां-बडियां गलत्तां करदी है: दिखा कियां, इक छोटी देई चिंगारी कितणे बड़े बणे च अग लगाई सकदी है। 6 ए छोटी जीभ भी इक चिंगारी सांई है; ए शरीर दा सबते बुरा हिस्सा है, जडा इक माणुए दी सारी जिन्दगी जो नरके दी अग्गी च नाश करी दिन्दी है। (Geenna g1067) 7 हर तरा दे बणे दे जानवर, पंछी, कने रेंगेबाले जानवर कने पाणिणे च रेहणे बाले तां माणुए दे वशे च होई सकंदे न, कने होई भी गियो न। 8 पर जीभा जो कोई भी माणु वशे च नी करी सकदा; सै इक ऐसी बला है, जडी कदी भी स्कदी ही नी है; कने जहरिले सांप् सांई खतरनाख है। 9 इसा जीभा ला ही असां प्रभु यीशु कने पिता परमेश्वर दी स्तुति करंदे न, कने इसा जीभा ला ही माणुआं जो श्राप दिन्दे न, जिना जो परमेश्वरे अपने स्वरूप च बणया है। 10 इक ही मुंए ला श्राप कने धन्याबाद दोनो निकलंदे न। हे मेरे मसीह भाईयो, ऐसा नी होणा चाईदा। 11 पाणिणे दे इकी ही खुए ला कोडा कने मिठा पाणी दोनो सोगी कदी नी निकली सकंदे। 12 हे मेरे मसीह भाईयो, इयां ही अंजीर दे स्खे च जैतन, या दाख दिया बेला च अंजीर कदी नी लगी सकंदे। इयां ही पाणिणे दे इकी ही खुए ला कोडा कने मिठा पाणी दोनो सोगी कदी नी निकली सकंदे। 13 तसां च ज्ञान बाला कने समझदार कुण है? अगर तसां हेन, तां तहांजो इसयो अच्छी जिन्दगी जी करी साबित करणा चाईदा कने शांत सभाव जडा तहाडे ज्ञान ला ओंदा है, अपने भले कम्मा दे जरिये साबित करणा चाईदा। 14 अगर तसां अपने मने च कड़वाट, जलन कने मतलबीपन रखंदे न, तां इदा घमंड मत करंदे, कने ना ही सकंदे दे खिलाफ कोई झूठ बोलनयो। 15 ए ज्ञान से नी है, जडा स्वर्ग ला मिलदा है, ए तां शारीरिक, संसारिक, कने शैतानी है। 16 क्योंकि जिथु जलन कने मतलबी हुंदा है, ओथु बखेडा कने हर तरा दे बुरे कम्म भी होंदे न। 17 पर जडा ज्ञान स्वर्ग ला मिलदा है, सै पेहेले तां पबित्र होंदा है, फिरी मिलनसार, कोमल, कने प्यारभाव, दया ला भस्या, खरे कम्मा ला लदुया कने बिना कुर्सी भेदभाव कने बिना कुर्सी कपट दे होंदा है। 18 कने जडे मेल मिलाप करणे बाले न, उना शान्ति दा बी राणा कने धार्मिकता दा फसल बडणी।

4 तसां च ए लेडाई कने झगडे कुथु ला ओंदे न, ए उना इच्छा ला ओंदे न जडियां तहाडे अंदर लडदियां न। 2 तसां कुछ चांदे न, पर जालू तसां जो सै मिलदा नी है; इस तांई तसां हत्या करणे तांई तैयार होई जांदे न, की तहांजो सै मिली जापे, पर कुछ हासिल नी हुंदा तांई तां तसां लडदे झगडदे न, तहांजो इस तांई कुछ नी मिलदा क्योंकि तसां परमेश्वरे ला कुछ नी मंगंदे न। 3 तसां मंगंदे न फिरी भी तहांजो नी मिलदा, क्योंकि तसां बुरिया इच्छा ला मंगंदे न, ताकि अपने बुरे कम्मा च उडाई दे। 4 हे व्यभिचारियो सांई वेविश्वासी लोको, क्या तसां नी जाणंदे, कि संसारे दियां चीजां ला मित्रता करणे दा मतलब परमेश्वरे ला बैर करणा है, जडा संसारे दा मित्र बणना चांदा है, सै अपने आपे जो परमेश्वरे दा बैरी बणाई लेंदा है। 5 क्या तसां ए समझंदे न, की पबित्र शाख च जडा लिखया है सै बेकार है, “जिसा पबित्र आत्मा जो उनी साडे अंदर बसाया है, सै ए चांदा है की असां परमेश्वरे दी ही अराधना करन।” 6 पर परमेश्वर सांझो होर भी जादा अनुग्रह दिन्दे है ताकि असां बुरियां इच्छां दे खिलाफ खडे होई सकन, इस बजा ला पबित्र शाख च ए भी लिखया है कि, “परमेश्वर घमडियां दा बिरोध करदा है, पर दीन लोकां पर अनुग्रह करदा है।” 7 इस तांई परमेश्वरे दे अधीन होई जा; कने उना कम्मा जो करणे ला मना करा जडा कि शैतान चांदा है की तसां करा, तालू उनी तहाडे सामणे ला नसी जाणा। 8 परमेश्वरे दे नेडे ओआ, तां उनी भी तहाडे नेडे ओणा, ओ पापियो, अपने मना जो शूद्र करा। लगातार सोच बदलने बाले लोको, अपने दिले जो पबित्र करा। 9 अपने पापां दिया बजा ला दुखी होआ, शोक करा, कने रोआ: तहाडी हंसी रोणे च कने खुशी उदासिया च बदली जा। 10 प्रभुए दे सामणे दीन बणा, तां उनी तहांजो उच्चा उठाणा। 11 हे मसीह भाईयो, इक

दुज्जे दी निंदा मत करा, जडा अपने भाईयां दी निंदा करदा है, या भाई पर दोष लांदा है, तां सै व्यवस्था दी निंदा करदा है, कने व्यवस्था पर दोष लांदा है, तां तू व्यवस्था पर चलणे बाला नी, पर उस पर न्याय करणे बाला होया। 12 परमेश्वर ही है जडा व्यवस्था देणेबाला कने न्याय करणे बाला है सै नाश करणे बाला कने बचाणे बाला है, तसां कुण होंदे न, जडे अपने पडोसिए पर दोष लांदे न? 13 तसां जडा ए बोलंदे न, “अज या कल असां दुज्जे शेहरे च जाईके इक साल ओथु रेंगे, कने व्यापार करिरी फायदा करगे।” 14 पर ए नी जाणंदे न की कल क्या होणा है। तसां सणु! की तहाडी जिन्दगी हे ही क्या? तसां ता मन्ना की धुंधा सांई न, जडी थोडी देर मिलदी है, फिरी उडी जांदी है। 15 इस तांई तहांजो ए बोलणा चाईदा, “अगर प्रभु दी मर्जी होगी, तां असां जींदे रेण है, कने ए या सै कम्म भी करगे।” 16 पर हण तसां अपनी बडियां-बडियां योजना पर घमंड करंदे न; ऐसा सारा घमंड बुरा होंदा है। 17 इस तांई जडा कोई भलाई करणा जाणदा है कने नी करदा, उदे तांई ए पाप है।

5 हे अमीरों, सणा; तसां लोकां जो रोणा कने जोरे-जोरे ला चिलाणा चाईदा, क्योंकि मुसीबता तहाडे पर ओणे बालियां न। 2 तहाडी धन दौलत नाश होई जाणी कने तहाडे कपडयां जो कीडे लगी गिया है। 3 तहाडा सोना चांदी बेकार होई गिया है; जिस धन दौलत पर तसां भरोसा करंदे न उनी तहांजो अग्गी सांई फुकी देणा: तहाडा गटेरया धन दौलत न्याय दे दिने तहाडे खिलाफ सबूत दे स्के च खडा होई जाणा। 4 दिखा, जिना मजदूर तहाडे खेत बड़े, उना दी मजदूरी जडी तसां उना जो नी दिती, उना दी नी दीतीयो मजदूरी परमेश्वरे दे सामणे तहाडे खिलाफ चिलाई-चिलाई करी गबाई दे दी है, कने मजदूर दी दुहाई स्वर्गीय सेना दे प्रभुए सुणी लेई है। 5 तसां धरतिया पर भोग-विलास करणा लगी रे, कने बडा भरी सुख भोगया; तसां तां उस जानवरे सांई होई गे, जिसयो मारणे ला पेहेले खुआई पियाई करी मोटा करंदे न, इयां ही तसां भी नी जाणंदे न, की तसां नाश होआ दे न। 6 तसां भोले लोकां जो दोषी बोली करी मारी दिता, कने सै तहाडे खिलाफ लडी ही नी सके। 7 इस तांई हे मसीह भाईयो, प्रभुए दे ओणे दीकर सबर रखा, जिंया किसान धरतिया दे किमती फसल दी आस रखीकर पैली कने आखरी बरखा होणे दीकर सबर रखदा है। 8 इयां ही तसां भी सबर रखा, कने आस मत छडा, क्योंकि प्रभु ओणे बाला है। 9 हे मसीह भाईयो, इक दुज्जे पर दोष मत ला, ताकि तहाडे पर भी दोष ना लगणे, दिखा, न्याय करणे बाला ओणे तांई तैयार है। 10 हे मसीह भाईयो, जिना परमेश्वरे दे संदेश देणेबालयां प्रभु दे नां ला गलत्तां कितियां न, उना जो दुख झेलणे कने सबर रखणे दा इक आदर्श समझ। 11 दिखा, असां धीरज रखणे बालयां जो धन्य बोलंदे न। तसां प्रभु दे सेवक अत्युब दे सबर दे बारे च सणया ही है, कने तसां ए भी जाणंदे न की प्रभुए आखरी च उदी कियां सहायता किती, उसला प्रभु दी बडी कम्णा कने दया प्रगट होंदी है। 12 पर हे मेरे मसीह भाईयो, सारयां ला बडी गल्ल ए है, कदी भी कसम मत खांदे, ना ही स्वर्ग दी, ना ही धरतिया दी, ना ही कुर्सी होर चीजा दी, पर तहाडी गल्ल हां दी हां, कने ना दी ना हो, ताकि तहांजो परमेश्वरे ला सजा ना मिले। 13 अगर तहाडे च कोई दुखी हो तां सै प्रार्थना करे, अगर कोई खुश हो तां सै स्तुति दे भजन गापे। 14 अगर तसां चे कोई रोगी हो, तां सै कलीसिया दे अगुवां जो सदे, कने सै प्रभु दे नापे ला उस पर तेल मली करी उदे तांई प्रार्थना करा। 15 कने भरोसे दिया प्रार्थना ला मरीजे दे सारे रोग दूर होई जाणे, कने प्रभुए उसयो ठीक करी देणा; अगर उनी पाप भी कितयो होंगे, तमी परमेश्वरे उसयो माफ करी देणा। 16 इस तांई तसां अपु चे इक दुज्जे दे सामणे अपने-अपणे पापां जो मनी लिया; कने इक दुज्जे तांई प्रार्थना करा, जिसला तसां ठीक होई जान; इक धर्मी जणे दी प्रार्थना बडी सामर्थी है कने अदभुत नतीजे निकलंदे न। 17 परमेश्वरे दा संदेश देणेबाला एलियाह भी तां साडे सांई दुख-सुख भोगी माणु था; कने उनी पुरे दिले ला गिडगिडाई करी प्रार्थना किती, की बरखा ना हो, कने साडे तिन्ना सालां दीकर धरती पर बरखा नी होई। 18 फिरी उनी प्रार्थना किती, तां अम्बरे ला बरखा होई, कने धरती हरी बरी होई। 19 हे मेरे मसीह भाईयो, अगर तसां चे कोई परमेश्वरे दे सच्च दे रस्ते ला भटकी जा, कने कोई तसां चे उसयो बापस फेरी लेई ओपे। 20 तां तसां समझी लिया, जडा कोई परमेश्वरे दी सच्ची शिक्षा ला भटकयो पापियो जो बापस लेई



ओंगा, उनी इक आदमिये दे प्राणा जो मौत ला बचाणा है, कने परमेश्वरे उदे केई पापां जो माफ करी देणा।

# 1 पतरस

**1** मैं, पतरस जडा यीशु मसीह दा प्रेरित है, ऐ चिट्ठी मेरिया तरफा ला है। मैं ऐ चिट्ठी परमेश्वरे दे चुणयो लोकां जो लिखा दा है जडे पुन्तस, गलातिया, कपूदकिया, आसिया, कने बितूनिया प्रदेशां दे लग-लग शहरां च परदेसियां सांई रेंदे न। **2** कने पिता परमेश्वरे बडे पहले ही तहांजो अपने लोक होंगे तांई कने पबित्र आत्मा दे कम्मे दे जरिये तहांजो चुणी लिया है। उनी ऐसा इस तांई किता ताकि तसां यीशु मसीह दे हुकमा जो मनन कने उदे खने ला शुद्ध होई सकन। मैं प्रार्थना करदा है की परमेश्वर तसां जो अनुग्रह कने शांति दिन्दा रे। **3** साडे प्रभु यीशु मसीह दे पिता कने परमेश्वरे दा धन्यवाद हो। परमेश्वरे सांझो अपणी दया ला इक नोई जिन्दगी दिती है, क्योंकि परमेश्वरे यीशु मसीह जो मरयां चे जिन्दा करिरी सांझो बडे आत्मविश्वास सोगी जिणे दे काबिल बनाया है; मतलब की असां उना चीजां जो मिलणे दी उम्मीद करी सकदे न जडियां उनी सांझो देणे दा बायदा कितया है। **4** असां उना खरियां चीजां दा मिलणे दा इतजार करदे न जडियां परमेश्वरे साडे तांई तैयार कितियां न। कोई भी कदी भी इना चीजां दा नाश नी करी सकदा। उना कदी भी पुराणिया कने उना दी सुन्दरता घट नी होणी। परमेश्वरे तहाडे तांई स्वर्ग च उना चीजां जो रखया है। **5** परमेश्वर अपणिया शक्तिया ला तहाडी रक्षा करदा है, क्योंकि तसां यीशु मसीह पर भरोसा करदे न। उनी तहांजो आखरी दिने दीकर जालू यीशु मसीह मुडी करी ओणा है बचाई रखणा है। तालू तहांजो पता लगी जाणा की परमेश्वरे तहांजो पाप कने मौत ला पुरे तरीके ला बचाई लिया है। **6** तहांजो इना सारियां चीजां दे बारे च खश होंणा चाईदा, चाहे हण थोडे बकते तांई लग-लग तरा दियां पेशानियां तहांजो दुखी करदियां न। **7** कने ऐ पेशानिया इस तांई होंदिया न की ताकि पता लगी सके की तहाडा भरोसा परमेश्वर पर है की नी। यीशु मसीह पर तहाडा भरोसा सोने ला भी जादा कीमती है। जियां नाश होई जाणे बाले सोने जो अमीं च परखया जांदा है कने शुद्ध होंदा है, इयां ही तहाडा भरोसा भी अगर पेशानियां होणे बाद भी मजबूत रेंदा है, तां इसला तहाडी बडी तरीफ कने महिमा कने इज्जत होणी जालू यीशु मसीह फिरी इस संसारे च मुडी ओणा है। **8** तसां यीशु मसीह जो कदी नी दिखया है, फिरी भी तसां उसयो प्यार करदे न। तसां हण उसयो नी दिखा दे न, पर फिर भी तसां उस पर भरोसा करदे न। इस तांई तसां खुशी कने महिमा ला जादा खश होआ जियां अखरां च ब्यान नी करी सकदे न, **9** क्योंकि परमेश्वर तहांजो पाप दिया सजा ला बचांदा है। ऐ यीशु मसीह पर तहाडे भरोसे दा फल है। **10** ऐ उद्धार कुछ ऐसा था जिदे बारे च परमेश्वरे दे संदेश देणेबाले होर जाणना चांदे थे। उना दसया की कियां परमेश्वरे तहांजो बचाणे तांई अपणी दया तहाडे पर किती जिदे तसां काबिल नी न, उना उस जबाब जो तोपणे तांई बडी मेहनत किती। **11** मसीह दी आत्मा परमेश्वरे दे संदेश देणेबालयां च था, जडा मसीह दे दुखां कने उना दुखां बाद मिलणे बाली महिमा दे बारे च उना जो पहले ला दस्सा दा था। परमेश्वरे दा संदेश देणेबालयां ऐ जाणने दी कोशिश किती की आत्मा उना जो क्या दस्सा दा था, ऐ सारियां गल्लां कालू होंगियां कने ऐ कियां पुरियां होणियां। **12** पर परमेश्वरे इना परमेश्वरे दे संदेश देणेबालयां जो दसया की उना दे संदेश अपु अपने तांई नी न बल्कि तहाडे तांई थे। सै संदेश यीशु मसीह दे बारे च श्भसमाचार है जडा तसां हण सुणया है। परमेश्वरे स्वर्ग ला पबित्र आत्मा भेजया ताकि तहांजो श्भसमाचार प्रचार करणे तांई सहायता करे। ऐ स बतणना अमोखा है की ऐशु दीकर की स्वर्गदूत भी बडिया गौर ला इना गल्लां जो होंदे होए दिखदे न। **13** इस तांई अच्छे तरीके ला सोचा कने अपने आप पर काबू करणे दी कोशिश करा। कने उस उद्धार दी आस अनुग्रह पर लाई रखा जडा तहांजो तालू मिलणा है जालू यीशु मसीह दुबारा इस संसारे च मुडी करी ओणा है। **14** परमेश्वरे दिया आज्ञा दा पालन करा जियां अच्छे बच्चे अपने पिता दिया आज्ञा दा पालन करदे न। कने उना बुरे कम्मा जो मत करा जिना दी तसां इच्छा रखदे थे, जालू तसां परमेश्वरे दिया सच्चाईया जो नी जाणने थे। **15** पर हण तहांजो हर कम्मा च जडे तसां करदे न पबित्र होणा चाईदा, जियां की परमेश्वर पबित्र है, जिनी तहांजो अपने बच्चे होंगे तांई चुणया। **16** क्योंकि पबित्र शास्त्र च लिखया है की, “तहांजो पबित्र होणा चाईदा क्योंकि मैं पबित्र है।” **17** कने जालू तसां प्रार्थना करदे न, तां तसां

परमेश्वरे जो अपना पिता बोलदे न। पर तसां याद रखा की सै भेदभाव नी करदा है, कने हर कुसी जो उदे कम्मा दे अनुसार न्याय करदा है। इस तांई जालू की तसां इसा धरती पर इक परदेसी होईकरी रेंदे न तां तहांजो परमेश्वरे दी बडी इज्जत करणी चाईदी। **18** क्योंकि तहांजो पता है की तसां पहले इक बेकार तरीके ला जिन्दगी जिया दे थे, इक ऐसा तरिका जडा तहाडे पूर्वजां दे बकत ला चली ओआ दा था। पर तहांजो उस बेकार जिन्दगी ला बचाई लिया। तहांजो सोने या चांदिया सांई खत्म होंगे बालियां चीजां ला नी खरीदया है, पर मसीह दे बडे कीमती खने ला खरीदया, जडा इक शुद्ध कने सिद्ध मेमने सांई था। **20** इस संसारे जो बणने ला पहले, परमेश्वरे पहले ला ऐ फेसला करी लिया था की यीशु मसीह छुडाणे बाला होंगा। पर सै इना आखरी दिना च तहाडी सहायता करणे तांई इस संसारे च प्रगट होया। **21** जडा कुछ भी मसीह किता है उदिया बजा ला तसां परमेश्वरे पर भरोसा करदे न। परमेश्वर सेई है जीनी यीशु मसीह जो मरयां चे जिन्दा किता, कने उसयो बडी जादा महिमा दिती। इस तांई तसां भरोसा करदे न कने परमेश्वर पर तहाडी उम्मीद पक्की है। **22** क्योंकि सच्चाईया जो मरुणे ला ही तहांजो तहाडे पापां ला शुद्ध कितया है, हण तहांजो अपने सार्थी मसीह भाई बेवणा सोगी इमानदारी कने साफ मने ला प्यार करदे रेंणा चाईदा। **23** तहांजो इक दुज्जे ला प्यार करणा चाईदा क्योंकि तहांजो परमेश्वरे दिया तरफा ला इक नोई जिन्दगी मिलियो है। तहांजो ऐ जिन्दगी कुसी ऐसिया चिजा ला नी मिलियो है, जिना खत्म होई जाणा, पर हमेशा टिकी रेणेबाले बचन दे जरिये नोई जिन्दगी मिलया है। (aiōn g165) **24** क्योंकि पबित्र शास्त्र ऐ बोलदा है, “हर इक माणु घाए सांई है, कने उदी सारी शोभा घाए दे फुलां सांई है। घाए सुकी जाणा है, कने फुलां झड़ि जाणा है।” **25** पर परमेश्वरे दा बचन हमेशा बणी रेंदा है। कने ऐ बचन मसीह दे बारे च श्भसमाचार है जडा तहांजो च प्रचार कितया था। (aiōn g165)

**2** इस तांई हर तरा दा बुरा व्यवहार छुडी दिया, दुज्जयां जो धोखा मत दिया, पाखंडी मत बणा, दुज्जयां ला जलन मत रखा, कुसी जो बदनाम मत करा, **2** जियां नोए जम्यो बच्चे अपणी माता दे दुधे दी इच्छा रखदे न, तियां ही तहांजो परमेश्वरे दे बचन सिखणे दी इच्छा रखणी चाईदी ताकि तसां आत्मिक रूप च मजबूत बणी सकन। तां आखरी च, परमेश्वरे तहांजो इस संसारे दियां बुरियां चीजां ला पुरे तरीके ला बचाई लेणा। **3** क्योंकि जियां पबित्र शास्त्र च लिखया है की, “तसां अपने अनुभव ला जाणया है की प्रभु भला है।” **4** प्रभु यीशु दी तुलना इक जिन्दे पत्थरे ला कितियो है। उस पत्थरे जो माणुआं फेंकी दितया था क्योंकि उना बोलया की ऐ बेकार था। पर परमेश्वरे दिया नजरा च, सै अनमोल है, कने परमेश्वरे उसयो नियां दे मुख्य पत्थरे दे स्मे च चुणया। हे मेरे मसीह साथियो तसां भी मसीह बाल ओआ, ताकि तहांजो भी उदे जरिये जिन्दे पत्थरां सांई बणाया जाऐ जडे परमेश्वरे दी आराधना दा घर बणाणे तांई लगाए जांदे न। उनी तहांजो भी पबित्र याजक बनाया है। क्योंकि जियां याजक परमेश्वरे जो चढावा चढां दे न, तियां ही तसां भी चढावे दे स्मे च अपना दिल परमेश्वरे जो चढाया है। कने सै चढावा परमेश्वरे जो खश करदा है, क्योंकि तसां यीशु मसीह दे न। **6** ऐ तियां ही है जियां परमेश्वरे पबित्र शास्त्र च बोलया है, “दिखा, मैं कुसी जो यरूशलेम शेहरे च कुणे दे पत्थरे सांई रखा दा है। सै इक बडे कीमती पत्थरे सांई है जडा नियां तांई चुणया। जडा उस पर भरोसा करदा है कने निराश नी होंदा।” **7** ऐ पत्थर तहाडे तांई बडा कीमती है जडे यीशु मसीह पर भरोसा करदे न। पर जडे लोक उस पर भरोसा नी करदे उना दे बारे च पबित्र शास्त्र बोलदा है की, “जिस पथरे जो राजभिषियां बेकार बोली करी लाणे तांई मना करी दितया था, सै घरे दिया नियां च सारयां ला जरूरी पत्थर बणी गिया।” **8** कने फिरी पबित्र शास्त्र च ऐ भी लिखया है, “इनी पत्थरे लोकां दी ठोकर खणे दी बजा होणा, ऐ इक चट्टान होणा, ऐ डेई उना दे डेई पोणे दी बजा होणी।” क्योंकि सै परमेश्वरे दे संदेश जो नी मनणे दिया बजा ला ठोकर खांदे न। परमेश्वरे उना सोगी ऐसा ही होणे दी योजना बनाईयो है। **9** पर तसां ऐसे नी न क्योंकि तसां परमेश्वरे दे चुणयो लोक न, तसां परमेश्वरे दे याजक न, राजे न, तसां परमेश्वरे दी सेवा करणे तांई समर्पित न कने परमेश्वरे दी अपणी निज सम्पति न। उनी तहांजो नेहे ला बार अपणी अनोखी लोई च सदया है, ताकि तसां परमेश्वरे दे अनोखे कम्मा दे बारे च दस्सी सकन। **10** (परमेश्वरे दे संदेश देणेबाले होणे जडा लिखया है सै तहाडे बारे च सच्च है।) इक बकत था जालू तसां परमेश्वरे दे लोक

नी थे, पर हण तुसां परमेस्वरे दे लोक न। पहले तुसां परमेस्वरे दिया दया जो नी जाणदे थे पर हण तुसां इसा जो जाणदे न क्योकि उनी पहले ला ही तुहाडे पर अपणी दया दस्सी है। 11 प्यारे मसीह भाईयो तुसां इस संसारे च परदेशियां कने यात्रियां सांई रे दे न। मै तुहांजो ला विनती करदा है की उना सारियां बुरियां शरीरिक इच्छां ला बचा क्योकि सै हमेशा तुहाडिया अपणिया आत्मा दे खिलाफ लडदियां न। 12 केई बरी ऐसे लोक होदे न जडे प्रभु जो नी जाणदे न कने सै तुहांजो पर ए बोली करी गलत इल्जाम लांदे न की तुहाडे कम्म बुरे न। इस तांई इक अच्छी जिन्दगी जिया ताकि सै उना भले कम्मा जो दीखन जडे तुसां करदे न कने उस दिन परमेस्वरे जो महिमा देन जिस दिन यीशु मसीह मुडी करी ओणा है। 13 प्रभु यीशु दी इज्जत मान करणे तांई तुहांजो उना सारे हुकमा जो मनणा चाईदा जडे इस संसारे दे अधिकारी न; मलब की राजा दे अधीन जडा सारयां ला बड्डा कने जरूरी अधिकारी है, 14 कने राज्यपालां दे अधीन रिया क्योकि सेई ही है जिना उपयोग लाऊना उना लोकां जो सजा देणे तांई करदा है, जिना दे कम्म बुरे न कने उना लोकां दी तारीफ करणे तांई जिना दे कम्म अच्छे न। 15 क्योकि परमेस्वरे दी ए इच्छा है, की साडे भले कम्मा करणे ला, जडे लोक परमेस्वरे जो नी जाणदे, सै अग्रे जो सांझो पर गलत तरीके ला इल्जाम लांणे दी हिम्मत ना करन, क्योकि ए गल्ल साफ-साफ पता है की उना दे झूठे इल्जाम सच्च नी न। 16 तुहाडे तांई ऐसा कोई भी नी है जडा तुहांजो सै करणे तांई रोकी सके जडा तुसां करणा चांदे न क्योकि तुसां साडे प्रभु यीशु मसीह दे जरिये पहले ही अजाद होई गियो न। पर बुरे कम्म करणे तांई इसयो भाना मत बणा। तुहांजो अपने कम्मा ला दसणा चाईदा की तुसां सच्ची परमेस्वरे दे सेवक न। 17 सारयां दी इज्जत करा, अपने मसीह भाईयां सोगी प्यार करा, परमेस्वरे ला डरा, राजा दी इज्जत करा। 18 हे सेबकों, तुसां जडे घरां च कम्म करदे न कने भरोसा करणे बाले न, तुहांजो अपने मालिके दे हुकम मनणा चाईदे कने हमेशा उना दी इज्जत करणी चाईदी। इयां हर तरा दे मालिको सोगी करा चाहे सै दयालु होन या सही होन, या जालिम होन। 19 के क्योकि अगर असां दुख सेहन करदे न चाहे साडीं गलतीं ना हो, पर असां सिर्फ इस तांई सेहन करदे न क्योकि असां परमेस्वरे दे बारे च सोचदे न, तां परमेस्वर सांझो ला खुश होदा है। 20 पर अगर तुहांजो गलत करणे तांई मार पोदी है, तां सजा मिलणे पर सबर रखणे च तुहाडी तारीफ करणे दी कोई बजा नी है। पर अगर भलाई करणे दिया बजा ला तुसां दुख सेहन करदे न कने सबर रखदे न, तां परमेस्वर खुश होदा है। 21 कने परमेस्वरे दे जरिये तुहांजो सदणे दी बजा चे इक बजा ऐ भी है की तुसां उदे तांई भले करदे होए दुख सेहन करी लेणा। यीशु मसीह जिनी तुहाडे तांई दुख सेहन किते, सै तुहाडे तांई इक उदाहरण है। इस तांई तुहांजो सेई कम्म करणे चाईदे जडे मसीह किते। 22 पबित्र शाब्द च लिखया है, “उनी कदी पाप नी किता। उनी कदी झूठ नी बोलया।” 23 जालू लोकां यीशुए दी बेजजती किती, उनी पलटी करी उना दी बेजजती नी किती। जालू लोकां उसयो दुख दिता, तां उनी उना ला बदला नी लिया। बल्कि उनी अपणी सहायता तांई परमेस्वरे पर भरोसा किता, क्योकि सै जाणदा था की परमेस्वर हमेशा लोकां दा सही न्याय करदा है। 24 जालू मसीह मरया, तां साडे पापां दिया बजा ला सूली पर उदे शरीर जो सजा दिती। उनी ऐसा इस तांई किता ताकि असां पाप करणा बंद करी देन। कने उना जखमा दिया बजा ला जडे उनी सेहन किते, असां ठीक होई गे। 25 इक बकत पहले तुसां भेडां सांई थे, जडियां गलत रस्ते पर जा दियां थियां। पर हण तुसां यीशु मसीह बाल बापस आई गियो न जडा तुहाडिया आत्मा दा पुआल कने रखवाला है।

**3** हे घरे बालियां, तुसां भी अपने घरे बालयां दे अधीन रिया। ताकि अगर उना चे कोई भी परमेस्वरे दे बचना पर भरोसा करणे ला मना करदा है, तां तुहांजो ए दसणे दी जरूरत नी होणी की उना जो भरोसा करणा चाईदा। जालू उना दिखणा की क्रियां तुसां पबित्र जिन्दगी जिया दे कने परमेस्वरे दी इज्जत करदे न, तां उना मसीह पर भरोसा करी लेणा। 3 तुहाडी सुन्दरता दिखावटी ना हो, जियां की बाल संवारना, कने सोने दे गेहणे पेहनणा, या भाँती-भाँती दे मेणे-मेणे कपडे पाणा। 4 जडा तुहाडे दिले च है, सेई है जडा तुहांजो सुंदर बणादां है। साडा व्यवहार प्यार भरा कने शांत हो, जडा की परमेस्वरे तांई बडा कीमती है। 5 कने बडे पहले जडियां जानासियां परमेस्वरे पर भरोसा रखदियां थियां, कने उस पर अपणी असा

रखदियां थियां, सै अपने घरे बाले दा हुकम मन्नी करी अपने आपे जो सुंदर बणादियां थियां। 6 जियां सारा अन्नहम दे हुकमा जो मंटी कने उसयो स्वामी बोलदी थी। अगर तुसां दुज्जयां सोगी भलाई करन कने तुहांजो कोई भी चिंता कने डर ना हो, तां तुसां सारा दे बचयां सांई बणणा। 7 तियां ही हे पतियो, तुहांजो अपणिया-अपणिया घरे बालिया सोगी समझदारिया ला रेंणा चाईदा, कने तुहांजो याद रखणा चाईदा सै तुसां ला कमजोर न, इस तांई तुहांजो उना दी इज्जत करणी चाईदी। क्योकि तुसां दोनो ही हमेशा दी जिन्दगिया दे बरदाने दे हिस्सेदार न जडा परमेस्वरे बडे अनुग्रह ला दितया है। इयां करा ताकि जालू तुसां परमेस्वरे ला प्राथना करन तां सै तुहाडी सुणे। 8 आखरी च, मै तुसां सारयां ला ए बोल्णा चांदा है की, तुसां सारयां दा इक ही मन होणा चाईदा कने इक दुज्जे सोगी प्यारभाव ला रिया कने घमंड मत करा कने नम्र बणा। 9 बुराईया दे बदले बुराई मत करा कने ना गाली दे बदले गाली दिया; इदे बदले उना जो आशीश दिया क्योकि परमेस्वरे तुहांजो इसी तांई सदया है की तुसां दुज्जयां जो आशीश देई सकन। अगर तुसां ऐसा करदे न तां परमेस्वरे भी तुहांजो आशीश देणी। 10 क्योकि पबित्र शाब्द च लिखया है, अगर कोई माणु अपणी जिन्दगी दी खुशी लेणा चांदा है, कने खरे दिन दिखणा चांदा है, तां उसयो ध्यान देणा चाईदा की सै बुरियां गल्लां ना बोले। कने उसयो एसियां गल्लां करणा बंद करी देणा चाईदा जडियां सच्च नी है। 11 उसयो पक्का ही बुरे कम्म करणा छडी देणा चाईदे। कने इदे बजाए उसयो सेई करणा चाईदा जडा भला है। दुज्जयां सोगी शान्ति ला रेणे दी कोशिश करा। 12 क्योकि प्रभु उना लोकां दी देखभाल करदा है जडे भले कम्म करदे न, कने सै हमेशा उना दी प्राथना सुणे तांई कने उना दा जबाब देणे तांई तैयार है। पर परमेस्वर बुराई करणे बाले लोकां दे खिलाफ कम्म करदा है। 13 अगर तुसां हमेशा भले कम्म करणे दी कोशिश करदे न, तां कोई भी असल च तुहाडा नुकसान नी करी सकदा। 14 पर अगर जडा सही है सै करणे दिया बजा ला असां दुख झेलंदे न, तां असल च असां धन्य होणा। इस तांई अगर कोई लोक सांझो डरान, तां डरदे मत कने ना ही पबरानयो, 15 पर मसीह जो अपने मना च प्रभु दे झे च इज्जत दाले। कने अगर कोई तुहांजो ला उस आसा दे बारे च पुच्छे जडी भरोसा करणे बाले होणे दे नाते तुसां सारयां च है, तां हमेशा उसयो समझणे तांई तैयार रिया। 16 कने अपणी अंतरात्मा भी शुद्ध रखा, इस तांई की जिना गल्लां दे बारे च तुहाडी बदनामी होदी है उना दे बारे च सै, जडे मसीह च तुहाडे खरे चाल-चलण दी बेजजती करदे न, शर्मिदा होन। 17 अगर सांझो अपने भले कम्मा दिया बजा ला दुख मिलदा है, तां ए साडे तांई खरा है, अगर परमेस्वरे दी ऐई इच्छा है। ऐ तां बुरे कम्मा दिया बजा ला दुख झेलणे ला साडे तांई खरा है। 18 मै इस तांई बोला दा है क्योकि यीशु मसीह भी साडे पापां दिया बजा ला दुख सेहन किता कने मरी गिया। सै सिर्फ इक ही बरी मरया उसयो दुबारा मरणे दी जरूरत नी है। सै इक धर्मी माणु था जडा पापी माणुआं तांई मरी गिया ताकि सै सांझो परमेस्वरे दे नेडे आणी सके। उना उदे शरीर जो तां मारी दिता पर परमेस्वरे उसयो पबित्र आत्मा दिया शक्तिया ला दुबारा जिन्दा करी दिता। 19 तालू उदिया आत्मा जाई करी उना आत्मा जो शुभसमाचार प्रचार किता जडियां उसा जगा पर केद कितियां न, जिथु मरयां लोकां तांई आत्मा न। 20 ए उना लोकां दियां आत्मा थियां जिना बडे बकत पहले जालू नूह अपना जाज बणा दा था, तालू इना परमेस्वरे दे हुकम जो नी मनया था, तालू परमेस्वर बडे सबर ला इंतजार करा दा था की क्या सै लोक पच्चाताप करगे। पर जालू पाणिऐ संसारे दा नाश करी दिता, तालू सिर्फ अठ लोक बचे जिना जाजे च प्रवेश किता था। 21 पुराणे बकत च उना दा उद्धार हण साडे उद्धार दा इक उदाहरण है जालू असां बपतिस्मा लेंदे न। जिस पाणिऐ च असां बपतिस्मा लेंदे न, सै साडे शरीर ला मेल नी साफ करदा, पर ए इक निशान है की असां परमेस्वरे ला माफी मंगी है ताकि अग्रे जो साडा मन पेशान ना रे। सांझो माफी मिली सकदी है क्योकि यीशु मसीह मौत दे बाद फिरी जिन्दा होया है। 22 कने सै स्वर्ग जो चली गिया। हण सै ओथु पर परमेस्वरे दे सज्जे पासे कने सारयां ला बडिया जगा पर जाई करी बेई गिया, कने सै स्वर्गदूतां कने सारे अधिकारियां कने सारियां शक्तियां पर राज करदा है।

**4** इस तांई जियां मसीह शरीर च रेईकरी दुख सेहन किता, तुहांजो भी उस सांई ही दुख सेहन करणे तांई तैयार रेंणा चाईदा। क्योकि अगर तुसां मसीह तांई

दुख सेहन करने ताई तैयार न, तां तुसां पाप नी करणे दा फेसला करी लिया है। 2 कने इसा बजा ला सै माणु इस संसार च रेईकरी उना बुरे कम्मा जो नी करता है, जिना जो लोक अक्सर करणा चांदे न, पर उनी सेई करणा जडा परमेस्वर चांदा है की सै करे। 3 क्योकि तुसां अपणिया पुराणिया जिन्दगिया च बडा बकत बर्बाद करी दिता जालु तुसां होर जातियां सांई, बुरे कम्मा च, बासना च, खांणे पीणे च, दास्-बाजी च कने असभ्य देवतयां कने उना दियां मुर्तियां दी पूजा करते थे, जिना ला परमेस्वर नफरत करता है। 4 इस ताई तुहाडे पूरणे मित्र हेरान होई जांदे न, जालु तुसां उना सोगी बुरियां चीजां च शामिल नी होई जडे सै करते न। इस ताई सै तुहाडे बारे च बुरा बोलंदे न। 5 पर इक दिन जस्र उना परमेस्वरे दे सामणे न्याय ताई खडे होणा, कने परमेस्वरे उना ला हर इक कम्मे दे बारे च पूछणा जडा उना धरती पर कितया। परमेस्वरे जिन्दे कने मरयो दोनो लोकां दा न्याय करणा। 6 क्योकि ऐई बजा है की मरयो लोकां भी मसीह यीशु दे बारे च शुभसमाचार सुणया। उना दे शरीरां जो सारयां सांई मरणा पिया, पर सै हुण आत्मा च हमेशा परमेस्वरे सोगी रेंदे न। 7 सारियां गल्लां दा अंत जल्दी होणे बाला है, इस ताई धयाने ला सोचा कने अपने आपे जो काबू च रखा कने प्राथना ताई तैयार रिया। 8 सारयां ला जरूरी गल्ले ऐ की, इक दुज्जे ला इमानदारिया ला प्यार करा, क्योकि अगर तुसां लोकां ला प्यार करणे तां तुसां हमेशा कुसी भी बुरे कम्मे जो माफ करणे ताई तैयार रेंणा जडे उना कितयो न। 9 लोकां दा अपने घरे स्वागत करा कने बिना कोई शिकायत कितयो करा। 10 हर इक माणुऐ जो परमेस्वरे दिया तरफा ला बरदान मिलया है, उसयो उस बरदाने दा इस्तेमाल दुज्जयां दी सहायता करणे ताई करणा चाईदा। उना जो परमेस्वरे दे अच्छे सेबकां दे स्पे च अपने बरदाना दा इस्तेमाल करणा चाईदा जडे परमेस्वरे उना जो अनुग्रह ला दितयो न। 11 अगर तुहाडे बाल प्रचार करणे दा बरदान है, तां तुहांजो परमेस्वरे दे बचना दा प्रचार करणा चाईदा, अगर तुहाडे बाल दुज्जे लोकां दी सहायता करणे दा बरदान है, तां सै इस कम्मे जो उस शक्तिया ला करन जडी परमेस्वर तुहांजो दिन्दा है। तां फिरी जडा कुछ भी तुसां करणा उसला यीशु मसीह दे जरिये परमेस्वरे जो महिमा मिलणी। सारी महिमा कने शक्ति यूना-यूना दीकर उदी है। आमीन। (aiōn g165) 12 हे प्यारे मसीह भाईयो, उना दुख देंणे बालियां चीजां दे बारे च हेरान मत होआ जिना दियां बजा ला तुहांजो दुख झेलणा पोआ दा है क्योकि तुसां मसीह दे चले न। पर ऐ चीजां ऐ दसणे ताई होआ दियां न की क्या तुसां सच्ची परमेस्वरे पर भरोसा करते न। इस ताई ऐ मत सोचा की तुहाडे सोगी कुछ अजीब घटना होआ दियां न। 13 बस ऐ सोची करी खुश रिया, क्योकि तुहांजो उना दुखां चे इक हिस्सा मिलया है, जडे मसीह जो मिलयो थे। इसा बजा ला जालु मसीहे सारयां लोकां जो अपणी महिमा दसणे ताई दुबारा मुडी करी ओणा है तां तुहांजो होर जादा खुशी होणी है। 14 फिरी अगर मसीह दे नाऐ दिया बजा ला तुहाडी बुराई होंदी है, तां तुसां धन्य न, क्योकि परमेस्वरे दी महिमा बाली आत्मा तुहांजो च बास करदी है। 15 तुहाडे चे कोई भी माणु चोरी, खून करणे ला या बुरे कम्म करणे ला, या दुज्जयां दे कम्मे च हथ पाणे दिया बजा ला दुख न झेले। 16 पर अगर मसीही होणे दिया बजा दुख झेलणा पोऐ, तां तुसां इसयो शर्मिंदगी दी गल्ल मत समझदे, पर इसा गल्लां ताई परमेस्वरे दी महिमा करा की तुसां इस ताई दुख सेहन करा दे न क्योकि तुसां यीशु मसीह दे चले न। 17 क्योकि न्याय करणे दा बकत आई गिया है, परमेस्वरे पेहले असां भरोसा करणे बालयां दा न्याय करणा है, इस ताई उना भयानक चीजां दे बारे च सोचा जडियां उना लोकां सोगी होणियां न जडे परमेस्वरे दे दितयो शुभसमाचारे जो नी मंदे। 18 जियां की पबित्र शास्त्र च लिखया है, “अगर इक भले माणुऐ दा बचाया जाणा इतणा मुशकिल है, तां बुरे लोकां दा कने पापियां दा क्या होणा जडे परमेस्वरे दे शुभसमाचारे पर भरोसा नी करदे?” 19 इस ताई जडे लोक परमेस्वरे दिया इच्छा दे अनुसार दुख झेलंदे न, उना जो परमेस्वरे पर भरोसा करते रेंणा चाईदा, जिनी उना जो बणया है। परमेस्वर हमेशा सै करता है जडा उनी करणे दा बायदा कितया था कने इस ताई जडा खरा है सै करंदे रेंणा चाईदा।

**5** कुछ एसियां गल्लां न जडियां में ओथु दे कलीसिया दे अगुवां ला बोलणा चांदा है क्योकि मैं भी तुहाडे सांई इक अगुवा है। मैं खुद उना दुखां जो दिखया है जडे बडे पेहले यीशु मसीहे सेहन किते। जालु उनी दुबारा मुडी करी

ओणा है, तां मैं उदिया महिमा च हिस्सेदार बणना है। हुण मैं तुहांजो ला बिनती करता है, 2 जियां इक पुहाल अपणियां भेडा दी रखबाली करता है, तियां ही तुहांजो भी हर इकी जणे दी देखभाल करणी चाईदी जिसयो परमेस्वरे तुहाडिया देखभाला च दितया है। इस कम्मे जो अपणिया इच्छा ला करा, ना की कुसी मजबूरिया दिया बजा ला क्योकि परमेस्वर ऐई चांदा है की तुसां ऐसा करन। ऐ कम्म इस ताई मत करा की तुसां पैसा कमाणे चांदे न, पर परमेस्वरे कने लोकां दी सेवा करणे दी इच्छा ला करा। 3 उना लोकां दे उपर इक शासक सांई हुकम मत दिया जिना ताई तुसां जिम्मेदार न, पर उना ताई इक अच्छा उदाहरण बणा। 4 जालु यीशु मसीह, जडा साडा प्रधान पुहाल है, उनी मुडी करी ओणा है, तालु तुहांजो इक सुंदर मुकूट मिलणा है जिदी चमक कदी नी घटणी। 5 इयां ही तुसां जवान लोकां जो बुड्ढे मदी दे हुकम मणणा चाईदे। तुसां सारयां जो प्यारभाव ला इक दुज्जे दी सेवा करणी चाईदी, क्योकि पबित्र शास्त्र च लिखया है की, “परमेस्वर घमण्डियां दा बिरोध करता है, पर नम्र लोकां ताई भला है।” 6 इस ताई अपने आपे जो परमेस्वरे सामणे नम्र बणा जडा सारयां ला शक्तिशाली है, ताकि सै सही बकत ओणे पर तुहांजो बडी जादा इज्जत दे। 7 परमेस्वरे जो अपणी सारी चिंता कने परेशानिया दस्सा क्योकि सै तुहाडी परवाह करता है। 8 ध्यान रखा, कने जागदे रिया, क्योकि शैतान तुहाडा दुशमण तुहांजो पर हमला करणा चांदा है, ताकि तुसां परमेस्वरे दे हुकमा जो नी मनन। सै धाहडने बाले शेरें सांई फिरदा कने दिखदा रेंदा है की कुसयो खाई सके। 9 तुहांजो अपने पक्के भरोसे सोगी शैताने दा बिरोध करणा चाईदा। याद रखा की तुहाडे मसीह भाई-बेहण जडे पुरे संसार च रे दे न, ऐदे ही दुखां जो सेहन करा दे न जियां तुसां सेहन करा दे न। 10 परमेस्वरे जडा अनुग्रह ला पूरा भस्या है, उनी साडे मसीह सोगी रिशते दिया बजा ला स्वर्ग च उदी हमेशा दी महिमा च हिस्सेदार होणे ताई चुणया है। तुहांजो थोडे बकते दीकर दुख झेलणे बाद परमेस्वरे तुहांजो अच्छा बणाई देणा ताकि तुहांजो च फिरी कोई दोष ना रे ताकि तुहाडा भरोसा मजबूत हो कने डगमगाणे बाला ना हो। (aiōnios g166) 11 उनी हमेशा ताई शक्तिशाली स्पे ला शाशन करणा। आमीन। (aiōn g165) 12 मैं ऐ छोटी देई चिट्ठी सिलवानुस दिया सहायता ला लिखियो है कने तुहांजो भेजी है। जिसयो मैं मसीह च भरोसे दे काबील भाई मंदा है। मेरा इसा चिठिया जो लिखणे दा मकसद तुहांजो उत्साहित करणा है कने तुहांजो भरोसा दिलाणा है की जडा कुछ भी तुसां सिखा दे न सै असल च तुहाडे ताई परमेस्वरे दे अनुग्रह दा हिस्सा है। इस अनुग्रह च टिकी रिया। 13 जडे बाबेल शेहरे दे यीशु पर भरोसा करणे बाले लोक तुहांजो नमस्कार करते न, जिना जो परमेस्वरे चुणया है, जियां उनी तुहांजो चुणया था। मरकुस जडा मेरे ताई इक पुत्रे सांई है, सै भी तुहांजो नमस्कार करता है। 14 इक दुज्जे जो गले लाईकरी नमस्कार करा। मैं प्राथना करता है परमेस्वर तुसां सारयां जो शांति दे जडे प्रभु यीशु मसीह सोगी रिशता रखदे न।

## 2 पतरस

**1** मैं, शमौन पतरस, जडा यीशु मसीह दा सेबक कने प्रेरित ह। मैं तुसां सारयां ताई ऐ चिड़ी लिखा दा है जडे सांझो साईं उसी कीमती भरोसे जो साझा करदे न, जडा भरोसा सांझो साडे परमेश्वर कने उद्धारकर्ता यीशु मसीह जरिये मिलया है, जडा सांझो परमेश्वर दिया नजरा च सही बणादां है। **2** मैं प्राथना करता ह कि परमेश्वर तूहांजो जादा ला जादा अनुग्रह कने शांति दे जियां-जियां तूसां परमेश्वर कने साडे प्रभु यीशु मसीह दे ज्ञान च बढे जाण। **3** परमेश्वरे अपनी शक्तिया ला सांझो से सब दितया है, जडा सांझो इक ऐसी जिन्दगी जिणे ताई चाईदा जडी परमेश्वरे जो खुश करदी है। ऐ इस ताई होया क्योकि असां परमेश्वरे जो जाणदे न कने से सेई है जिनी अपनी अच्छाई कने महिमा दिया बजा ला सांझो अपने लोक होंगे ताई सदया है। **4** कने उदिया महिमा कने अच्छाईया दिया बजा ला, उसी सांझो बडे महान कने कीमती बायदे दितयो न। ताकि इना बरदाना दा इस्तेमाल करिरी असां इस संसारे च जडियां बुरियां इच्छा न उना ला बची सकन कने परमेश्वरे दे सभावे च साझी बणी सकन। **5** क्योकि तूसां परमेश्वरे दे सभावे च साझी होंगे ताई न इस ताई तूहांजो सिर्फ मसीह पर भरोसा ही नी करणा चाईदा, बल्कि तूहांजो हमेशा सेई करणे दी कोशिश करणी चाईदी जडा दुज्जयां ताई खरा है। तूहांजो ना सिर्फ से करणा चाईदा जडा खरा है, बल्कि तूहांजो ऐसे लोक बणना चाईदा जडे समझदारिया ला व्यवहार करणा जाणदे न। **6** तूहांजो ना सिर्फ ऐ जाणना चाईदा की समझदारिया ला कियां व्यवहार करणा है, बल्कि तूहांजो अपने आपे जो भी काबू करणा चाईदा। तूहांजो ना सिर्फ अपने पर काबू रखणा चाईदा, बल्कि तूहांजो मुसीबतां च सबर भी रखणा चाईदा। ना सिर्फ तूहांजो सबर रखणा चाईदा, बल्कि तूहांजो ऐसे तरीके ला जीणा चाईदा जडा परमेश्वरे जो खुश करदा है। **7** ना सिर्फ तूहांजो इस तरीके ला जिणा चाईदा जडा परमेश्वरे जो खुश करदा है, बल्कि तूहांजो इक दुज्जे मसीह भाई बहणा जो अपने खुद दे परिवारे साईं प्यार करणा चाईदा। ना सिर्फ तूहांजो इक दुज्जे सोगी अपने परिवारे साईं प्यार करणा चाईदा, बल्कि तूहांजो सारे लोकान सोगी प्यार भी करणा चाईदा। **8** क्योकि अगर ऐ सारियां गल्लां तूसां च हेन कने बदा दियां न, तां इना साडे प्रभु यीशु मसीह दा होर जादा ज्ञान लेणे च तूहांजो बेकार कने असफल नी होणा देणी। **9** पर जिदे च ऐ गणु नी है, से उस माणुऐ साईं जिदी नजर इतणी कमजोर है की सै दिखी नी सकदा कने भूली गिया है की परमेश्वरे उसयो उदे पुराणे पापां ला पबित्र करणी दितया है। **10** इस बजा ला है मसीह भाईयो, अपने आपे जो कने होर लोकान जो ऐ दसणे ताई होर भी अच्छा व्यवहार करणे दी कोशिश करा की परमेश्वरे सच्ची चुनया है कने तूहांजो अपने लोक होंगे ताई सदया है। अगर तूसां ऐसा करणे तां पक्का ही तूसां कदी भी परमेश्वरे ला लग नी होणा। **11** कने परमेश्वरे तुहाडा उस राज्य च बडे आदर सोगी स्वागत करणा, जिथु साडा प्रभु कने उद्धारकर्ता यीशु मसीह हमेशा ताईं राज करणा। (aiónios g166) **12** मैं तूहांजो इना गल्लां दे बारे च बार-बार याद दिलाणा चांदा है, हालाकि तूसां पहले ला ही इना गल्लां जो जाणदे न कने पूरा भरोसा करदे न की सै सच्चियां न। **13** साडे प्रभु यीशु मसीह मिंजो साफ-साफ दर्सी दितया है की मैं जल्दी ही मरी जाणा है। इस ताई मिंजो लगदा है की मेरे ताई ऐई खरा है की जालु दीकर मैं जिन्दा है तालु दीकर मैं तूहांजो याद दिलांदा रे। **15** इस ताई मैं तूहांजो ऐ गल्लां दसणे ताई इतणी मेहनत करा दा है, ताकि मेरिया मौता ला बाद तूसां हर बकत इना गल्लां जो याद रखन। **16** जालु असां प्रेरितां तूहांजो साडे प्रभु यीशु मसीह दी शक्ति कने मुडी ओणे दे बारे च संदेश दितदा, तां असां तूहांजो कोई चलाकिया ला मन घडन्त कहाणियां नी सुणाईयां न, बल्कि असां उदिया महिमा जो अपनी हखी ला दिखया है। **17** असां उदे सोगी उस पबित्र पाडे पर थे, जालु पिता परमेश्वरे उसयो महिमा कने इज्जत दिती थी। उस बकत परमेश्वरे दिया तरफा ला यानी की महिमा ला उस ताई अबाज आई, ‘‘ऐ मेरा अपना प्यारा पुत्र है, जिसला मैं खुश है!’’ असां खुद स्वर्ग ला ओदी अबाज जो सुणया। **19** कने असां जाणदे न की मसीह दे बारे च परमेश्वरे दे संदेश देणेबालयां जडे बचन लिखयो थे, सै सच्चे न, कने जडा असां तूहांजो यीशु मसीह दे दुबारा मुडी ओणे दे बारे च सिखाया था, सै इसा गल्ला जो सच्च साबित करदे न। तूहांजो उना बचना जो ध्याने ला सुणना चाईदा, क्योकि जियां नेहे च इक

चमकदा दितया लोकान जो सही रस्ता दसणे च सहायता करदा है, तियां ही इना बचना तूहांजो ऐ जाणने ताई सहायता करणी की सच्च क्या है। प्रभु यीशु मसीह दे दुबारा मुडी करी ओणे दीकर तूहांजो उना बचना जो ध्याने ला सुणना चाईदा, उदा मुडी करी ओणा नोऐ दिने दिया भयागा सांई रौशनी लोंणा है, कने से भयागा दे तारे सांई होणा। उस बकत उदी लौ तुहाडे दिलां च चमकणी कने तुहाडे सामणे परमेश्वरे जो साफ-साफ प्रगट करणा। **20** पर ऐ बडा जरूरी है की तूसां इसा गल्ला जो समझन की परमेश्वरे दा संदेश देणेबालयां दे बचन जडे तूसां पबित्र शाश्व च पढे न, सै सिर्फ उना दे अपने बिचार नी न। **21** क्योकि पबित्र शाश्व च दीतियो कोई भी भविष्यवाणी कदी भी माणुऐ दिया मरजिया ला नी हौदी है। पर पबित्र आत्मा उना दे मना च पांदा है, जालु उना परमेश्वरे दिया तरफा ला आयो संदेशो जो बोलया।

**2** जियां बडे बकत पेहले, ऐथु इस्त्राएली लोकान बिच झूठा संदेश देणेबाले गुफु थे, तियां ही तुहाडे बिच भी झूठी शिक्षां दे झूठे गुफु होंगे। सै झूठी शिक्षां जो चुपके ला फेलाई दिन्ने न, कने जडियां लोकान जो मसीह पर भरोसा करणे ला रोकदियां न। इना झूठे गुफुआं मसीह जो अपना मालिक मणणे ला मना करी देणा जडा उना दा मालिक है कने जिनी उना जो पाप दिया शक्तिया ला अजाद कितया है। ऐसा करिरी उना अचानक अपने आप दा नाश करवाई लेणा है। **2** परमेश्वरे दे मतयां लोकान इना गुफुआं दे बुरे कम्मा दी नकल करणी है, कने जडा कुछ भी सै करदे न उदिया बजा ला लोकान परमेश्वरे पासे जाणे बाले रस्ते दे बारे च बुरियां-बुरियां गल्लां करणियां। **3** ऐ गुफु लालची होंगे, कने उना बणिण्यां-बणाईयां कहाणियां सुणाई करी तूहांजो धोखा देणा ताकि तूहांजो ला पैसा कमाई सकन। परमेश्वरे बडे पेहले ही फेसला करी लिया था की सै उना जो सजा दे कने से ऐसा करणे ताई तैयार है। उनी पक्का ही उना दा नाश करी देणा। **4** तूसां जाणदे न की बडे बकत पेहले जालु कुछ शैताने दे दूतां परमेश्वरे दे हुक्मा जो नी मनया था, तां परमेश्वरे उना स्वर्गदूतां जो सजा दिती। उनी उना जो नरक च फेकी दिता, कने उना जो नेहे च केद करिरी उस दिने दीकर रख्या है जालु उनी उना दा न्याय करणा कने सजा देणी है। (Tartaroō g5020) **5** तूसां ऐ भी जाणदे न की जालु बडे बकत पेहले रेणे बालयां लोकान परमेश्वरे दा डर नी मनया तां उनी उना दे बुरे कम्मा जो नजरअंदाज नी किता जडे सै करा दे थे। बल्कि उनी पुरिया धरतिया पर पांणी भरी करी ऐसी सजा दिती की सै सारे डूबी करी मरी गे। पर परमेश्वरे नूह समेत अटां लोकान जो बचाई लिया, जिना परमेश्वरे सोगी सही रेणे दे बारे च बिचार किता। **6** परमेश्वरे सदोम कने अमोरा शेहरान जो सजा दिती, कने उना जो ऐसा भस्म करी दिता की सै फुकुई करी राख बणी गे। परमेश्वरे इना लोकान जो सजा देईकरी चेताबनी दिती की जडे लोक परमेश्वरे दे हुक्मा जो नी मंदे न उना सोगी क्या होंणा है। **7** पर इसला पेहले की परमेश्वर सदोम कने अमोरा शेहेर दा नाश करदा, उनी लूत जो ओथु ला निकाली दिता कने बचाई लिया, सै इक धर्मी माणु था। लूत बडा दुखी था क्योकि सदोम शेहेर दे लोक कुसी भी नियम जो नी मंदे थे कने बडे ही शर्मशार कम्म करदे थे। **8** सै उना बुरे लोकान बिच रेंदा था, कने सै हर रोज उना बुरे कम्मा जो दिखदा था जडे सै करदे थे कने उना दियां बुरियां गल्लां जो सुणदा था, कने सै इना सारियां गल्लां ला बडा दुखी था, क्योकि सै इक धर्मी माणु था। **9** ऐ सारे कम्म जडे परमेश्वरे अतीत च किते, सै सांझो ऐ दसणे ताई न की जडे लोक परमेश्वरे जो खुश करणे बाली जिन्दगी जिन्ने न, जालु सै मुसीबता च हौदे न तां परमेश्वर उना दी पक्का बखाल करा करदा। कने असां ऐ भी यकीन करी सकदे न की परमेश्वरे उस दिने दीकर लगातार अधर्मियां जो सजा दिन्ने रेणा जालु दीकर सै सारे लोकान दा न्याय नी करदा। **10** परमेश्वरे उना झूठे गुफुआं जो पक्का ही सजा देणी है जडे अपनी बुरियां इच्छा दे मुताबिक कम्म करदे न, कने अपने उपर परमेश्वरे दे अधिकारे जो नी मंदे न। सै हीट कने घमण्डी न। सै महिमायय स्वर्गो दे प्राणियां दे बारे च बुरा भला बोलणे ला नी डरदे न। **11** पर स्वर्गदूत जडे इना झूठे गुफुआं ला जादा शक्तिशाली न, सै भी उना दी बेइज्जती नी करदे जालु सै परमेश्वरे सामणे उना पर दोष लांदा न। **12** पर ऐ झूठे गुफु जंगली जानवरान सांई कम्म करदे न, जडे सेई करदे न जदिया उना दा शरीर चांदा है कने जडे इस ताई पैदा हौदे न की लोक उना जो फसाई करी मारी सकन। ऐ झूठे गुफु उना चीजां दी बेईजती करदे न, जिना दे बारे च सै असल च कुछ नी जाणदे। परमेश्वरे उना जो

तियां ही नाश करी देणा जियां लोक जानवरं जो मारदे न। 13 उना दा विनाश उस नुस्सान दा फल है जडा उना कितया है। उना जो दिन दोपहरी अनेतिक खांणा-पिणा पसंद है। सै तुहाडे बिच इक कलंक कने धब्बे न। सै धोखा देणे च खुशी मदे न, कने सै तुहाडे ताई धामा च तुहाडे सोगी खांदे पिंदे न। 14 सै हर इक जनानिया सोगी व्यभिचार करणा चांदे न, जिसा जो भी दिखदे न। सै पाप करणे दे मौके तोपदे रेंदे न। सै उना लोकां जो धोखा दिन्दे न जिना दा मसीह पर भरोसा कमजोर होंदा है, कने सै उना जो पाप पासे लेई जांदे न। कने उना दे होर जादा-जादा चीजां पाणे दे हमेशा बद्दे लालचे दिया बजा ला ही परमेश्वरे उना जो सजा देंगी। 15 उना सही कम्म करणा बंद करी दितया है, कने उना सियुदा ही कम्म करणा शुरू करी दितया है, जदिया बअोर दे पुत्र बिलामे बडे पेहले कितया था। उनी गलत कम्म करिरी पैसा कमाणे पसंद कित। 16 पर परमेश्वरे बिलामे जो उदे बुरे कम्मा ताई उदिया गदिया दे जरिये फटकार लाई। भले ही गधे बोलंदे नी न, पर उना गदिया बिलामे ला इन्साना सांई गल्ल किती, जालू बिलाम राजे जो मिलणे तांई गदिया जो लंदी करी लेई चलया था कने परमेश्वरे उना स बकत बिलामे जो बेमकूफिया बाला कम्म करणे ला रोकी दित। 17 ऐ झूठे गुरु उना पाणिणे दे झनक्या सांई बेकार न, जडे सुकी गियो न। सै उना बदला सांई बेकार न, जिना जो बरखा होणे ला पेहले तेज होआ उडाई करी लेई जांदी है। परमेश्वरे उना तांई इक ऐसी जगा तैयार कितियो है जिथू सिर्फ काला नेहरा ही है। 18 जालू सै लोकां जो शिक्षा दिन्दे न, तां सै बेकार कने घमंडी गल्लां दा इस्तेमाल करदे न। सै लोकां जो दसदे न की सै उना शर्मनाक कम्मा जो करी सकदे जडा उना दा शरीर करणा चांदा है, कने सै उना लोकां जो दुबारा पाप करणे तांई भटकाई दिन्दे न, जिना थोडे बकत पेहले ही यीशु मसीह पर भरोसा कित। 19 झूठे गुरु लोकां जो दसदे न की सै जडा कुछ भी करणा चांदे न, सै करणे तांई उना जो अजादी है, हालांकि सै खुद गुलाम न क्योंकि उना दा अपना पापी सभाव उना जो बुरे कम्म करणे तांई मजबूर करदा है। क्योंकि जडा कुछ भी तुहांजो काबू करदा है, तुसां उदे गुलाम बन जांदे न। 20 लोक संसारे दिया बुराईयां ला बची गे जालू उना प्रभु यीशु मसीह जो उद्धारकर्ता मन्नी लिया, पर हुण फिरी दुबारा उना बुरे कम्मा च फसी गियो न, कने सै बुरे कम्म सान्झो काबू करदे न, इस तांई हुण यीशु मसीह जो छडणे बाद उना दी हालत पेहले ला भी बुरी होई गियो है, जालू उना भरोसा नी कितया था। 21 मेरा ऐ मतलब है, क्योंकि परमेश्वरे उना लोकां जो होर भी जादा सकत सजा देंगी जडे प्रभु यीशु मसीह जो छडी दिन्दे न, बजाए उना दे जिना कदी प्रभु यीशु मसीह जो अपनाया ही नी। उना तांई ऐई खरा होणा था की सै कदी ऐ जाणदे नी की जिन्दगी जो धर्मी तरीके ला जिणे दा क्या मतलब होंदा है। हुण सै जाणदे न की सही क्या है पर उना परमेश्वरे दे हुकमा मणगा बंद करी दितया है जडे असां प्रेरितां सिखायो थे। 22 उना सोगी जडा होंदा है सै दसदा है की ऐ कहाबतां सच्चियां न; सै कुतयां सांई न जडा अपणिया उलटिया जो चटणे तांई बापस ओंदा है, कने सै सुअरां सांई न जिसयो धोया जांदा है कने सै दुबारा चिकडे च लोटणे तांई चली जांदा है।

**3** हे प्यारे मसीह भाईयो, हुण मैं तुहांजो ऐ दुज्जी चिट्ठी लिखदा है, मैं तुहांजो ऐ दोनो चिटियां इस तांई लिखियां न, ताकि जडिया गल्लां तुसां पेहले ला ही जाणदे न, उना दे बारे च तुहांजो याद दिलाई करी तुहाडे मना च साफ बिचार पैदा करी सकें। 2 मैं ऐसा इस तांई करा दा है क्योंकि मैं चांदा है की तुसां उना बचना जो याद रखा, जडे परमेश्वरे दे संदेश देणेबालयां बडे पेहले बोलयो थे, कने साडे उद्धारकर्ता, साडे प्रभु यीशु मसीह दियां शिक्षां जो याद रखा जडियां तुहांजो उना प्रेरितां सिखाईयां थियां जडे तुहाडे बाल आये थे। 3 सारयां ला जस्री गल्ल ऐ है जडी तुहांजो पता होणा चाईदी की मसीह दे दुबारा मुडी ओणे ला पेहले आखरी दिना च ऐसे लोक होणे न जिना तुहाडिया इसा गल्ला दा मजाक उडाणा की मसीहे दुबारा मुडी करी ओणा है। उना अपणिया बुरियां आदतां ला मजबूर होईकरी बुरे कम्म करणे जिना ला उना जो खुशी मिलदी है। 4 कने उना बोलणा, “उदे ओणे दा बायदा सचच नी है! उनी कदी नी ओणा है, क्योंकि सारयां ला पेहले साडे अगुवे थे, सै सारे मरी गियो न, पर फिरी भी कुछ नी बदलया है। सारियां चीजां तियां ही होंदिया आईयां न जालू ला परमेश्वरे इस संसारे जो बणाया है।” 5 सै जाणी बूझी करी इसा गल्ला जो नजरअंदाज करदे न की संसारे

दिया शुरूआत च, परमेश्वरे बोलया कने अम्बर बणी गिया। अपने बचने ला उनी धरतिया जो पाणिया ला लग कित, कने पाणिणे ला सुकी जमिना जो बाहर लेई आया। 6 इस पाणिणे ला ही उनी उस संसारे जो खत्म करी दिता जडा उस बकत था। उनी इक भारी बरखा किती कने सारिया धरतिया पर बाढ आई गई कने सारे जिन्दे प्राणी डुबी करी मरी गे। 7 जियां परमेश्वरे धरती कने अम्बरे जो बणाणे दा हुकम दिता था, तियां ही उनी इस हुणे दे युगे जो तालू दीकर बणी रेणे दा हुकम दिता जालू दीकर उसयो अग्गी च ना फुकी दे। परमेश्वर उना जो उस रोजे दीकर रखा दा है जालू उनी सारे लोकां दा न्याय करणा कने उना लोकां दा नाश करणा जडे उदी इज्जत नी करदे। 8 हे मेरे प्यारे मसीह भाईयो, तुसां इसा इकी गल्ला जो कदी मत भुला की परमेश्वरे तांई इक दिन हजार सालां सांई है कने हजार साल इक दिन सांई है। उदे तांई इक दिन कने इक हजार साल सब इक बराबर है। 9 कुछ लोक सोचा दे न की प्रभु बापस मुडी ओणे दे बायदे जो पूरा करणे च देरी करा दा है पर प्रभु देरी नी करा दा है बल्कि सै तुहाडे सोगी सबर रखा दा है। क्योंकि सै कुसी जो भी नाश नी करणा चांदा है। परमेश्वर चांदा है की हर कोई अपने मने जो फिराए कने गलत करणा जो करणा बंद करी दे कने उदे बाल आई जा। 10 पर प्रभुऐ पक्का ही बापस ओणा है। कने उनी अचानक ही मुडी करी ओणा है जियां कोई चोर अचानक आई जांदा है। उस दिने अम्बरे च बडे गडाकयां दा शोर होणा है। कने अम्बरे लोप होई जाणा। अम्बरे च सारा कुछ मतलब की सूरज, चाँद, तारे सब कुछ अग्गी च खत्म होई जाणा। उस दिन परमेश्वरे उना सारे कम्मा जो प्रगट करी देणा है जडे लोकां कितयो न, ताकि उना दा न्याय होई सके। 11 परमेश्वरे पक्का ही इना सारियां चीजां दा नाश करी देणा है, जियां मैं हुण बोलया है, इस तांई तुहांजो पबित्र चाल चलन कने भक्ति च जिन्दगी जिणा चाईदी जडी परमेश्वरे जो खुश करे। 12 जियां की तुसां उस दिने दा इंतजार करा दे न जालू परमेश्वरे संसारे दे लोकां दा न्याय करणे तांई ओणा है, तां उस दिने दे जल्दी ओणे तांई अपनी तरफ ला पूरी कोशिश करा। उस दिन अग्गी भडकी पोणा है कने अम्बरे जो भस्म करी देणा है, उसा गमियां ला अम्बरे दा सब कुछ पिघली जाणा। 13 पर असां उम्मीद करा दे न की परमेश्वरे इक नोआ अम्बर कने नोई धरती बणाणी जिदा उनी बायदा कितया था। ओथू सिर्फ धर्मी लोक ही रेंदे न। 14 इस तांई हे प्यारे मसीह भाईयो, जालू तुसां इना गल्लां दा होणे दा इंतजार करा दे न, इस तांई तुहांजो ऐसी जिन्दगी जिणे दी हर इक कोशिश करणा चाईदी जडी पबित्र कने परमेश्वरे जो खुश करदी हो कने इक दुज्जे सोगी शांतिया सोगी रिया। 15 साडे प्रभु दे सबर जो इक ऐसा मौका समझा, जडा सै तुहांजो ओणे बाले न्याय ला बचणे तांई दे दा है। ऐ सब कुछ साडे प्यारे मसीह भाई पौलसे भी परमेश्वरे दे दितयो ज्ञाने ला इक चिटिया च लिखया है, जडा मैं तुहांजो दसया है। 16 उनी अपणियां सारियां चिटियां च, जडियां उनी यीशु मसीह पर भरोसा करणे बालयां जो लिखियां न, उना च एसियां ही गल्लां करदा है जदियां तुहांजो लिखियां न। पर कुछ गल्लां जडियां सै लिखदा है, उना जो समझणा मुशकिल है। जिना लोकां खरी शिक्षा नी लियो है कने जिना दा मसीह पर भरोसा कमजोर होंदा है, सै इना मुशकिल गल्लां दा मतलब गलत समझांदे न, तियां ही जियां सै पबित्र शाश्व दे कुछ हिस्सयां जो गलत तरीके ला दसदे न। इयां करिरी ला खुद ही अपना नाश करी लेंदे न। 17 इस तांई हे मसीह भाईयो, तुसां पेहले ला ही जाणदे न की ऐ गल्लां होणियां न। इस तांई इसा गल्ला दा ध्यान रखा की जडे लोक नियमा जो नी मदे सै तुहांजो झूठ बोली करी भटकाई ना दें। अगर तुसां सचचाई पर भरोसा करणा बंद करी दिगे जिस पर तुसां इक बकत पर बडा जांदा भरोसा था। 18 पर तुसां साडे प्रभु, कने उद्धारकर्ता यीशु मसीह दे अनुग्रह जो होर जादा ला जादा अनुभव करणा चाईदा, कने ऐ की तुसां होर अच्छे तरीके ला जाणी सकन। उदी महिमा हुण कने हमेशा होंदी रे। आमीन। (aiōn g165)

# 1 यूहन्ना

**1** असां तूहांजो इक माणुए दे बारे च लिखा दे न जडा जीवन दा बचन है, कने सै शुरुआत ला ही था, जिसयो असां सुणया, जिसयो असां ध्याने न अपणी हखी ने दिखया कने हथां ने छुता। **2** ऐ माणु जडा जिन्दगी दिदा है सै धरती पर आया है, कने असां उसयो दिखया, कने उदी गबाई दिन्दे न, कने तूहांजो हमेशा दी जिन्दगी दे बारे च दसदे न, जिसयो पिता परमेश्वरे सांझो दसया। (aiōnios g166) **3** जडा कुछ असां यीशुए मसीह दे बारे च दिखया कने सुणया है, उदी गबाई तूहांजो भी दिन्दे न, इस ताई की तूहाडी संगती साडे सोगी हो: कने साडी ऐ संगती पिता परमेश्वर सोगी, कने उदे पुत्र यीशु मसीह सोगी है। **4** कने ऐ गल्लां असां इस ताई लिखदे न, की तूहाडी खुशी पूरी होई जा। **5** जडा शुभसमाचार असां यीशुए ला सुणया है, सै ऐ है, की परमेश्वर अच्छा है कने ज्योति सांई पबित्र है कने उदे च कोई भी बुराई नी है। **6** अगर असां बोलन, की परमेश्वरे सोगी साडी हिस्तेदारी है, कने असां फिरी भी बुराई करदे रेंदे न, तां असां झूठ बोलदे न कने सच्चाई ने नी जिन्दे न। **7** तुसां सै ही करा जडा सही है जियां परमेश्वर सिद्ध स्पे च सही है, तियां ही असां भी लौई च जी न, तां परमेश्वरे कने इक दुज्जे ने हिस्तेदारी रखदे न, कने उदे पुत्र यीशु मसीह दा खून सांझो साडे सारयां पापां ला शुद्ध करता है। **8** अगर असां बोलन की असां कोई पाप नी किता, तां असां अपने आपे जो धोखा दिन्दे न, कने जडी सच्चाई परमेश्वर बोलदा है इस पर भरोसा नी करदे। **9** अगर असां परमेश्वरे सामणे अपने पापां जो मन्नी लेन, तां सै साडे पापां जो माफ करणे कने सांझो सारे अधर्म ला शुद्ध करणे च भरोसे दे काबील कने धर्मी है। **10** अगर असां बोलन की असां पाप नी किता, तां असां परमेश्वरे जो झूठा बणादे न, कने असां परमेश्वर दे बचन जो नी समझदे न कने सै जडा बोलदा है उदा पालन नी करदे।

**2** हे मेरे बच्चो, मै ऐ गल्लां तूहांजो इस ताई लिखा दा है, की तुसां पाप ना करन; कने अगर कोई पाप करे तां पिता परमेश्वर बाल साडा इक सहायक है सै यीशु मसीह है कने सांझो माफ करणे तांई पिता परमेश्वरे ला प्रार्थना करता है कने सै धर्मी है। **2** कने उनी ही साडे पापां दी माफी तांई अपना बलिदान दिता: कने सिर्फ साडे ही नी पर संसारे दे सारे लोकां दे पापां तांई भी। **3** अगर असां परमेश्वरे दे हुकमा जो मन्नी लेगे, उसला ही सांझो पता चलणा की असां उसयो जाणदे न। **4** जडा कोई ऐ बोलदा है, मै परमेश्वरे जो जाणी गया है, पर उदे हुकमा जो नी मनदा, सै झूठा है; कने परमेश्वरे दे सच्च दे अनुसार जिन्दगी नी जिन्दा है। **5** पर जडा कोई परमेश्वरे दे बचना जो मनदा है, उदे च सच्ची परमेश्वरे दा प्यार सिद्ध होया है, सांझो इसी ने ही पता चलदा है, की असां उदे सोगी बणी रेंदे न। **6** जडा कोई ऐ बोलदा है की असां यीशु मसीह च टिकयो न, तां सै यीशु मसीह सांई ही चाल चलन रखन। **7** हे प्यारो, मै तूहांजो कोई नोआ हुकम नी लिखदा, पर सेई पुराणा हुकम जडा शुरू ला तूहांजो मिलया है; ऐ पुराणा हुकम सै बचन है, जिसयो तुसां तालु सुणया जालु यीशु मसीह पर भरोसा किता। **8** फिर भी जडा हुकम मै तूहांजो लिखदा है, सै नोआ हुकम है, कने इदी सच्चाई यीशु मसीह च कने तुसां च भी मिलदी है; क्योंकि हुण बुराई खत्म होंदी जा दी है कने सच्चाई कने पबित्रता बदा दी है। **9** जडा कोई ऐ बोलदा है, की मै अच्छाई कने भलाई ने जी दा है; पर अपने मसीह भाइयां ने बैर रखदा है, सै हल्ले दीकर भी बुराई च ही है। **10** जडा कोई अपने मसीह भाइरे ने प्यार रखदा है, सै भलाई ने जिन्दगी जिंदा है, कने उदे अंदर ऐसा कुछ नी है जडा कुसी दे पाप करणे दी बजा बणे। **11** पर जडा कोई अपने मसीह भाइरे ने बैर रखदा है, सै बुराई च जी दा है कने बुराई च चलया है, कने नी जाणदा है की कुशु चलया है क्योंकि बुराईया उदियां हखी अनिया करी दितियां न। **12** हे बच्चो, मै तूहांजो इस तांई लिखा दा है, की यीशु मसीह दे नापे ने तूहाडे पाप माफ होऐ न। **13** हे पिताओ, मै तूहांजो इस तांई लिखा दा है, क्योंकि तुसां मसीह जो जाणदे न, जडा शुरू ला है। हे जवानो, मै तूहांजो इस तांई लिखा दा है, की तुसां उस शैताने पर जित हासिल किती है: हे बचयां, मै तूहांजो इस तांई लिखया है, की तुसां पिता परमेश्वरे जो जाणी गियो न। **14** हे पिताओ, मै तूहांजो इस तांई लिखया है, क्योंकि तुसां मसीह जो जाणदे न, जडा शुरू ला है। हे जवानो, मै तूहांजो इस तांई लिखया है, की जारे बाले होआ, कने

परमेश्वरे दा बचन तुसां च बणी रेंदा है, कने तुसां उस शैताने पर जित हासिल किती है। **15** तुसां ना तां संसारे ला कने ना तां संसारे दिया चीजां ने प्यार रखा अगर कोई संसारे ने प्यार रखदा है, तां उदे च पिता परमेश्वरे दा प्यार नी है। **16** क्योंकि जडा कुछ संसारे च है, मतलब की शरिरी दी पापी इच्छा जो पूरा करणा, कने चीजां जो दिखणा कने उना जो पाणे दी इच्छा रखणा कने जडा उदे बाल है कने जडा सै करता है उदा घमंड करणा, सै पिता परमेश्वरे दिया तरफा ला नी, पर संसारे दिया तरफा ला है। **17** संसार कने उदी बुरी इच्छा दोनो खत्म हुंदे जांदे न, पर जडा परमेश्वरे दिया इच्छा दे अनुसार चलदा है, सै हमेशा बणी रेंदा है। (aiōn g165) **18** हे बच्चो, ऐ मसीह दा मुडी करी ओणे दा बकत है, जियां तुसां सुणया है, की मसीह दा बिरोधी ओणे बाला है, उदे अनुसार हुण भी बडे भरी मसीह दे बिरोधी आई गियो न; इसला असां जाणदे न, की मसीह दे मुडी करी ओणे दा बकत है। **19** सारे जडे मसीह दा बिरोध करदे न सै निकलयो तां सांझो ला ही न, पर सांझो चे नी थे; क्योंकि अगर सांझो चे होंदे, तां साडे सोगी रेंदे, पर उना सांझो छडी दिता क्योंकि उना के कोई भी साडा नी था। **20** पर तूहांजो तां यीशु मसीह दे जरिये पबित्र आत्मा मिलया है, कने तुसां खब सचच जाणदे न। **21** मै तूहांजो इस तांई नी लिखया, की तुसां सच्च जो नी जाणदे न, पर इस तांई लिखया है, की तुसां उसयो जाणदे न, कने इस तांई की कुसी भी झूठ दा जन्म सच्च ला नी होंदा है। **22** झूठा कुण है? सिर्फ सै जडा यीशु जो मसीहा होणे जो मना करता है; कने मसीह दा बिरोधी सेई है, जडा पिता परमेश्वर दा कने पुत्र यीशु जो नी मनदा है। **23** जडा कोई पुत्रे जो नी मनदा है उदे बाल पिता परमेश्वर भी नी: जडा पुत्र यीशु जो मन्नी लेदा है, उदे बाल पिता परमेश्वर भी है। **24** जालु तुसां मसीह पर भरोसा किता कने जडा सच्चाई दा बचन तुसां सुणया, सै ही तुसां च बणी रे। अगर सै तुसां च बणी रे, तां तुसां भी पुत्रे च, कने पिता परमेश्वर च बणी रेणा। **25** हमेशा दी जिन्दगी सै बायदा है जडा पिता परमेश्वरे सांझो ने कितया है। (aiōnios g166) **26** मै तूहांजो उना लोकां दे बारे च चितानबनी दे दा है जडे तूहांजो गलत शिक्षा ने धोखा देणे दी कोशिश करा दे न। **27** पर तूहांजो तां पबित्र आत्मा यीशु मसीह दे जरिये मिलया है, सै तूहाडे च हमेशा बणया रे; इस तांई तूहांजो सच्चाई दे बारे च कुसी माणुए जो सिखाणे दी जरूरत नी है, बल्कि पबित्र आत्मा तूहांजो उना सरियां चीजां दे बारे च जाणने च मदद करणी है जिना दी तूहांजो जरूरत है, जडा पबित्र आत्मा तूहांजो सिखाणा सै सच्च है, उस च कुछ झूठ नी है: इस तांई यीशु मसीह सोगी बणी रिया जियां की पबित्र आत्मा करणे तांई बोलया है। **28** हे बच्चो मसीह सोगी बणी रिया; की जालु उनी दोबारा प्रगट होणा, तां सांझो हिम्मत हो, कने असां उदे ओणे पर उदे सामणे शरमिंदा ना होन। **29** क्योंकि तुसां ऐ जाणदे न, की यीशु मसीह धर्मी है, तां ऐ भी जाणदे न, की जडे कोई धर्म दे कम्म करदे न, सै परमेश्वर दे बच्चे न।

**3** बिचार करा की पिता परमेश्वरे साडे ने कितणा प्यार किता है, की सांझो परमेश्वर दे बच्चे बोलन, कने सच्ची असां परमेश्वर दे बच्चे न। इस संसारे दे लोक ऐ नी जाणदे न की असां परमेश्वर दे बच्चे न क्योंकि सै पिता परमेश्वर जो नी जाणदे। **2** हे प्यारो, हुण असां परमेश्वरे दी ओलाद न, कने हल्ले दीकर ऐ प्रगट नी होया, की असां भविष्य च क्या बणी जाणा। इतणा पता है की जालु उनी प्रगट होणा है, तां असां भी उदे सांई होणा, क्योंकि उसयो तदिया ही दिखणा जियां सै है। **3** कने जडा कोई यीशु मसीह पर आस रखदा है, सै अपने आपे जो तदेया ही पबित्र करता है, जदेया सै पबित्र है। **4** जडे कोई लगातार पाप करदे न, सै परमेश्वरे दी व्यवस्था जो नी मंदे कने पाप करणा व्यवस्था जो तोड़णा है। **5** कने तुसां जाणदे न, की सै इस तांई आया है की साडे पापां दिया सजा जो दूर करी दे; कने उदे च कोई पाप नी है। **6** जडा कोई उदे च बणी रेंदा है, सै लगातार पाप नी करता; जडा कोई पाप करता है, सै नी जाणदा की यीशु मसीह कुण है, कने ना ही उसयो जाणया है। **7** हे बच्चो, कुसी दे बेहकाबे च मत ओंदे। जडा धार्मिकता दे कम्म करता है, सेई यीशु मसीह सांई धर्मी है। **8** जडा कोई लगातार पाप करता है, सै शैताने दिया तरफा ला है, क्योंकि शैतान शुरू ला ही पाप करता आया है, परमेश्वरे दा पुत्र इस तांई आया, की शैताने दे कम्मा जो खत्म करे। **9** जडा कोई परमेश्वरे दे बच्चे न सै लगातार पाप नी करता; क्योंकि परमेश्वर दा सभाब उदे च है: कने सै पाप नी करी सकदा, क्योंकि सै परमेश्वरे दा बच्चा है। **10** इसी ने

परमेश्वरे दे बच्चे कने शैताने दे बच्चे जाणे जांदे न; जडा कोई धर्म दे कम्म करदा, सै परमेश्वरे दिया तरफा ला है, कने जडा कोई अपने मसीह भाईरे ने प्यार करदा है सै भी परमेश्वरे दिया तरफा ला है। 11 जडा समाचार तुसां शुरू ला सुणया है, से ऐ है, की असां इक दुज्जे ने प्यार रखिए। 12 कने आदम दे पुत्र कैन सांई मत बण्दे, जडा उस शैताने दा बच्चा था, जिनी अपने भाईरे दी हत्या कित्ती, कने उनी उदी कुसा बजा ने हत्या कित्ती? उनी इस तांई हत्या कित्ती क्योकि उदे अपने कम्म बुरे थे, कने उदे भाईरे दे कम्म धर्म दे थे। 13 हे मसीह भाईयो, अगर संसारे दे लोक तुहांजो ने बैर रखदे न तां हेरान मत होंदे। 14 सांझो पता है, की असां मौत दी शक्ति ला अजाद होई गियो न कने हुण साडे बाल परमेश्वरे दिया तरफा ला हमेशा दी जिंदगी है, क्योकि असां मसीह भाईयां ने प्यार रखदे न, कने जडा प्यार नी रखदा है सै हले भी मौत दिया शक्तिया दे अधीन है। 15 जडा कोई अपने भाईयां ने बैर रखदा है, सै हत्यारा है; कने तुसां जाणदे न, की कुसी भी हत्यारे क हमेशा दी जिन्दगी नी रेंदी। (aiōnios g166) 16 असां प्यार जो यीशु मसीह ला ही जाणया, की उनी साडे तांई अपने प्राण दिते; इस तांई सांझो भी मसीह भाईयां तांई प्राण देणा चाईदे। 17 पर जिसदे बाल संसारे दी धन सम्पत्ति हो कने सै अपने मसीह भाईये जो कंगाल दिखीकरी उस पर तरस ना खा, तां उदे च परमेश्वरे दा प्यार नी होई सकदा। 18 हे मेरे प्यारे बच्चे, सांझो बचना कने गल्लां ला ही नी, पर उना दी सहायता करी के सच्चा प्यार करणा चाईदा। 19 जालू असां दुज्जयां ने प्यार करगे इसला ही सांझो पता चलणा है, की असां सच्च दी ओलाद न। कने जालू कदी साडा मन सांझो पर दोष ला, तां असां परमेश्वरे दे सामणे अपने मने जो दिलासा देई सकदे न। 20 क्योकि परमेश्वर साडे मने ला बढा है; कने सब कुछ जाणदा है। 21 हे प्यारो, अगर साडा मन सांझो दोष नी ला, तां असां परमेश्वरे सामणे हिम्मत होंदी है। 22 कने जडा कुछ असां परमेश्वरे ला मंगदे न, सै सांझो उसला मिलदा है, क्योकि असां उदे हुकमा जो मंगे न; कने जडा परमेश्वरे जो खुशी दिन्दा है असां सेई करदे न। 23 कने उदा हुकम ऐ है की असां उदे पुन यीशु मसीह पर भरोसा करन कने जियां उनी सांझो हुकम दितया है तियां ही अपु चे प्यार रखन। 24 जडा उदे हुकमा जो मनदा है, सै शैताने च रेंदा है कने परमेश्वर उना च रेंदा है। कने इसी ला ही उसा पबित्र आत्मा ला जडी उनी सांझो दिती है, असां जाणदे, की सै सांझो च रेंदा है।

4 हे प्यारो, हर इक कुसी पर भरोसा मत करा जडा बोले उस बाल पबित्र आत्मा है, पर उना जो परखा, की सै परमेश्वरे दिया तरफा ला हेन की नी; क्योकि बडे भरी झूठे संदेश देणेबाले इस संसारे च आयो न, जडे बोलदे न की असां पिता परमेश्वरे दिया तरफा ला बोलदे न। 2 परमेश्वरे दी आत्मा जो तुसां इसा रीतिया ने पछेणी सकदे न, की जडा कोई माणु ऐ मनी लेंदा है, की यीशु मसीह माणु बणी करी आया है, सै परमेश्वरे दिया तरफा ला है। 3 कने जडा कोई माणु यीशुऐ जो नी मंदा है, सै परमेश्वरे दिया तरफा ला नी है; कने सेई मसीह दे बिरोधी दी आत्मा है; जिसदी चर्चा तुसां सुणी बैठयो न, की सै औणे बाला है, कने हल्ले भी संसारे च है। 4 हे बच्चो, तुसां परमेश्वरे दिया तरफा ला झूठे संदेश देणेबालयां जो हराया; क्योकि जडा पबित्र आत्मा तुहाडे च है, सै शैताने ला बडा है जडा संसार च है। 5 सै परमेश्वर दिया तरफा ला झूठे संदेश देणेबाले संसारे दे न, इस तांई सै संसारे दिया गल्लां करदे न, कने संसार दे लोक उना दी सुणदे न। 6 असां परमेश्वरे दिया तरफा ला न, जडे परमेश्वरे जो जाणदे न, सै साडी सुणदा है; जडा परमेश्वरे जो नी जाणदा है सै साडी नी सुणदा है इस तरीके ने असां सच्च दी आत्मा कने झूठ दी आत्मा जो पछेणी लेंदे न। 7 हे प्यारो, असां अपु चे प्यार रखन; क्योकि प्यार परमेश्वर ला है कने जडा कोई दुज्जयां सोगी प्यार करदा है, सै परमेश्वरे दा बच्चा है कने परमेश्वरे जो जाणदा है। 8 जडा दुज्जयां जो प्यार नी करदा सै परमेश्वरे जो नी जाणदा है, क्योकि परमेश्वर प्यार है। 9 जडा प्यार परमेश्वर साडे ला रखदा है, सै इसा गल्ला ने प्रगट होया है की पिता परमेश्वरे अपने इकलोते पुत्रे जो संसार च भेजया है ताकि सांझो उसला हमेशा दी जिन्दगी मिल्ले। 10 सच्चा प्यार ऐ नी है की असां परमेश्वरे ने प्यार किता, पर उनी सांझो ने प्यार किता है, पर परमेश्वरे साडे पापां जो माफ करणे तांई अपने पुत्रे जो बलिदान होणे तांई भेजया है। 11 हे प्यारो, जालू परमेश्वरे सांझो ने ऐसा प्यार किता, तां सांझो भी अपु चे ऐदिया ही प्यार रखणा चाईदा। 12 परमेश्वरे जो कदी भी कुनी नी दिखया है; अगर असां

अपु चे प्यार रखिए, तां परमेश्वर सांझो च बणी रेंदा है; कने उदा प्यार सांझो च सिद्ध होई गिया है। 13 इसी ने सांझो पता चलदा है, की असां परमेश्वर च रेंदे न, कने परमेश्वर सांझो च रेंदा है; क्योकि उनी अपनी पबित्र आत्मा सांझो दितया है। 14 असां पुत्रे जो दिखया है कने गबाई भी दिन्दे न की पिता परमेश्वरे अपने पुत्रे जो संसारे दे लोकां दा उदारकर्ता बणाई के भेजया है। 15 जडा कोई ऐ अपनाई लेंदा है की यीशु परमेश्वरे दा पुत्र है, परमेश्वर उदे च रेंदा है, कने सै परमेश्वरे च रेंदा है। 16 असां जाणदे न कने भरोसा करदे न की परमेश्वर सांझो ने प्यार करदा है, उसयो असां जाणी गे न, कने सांझो उदा भरोसा है; परमेश्वर प्यार है जडा प्यार च बणया रेंदा है परमेश्वर उदे च रेंदा है, कने सै परमेश्वरे च रेंदा है। 17 इसी ला ही प्रेम सांझो च पूरा होया कि, न्याय दे दिने सांझो हिम्मत मिल्ले की सै सांझो नी दिगा, क्योकि मसीह सांई इक दुज्जे सोगी प्यार करदे न कने इसा दुनिया च मसीह सांई रेंदे न। 18 प्यार च डर नी होंदा, सिद्ध प्यार डरे जो भी दूर करी दिन्दा है, क्योकि जडा डरदा है सै सजा ला डरदा है। जडा डरदा है सै प्यारे च सिद्ध नी होया है। 19 परमेश्वरे सांझो ला पहले प्यार किता इस तांई असां परमेश्वर कने दुज्जयां सोगी प्यार करदे न। 20 अगर कोई बोले, मै परमेश्वरे ने प्यार करदा, पर अपने मसीह भाईरे ने दुशमणी रख; तां सै झूठा है; क्योकि जडा अपने मसीह भाईरे ने जिसयो उनी दिखया है उसला प्यार नी रखदा है, तां सै परमेश्वरे ने भी प्यार नी रखी सकदा है, जिसयो उनी दिखया भी नी है। 21 कने उसला सांझो ऐ हुकम मिलया है, की जडा कोई परमेश्वरे ने प्यार रखदा है, सै अपने मसीह भाईरे ने भी प्यार रखे।

5 जिदा ऐ भरोसा है की यीशु ही मसीह है, सै जन परमेश्वरे दी संतान है कने जडा कोई पिता परमेश्वरे ला प्यार करदा है, तां सै उदी संतान ला भी प्यार करदा है। 2 जालू असां परमेश्वरे ने प्यार करदे न, कने उदे हुकमा जो मंगे न, तां इसी ने सांझो पता चलदा है, की परमेश्वरे दी ओलाद ने प्यार रखदे न। 3 परमेश्वरे ने प्यार करणे दा मालब है की असां उदे हुकमा जो मनन; कने उदे हुकमा जो मनणा बडा कठिन नी न। 4 क्योकि जडे कोई परमेश्वरे दे बच्चे न, सै संसारे पर जित हासिल करदे न, कने सै जीत, जिसने संसारे जो रांदा है, सै साडा भरोसा ही है। 5 संसारे पर जीत पाणे बाला कुण न? सिर्फ सेई जिसदा भरोसा है, की यीशु ही परमेश्वरे दा पुत्र है। 6 ऐ यीशु मसीह है, जिसयो परमेश्वरे इस संसार च भेजया है, कने उसयो पाणिए ने बपतिस्मा दितया था, कने बाद च जालू सै मरी गिया तां उदा खून बेह गिया। सै सिर्फ बपतिस्मा लेणे तांई नी आया था पर सूली पर अपना खून बहाइ करी मरया भी। पबित्र आत्मा दसदा है की यीशु मसीह परमेश्वरे ला आया, कने पबित्र आत्मा हमेशा सेई दसदा है जडा सच्च है। 7 गबाई ऐ है की यीशु मसीह साडे पापां तांई बलिदान होया, ऐ तिन्न गल्लां इसदी गबाई दिन्दियां न। 8 पबित्र आत्मा, पाणी, कने खून; तिने इक ही गल्ल बोलदियां न। 9 जालू असां माणुऐ दी गबाई मन्नी लेंदे न, तां परमेश्वरे दी गबाई तां उसला भी बदीकरी है कने परमेश्वरे दी गबाई ऐ है, की उनी अपने पुत्रे दे बारे च गबाई दितियो है। 10 जडा परमेश्वरे दे पुत्रे पर भरोसा करदा है, सै अपने मने च ही गबाई रखदा है; जिनी परमेश्वरे पर भरोसा नी रखया, उनी परमेश्वरे जो झूठा बणाया; क्योकि उनी उसा गबाइया पर भरोसा नी किता, जडी परमेश्वरे अपने पुत्रे दे बारे च दिती है। 11 कने सै गबाई ऐ है, की परमेश्वरे सांझो हमेशा दी जिन्दगी दितियो है कने सांझो ऐ हमेशा दी जिन्दगी परमेश्वरे दे पुत्रे ला मिल्ले ला। (aiōnios g166) 12 जडा पिता परमेश्वरे दे पुत्र यीशु मसीह जो अपनांदा है, उदे बाल हमेशा दी जिन्दगी है; कने जडा परमेश्वरे दे पुत्रे जो नी अपनांदा है, उदे बाल हमेशा दी जिन्दगी भी नी है। 13 मै तुहांजो ऐ सब इस तांई लिखया है की तुसां, जडे परमेश्वरे दे पुत्रे पर भरोसा करदे न, की तुहांजो पता लागे की हमेशा दी जिन्दगी तुहाडी है। (aiōnios g166) 14 कने सांझो परमेश्वरे सामणे जडी हिम्मत होंदी है, सै ऐ है; की अगर असां उदी इच्छा ने कुछ मंगदे न, तां सै साडी सुणदा है। 15 कने जालू असां जाणदे न, की जडा कुछ असां परमेश्वरे ला मंगदे न, सै साडी सुणदा है, तां ऐ भी जाणदे न, की जडा कुछ असां मंगया है सांझो मिल्ला भी है। 16 अगर कोई अपने मसीह भाईऐ जो ऐसा पाप करदे दिखे, जिदा परिणाम मौत न हो, तां सै उदे तांई परमेश्वरे ला प्रार्थना करा तां परमेश्वरे उदिया जिन्दगिया दी रक्षा करणी। क्योकि इक पाप ऐसा भी होंदा है जिदा नतीजा मौत है; मै इदे बारे च परमेश्वरे ला प्रार्थना करणे तांई नी



बोलदा। 17 हर तरा दा अधर्म तां पाप है, पर ऐसा पाप भी है, जिदा नतीजा मौत है। 18 सांझो पता हे, की जडा कोई परमेस्वर दा बच्चा है, से लगातार पाप नी करदा; क्योंकि परमेस्वरे दा पुत्र यीशु मसीह उदी रक्षा करदा है कने शैताने उसयो छुई नी सकदा। 19 असां जाणदे न, की असां परमेस्वरे ला न, कने सारे संसारे दे लोक उस शैताने दे वशे च पियो न। 20 कने ऐ भी जाणदे न, की परमेस्वरे दा पुत्र यीशु मसीह इस संसार च आया कने उनी सांझो समझ दिती, की असां उस सच्चे परमेस्वरे जो पछेणन। असां सच्चे परमेस्वरे सोगी करीबी रिशते च न क्योंकि साडा उदे पुत्र यीशु मसीह सोगी करीबी रिशता है। सच्चा परमेस्वर कने हमेशा दी जिन्दगी ऐई है। (aiōnios g166) 21 हे बच्चों, अपने आपे जो हर इक ऐसी चिजा ला दुर रखा जडी तुहाडे दिले च परमेस्वरे दी जगा ले।

## 2 यूहन्ना

**1** मैं यूहन्ना कलीसिया दा अगुवा, मैं ऐ चिठी उसा आदरणीय जनानिया जो कने उसा दे बचच्यों जो लिखा दा है, जिना जो परमेश्वरे चुणया है। मैं सच्ची तूहांजो ने प्यार करदा है, कने सिर्फ मैं ही नी पर सै सारे भी प्यार करदे न, जडे परमेश्वरे दी सच्चवाईया पर भरोसा रखदे न। **2** असां तिजो ला इस ताई प्यार करदे क्योंकि सच्ची शिक्षा साडे मना च बणियो है सै हमेशा साडे सोगी बणी रेणी है। (aiōn g165) **3** परमेश्वर पिता कने उदे पुत्र यीशु मसीह दिया तरफा ला अनुग्रह, दया कने शांति असां सारयां सोगी बणी रे। जडे सच्च जो मंदे कने इक दुज्जे ने प्यार करदे न। **4** मैं बडा खुश होया जालू मैं तेरे कुछ बचयां दे बारे च सुणया की सै सचाई ने जिन्दगी जी दे न, सै बिलकुल सै ही करा दे न जडा साडे पिता परमेश्वरे करणे जो बोलया। **5** हुण हे आदरनीय जनानी, मैं तिजो ला विनती करदा है, की सांझो इक दुज्जे ने हमेशा प्यार करणा चाईदा। ऐ कोई नोआ हुकम नी है पर सेई हुकम है जिसयो असां उस बकते ला जाणदे न जालू असां मसीह दे पिच्छे चलणा शुरू कितया था। **6** सच्च प्यार सै है जडा असां तालू करदे न जालू असां परमेश्वर दे हुकमा जो मंदे न, जालू ला असां मसीह दे पिच्छे चलणा शुरू कितया है, तालू ला असां सुणया है की परमेश्वरे तूहांजो हुकम दितया है की तूहांजो हमेशा इक दुज्जे ने प्यार करदे रेणा चाईदा। **7** मैं ऐ इस ताई बोला दा है क्योंकि केई लोक न जडे झूठे उपदेश दिन्दे न सै मतियां जगां च गियो न, सै बोलदे न की यीशु मसीह माणुए दे स्पे च इसा दुनिया च नी आया है। जडा कोई ऐ नी मंदा की यीशु माणुए दे स्पे इसा धरती च नी आया है तां सै माणु मसीह दा बिरोधी है कने लोकां जो हमेशा धोखा दिदा है। **8** इस ताई तुसां ऐ ध्यान रखा की ऐ लोक तूहांजो धोखा ना देन, ताकि परमेश्वरे दी सेबा ताई कितियो मेहनत बेकार ना होई जा कने परमेश्वरे तूहाडी सेबकाई ताई तूहांजो पूरा इनाम देणा। **9** जडे लोक सच्ची शिक्षा ला भटकी जादे न कने मसीह दी शिक्षा जो नी मंदे न, सै परमेश्वरे सोगी संगती च नी न। जडे लोक यीशु मसीह दी शिक्षा जो मंदे न सै परमेश्वरे सोगी कने उदे पुत्र यीशु सोगी संगती च न। **10** अगर कोई तूहाडे बाल आऐ कने कुछ सिखा दा है, जडा मसीह यीशु दी शिक्षा ला लग है। ना तां उदी मेहमान नबाजी करा, कने ना ही उसयो नमस्ते करा। **11** क्योंकि जडा कोई ऐसे माणुआं दा स्वागत करदा है, सै उदे बुरे कम्मा च हिस्सेदार होंदा है जडा सै करदा है। **12** मैं होर भी मतियां गल्लां तूहांजो दसणा चांदा है, पर मैं उना जो इयां चिठिया च नी लिखणा चांदा है, पर मिंजो आस है, की मैं तूहाडे बाल ओऐ, कने आमणे सामणे होईकरी गल्लां करे तालू असां पूरी तरा ला खुश होणा। **13** ऐथू तूहाडियां बेहणा दे बच्चे, जिना जो परमेश्वरे चुणयां है सै तूहांजो नमस्कार करा दे न।

# 3 यूहन्ना

**1** मैं यूहन्ना कलीसिया दा अगुवा इसा चिठिया जो अपने प्यारे भाई ग्यूस जो लिखदा है, मैं तिजो ला सच्चा प्यार करदा है। **2** हे प्यारे, मेरी ऐ प्रार्थना है; जियां तुसां भरोसे च मजबूत होदे जादे न, ठीक तियां ही बाकी होर कम्मा च भी तरकी करा कने स्वस्थ रिया। **3** क्योंकि कुछ विश्वासी भाईयां आई करी, मिजो दसया की तुसां अपनी जिन्दगी इमानदारिया ने सच्चाई च जी दे न, तां मिजो बड़ी खुशी होई। **4** जालू भी मैं ऐ सुणदा है की से लोक जडे मेरे बचयां साईं न, से उसी तरीके ने जी दे न, जडा सच्ची परमेख्वरे सांजो दसया है, इसला मिजो होर भी जादा खुशी होदी है। **5** हे प्यारे, तू बडिया इमानदारिया ने साडे मसीह भाईयां दी मदद किती जडे शुभसमाचार प्रचार ताई यात्रा करा दे थे, चाहे से तुहाडे ताई अनजाण ही थे। **6** उना चे केई लोकां ऐथू दे विश्वासियां जो कलीसिया च दसया है की तू अपने मसीह साथियां ने कितणा प्यार करदा है। हण मैं तिजो ने बोलदा है तिजो ऐसे मसीह साथियां दी मदद करदे रेणा चाईदा जडे मसीह दा शुभसमाचार प्रचार करणे ताई यात्रा करदे न क्योंकि ऐ परमेख्वरे जो खुश करदा है। **7** क्योंकि से मसीह दा शुभसमाचार सुणणे ताई निकलयो न, कने भरोसा नी करणे बालयां ला कोई मदद नी लेंदे। **8** इस ताई ऐसयां दा अपने घरे ओणे पर स्वागत करा कने जडी उना दी जरूरत है से दिया, जिसने असां भी सच्ची सेबा दे हिस्सेदार बणन। **9** मैं कलीसिया दे ना इक चिठी लिखी; पर दियुत्रिफिस उनी मेरियां गल्ला जो मनणे ला मना करी दिता क्योंकि से खुद हमेशा ला ही कलीसिया दा अगुवा बणना चांदा है। **10** इस ताई जालू मैं ओणा, तां तुहाडे सामणे उदे कम्मा जो जडा से करा दा कने जडा साडे बारे च बुरियाँ-बुरियाँ गल्लां बोलदा है सारा कुछ दसगा; कने इतणा ही नी, से अपु तां शुभसमाचार प्रचार करणे बाले मसीह भाईयां जो स्वीकार नी करदा है कने ना ही कलीसिया दे लोकां जो ऐसा करणा दिन्दा है कने जडे करणा चांदे न, उना जो मना करदा है, कने कलीसिया ला निकाली दिन्दा है। **11** हे प्यारे, उना माणुआं दी नकल मत करदे जडे बुरे कम्म करदे न, पर उना माणुआं दे पिच्छे चलनयो जडे अच्छे कम्म करदे न। जालू कोई अच्छा कम्म करदा है, तालू से ऐ साबित करदा है, की मैं परमेख्वरे दा पुत्र है कने जडा बुराई करदा है उनी परमेख्वरे जो नी दिखया। **12** दिमेत्रियस दे बारे च कलीसिया दे सारे लोक बोलदे न की बडा अच्छा बन्दा है क्योंकि से सच्चाई ने जिन्दगी जिन्दा है, सच्च भी अपु उदी गबाई दिदा है: कने असां भी बोलदे न, की से बडा अच्छा बन्दा है कने तू जाणदा है, असां सच्च बोलदे न। **13** मैं होर भी मतियां गल्लां तुहांजो दसणा चांदा है, पर मैं उना जो इयां चिठिया च नी लिखणा चांदा है। **14** पर मिजो आस है, की मैं तुहाडे बाल ओणे, कने आमणे सामणे होईकरी गल्लां करे तालू असां पूरी तरा ला खुश होणा। मैं प्रार्थना करदा है की परमेख्वर तिजो शांति दे। ऐथू दे मसीह मित्र तिजो नमस्कार करदे न ओथू दे दोस्तां दे ना लेई-लेई के नमस्कार बोली दियां।

# यहदा

**1** मैं, यहदा तुहांजो ऐ चिड़ी लिखा दा है। मैं यीशु मसीह दा सेबक कने याकूबे दा छोटा भाई है। मैं तुसां लोकां जो लिखा दा है, जिना जो परमेश्वरे अपने उपर भरोसा करणे ताई सदया है। साडा पिता परमेश्वर तुहांजो ने प्यार करदा है कने तुहाडी रक्षा करदा है। 2 मैं प्रार्थना करदा है की परमेश्वर तुहांजो दया, शांति कने प्यार बडा जांदा दे। 3 हे प्यारे मसीह भाईयो, मैं तुहांजो उसा नोई जिन्दगी दे बारे च लिखणे दी हर इक कोशिश करा दा है कने जडी यीशु मसीह दे जरिये परमेश्वरे दिया तरफा ला होंदी है कने जिसा च असां सारे हिस्सेदार न। पर हण मिंजो इसा चिठिया जरिये तुहांजो प्रोत्साहित करणे दी जरूरत महसूस होआ दी है ताकि तुसां मसीह पर भरोसे च टिकी रेणे ताई कोशिश करा। परमेश्वरे अपने लोकां ताई ऐ भरोसा इक ही बरी हमेशा ताई दितया है, कने इसयो बदली नी सकदे। 4 मैं तुहांजो इस ताई लिखा दा है क्योंकि कुछ ऐसे लोक न जडे भरोसा करणे दा दिखावा करदे न, कने परमेश्वरे दी इज्जत नी करदे न कने तुहाडिया कलसीया च शामिल होई गियो न, कने गलत शिक्षा दिन्दे न क्योंकि परमेश्वरे अपने अनुग्रह ला साडे पापां जो माफ करी दिन्दे है, इस ताई असां बुरे कम्म कने पाप करी सकदे न, जडा साडा इकलोता मालिक कने साडा प्रभु है। बडे बकत पेहेले ला, पबित्र शास्त्र च लिख्या है की परमेश्वरे ऐसे लोकां जो सजा देंगी है। 5 हालांकि तुसां इना सारियां गल्लां दे बारे च जाणदे न, फिरी भी मैं तुहांजो इना गल्लां दी याद दिलाणा चांदा है, की परमेश्वरे इसाएलियां जो गुलामी ला अजाद कराया कने मिश्र देशे ला कडी लेई आया, पर बांटे च उनी सारयां जो मारी दिता, जिना रेगिस्तान च उस पर भरोसा नी किता। 6 याद करा की परमेश्वरे उना शैताने दे दूतां जो कियां सजा दिती, जिना अपणिया जिम्मेदारियां जो नी निभाया, कने उना अपने पदां जो छडी दिता। परमेश्वरे इना स्वर्गदूतां जो नेहरे च रखया है, कने ऐसे स्यालला ला बनया है जिना जो कोई नी तोडी सकदा ताकि उस महान न्याये बाले दिने उना दा न्याय होई सके। (1 aiodis g126) 7 इस ताई इना इस्राएली कने स्वर्गदूतां सांई, उना लोकां जो भी याद रखा जडे सदोम कने अमोरा शेहरां च कने उना दे अखे-बखे दे गां च रेंदे थे, की उना सोगी क्या होया था। सै लोक व्यभिचारी होई गियो थे, कने हर तरा दे नाजायज यौन रिशतयां च पेई गियो थे, इस ताई परमेश्वरे उना जो अग्गी ने मारी दिता। उना सोगी जडा होया सै झूठे गुप्तआं ताई इक चेतानबी है की उना जो भी कदी नी बुझणे बालिया अग्गी दी सजा मिलणी है। (aiōnios g166) 8 इना उदाहरणा दे बारे च जाणने बाद भी, ऐ भरोसा होणे दा दिखावा करणे बाले माणु इयां ही पाप करदे न कने बोलदे न की उना दर्शन दिखया है। सै अपने शरीर जो पाप करणे ताई इस्तेमाल करदे न, कने परमेश्वरे दे अधिकारां जो नी मंदे न, कने महिमामय स्वर्गदूतां जो बदनाम करदे न। 9 पर ऐथू दीकर की प्रधान स्वर्गदूत मीकाइले भी ऐसियां बुरियां गल्लां नी कीतियां जदियां गल्लां ऐ झूठे गुप्त करदे न। पर जालू उनी शैताने सोगी बेहस किती कने मूसा परमेश्वरे दा संदेश देणेबाले दिया लाशा जो लेई जाणे ताई अपने अधिकारे जो चुनौती दिती, तां मीकाइले ऐ नी सोचया की उदे बाल बुरियां गल्लां बोली करी शैताने पर बुरा दोष लागे दा हक है। बल्कि उनी बोलया, “प्रभु तिजो ला सकताईया ला गल्ल करे।” 10 पर सै लोक जडे परमेश्वरे दी आराधना नी करदे, सै ऐसिया गल्लां दा बिरोध करणे ताई उना दे बारे च बुरा भला बोलदे न, जडियां उना जो समझ नी ओदियां; कने सै जंगली जानवरां सांई व्यवहार करदे न, कने जिना कम्मा दे बारे च सै जाणदे नी न, उना जो बिना सोचयो समझे करदे न, परमेश्वरे उना जो सजा देंगी है। 11 उना दा बडा बुरा होंणा है! की सै कैन सांई बुराई दे रस्ते पर चलदे न, जिनी अपने भाई दी हत्या करी दिती थी, क्योंकि सै भाईऐ ला जलदा था, क्योंकि परमेश्वरे उदे भाईऐ दे बलिदान जो अपनाई लिया था पर उदे बलिदाने जो नी। उना जल्दबाजी च सेई गलती किती जडी बिलामे होर लोकां जो पाप पासे लेई जाणे दी किती ताकि पैसे कमाई सके। जियां मूसा दे खिलाफ जाणे ला कोरह दा नाश होई गिया, तियां ही उना लोकां दा भी नाश होई जाणा जडे परमेश्वरे दे खिलाफ जांदा न। 12 जियां पाणिऐ अंदर लुकियां चट्टाना समुंद्री जाजां ताई खतरनाख न, तियां ही ऐ लोक तुहाडे सोगी धामा च तुहाडे ताई खतरनाख न। चाहे सै प्रभु भोज च शर्मनाक कम्म करदे न पर सै इना कम्मा दिया

बजा ला कोई भी शर्म महसूस नी करदे। सै उना पुहाला सांई न जडे अपणी ही देखभाल करदे न; सै दुज्जयां लोकां दी सहायता नी करदे। सै उना बदला सांई न जिना जो सुकी होआ बिना बरखा कितयो उडाई लेई जांदी है। सै बायदे तां बडे करदे न, पर कुछ दिन्दे न। फसल दे बकते दे रखां सांई न जिना पर कोई फल नी होंदा है जिना जो उखाडी दिन्दे न, मतलब की सै मरी गियो न। 13 समुन्द्रे दियां भारी लेहरां सांई जडियां गंदा झाग बणादियां न, ऐ लोक भी शर्मनाक कम्म करदे न। सै कुछ तारयां सांई न जडे इक सीधे रस्ते पर नी चलदे, कने सही रस्ता नी दसदे। प्रभु उना ताई इक जगा रखा दा है जडा जिथू परा नेहरा ही है जिथू उना जो हमेशा ताई रेणा पोणा है। (aiōn g165) 14 कने हनोक जडा पेहेले माणु आदम ला बाद सतमी पीडियां च जमया था, उनी इना अधमी लोकां दे बारे च भविष्यवाणी किती, “सूणा! परमेश्वरे पक्का ही अपने अणगिनत स्वर्गदूतां सोगी ओणा। 15 सारे लोकां दा न्याय करणे ताई, उना सारे बुरे कम्मा ताई उना पर दोष लागे ताई जडे उना परमेश्वरे दे खिलाफ कितयो न कने उना सारियां भड़ी गल्लां ताई जडे उना उदे खिलाफ बोलियां न।” 16 ऐ लोक हमेशा परमेश्वरे दे खिलाफ बोलदे न कने दुज्जयां लोकां च गलती तोपे दे न। सै लगातार उना बुरे कम्मा जो करदे न जडे उना दे दिल करणा चांदा न। सै अपने बारे च घमंड ला दाबा करदे न कने खुद दे फायदे ताई दुज्जयां लोकां दी चापलूसी करदे न, उना जो पिता परमेश्वरे दिया तरफा ला सजा मिलणी। 17 पर हे प्यारे मसीह भाई, तुसां उना गल्लां जो याद रखा; जडे साडे प्रभु यीशु मसीह दे प्रेरित बडे पेहेले बोली बैठयो न। 18 सै तुहांजो ला बोलदे थे, “साडे प्रभु यीशु मसीह दे मुडी करी बापस ओणे ला पेहेले, ऐसे लोकां होंणा है जिना प्रभु कने उदे लोकां दा मजाक उडाणा। ऐ सेई लोक न जिना दिया जान्दियां च बुरी इच्छां दा काबू है।” 19 ऐ सै लोक न, जडे तुहांजो च फुट पांटे न, उना दिया बुरियां इच्छा उना जो काबू करदियां न, कने उना च पबित्र आत्मा नी है। 20 पर हे प्यारे भाईयो तुहांजो इक दुज्जे दी सहायता करदे रेणा चाईदा ताकि उना पबित्र सच्चाईयां च जिना पर तुसां भरोसा करदे न, इक दुज्जे जो बधाई सकन। तुहांजो पबित्र आत्मा दिया अगुवाई च प्रार्थना करणी चाईदी। 21 तुहांजो इस भरोसे सोगी जीणा चाईदा की परमेश्वर सांझो ला प्यार करदा है। हालांकि तुसां उस दिने दा इंतजार करदे न जालू साडे प्रभु यीशु मसीह बापस मुडी करी ओणा ताकि तुहांजो हमेशा दी जिन्दगी मिल्ले क्योंकि उनी सांझो पर दया किती है। (aiōnios g166) 22 उना लोकां ताई दयालू बणा जडे ऐ नी जाणदे कुस पर भरोसा करन। 23 कुछ होर लोक जिना जो तुसां जाणदे न, अगर सै नरख पासे जा दा दे न, तां उना जो उस हमेशा दिया अग्गी ला झट खिची करी बचाई लिया। कने दुज्जयां पर दया दससा। पर सियुदा ही पाप करणे ला बचणे ताई साबधान रिया। ऐथू दीकर की उना कपडयां ला भी नफरत करा जिना पर पाप दे कम्मा दे दाग न। 24 इकलोता परमेश्वर ही है जडा तुहाडी रक्षा करी सकदा है, जालू सै तुहांजो अपणिया महिमा च अपने सामणे खरेडदा है। उनी सांझो साडे प्रभु यीशु मसीह दे जरिये बचाया है। महिमा, गौरव, शक्ति, अधिकार बकत दी शरूआत ला ही उदे थे, हण भी उदे न, कने हमेशा ताई उदे ही रेणे। आमीन। (aiōn g165)

# प्रकाशितवाक्य

**1** इसा कताबा च उना गल्लां जो लिख्या है जडिया परमेश्वरे यीशु मसीह जो दसियां न। परमेश्वरे इस तांई उसयो दसियां ताकि सै अपने सेबकां जो उना घटना दे बारे च दस्सी सके जडियां जल्दी ही होणियां न। यीशु मसीहे ऐ संदेश मिजो, अपने सेबक यहून्ना बाल स्वर्गदूते जो भेजी करी दसया, **2** इस तांई, मैं सै सब कुछ लिख्या जडा मैं दिखया। मैं इसा कताबा च परमेश्वरे दा बचन कने सै सच्चियां शिक्षां लिख्यां न जिना दे बारे च यीशु मसीहे मिजो दसया। **3** परमेश्वरे हर उस माणुऐ जो आशीष देणी जडे इसा भविष्यवाणियां जो दुज्जयां जो पढी करी सुणादा है, कने उनी हर उस माणुऐ जो आशीष देणी जडे उसयो सुणदे न कने इसयो मदे न। क्योंकि ऐ चीजां जल्दी ही होणियां न। **4** ऐ चिट्ठी यहून्ना दिया तरफा ला आसिया प्रदेशो दिया सत्तां कलीसियां तांई है: मैं प्रथना करता है की परमेश्वर तहांजो पर अनुग्रह कने शाति दे। सै सेई परमेश्वर है, जडा बकत दिया शुरुआत ला लेईकरी हुणे दीकर कने हमेशा तांई नी बलदा। कने उना सत्तां आत्मा दिया तरफा ला, जडियां परमेश्वरे दे सिहांसने दे सामणे न, **5** कने यीशु मसीह दिया तरफा ला जिदे बचना पर भरोसा करी सकदे न, सै सेई ही है जडा मरी करी दुबारा ला जिदा होणे बालयां च पेहला है कने सै इस संसारे दे सारे राजयां दा शासक है। कने यीशु मसीह सांझो ला प्यार करता है। सै साडे तांई मरी गया कने उनी साडे पापां दिया सजा जो खत्म करी दितया है। इसा बजा ला असां शयजकां दा इक परिबार बणी गियो न, जडे उदे पिता परमेश्वरे दी सेबा करते न। इस तांई यीशु मसीह जो महिमा कने शक्ति हमेशा मिलदी रे। आमीन। (aiōn g165) **7** सणा, सै बदलां सोगी औणे बाला है; कने हर इक जणे उसयो दिखणा, जडे लोक उदिया मौता तांई जिम्मेबार थे, उना भी उसयो ओदे दिखणा। कने धरतिया दे सारे लोकां ज़ोरे-जोरे ला रोंणा जालू उना उसयो दिखणा। हॉं ऐसा ही होणा! आमीन। **8** प्रभु परमेश्वर बोलदा है, "मैं अलफा कने ओमेगा है, मतलब की मैं ही है जिनी सारियां चीजां दी शुरुआत किती, कने मैं ही है जिनी सारियां चीजां जो खत्म करणा, कने मैं ही है जडा हमेशा ला था, कने जडा औणे बाला है, मैं सारयां ला शक्तियाली है।" **9** मैं यहून्ना, तुहाडा साथी मसीह भाई, मैं भी तुहाडे सांई दुख सेहन किता। मैं परमेश्वरे दे राज्य दा इक नागरिक है जियां की तुसां न, कने मिजो भी अपणियां परेशानियां जो तियां ही सबर सोगी सेहन करणा चाईदा जियां तुसां करदे न। मैं परमेश्वरे दे बचन दा प्रचार करणे कने यीशु दे बारे च दसणे दिया बजा ला पतमुस दे टापुरे पर केदी बनाई करी भेजी दितया था। **10** तुआरे जो जडा परमेश्वरे दा दिन है, परमेश्वरे दी आत्मा मिजो पर आई। कने मैं अपने पिच्छे ला कुसी जो बोलदे सुणया जडा तुरही सांई उच्चा कने साफ अबजा च बोला दा था। **11** उनी मिजो बोलया जडा कुछ ट दिखदा है, उसयो कताबा च लिखी करी उना सत्तां कलीसियां जो भेजी दे जडियां इफिसस, स्मरुना, पिरगमुन, थुआतीरा, सरदीस, फिलदिलफिया, कने लौदीकिया शेहरां च न। **12** तालू मैं ऐ दिखणे तांई पिच्छे मुडया की कुण मिजो ला गल्लां करा दा है, कने मैं सोने दे सत दिव्ये दिखे; **13** कने उना दिव्यां बिच इक प्राणी दिखया जडा माणुऐ सांई लग्गा दा था। उनी इक लम्बा चौला पाया था जडा उदे पैरां दीकर पुजदा था। उनी अपणिया छातिया दे चारो पासे इक सोने दा पटका पाया था। **14** उदे सिर दे बाल चींटिया उना सांई चिट्टे या बर्फा सांई थे। कने उदियां हखी अग्गी दिया लौई सांई चमका दियां थियां। **15** उदे पर पीतलू सांई चमक दे थे, जियां पीतलू जो भटिया च तपा दे होन, कने जालू उनी बोलया तां उदी अबाज बड्डी जोर दी थी, जियां केई इरनया ला पाणी पोणे दी अबाज होंदी है। **16** उनी अपने सजे हथे च सत तारे लियो थे, कने उदे मुऐ ला तेज दोधारी तलवार निकलदी थी; उदा मुं उतणा ही चमका दा था जियां सूरज दोपेरा बडिया धूपा च चमकदा है। **17** जालू मैं उसयो दिखया, तां इट उदे पैरां च मरयो माणुऐ सांई पेई गया। पर उनी मिजो पर सजा हथ रखीकरी बोलया, "डर मत; मैं ही है जिनी सारियां चीजां दी शुरुआत किती, कने मैं ही है जिनी सारियां चीजां जो खत्म करणा कने मैं सै है जडा हमेशा जिन्दा है, **18** चाहे मैं मरी गया था। पर हुण मैं जिन्दा है कने हमेशा जिन्दा रेणा; मैं युगां-युगां दीकर जिन्दा है; कने मेरे बाल मौत कने अधोलोक पर अधिकार है जडा मरयो लोकां दी जगा है। (aiōn g165, Hadēs g86) **19** इस तांई ट इना सारियां गल्लां जो लिखी ले,

जिना जो त दिखदा दा है, कने ऐ चीजां पक्का ही बादे च होणियां न।" **20** हुण मैं तिजो दसणा करी मेरे सजे हथे दे सत्तां तारयां दा कथा मतलब है जडा पेहले पता नी था। इदा मतलब ऐ है की सत तारे उना स्वर्गदूतां जो दसदे न जडे सत कलीसियां दी रखबाली करदे न कने सत दिव्ये सत कलिसियां जो दुशादे न।

**2** उनी मिजो ऐ भी बोलया, इफिसस शेहरे दिया कलीसिया दे अगुवे जो ऐ संदेश लिख: मैं सेई है जडा अपने सज्जे हथे च सत तारे लेई रखदा है, कने सोने दे सत दिव्यां दे बिच चलदा है, मैं तिजो ला ऐ बोलदा है: **2** मैं जाणदा है की तू क्या करता है, कने किंतप्री मेहनत करता है कने कदी हार नी मंदा। मैं ऐ भी जाणदा है की तू बुरे लोकां दियां झूठियां शिक्षा जो सेहन नी करता। तू उना लोकां जो जांचया परखया जडे बोलदे न की सै प्रेरित न पर असल च सै प्रेरित नी न कने सै सारे झूठे निकले। **3** तू सबर रखीकरी दुखां जो सेहन कितया है क्योंकि तू मिजो पर भरोसा करता है, कने फिरी भी तू मेरी सेबा करणा बंद नी किती। **4** पर हुण मिजो तिजो ला ऐ शिकायत है की: हुण तू मिजो ला सियुदा प्यार नी करता जदिया प्यार तू मिजो ला तालू करता था जालू तू पैली बरी मिजो पर भरोसा किता था। **5** इस तांई याद कर की तू शुरुआत च मिजो ला कदिया प्यार करता था कने हुण तू मिजो ला सियुदा प्यार नी करता। इसा गल्ला जो मन्नी ले कने मिजो ला सियुदा ही प्यार करणा शुरु करी दे जदिया तू शुरुआत च किता था। अगर तू मन बदलगा नी, तां मैं तेरे बाल ओणा कने जिथू तेरा दिव्या रख्या है उसयो ओथू ला हटाई करी तिजो सजा देणी। **6** पर मैं तिजो ला खुश भी है क्योंकि तू उना लोकां ला नफरत करता है जडे नीकोलस दियां गल्लां मदे न, तियां ही जियां मैं उना दे कम्मा ला नफरत करता है। **7** हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। सै लोक जडे बुरियां शक्तियां जो हरां दे, उना जो मैं जिन्दगी देणेबाले स्खे ला फल खाणे दी इजाजत देणी जडा परमेश्वरे दे स्वर्गे दे बर्गीचे च है। **8** स्मरुना शेहरे दिया कलीसिया दे अगुवे जो ऐ लिख: मैं ही है जिनी सारियां चीजां जो शुरु कितया है, कने मैं ही सै है जिनी सारियां चीजां दा अंत करणा; चाहे मैं मरी गया था कने हुण जिन्दा है कने हमेशा जिन्दा रेणा मैं तिजो ला ऐ बोलदा है; **9** मैं जाणदा है की तिजो दुख तकलीफ होए कने तू गरीब है। पर तू दिले ला अमीर है। मैं उना लोकां दे बारे च जाणदा है, जडे ऐ यकीन कने बोलदे न की सै परमेश्वरे दे चुणयो लोक न, मतलब यहूदी लोक, पर हे नी न। सै तेरे बारे च बुरियां गल्लां बोलदे न, पर असलियत च सै शैताने दिया मंडलिया दे बंदे न। **10** उना दुखां ला मत डरा जडे तिजो मिलणे न। शैताने लोकां ला तुसां चे कुछ लोकां जो गिरफ्तार करणा कने तहांजो जेल कराई देणी ताकि सै तुहाडी परिक्षा करी सके। तुसां दस दिना दीकर बडियां मुसीबतां जो झेलणा। पर मिजो पर भरोसा करणा कदी मत छडदे चाहे तहांजो मरणा पोए, क्योंकि मैं तुहाडिया जिता तांई इनाम च हमेशा दी जिन्दगी देणी। **11** हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है: जडे लोक बुराई जो हराई करी जित हासिल करदे न, उना जो उसा दुज्जी मौत ला कोई नुकसान नी होणा, जालू परमेश्वरे आखरी न्याय करणा। **12** पिरगमुने शेहरे दिया कलीसिया दे अगुवे जो ऐ लिख: मैं ही है जिदे बाल तेज दोधारी तलवार है, मैं तहांजो ला ऐ बोलदा है: **13** मैं जाणदा है, की तेरा शेहर शैताने दे काबू च है, पर इदे बावजूद भी मिजो पर भरोसा करणा नी छडया कने मेरियां शिक्षां जो मणना नी छडया। तू उस बकत भी भरोसा करणा नी छडया जालू उना अन्तिपास जो ओथू मारी दिता। सै मेरे बचना दा प्रचार करणे च भरोसे दे कारबील था, इस तांई उसयो तेरे शेहरे च मारी दिता जडा शैताने दे काबू च है। **14** पर मिजो तेरे बारे च कुछ शिकायतां न, क्योंकि तू उना गल्लां दा बिरोध नी करता जडे झूठी शिक्षा दिन्दे न, जियां परमेश्वरे दा संदेश देणेबाले बिलामे बडे पहले दीतियां थियां। बिलामे राजा बालाक जो सिखाया की इशाएल दे लोकां जो पाप करणे तांई उकसाणे तांई क्या करणा चाईदा। उनी उना जो मूर्तियां अग्रे चढाईयां चीजां जो खाणे कने व्यभिचार करणे तांई सिखाया। **15** तियां ही तुहाडे बिच कुछ लोक न जडे नीकुलदियां दे दलां दियां शिक्षां जो मदे न। **16** इस तांई पाप करणा छडी दिया, अगर तू ऐसे कम्म करणा बंद नी करणा तां मैं जल्दी ही ओणा, कने उना लोकां दे खिलाफ उसा तलबारा ला लडना, जडी मेरे मुऐ ला निकलदी है जडा मेरा बचन है। **17** हर

कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है; से लोक जडे बुराई जो हरादे न, मै उना जो उस मन्ने चे देणा जिसयो कुनी लुकाया है। मै उना चे हर इक जो इक चिट्टा पथर देणा, जिस पर इक नोआ ना लिख्या होणा। जिस माण्णे जो से मिलगा उसयो छडी करी कोई भी उन नाए जो नी जाणी सकदा। 18 थुआतीरा शेहरे दिया कलीसिया दे अगुवे जो ऐ लिखः परमेख्वरे दे पुत्रे दिया तरफा ला ऐ संदेश है जिदियां हखी अग्गी दिया लौई सांई चमका दियां थियां, कने जिदे पैर पीतलू सांई चमका दे थे, जियां पीतलू जो भटिया च तपा दे होन, से ऐ बोला दा है: 19 मै तुहाडे कम्मा जो जाणदा है की तुसां इक दुज्जे ला प्यार करदे न कने तुसां पक्का भरोसा करदे न। मै जाणदा है की तुसां इक दुज्जे दी सहायता किती, कने तुहाडी सेहनशक्ति जो भी जाणदा है। मै जाणदा है की तुसां हण पेहेले ला जादा भले कम्म करदे न जालू तुसां पेहेले मिंजो पर भरोसा किता था। 20 पर मिंजो तेरे बारे च कुछ शिकायतां न, राणी इजेबेल जडी बडी पेहेले रैडी थी, उसा सांई इक जमाना तुहाडे बिच है। से अपने आप जो परमेख्वरे दा संदेश देणेबाली बोलदी है पर मेरे चेलयां जो गलत शिक्षा दिन्दी है। से मेरे दासां जो व्यभिचार करणे कने मूर्तियां अग्गे चढाईयां चीजा जो खाणे दी शिक्षा दिन्दी है। 21 मै उसा जो अपने पापां ला पश्चात्ताप करणे दा मौका दिता है, पर से उना बुरे कम्मा जो बंद करणे ला मना करदी है। 22 मै उसा जो रोगी बणाई देणा। कने जडे उसा सोगी व्यभिचार करदे न, अगर से भी उसा सांई पाप करणा नी छडो तां मै उना जो भी बडे दुखां च पाई देणा। 23 मै उना लोकां जो मारी देणा है जडे उदिया शिक्षां जो मदे न; तालू सारियां कलीसियां जो पता चली जाणा की मै हर इक जणे दे बिचारां कने मकसदां जो परखदा। मै तुहांजो सबना जो तुहाडे अपने कम्मा दे अनुसार इनम देणा है। 24 पर थुआतीरा शेहरे च तुसां बाकी लोकां उसा झूठी शिक्षा जो नी मन्न्या। तुसां उना गल्लां च हिस्सा नी लिया जिसयो उदे चले शैताने दियां बडी जरूरी गल्लां बोलदे न। मै तुहांजो बोलदा है, की मै तुहाडे पर होर कोई जरूरी हुकम नी थोपणा, सिवाए इंटे की जालू दीकर मै नी आई जांदा तालू दीकर मिंजो पर पक्का भरोसा करदे रेनयो। 26 सै लोके जडे बुराईया जो हराई दिन्दे न, कने संसारे दे अंत दिकर मेरे हुकम मंदे रेदे न, मै उना जो देशां पर राज्य करणे दा हक देणा। 27 मै उना जो राज्य करणे दा सेई हक देणा जियां मेरे पिता मिंजो दिता है। उना दा राज्य लोए सांई मजबूत होणा जडा टुटदा नी है, उना दे दुशमणा टुटयो भांडया सांई होणा। 28 कने मै उसयो अपनी जीत दसणे तांई ब्यागा दा तारा देणा। 29 हर कुसी जो जडा मेरे संदेश जो समझणा चांदा है, उसयो इसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है।

**3** सरदीसे शेहरे दिया कलीसिया दे अगुवे जो लिखः ऐ संदेश उदिया तरफा ला है जिनी सत तारयां जो अपने हथां च रखया है कने जडा परमेख्वरे दियां सत आत्मा जो भेजदा है। से ऐ बोलदा है, की मै तेरे कम्मा जो जाणदा है: तू मिंजो च भरोसे दे लायक लगदा है, पर असल च तू मेरे हुकमा जो नी मंदा। 2 इस तांई साबधान होई जा, कने मिंजो पता लगगा है की विश्वासी होणे दे नाते जदेई जिन्दगी जिणे तांई परमेख्वरे बोलया है सिधुदी जिन्दगी तुसां नी जिया दे न। इस तांई आत्मिक निंदा ला जागी जा, कने जडे मसीह गण तुहांजो च हण भी बचयो न उना जो नोए करा इसला पेहला की सै गायब होई जान। 3 इस तांई उसा शिक्षा जो याद कर, जडी तू बडे पेहेले सुणियो थी कने भरोसा किता था, कने जडा तिजो सिखाया था उसयो मन, कने गलत कम्मा जो छडी करी पाणो जो मनी ले। अगर तू ऐसे गलत कम्म करणा नी छडदा है, तां मै चोरी छुपे ओणा, जियां राती चोर आंदा है, कने तू उस बकत जो नी जाणी सकदा जालू मै तिजो सजा देणे तांई ओणा। 4 पर सरदीस च तुहाडे बिच कुछ ऐसे लोक न जिना पाप नी कितया है, जिना विश्वासी होणे दे नाते इक पबित्र जिन्दगी जि है। उना चिट्टे कपडे पाई करी मेरे सोगी रेंगा है, क्योंकि सै भरोसे दे लायक न। 5 सै जडे जीत हासिल करदे न, उना जो भी उना सांई ही चिट्टे कपडे पेहनाणे न। मै उना दे ना उसा कताबा ला कदी नी हटणे न जिना च परमेख्वरे उना लोकां दे ना लिखयो न जिना जो हमेशा दी जिन्दगी मिलणा। मै अपने पिता दे सामणे कने उदे स्वर्गदूतां दे सामणे ऐ घोषित करणा की सै मेरे न। 6 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है।

7 फिलदिलफिया शेहरे दिया कलीसिया दे अगुवां जो ऐ लिखः ऐ संदेश उदिया तरफा ला है जडा पबित्र कने सच्च है, से जिदे बाल दाऊदे दे राज्य दा अधिकार है। अगर सै दरबाजा खोलदा है, तां कोई भी उसयो बंद नी करी सकदा। अगर सै उसयो बंद करी दे, तां कोई भी उसयो खोली नी सकदा। मै तुसां जो ऐ बोलदा है की, 8 मै तेरे कम्मा जो अच्छे ला जाणदा है। मै जाणदा है की तिजो च थोडी ही ताकत है, पर फिर भी तू मेरियां बोलियां गल्लां पर भरोसा किता कने तू इसा गल्ला ला मना नी किता की तू मिंजो पर भरोसा करदा है। इस तांई मै तिजो तांई इक दरबाजा खोलया है, जिसयो कोई बंद नी करी सकदा। 9 सै लोक जडे इक ऐसे झुंढे दे सदस्य न जडे शैताने ला रिशता रखदे न, कने बोलदे न की सै यहूदी न पर सै सच्चे यहूदी नी न कने सै झूठ बोलदे न। दिख मै ऐसा करणा है, की जिसला उना आई करी तेरे पैरां च पेई जाणा, कने उना जो पता लगी जाणा है की मै तिजो ला प्यार रखदा है। 10 तू मेरे संदेशे दा पालन किता ताकि जालू तू दुख झेले तां उसयो सबर रखीकरी सेहन करी सकन। इस बजा ला, मै तेरी परिक्षा दे बकत तेरी रक्षा करणा। जडी इस संसारे दे सारे लोकां पर ओणी है। 11 मै जल्दी ही ओणे बाला है; इस तांई तिजो मिंजो पर भरोसा करदे रेंणा चाईदा ताकि कोई भी तिजो तेरी जित दा इनम लेणा ला ना रोकी सके जडा मुकुटे सांई है। 12 सै जडे जीत हासिल करदे न, जियां इक खम्बा घरे जो मजबूत बणादा है, तियां ही उना भी हमेशा तांई परमेख्वरे दे मंदरे च रेंणा। मै उदे पर मेरे परमेख्वरे दा ना लिखणा कने परमेख्वरे दे शेहर यरूशलेम दा ना लिखणा। कने ऐ सेई शेहर है जडा स्वर्ग च है, मतलब की मेरे परमेख्वरे दिया तरफा ला थले ओणा। मै उदे पर मेरा नोआ ना लिखणा। 13 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। 14 लौदीकिया शेहरे दिया कलीसिया दे अगुवे जो ऐ लिखः ऐ संदेश उदिया तरफा ला है जडा आमीन है। कने भरोसा दिया काबलियता ला परमेख्वरे दे बारे च सच्च जो प्रगट करदा है, कने मै सेई है जिदे जरिये परमेख्वरे सारियां चीजां जो बणाया है। 15 मै जाणदा है की तू क्या करदा है, तू किताणी मेहनत करदा है कने कदी हार नी मंदा। कने ना तां तू मिंजो पर भरोसा करणे ला मना करा दा है कने ना ही मिंजो पुरे मने ला प्यार करदा है। मै चांदा है की या तां तू मिंजो मन्णे ला मना करी दे या मिंजो ला पुरे मने ला प्यार कर। 16 इस तांई की तू मिंजो पर भरोसा करणे ला मना करा दा है कने ना ही मिंजो पुरे मने ला प्यार करदा है, क्योंकि तिजो मिंजो पर अथा-अधुरा भरोसा है, इस तांई मै तिजो पूरी तरहा ला हटणे तांई तैयार है। 17 तू सोचदा है की तू अमीर है, कने तेरे बाल से सब है जिदी तिजो जरूरत है, पर तू नी जाणदा की इदा सच्च ऐ है की, तिजो पर तस ओणा चाईदा। क्योंकि सच्च ऐ है की तू गरीब है, तेरे बाल कपडे नी न, कने तू अन्ना है। 18 इस तांई मै तिजो सलाह दिन्दा है की तिजो मिंजो ला शुद्ध सोना खरीदणा चाईदा ताकि तू सच्चवी दा अमीर बणी सके। तिजो मिंजो ला अपने पाणे तांई चिट्टे कपडे भी खरीदणे चाईदे ताकि तेरा शरीर डक्की रे कने तू शर्मिंदा ना हो। कने तिजो अपनी हखी दा लाज करणे तांई दवा भी मिंजो ला खरीदणी चाईदी ताकि तू दिखी सके। 19 मै जिना-जिना ला भी प्यार करदा है, उना जो मै सिखांदा है कने सजा दिन्दा है ताकि सै खरे बणन। इस तांई अच्छाई करणे च लगगी रिया, कने पापी कम्म करणा बंद करी दिया। 20 मै तुहाडे दिले च बसणे तांई, मै उस बंदे सांई है जडा घरे बाहर खडोतया है कने दरबाजे जो खटखटा दा है। अगर तुसां मेरिया अबाजा जो सुणदे न कने मेरे तांई अपना दिल खोलदे न तां मै अंदर ओणा कने असां इक दुज्जे सोगी संगती करणी। 21 सै जडे जीत हासिल करदे न, उसयो मै अपने सोगी उदे सिंहासने पर बोणे दा हक देणा। ऐ बिलकुल मेरे सांई ही होणा, जियां मै जित हासिल कितियो हो कने अपने पिता दे बखे आसन मिलया हो। 22 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है।

**4** मै इना सारियां गल्लां जो दिखणे बाद स्वर्ग च खुलया दरबाजा दिखया। कने कोई मिंजो सोगी गल्लां करा दा था कने गल्लां करणे बाला सेई या जिसयो मै पेहेले भी सुणया था, जिदी अबाज तरही जो बजाणे दिया अबाजा सांई थी। कने उनी मिंजो बोलया, “मेरे बाल ऐथु उपर आई जा, कने मै सै गल्लां तिजो दसणियां न, जिना दा इना गल्लां बाद पूरा होणा जरूरी है।” 2 तालू ही झट परमेख्वरे दी

आत्मा मित्रो पर आई; “कने मैं स्वर्गं च इक सिंहासन दिखया कने उस सिंहासने पर कुसी जो बैठया दिखया।” 3 जडा उस पर बैठया था, उदा चेहरा बेशकीमती अन्नमोल पथरे सांई चमकदा था जिसयो यशब कने लाल कीमती पथर बोलंदे न। कने उदे सिंहासने दे चारो पासे इक इन्द्रधनुष था, जडे सेले कीमती पथरे सांई मिल्ला दा था। 4 उस सिंहासने दे चारो पासे होर चोबी सिंहासन थे; कने इना सिंहासना पर चोबी अगुवे चिट्टे कपडे पायी करी बैठयो थे, कने उना दे सिरां पर सोने दे मुकूट थे। 5 उस सिंहासने ला बिजली कने गडाकयां दी अबाज निकला दी थी कने सिंहासने दे सामणे अग्नी दे सत दिये बलयो थे, कने जडियां परमेश्वरे दियां सत आत्मा थियां, 6 कने उस सिंहासने सामणे इक फरश था जडा समुद्रे सांई चौडा था कने शीशे सांई साफ था। कने सै सिंहासन उना सबना दे बिच था कने उदे चारो पासे चार जिन्दे प्राणी दिखे, जिना दे पुरे शरीर हखी ला डकुयो थे। 7 उना चारां जिन्दे प्राणियां च प्राणी शेर सांई मिल्ला दा था, कने दुज्जा प्राणी बखडे सांई था, तिजे प्राणिये दा मुं माणुऐ सांई था, कने चौथे दा उददे बाजे सांई था। 8 कने उना चारां जिन्दे प्राणियां दे छे-छे फंग थे, कने उना दे शरीर पर हखी थियां, ऐथू दीकर की उना दे फंगा हेठ भी; कने सै रात-दिन बिना अराम कितयो ऐ बोलंदे रेंदे थे, “पबित्र, पबित्र, पबित्र प्रभु परमेश्वर, सारयां ला शक्तिशाली, जडा बकत दिया शूरआत ला लेईकरी हुणे दीकर कने हमेशा तांई नी बदलदा कने जडा औणे बाला है।” 9 जडा सिंहासने पर बैठया है, कने सै सेई है जडा हमेशा-हमेशा दीकर जिन्दा रेंदा है, जालू भी सै जिन्दा प्राणी उसयो आदर कने धन्यावाद दिन्दे न। तां सै चौबी अगुवे जडे सिंहासने पर बैठयो न, उदे सामणे झुकी जांटे न कने उदी अराधना करदे न। सै ऐ बोली करी सिंहासने दे सामणे अपने-अपने मुकूटां जो रखी दिन्दे थे। (aiōn g165) 11 ऐ साडे प्रभु परमेश्वर, तू सारियां चीजां जो बणया है, तेरिया इच्छा अनुसार सै बणाईयां न। इसा बजा ला तुसां महिमा कने आदर कने शक्ति देणे दे काबिल है।

5 जडा सिंहासने पर बैठया था, मैं उदे सजे हथे च इक कताब दिखी, कने सै कताब दोनो पासयां ला लिखियो थी, कने सै सत मुहरां लाई के बंद कितियो थी। 2 फिरी मैं इक शक्तिशाली स्वर्गदूते जो दिखया कने सै जोरे-जोरे ला ऐ प्रचार करा दा था की, “इसा कताबा जो खोलंदे दे कने इसा दियां मोहरां जो तोडने दे काबील कुण है?” 3 पर ना तां स्वर्गं च, ना ही धरती पर, ना ही धरतिया दे थले के कोई इसा कताबा जो खोलणे कने उसा जो पढने दे काबिल निकलया। 4 तालू मैं बडे जोरे-जोरे ला रोया, कयोकि उसा कताबा जो खोलणे बाला कने नां ही कोई पढने दे काबिल है। 5 इसा गुल्ला पर उना अगुवां चे इकी मित्रो ला बोलया, “मत रो; दिख, सै जिसयो यहदा दे गोत्रे दा शेर बोलंदे न, कने जडा राजा दाऊदे दा बंशज है, उनी उसा कताबा जो खोलणा कने सै उसा दियां मोहरां जो तोडी सकदा है, उनी शैताने जो हराई दिता।” 6 तालू मैं उस सिंहासने कने चारों जिन्दे प्राणियां कने उना चौबी अगुवां दे बिच इक छेलुये जो खडोटयो दिखया था। कने उस छेलुये दे शरीर पर ऐसे निशाण थे की उसयो मारी दितया था। उदे सत सिंग कने सत हखी थियां; ऐ परमेश्वर दियां सत आत्मा न, जडियां सारिया धरतिया पर भेजियां न। 7 उनी छेलुऐ आईके उदे सजे हथे ला कताब लेई ली, जडा सिंहासने पर बैठया था। 8 जालू उनी कताब लेई ली, तां सै चारों जिन्दे प्राणी कने चौबी अगुवे उस छेलुये अगो पेई गे; कने हर इकी अगुवे हथे च वीणा कने धुंने ने भरुया सोने दा कटोर लाया था, उस धुंने दी खुशबु उना लोकां दी प्राथना दा निशाण है जडे परमेश्वरे दे सेवक न। 9 कने सै ऐ नोआ गीत गाणा लगगे, तू इसा कताबा जो खोलणे कने इदिया मोहरां जो खोलणे दे काबील है; कयोकि उना तेरी बलि दिती कने तू अपने खुने ला हर इक कुले, भाषा, लोकां, कने जातियां चे परमेश्वरे तांई लोकां जो खरीदी लिया। 10 कने तू उना जो ऐसे लोक बणाई दितया है जिना पर साडा परमेश्वर राज करदा है कने याजक बणया जडे उदी सेवा करदे न, कने उना धरतिया पर राज करणा। 11 जालू मैं फिरी दिखया, तां मैं अचानक उस सिंहासने कने उना जिन्दे प्राणियां कने चौबी अगुवां दे चारो पासे ला स्वर्गदूतां दियां अबाजा सुणियां, जिना दी गिणती नी करी सकदे थे। 12 कने सै जोरे ला गांटे दे थे, “धन्य है, सै छेलू जिसयो मारी दितया था, सै महिमा दे काबिल है। उदा अधिकार महान है। उदा ज्ञान गेहरा है। सै बडा शक्तिशाली है कने बडा अमीर है। ओआ असां उदा आदर करन। ओआ असां उदी स्तुति करन।” 13 फिरी मैं स्वर्गं

च, कने धरतिया पर, कने धरतिया दे थले, कने समुद्रे दियां बणाईयां सारियां चीजा जो, कने सै सब केसी जो जडा उना चे है, उना जो ऐ बोलंदे सुणया, “की ओआ असां उदी स्तुति करन जडा सिंहासने पर बैठया है। ओआ असां हमेशा तांई छेलुये दी महिमा करन कने उसयो आदर देन कयोकि सै सारयां ला जादा शक्तिशाली है।” (aiōn g165) 14 कने चारों जिन्दे प्राणियां, “आमीन” बोलया, कने सै अगुवे झुकी करी उदी अराधना करणा लगगे।

6 फिरी मैं दिखया की छेलुये उना सतां मुहरां चे इकी जो खोलया; कने मैं चारों जिन्दे प्राणियां चे इकी जो पुकारंदे सुणया। उदी अबाज गडक्यां सांई तेज थी। उनी बोलया, “हुण जा, अगो बद।” 2 तालू ही मिंजो इक चिट्टा घोडा मिल्ला, कने उदे पर सवार होयो माणुऐ धनुष लिया था; कने उसयो इक मुकूट भी दितया था, कने सै इक विजेता सांई जित हासिल करणा निकलया कने दुबारा ला उनी ही जितणा। 3 जालू छेलुये दुज्जी मोहर खोली, तां मैं दुज्जे जिन्दे प्राणिए जो ऐ बोलंदे होऐ सुणया, “हुण जा, अगो बद।” 4 फिरी इक चमकदार लाल घोडा उसा जगा ला बाब आया जिथू सिंहासन रख्या है। परमेश्वरे उस पर बैठयो जो धरती दे लोकां जो अपु चे लडाणे दी शक्ति दिती, ताकि सै लडाईया दे बकत इक दुज्जे जो मारी देंन। इस कम्मे तांई परमेश्वरे इस सवारे जो इक बड्डी तलबार भी दितियो थी। 5 जालू छेलुये तिजी मोहर खोली, तां तिजे जिन्दे प्राणिए जो ऐ बोलंदे होऐ सुणया, “हुण जा, अगो बद।” कने तालू मैं दिखया की इक काला घोडा बाहर आया है कने उस पर सवार बंदे दे हथे च इक तरकडी थी। 6 कने मैं सुणया की उना चारां जिन्दे प्राणियां चे कोई बोला दा था, ऐ माणुऐ सांई अबाज थी की, “ओणे बाले दिना च धरतिया पर अकाल पोणा। इस तांई इक किलो कणक कने तिन किलो जौ दी कीमत पुरे इक दिने दिया ध्याडिया बराबर होंगी। पर तेले कने अंगरा दे रसां दी कीमत नी बदलणी।” 7 जालू छेलुये चौथी मोहर खोली तां मैं चौथे जिन्दे प्राणिए जो ऐ बोलंदे सुणया, “हुण जा, अगो बद।” 8 तालू मैं फीका पिया हरे रंगे दा घोडा दिखया; कने उस पर सवार बंदे दा नां मौत था; कने अधोलोक उदे पिच्छे-पिच्छे ओआ दा था। कने उसयो धरतिया पर रेणेबाले इक चौथाई लोकां जो मारणे दा हक है। उनी उना जो भूखा ला, उना जो बुरियां-बुरियां बिमारियां जो, कने उना जंगली जानवरां ला मारी दिता। (Hades g86) 9 जालू छेलुये पंजमी मोहर खोली, तां मैं वेदिया दे थल्ले उना लोकां दिया आत्मा थियां जिना जो मारी दितया था कयोकि उना परमेश्वरे दे बचना दा प्रचार कितया था कने प्रभु यीशू पर भरोसा करणे ला पिच्छे नी हटे की यीशू उना दा प्रभु है। 10 कने उना जोरे ला पुकारी करी परमेश्वरे ला बोलया, “हे पबित्र कने सच्चे परमेश्वर; तू धरतिया पर रेणेबाले उना बुरे लोकां जो सजा देणे च इतणा लम्बा इंतजार कजो करदा है?” असां बिनती करदे न की तू उना लोकां दे व्यवहारे जो बदला ले जिना सांडो मारी दितया था। 11 कने उना चे हर इकी जो चिट्टे कपडे दितयो। कने परमेश्वरे उना जो बोलया, “हुणे तांई अराम करा, कयोकि हल्ले भी कुळ सोगी कम्म करणे बाले कने तुहाडे साथी मसीह भाई न, जिना जो तुहाडे सांई मारी देणा है। जालू दीकर तुहाडे मसीह साथियां दे मरणे दी संख्या पूरी होई जागी, तालू ही मैं बदला लेंगा।” 12 जालू मैं उसयो छेमी मोहर खोलंदे दिखया, तां मैं दिखया की इक बडा बडा हिलण होया, कने सरज दा रंग काले कम्बले सांई काला होई गया कने पूरे चन्द्रमे दा रंग खुने सांई लाल होई गया। 13 कने अम्बरे दे तारे धरतिया पर इयां पेई गे जियां तूफाने ला स्खे ला कच्चे फल पेई जांदे न। 14 अम्बर उस कागजे सांई गायब होई गया जिसयो लपेट्टी दितया हो कने सारे पाड कने समुद्रे चे सारे टापूआं अपनी जगा बदली दिती। 15 इदा नतीजा ऐ होया की, तालू धरतिया दे राजे, कने प्रधान, कने सरदार, कने अमीर कने सामर्थी लोक, कने हर इक सेवक, कने जडे गुलाम नी न, सारे पाडां दियां गुफां च कने पथरां थल्ले जाई लुकयो न; 16 कने पाडां कने पथरां ला बोलणा लगगे, “साडे पर पेई जा; कने सांडो उसला बचाई लिया जडा सिंहासने पर बैठया है कने छेलुऐ दिया सजा ला बचाई लिया।” 17 कयोकि सै भयानक दिन आई गया है जालू परमेश्वरे कने छेलुये सारयां जो सजा देणी कने कोई भी इसा सजा ला नी बची सकदा।

7 इदे बाद मैं धरतिया दे चारों कुणा च चार स्वर्गदूतां जो खडोटया दिखया। कने उना स्वर्गदूतां जो परमेश्वरे हक दितया है की सै संसारे दे लोकां जो दुख

पेशानिया च पाई करी उना दा नुकसान करन, चाहे सै धरती च होन या समुंद्र च। उना संसारे दे चारो कुण्यां ला होआ जो रोकी दिता, ताकि समुंद्र च धरती च या बणे च होआ ना चलो। मैं इक होर स्वर्गदूते जो पूर्व दिशा पास्से ला प्राट्ट होंदे दिखया, उदे बाल जिंदे परमेस्वरे दी मोहर थी। उनी स्वर्गदूते उच्चिया अबाजा ला उना चार स्वर्गदूतां जो पुकारी करी बोलया; 3 “जालू दीकर असां अपने परमेस्वरे दे सेबकां दे मथयां च मोहर नी लागे, तालू दीकर धरती कने समुंद्र कने स्व्हां दा नाश मत करदे, ताकि सै उना दुख पेशानिया च नी पोंन।” 4 जालू स्वर्गदूतां मोहर लागे दा कम्म पूरा करी लिया। तां कुनी मिंजो दसया की सै लोक जिना दे मथे पर स्वर्गदूतां परमेस्वरे दी मोहरा दा निशाण लाया है, उना दी गिणती 1,44000 थी। ऐ लोक इस्राएल दे बारां गोत्रां च थे: 5 स्वर्गदूतां यहदा दे गोत्रां चे बारह हजार पर परमेस्वरे दी मोहर लाई, स्व्बेने दे गोत्रे चे बारा हजार पर, गाद दे गोत्रे च भी बारा हजार, 6 अशेर दे गोत्रे चे भी बारा हजार, नमाली दे गोत्रे चे भी बारा हजार; मनशरे दे गोत्रे चे भी बारा हजार, 7 शमौने दे गोत्रे चे बारा हजार पर, लेवी दे गोत्रे चे बारा हजार पर, इस्राकार दे गोत्रे चे बारा हजार, 8 जबूलने दे गोत्रे चे बारा हजार, युसुफे दे गोत्रे चे बारा हजार, कने बिन्यामीन दे गोत्रे चे बारा हजार पर मोहर दिती है। 9 इदे बाद मैं दिखया की लोकां दी इक इतणी बडी भीड थी की कोई भी उना सारयां जो गिणी नी सकदा था। सै संसारे दिया हर इक जाति, कने कुल, भाषा चे थे। सै सारे सिंहासने कने छेल्ले सामणे खडोतयो थे। उना चिटे कपडे पायो थे कने उना सारयां हथे च खजूरी दियां डालियां पकडियां थियां कने जडा इक त्योहारो दा प्रतीक है; 10 कने जोरे ला पुकारी करी बोला दे थे, “साडे परमेस्वरे दी स्तुति हो, जडा सिंहासने पर बैठया है, कने छेल्ले दी जै-जै कार करा! सिर्फ तू ही है जडा उदार करता है।” 11 कने सारे स्वर्गदूत, उस सिंहासने दे चारो पासे कने अगुवां दे कने चारों जिन्दे प्राणियां दे चारों पासे खडोतयो थे। फिरी सै सिंहासने दे अगो दण्डवत होई गे कने उना परमेस्वरे दी अराधना किती। 12 “आमीन, असां हमेशा तेरी महिमा करदे न, तिजो धन्यवाद कने इज्जत दिन्दे न। असां मंदे न कने तू ज्ञानवान, कने शक्तियाली है, जडा हमेशा तां सारे कम्म जो करणे दे काबिल है। परमेस्वरे दा धन्यावाद कने महिमा करदे न।” (aiōn g165) 13 उना चे इकी अगुवे मिंजो ला पुच्छया, “ऐ जिना चिटे कपडे पायो थे सै कुण है? कने कुथु ला आयो न?” 14 मैं उसयो बोलया, “हे मालिक, मैं नी जाणदा पर तू जाणदा है।” उनी मिंजो बोलया, “ऐ सै लोक न जिना बडा दुख झेलया है। उना अपने कपडयां जो छेल्ले दे खूने ला धोई लिया है कने हण सै चिटे होई गियो न, इदा मतलब ऐ है की उना दे पाप मिटाई दितयो न।” 15 इसा ही बजा ला सै परमेस्वरे दे सामणे खडोतयो न, कने हर बकत दिन रात परमेस्वरे दे घरे च उदी सेवा करदे न। कने सै जडा सिंहासने पर बैठया है, उनी उना बिच रेंगा कने उना दी रक्षा करणी। 16 “उना फिरी भूखे कने प्यासे नी होणा; कने ना ही सूरजे उना जो धुपा ला जलाणा कने ना ही गर्मियां ला उना जो जलन होणी। 17 क्योकि छेलू जडा सिंहासने बिच है, उनी उना दी देखभाल करणी, तियां ही जिना इक पुआल अपणियां भेडां दी देखभाल करता है कने उनी उना जो ताजा पाणिए बाल लेई जाणा जडा लोकां जो जिन्दगी दिन्द्या है कने परमेस्वरे उना दिया हखी ला सारे आंसू पूंजी देणे।”

8 जालू छेल्ले सतमी मोहर खोली, तां सै सारे जडे स्वर्ग च थे अघे घटे तांई शांत होई गे। 2 तालू मैं उना सतां स्वर्गदूतां जो दिखया जडे परमेस्वरे दे सामणे खडोतयो रेंदे न, कने उना जो सत तुरहियां दितियां च। 3 फिरी ओथु ला, इक होर स्वर्गदूत सोने दा इक धूपदान लाई करी अया कने वेदिया बखे खडोई गिया। कने उसयो सारयां लोकां दियां प्राथना समेत बालने तांई बडा भरी धूप दिता। उनी धूप कने प्राथना जो उस सोने दिया वेदिया उपर बाली दिता, जडी परमेस्वरे दे सिंहासने दे सामणे है। 4 जालू उनी ऐसा किता, तां धूपे दा धुंआं पबित्र लोकां दियां प्राथना समेत स्वर्गदूते दे हथे ला उठी करी परमेस्वरे दे सामणे गिया। 5 तालू स्वर्गदूते धूपदाने जो वेदिया दिया अग्नी चे अंगारे भरी दिते, कने धरतिया पर फेंकी दिते, कने फिरी गडाके, बिजली, कने अबाजां, कने हिरण होणा लग्यो। 6 कने सै सतां स्वर्गदूत जिना बाल सत तुरहियां थियां उना जो बजाणे तांई तैयार होऐ। 7 पहले स्वर्गदूते तुरही बजाई कने खूने ला मिलयो ओले कने अग्ग पैदा होई, कने धरतिया पर पेई गे। इसा बजा ला धरतिया दा इक तिहाई हिस्सा फकोई गिया, कने स्व्हां दी

इक तिहाई भी फकोई गे, कने सारा सेला था भी फकोई गिया। 8 दुज्जे स्वर्गदूते तुरही बजाई, तां इक अग्ग लगयो बडे बड़े पाडे सांई कोई चीज समुंदरे च पेई गेई, कने इसा बजा ला समुंद्र भी इक तिहाई हिस्सा खूने सांई होई गिया, 9 कने समुंदरे च रेणेबाले इक तिहाई प्राणी मरी गे। इसला समुंद्रे दे इक तिहाई जाज खत्म होई गे। 10 तीजे स्वर्गदूते तुरही बजाई, कने इक बडा बडा तारा मशाला सांई बलया होया स्वर्ग ला टुटया, कने नदियां दे इक तिहाई हिस्से पर, कने ताजा पाणिए दे तलाबां पर जाई पिया। 11 उस तारे दा नां कौडा है। इदिया बजा ला सै सारा इक तिहाई पाणी कौडा कने जरिला होई गिया, कने उस पाणिए जो पीणे बालयां दी मौत होई गेई। 12 चौथे स्वर्गदूते तुरही बजाई, तां सूरजे दा इक तिहाई, चन्द्रमे दा इक तिहाई कने तारयां दे इक तिहाई पर कोई चीज टकराई, इसा बजा ला दिने दे इक तिहाई बकते दीकर सूरज नी चमकया कने चन्द्रमा कने तारे राती दे इक तिहाई बकते दीकर नी चमके। 13 जालू मैं फिरी दिखया, तां अम्बरे च इक बाजे जो बडे उच्चा उडदे दिखया कने जोरे ला ऐ बोलदे सुणया की, “जालू आखरी तिन्ना स्वर्गदूतां उना तुरही जो बजाणा जडियां उना जो दितियां न, तालू संसारे पर ओणे बालियां मुसीबतां बडियां भयानक न। धरतिया पर रेणे बालयां पर, हाय, हाय, हाय।”

9 जालू पंजमे स्वर्गदूते तुरही बजाई, तां मैं स्वर्ग ला धरतिया पर इक तारा पोंदा दिखया, कने उसयो अथाह कुंडे दी चार्बी दितियो थी। (Abyssos g12) 2 उनी अथाह कुंडे जो खोलया, कने कुंडे ला बडी बडिया भटिया सांई धुंआ निकलया, कने कुंडे दे धुंए ला सूरज कने बाताबरन काला होई गिया। (Abyssos g12) 3 उस धुंए चे धरतिया पर टिड्डियां निकलियां, कने उना जो बिछुआं सांई लोकां जो डंग मारणे दी शक्तियां दितियां थियां। 4 जियां कुसी जो बिछुए दे डंग मारणे ला पीड होई है, तियां ही इना टिड्डियां जो पंज मिने दीकर उना दा नुकसान करणे दा हुकम दितया है जिना दे मथे पर परमेस्वर दिया मोहरा दा निशाण नी था। पर उना जो ना तां धरती दे घा जो, ना कुसी बूटे जो कने ना कुसी खेदा दा नुकसान करणा था। 6 उना पंज मिनयां च लोकां मरणे दे तरीके तोपणे न, पर उना मरी नी सकणा है। उना जो मरणे दी इच्छा होणी, पर उना ला मरी नी होणा। 7 ऐ टिड्डियां दिखणे च लडाईया तांई तैयार घोडयां सांई लगदियां थियां, कने उना अपने सिरां पर सोने दे मुकुट सांई कुछ पाया था। कने उना दे मुह माणुआं सांई थे। 8 कने उना दे बाल जनानिया दे बालां सांई लम्बे थे। कने उना दे दंद शेर दे दंदा सांई पक्के थे। 9 उना अपणिया छातिया पर लोहे दा कवच पाया था। जालू सै उडदे थे, तां सै सियुदी अबाज करदे थे, जियां मते घोडे लडाईया च जाणे बाले रथां जो खिचदे बेले करदे न। 10 उना दियां बिछुआं सांई पंछा कने डंग थे। कने उना दिया पंछा च डंक थे, कने उना जो पंज मिने दीकर माणुए जो दुख देणे दी शक्ति मिलियो थी। 11 इक राजा है जडा उना जो काबू करता है। सै सेई शैताने दा दूत है जिनी अथाह कुंडे जो खोलया था, उदा ना इब्रानी भाषा च अब्दोन है, कने यूनानी भाषा च अपुल्लयोन है, जिदा मतलब है की सै जडा नाश करता है। (Abyssos g12) 12 पंज मिने बाद सै मुसीबत खत्म होई जाणी। पर इदे बाद भी होर दो मुसीबतां ओणे बालियां तां। 13 इदे बाद जालू छेमे स्वर्गदूते अपणी तुरही बजाई। जालू उनी उसयो बजाया तां मैं परमेस्वरे दे सामणे धूप बोलने बालिया वेदिया दे चारो कुणा ला इक अबाज सुणोई, 14 उना अबाजां छेमे स्वर्गदूते ला बोलया, “उना चार शैताने दे दूतां जो खोली दे जडे फरता नाऐ दिया खड्डा दे बखे बनयो न।” 15 इस तांई तालू सै चारों शैताने दे दूत खोली दिते। सै पेहेले ला ही तैयार थे कने उना जो बोलया था की इस मिने, इस दिन, इस साल तांई इतंजार करा कने हण ऐ बकत आई गिया था। उना जो संसारे दे इक हिस्सा लोकां जो मारणा था। 16 ओथु घोडे पर सवार सेनिका दी फौज गिठी होई, जिना दी गिणती मैं 20 करोड सुणी। 17 सै घोडे कने उना दे सवार जिना जो मैं दर्शन च दिखया, सै उना दे रक्षा करणे बाले कवच अग्नी सांई लाल, गाडी नीली कने गंधक सांई पिली थी। घोडयां दे सिर शेर दे सिरा सांई लगदे थे, उदे मुंए ला अग्ग, धुंआ कने गंधक निकला दे थे। 18 इना उना मुसीबतां ला, जडियां घोडयां दे मुआं ला निकलने बाली अग्ग, धुंआ, कने गन्धक थी, इना ला इक तिहाई लोक मारी दिते। 19 पर उना घोडयां बाल लोकां जो मारणे तांई दो लग चीजां थियां, पेली तां सै उना दे मुंए ला निकलदी थी, दुज्जी उना दिया पुछां च थी। क्योकि उना दियां पंछा सप्पां सांई थियां, कने उना



चे लोकां जो कटणे तांई सिर थे। 20 पर बाकी लोक जडे उना मुसीबतां ला पेहले नी मरयो थे, उना हल्ले भी अपने बुरे कम्म करणा नी छडे। उना हत्या करणा, टूणा-टोटका, नाजायज रिश्ते, चोरी करणा नी छडया। उना बुरियां आत्मा कने अपने हथां ला बणियां चीजां दियां पूजा करणा भी नी छडया, जियां की सोने या चांदी या पितल या पत्थर या लकडिया ला बणियां मूर्तियां, जडियां ना तां दिखी सकदियां, कने ना सणदियां, कने ना ही चलदियां ना।

**10** फिरी मैं इक होर शक्तिशाली स्वर्गदूते जो स्वर्ग ला उतरदे दिखया कने इक बदल उदे चारो पासे था। कने इक इन्द्रधनुष उदे सिरे चारो पासे था, कने उदा मुं सूरजे सांई चमकदा था कने उदियां जंगा अग्नी दे बलदे खम्बयां सांई थियां। 2 उदा सज्जा पैर समुंद्रे पर रख्या, कने उदा खबा पैर जमिना पर रख्या। उदे हथे च इक छोटा दिया कागज था। 3 उनी स्वर्गदूते जोरे ला पुकारया कने उदी अबाज शेर दे गर्जणे सांई थी। जालू सै चीखया, तां सत तेज अबाजां उसयो जबाब दिता, जडी गडाकयां दिया अबाजा सांई थियां। 4 जालू सतों गर्जणे दियां अबाजां बंद होई गियां, तां मै जडा सुण्या उसयो लिखणा लग्गा, पर मै स्वर्ग ला ऐ अबाज सुणी, “जडियां सत गल्लां तू गर्जणे ने सुणियां न, उना जो छुपाई रख कने लिख मत।” 5 जिस स्वर्गदूते जो मै दिखया था, सै समुंदरे कने धरतिया पर खडोतयो था, उनी अपना सज्जा हथ कसम खाणे तांई स्वर्ग पासे चुकया। 6 कने जडा हमेशा-हमेशा दीकर जिन्दा रेंदा है, जिनी स्वर्ग, धरती कने समुंद्रे कने उना च रेणे बालियां सारियां चीजां जो बणाया है, उदे नाए दी कसम खाई करी उनी बोलया की, “हुण कुसी भी गल्ला तांई होर जादा इंतजार नी करणा पोणा। हुण सै सारियां पुरियां होई जाणियां।” (aiōn g165) 7 सतमें स्वर्गदूते जो तुर्ही बजाणे दे दिनां च, जालू उनी तुर्ही बजाणी है, तालू उनी जल्दी कम्म करणा है, उनी अपणिया गुप्त योजना जो पूरा करणा, जियां की उनी अपने सेबक परमेश्वरे दे संदेश देणेबालयां जो इदा शुभसमाचार दितया था। 8 तालू मैं फिरी सै अबाज सुणी जिनी स्वर्ग च मिंजो ला गल्ल किती थी। अबाजा मिंजो ला बोलया, “जा, उसा छोटीया दिया कताबा जो लेई ले जडी स्वर्गदूते दे हथे खुलियो है जडा स्वर्गदूत समुंदर कने धरतिया पर खडोतया है।” 9 मै स्वर्गदूते बाल जाई करी बोलया, “ऐ छोटी देई कताब देई दे।” कने उनी मिंजो ला बोलया, “ले इसयो खाई ले; इसा दा स्वाद तां मखिरे सांई मीठा है,” पर बादे च इदिया बजा ला तरे पेटे च तकलीफ होणी। इस तांई मै सै कताब लेई लि जडी स्वर्गदूते पकडियो थी कने खाई लेई कने सच्ची इदा स्वाद शेरदे सांई मीठा था, पर जालू मै इसयो निगली लिया, तां मेरा पेट दुखणा लग्गा। 11 तालू मिंजो ला ऐ बोलया, “लग्ग-लग्ग झुंडा कने देशां कने लग्ग-लग्ग भाषा बोलणे बालयां लोकां जो कने राजयां जो इक बरी फिरी ला दास, जडा परमेश्वर तिजो बोलणे तांई बोलदा है।”

**11** फिरी मिंजो नापणे तांई इक सोठीं दिती कने परमेश्वरे मिंजो बोलया, “उठ, जा कने मेरे मंदरे कने वेदिया दा नाप ले, कने उना लोकां दी गिणती कर जडे ओथू मेरी अराधना करा दे ना।” 2 पर मंदरे दे बाहरे दे अंगणे जो मत नाप; उसयो रेंपी दे क्योकि सै लोक जडे परमेश्वरे जो नी जाणदे उना जो दितया है, कने उना पबित्र शेरह यस्शलेम जो बयाली मिनयां दीकर बरबाद करदे रेणा है। 3 “कने मै अपने दो गबाहां जो ऐ हक देणा की सै टाट ओढी करी इक हजार दो सो सठ दिनां दीकर भविष्यवाणी करणा।” 4 ऐ सेई दो जैतून खू कने दो दित्ये न जडे धरतिया दे प्रभुऐ दे सामणे खडोतया ना। 5 कने अगर कोई उना दा कोई नुकसान करणा चांदा है, तां उदे मुंऐ ला अग्न निकलदी है कने उना दे दुश्मणा जो भस्म करी दीदी है, कने अगर कोई उना जो नुकसान करणा चांगा, तां सै पक्का इसी तरीके ला मारी देणा। 6 उना जो हक है की अम्बरे जो बंद करन, ताकि उना दी भविष्यवाणियां दे दिनां च कोई बरखा ना हो; कने उना जो सारे पाणिए पर हक है, की उसयो खून बणान, कने जालू-जालू सै चांगे तालू-तालू सै धरतिया पर मुसीबतां जो लेई ओन। 7 जालू उना दो गबां परमेश्वरे दे संदेशे दा प्रचार करी बौणा है, तालू सै जंगली जानवर जडा अथाह कुंडे ला निकलना है, उनी दो लोकां सोगी लडणा, कने उना जो हराई देणा कने मारी देणा। (Abyssos g12) 8 कने उना दियां लाशां बडे शेरह यस्शलेमे दियां सडकां पर रेंपियां न, जित्थू उना दा प्रभु भी सूली पर चढाया था। इस शेरहे जो निशाण दे स्पे च सदाम कने मिस्र देश बोलदे ना। क्योकि

इस शेरहे दे लोक सदाम कने मिस्र देशे दे रेणे बालयां लोकां सांई बडे बुरे थे। 9 कने सारे लोक, कने कुल, कने भाषा, कने जातियां सारे लोकां उना जो साढे तिन दिनां दीकर दिखदे रेणा है, पर उना कुसी दिया भी लाशां जो दफनणा नी देणा है। 10 कने इस संसारे दे लोकां उना दे मरणे पर खूश होणा कने मगन होणा कने इक दूज्जे जो तोफे भेजणे न, क्योकि इना दोनो परमेश्वरे दे संदेशे देणेबालयां संसारे दे लोकां जो दुखी कितया था। 11 पर साढे तिन दिनां दे बाद परमेश्वरे उना च अपना सा पाया कने सै जिन्दे होई गे, कने सै खडोई गे, कने जिना लोकां उना जो दुबारा ला जिन्दे दिखया, सै डरी गे। 12 इदे बाद उना दो लोकां स्वर्ग ला इक बंदे जो बोलदे सुण्या, जिनी उना जो जोरे ला पुकारया कने बोलया, “ऐथू उपर ओआ।” जालू दुश्मण दिखा दे थे, तालू सै इक बदले ला डकुई करी स्वर्ग जो चली गे। 13 फिरी तालू ही यस्शलेम शेरहे च इक बडा बडा हिलण होया, कने शेरहे दियां इमारतां दा दसमां हिस्सा पेई गिया, कने उस हिलणे ला सत जार लोक मरी गे कने जडे लोक बची गियो थे, सै डरे ला रोंणा लगे कने उस परमेश्वरे दी महिमा करणा लगे जडा स्वर्ग च है। 14 ऐ दुज्जिया मुसीबता दा खाम्ता था; पर हल्ले इक होर है जडी तोल्लेई ओणे बाली है। 15 जालू सतमे स्वर्गदूते तुर्ही बजाई, तां मै स्वर्ग ला तेज अबाजां जो पुकारदे सुण्या: “संसारे च हुण होर कोई नी है जडा राज करे, सिर्फ साडा परमेश्वर कने उदा चुण्या मसीहे राज करणा कने उनी हमेशा तांई राज करणा।” (aiōn g165) 16 कने चौबियां अग्लां जडे परमेश्वरे सामणे अपने-अपणे सिंहासने पर बैठयो थे, उना परमेश्वरे अगे दण्डवत करिरी, 17 ऐ बोलणा लगे, “हे सारयां ला शक्तिशाली प्रभु परमेश्वर, कने तू सेई परमेश्वर है, जडा बकत दी शुक्रआत ला लोईकरी हुणे दीकर कने हमेशा तांई नी बदलदा, असा सच्ची तेरा धन्यावाद करदे न, क्योकि तू हुण अपनी महान सामर्थ्य दर्सी कने हुण तू धरती पर अपना राज्य शुरू करी दिता है। 18 कने जीना देशां दे लोक तिजो पर भरोसा नी करदे सै बडे गुस्सा न, कने बकत आई गिया है की तू अपना गुस्सा दर्से कने उना सारयां दा न्याय करणे दा बकत आई गिया है जडे मरी गियो ना। कने हुण सै बकत भी है जालू तू उना परमेश्वरे दा संदेशे देणेबालयां जो इनाम देणा जडे तेरी सेवा करदे न कने उना सारे लोकां जो जडे तेरी इज्जत करदे न, हालांकि तू उना दा नाश करी देणा है जिना धरती दा नाश कितया है।” 19 कने परमेश्वरे दा जडा मंदर स्वर्ग च है, सै खोली दिता, कने उदे मंदरे च उदी बाचा दा संदूक मिल्ला, कने बिजली लग्गी, गडाके होए, हिलण होए, कने बड़े-बड़े ओले पे।

**12** जालू सै सुकी गिया, तां ओथू इक अनोखा निशाण था, जिसयो अम्बरे च दिखी सकदे थे। क्योकि चन्द्रमे पर इक खडोतियो जनानी प्राट होई जिना एसे कपडे पायो थे जडे सूरजे सांई चमकदे थे। कने उसा दे सिरे पर मुकुट लाया था, जिडे उपर बारा तारे थे। 2 सै जनानी गर्भवती थी, उसा दा बच्चा पैदा करणे दा बकत आई गिया। कने सै बच्चा जमणे दिया पीडा ला रोआ दी थी। 3 इक होर निशाण अम्बरे च मिल्ला, इक बडा बडा लाल अजगर था, जडा शैतान है। उदे सत सिर थे कने दस सिंग थे, कने उदे सतों सिरा पर सत मुकुट थे। 4 कने उदिया पूंछा अम्बरे दे इक तिहाई तारयां जो खिची करी धरतिया पर सुटी दिता, सै अजगर उसा जनानिया दे सामणे जाई खडोता, ताकि जालू सै बच्चा जम्मे तां उसा दे बच्चे जो खाई जा। 5 तालू उना जनानिया जागते जो पैदा किता, पर उसयो अजगर नी खाई सकया क्योकि उसयो झट खोई लिया कने परमेश्वरे दे सिंहासने सामणे लेई ओदा। उनी जागते इक लोहे दे डंडे सोगी सारे देशां दे लोकां पर राज करणा। 6 कने सै जनानी उसा सुनसान जगा जो नठी गेई, जडा परमेश्वरे उस तांई तैयार कितया था ताकि सै ओथू इक हजार दो सो सठ दिनां दीकर पली सके। 7 फिरी स्वर्ग च लडाई होई, तां परमेश्वरे दे मुख्य स्वर्गदूतां च इकी जिदा ना मीकाईल है, उनी अपने अर्धीन स्वर्गदूतां सोगी अजगरे पर हमला किता। कने अजगर कने शैताने दे दूतां मीकाईल दे खिलाफ लडाई लडी। 8 अजगर लडाई हरी गिया, कने उसयो कने उदे दूतां जो स्वर्ग ला कडी दिता। 9 इस तांई उसयो कने उदे दूतां जो धरतिया पर फेंकी दिता। ऐ बड्ठा अजगर सेई है जडा बडे पेहले सपे दे स्पे च मिल्ला था, जिसयो शैतान या दोष लांणे बाला बोलदे ना। ऐ सेई है जडा इस संसारे दे लोकां जो धोखा दिन्दा आया है। 10 फिरी मै स्वर्ग ला ऐ जोरे ला अबाज सुणी, हुण साडे परमेश्वरे अपने लोकां जो बचाणा! हुण उनी अपणिया शक्तियां दा इस्तेमाल करणा कने राजे दे स्पे च राज करणा! हुण उदे मसीहे संसार

पर अपने अधिकारे दा दाबा करणा! हुण शैताने साडे परमेश्वरे दिया हजुरी च खडोई करी साडे साथी सेबकां पर दिन रात दोष नी लाणा, क्योंकि उसयो स्वर्ग ला बार फेंकी दितया है! 11 कने साडे भरोसा करणे बालयां शैताने जो राई दिता। उना उसया छेल्लये दे खूने दिया शक्तिया ला हराया है, जडा उना जो पापां ला छुडाणे तांई मरी गिया था। क्योंकि उना भरोसा करणा नी छडया की छेल्ल उना दा प्रभु है। हालांकि उना जो दुख तकलीफ होई, ऐथू दीकर की उना जो मारी भी दिता पर सै अपने उस भरोसे ला पिच्छे नी हटे। 12 इस तांई तुसां सारायां जो खुश होणा चाईदा जडे ऐथू स्वर्ग च रेंदे न। पर तुसां जडे धरती पर न कने जडे समुंद्रे च न तुहांजो पर तरस खाणा चाईदा, क्योंकि बुरियां आत्मा दा अणुवा थले तुहांडे बाल आई गिया है। असल च सै बडा जादा गुस्सा है क्योंकि सै जाणदा है की जल्दी ही उदा अंत होई जाणा। 13 जालू अजगरे समझी लिया, की उसयो धरतिया पर सुटी दितया है, तां उनी उसा जनानिया दा पिच्छा किता जिना पुत्र जमया था। 14 पर परमेश्वरे उसा जनानिया जो बाजे दे दो फंग दितयो थे, ताकि सै उडी करी सुनसान जग च जा जडी उसा तांई तैयार कितियो था। कने ओथु उसा दी साडे तिन्ना सालां दीकर देखभाल किती ताकि अजगर उसा दीकर ना पुज्जी सके। 15 तालू अजगरे उसा जनानिया पर अपने मूरे ला खडा सांई पाणी फेंकया ताकि बाड उसा जो सडाई लेई जा। 16 पर धरतिया उसा जनानिया दी सहायता करणे तांई पाणिए जो निगली लिया जडा अजगरे अपने मूरे ला निकला था। 17 इस बजा ला, अजगर उसा जनानिया पर बडा गुस्सा होया, इस तांई उनी जनानिया दे बंशजा दे खिलाफ लडाईया दी घोषणा करी दिती। मतलब की उना लोकां दे खिलाफ जडे परमेश्वरे दे हुकमा जो मंदे न कने यीशु मसीह दियां सिखाईयां शिक्षा जो मंदे रेंदे न।

**13** तालू सै अजगर चली गिया कने समुंद्रे दे कंडे पर खडोई गिया। तां मै इक जानवरे जो समुंद्रे ला निकलदे दिखया, जिसदे दस सिंग कने सत सर थे। उदे सिगां पर दस राजमुकुट थे, कने उदे हर इक सिरे पर परमेश्वरे दे खिलाफ इक ना लिख्या था। 2 जडा जानवर मै दिखया, सै चिते सांई था; उदे परे भालुए सांई थे, कने मुं शेर सांई था। अजगरे अपनी शक्ति इस जानवरे जो देई दिती कने उसयो धरती पर राज करणे दा हक देई दिता। 3 मै जानवरे दे सिगां चे इकी सिरे च इक डुगे जखमे दा निशाण था, जडा उदिया मौता दी बजा बणी सकदा था, पर उदा जखम खरा होई गिया था, इस तांई धरतिया दे लोक हेरान थे कने सै उदे चले बणी थे। 4 सारायां लोकां अजगरे दी पूजा किती क्योंकि उनी जानवरे जो अपना हक देई दितया था। उना उस जानवरे दी भी पूजा किती। उना बोलया, “कोई भी इस जानवरे ला जादा शक्तिशाली नी है कोई भी उसला लडी नी सकदा है।” 5 परमेश्वरे उसा जानवरे जो अपने बारे च बडाई कने परमेश्वरे दी बुराई करणे दा हक दिता। कने परमेश्वरे उसयो बयालीं मिनयां दीकर ऐ हक रखणे दा हुकम दिता। 6 कने जानवरे परमेश्वरे दी बुराई करणा शुरू किती, उनी उदे नां दे खिलाफ कने उसा जगा दे खिलाफ बोलया मतलब की स्वर्ग दे खिलाफ जिथू परमेश्वर रेंदा है, कने ओथु रेणेबाले लोकां दे खिलाफ बुराई करणा शुरू किती। 7 उस जानवरे जो ऐ हक दितया है की सै परमेश्वरे दे लोकां ला लडे, कने उना जो राई दे, कने उसयो हर इक कुल दे लोकां, जातियां, भाषा पर हक दितया है। 8 धरतिया पर रेणेबाले सारे लोक जानवरे दी पूजा करणा लगे, मतलब की सै सारे लोक जिना दे नां संसारे दिया शुरूआत ला छेल्लुए दिया जिन्दगिया दिया कताबा च नी लिखयो न। छेल्लु सेई है जडा मारी दिता था। 9 हर कुसी जो जडा मेरे संदेश जो समझणा चांदा है, उसयो उसा गल्ला जो ध्यान ला सुणना चाईदा जडा पबित्र आत्मा कलींसिया ला बोलदा है। 10 जिना दा जेला च जाणा तय है, उना जो पक्का जेल होंगी, जिना लोकां दा तलबारा ला मरणा तय है, उना पक्का ही तलबारा ला मरणा है। इस तांई परमेश्वरे दे लोकां जो दुख सेहन करणे च सबर रखणा चाईदा कने उस पर भरोसा करदे रेणा चाईदा। 11 फिरी मै इक होर जानवरे जो धरतिया ला निकलदे होए दिखया, उदे छेल्लुये सांई दो सिंग थे। पर जालू सै बोलणा लग्गा तां उदी अबाज अजगरे सांई थी। 12 ऐ दुज्जा जानवर उस पेहले बाले जानवरे दे सारे हकां दा इस्तेमाल करदा था। कने धरतिया दे लोकां जो उस पेहले जानवरे दी जबरदस्ती पूजा करांदा था, जिदा सै जखम ठीक होई गिया था। 13 सै दुज्जा जानवर बड़े-बड़े चमत्कार दसदा था, ऐथू दीकर की सै लोकां दे

दिखदे-दिखदे अम्बरे ला अग्गी दी बरखा कराई दिन्दा था। 14 दुज्जे जानवरे जो पेहले जानवरे दिया हजुरिया च चमत्कार दसणे दी इजाजत है। इना चमत्कारां दिया बजा ला सै धरती दे लोकां जो भटकाई सकदा था। उनी उना जो पेहले जानवरे दी मूर्ति बणाणे दा हुकम दिता, जडा तलबारा ला घायल होणे बाद भी जिन्दा रिया था। 15 कने दुज्जे जानवरे जो उस पेहले जानवरे दी मूर्ति बणाई करी उसा जो जिन्दा करणे दी हक मिलिया था, ताकि मूर्ति बोली सके कने उना लोकां जो मराई दे जडे उस जानवरे दिया मूर्तिया दी पूजा नी करगे। 16 दुज्जे जानवरे छोट-बड़े, अमीर-गरीब, मालिक या जडे गुलाम न मतलब की सारायां लोकां जो मजबूर किता की सै पेहले जानवरे दे नापे दी छाप अपने सजे हथे पर या मथे पर लाई लेन। 17 उनी ऐसा इस तांई किता ताकि कोई भी माणू जिदे पर पेहले जानवरे दी छाप ना हो तां सै कोई भी समान खरीदी बेची नी सकदा था। 18 इसा छाप दे बारे च समझणे तांई तुहांजो ज्ञान दी जरूरत है। पर जिस बाल ज्ञान है, सै ऐ पता लाई सकदा है की इस जानवरे दिया संख्या दा क्या मतलब है। क्योंकि ऐ इक माणूरे दा ना है। ऐ संख्या छेसो छयासठ है।

**14** मै फिरी दिखया की, सै छेल्लु सिय्योन पहाडे पर खडोतया है, कने उदे सोगी इक लख चौवालीं जार लोक न, जिना दे मथे पर उदा कने उदे पिता दा नां लिखया होया है। 2 कने मै स्वर्ग च कुसी दी अबाज सुणी जडी इक झरने दिया तेज अबाजा सांई थी। जडी अबाज मै सुणी, सै अबाज उसा अबाजा सांई थी, जियां लोक तार बाले यंत्रा जो बजां दे निकलदे न। 3 कने इक लख चूर्तालीं हजार लोक सिहांसने, चार जिन्दे प्राणियां कने अगुवां सामणे खडोतयो थे; सै इक नोआ गीत गा दे थे, जिसयो सेई सीखी सकदे थे, जिना जो परमेश्वरे धरतिया पर रेणेबाले लोकां बिच ला छुडाया था। 4 ऐ सै न, जडे पबित्र जिन्दगी जिन्दे न। ऐ उना लोकां सांई न जिना इक बरी भी नाजायज रिशता नी बणाया है कने ना ही इना कुसी चिजा दी पूजा कितियो है, ऐ सिर्फ छेल्लुये दी ही पूजा करदे न, जिस पासे छेल्लु जांदा है, ऐ भी उदे पिच्छे चली पोंदे न। ऐ सै न जिना जो धरतिया दे सारे माणुआं ला लग कितया है, जियां लोक खेतारां दियां फसला दा सारायां ला खरा हिस्सा परमेश्वरे जो दिन्दे न, तियां ही ऐ लोक अपणिया जिन्दगिया जो पुरिया पबित्रता सोगी परमेश्वर कने छेल्लुये जो दिन्दे न। 5 कने उना कदी भी झूठ नी बोलया है, उना च कुछ भी गलत नी है। 6 फिरी मै इक होर स्वर्गदूते जो अम्बरे च उच्चा उडदे दिखया। उनी स्वर्गदूते उस श्भसमाचार जो लिया था जडा कदी नी बदलदा, उनी संसारे च रेणेबाले लोकां, हर इक देश, हर इक गोत्र, कने सारियां भाषां च इदी घोषणा किती। (aiōnios g166) 7 कने उनी बडे जोरे ला बोलया, “परमेश्वरे ला डरा, कने उदी महिमा करा, क्योंकि उदा हुण लोकां दा न्याय करणे दा बकत है। कने उदी आराधना करा क्योंकि सेई है जिनकी स्वर्ग, धरती, समुंदर कने पाणिए दे तलाबां जो बणाया है।” 8 ओथु इक होर स्वर्गदूत था जडा पेहले दे पिच्छे आया कने बोलया, “बाबेल देश दा सर्वनाश होई गिया! बडे बाबेल देश दा सर्वनाश होई गिया! बाबेल देशे सारिया माणुआं दिया जातिया जो अपणिया शराबा दे नशे च दूत करी दिता, उदा बडा ही बुरा व्यवहार ऐ है जडा उनी सारिया धरतिया कने माणुआं दिया जातिया जो सिखाया क्योंकि उनी उना जो मूर्तिपूजा करणा सिखाया।” 9 फिरी इदे बाद इक होर स्वर्गदूत बडे जोरे ला बोलदा होया आया, “जडा कोई उस जानवरे कने उदिया मूर्तिया दी भक्ति करगा, कने अपने मथे कने अपने हथे पर उदी छाप लांगा, 10 तां उनी परमेश्वरे दे प्रकोपे दिया शराबा जो जडी बिना मिलावटा दी है, उदे गुस्से बाले कटोरे च पाईयो है, पिणा कने पबित्र स्वर्गदूतां दे सामणे कने छेल्लुये दे सामणे अगी कने गन्धका दिया पीडा च पोणा। 11 अग्गी ला निकलदा धुंआ जडा उना जो सतांदा है सै हमेशा उपर उठदा रेंदा है। दिन रात उना दा सताया जाणा स्कदा नी है क्योंकि उना उस जानवरे दी कने उदिया मूर्तिया दी पूजा किती, कने उना उस जानवरे दी छाप लाई।” (aiōn g165) 12 इस तांई ऐ जरूरी है की परमेश्वरे दे लोक उना सारे दुखां जो सेहन करन जिना चे होईकरी सै गुजरदे न। उना सेई करणा जडा परमेश्वर हुकम दिन्दा है कने उना जो यीशु मसीह पर भरोसा करणा बंद नी करणा चाईदा। 13 कने फिरी मै स्वर्ग ला कुसी जो बोलदे सुणया, “इना गल्लां जो ऐथू लिख।” हुणे ला सै लोक सोभायशालीं न जडे परमेश्वरे पर भरोसा करदे मरी जांदि न। तालू पबित्र आत्मा इसा गल्ला ला राजी होया, उनी बोलया, “ऐ सचच है। सै सोभायशालीं न

क्योंकि उना जो अपणिया कडिया मेहनता ला अराम मिलणा कने जडे कम्म उना कितयो न उदे ताई उना जो इनाम मिलणा।” 14 मै फिरी इक चिट्टे बदले जो दिखया, कने मै उस बदले पर कुसी जो बैठया दिखया जडा माणुए साई लग्गा दा था, कने उस पर माणुए दे पुत्रे साई कोई बैठया है, जिसदे सिरे पर सोने दा मुकट कने हथे च पेनी दराटी थी। 15 तालू ही फिरी इक होर स्वर्गदूत परमेष्करे दा संदेश लेईकरी स्वर्गे दे मंदरे ला बार आया, ए चौथा स्वर्गदूत था। उनी बदले पर बैठयो माणुए जो जोर देईकरी बोलया, “धरतिया दी फसल तैयार है, फसला जो बढणे दा बकत आई गिया है। इस ताई अपणी दराटी चला कने फसला दी बडाई कर।” 16 इसा बजा ला सै माणु जडा बदले पर बैठया था, सै अपणिया धराटिया ला धरतिया पर बडणा लग्गा उनी पुरिया धरतिया दिया फसला दी कटाई कित्ती। 17 फिरी पजमा स्वर्गदूत उस मंदरे ला निकलया, जडा स्वर्ग च है, कने उदे बाल भी पेनी दराटी थी। 18 तालू इक होर स्वर्गदूत वेदिया ला बार आया, जडा अग्गी ला धुप बालने दी जिम्मेदारी निभान्दा है। उनी जोरे ला उस स्वर्गदूत ला जिनी पेनी दराटी लिथो थी उसयो बोलया, “धरतिया पर अंगरा दे गुच्छे पक्की गियो न! उना जो अपणिया दराटिया ला बडी ले।” 19 तालू उनी स्वर्गदूते अपणिया दराटिया ला उना अंगरा जो बढी दिता जडे धरती पर थे कने उना जो गठेरया। ताकि उना जो निचोडी सकन, इदा मतलब ऐ है की परमेष्करे बडी खतरनाख सजा देंगी। अंगरा जो शेहेरे ला बार निचोडया। ओथु जिथु अंगरा जो निचोडया था ओथु ला जडा खन निकलया सै इतणा डुगा था, जितणा की इक घोडे दा सिर होंदा है जालू उसयो लगामा ला पकडदे न कने तिन सौ किलो मीटर दीकर चली गिया।

**15** इदे बाद मै अम्बरे च जडा नोआ नोखा चमत्कार दिखया कने सै बडा डराणे बाला था। ओथु सत स्वर्गदूत थे जिना सत लग-लग मुसीबतां पकडियां थियां। ऐ मुसीबतां आखरी न क्योंकि जालू उना मुकी जाणा तालू परमेष्करे दा गुस्सा भी पूरा होई जाणा। 2 तालू मै कुछ दिखया जडा समुन्दे साईं लागदा था कने शिशे साईं चमकदा था कने उदे च अग्ग भी मिलियो थी। मै उना लोकां जो भी दिखया जिना उस जानकरे जो हराया था क्योंकि उना उदिया मूर्तिया दी अराधना नी कितियो थी कने उना पर जानकरे दी छाप नी लगियो थी। 3 कने सै परमेष्करे दे दास मूसा दा गीत गांटे थे, जडा छेल्ये दे बारे च गीत है। सै गांटे थे की, “हे सारयां ला शक्तिशाली प्रभु परमेष्कर, जडा कुछ तू कितया है सै कीमती कने अनोखा है।” 4 “हे प्रभु, सारे लोक तेरी इज्जत करदे न, सै सारे तेरे नापे दी इज्जत करदे न, क्योंकि सिर्फ तू ही पबित्र परमेष्कर है। हर इक जातिया दे लोक तेरे बाल ओदे न, कने सै तेरी अराधना करदे न क्योंकि तेरे धर्मे दे कम्म सारे लोक अच्छे ला जाणदे न।” 5 इदे बाद जालू सै गीत गाईं बैठे, तालू मै दिखया की स्वर्ग दा मंदर खुलया था। जडा मिलाप बाले तम्बूरे साईं है। 6 कने सै सतों स्वर्गदूत जिना बाल सतों मुसीबतां थियां, उस मंदरे ला बार निकले। उना चमकदार कपडे पायो थे कने उना दिशा छापिया दे चारो पासे सोने दिया पट्टियां भी थियां। तालू उना चार जिन्दे प्राणियां चे इकी उना सत स्वर्गदूतां जो परमेष्करे दिया तरफा ला जडा हमेशा जिन्दा है, गुस्से दा भस्या इक-इक सोने दा कटोरा दिता। (aion g165) 8 कने मन्दिर परमेष्करे दिया महिमा कने सामर्थ्य ला ओणे बाले धुरे ला भरई गिया। कने तालू दीकर कोई भी मंदरे च नी जाईं सके जालू दीकर उना सत स्वर्गदूतां दे जरिये नियोरियां सतो मुसीबतां मुकी नी जान।

**16** फिरी मै उदे बाद मंदरे ला इक उचिया अबाजा जो सतों स्वर्गदूतां जो ऐ बोलदे सुणया, “जा, कने परमेष्करे दिया तरफा ला सजा जो जडी उना सतों कटोरयां च है, धरतिया दे लोकां पर नियोरी दिया।” 2 इस ताईं पेहले बाले स्वर्गदूते जडा उदे कटोरे च था सै धरती पर नियोरी दिता। फिरी उना लोकां जो जिना पर उस जानकरे दी छाप थी, या जिना उदिया मूर्तिया दी पूजा कितियो थी, उना जो बडे बड़े जखम होईं गे जिना च बडी जादा पीडा होंदी थी। 3 दुज्जे स्वर्गदूते जडा उदे कटोरे च था उसयो उनी समुन्दे च नियोरी दिता। कने तालू ही समुन्दे दा रंग मरयो माणुए दे खूने साईं होई गिया, कने समुन्दे च रेणे बाली हर इक प्राणी दी मौत होईं गईं। 4 तिजे स्वर्गदूते जडा उदे कटोरे च था उसयो उनी खड्डां कने पाणिए दे झरनया पर नियोरी दिता, कने सै खन साईं बणी गे। 5 तालू मै उस स्वर्गदूते जो जिसया पाणिए पर हक है, परमेष्करे ला ऐ बोलदे होऐ सुणया, “हे

पबित्र परमेष्कर, जडा बकत दी शूआत ला लेईकरी हणे दीकर कने हमेशा ताईं नी बदलदा, तू जडी सजा दितियो है, सै सही है।” 6 क्योंकि उना तेरे लोकां कने परमेष्करे दे संदेश देणेबालयां जो मारी दिता, इस ताईं तू हण उना जो खून पिणे ताईं दिन्दा है। ऐई उना ताईं खरा है। 7 मै फिरी वेदिया ला कुसी जो बोलदे सुणया, “हो, हे सारयां ला शक्तिशाली प्रभु परमेष्कर, ऐ सच्च है की जियां तू लोकां दा न्याय करदा है सै सही है।” 8 चौथे स्वर्गदूते जडा उदे कटोरे च था उनी सूजे पर नियोरी दिता, कने सूजे जो अपणी गमीं बदाणे दी इजाजत दिती, इसा बजा ला लोक जादा गर्मियां दिया बजा ला फकुईं गे, 9 इस ताईं उना परमेष्करे जो श्राप दिता था, क्योंकि सेईं था जिदे बाल सजा देणे दा हक था। उना हल्ले भी अपने पापां ला पञ्चाताप नी किता कने परमेष्करे दी निंदा कित्ती, उना हल्ले दीकर परमेष्करे दिया महानता जो नी मनया। 10 पंजमे स्वर्गदूते जडा उदे कटोरे च था उनी उस जानकरे दे सिंहासने पर नियोरी दिता, कने जिस राज्य पर जानवर राज करदा था उस पर नेरा छाई गिया; कने लोक अपणिया जीभा जो चबाणा लग्गी पे क्योंकि सै उना दुखां कने जखमा जो सेहन नी करी सका दे थे जडे उने जो होआ दे थे। 11 कने अपणियां पिंडा कने फोडयां दिया बजा ला स्वर्ग दे परमेष्करे दी बुराई कित्ती; भले ही उना दे हालात इयंटे थे पर अपने बुरे कम्मा ला पञ्चाताप नी किता कने न ही उना बुरे कम्मा जो करणा छडया जडे सै करा दे थे। 12 छेमे स्वर्गदूते जडा उदे कटोरे च था उनी सै बडी बडी नदी फरात च नियोरी दिता, इसा बजा ला उसा दा पाणी सुकी गिया कने पूर्व दिशा दे राजे अपणिया सेना लेईकरी उसा नदिया जो पार करी सके। 13 कने मै इदे बाद तिन बुरी आत्मा जो दिखया जडियां दिखणे च मेढके साईं थियां। इक उस अजगरे दे मुरे ला बार आई, कने दुज्जी पेहले जानकरे दे मुरे ला बार आई कने तीजी उस दुज्जे जानकरे दे मुरे ला बार आई जिनी झूठा संदेश दितया था। 14 इना बुरियां आत्मा बाल चमत्कार करणे दी शक्ति थी कने उना जाईं करी उना लोकां जो गठेरया जडे इस संसारे दे सारे देशां पर राज करदे न ताकि सै सारयां ला शक्तिशाली परमेष्करे दे उस महान दिने पर उदे खिलाफ लडाईं लडने ताईं जान। 15 “उना बुरियां आत्मा राज कने उना दियां सेना जो उसा जग पर गिठा किता जिसया इज्जानी भाषा च हर-मगिदोन बोलदे न।” इस ताईं प्रभु यीशु मसीह बोलया है, “ऐ गल्ल सुणा। मै चोरे साईं अचानक ओणा है। सोभाग्यशाली है सै माणु जडा मेरे ओणे पर जागदा है कने अपने कपडे तैयार रखदा है। तालू उना नंगे नी होणा कने शरमिंदा नी होणा जालू उना लोकां बिच जाणा।” 17 कने सतमे स्वर्गदूते जडा उदे कटोरे च था उनी होआ च नियोरी दिता, कने मै सुणया, ओथु सै था जडा स्वर्ग दे मंदरे दे अंदरे ला परमेष्करे दे सिंहासने ला बोला दा था, “सब कुछ होई गिया।” 18 कने उसी बकत बिजलियां कने गडगडात बदलां दे गडाके होणा लगे कने इक ऐसा भयानक हिलण होया, इसला पेहले लोकां कदी भी इतणे जौरे ला हिलण महसूस नी कितया था। 19 इसला बाबेल दा सै बडा शेहर तिन हिस्सयां च बंडूई गिया। क्योंकि परमेष्करे अपना वायदा पूरा किता जडा उनी बाबेल शेहेरे दे लोकां जो सजा देणे दे बारे च कितया था। इसयो परमेष्करे बडी कटोर सजा देंगी। ऐ इयां ही होणा जियां उना बिना पाणी पायो शराब पि लियो है, जिसया परमेष्करे अपु गलासे च पाया है, जडा उदे गुस्से जो दसदा है। 20 कने उस बकत समुन्दे दे सारे टापू गायब होईं गे, कने पाड भी गायब होईं गे। 21 अम्बरे ला लोकां पर बड़े-बड़े ओले पे, हर इकी ओले दा बजन लगभग 50 किलो था। ऐ मुसीबत बडी भरी बडी थी, इसा बजा ला लोकां परमेष्करे दी बुराई कित्ती।

**17** जिना सत स्वर्गदूतां बाल सै सत कटोरे थे, उना चे इक जणे आई करी मिंजो ला ऐ बोलया, “मै तिजो दसणा की परमेष्करे कियां उसा बडिया बेशया जो सजा देंगी, जडी ऐसिया जग पर बोंदी है जिथू ला मतियां खड्डां न।” 2 जिसा सोगी धरती दे राजयां व्यभिचार किता, बाबेल दे बुरे कम्मा धरतिया दे सारे देशां जो भ्रष्ट करी दिता। ऐ ऐसा था जियां उनी उना जो शराब पिणे ताईं दिती, कने इसा बजा ला परमेष्करे उना जो सजा देंगी। 3 तालू स्वर्गदूत मिंजो पबित्र आत्मा दिया सहायता ला सुनसान जग च लेई गिया, आत्मा मिंजो अपने काबू च लेई लिया, कने मै ओथु इक जनानिया जो दिखया जडी इक लाल रंगे दे जानकरे पर बेठियो थी, जिसादे सत सिर कने दस सिंग थे। उदा शरीर परमेष्कर दे खिलाफ लिखयो ना ला भस्या था। 4 इना जनानिया बैगणी, कने लाल रंगे दे कपडे पायो

थे। उना अपने शरीर जो सोने दे भेगे मणियां कने मोतियां ला सजाया था। कने उसा दे सच्चे हथे च शराबा ला भस्मया सोने दा गलास पकड़या था, जडा उसा दे बुरे कम्मा कने गंदे यौन कम्मा जो दसदा है। 5 कने उसा दे मथे पर इक न लिखया था जिदा इक गुप्त मतलब है, “मै महान शेरह बाबेल है। मै सारियां बेशयां दी मां है कने संसारे दे सारे बुरे कम्मा दा जरिया है।” 6 कने मै दिखया की जनानी परमेश्वरे दे लोकां दे खने दे नशे च थी, जिना जो लोकां मारी दितया था क्योंकि सै यीशुए पर भरोसा करदे थे। कने उसयो दिखीकरी मिजो बडी हेरानी होई। 7 उनी स्वर्गदूते मिजो ला बोलया, “तू हेरान मत हो। मै तिजो इसा जनानी, कने उस जानवरे दा, कने जिस पर सै बेठियो है, जिदे सत सिंग न कने दस सर न, गुप्त भेद समझांगा।” 8 जडा जानवर जिसया तू हण दिखया, इक बकत पेहले जिन्दा था, पर हण नी है, कने सै हण अथाह कुंडे ला बार ओणे बाला है कने परमेश्वरे पुरे तरीके ला नाश करी देणा। धरती पर रेणेबाले लोक जिना दे ना परमेश्वरे संसार शुरू होणे ला पेहले जिन्दया दिया कताबा च नी लिखयो, उना सारयां हेरान होई जाणा जालू उना इस जानवरे जो दिखया। इक बकत पेहले सै जिन्दा था; हण सै जिन्दा नी है, पर उनी फिरी बापस मुडी ओणा। (Abyssos gl2) 9 ऐ समझणे तांनुं हांजो ज्ञान दी जरूरत है: जानवरे दे सतो सर उस शेहेरे जो दृशांदे न जिस पर ऐ जनानी राज करदी है। कने सै सत राजयां जो भी दृशांदे न। 10 कने सै जडे सत राजा न, उना चे पंज तां पेहले ही मरी गियो न; उना चे इक हण राजा है कने आखरी बाला हल्ले दीकर आया नी है, पर जालू उनी ओणा तां उनी थोडे बकते तांई राज करणा। 11 सै जानवर जडा बडे पेहले रेंदा था कने हण नी है, सै अठमा राजा है। पर सै अठमा राजा पेहले सत राजयां चे इक है। आखरी च उस राजे जो पक्का ही हमेशा तांई सजा मिलणी। 12 जडे दस सिंग तू पेहले दिखे थे, सै उना दस राजयां जो दृशांदे न जिना हल्ले दीकर राज करणा शुरू नी कितया है। उना दस राजयां जो उस जानवरे सोगी मिलिकरी थोडे दे बकते तांई राज करणे दा अधिकार मिलणा। 13 इना सारयां राजयां दा इक ही मकसद है, कने उना अपनी-अपनी शक्ति कने अधिकार जानवरे जो देई देणा। 14 “जानवर कने इना दसां राजयां छेलुये दे खिलाफ युद्ध करणा, पर छेलुये उना जो हराई देणा, क्योंकि सै प्रभुआं दा प्रभु, कने राजयां दा राजा है। उनी उना जो अपने सदयो, चुणयो कने भरोसे दे काबील चेलयां सोगी हराई देणा।” 15 स्वर्गदूते भी मिजो ऐ भी बोलया, “जडा पांणी तू पेहले दिखया था, जिस पर सै बेशया बेठियो थी, सै सारे संसारे दे लोक न, जडे सारियां जातियां, धर्म, देश दे कने लग-लग भाषा बोलणे बाले न।” 16 सै बकत ओणा जालू जानवर उना दस राजयां सोगी जडे उदे सोगी न, उस बेशया ला नकरत करणी जडी उस पर बेठियो है। उना उस पर हमला करणा, उसयो नंगा करणा, उना उदे मिटे दा हिस्सा खाई जाणा, कने बाकियां जो उना फुकी देणा। 17 सै जनानी जिसया तू दिखया था, सै बड़ा शेरह है जडा धरती पर सारे राजयां पर शासन करदा है। ऐ चीजां उदे सोगी होई न, क्योंकि परमेश्वरे अपने मकसदे जो पूरा करणे तांई उना दे मना दा मार्गदर्शन किता है। ऐई बजा है की उना अपना अधिकार जानवरे जो देई दिता ताकि सै राज करे, जालू दीकर सै पूरा नी होई जा जडा परमेश्वरे बोलया था।

**18** इदे बाद मै इक होर स्वर्गदूते जो स्वर्ग ला उतरदे दिखया। उदे बाल बड़ा अधिकार था कने उदिया चमका दिया बजा ला सारिया धरतिया पर लौ होई गई। 2 उनी जौरे ला पुकारी करी बोलया, “बाबेल देश दा सर्वनाश होई गया! बड़े बाबेल देश दा सर्वनाश होई गया।” कने सै बुरियां आत्मा दा घर, कने हर इक अशुद्ध आत्मा दा अडा, कने हर इक अशुद्ध कने बुरे पछियां दा अडा होई गया। 3 ऐ इसा बजा ला होणा क्योंकि उना ज्ञानिया जडी बाबेल शेरह है, उना हर इक देशे दे सारे लोकां जो सै शराब पियाइयो है जडी उसा दी मूर्तियां दी पूजा है। सारिया धरतिया दे राजा उदे गंदे कम्मा च शामिल होयो न। धरतिया दे व्यपारी उसा ज्ञानिया दिया मेगियां-मैंगिया चीजां दिया इच्छा दिया बजा ला अमीर बणी गे। 4 फिरी मै स्वर्ग ला इक हर अबाज सुणी, “हे मेरे लोको, उस शेहेरे ला निकली जा। उना लोकां सोगी मिली करी पाप मत करा, ताकि तुहांजो उना सोगी सजा ना मिल्ले।” 5 क्योंकि उना दे पाप बडे बड़े न, जिना दा ढेर अम्बरे दीकर लगणी गिया है, कने परमेश्वर उसा बुराई जो कदी नी भुलदा है जडी उना कितियो है। 6 इस तांई मै बोलदा है, उस शेहेरे सोगी भी सियुदा ही कर जियां उनी दुज्जयां

सोगी कितया है, उदे सारे बुरे कम्मा तांई उसयो दो गुणा बदला दे। उस शेहेरे तांई दौमुनी शक्तिशाली यातना दी तैयारी कर जदियां यातना सोगी उनी दुज्जयां लोकां सोगी जुलम कितया था। 7 तू उसयो पक्का ही बडी जादा पीडा कने दुख देंगी जडा उदे जिन्दगी जिणे दे तरीके कने उदे अपने आपे दे घमंडे दे बराबर है। उनी अपने आपे ला बोलया, “मै इक राणिया साई लोकां साई राज करणा।” इक बिधवा नी है कने मिजो कदी दुख नी होणा। 8 उदे अपनी बडाई करणे दिया बजा ला उस अचानक मुसीबतां आई पोणियां। सिर्फ इकी ही दिने च बिमारी कने शोक कने अकाल उस पर इक सोगी आई जाणा। कने उसयो अग्नी च भस्म करी देणा, क्योंकि प्रभु परमेश्वर शक्तिशाली है, कने उनी उसयो सजा देणी। 9 कने राजे शेहेरे जो फुकुंदा दिखणा तां उना उदे तांई रोणा कने दुख मनाणा। 10 कने सै उसा सजा ला डरदे न जडा उसा जो पीडा दिन्दा है, बड़े शेरह, बाबेल। हे मजबूत शेरह, हाय। थोडे दे बकत च, परमेश्वरे तेरा न्याय करी दिता कने सजा देती। 11 धरती दे व्यपारियां उदे तांई रोणा कने दुख मनाणा है। क्योंकि हण कुनी भी उना दा माल नी खरीदणा है। 12 उना दा माल केइयां तरा दा था। उदे च सोना, चांदी, रतन, मोती थे। उदे च बडे छेल कने भेगे धागे चमकीले लाल बैजणी, रेशमी, कपडे दे बणयो थे। उदे च खुशबुदार लकडिया ला बणियां चीजां, हाथिये दे दंदा ला बणियां चीजां थियां, होर भी बाकी चीजां थियां जडियां मैंगी लकडिया या पीतल, लोहा, या संगमरमर दियां बणियां थियां, 13 कने लोक दालचीनी, मसाले, धूप, इत्र, लोबान, शराब, तेल, मैदा, गाय-बैल, भेड-बकरियां, घोडे, रथ, कने दास कने माणुपे दे प्राण नी खरिददे थे। 14 व्यपारियां उसला बोलणा, सै सारियां चीजां जिना दी तू इच्छा रखदी थी हण नी न। हण सारियां छेल खुशबुआ बालियां चीजां जडियां तिजो पसंद थियां, सै सारियां चीजां जिना जो तू अपने शरीर जो सुंदर बणांदी है, सै सारियां गबाची गियां न, हण नी मिलदियां। 15 इना चीजां दे व्यपारी जडे उदे जरिये अमीर होई गियो थे, उसा दी पीडा दे डरे ला उना दूर खडोणा कने रोदे-रोदे बोलणा, 16 हाय! हाय! ऐ बडा शेरह जिनी मलमल कने लाल रंग दे कपडे पायो थे, कने सोने कने मोतियां ला सजाया था; 17 घडिया च ही उदा सारा धन खतम होई गया। जाजे दे सारे कप्तान कने सै सारे जडे जाजे पर यात्रा करदे न, कने सै सारे जडे समुंदरे ला अपना गुजारा करदे न, बाबेल शेहेरे ला बडे दूर खडोई करी दिखदे रे। 18 कने जालू उना शेहेरे जो फुकुंदे कने अग्नी ला निकलदे धुंए जो दिखणा कने चिल्लाणा, इस सांई महान शेरह होर कोई नी होया! 19 कने उना अपना दुख दसणे तांई अपने-अपने सिरां पर धुड पाणी है, कने रोदे-रोदे कने चीलाई करी बोलणा, हाय। हाय। ऐ बडा शेरह जिदिया संपतिया ला समुंद्रे दे सारे जाजां बाले अमीर होई गियो थे, सै घडिया च ही सारा उजडी गया। 20 तू जडा स्वर्ग च रेंदा है, कने हे परमेश्वरे दे लोको, कने प्रेरितां, कने परमेश्वरे दे संदेश देणेबालयां, जडा उस सोगी होया उस पर खुश होआ, क्योंकि परमेश्वरे बाबेल शेहेरे जो उना गल्लां च दोषी बणया है जडियां उनी तुहाडे सोगी कितियां न। 21 फिरी इक जौरे बाले स्वर्गदूते बडिया चक्कियां दे चक्के दे बराबर इक पथर चुकया, कने ऐ बोली करी समुंदरे च सूटी दिता, “जियां इस पथरे जो समुंदरे च फेंकदे न,” कने सै दोबारा नी मिलदा है, तियां ही सै महान शेरह बाबेल भी इक ही बरी च खतम होई जाणा, कने दुबारा नी बणाणा। 22 बाबेल शेरह तेरियां गलियां च फिरी कदी भी गाणा बजाणा नी सुणेणा, कोई भी गायकां, बंसरी बजाणे बालयां, कने तुरही बजाणे बालयां दा संगीत नी होणा। तुहाडे सारे माहिर कर्मचारी गायब होई जाणे, कने तुहाडियां मिलां बाल पिणे तांई कोई अनाज नी होणा। 23 कने उदियां राती नेरियां होणियां, ऐथू दीकर की इक भी दिव्या नी बलना। ओथु कुसी भी लाडा लाडिये दिया खुशिया दी गल्ल नी होणी। ऐसा इस तांई होणा क्योंकि उदे व्यपारियां जडे दुनिया भर च सारयां ला बडे थे उना अपने जादू टोणे ला देशां जो धोखा दिता है। 24 परमेश्वरे बाबेल जो इस तांई सजा देती क्योंकि सै परमेश्वरे दे संदेश देणेबालयां जो, कने होर सारे लोकां जो जडे परमेश्वरे दे न, कने धरती दे लोकां जो मारणे दा दोषी था।

**19** जालू सै जौरे बाला स्वर्गदूत बोली बैठा तां इदे बाद मै जडा सुणया सै इयां था जियां मते लोक गा दे होन, “परमेश्वरे दी महिमा हो! तू ही है जडा उद्धार करदा है, कने सामर्थ्य साडे परमेश्वरे दी ही है।” 2 उदी स्तुति करा क्योंकि उदे सारे फैसले सही कने सच्चे न। उनी बदनाम बेशया दा न्याय कारीरी बदला

लिया क्योंकि उनका संसारे दे लोकां जो पाप करणे तांई भरमाया। परमेश्वरे उसा वेश्या दा न्याय करिरी बदला लिया क्योंकि उनका अपने दास मारयो थे। 3 फिरी दूजी बरी उना बोलया, “हालेल्यूयाह! बाबेल जो नाश करणे बालिया अग्गी ला निकलणे बाला धुआ उठदा रेणा कने कदी बंद नी होणा।” (aiōn g165) 4 कने चोबियाँ अगुवां कने चारों जिन्दे प्राणियां गोडे भार बेईकरी परमेश्वरे जो टण्डवत किता, जडा सिंहासने पर बैठया था, कने बोलया, “आमीन! परमेश्वरे दी स्तुति हो।” 5 कने फिरी मैं कुसी जो बोलदे सुणया, कने ऐसा लगया की जियां ऐ अबाज परमेश्वरे दे सिंहासने ला आई हो। उनी बोलया, “साडे परमेश्वरे दे सेबकों कने तुसां जडे उदा डर मंदे न, चाहे बड़े दर्जे दे होया या छोटे दर्जे दे होन तुसां सोरे परमेश्वरे दी स्तुति करा।” 6 इदे बाद, फिरी मैं ऐ भी सुणया जडा बडे जादा लोकां दे चिलाणे सांई था। उना दा चिल्लाणा मते पाणिए दिया अबाजा सांई था, कने बदलां दे गडाकयां दिया अबाजा सांई था। मैं ना जो ऐ बोलदे सुणया; परमेश्वर साडा प्रभु, ओआ असा उदी स्तुति करन। क्योंकि उदे बाल हर जगा राज करणे दी शक्ति है। 7 ओआ, असां खुश कने मगन होई जान, कने उदी स्तुति करन, क्योंकि छेल्ये दा बियाह होणेबाला है, उदी लाडी श्रृंगार करिरी कने अपने आपे सजाई करी उदे तांई तैयार है। 8 छेल्ये उसयो साफ चमकदार मलमल ला बणयो कपडे पाणे तांई दिते न, जडे शूद्र न, जडा भरोसा करणे बालयां दे भले कम्मा दा प्रतीक है। 9 तालू स्वर्गदूते मिंजो ला बोलया, “ऐ लिख, धन्य सै न, जिना जो छेल्ये दे बियाये दा जशन मनाणे तांई धामा क सदया है।” फिरी उनी मिंजो बोलया, “ऐ बचन परमेश्वरे दे सच्चे बचन न।” 10 जालू मैं सुणया तां जडा मिंजो ला गल्लां करा दा था, मैं उस माणुए सामणे झुकी गिया, क्योंकि मैं उदी अराधना करा दा था। उनी मिंजो बोलया, मेरी अराधना मत कर, मैं भी तैरे सांई परमेश्वरे दा सेबक है कने तैरे भाईयां सांई जडे यीशु मसीह दियां सच्ची शिक्षां पर भरोसा करदे कने मंदे न। तिजो परमेश्वरे दी ही अराधना करणी चाईदी। क्योंकि परमेश्वर आत्मा है जडी परमेश्वरे दे लोकां जो यीशु मसीह दी दसियो सच्चाईया दी घोषणा करणे दे काबिल बणादां है। 11 फिरी मैं स्वर्ग की खुलया होया दिखया, कने ओथु मेरे सामणे इक चिट्टा घोडा था, कने उस पर इक सवार था, सै परमेश्वरे दा सच्चा कने भरोसेमंद सेबक था; सै धार्मिक तरीके ला उदे दुशमणा दा न्याय करदा है कने उना दे खिलाफ लडाई करदा है। 12 उदियां हखी अग्गी दियां लपटा सांई चमकदियां थियां, कने उदे सिरे पर मते भरी राजमुकुट थे। उदा इक ना उस पर लिखया था, पर सिर्फ सेई उस नाणे दा मतलब जाणदा था। 13 उनी खूने क डोबया कपडे पायो थे, कने उदा ना परमेश्वरे दा बचन था। 14 कने स्वर्ग दी सेना उदे पिच्छे-पिच्छे थी। सै भी चिट्टे घोडयां पर सवार थे कने उना चिट्टे मलमले दे कपडे पायो थे जिना च कोई भी दाग नी था। 15 उदे मुंए ला इक पैनी तलवार निकली जिसला उनी देशां जो हराई देणा। जडा उदे अधिकारां जो नी अपनांदा उनी उना जो पुरे तरीके ला सजा देंगी। उनी सारयां ला शक्तिशाली परमेश्वरे दे भयंकर गुस्से जो इयां ही छडी देणा जियां इक रस्सकुंड ला अंगूरा दा रस्स निकलदा है। 16 कने उदिया पोशाका कने उदिया सजां जंघा पर ऐ ना लिखया है: “राजयां दा राजा कने प्रभुआं दा प्रभु है।” 17 फिरी मैं इक स्वर्गदूते जो सूरजे पर खडोतयो दिखया, कने उनी अम्बरे च उच्चे उडदे मांस खाणे बाले सोरे पछियां जो जोरे ला पुकारया, “ओआ, उसा बडिया धामा तांई गिठे होई जा जडी परमेश्वरे तुहाडे तांई तैयार कितियो है।” 18 ओआ कने राजयां, सेना दे अगुवां, ताकतवर सेनिका, घोडयां कने उना से सवारां दा मास खाओ। तुसां हर तरा दे मरयो लोकां दा मास खाई सकदे न, मतलब की गुलाम कने अजाद, बड़े कने छोटे, सारयां दा मास खा। 19 फिरी मैं उस जानवरे जो दिखया जडा समुद्रे ला बार आया था, कने धरती दे राजयां कने उना दियां सेना जो दिखया। सै घोडे पर बोणे बाले कने उदिया सेना दे खिलाफ लडाई लडने तांई इक सोगी आऐ। 20 कने सै पैला जानवर, कने उदे सोगी सै झूठा परमेश्वरे दे संदेश देणे बाला पकडोई गिया, झूठे संदेश देणेबाले जानवरे दिया तरफा ला चमकारी चिन् दस्से कने उना सोरे लोकां जो भटकाया, जिना अपने मथे पर छाप लाईयो थी कने जडे उदिया मुर्तिया दी पूजा करदे थे। ऐ दोनो जीं दे जी उसा अग्गी दिया झिला क पाई दिते, जडी गन्धक ला बलदी है। (Limnē Pyr g3041 g4442) 21 तालू चिट्टे घोडे दे सवारे उस जानवरे दे सोरे सेनिका जो मारी दिता, उनी उना जो उसा तलबारा ला बडी

दिता जडी उदे मुंए ला निकली थी। तालू अम्बरे दे सोरे पंछी मरयो लोकां दा मास खाणे तांई आई गे जालू दीकर की उना दा पेट भई नी जा।


**20** फिरी मैं इक स्वर्गदूते जो स्वर्ग ला उतरदे दिखया, जिदे हथे च डुगे कुंडे दी चाबी थी, कने इक बडी जंजीर थी। (Abyssos g12) 2 कने उनी उस पूराणे अजगरे जो झपटी करी पकडी लिया। जिसयो शैतान भी बोलदे न, उनी उसयो बन्नी करी डुगे कुंडे च फेंकी दिता कने दरबाजा बंद करी दिता कने उस पर मोहर लाई दिती ताकि उसयो इक जास सालां दीकर कोई खोले ना। इना जास सालां च शैताने संसारे लोकां जो धोखा नी देई सकणा। उदे बाद उसयो थोडे बकते तांई छडी देणा। (Abyssos g12) 4 फिरी मैं कुछ सिंहासन दिक्खे, कने जडे लोक उना सिंहासना पर बैठयो थे उना जो राज करणे दा हक दितया था। मैं उना लोकां दियां आत्मा जो भी दिखया जिना दे सिरां जो बड्डी दितया था क्योंकि उना ऐ मन्नी लिया था की यीशु उना दा प्रभु है, कने सै परमेश्वरे दे बचने पर भरोसा करदे थे। उना जानवर या उदिया मुर्तिया दी पूजा नी कितियो थी कने इना अपने मथे कने हथां पर जानवरे की छाप नी लाईयो थी। ऐ लोक दुबारा ला जिन्दे होई गे कने इना इक हजार सालां दीकर मसीह सोगी राज किता। 5 मरयां चे जिन्दे होंणे बालयां चे ऐ सारयां ला पहले थे कने ऐ बडे जादा सोभाग्याली कने पबित्र न। दूजी मौत दा उना पर कोई अधिकार नी है। सै परमेश्वरे दे कने मसीह दे याजक होणे कने उना सोगी इक हजार साल दीकर राज करणा। इना इक हजार सालां ला पहले कुसी भी भरोसा करणे बालयां जो जडे सोगी मरियो थे जिन्दे नी कितया। 7 जालू हजार साल पुरे होई जाणे तां स्वर्गदूते शैताने जो ओथु ला जिथु सै बन्नया था अजाद करी देणा कने उनी उना देशां जो धोखा देणे तांई बार आई जाणा जडे पुरे संसारे च खिडयो न। इना देशां जो गोग कने मागोग बोलदे न। शैताने उना सारयां जो इकी जगा पर गटेरी देणा जिथु उना लडाई करणी। उना समुंदरे दे बखे दिया रेता बराबर होणा की कुनी उना जो गिणी नी सकणा। 9 कने सै सारिया धरतिया पर हर जगा गे। उना उस शेहरे जो घेरी लिया, जिसयो परमेश्वर प्यार करदा है, जिथु उदे लोक रेंदे थे। परमेश्वरे दिया तरफा ला कने स्वर्ग ला अग आई उना पुरिया सेना जो भस्म करी दिता। 10 इदे बाद शैतान पकडोई जाणा, जिनी हर देशे दे लोकां जो भटकाया कने उसयो गन्धक दिया अग्गी च फेंकी देणा, मतलब की उसा अग्गी च जडी झीला सांई बड्डी है। जिदे अंदर उस जानवरे जो कने परमेश्वरे झूठे संदेश देणेबालां जो पहले ही फेंकी दितया था। उसा अग्गी च उना जो हमेशा तांई दिन रात सताया जाणा है। (aiōn g165, Limnē Pyr g3041 g4442) 11 फिरी मैं इक चिट्टा सिंहासन दिखया जिस पर परमेश्वर बिराजमान था। पर ओथु जिथु परमेश्वर बिराजमान था, ओथु ला धरती कने स्वर्ग सारा गायब होई गिया कने फिरी कुनी भी उना जो नी दिखया। 12 फिरी मैं मरयो लोकां जो उस सिंहासने सामणे खडोतयो दिखया मतलब की उना जो जडे खास न कने आम लोक न। सै लोक जडे समुंद्रे च डूबी करी मरी गियो थे कने कवरां दे सोरे मरयो लोक, कने सै सोरे लोक जडे मरयां दिया जगा पर थे, सै सोरे उस सिंहासने सामणे खडोते। कने कलावां च लिखियां गल्लां दे अनुसार, जडा-जडा उना कितया उदे अनुसार उना दा न्याय होणा। (Hadēs g86) 14 सै सोरे लोक जिना दे ना जिन्दगिया दिया कताबा च नी लिखयो थे, उना जो अग्गी दिया झिला च फेंकी दिता। इदे बाद मौत नी है, हुण मरयां दी कोई जगा नी है क्योंकि सै सोरे लोक जिना दे ना जिन्दगिया दिया कताबा च नी लिखयो थे उना जो अग्गी दिया झिला च फेंकी दिता, इसा जो ही दुज्जी मौत बोलदे न, जडा की अग्गी दिया झिला च सजा है। (Hadēs g86, Limnē Pyr g3041 g4442)

**21** फिरी मैं नोआ स्वर्ग कने नोई धरती दिखी, क्योंकि पूराणी धरती कने स्वर्ग हुण नी थे। कने हुण कोई समुन्द्री भी नी था। 2 फिरी मैं पबित्र नोए शेहर यस्शलेमे जो भी दिखया, जडा स्वर्ग ला परमेश्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिना जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। 3 फिरी मैं इक अबाज सुणी जडी परमेश्वरे दे सिंहासने ला जोरे ला बोली, “दिख, हुण परमेश्वरे लोकां बिच अपना घर बणाणा।” उनी उना सोगी रैणा, कने सै उदे लोक होणे, उनी अपु उना जो अपने लोकां दे स्पे च अपनाणा कने उनी उना सोगी रैणा कने उना भी उसयो परमेश्वरे दे स्पे च अपनाई लेणा। 4 परमेश्वरे उना दियां हखी

ला सारे आंसू पूंज्जी देंगे; कने इदे बाद कुसी भी माणुए जो दुख नी सेहणा पोणा, रोणा नी पोणा, दर्द महसूस नी होणा, ना ही कूदी मौत होणी क्योकि प्राणे संसारे दियां सारियां चीजां गायब होई गियां ना। 5 कने जडा सिंहासने पर बैठया था, उनी बोलया, “दिख, मैं सब कुछ नोआ करी दिन्दा है।” फिरी उनी बोलया, “लिखि ले, क्योकि जडा मैं बोलदा है उदे पर भरोसा करी सकदा है। ऐ गल्लां पक्का ही होणियां।” 6 फिरी उनी मिंजो बोलया, सब कुछ मुकी गिया है। मैं अलफा कने ओमेगा, कने श्शूआत कने अंत है। जडा कोई प्यासा है, मैं उसयो उस पाणिणे ला मुफ्त पाणी पिणे तांई देणा जडा हमेशा दी जिन्दगी दिन्दा है। 7 जडा शैताने जो हराई दिन्दा है, उसयो मिंजो ला सै ऐ सारियां आशीषां मिलणियां; कने मैं उदा परमेस्वर होणा कने सै मेरा पुत्र होणा। 8 पर जडे मिंजो पर भरोसा नी रखदे, उना जो जोर लाईकरी गंधक बालिया उसा झिला च पाई देणा, जडी दुज्जी मौत है। कने सेई अंजाम उना दा भी होणा, जडे लोकां दे सामणे मिंजो अपनाणे ला डरदे न, बुरे कम्म करदे न, जडे हत्यारे न, गंदे कम्म करदे न, जादू टोणा करदे न, मृतियां दी पूजा करदे न, या झूठ बोलदे न। (Limnê Pyr g3041 g4442) 9 फिरी उना सतां स्वर्गदां चे इकी जिना माणुए देिया जाति पर सत आखरी मुसीबतां ला भरयो कटोरें न्योरे थे, मिंजो सोगी गल्ल कित्ती कने उनी बोलया, “रेथु ओआ, मैं तिजो लाडी दसणी जिदा जल्दी ही छेल्ये सोगी बियाह होई जाणा है।” 10 तालू परमेस्वरे देिया आत्मा इक दर्शण दसया। उस दर्शने च स्वर्गदूत मिंजो इक बडे बड़े पाडे पर लेई गिया। कने पबित्र शेर यस्शलेम दसया, जडा परमेस्वरे देिया तरफा ला स्वर्ग ला थले उतरया था। 11 शेर परमेस्वरे ला मिलणे बालिया लौई ला चमका दा था, कने उदी ज्योति बडे कीमती पथर मतलब की यशब नापे दे बेशकीमती पथरे सांई चमका दी थी, कने शीशे सांई साफ थी। 12 शेर देियां चारो पासे दियां दिबां बडिया उच्चिया थियां, कने शेरहे च बारा दरबाजे थे कने उना सारे दरबाजां च इक स्वर्गदूत पेहरा दे दा था कने उना दरबाजां पर झ्झाएलियां दे बारा गोत्रां दे ना लिखयो थे। 13 शेरहे देिया चारो दिशां च तिन दरबाजे थे: पूर्व, पच्छिम, उत्तर कने दक्षिण च। 14 उना शेरहे दियां दिबां बारा बड़े-बड़े पथरां उपर बणायां थियां, कने उना हर इक पथरे पर छेल्ये दे बारह प्रेरितां दे नां लिखयो थे। 15 सै स्वर्गदूत जडा मिंजो सोगी गल्लां करा दा था, उदे बाल दरबाजां कने उदियां दिबां जो नापणे तांई इक सोने दा गज था। 16 उस शेरहे दे चार सिरे थे कने चारो सिरे इकोदे थे। स्वर्गदूते उस सोने दे फीते ला शेरहे जो नापया; इदी लम्बाई दो हजार चार सौ किलो मीटर थी। इदी चौडाई कने उच्चई लम्बाइयां बराबर ही थी। 17 इदे बाद स्वर्गदूते दिबां दी उच्चई नापी। उनी इसयो भी इयां ही नापया जियां लोक चीजां जो नापदे ना। दिबां छियासठ मीटर उच्चि थी। 18 शेर खरे सोने ला बणया था जडा शीशे सांई चमकदा था कने उदियां दिबां यशब नापे दे कीमती पथरे ला बणियां थियां। 19 उस शेरहे दियां नियां कीमती बारा बड़े-बड़े पथरां पर बणियां थियां; पैली नी यशबे दी, दुज्जी नीलमणी दी, तीजी लालडीए दी, चोथी मरकते दी, 20 पंजमी गोमेदके दी, छेमी महणिके दी, सतमी पीतमणिणे दी, अठमी पेरोजे दी, नौमी पुखराजे दी, दसमी लहसनिये दी, गयारमी धूम्रकान्ते दी, कने बारमी याकूबे दी थी। 21 बारा दरबाजे भी इक-इक कीमती मोतियां ला बणयो थे, कने शेरहे दियां सडकां खरे सोने दियां बणियां थियां जडियां शीशे सांई चमकदियां थियां। 22 मैं इस शेरहे च कोई मंदिर नी दिखया क्योकि सारयां ला शक्तिशाली प्रभु परमेस्वर कने छेलू उस शेरहे च है। इस तांई ओथु मंदरे दी कोई जरूरत नी है। 23 उस शेरहे च ना सूरजे दी कने ना चन्द्रमे दी जरूरत है, क्योकि सै शेर परमेस्वरे कने छेल्ये देिया रोशनिया ला रोशना है। 24 उस शेरहे च चमक संसारे च रेणे बालयां सारे लोकां जो रौशनी दिन्दी है कने संसारे दे सारे राजयां अपणिया-अपणिया दौलता जो उस शेरहे च लेई ओणा है। 25 उस शेरहे दे दरबाजे दिन भर खुले रेंदे न। सै कडी कदी भी बंद नी हौंदी क्योकि ओथु कदी भी रात नी हौंदी। 26 संसारे दे लोकां संसारे दियां सारियां खबसुरत चीजां जो कने लोकां देिया धन दौलता जो उस शेरहे च लेई ओणा है। 27 पर जडे कुछ भी गंदा था या सै लोक जडे बुराई करदे न या झूठ बोलदे न, उना जो पक्का ही उस शेरहे च अंदर ओणे दी इजाजत नी है। ओथु सिर्फ सेई लोक अंदर जाई सकदे न जिना दे ना छेल्ये देिया जिन्दगिया देिया कताबा च लिखयो थे।

22 तालू स्वर्गदूते मिंजो इक नदी दस्सी जिदे च जिन्दगी दा पाणी था। पाणी शीशे सांई चमका दा था। ऐ नदी परमेस्वर कने छेल्ये दे सिंहासने दे थले ला बेह दी थी। 2 नदी शेरहे देिया सडकां दे बिचो बिच ला गुजरदी थी। नदिया दे हर इक किनारे पर जिन्दगी देणेवाले सख लगयो थे जडे हर साल बारा बरी फल दिन्दे थे मतलब की हर मिने च इक बरी। संसारे दे लोक उना दे पतयां दा उपयोग अपणियां बिमारियां जो ठीक करणे तांई करदे न। 3 उस शेरहे च कुछ भी ऐसा नी है जडा परमेस्वरे दे श्राप दे अधीन है। परमेस्वर कने छेल्ये दा सिंहासन उस शेरहे च होणा, कने परमेस्वरे दे सेवकां उदी अराधना करणी। 4 उना परमेस्वरे जो आमणे सामणे दिखणा, कने परमेस्वरे दा ना उना दे मथे पर लिखया होणा। 5 कने ओथु फिरी कदी रात नी होणी, कने शेरहे दे लोकां जो रस्ते च चलणे तांई दिट्ये दी जरूरत नी होणी कने ना ही सूरजे देिया लौई दी जरूरत थी, क्योकि परमेस्वरे ही है जडा लोकां जो लौ दिन्दा है। जडे लोक ओथु रेंदे न उना हमेशा तांई राजयां सांई राज करणा। (aiōn g165) 6 तालू स्वर्गदूते मिंजो ला बोलया, “ऐ सारियां गल्लां जडियां तिजो दसियां न, सै सच्च च कने पुरे तरीके ला भरोसा करणे दे काबिल ना। क्योकि प्रभु परमेस्वरे जिनी संदेश देणेवालां दे मना दा मार्गदर्शन करणे तांई अपणा आत्मा देिया था, सेई है जिनी मिंजो, जडा की उदा स्वर्गदूत है, तिजो ऐ दसणे तांई भेजया है जडा जल्दी ही होणा।” 7 “कने दिख, मैं तौली ओणे बाला है; सै धन्य न जडे इसा कताबा च लिखियां भविष्यवाणियां जो मंदे ना।” 8 मैं सेई यहून्ना है जिनी इना सारियां गल्लां जो दिखया कने सुणया है। कने जालू मैं इना गल्लां जो सुणया कने दिखया, तां मैं स्वर्गदूते दी अराधना करणे तांई उदे पैरां च पेई गिया। 9 पर उनी मिंजो ला बोलया, “इयां मत कर; क्योकि मैं तेरा कने तेंरे भाई जडे परमेस्वरे दे संदेश देणेवाले न कने इसा कताबां दियां गल्लां जो मनणे बालयां सांई साथी सेबक है, सिर्फ परमेस्वरे दी ही अराधना कर।” 10 फिरी उनी मिंजो बोलया, इसा कताबां देिया भविष्यवाणियां देिया गल्लां जो लोकां ला मत लुका; क्योकि इना चीजां दा पूरा होणे दा बकत नेडे आई गिया है। 11 “जडा कोई भी बुरे कने गंदे कम्म करदा है, उना जो सै बुरे कने गंदे कम्म करदे रेणा चाईदा। कने तियां ही जडे कोई अच्छे कने पबित्र कम्म करदे न, उना जो अच्छे कने पबित्र कम्म करदे रेणा चाईदा।” 12 तालू प्रभु योशुये बोलया, मैं तौली ही ओणे बाला है; कने लोकां जडे-जडे कम्म कितया न, मैं उना जो उना दे कम्मा जो दिखीकरी इनाम कने सजा देंगी। 13 “मैं अलफा कने ओमेगा, पेहला कने आखरी, श्शूआत कने अंत है।” 14 धन्य न सै, जडे अपने कपडयां जो छेल्ये दे खूने ला धोई लेंदे न मतलब की अपने पापां जो खत्म करी दिन्दे न, इस तांई उना जो शेरहे दे दरबाजां अंदर कने जिन्दगी दे स्खे दे फल खाणे दा हक है। 15 पर जडे बुरे कम्म करदे न, जादू टोणा, व्यभिचारी, खनी, मूर्तिपूजक, कने हर इक झूठ जो पसंद करणे बाले कदी भी अंदर नी जाई सकदे न। 16 मैं, यीशुए अपने स्वर्गदूते जो तुहाडे बाल इना गल्लां दी घोषणा करणे तांई भेजया है जडियां परमेस्वरे देिया कलीसिया च होना। मैं राजा दाऊद दा बंशज है, कने मैं ही ब्यागा दे तारे सांई है। 17 कने परमेस्वरे की आत्मा कने छेल्ये दी लाडी योशुये ला बोलदे न, “तिजो पक्का ओणा चाईदा।” हर इक जडा ऐ सुणदा है, उसयो भी ऐ बोलणा चाईदा, “आ!” कने जडा कोई भी प्यासा है, सै ओए कने उस पाणिणे जो पिया जडा जिन्दगी दिन्दा है, जडा की उना सारयां जो मुफ्त मिलदा है जडे उसयो पिणा चांदे न। 18 मैं यहून्ना है कने मैं तुसां सारयां जो ऐ चेताबनी दे दा है, जडे इसा कताबा देिया भविष्यवाणियां जो सुणदे न, जडियां हुण होआ दियां न कने अगे होणे बालियां न, जडियां मैं इसा कताबा च लिखियां न; अगर कोई माणु इना गल्लां च कुछ भी बदांदा है, तां परमेस्वरे उदिया सजा जो भी बधाई देणा। उनी तुहांजो उना मुसीबतां ला मारणा, जडियां मैं इसा कताबा च लिखियां न। 19 अगर कोई ऐसा माणु है जडा इसा कताबा च भविष्यवाणिया देियां गल्लां च कुछ हटाई दिन्दा है, तां परमेस्वरे तुहांजो ला उना आशीषां जो लेई लेणा जडियां मैं इसा कताबा च लिखियां न कने परमेस्वरे उस जिन्दगी दे स्ख ला फल खाणे कने पबित्र शेरहे च रेणे दा हक भी बापस लेई लेणा। 20 ऐ यीशु मसीह दे शब्द न जडा उना सारियां गल्लां दी गबाई दिन्दा है जडियां इसा कताबा च लिखियां न, सै बोलदा है “हां, मैं तोल्ली ओणे बादा है।” मैं यहून्ना जबाब देिया, “आमीन, हे प्रभु यीशु

मसीह आ।” 21 मैं प्रार्थना करता है की साडे प्रभु यीशु मसीह दा अनुग्रह हमेशा तुसां सारयां पर होदा रे। आमीन।



फिरी में पबित्र नोए शेहर यस्जालेमे जो भी दिखया, जडा स्वर्गे ला परमेख्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिसा जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। फिरी में इक अबाज सुणी जडी परमेख्वरे दे सिंहासने ला जारे ला बोली, “दिख, हण परमेख्वरे लोकां बिच अपना घर बणाणा।” उनी उना सोगी रैणा, कने सै उदे लोक होणे, उनी अपु उना जो अपने लोकां दे स्मे च अपनाणा कने उनी उना सोगी रैणा कने उना भी उसयो परमेख्वरे दे स्मे च अपनाई लेणा।

प्रकाशितवाक्य 21:2-3



# Reader's Guide

भटियाली at [AionianBible.org/Readers-Guide](http://AionianBible.org/Readers-Guide)

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

# Glossary

भटियाली at [AionianBible.org/Glossary](http://AionianBible.org/Glossary)

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

## **Abyssos** g12

*Greek:* proper noun, place

*Usage:* 9 times in 3 books, 6 chapters, and 9 verses

*Meaning:*

Temporary prison for special fallen angels such as Apollyon, the Beast, and Satan.

## **aidios** g126

*Greek:* adjective

*Usage:* 2 times in Romans 1:20 and Jude 6

*Meaning:*

Lasting, enduring forever, eternal.

## **aiōn** g165

*Greek:* noun

*Usage:* 127 times in 22 books, 75 chapters, and 102 verses

*Meaning:*

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

## **aiōnios** g166

*Greek:* adjective

*Usage:* 71 times in 19 books, 44 chapters, and 69 verses

*Meaning:*

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

## **eleēsē** g1653

*Greek:* verb, aorist tense, active voice, subjunctive mood, 3rd person singular

*Usage:* 1 time in this conjugation, Romans 11:32

*Meaning:*

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See [ntgreek.org](http://ntgreek.org).

**Geenna** g1067

*Greek:* proper noun, place

*Usage:* 12 times in 4 books, 7 chapters, and 12 verses

*Meaning:*

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

**Hadēs** g86

*Greek:* proper noun, place

*Usage:* 11 times in 5 books, 9 chapters, and 11 verses

*Meaning:*

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

**Limnē Pyr** g3041 g4442

*Greek:* proper noun, place

*Usage:* Phrase 5 times in the New Testament

*Meaning:*

Lake of Fire, final punishment for those not named in the Book of Life, prepared for the Devil and his angels, Matthew 25:41.

**Sheol** h7585

*Hebrew:* proper noun, place

*Usage:* 66 times in 17 books, 50 chapters, and 64 verses

*Meaning:*

The grave or temporal afterlife world of both the righteous and unrighteous, believing and unbelieving, until the general resurrection.

**Tartaroō** g5020

*Greek:* proper noun, place

*Usage:* 1 time in 2 Peter 2:4

*Meaning:*

Temporary prison for particular fallen angels awaiting final judgment.

# Glossary +

[AionianBible.org/Bibles/Bhattiyali---Bhattiyali-Bible/Noted](http://AionianBible.org/Bibles/Bhattiyali---Bhattiyali-Bible/Noted)

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. \* The note placement is skipped or adjusted for verses with non-standard numbering.

## **Abyssos**

लूका 8:31  
रोमियो 10:7  
प्रकाशितवाक्य 9:1  
प्रकाशितवाक्य 9:2  
प्रकाशितवाक्य 9:11  
प्रकाशितवाक्य 11:7  
प्रकाशितवाक्य 17:8  
प्रकाशितवाक्य 20:1  
प्रकाशितवाक्य 20:3

## **aidios**

रोमियो 1:20  
यहूदा 1:6

## **aiōn**

मती 12:32  
मती 13:22  
मती 13:39  
मती 13:40  
मती 13:49  
मती 21:19  
मती 24:3  
मती 28:20  
मरकुस 3:29  
मरकुस 4:19  
मरकुस 10:30  
मरकुस 11:14  
लूका 1:33  
लूका 1:55  
लूका 1:70  
लूका 16:8  
लूका 18:30  
लूका 20:34  
लूका 20:35  
यहून्ना 4:14  
यहून्ना 6:51  
यहून्ना 6:58  
यहून्ना 8:35  
यहून्ना 8:51  
यहून्ना 8:52  
यहून्ना 9:32  
यहून्ना 10:28  
यहून्ना 11:26  
यहून्ना 12:34  
यहून्ना 13:8  
यहून्ना 14:16

प्रेरितां दे कम्म 3:21  
प्रेरितां दे कम्म 15:18  
रोमियो 1:25  
रोमियो 9:5  
रोमियो 11:36  
रोमियो 12:2  
रोमियो 16:27  
1 कुरिन्थियों 1:20  
1 कुरिन्थियों 2:6  
1 कुरिन्थियों 2:7  
1 कुरिन्थियों 2:8  
1 कुरिन्थियों 3:18  
1 कुरिन्थियों 8:13  
1 कुरिन्थियों 10:11  
2 कुरिन्थियों 4:4  
2 कुरिन्थियों 9:9  
2 कुरिन्थियों 11:31  
गलातियों 1:4  
गलातियों 1:5  
इफिसियों 1:21  
इफिसियों 2:2  
इफिसियों 2:7  
इफिसियों 3:9  
इफिसियों 3:11  
इफिसियों 3:21  
इफिसियों 6:12  
फिलिप्पियों 4:20  
कुलुसियों 1:26  
1 तीमुथियुस 1:17  
1 तीमुथियुस 6:17  
2 तीमुथियुस 4:10  
2 तीमुथियुस 4:18  
तीतुस 2:12  
इब्रानिया 1:2  
इब्रानिया 1:8  
इब्रानिया 5:6  
इब्रानिया 6:5  
इब्रानिया 6:20  
इब्रानिया 7:17  
इब्रानिया 7:21  
इब्रानिया 7:24  
इब्रानिया 7:28  
इब्रानिया 9:26  
इब्रानिया 11:3  
इब्रानिया 13:8  
इब्रानिया 13:21  
1 पतरस 1:23

1 पतरस 1:25  
1 पतरस 4:11  
1 पतरस 5:11  
2 पतरस 3:18  
1 यहून्ना 2:17  
2 यहून्ना 1:2  
यहूदा 1:13  
यहूदा 1:25  
प्रकाशितवाक्य 1:6  
प्रकाशितवाक्य 1:18  
प्रकाशितवाक्य 4:9  
प्रकाशितवाक्य 4:10  
प्रकाशितवाक्य 5:13  
प्रकाशितवाक्य 7:12  
प्रकाशितवाक्य 10:6  
प्रकाशितवाक्य 11:15  
प्रकाशितवाक्य 14:11  
प्रकाशितवाक्य 15:7  
प्रकाशितवाक्य 19:3  
प्रकाशितवाक्य 20:10  
प्रकाशितवाक्य 22:5

## **aiōnios**

मती 18:8  
मती 19:16  
मती 19:29  
मती 25:41  
मती 25:46  
मरकुस 3:29  
मरकुस 10:17  
मरकुस 10:30  
लूका 10:25  
लूका 16:9  
लूका 18:18  
लूका 18:30  
यहून्ना 3:15  
यहून्ना 3:16  
यहून्ना 3:36  
यहून्ना 4:14  
यहून्ना 4:36  
यहून्ना 5:24  
यहून्ना 5:39  
यहून्ना 6:27  
यहून्ना 6:40  
यहून्ना 6:47  
यहून्ना 6:54  
यहून्ना 6:68

यहन्ना 10:28  
यहन्ना 12:25  
यहन्ना 12:50  
यहन्ना 17:2  
यहन्ना 17:3  
प्रेरितां दे कम्म 13:46  
प्रेरितां दे कम्म 13:48  
रोमियो 2:7  
रोमियो 5:21  
रोमियो 6:22  
रोमियो 6:23  
रोमियो 16:25  
रोमियो 16:26  
2 कुरिन्थियों 4:17  
2 कुरिन्थियों 4:18  
2 कुरिन्थियों 5:1  
गलातियों 6:8  
2 थिस्सलुनीकियों 1:9  
2 थिस्सलुनीकियों 2:16  
1 तीमुथियुस 1:16  
1 तीमुथियुस 6:12  
1 तीमुथियुस 6:16  
2 तीमुथियुस 1:9  
2 तीमुथियुस 2:10  
तीतुस 1:2  
तीतुस 3:7  
फिलेमोन 1:15  
इब्रानिया 5:9  
इब्रानिया 6:2  
इब्रानिया 9:12  
इब्रानिया 9:14  
इब्रानिया 9:15  
इब्रानिया 13:20  
1 पतरस 5:10  
2 पतरस 1:11  
1 यहन्ना 1:2  
1 यहन्ना 2:25  
1 यहन्ना 3:15  
1 यहन्ना 5:11  
1 यहन्ना 5:13  
1 यहन्ना 5:20  
यहदा 1:7  
यहदा 1:21  
प्रकाशितवाक्य 14:6

## **eleēsē**

रोमियो 11:32

## **Geenna**

मती 5:22  
मती 5:29  
मती 5:30  
मती 10:28  
मती 18:9  
मती 23:15  
मती 23:33  
मरकुस 9:43

मरकुस 9:45  
मरकुस 9:47  
लका 12:5  
याकूब 3:6

## **Hadēs**

मती 11:23  
मती 16:18  
लका 10:15  
लका 16:23  
प्रेरितां दे कम्म 2:27  
प्रेरितां दे कम्म 2:31  
1 कुरिन्थियों 15:55  
प्रकाशितवाक्य 1:18  
प्रकाशितवाक्य 6:8  
प्रकाशितवाक्य 20:13  
प्रकाशितवाक्य 20:14

## **Limnē Pyr**

प्रकाशितवाक्य 19:20  
प्रकाशितवाक्य 20:10  
प्रकाशितवाक्य 20:14  
प्रकाशितवाक्य 20:15  
प्रकाशितवाक्य 21:8

## **Sheol**

Genesis 37:35  
Genesis 42:38  
Genesis 44:29  
Genesis 44:31  
Numbers 16:30  
Numbers 16:33  
Deuteronomy 32:22  
1 Samuel 2:6  
2 Samuel 22:6  
1 Kings 2:6  
1 Kings 2:9  
Job 7:9  
Job 11:8  
Job 14:13  
Job 17:13  
Job 17:16  
Job 21:13  
Job 24:19  
Job 26:6  
Psalms 6:5  
Psalms 9:17  
Psalms 16:10  
Psalms 18:5  
Psalms 30:3  
Psalms 31:17  
Psalms 49:14  
Psalms 49:15  
Psalms 55:15  
Psalms 86:13  
Psalms 88:3  
Psalms 89:48


Psalms 116:3  
Psalms 139:8  
Psalms 141:7  
Proverbs 1:12  
Proverbs 5:5  
Proverbs 7:27  
Proverbs 9:18  
Proverbs 15:11  
Proverbs 15:24  
Proverbs 23:14  
Proverbs 27:20  
Proverbs 30:16  
Ecclesiastes 9:10  
Song of Solomon 8:6  
Isaiah 5:14  
Isaiah 7:11  
Isaiah 14:9  
Isaiah 14:11  
Isaiah 14:15  
Isaiah 28:15  
Isaiah 28:18  
Isaiah 38:10  
Isaiah 38:18  
Isaiah 57:9  
Ezekiel 31:15  
Ezekiel 31:16  
Ezekiel 31:17  
Ezekiel 32:21  
Ezekiel 32:27  
Hosea 13:14  
Amos 9:2  
Jonah 2:2  
Habakkuk 2:5

## **Tartaroō**

2 पतरस 2:4

## **Questioned**

None yet noted




भरोसे दिया बजा ला ही अब्राहम नाए दे माणुए जो परमेश्वरे इक ऐसी जगा च जाणे ताई सदया जिसा जगा जो परमेश्वर बादे च उसयो विरासत च देणेबाला था। कने सै ऐ नी जाणदा था की कुथयो चलया है, पर फिर भी परमेश्वरे दा हुकम मन्नी करी सै उस देशे जो चली गया। - इब्रानिया 11:8

# Israel's Exodus




*"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17*



मैं ऐ इस ताई बोलदा है क्योंकि मैं, माणुंरे दा पुत्र, इस संसारे च सारायां दी सेबा करणे ताई आया हूँ, मैं इस ताई नी आया कि लोकां ला अपणी सेबा करां।  
मैं तां लोकां जो पापां ला छुटकारा करणे ताई अपणे प्राण कीमत च देण आया है। - मत्कुस 10:45





ऐ चिट्ठी पौलस दिया तरफा ला है, जडा प्रभु यीशु मसीह दा सेवक है, कने परमेस्वरे उसयो प्रेरित होणे ताई चुणया है, कने परमेस्वरे दा शुभसमाचार दा प्रचार करणे ताई नियुक्त कितया है। - रोमियो 1:1

## Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

**Jesus Christ born 4 B.C.**

## New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1614	Japanese kill 40,000 Christians
1572	Jesuits reach Mexico
1517	Martin Luther leads Reformation
1455	Gutenberg prints first Bible
1323	Franciscans reach Sumatra
1276	Ramon Llull trains missionaries
1100	Crusades tarnish the church
1054	The Great Schism
997	Adalbert martyrd in Prussia
864	Bulgarian Prince Boris converts
716	Boniface reaches Germany
635	Alopen reaches China
569	Longinus reaches Alodia / Sudan
432	Saint Patrick reaches Ireland
397	Carthage ratifies Bible Canon
341	Ulfilas reaches Goth / Romania
325	Niceae proclaims God is Trinity
250	Denis reaches Paris, France
197	Tertullian writes Christian literature
70	Titus destroys the Jewish Temple
61	Paul imprisoned in Rome, Italy
52	Thomas reaches Malabar, India
39	Peter reaches Gentile Cornelius
33	Holy Spirit empowers the Church

(Wikipedia, Timeline of Christian missions)

**Resurrected 33 A.D.**

<b>What are we?</b> ▶			Genesis 1:26 - 2:3		Mankind is created in God's image, male and female He created us				
<b>How are we sinful?</b> ▶			Romans 5:12-19		Sin entered the world through Adam and then death through sin				
<b>Where are we?</b> ▶			<b>When are we?</b> ▼						
			Innocence		Fallen			Glory	
▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light		
Son	God's perfect fellowship	John 8:58 Pre-incarnate		John 1:14 Incarnate	Luke 23:43 Paradise				
Holy Spirit		Psalm 139:7 Everywhere		John 14:17 Living in believers					
Mankind	Living	Genesis 1:1 No Creation No people	Genesis 1:31 No Fall No unholy Angels	Ephesians 2:1-5 Serving the Savior or Satan on Earth			Matthew 25:41 Revelation 20:10  Lake of Fire prepared for the Devil and his Angels		
	Deceased believing			Luke 16:22 Blessed in Paradise					
	Deceased unbelieving			Luke 16:23, Revelation 20:5,13 Punished in Hades until the final judgment					
Angels	Holy	Genesis 1:1 No Creation No people	Genesis 1:31 No Fall No unholy Angels	Hebrews 1:14 Serving mankind at God's command			Revelation 20:13 Thalaasa  Revelation 19:20 Lake of Fire  Revelation 20:2 Abbyss		
	Imprisoned			2 Peter 2:4, Jude 6 Imprisoned in Tartarus					
	Fugitive			1 Peter 5:8, Revelation 12:10					
	First Beast			Rebelling against Christ Accusing mankind					
	False Prophet								
	Satan								
<b>Who are we?</b> ▶			Romans 11:25-36, Ephesian 2:7		For God has bound all over to disobedience in order to show mercy to all				
<b>Why are we?</b> ▶			Romans 11:25-36, Ephesian 2:7		For God has bound all over to disobedience in order to show mercy to all				

# Destiny

भटियाली at [AionianBible.org/Destiny](http://AionianBible.org/Destiny)

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



इस ताईं तुसां जाईं करी सारियां जातियां दे लोकां जो चले बणा; कने उना जो पिता, पुत्र, कने पबित्र आत्मा दे नाएे ने बपतिस्मा दीया। - मत्ती 28:19